

Xti'idza' Diuzi



New Testament in Zapotec, Choapan (MX:zpc:Zapotec, Choapan)

Xti'idza' Diuzi

New Testament in Zapotec, Choapan (MX:zpc:Zapotec, Choapan)

copyright © 1986 Wycliffe Bible Translators, Inc.

Language: Zapotec, Choapan

Translation by: Wycliffe Bible Translators, Inc.

Zapoteco, Choapan [zpc], Mexico

Copyright Information

© 1986, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Choapan

© 1986, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files dated 29 Jan 2022
f44721e8-d767-55bd-8bcb-f1eb4965c7c2

Contents

| | |
|----------------------------|-----|
| San Mateo | 1 |
| San Marcos | 43 |
| San Lucas | 71 |
| San Juan | 117 |
| Hechos | 151 |
| Romanos | 193 |
| 1 Corintios | 211 |
| 2 Corintios | 227 |
| Gálatas | 238 |
| Efesios | 244 |
| Filipenses | 250 |
| Colosenses | 254 |
| 1 Tesalonicenses | 258 |
| 2 Tesalonicenses | 262 |
| 1 Timoteo | 264 |
| 2 Timoteo | 269 |
| Tito | 272 |
| Filemón | 274 |
| Hebreos | 275 |
| Santiago | 289 |
| 1 Pedro | 294 |
| 2 Pedro | 299 |
| 1 Juan | 302 |
| 2 Juan | 306 |
| 3 Juan | 307 |
| Judas | 308 |
| Apocalipsis | 310 |

DI'IDZA' LA'IYA BZU SAN MATEO LĒ'Ē GUICHI

*Ni mñen quie xuzixta'o Jesucristo
(Lc. 3.23-38)*

¹ Ni rguixogue'n quie ja xuzixta'o Jesucristo. Naca Abraham len rey David xuzixta'o Jesucristo. ² Abraham guquë' xuzi Isaac, na' Isaac guquë' xuzi Jacob, na' Jacob guquë' xuzi Judá len ja bichinë'. ³ Na' Judá guquë' xuzi Fares len Zara, na' lao zna'jè' Tamar. Na' Fares guquë' xuzi Esrom, na' Esrom guquë' xuzi Aram. ⁴ Na' Aram guquë' xuzi Aminadab, na' Aminadab guquë' xuzi Naasón, na' Naasón guquë' xuzi Jeconías len ja bichinë' tiempo cati unita' ben' Booz, na' lao zna'nè' Rahab. Na' Booz guquë' xuzi Obed, na' lao zna'nè' Rut. Na' Obed guquë' xuzi Isaí. ⁶ Na' Isaí guquë' xuzi rey David, na' rey David lènè' žgula Uriás gucajè' xuzi zna' Salomón.

⁷ Na' Salomón guquë' xuzi Roboam, na' Roboam guquë' xuzi Abías, na' Abías guquë' xuzi Asa. ⁸ Na' Asa guquë' xuzi Josafat, na' Josafat guquë' xuzi Joram, na' Joram guquë' xuzi Uzias. ⁹ Na' Uzias guquë' xuzi Jotam, na' Jotam guquë' xuzi Acaz, na' Acaz guquë' xuzi Ezequías. ¹⁰ Na' Ezequías guquë' xuzi Manasés, na' Manasés guquë' xuzi Amón, na' Amón guquë' xuzi Josías. ¹¹ Na' Josías guquë' xuzi Jeconías len ja bichinë' tiempo cati unita' ben' Babilonia cati yahua'ajè' preso ben' Israel lao yedyi quiejè'.

¹² Te beyudyi na', Jeconías guquë' xuzi Salatiel, na' Salatiel guquë' xuzi Zorobabel. ¹³ Na' Zorobabel guquë' xuzi Abiud, na' Abiud guquë' xuzi Eliaquim, na' Eliaquim guquë' xuzi Azor. ¹⁴ Na' Azor guquë' xuzi Sadoc, na' Sadoc guquë' xuzi Aquim, na' Aquim guquë' xuzi Eliud. ¹⁵ Na' Eliud guquë' xuzi Eleazar, na' Eleazar guquë' xuzi Matán, na' Matán guquë' xuzi Jacob. ¹⁶ Na' Jacob guquë' xuzi José, ben' quie María, na' María guquë' zna' Jesús, ben' naca Cristo.

¹⁷ Lao tiempo uzu Abraham hasta bdyinnan tiempo uzu rey David, udaohue chida' tiempo unita'jè'. Lëscan' lao tiempo uzu rey David hasta bdyinnan tiempo yehua'a ben' Babilonia ben' Israel preso yedyi quiejè', udaohue itu chida' tiempo unita'jè'. Lëscan' lao tiempo yehua'a ben' Babilonia ben' Israel preso yedyi quiejè' hasta bdyinnan tiempo golo Cristo, udaohue itu cue' chida' tiempo unita'jè'.

*Ni mñen cati golo Jesucristo
(Lc. 2.1-7)*

¹⁸ Caora cati golo Jesucristo guca caniga: Zna'nè' María napè' compromiso utzagana'lènè' José. Pero antes binesi' laguedyijè' sujè' tuze, caora na' gucabè' José banu'a María xcuidi'. Pero por nun quie Bichi Be quie Diuzi nu'anè' xcuidi'. ¹⁹ José naquè' ben' huen bire'ennè' gaohuè' María xquia lao yedyi. Re'ennè' usannè' lenè' sin que inezi ja benè'. ²⁰ Tu racanè' pensari bi huenè', cati ptilalao tu ángel quie Diuzi lenè' lao bichi gala quiè'. Na'ra una ángel rëbinè' lëbè':

—José, ži'i suba David luè', bidzebo' siu' María gacanè' žgulo', porque nun quie Bichi Be quie Diuzi banu'anè' xcuidi'. ²¹ Lëbè' su tu ži'inè', na' huelo' laobi' JESUS. Cana' huelo' laobi' porque ži'inè' ute uselabi' dula' xquia quie ben' yedyi quiebi'.

²² Yugulu cabè' guca na', bzunan di'idza' quie Diuzi cabè' una Diuzi lao na'a tu ben' udixogue' xti'idza'nè' tiempote. Cani unè' dza na':

²³ Huazu tu nigula cuidi', ben' binesulè be'mbyu, hua'anè' tu ži'inè'. Na' si' laobi' Emanuel.

Ta inaro xti'idza'ro: Zëlè Diuzi ra'o.

²⁴ Cati udëlebè José lao bichi gala quienè', bënë' cabè' gudyi ángel quie Diuzi lëbè'. Aozì'nè' María para žgulanè'. ²⁵ Pero biuzulënè' lëbè' cabè' rzulè ja benè' žgulajè' hasta que golo ži'inè' nëro. Na' bënë' lao ži'inè' JESUS.

2

Uyo ben' psëdi quie bélo yena'jè' Jesús

¹ Cati golo Jesús lao yedyi Belén ga nebaba Judea, caora na' uzu tu ben' lao Herodes naquè' rey. Na'ra bdyin ja ben' za' zaca' ga rlè obidza, bdyinjè' ciudad Jerusalén. Nacajè' ben' psëdi quie bélo. ² Na'ra unabajè':

—¿Gaži zu rey quie ben' Israel, ben' zagolo? Nita'ndo' zaca' ga rlè obidza blè'endo' bélo ta naca seña golobi'. Quie lena' za'ndo' ta gapala'nndo'bi'.

³ Cati unezi rey Herodes cabè' unayaquè', lega ptëbi pensari quienè' lëbè'. Lëscan' yugulu ja ben' ciudad Jerusalén, lega ptëbi pensari quiejè' lëjè'. ⁴ Na'ra guži rey Herodes yugulu ja xan' pxuzi len ja ben' rusèdi ja ley rnao ben' Israel. Na' unabané' rëbinè' lëjè':

—¿Gan' galo ben' naca Cristo?

⁵ Na' ra unajë' rëbjjë' lëbë':

—Galoguë' yedyi Belén ga nebaba Judea, porque cani rnën lë'ë guichi bë profeta dza na'te:

⁶ Le'e ben' yedyi Belén quie yu nebaba Judá, ba'ala'cazi naca yedyi quiele yedyi dao', hualo ladole tu ben' inabë'ra, ben' inabë' ben' Israel, ben' quie Diuzi.

Cana' rnën lë'ë guichi.

⁷ Na'ra balarazi guzi rey Herodes yaca ben' psëdi quie bélo. Unabanë' lëjë' dyë'ëdi bi tiempo golo bélo. ⁸ Na' use'ela'në' lëjë' Belén rëbinë' lëjë':

—Uletzio Belén inabale dyë'ëdi bi raca quie xcuidi'. Cati babedzelelebi' nadetixogue'le në'ëdi' tacuenda guidaria' gapala'na'bi'. —Cana' unanë' rëbinë' lëjë'.

⁹ Te beyudyi una rey Herodes gudyijë' lëjë' cana', na'ra zio ben' psëdi quie bélo. Na'ra lëbélo blë'ëjë' caora nita'jë' zaca' ga rlë obidza, udyialaona laojë' hasta que bdyinnan laohue ga zu xcuidi'. ¹⁰ Cati blë'ëjë' ga bdyin bélo, lega bedaohuetzeguejë'. ¹¹ Caora uyu'ujë' lu'yu'yu'u, blë'ëjë' xcuidi' lëbi' zna'bi' Maria. Na'ra uditzuzibijë' udapala'një' bdao' na'. Na'ra laosalotejë' caja quiejë' nu'ajë', bë'jë'bi' regalo ta nu'ajë', bë'jë'bi' oro len yalo len ja aceite zio. ¹² Beyudyi na', guca tu chopa dza nita'jë' na' cati uxusajë' de que bireya'ala' yeyojë' gan' uza'jë', gan' re' rey Herodes. Quie lena' uzi'jë' neza tula zeyojë' yedyi quiejë'.

Bzuno José lënë' familia quienë' yedyi tula

¹³ Ude beyudyi beza' ja ben' psëdi quie bélo yena'jë' xcuidi', na'ra uxusa José blë'ënë' tu ángel quie Diuzi rëbinë' lëbë':

—Uyasabachi' udë'ëla' bdao' na' len zna'bi'. Uzunolëlo'bi' tziola'obi' yu nebaba Egipto. Na' yega'nla'obi' hasta que inia' luë' gala tzio', porque rey Herodes hueguiloguë'bi' ta gutië'bi'.

¹⁴ Na'ra udëlebë José, uyananë', uzi'në' xcuidi' len zna'bi' lao rëla ziojë' yu nebaba Egipto.

¹⁵ Na'zi bega'një' ulezajë' uzujë' hasta que bdyin hora guti rey Herodes. Cana' guca tacuenda bzu di'idza' quie Diuzi cabë' gudyinë' profeta rëbinë' lëbë' cani: “Yu nebaba Egipto babeyëza' zi'ina' yerobi'.”

Na'ra bë rey Herodes mandado gati ja xcuidi'

¹⁶ Cati gucabë' rey Herodes uzi' ja yë' ben' psëdi quie bélo, na'ra bdza'në', bënë' mandado gati ja xcuidi' de chopa iza huio para žanle, bi' necua' Belén len ja bi' necua' yedyi rega'n ga'ala'. Cana' bënë' mandado segün cabë' tiempo una ja ben' psëdi quie bélo gudyijë' lënë'.

¹⁷ Cana' bzu di'idza' quie profeta Jeremías caora unë':

¹⁸ Yero tu rchi' ja ben' yedyi Ramá, rbedyijë' rnaya'jë'.

Na' rbedyi ja nigula quie ja ben' Israel por nun quie ži'ijë'.

Bireudyicazi cuedyijë' ta yezujë' gusto dan' aguti ži'ijë'.

¹⁹ Pero bë' beyudyi guti rey Herodes, caora na' ptilalao tu ángel quie Diuzi lao bichi gala quie José ga zunë' yedyi nebaba Egipto. Na'ra gudyinë' lëbë':

²⁰ —Uyasa, uzi'lë xcuidi' len zna'bi'. Uleyozi lao yedyi nebaba Israel, porque aguti yaca ben' re'en guti xcuidi'.

²¹ Na'ra uyasa José uzi'në' xcuidi' len zna'bi', ziolënë' lëbi' lao yedyi ga nebaba Israel. ²² Pero cati unezi José rnabë' Arquelao lao laza xuzinë' Herodes, na'ra bdzebinë' yeyonë' na'. Bdzebinë' como dan' aoxusanë' ta bitzionë' estado Judea. Quie lena' zionë' estado Galilea. ²³ Caora bdyinnë' na', na'ra zionë' tzesunë' yedyi Nazaret. Cana'ra bzu di'idza' quie ja profeta ca unajë' de quie ina ja benë' naca Jesús ben' yedyi Nazaret.

3

Udixogue' Juan bautista xti'idza' Diuzi lao lato dachi ga bidyia yu'u

(Mr. 1.1-8; Lc. 3.1-9, 15-17; Jn. 1.19-28)

¹ Na'ra uyo Juan bautista yu nebaba Judea ga naca lato dachi. Uyonë' yetixogue'në' ja benë' xti'idza' Diuzi. ² Na'ra në' rëbinë' lëjë':

—Reya'ala' utza'le pensari quiele usanle ca tamala ruele, porque baruen bago dza inabë' Diuzi lao yedyi layu.

³ Quie Juan unë profeta Isaías caora unë':

Huazu ben' na' lao lato dachi ga bidyia yu'u.

Huanë' zidzo rëbinë' laguedyinë' caniga:

“Huele hueluba neza quiele cuenda huida ben' naca xa'nro, usalole tu neza li.”

⁴ Guco Juan la'ari' de guitza' quie žaba camello. Na' tu cincho guidi bdze'në' lë'ënë'. Udaonë' bëchi'zu, hue'enë' bdyin'dao' quie bezu cera ta rdzela guixi' dao'. ⁵ Na' rio ja ben' Jerusalén rena'jë' ruzë'nagajë' quienë'. Lëzi rio ja ben' yedyi nebaba Judea len ja ben' nita'

ga'ala' ga de yao Jordán. ⁶ Caora na' cati uxubaləpijə' dula' xquia quiejə', na'ra bə' Juan laojə' lu'u yao Jordán.

⁷ Cati blə'ə Juan bdyin ja ben' partido fariseo len ja ben' partido saduceo za'jə' gan' ru'e Juan lao ja benə', na'ra nē' rəbinə' ləjə':

—[Ca bəla rgui'idiy' benə' nacale! ¿Nuži udixogue' le'e ta te ilale cabə' castigo quie Diuzi baza' ga'ala'zi? ⁸ Ulehue dya'a ta ulu'en nacan li aotza' pensari quiele, aruele quie Diuzi. ⁹ Bihuele pensari bihue Diuzi le'e castigo por nun quie nacale ži'i suba Abraham. Porque rnia' le'e hasta yo huaca hue Diuzi ben' gaca ži'i Abraham. ¹⁰ Ca quie yebandyo baden listo para ichugon yaga ta birbia tazixi ta tzeina, cana' nacarən quiele. Chi bihue quiele xti'idza' Diuzi ca rnənə', huata' castigo quiele tziolo lao gui' gabila. ¹¹ Nə'ədi' tali ru'a lao benə' conlə nisa yela' gacajə' seña de que aotza' pensari quiejə' aruejə' quie Diuzi. Pero baza' tu ben' zaza'ra zenao nə'ədi'. Ləbə' udze'nə' Bichi Be quie Diuzi lu'u guicho laxta'o ja ben' rale quienə'. Ləzi huenə' mandado tzei yaca ben' birale quienə' lao gui' gabila. Nacarə' ben' že ca nə'ədi'. Tanto nacarə' ben' že ca nə'ədi', ni siquiera biyeyažoga' cuioğa' gaudi yu'u ni'anə'. ¹² Bazənə' becue' ta ucha'anə' trigo len bəbi quien. Na'ra yezi'chi'nə' trigo lu'u lidyin. Yeyudyin na' uzeinə' bəbi quien lao gui' ta biyeyulacazi.

Bə' Juan lao Jesús

(Mr. 1.9-11; Lc. 3.21-22)

¹³ Na'ra uza' Jesús yu nebaba Galilea bdyinnə' ga de yao Jordán ga zu Juan cuenda hue' Juan laonə' ləbə'. ¹⁴ Na' bigu'un Juan hue'nə' lao Jesús. Lena' unə' gudyinə' Jesús:

—Luə'la reya'ala' hue'lo' laohua'. ¿Na' como bazao' niga ta hua' laolo'?

¹⁵ Na'ra una Jesús rəbə' Juan:

—Reya'ala'cazi hue'lo' laohua', porque cana' re'ennan huero ta uzuro duže cabə' una Diuzi.

Na'ra guca Juan de acuerdo, bə'nə' lao Jesús. ¹⁶ Na'ra beyudyi bə' Juan lao Jesús, bero Jesús lu'u nisa. Caora na' laoyalote guibá blə'ə Jesús uyəzi Bichi Be quie Diuzi ca quie ga rəzi paloma. Bdyinnə' ga zə Jesús. ¹⁷ Na'ra unə' Diuzi ga zuə' guibá unə':

—Ləzi'ina' ni, nedyə'əda'bi'. Redaohueda' zua' gusto conlə ləbi'.

4

Gu'un xan' taxi'ibi' iquixi Jesús huenə' tamala

(Mr. 1.12-13; Lc. 4.1-13)

¹ Na'ra guca dza uquiə' Bichi Be quie Diuzi Jesús lao lato dachi ga bidyia yu'u. Na' lao lato na' bdyinrə xan' taxi'ibi' gu'unna iquixi Jesús huenə' tamala.

² Ləgan' na' bega'n Jesús chopa galo dza len chopa galo yela, biudaohuə'. Bə' guca lao chopa galo dza, na' uduenə'. ³ Na'ra ubiga' xan' taxi'ibi' gan' zə Jesús rəbina lənə':

—Chi naco' ži'i Diuzi, bə' mandado iyaca yo niga yəta xtila.

⁴ Na'ra una Jesús rəbinə' taxi'ibi':

—Lə'ə guichi la'iya quie Diuzi nan ca niga: “Quele tuzi yela' huao gaoro yezi'ro fuerza, den' ləscan' ruen dyaibə' hue quiero ca na Diuzi ta yezi'ro fuerza.”

⁵ Na'ra uquiə' taxi'ibi' Jesús lao yedyi la'iya Jerusalén. Na'ra pčuəna lənə' guicho idao' rnabə'ra. ⁶ Na' rəbinan lənə':

—Chi tali naco' ži'i Diuzi, uquino cuinlo' guicho idao'. Bibi ži' gaquelo', como dan' na guichi la'iya quie Diuzi ca niga:

Ise'ela' Diuzi yaca ángel quienə' ta gapajə' luə'.

Huidajə' idehuia ina'jə' luə' cuenda ni lə'əti' bigaco' ži' chan' na' ga re' yo.

⁷ Na'ra una Jesús gudyinə' xan' taxi'ibi':

—Ləzi narə' lə'ə guichi la'iya quie Diuzi: “Bihuenəle Diuzi bizinaquezi chi uzunə' di'idza' cabə' unə', chi biuzunə' di'idza' cabə' unə'.”

⁸ Tatula uquiə'cazi taxi'ibi' lənə' lao ya'a sibi gula. Blu'enan lənə' dužete yedyi de lao yedyi layu. Blu'enan lənə' cabə' naca yela' že quien. ⁹ Na'ra una xan' taxi'ibi' rəbin lənə':

—Dužeten guna' quio' chi quitzo' žibo' tziionla'adyo' nə'ədi'.

¹⁰ Cana'ra una Jesús rəbinə' lənan:

—Beyo, Satanás, porque lə'ə guichi la'iya quie Diuzi nan caniga: “Tziionla'adyi'ro tuzi Diuzi quiero. Tuzi ləbə' huero ca mandado ruenə' quiero.”

¹¹ Na'ra zeyo taxi'ibi' gan' zə Jesús. Na' laza'te ja ángel, gualəjə' ləbə' ta yezi'nə' fuerza.

Uzulao Jesús ruenə' dyin quie Diuzi estado Galilea

(Mr. 1.14-15; Lc. 4.14-15)

¹² Cati unezi Jesús de Juan lu'u dyiguiba, bebə'nə' zeyoguə' yu nebaba Galilea. ¹³ Pero bibega'nnə' yedyi Nazaret, uyoguə' yesunə' yedyi lao Capernaum ga re' ru'a lagun ga naca

beza' quie yu nebaba Zabulón len yu nebaba Neftalí. ¹⁴ Cana' guca ta bzu di'idza' quie Diuzi bzu profeta Isaías lè'è guichi tiempote. Cani rnèn:

¹⁵ Lao yu nebaba Zabulón len yu nebaba Neftalí, ga de neza zion ru'a lagun itzala' yao Jordán, ga re' yu nebaba Galilea, lao yu na' nita' ben' binaca ben' Israel.

¹⁶ Lèja ben' na' rdajè' lao lato lao chula, pero aose'ela' Diuzi ben' gacalè lèjè' cabè' racalè xni' gui' lèjè' ta ilè'èjè' ga naca chula.

Lèja ben' na' rdajè' lao lato lao chula, pero use'ela' Diuzi ben' gacalè lèjè' cabè' racalè xni' gui' lèjè' ta ilè'èjè' ga naca chula.

¹⁷ Caora na' uzulao Jesús udixogue'nè' benè' xti'idza' Diuzi unè':

—Reya'ala' utza'le pensari quiele, porque baruen bago dza inabè' Diuzi lao yedyi layu.

Blidza Jesús tapa ben' rze bela

(Mr. 1.16-20; Lc. 5.1-11)

¹⁸ Zio Jesús yu'unè' neza zaca' ru'a lagun Galilea. Na' blè'ènè' chopa ben' rze bela. Tunè' laonè' Simón, ben' laorè Pedro. Na' itunè' laonè' Andrés. Naca Andrés bichi Simón. Na' yu'ujè' rulètojè' yèxo lu'u nisa. ¹⁹ Na'ra una Jesús gudiyinè' leyaquè':

—Ulenao nè'èdi'. Cabè' ruele cuiole bela yu'u lu'u nisa, cana' ulu'ena' le'e cuiole ben' nao xneza Diuzi.

²⁰ Laohue na'tezi lapsantejè' yèxo quiejè' ziolèjè' Jesús.

²¹ Lè'èti'zi ude Jesús zioquè' mazara cati blè'ènè' ichopa ja benè' naca bichè'. Tunè' laonè' Santiago, itunè' laonè' Juan. Nacayaquè' zi'i Zebedeo. Yu'ujè' lao barco len xuzijè' ruda'jè' yèxo quiejè'. Na'ra blidza Jesús lèjè' ta unaojè' lèbè'. ²² Na'ra lapsanrètejè' barco len xuzijè' ziolèjè' Jesús.

Bzioñe'e Jesús ben' zè

(Lc. 6.17-19)

²³ Zio Jesús yugulu yedyi nebaba Galilea. Ruzioñe'enè' benè' lu'u idao' quiejè' laonan sinagoga tu tu yedyi ga rdenè'. Udixogue' Jesús ca naca tahuen quie xti'idza' Diuzi baruen bagozi dza inabè' Diuzi yedyi layu. Lèscan' beyue Jesús yugulu cue' yela' hue' yu'u ja benè'. ²⁴ Nezijè' quie Jesús yugulu ben' nita' yedyi nebaba Siria. Na' uquiè'jè' yaca ben' redzagalaoja bitezi yela' hue', len ben' yu'u ja taxi'ibi', len ben' raca zuguti, len ben' nazi. Na'ra beyue Jesús lèjè'. ²⁵ Zè ja ben' unao Jesús. Unao ben' yedyi nebaba Galilea, len ben' yedyi nebaba Decápolis, len ben' ciudad Jerusalén, len ben' yedyi nebaba Judea, len ben' nita' yedyi re' itzala' yao Jordán. Tu cana' ja yedyi udaojè' lènè'.

5

Zu Jesús tu lao ya'a ruzioñe'enè' benè'

¹ Cati blè'è Jesús babegu'udi' ben' zè, na'ra urènè' tu lao ya'a ure'nè'. Na'ra beyècho ja ben' quienè' lènè'. ² Cana' uzulao Jesús ruzioñe'enè' lèjè'.

Ni rnèn quie nu ja ben' huaca huen quie lao Diuzi

(Lc. 6.20-23)

Na' una Jesús:

³ —Yedaohue nu yaca ben' raca yèchi' ca naca dula' xquia quie, dan' naque quiejè' ga rnabè' Diuzi. ⁴ Yedaohue nu yaca ben' raque bayèchi' quie dula' xquia ta raca lao yedyi layu, dan' yeyuežela'adyi' Diuzi lèjè'.

⁵ Yedaohue nu yaca ben' gaxo, dan' gaque quieyaquè' layu gan' una Diuzi hue'nè' lèjè'.

⁶ Yedaohue nu yaca ben' re'en inao xneza Diuzi cabè' re'en gao yo'o nu ben' rdue rbili, dan' Diuzicazi gacalènè' lèjè' ta inaoyaquè' xnezè'.

⁷ Yedaohue nu yaca ben' reyèchi'la'adyi' ben' tula, dan' yeyèchi'la'adyi' Diuzi lèjè'.

⁸ Yedaohue nu yaca ben' anaca yèri laxta'ohue, dan' hualè'èyaquè' Diuzi.

⁹ Yedaohue nu yaca ben' rue dyiabè' cue' chizi laxta'o benè', dan' huèbi Diuzi leyaquè': "Zi'ina' le'e."

¹⁰ Yedaohue nu yaca ben' racatzegue tamala quie por nun quie ruejè' ca re'en Diuzi, dan' naque quiejè' ga rnabè' Diuzi.

¹¹ Yedaohue le'e cati inaya' benè' le'e huenèjè' le'e bizinaquezi, si'jè' le'e yè', inèjè' quiele por nun quie naole xneza'. ¹² Yedaohuele sule gusto como dan' huata' tu tahuen gula quiele gun Diuzi le'e guibá. Yaca ben' profeta, ben' use'ela'Diuzi, bizinaquezi psaca'rè ja benè' lèjè' dza tiempote tu binenita'le.

Ca quie zedi', ca quie gui', naca ben' nao xneza Jesús

(Mr. 9.50; Lc. 14.34-35)

Na' una Jesús:

¹³ —Ca quie nu zedi' naca quiele. Pero chan' na' abeyula zedi', çbizi huero ta huen dyin tatula? Bira gue'ennan huenan dyin. Anacan zi ta chu'unron ta utzutzu ulio benë' len.

¹⁴ 'Ca quie nu gui' ta ilë'ë benë' ga naca chula, cana' naca quiele. Tu yedyi re' lao ya'a, bigaca igüi'onan ta biilë'ëron. ¹⁵ Nunu rusë gui' candil uzulen ta iseni'na lu'u cajón. Reya'ala' uzëron tu lu'u yu'u ga naca sibi cuenda ilë'ë ja yugulu ben' yu'u lu'u yu'u. ¹⁶ Cana' naca quiele, reya'ala' tale dyë'ëdi lao ja benë' tacuenda ilë'ëjê' ruele tadya'a ca re'en Diuzi huele. Cana' hua ja benë', huejê' ben' ze Xuziro Diuzi, ben' zu guibá.

Udixogue' Jesús cabë' naca lao ley

Na' una Jesús:

¹⁷ —Bigaquele chi za'a chu'una' ley quie Diuzi ta bënë'në' Moisés. Quele za'a chu'una' cabë' ta una ja profeta, dechan' za'a ta uzua' di'idza' cabë' bzujê' lë'ë guichi la'iya quie Diuzi. ¹⁸ Tali ca rnia' le'e, tu lala nede guibá len yedyi layu, ni lë'ëti' ta rna lao ley biten cana'zi. Uzu di'idza' quien yugulute ca rnan. ¹⁹ Quie lena' nu ben' birue bala ruzu di'idza' ca mandado rue lë'ë guichi la'iya quie Diuzi, lëscan' rusëdjê' ben' tula ta bihuejê' bala ca mandado ruen, nacajê' ben' latoquiëzi ga r nabë' Diuzi guibá. Pero nu ben' rue bala ruzu di'idza' ca mandado rue lë'ë guichi la'iya quie Diuzi, lëscan' rusëdjê' ben' tula ta huejê' bala ca mandado ruen, nacajê' ben' bala'ana ga r nabë' Diuzi guibá. ²⁰ Porque rnia' le'e, chi bihue quiele quie Diuzi dya'ara, quele cabë' rue ja ben' rusëdi ley quie Moisés len ja ben' partido fariseo, bisaque' yeyole ga r nabë' Diuzi guibá.

Una Jesús quie yela' rdza'

(Lc. 12.57-59)

Na' una Jesús:

²¹ —Banezile ca gudyi Moisés xuzixta'oro: “Bireya'ala' gutile benë'. Nutezi ben' ruti benë', reya'ala' ichugobë'le quië'.” ²² Pero në'ëdi' rnia' le'e, nutezi ben' idza' bichi laguedyi, huachugobë' Diuzi quië'. Lëscan' nutezi ben' inaya' bichi laguedyi, huarugobë' quië' ga reyudyi yela' r nabë'. Lëscan' nutezi benë' idza' bichi laguedyi yëbinë' lëjê': “Ben' raca loco luë'” zudyizi ruen quienë' tzionë' lao gui' gabila.

²³ 'Chi zio' nu'alo' gun quio' ru'aba lu'u idao', na' yeza'la'adyo' de ta de quie bichi laguedyo' conlë luë', ²⁴ na'ra pca'n gun quio' lao ru'aba na'zi, zatziolo' tzequë'zela'adyo' bichi laguedyo'. Na'tera yebi'lo' hue'lo' gun quio' lao ru'aba.

²⁵ 'Chi nu ben' rao xquia le'e, iquië'jê' le'e lao juzgado, tu nezirole tu neza, bënë' di'idza' bichi laguedyile, a ver nacala yega'nle yela' bitzirole lao juez. Porque si no, hue juez mandado policia quië', udze'jê' le'e lu'u dyiguiba. ²⁶ Di'idza' li rnia' le'e, biyerole lu'u dyiguiba hasta que udyiale dumi ca ta inaba juez le'e.

Una Jesús quie ben' rdalë nigula tula, ben' binaca zgule

Na' una Jesús:

²⁷ —Banezile cabë' una xuzixta'oro Moisés cana'te: “Bireya'ala' talële nigula tula.” ²⁸ Pero në'ëdi' rnia' le'e, nutezi ben' rebane ja nigula re'ennë' bi huenë' lënë' nigula, na' lu'u guicho laxta'ohuë' nacan ca quie bagusilëcazinë' lënë'.

²⁹ 'Pues ugunro chi tu laolo' yebë ruhua'n luë' dula' xquia, reya'ala' cuiolo'n chu'unlo'n zitu', como dan' dya'alan' initi tu laolo', quele ca ta tzio' duzetio' lao gui' gabila. ³⁰ Lëzi ugunro chi na'alo' yebë ruhua'n luë' dula' xquia, reya'ala' ichugo'n uru'unnan, como dan' dya'alan' initi tu na'alo' quele ca ta tzio duzetio' lao gui' gabila.

Una Jesús quie ben' rusan ja nigula quie

(Mt. 19.9; Mr. 10.11-12; Lc. 16.18)

Na' una Jesús:

³¹ —Lëscan' una xuzixta'oro Moisés dza na'te: “Nutezi ben' re'en usan nigula quie, reya'ala' ichisanë' guichi ga ru'en di'idza' bira re'ennë' sulënë' nigula. Reya'ala' hue'nënë' nigula quienë', na'tera huazaquë' usannë' nigula quienë'.” ³² Pero në'ëdi' rnia' le'e, chi nu ben' rnan zgulë, na' bezi' zgulë' be'mbyu tula, nacan xquia quie nigula na' lao Diuzi. Solamente chan' udalë zgulë' be'mbyu tula, cana'ra huazaque' usan be'mbyu na' zgulë'. Lëscan' nutezi ben' bezi' nigula psan xquiuhue, nacan xquia quienë' lao Diuzi.

Bireya'ala' ugunro Diuzi ca cuendazi

Na' una Jesús:

³³ —Lëscan' banezile ca una Moisés gudyi'në' xuzixta'oro: “Reya'ala' uzulo' di'idza' cabë' unao' huelo' bguntio' Diuzi.” ³⁴ Pero në'ëdi' rnia' le'e, bireya'ala' ugunle Diuzi ca cuendazi. Biugunle nu guibá, porque dan' ga re' Diuzi r nabë'në'. ³⁵ Cana'rë biugunrële nu yedyi layu, porque dan' ga ruzu ni'a Diuzi. Biugunrële ciudad Jerusalén, porque dan' ciudad quie Diuzi. ³⁶ Lëzi biugunrële guichole, porque quele huacale utza'le gacan bezëri gaso ni tu

guitza' guichole. ³⁷Tuzi iquëbile inale tali. Chi inëro ugunro Diuzi ca cuendazi, quie taxi'ibi' za'n dan' rnëro cana'.

Una Jesús quie ben'yeyue laohue quie laguedyijè'
(Lc. 6.29-30)

Na' una Jesús:

³⁸—Lëscan' banezile cabè' una xuzixta'oro Moisés dza na'te: "Chi nu ben' bdyiagui'nè' tu laolo', o tu leilo', o bi ta de quio', napa' derecho udyiagui'lo' tu laohuè', o tu leiyé', o bi ta de quiè' tacuenda iyaca laohue quiè'." ³⁹ Pero në'èdi' rnia' le'e: Biyeyuele laohue quie ja ben' rue mala quiele. Chi nu ben' aodapa xago', bè'le lato capè' itzala' xago'. ⁴⁰ Chi nu ben' hueja cuenda luè' lao ja ben' r nabè' ta si'nè' camisa quio', bè'rènè' len chamarra quio'. ⁴¹ Chi nu ben' ruegadyi luè' hua'alo' yua' quienè' tu legua, bi'alan chopa legua. ⁴² Chi nu ben' rnabayèchi' luè' bi cosa, bènè'n. Chi nu ben' rnaba presta bi ta de quio', bihuelo' zidi, bènè'n ta rnabè'.

Una Jesús quie yaca ben' rudie ra'o
(Lc. 6.27-28, 32-36)

Na' una Jesús:

⁴³—Lëscan' banezile ca una xuzixta'oro dza na'te: "Edyè'èle amigo quiele, udiele ben' rudie le'e." ⁴⁴ Pero në'èdi' rnia' le'e: Edyè'èlale ben' rudieja le'e. Inabale tahuen lao Diuzi quie ja ben' rudze'de' le'e. Huele dya'a quie ja ben' rudie le'e. Ulehue'lè Diuzi di'idza' inabale tahuen quie ja ben' rnaya' dilalè le'e. ⁴⁵ Cana' gacale dugalo zi'i Xuziro Diuzi zu guibá. Cana' rue Diuzi lènè' obidza quiè'. Useni'nan duzete yedyi layu ga nita' ja ben' mala len ja ben' huen. Na' rse'ela'rè' nisa yo quiè' lao ja benè', la'acazi ben' rue tadya'a, la'acazi ben' rue tamala. ⁴⁶ Chi rapachi'le tuzi ben' rapachi' le'e, biugunle rlè'è Diuzi le'e ben' laxta'o yèri por nun quie ruele cana'. Porque cana' ruerè hasta ben' malaja, ben' binao xneza Diuzi. ⁴⁷ Chi rda në'èle tuzi ja ben' nubè'zile, biugunle tadya'a gula ruele. Porque hasta ben' binuebè' Diuzi ruerèjè' cana'. ⁴⁸ Reya'ala' gacale ben' laxta'o yèri cabè' naca Xuziro Diuzi zu guibá ben' laxta'o yèri.

6

Bzioñe'e Jesús ra'o cabè' re'ennè' huero

¹ Na' una Jesús:

—Reya'ala' huele cabè' re'en Diuzi huele du guicho du la'adyi'le, pero bihuelen tacuendazi ta ilè'è benè' le'e nacale ben' huen. Chi huelen tacuendazi ta ilè'è benè' le'e nacale ben' huen, bigata' quiele ta gun Xuziro Diuzi le'e ga rnabè' guibá. ² Lena' cati gacalèle ben' rdziogue bi cosa, biulu'etele ladza inale cani bia' cabè' rue ja ben' rionla'adyi' Diuzi de ladzazi caora riojè' lu'u idao', caora rdajè' tu neza. Cana' ruejè' tacuenda inè benè' quiejè' dya'a. Pero tali ca rnia', tana'zi de babèjè' gan, bibira de hue' Diuzi lèjè' ga rnabè' guibá. ³ Pero le'e cati gacalèle ben' rdziogue bi cosa, biulu'etele ladza yela' binezi ja benè' chi bi ruele, ba'ala'cazi ben' naca bichile. ⁴ Dya'alan' gacalèle benè' balarazi. Na' Xuziro Diuzi rlè'ènè' cabè' tadya'a ruele balarazi, lènè' gunnè' quiele ga rnabè' guibá.

Bzioñe'e Jesús ra'o cabè' reya'ala' huero hue'lëro Diuzi di'idza'
(Lc. 11.2-4)

Na' una Jesús:

⁵—Cati hue'lèle Diuzi di'idza', bihuele ca rue ja ben' rionla'adyi' Diuzi de ladzazi. Lega raxejè' hue'lèjè' Diuzi di'idza' zètela lu'u idao'. Cana' ruejè' con ga ziojè' zaca'lao ja benè'. Pero tali ca rnia', tana'zi de babèjè' gan'. Bibira de hue' Diuzi lèjè' ga rnabè' guibá. ⁶ Pero cati hue'lèle Diuzi di'idza', reya'ala' ucu'ole tu tule tu ga negachi'. Tuzile conlè Xuziro Diuzi hue'lèlènè' di'idza'. Na' Xuziro Diuzi rlè'ènè' cabè' tadya'a ruele balarazi, lènè' gunnè' quiele ga rnabè' guibá.

⁷ Cati hue'lèle Diuzi di'idza', biinale di'idza' ladzazi, bihuele zètela di'idza' cabè' rue ben' binuebè' Diuzi. Ruejè' pensari chi uzènaga Diuzi quiejè' nun quie dan' ru'elèjè' Diuzi di'idza' zètela. ⁸ Bihuele cabè' rue lèjè', porque dan' Xuziro Diuzi banezinè' bidan' rdzioguele cati zainabale laohuè'. ⁹ Lena' reya'ala' hue'lèle Diuzi di'idza' cani: Xuzindo' Diuzi zulo' guibá, naca la'iya laolo'.

¹⁰ Rbezando' guida dza inabè'lo' lao yedyi layu cabè' rnabè'lo' guibá ga zulo'.

¹¹ Gunò' ta gaondo' quie na'adza cabè' ta rdzioguendo'.

¹² Bezi'ze quiendo' cabè' tamala babèndo' cabè' rezi'zendo' tamala bè ja benè' len nètò'.

¹³ Gacalao' nètò' ta biguinondo' lao tamala, ucuasa ucu'olo' tamala za' gaca quiendo'.

Porque tuzo' luè' naco' ga zelaozi yela' rnabè' quio', ga zelaozi yela' huaca quio', ga zelaozi yela' ze quio' tuzioli. Amén.

¹⁴ 'Cana' rnia' le'e porque chi le'e rzi'zele quie ja ben' rueja tamala quiele, lëscana' huazi'zerë Xuziro Diuzi zu guibá quiele. ¹⁵ Pero chi bisi'zele quie laguedyile, bisi'zerë Xuziro Diuzi dula' xquia quiele.

Bzioñe'e Jesús ra'o cabë' reya'ala' huero ubasi

Na' una Jesús:

¹⁶ —Cati huele ubasi, bihuenëlaole bayëchi' cabë' rue ben' rionla'adyi' Diuzi de ladzazi. Lëjë' ruzutelaojë' bayëchi' tacuenda ilë'ë ja benë' ruejë' ubasi. Pero tali ca rnia', tana'zi de babëjë' gan, bibira hue' Diuzi lëjë'. ¹⁷ Pero le'e cati huele ubasi, ulequibi laole, ulequin guichole dya'a. ¹⁸ Cana' huele tacuenda bigacabë' ja benë' de que ruele ubasi. Tuzi Xuziro Diuzi zulënë' le'e, gunnë' tadya'a gula quiele guibá ga r nabë'në'.

Udixogue' Jesús quie lao yela' uña'a

(Lc. 12.33-34)

Na' una Jesús:

¹⁹ —Bireya'ala' uzule guichole huele cuinle ben' uña'a lao yedyi layu ga reyulazin, ga rbiagui'zin, ga rban benë' len. ²⁰ Reya'ala' uzule guichole huele quie Diuzi tacuenda utupale yela' uña'a quiele guibá ga bireyulazin, ga birbiagui'zin, ga bisaque' cuan benë' len. Chi huele cana', nacale ca quie yela' uña'a lao Diuzi. ²¹ Pues ga rutupa ja benë' yela' uña'a quiejë', chi lao yedyi layu, chi guibá, lena' ulu'en ca bi pensari raquejë', chi quie cuinzijë', chi quie Diuzi.

Una Jesús quie pensari yani' quiero

(Lc. 11.34-36)

Na' una Jesús:

²² —Chi ru'ele lato raca guicho laxta'ole pensari dya'a, cana' sí, ruele tadya'a, neyani' pensari quiele rlë'ële racalële benë'. ²³ Pero chi ru'ele lato zu guicho laxta'ole yela' zë', cana' sí, huele tamala, nechula pensari quiele, birlë'ële gacalële benë'. Chi lao laza yu'ule pensari dya'a, na' ru'ele lato su guicho laxta'ole yela' zë', lena' naca mala gula quiele, nechulatzegue pensari quiele.

Ni rnën cabë' naca quie Diuzi len dumi

(Lc. 16.13)

Na' una Jesús:

²⁴ —Nitu nunu saque' uzu chopa xa'ne, porque dan' udienë' tunë', na' itunë' idyë'ënë', uzunë' di'idza' quie tunë', na' quie itunë' biuzunë' di'idza'. Cana' naca quiero len Diuzi. Chi nuzu guichoro rza'la'adyi'ro dumi, bisaque' uzuro guichoro Diuzi.

Diuzi gunnë' yugulute ta rdzioguero

(Lc. 12.22-31)

Na' una Jesús:

²⁵ —Rnia' le'e, bidëbile quie ta yo'ole, quie ta gaole, quie ta tebanle, ni quie zaba quiele ta gacole. ¿Quele zaca'ra yela' neban quiero quele ca ta gaoro? ¿Quele zaca'ra cuinro quele ca zaba quiero? ²⁶ Ulena'cara cabë' rue ja bguini rdajaba' ladza. Birazajaba', birezi'jaba' usecho udze'tza'ojaba' gaojaba', nechan' Xuziro Diuzi zu guibá rugaonë'jaba'. ¿Binezile zaca'ra le'e quele ca lëjaba'? ²⁷ ¿Nuzi ca le'e huaca huezu huele cuinle igatzo metro yela' hugo' nun quie rdëbile quie ta rdzioguele?

²⁸ ¿Bixquien' rdëbile nacala gaca idzela zaba quiele? Ulena'cara cabë' re'eni ja yo guixi'. Biruejan dyin, biruejan la'ari' ta gaca zabajan. ²⁹ Nechan' rnia' le'e, ni rey Salomón, ba'ala'cazi guquë' ben' uña'a gula, bibdyinnë' sutza'ohuë' cabë' zutza'o ja yo guixi' badan gula. ³⁰ Ulena' cabë' rugaco Diuzi zaba guixi' badanzi ta de na'adza, ba'ala'cazi du uxezi uzei benë' len, ¿bizi binezile ruetera Diuzi tadya'a quiele quele ca nu ja yo guixi'? Le'e rdzioguele sudyi'ilële Diuzi dyë'ëdi. ³¹ Lena' bireya'ala' idëbile inale: "¿Ga za' ta gao ta yo'oro? ¿Ga za' zaba quiero?" ³² Le'e bireya'ala' huele cana', porque dan' can' rue ja ben' binuebë' Diuzi. Rdëbijë' rdajë' quilojë' ga idzelejë' ta gaojë' len ta yo'ojë'. Pero cabë' le'e, zu Xuzile ben' zu guibá, nezinë' yugulute bidan' rdzioguele. ³³ Hue'le lato inabë' Diuzi le'e, huele ta yu'u ni'a xnezi quie Diuzi ca raxenë'. Na'tera gunnë' yugulute ta rdzioguele. ³⁴ Bidëbile chi bi tazëdi za' quiele du uxe du huidzo, porque durpende chan' du uxezi za'rë cuëchilile gacan reglo. Tu dza tu dza rdëbile quien, huele pensari bi gaca ta cue'lina.

7

Bireya'ala' inëro quie laguedyiro

(Lc. 6.37-38, 41-42)

¹ Na' una Jesús:

—Bireya'ala' inële quie laguedyile, yela' biinē Diuzi quiele ca ruele. ² Con cabè' rlè'èle laguedyile, chi ben' huen, chi ben' mala, cana'rè ilè'è Diuzi le'e. Con cabè' inële quie laguedyile, cana'rè inē Diuzi quiele ca ruele. ³ ¿Cómo nezile yegunni'ale bigazi tadao' mala rue benè', na' binezile yegunni'ale ca tamala gulatera ruele cuinle? ⁴ ¿Cómo yèbile laguedyile: “Bencara lato cuiogo' bēbi dao' yu'u laolo”, na' birnao' cuinlo' bichu yaga yu'u laolo”? ⁵ Le'e ben' rnè di'idza' ladzazi, zaolio bichu yaga yu'u laolo', na'tera ilè'elo' yebiolo' bēbi dao' yu'u lao laguedyile.

⁶ 'Bireya'ala' hue'le ja beco' ta naca la'iya quie Diuzi, porque biži chan' lalèziba' yegui'imba' le'e. Lèscan' bireya'ala' chu'unle ta naca tatzao' quie Diuzi lao ja cuchi, porque biži chan' utzutzu ulioba'n.

Ni nan cabè' reya'ala' huelëro Diuzi
(Lc. 11.9-13; 6.31)

Na' una Jesús:

⁷ —Chi inabaro Diuzi bi cosa, gunnē'n. Chi rguiloro ta naca tali quie Diuzi, huadzeleron. Chi ulidzaronè', huequēbinè' quiero. ⁸ Cana' rnia' le'e, porque nu ben' rnaba lao Diuzi bi cosa, hue'nē'n lēnē'. Lèscan' nu ben' rguilo ta naca tali quie Diuzi, huadzelenē'n. Nu ben' rulidza Diuzi, huequēbinè' quienè'. ⁹ ¿Nuži le'e rna'le hue'le yola ži'ile lao laza ta rnababi' pan? ¹⁰ ¿Nuži le'e rna'le hue'le bēlala ži'ile lao laza ta rnababi' bela? ¹¹ Chi le'e nacale ben' žè'è, pero nezile hue'le tahuen ži'ile, įbižira Xuziro Diuzi zu guibá neziterè' hue'nè' tahuen ben' rnaba len laohuè'!

¹² 'Cabè' re'enle huelële laguedyile le'e, cana' reya'ala' huerële len laguedyile. Cana' ruen mandado quiele huele lè'è guichi ley pca'n Diuzi lao na'a Moisés len guichi bē ja ben' udixogue' xti'idza' Diuzi timpote.

Quie lao chopa neza udixogue' Jesús
(Lc. 13.24)

Na' una Jesús:

¹³ —Taguizi naca ru'a yu'u quie guibá. Lëru'a yu'u na' reya'ala' tzu'ule. Tažera naca ru'a yu'u quie gabila. Lèscan' tala'aga'ra nacarè neza quien. Ben' žè gulara reyu'ujè' ru'a yu'u na', rezi'jè' neza na'la. ¹⁴ Pero taguizi naca ru'a yu'u quie guibá. Lèscan' taguizi nacarè neza quien. Lè'èti'zija naca ja ben' ruzuja di'idza' quia' cabè' rnia'. Lèzijè' redzelejè' neza zeyo guibá.

Cabè' rue benè', cana' yezaquero ca nacayaquè'
(Lc. 6.43-44)

Na' una Jesús:

¹⁵ —Gapale cuidado quie ja ben' huizi' yè', ben' rnaja quie Diuzi rnèjè'. Nacajè' ben' za'zija ruejè' gaxo gula cabè' rue beco' ži'ila'. Pero bē' ruezijè', dechan' lu'u laxta'olajè' yu'u yela' snia quiejè', ruejè' ca rue coyote. ¹⁶ Huezuyezaquele cabè' ruejè' chi balejè' nacajè' ben' quie Diuzi. Bicuia bedzuli' lao luba yèchi'. Lèscan' bicuia higo lao yaga yèchi'. Lècana' rue ja ben' binaca ja ben' quie Diuzi. Birlè'ero huejè' tadya'a cabè' rue Diuzi. ¹⁷ Yugulu yaga huen rbian tazixi naca dya'a, pero nu yaga median, birbian tadya'a. ¹⁸ Tu yaga huen bisaque' cuian tazixi binaca dya'a. Lèzi tu yaga median bisaque' cuian tazixi naca dya'a. ¹⁹ Yugulu yaga birbia ta gaoro ichuguron ibidyin uzeiron. ²⁰ Na'ra rnia' le'e, según cabè' ruejè', cana' yezaquele cabè' nacajè', chi nacajè' cabè' quie tu yaga huen, o chi nacajè' cabè' quie tu yaga median.

Quele yugo ja benè' yeyojè' guibá
(Lc. 13.25-27)

Na' una Jesús:

²¹ —Quele yugo ja ben' na nē'èdi': “Señor, Señor”, yeyojè' guibá ga rnabè' Diuzi, dechan' yaca ben' ruzu di'idza' quie Xuza', ben' zu guibá, lèzijè' yeyojè' guibá. ²² Cati idyin dza hue Diuzi juicio, cana' ina ben' zè nē'èdi': “Señor, Señor, laolo' bzètondo' udixogue'ndo' benè' xti'idzo'. Lèscana' bzètondo' laolo' uliondo' taxi'ibi' yu'u ja benè'. Lèscan' bzètondo' laolo' bēndo' tazè yela' huaca quio'.” ²³ Pero cana'ra yēpa'jè': “Binubè'cazida' le'e. Ulebiga' tzala'la, le'e ben' bē ja tamala.”

Pxi'idze' Jesús quie chopa ben' bē yu'u
(Lc. 6.47-49; Mr. 1.22)

Na' una Jesús:

²⁴ —Cani nacan quie yaca ben' ruzènaga ruzu di'idza' quia'. Naca quienè' ca quie tu ben' rioñe'e, ben' bē yu'u quie tu lao lachi' ga re'rara yu. ²⁵ Na'ra ben nisa yosiu', uyala yao, ben be bedun', pero bibyalan, porque re'n tu lao lachi' ga naca yu huala. ²⁶ Pero ben' ruzènaga, na' birue quienè' ca rnia', naca quienè' ca quie tu ben' tondo, ben' bē yu'u quie tu lao yu

yolo, yu bire'ra. ²⁷ Bè' ben nisa yosiu!, bè' uyala yao, bè' ben be bedun!, na'ra byala yu'u. Tu casion ze gula guca quiè'.

²⁸ Cati beyudyi unè Jesús, rebane ja ben' zè nita'ja na' cabè' ruè' rusèdiè'. ²⁹ Porque rusèdinè' lèjè' ca quie ben' de yela' r nabè' quie, quele cabè' rusèdi ja ben' rusèdi ley pca'n Diuzi lao na'a Moisés dza na'te.

8

Beyue Jesús tu ben' raza yela' hue' ca pindo

(Mr. 1.40-45; Lc. 5.12-16)

¹ Cati beyèzi Jesús lao ya'a, ben' zè beyao lènè'. ² Caora na' laobiga'te ga'ala' tu ben' raza yela' hue' ta ruzudzo' cuerpo quienè'. Laoditzute žibè' lao Jesús rëbinè' lènè':

—Señor, chi gue'enlo', huu' cule yeyuelo' yela' hue' raza'.

³ Na'ra udan Jesús na'anè' lènè' rëbinè' lènè':

—Hue'enda' iyaco' yèri.

Cana'zi ta una Jesús, labeyacate yela' hue' racanè'. ⁴ Na'ra una Jesús rëbinè' lènè':

—Ni tu ganu quixogue'lo' bi guca beyaco'. Tu uyotezi cuinzo' lao pxuzi. Na' hue'lo' gun quie Diuzi cabè' mandado bè Moisés yela' inezi ja benè' abeyaco' yela' hue' raco'.

Beyue Jesús tu mozo quie tu capitán ben' romano

(Lc. 7.1-10)

⁵ Na'ra zio Jesús ciudad Capernaum. Lèzi laoyote tu ben' naca capitán quie ja soldado quie ciudad Roma ga zè Jesús. Caora na' unabayèchi'nè' ⁶ rëbinè' Jesús:

—Señor, de tu mozo quia' raza žhue'bi' žan yu'u. Nesecobi', redzagalaolèbi'n, rlatzeguen.

⁷ Na'ra rëbi Jesús lènè':

—Uletza' yeyu'abi'.

⁸ Na'ra rëbi capitán lènè':

—Señor, binaca' zi ta huelo'nè' ze guidatiu' žan yu'u quia'. Tu bè'zi di'idza', bè mandado yeyaca mozo quia'. Nezda' huazaque' huelo' tu mandadozi inao', ⁹ porque lèzi cana' naca quia'. Zu xa'na', ben' belao r nabè'nè' nè'èdi'. Lèscana' napa'ria' soldado ben' r nabè'a. Cati rëpa' tujè': “Tzio' niga”, huayonè'. Cati rëpa' itunè': “Uda”, huidè'. Cati rëpa' mozo quia' bi ta huebi', ruebi'n. Cana' nacaré quio'.

¹⁰ Cati be Jesús cabè' una capitán rëbinè' lènè', tu rebanezinè' rëbinè' ja ben' zenaoja lènè': —Tali rnia' le'e, lao yugu ja ben' Israel, binedila' ni tujè' ben' rioñe'e cabè' rioñe'e ben' niga. ¹¹ Rnia' le'e, ben' zè, ben' binaca ben' Israel, yedyinjè' gatezi parte yedyi layu cue'lèjè' tuže len xuzixta'oro Abraham, len xuzixta'oro Isaac, len xuzixta'oro Jacob ta gaolèjè' lèjè' guibá ga r nabè' Diuzi. ¹² Pero zè ben' Israel, ben' reya'ala' yeyoja guibá ga zu Diuzi, naca quiejè' tzegu'unjè' lao lato lao chula ga cuedyijè' zi'laza gula, ga gaojè' lejè'.

¹³ Na'ra rëbi Jesús capitán na':

—Beyo žan yu'u quio'. Huacacazi cabè' ažela'adyo'.

Caora na'tezi labeyacate mozo quiè'.

Beyue Jesús ben' gula quie Pedro

(Mr. 1.29-31; Lc. 4.38-39)

¹⁴ Na'ra uyo Jesús žan yu'u quie Pedro. Na' blè'ènè' žna' nigula quie Pedro denè' žla, raza žhue'nè'. ¹⁵ Na'ra caora uže Jesús nè'è, labedubaten. Na'ra labeyasatè' uzulahuè' ru'enè' laze ta gaojè'.

Beyue Jesús ben' zè, ben' raza žhue'

(Mr. 1.32-34; Lc. 4.40-41)

¹⁶ Cati aochula, uquiè'jè' lao Jesús ben' zèja raza žhue', ben' yu'uja bichi be quie taxi'ibi'. Con tu la'anazi di'idza' rebioque' tzala'la taxi'ibi' yu'ujè'. Cana' beyuerènè' yuguja ben' raza žhue'. ¹⁷ Cana' bzun di'idza' cabè' una profeta Isaías caora unè' cani: “Lèbè' begubè' yela' tzen quiero, beyuenè' yela' hue' quiero.”

Ni rnan quie ja ben' nao Jesús

(Lc. 9.57-62)

¹⁸ Cati blè'è Jesús ben' zè baneyècholènè', bènè' mandado udelènè' ja ben' quienè' itzala'la lagun. ¹⁹ Na'ra bdyin tu maestro, ben' rusèdi ley quie Moisés. Na'ra gudyinè' Jesús:

—Maestro, re'enda' inahua' luè' con gatezi zio'.

²⁰ Na'ra bequèbi Jesús quienè':

—Yaca be'eza', zu beló quiejaba'. Lèscan' ja bguini, dyia lidyijaba'. Pero nè'èdi' naca' bichi yugulu benè', bizu litya' ga idyina' sua'.

²¹ Itu ben' nacarécazi ben' quienè' unè' rëbinè' Jesús:

—Señor, ben lato tzetapa' xuzá', porque bagatinè'. Na'tera yeguida' inahua' luè'.

²² Na'ra bequëbi Jesús gudyinë' lënë':

—Unaozi në'ëdi'. Bë lato ucachi' yaca ben' birue quie xti'idza' Diuzi xuzo'.

Ulëchi Jesús chizi be bedun' len nisa

(Mr. 4.35-41; Lc. 8.22-25)

²³ Na'ra uyu'u Jesús lu'u barco len ja ben' quienë'. ²⁴ Caora na' bënëan tu be bedun' huala gula, rudygaten nisa rudzon lu'u barco. Pero rasila Jesús cati ruen cana'. ²⁵ Na'ra uyo yaca ben' quienë' yesebëjë' lënë', rëbijë' lënë':

—¡Señor, psela nëto'! ¡Are'en yëto barco lu'u nisa!

²⁶ Na'ra unë Jesús rëbinë' lëjë':

—¿Bixquien' lega rdzebile? ¡Biralele ucuasa ucu'lo Diuzi ra'o!

Na'ra uyanë', udilalënë' be bedun' len nisa. Caora na' bguenan ure'n chizi. ²⁷ Na'ra rebane ja ben' quienë' najë':

—¿Ca nuži naca ben' niga? Lente be bedun', lente nisa ralen quienë'.

Bebio Jesús taxi'ibi' yu'u chopa ben' Gadara

(Mr. 5.1-20; Lc. 8.26-39)

²⁸ Cati bdyin Jesús itzala' lagun ga lao yu nebaba Gadara, caora na' labdyinte chopa ben' bro lu'u yerobá dyia na'. Rupatejë' yu'ujë' taxi'ibi'. Na' bdyinjë' lao Jesús. Tantozi nacajë' ben' snia gula, ni tu ganu rerugue te tu neza zaca' ga yu'ujë'. ²⁹ Na'ra uzulaojan rbedyia'zijan najan rëbijan Jesús:

—¿Bi de quio' conlë nëto' zao' niga, Jesús ži'i Diuzi? ¿Quele baodyialaolalo' bla'lo' huelo' nëto' castigo, na' binedyin hora?

³⁰ Ga'ala'zi ga zë Jesús yu'u ja cuchu zë. Lëgan' na' la'adyi'jaba' rguilojaba' ta raojaba'.

³¹ Na'ra bë ja taxi'ibi' zëdi rëbijan Jesús:

—Chi yebiolo' nëto' tzala'la, ben lato tzu'undo' lu'u cuchila.

³² Na'ra rëbi Jesús lëjan:

—Uletzu'ujaba'.

Na'ra bero ja taxi'ibi' yu'u ja benë' yetzu'ujan lu'u cuchila. Tu chi'zi raca cana', yequinojaba' cuinjaba' tu ru'a ya'a ga naca stëbi. Laga lu'u lagun yetzu'ujaba' uyëpijaba' gutijaba'.

³³ Quie lena' yaca ben' rapa lëjaba' bežunojë' dan' bdzebijë' bedyinjë' yedyi quiejë'. Na'ra uzulaojë' ru'ejë' di'idza' cabë' guca quie ja ben' bero ja taxi'ibi'. ³⁴ Na'ra bro ja ben' zë yedyi na', ziojë' gan' zë Jesús. Laonabayëchi'tejë' rëbijë' lënë':

—Yerolo' yeyo' lao yu quiendo'.

9

Beyue Jesús tu ben' ži

(Mr. 2.1-12; Lc. 5.17-26)

¹ Beyu'u Jesús tatula lu'u barco. Bela'guë' itzala' lagun, bedyinnë' lao yedyi quië'.

² Na' bi'ajë' tu benë' ži, ben' zuba lao belaga nu'a ja benë' lënë'. Caora blë'ë Jesús cabë' žela'adyi'yaquë' yeyuenë' lënë', na'ra unë' rëbë' ben' raca žhue':

—Bidzebo', bicha'. Cabë' quie ja dula' xquia quio', aoži'zia'n.

³ Na'ra bala ja maestro, ben' rusëdija ley quie Moisés, bëjë' pensari lu'u guicho laxta'ojë' cani: "Huadza' Diuzi ben' niga cabë' di'idza' unë'." ⁴ Pero como dan' anezi Jesús cabë' pensari racajë', na'ra unë' rëbë' lëjë':

—¿Bixquien' racale pensari cana'? ⁵ ¿Ca nurlan nacaran yalo hua' quie ben' ži niga? ¿Nacaran yalo chi yëpa'në': "Aoži'zia' xquia quio'", o chi nacaran yalo yëpa'në': "Uyasa, beži' belaga quio', beyo'?" ⁶ Pero como naca' bichi yugulu benë', lena' re'enda' inezile de yela' rnabë' quia' ta si'zia' dula' xquia quie ja ben' nita' lao yedyi layu.

Na'ra unë' rëbinë' ben' ži:

—Beyasa, beyu'a belaga quio'. Beyo žan yu'u.

⁷ Na'ra beyasë' zeyoguë' žan yu'u quië'. ⁸ Caora blë'ë ja benë' cabë' bë Jesús, tu bebanezijë'. Na'ra uzulaojë' rapala'një' Diuzi por nun quie dan' babë'në' yela' huaca quienë' Jesús.

Guži Jesús Mateo

(Mr. 2.13-17; Lc. 5.27-32)

⁹ Na'ra beza' Jesús ga beyuenë' ben' ži, caora na' blë'ënë' tu ben' lao Mateo, re'në' tu ga ruquizunë' quie impuesto. Na'ra unë' rëbë' lëbë':

—Uda, unao në'ëdi'.

Na'ra uyasa Mateo bëlënë' lënë' tuže.

¹⁰ Bizi guca na' tu re'nè' raohuè' zan yu'u, cati bdyin ja ben' zè, ben' huequižu, lenrè ja ben' cacuendazi. Udaolèjè' Jesús tuže len ja ben' quienè'. ¹¹ Pero bè' blè'è yaca ben' partido fariseo tužezi udaolè Jesús len lèjè', na'ra unabajè' ben' quie Jesús rëbijè' lèjè':

—¿Bixquien' raolè maestro quiele tužezi len ja ben' huequižu len ja ben' cacuendazi?

¹² Bè' be Jesús cana', na'ra unè' rëbinè' lèjè':

—Ca quie ben' zu dya'a, birnaban ben' yeyue lènè'. Pero ben' raca žhue', rnaban ben' yeyue lènè'. ¹³ Uletzio huele pensari yela' tzioñe'ele bi nan lè'è guichi la'iya quie Diuzi ga rnan caniga: "Raxera Diuzi yeyèchi'la'adyi'ro benè', quele ca ta hue'ro Diuzi gun." Quele za' rëža' ben' na "bibì xquia naca quia'", sino que za' rëža' ben' nezi de dula' xquia quie tacuenda yetza'jè' pensari quiejè' inaojè' xneza Diuzi.

Unabajè' Jesús quie ubasi
(Mr. 2.18-22; Lc. 5.33-39)

¹⁴ Bdyin ja ben' quie Juan bautista lao Jesús rnabajè' lènè':

—¿Bixquien' nètò' len ja ben' partido fariseo ruetzeguendo' ubasi, na' ja ben' quio' biruejè' ubasi?

¹⁵ Na'ra bequèbi Jesús rëbinè' lèjè':

—Yaca ben' zioja ga raca lani quie huetzagana', bireya'ala' sujè' bayèchi' tu nezu ben' rutzagana' len lèjè'. Pero cati idyin dza birazulè ben' rutzagana' len lèjè', caora na' sí, huazujè' bayèchi' huejè' ubasi.

¹⁶ Bisaque' yeda'ro la'ari' cubi binetzèri lè'è la'ari' gula, porque huetzere'nan igan ru'a la'ari' gula, ichezan len mazara. ¹⁷ Lèscan' bisaque' ca'ro nupì zixi lu'u bolsa guidi gula, porque bè' sulao ilèbin, huedza'n ichezan len. Lao rupatelan cuiaguì'. Lena' reya'ala' ca'ron tu lu'u guidi cubi. Cana' sí, bibi gaca quie lao rupaten.

Beyue Jesús tu nigula raca žhue', besebanrènè' itu nigula baguti
(Mr. 5.21-43; Lc. 8.40-56)

¹⁸ Tu raca nerue' Jesús di'idza' len ja benè', cati bdyin tu ben' rnabè' quie ja ben' Israel gan' zè Jesús. Na' gutanè' uzuru'ala lao Jesús rëbinè' lènè':

—Zabeyudyi guti tu ži'ina' nigula. Pero chan' na' luè' guido' ixubalo' nao' lèbi', huebambi' tatula.

¹⁹ Na'ra uži'nè' ziolènè' ja ben' quienè'. ²⁰ Na'ra tu neziojè' tu neza, cati ubiga' tu nigula raca žhue' xcu'udzula Jesús, uženè' diba zu ni'a žabè'. Aziote lao chipchopa iza ruzun lènè' uba'a. ²¹ Cana' bènè' porque guquenè' chi tu guxuzè' žaba Jesús, yeyaquè'. ²² Cati beyècho Jesús rnè'è ga zè nigula, rëbinè' lènè':

—Bidzebo', zana'. Como dan' rzudyi'ilèlo' nè'èdi', abeyaco'.

Caora na'tezi labeyacatè'.

²³ Na'ra uži'nè' zioquè' bdyinnè' zan yu'u quie ben' rnabè', ben' nequiè' lènè'. Na' blè'ènè' bala yu'ute ja músico listo ta tzečachi'jè' lèbi'. Lèzi cana' blè'èrènè' ru'be gula bayu'uja benè'.

²⁴ Na'ra unè' rëbinè' lèjè':

—Ulero ga yu'ule niga. Para nè'èdi' quele natibi', dechan' tu rasizibi'.

Na'ra žbidityjè' Jesús cabè' unè'. ²⁵ Cati beyudyi betzatzanè' lèjè', na'ra uyu'unè' ga de nigula baguti, uženè' na'abi' besebannè'bi'. Caora na' beyasabi'. ²⁶ Na' tzadi unezi ja ben' quie ja yedyi na' cabè' bè Jesús besebannè' nigula dao' de baguti.

Beyue Jesús lao chopa ben' laochula

²⁷ Lazune Jesús yeza'nè' gan' na' cati unao chopa ben' laochula lènè'. Rbedyiya'zìjè' rëbijè' Jesús:

—jBeyèchi'la'adyi' nètò', luè' ži'i rey David!

²⁸ Cati uyu'u Jesús lu'u yu'u, na'ra ubiga'ja ben' laochula laohuè', na'ra unabè' lèjè':

—¿Rzudyi'ilèle nè'èdi' huaca' yeyua' le'e na'?

Na'ra najè':

—Rzudyi'ilèndo' luè', Señor.

²⁹ Na'ra udèbi Jesús laojè' rëbinè' lèjè':

—Yeyacale con cabè' rzudyi'ilèle nè'èdi'.

³⁰ Na'ra labeyacate laojè' dyè'èdi. Na'ra bè Jesús mandado gudyinè' lèjè':

—Nitu nitu biquixogue'le cabè' bia' quiele.

³¹ Pero lapencara brojè' cati uzulaojè' rguixogue'jè' tu tu yedyi cabè' bè Jesús quiejè'.

Beyue Jesús tu ben' birnè

³² Na'ra zeza'jè' zeyojè' cati za' bala ja ben' nequiè' tu ben' birnè lao Jesús, ben' yu'u taxi'ibi'. ³³ Na'ra bebio Jesús tzala'la taxi'ibi' yu'unè'. Caora na' beyacanè' benètenè'. Na'ra rebane ja benè' rnajè':

—Binelè'ècaziro gaca lao ja yedyi quie ben' Israel cabè' raca niga na'a.

³⁴ Na'ra na ja ben' partido fariseo:

—Ben' niga rebioquë' taxi'ibi' yu'u ja benë' lao na'a xan' taxi'ibi'.

Guque Jesús bayëchi' cabë' rue ja benë'

³⁵ Na'ra rda Jesús yugulu yedyi yela len ja yedyi dao', ruxi'dze'në' lëjë' lu'u idao' sinagoga quiejë'. Rguixogue'në' lëjë' xti'idza' Diuzi, ben' r nabë' lao yedyi layu. Na'ra beyuenë' bitezi yela' hue' yu'u ja benë'. ³⁶ Bë' rlë'ë Jesús ja benë', guquenë' bayëchi' quiejë', dan' redzagalaojë' rëpi reyëzijë' ca quie ja beco' zi'ila' bizu ben' rapa ja lëba'. ³⁷ Na'ra unë' rëbinë' ja ben' quienë':

—Tali rnia', lega de dyin quiero gacalëro usëdiro ja benë' cabë' re'en Diuzi huejë', pero biyu'ute ja ben' zë, ben' gacalë usëdi lëjë'. ³⁸ Quie lena' na', reya'ala' inabale lao Diuzi ta ise'lë' ja ben' gacalë ra'o usëdi lëjë'.

10

Betupa Jesús lao chipchopa ben' quienë'

(Mr. 3.13-19; Lc. 6.12-16)

¹ Na'ra betupa Jesús lao chipchopa ben' quienë'. Bë'në' lëjë' yela' huaca quienë' ta cuiojë' tza'la' taxi'ibi' yu'u ja benë', lëscan' ta yeyuerëjë' bitezi yela' hue' yu'u ja benë'.

² Cani lao ja chipchopa ben' quie Jesús: tunë' laonë' Simón, ben' laorë Pedro, len bichinë' Andrés, len Santiago, len bichinë' Juan zi'i Zebedeo, ³ len Felipe, len Bartolomé, len Tomás, len Mateo, ben' huequižu, len Santiago, zi'i Alfeo, len Tadeo, ⁴ len Simón, ben' partido cananista, len Judas Iscariote, ben' psedyin Jesús lao na'a ben' r nabë', ben' bëti lënë'.

Use'ela' Jesús ben' quienë' ta tzetixogue'jë' benë' xti'idza' Diuzi

(Mr. 6.7-13; Lc. 9.1-6)

⁵ Na'ra use'ela' Jesús lao chipchopa ben' quienë' ta tzetixogue'jë' benë' xti'idza' Diuzi. Na'ra zagudyinë' lëjë' cabë' huejë', unë' rëbinë' lëjë' caniga:

—Tziole puro yedyi quie ja ben' Israel. Bitziole yedyi quie ja ben' tula. Bitziorële ja yedyi quie ja ben' Samaria. ⁶ Uletziotezi yedyi quie ja ben' Israel. Ben' na' naca quiejë' ca quie beco' zi'ila' neniti xa'ne. Cana' naca quiejë' lao Diuzi. ⁷ Uletzi tzetixogue'lejë' baruen bagozi dza guida ben' ise'ela' Diuzi ta inabë'në' lao yedyi layu. ⁸ Uleyue yaca ben' raca yela' hue' ta rutao cuinjë' len ja ben' raca zhue'. Uleseban ben' bagutija. Ulebio tza'la' taxi'ibi' yu'u ja benë'. Runa' le'e yela' huaca quia' ta yeyuele ja benë', pero bihuelenan de lazo.

⁹ 'Bihua'ale dumi, ni oro, ni plata, ni cobre. ¹⁰ Ni tu bihua'ale ga udze'le dumi. Tuzi cue' zabale nacole. Tuzi huaracho nuliole tziole. Ni xaga bisele. Nu ben' racalële, lëben' na' naca cuenda quiejë' gunjë' ta rdzioguele.

¹¹ 'Cati idyinke tu yedyi ze o chi tu yedyi dao', quilole ga zu tu ben' dya'a. Na' yega'nle hasta que idyin hora yeza'le. ¹² Bë' tzu'ule žan yu'u quienë', gapala'nlejë' yëbilejë': "Huela'iya Diuzi le'e ta sule chizi." ¹³ Chi ben' naca xa'n yu'u ruenë' zi žela'adyi', inabarale lao Diuzi sunë' chizi. Pero chi binaquë' zi ben' rue žela'adyi', bira inabale lao Diuzi ta sunë' chizi. ¹⁴ Chi nu ja ben' bisi'jë' le'e dyë'ëdi, na' chi bire'enjë' uzënarëjë' quiele, yerozile žan yu'u o chi yedyi ga bire'enjë' le'e. Usisile bëxte dyia ni'ale cati yerole ta nacan seña binacan dula' quiele chi baodyiagui'jë' hue Diuzi lëjë' castigo. ¹⁵ Tali cabë' rnia' le'e, cati idyin dza gaca juicio, huera Diuzi castigo fuertera quie ja yedyi ga bibejë' le'e bala, quele cabë' bë Diuzi quie ciudad Sodoma len ciudad Gomorra. Bzei Diuzi lao rupate yedyi na' besulatë'n.

Unë Jesús cabë' huenë yaca benë' yaca ben' quië'

¹⁶ Na' una Jesús:

—Ulena'cara ca nia' le'e. Rse'ela' le'e ca quie beco' zi'ila' lado ja lobo. Lena' rnaban huele listo ca quie nu bëla. Rnabarën huele žela'adyi' gaxo ca paloma. ¹⁷ Gapale cuidado, porque huetzehua'arëjë' le'e lao na'a ja ben' r nabë'. Gunrëjë' le'e zi' ga regu'udi'jël' lu'u idao' sinagoga. ¹⁸ Hasta huetzehua'ajë' le'e lao ja ben' gobierno, len lao ja rey, len lao ja ben' r nabë'tera, porque dan' biraxejë' nacale ben' quia'. Cana' sí, huacale inële quia' lao ja ben' Israel len lao ja ben' binaca ben' Israel. ¹⁹ Cati tzehua'ajë' le'e lao na'a ja ben' r nabë', bidëbile quie bižidan' yëbilejë', bidëbile bi huele yëbilejë'. Porque cati babdyin hora saca'le cana', Diuzcazi gunnë' ta inale. ²⁰ Porque quele le'ecazi cuinle inële, Bichi Be quie Diuzila, inëcazinë' le'e.

²¹ 'Cani hue yaca benë', usedyinjë' benë' bi' bichinë' lao na'a ja ben' r nabë' ta gutijë'bi'. Lëzirë ja be'mbyu usedyinrëjë' ži'ijë' lao na'a ja ben' r nabë' ta gutirëjë'bi'. Na' laži'izi ja benë' yeyëchobjabi' tilajabi' xuzijabi', quilojabi' bihuejabi' ta gutiyacabi' lëjë'. ²² Ben' zë tzu'uja udie le'e nun quie dan' baralele quia'. Nu ben' sue inao në'ëdi' la'acazi bitezi raca quienë', ben' na' sí, huade ilanë' gaquë' ben' quia'. ²³ Cati baruenë ja benë' quie tu yedyi

le'e bizinaquezi, layežunotele yeyole yedyi tula. Tali ca rnia', bicala nedu lao yedyi quie ja ben' Israel zetale tzetixogue'lejè' xti'idza' cati yeguida' nè'èdi', bichi yugulu benè'.

²⁴ Ca ruenè ja benè tu maestro, cana' huenèrèjè' yaca ben' rusèdinè'. Lëscan' ca ruenèjè' tu ben' napa mozo, cana' huenèrèjè' mozo quienè'. ²⁵ Nu ben' rsèdi, reya'ala' sunè' dispuesto usaca yaca benè' lèbè' con cabè' rsacajè' maestro quienè'. Lëscan' nu ben' naca mozo, reya'ala' sunè' dispuesto usaca ja benè' lèbè' cabè' rusacajè' xa'nnè'. Chi ina yaca benè' yèbjijè' tu ben' necua' familia: "Naco' xan' taxi'ibi'", lëscan' yèbjijè' ži'inè': "Naco' ži'i xan' taxi'ibi'."

Bireya'ala' idzebiro bi ruenè ja benè' ra'o
(Lc. 12.2-7)

²⁶ Na' una Jesús:

—Quie lena' bireya'ala' idzebile bi ruenè ja benè' le'e. Rnia' le'e ni tu ta rue yaca benè' balarazi yega'nnan cana'zi biyezaca'laona, decazi de huanezan. Lèzi ni tu ta nezi yaca benè' de negachi' yega'nnan cana'zi biyezaca'laona, decazide huanezan. ²⁷ Cabè' di'idza' ru'elia' le'e bè' baochula, lèdi'idza' na' yèbile ja benè' bè' baoyani'. Lèzi cabè' di'idza' ru'elia' le'e xcu'udzu yu'u, lèdi'idza' na' yèbile ja benè' zaca'laojè'. ²⁸ Bidzebile bi hue ja benè', porque dan' ba'ala'cazi gacajè' gutijè' le'e, bigacajè' gutijè' bichi be quiele. Reya'ala' idzebile Diuzi, ben' gaca udyiagui' le'e len bichi be quiele ise'elè' le'e len bichi be quiele lao gui' gabila.

²⁹ Na' ledao'zi zaca' chopa bguini dao' ga ruti'jè'ba', pero ni tu bguini dao' bižu biiguin-uba' sino que binezi Xuziro Diuzi biguca bguinuba' layu. ³⁰ Hasta len guitza' guichoro nezi Diuzi balan naca. ³¹ Lena' bireya'ala' idzebile, porque zaca'ra le'e quele ca ja bguini dao'.

Ni nan quie ben' rnèja cule Jesucristo lao ja benè'
(Lc. 12.8-9)

³² Na' una Jesús:

—Nutezi ben' rnè cule nè'èdi' lao ja benè', cana'rè inia' cule lèjè' lao Xuza' Diuzi zu guibá. ³³ Pero nu ben' rnè condre nè'èdi' lao ja benè', cana'rè inia' condre lèjè' lao Xuza' Diuzi zu guibá.

Guta' tazèdi quie ben' nao xneza Jesús
(Lc. 12.51-53; 14.26-27)

³⁴ Na' una Jesús:

—Biinale bigalo dila quie ja benè' tanun quie dan' bida' lao yedyi layu, sino que hualo dila. ³⁵ Por nun quie dan' chi gale nu benè' quia', huazu ži'ijè' condre xuzijè', huazu ži'ijè' nigula condre žna'jè', huazu žualidyijè' condre ben' gula quiejè'. ³⁶ Cana' tzu'ujè' hasta quie udiejè' familiazi quiejè'.

³⁷ Nu ben' nedyè'èra nu xuzi žnè'è quele cabè' nè'èdi', binaquè' zi gacanè' ben' quia'. Lèzi nu ben' nedyè'èra ži'ine, quele cabè' nè'èdi', binacarè' zi gacanè' ben' quia'. ³⁸ Nu ben' bire'en usacayudyi cuinnè' inaonè' nè'èdi', binaquè' zi gaguè' ben' quia'. ³⁹ Nu ben' bire'en izane cuine gatinè' por nun quia' nè'èdi', lèben' na' initalanè' yela' neban ta hue' Diuzi lènè' guibá. Pero ben' rzane cuine, ben' zu puesto gati por nun quia' nè'èdi', hue'la Diuzi yela' neban quienè' guibá.

Unè Jesús cabè' di'idza' zela'adyi' ru'e Diuzi benè'
(Mr. 9.41)

⁴⁰ Na' una Jesús:

—Chi nu ben' rezila'adyi' le'e, lëscan' nè'èdi'cazirè rezila'adyi'rèjè'. Chi nu ben' rezila'adyi' nè'èdi', lëscan' rezila'adyi'rèjè' Diuzi, ben' use'ela' nè'èdi'. ⁴¹ Nu ben' rezila'adyi'rè ca una yaca profeta, porque dan' nacayaquè' ben' za'lao Diuzi, na'ra con cabè' hue Diuzi ben' profeta ben' ze, cana' huerè Diuzi lèbè' ben' ze. Nu ben' rezila'adyi'rè ca una tu ben' quie Diuzi, porque dan' naquè' ben' quie Diuzi, na'tera con cabè' hue Diuzi ben' quienè' ben' ze, cana' huerè Diuzi lèbè' ben' ze. ⁴² Nu ben' hue' chan' tu vasozi nisa zaga ben' quia', porque dan' naquè' ben' quia', decazide hue Diuzi lèbè' ben' ze. —Cana' una Jesús gudyinè' leyaquè'.

11

Use'ela' Juan bautista ben' quienè' yena'jè' Jesús
(Lc. 7.18-35)

¹ Cati beyudyi pxi'idze' Jesús lao chipchopa ben' quiè', caora na' zeyoguè' tzetixogue'nè' ja benè' yu'uja yedyi rega'n ga'ala' gan' rdè'.

² Na' dyiguiba yu'u Juan na' cati unezinè' cabè' barue Cristo. Na'ra use'ela'nè' bala ben' quienè' ta tzena'jè' Jesús. ³ Na'ra unajè' rëbjijè' lènè':

—¿Naco' ben' na Diuzi ise'ela'në' o chi ben' tula reya'ala' cuezando'?

⁴ Na'ra bequëbi Jesús rëbinë' lëjë':

—Uletzio uletzeguëdyi Juan cabë' rlë'ële rele. ⁵ Ulehue' lënë' di'idza' yëbilenë' cabë' babeyaca ja ben' laochula, barelë'ëjë'. Na' ja ben' zi, babeyacajë', baredajë'. Na' ja ben' yu'u yela' hue' ta rutaog lëjë', babeyacajë', babezijë'. Na' ja ben' bireja, babeyacajë', bareyeyë'. Na' ja ben' bagutija, babebanrëjë'. Na' ja ben' yëchi', rguixogui'ajë' ca na xti'idza' Diuzi ta inezijë' bi huejë' ta yeyojë' guibá. ⁶ Huaca huen quie ben' biusan sudyi'ilë' në'ëdi'.

⁷ Cati beza' ja ben' quie Juan, na'ra uzulao Jesús ru'elënë' benë' di'idza' rëbinë'jë' ca naca quie Juan. Cani unë':

—¿Bidan' uyole yena'le lao lato dachi ga bidyia yu'u? ¿Uyole yena'le tu yaga yëto ru'a be ni'nila? ⁸ Quele lena' uyole yena'le. ¿Bíidan' uyole yena'le chi quele lena' uyole yena'le? ¿O chi uyole yena'le tu ben' zë žabe tza'o'? Na' nu ben' zë žabe tza'o' bitajë' lao lato dachi ga bidyia yu'u. Quele lena' uyole yena'le. ⁹ ¿Cabízi uyole yena'le? ¿Uyole yena'le tu ben' naca profeta? Talicazi naca Juan profeta. Nacarë' ben' tza'o'ra ca ja profeta. ¹⁰ Lëquie Juan na', ben' cuialao laohua', quie lëbë' rguixogue' guichi la'iya quie Diuzi cani:

Ise'ela' Diuzi tu ben' cuialao neza ga tza' cuenda tzetixogue'në' yaca benë' huida' në'ëdi'.

¹¹ Tali rnia' le'e, lao yugu ja benë' baoyu'uja yedyi layu hasta na'a, nitujë' binegacajë' ben' že ca Juan bautista. Dechan' nu ben' binacate že ga r nabë' Diuzi guibá, nacacazirë' ben' žera ca Juan.

¹² 'Desde cati bida Juan bautista hasta na'a, raca ja benë' dila condre yela' r nabë' quie Diuzi. Du rdilajë' rguilojë' bi huejë' ta useyudyi usedujë' lëbë'. ¹³ Yugulu ja ben' udixogue' tiempote cabë' na Diuzi, len cabë' na di'idza' bzu Moisés lë'ë guichi hasta cati bla' Juan, unëjë' quie dza zaza'ra cati inabë' Diuzi lao yedyi layu. ¹⁴ Chi ralele ca nia' quie Juan, huanezile babidalanë' lao laza profeta Elías, ben' yeguidacazi. ¹⁵ Reya'ala' tzu'u guicho nagale ca nia'.

¹⁶ ¿Cabi di'idza' inia' le'e ta tziõne'ele cabë' naca yela' zidi quie ja ben' nita' na'a? Ruejë' ca quie xcuidi' re' lao ye'eya bire'enjabi' quitulëjabi' laguedyí xcuidi'jabi'. ¹⁷ Na'ra laguedyí xcuidi'jabi' rucuedyíjabi' bdyio tacuenda uya'a ja xcuidi' bire'en quitu. Pero bire'enjabi' uya'ajabi'. Lena' laguedyí xcuidi'jabi' bilajabi' canción bayëchi' tacuenda cuedyi ja xcuidi' bire'en quitu. Pero ni cana' biuredyíjabi'. ¹⁸ Na'ra bë' bida Juan, biudaotza'onë' bihue'enë' vino. Na' le'e unale quië' yu'unë' taxi'ibi'. ¹⁹ Na'ra bë' bida' në'ëdi', bichi yugulu benë', raohua' ri'oga' cabë' ta ri'o rao ja benë'. Na' rnële quia' ben' ri'o raolë'ëna', ben' rdalë ja ben' mala len ja ben' huequizu. Lena' nia' le'e, yela' sin' quie Diuzi nenacazi nacan huen.

Regunni'a Jesús yaca ben' yedyi birale quienë'

(Lc. 10.13-15)

²⁰ Na'ra uzulao Jesús regunni'anë' ja ben' yedyi gan' babërë' yela' huaca quienë' como ja benë' yu'u na' biptza'jë' pensari quiejë' cabë' gudyinë' lëjë'. Na'ra unë' rëbinë' lëjë':

²¹ —¡Bayëchi'zi gaca quie le'e ben' ciudad Corazín! ¡Bayëchi'zi gaca quie le'e ben' ciudad Betsaida! Chan' na' guca milagro lao ciudad quie ja ben' Tiro, len lao ciudad quie ja ben' Sidón cabë' milagro guca lao yedyi quiele tiempote, babetza'jë' pensari quiejë', babeyacajë' ben' quie Diuzi chan' na'. Lëzi cana', chan' cana'cala bagucojë' la'ari' ta nena yu'ujë' bayëchi', na' bda'rëjë' de guichojë' cabë' costumbre guta' quiejë' cati renabajë' perdón quiejë' lao Diuzi. ²² Pero nia' le'e, cati idyín dza gaca juicio, castigo hualara gata' quiele, quele ca castigo gata' quie ja ben' ciudad Tiro len ja ben' ciudad Sidón. ²³ Lëscana' le'e ben' ciudad Capernaum, bigaquele chi huapala'n Diuzi le'e yeyole guibá, dechan' lao gui' gabilala tziõle, porque chan' na' gucarë milagro lao ciudad Sodoma cabë' milagro guca lao ciudad quiele, nere' ciudad Sodoma nedian hasta na'a chan' cana'cala. ²⁴ Lëzi cana' rnia' le'e, cati idyín dza gaca juicio, huata'rë tu castigo hualara quiele, quele ca castigo gata' quie ja ben' ciudad Sodoma.

Ben Jesús yela' huezila'adyi quiero

(Lc. 10.21-22)

²⁵ Lëlao tiempo na' una Jesús rëbinë' Xuzinë' caniga:

—Ben' že naco' luë' Xuza'. Naco' xan' guibá len yedyi layu. Diuxcalelo' por nun quie dan' bablu'elo' ca naca tali quio' lao yaca ben' nezi rdzioguejë' inezijë'n. Pero pcachi'lo' ca naca tali quio' lao ja ben' na riõne'ejë', pero bë' nazijë' birioñe'ejë'n. ²⁶ Cana' nacan Xuza', porque cana' re'eno' gacan. —Cana' una Jesús rëbinë' Xuzinë'.

Na' una Jesús rëbinë' ben' quië':

²⁷ —Yugulute ta de baben Xuza' në'ëdi'. Tuzi Xuza' Diuzi nubë'në' në'ëdi' naca' zi'inë'. Na' ben' re'en huebë' cabë' naca Diuzi, në'ëdi' uzioñe'eda' lëjë' ta huebë'jë' cabë' naca Diuzi. Tuza' në'ëdi'lia' lëjë' nubë'ndo' Diuzi. ²⁸ Uleda galalële në'ëdi' tuže, yugulu le'e, ben' barexaque quie dula' xquia quie, ben' barexaque cabë' tazëdi raca quie. Në'ëdi' guna'

huezila'adyi' quiele. ²⁹ Ulehue quiele di'idza' quia' cabè' rnia' le'e. Ulesèdi cabè' naca quia' como dan' naca' ben' zela'adyi', ben' laxta'o gaxo. Chi hue quiele cabè' nia' le'e, huata' yela' huezila'adyi' quiele. ³⁰ Ca naca dyin re'enda' huele, binacatigan zèdi. Ca naca yua' re'enda' hua'ale, binacatigan zi'i.

12

Bezi' ja ben' quie Jesús trigo dza huezila'adyi'

(Mr. 2.23-28; Lc. 6.1-5)

¹ Na'ra guca dza na' tu dza huezila'adyi', uza' Jesús ziolènè' yaca ben' quienè' udejè' ga nazajè' trigo. Na' nun quie udue yaca ben' quie Jesús, sulaojè' ralojè' dao quie trigo raojè'n.

² Cati blè'è ja ben' fariseo cabè' rue ja ben' quie Jesús, na' unèjè' rëbijè' Jesús:

—Una'cara, barue ja ben' quio' dyin ta biru'en lato huejè' dza huezila'adyi'.

³ Na' unè Jesús rëbinè' lèjè':

—¿Binelabale cabè' bè rey David lènè' yaca ben' quiè' bè' uduejè' dza na'? ⁴ Uyu'unè' lu'u idao' rnabè'ra udaohuè' yèta xtila naca gun quie Diuzi ta biru'en lato gaohuè', ni lèbè', ni ben' quiè'. Tuzi ja pxuzizi ru'en lato gaojè'n. Pero cala xquia bènè', bènè' cana'.

⁵ ¿Lèzi binena'le lè'è ley quie Moisés ga rguixogue'n quie ja pxuzi, ben' rue dyin lu'u idao' rnabè'ra? Bibezila'adyi'jè' dza huezila'adyi', pero bèjè' dyin lu'u idao' rnabè'ra, dechan' quele xquia bèjè', bèjè' cana'. ⁶ Na'ra rnia' le'e, nacara' nèn'èdi' balaora ca idao' rnabè'ra. ⁷ Le'e binetziõe'ele cabè' na lè'è guichi la'ya quie Diuzi ga una Diuzi: "Re'enda' yeyèchi'la'adyi'le benè'. Lena' nacaran belao quele ca ta udyiale nu bia naca gun quia' ru'aba." Chi uyoñe'ele cabè' na Diuzi, bigaole xquia ben' bide falta quie. ⁸ Nèn'èdi', bichi yugulu benè', rnabi'a quie yugulute ta raca dza huezila'adyi'.

Byue Jesús tu ben' neseco nè'è

(Mr. 3.1-6; Lc. 6.6-11)

⁹ Na'ra uza' Jesús zioquè' uyu'unè' lu'u idao' quieyaquè' laona sinagoga. ¹⁰ Na' zu tu be'mbyu neseco nè'è. Na'ra yaca ben' zu na' rguilola'adyi'jè' gaojè' Jesús xquia. Lena' unabajè' lèbè':

—¿Ru'en lato yeyuero benè' dza huezila'adyi'?

¹¹ Na'ra bequèbi Jesús rëbinè' lèjè':

—¿Chi nu le'e zu tu beco' zi'ila' quiele bguinuba' lu'u pozo dza huezila'adyi', quele seguro na' huayole tzeliolèba'? ¹² ¿Como binezile zaca'ra tu be'mbyu quele ca tu beco' zi'ila'? Quie lena' ru'en lato yeyuero benè' dza huezila'adyi'.

¹³ Na'ra una Jesús rëbinè' ben' neseco nè'è:

—Bli nao'.

Na' cati belinè' nè'è, beyacan cabè' naca itzala' nè'è dya'a. ¹⁴ Na' uza' ja ben' fariseo ziojè' uzulaojè' rusaque'jè' bi huejè' ta gutijè' Jesús.

Desde tiempote udxogue' Isaías cabè' hue Jesús

¹⁵ Cati unèzi Jesús gu'unjè' gutijè' lèbè', uzè'è zioquè' tatula. Na' ben' zè gula zio zena' lèbè'. Reyuenè' yugulu yaca ben' raca zhue'. ¹⁶ Na'ra bè Jesús lèjè' mandado ta biquixogue'jè' cabè' bènè' quiejè'. ¹⁷ Cana' bè Jesús tacuenda su di'idza' cabè' una profeta Isaías dza na'te caora udxogue'nè' ca una Diuzi caniga:

¹⁸ Ben' niga ben' rue dyin lao laza', ben' ulioga', nedyè'èda'nè' redaohueda' cabè' ruenè'.

Udzi'a Bichi Be quia' lu'u guicho laxta'onè'.

Huaguixogue'nè' yaca ben' nita' lao yedyi layu ca tali rchugubi'a quiejè'.

¹⁹ Bihuenè' huenè, biinènè' snia, bihuenè' zèdi tu neza.

²⁰ Xela'adyi'nè' ben' raca bayèchi' quie, yeyèchi'la'adyi'nè' ben' re'en usan xquia quie.

Cana' huenè' hasta que idyinnè' inabè'nè' huenè' tali lao yedyi layu.

²¹ Sudyi'ilè yaca ben' nita' lao yedyi layu lènè'.

Cana' udxogue' Isaías tanun quie Diuzi dza na'.

Udaojè' Jesús xquia najè' yu'unè' taxi'ibi'

(Mr. 3.19-30; Lc. 11.14-23; 12.10)

²² Na'ra uquiè'jè' tu ben' laochula, ben' birnè, lao Jesús. Ben' na' uyu'u taxi'ibi' lu'u laxta'onè'. Byue Jesús lènè', belè'ènè', benènè'. ²³ Na' bebane ja ben' zè unajè' rëbijè' laguedyijè':

—¿Quele ben' niga zi'i David, ben' use'ela' Diuzi?

²⁴ Na' cati be yaca ben' partido fariseo cabè' una ja benè', na'ra unajè' rëbijè' lèjè':

—Yela' huaca quie Beelzebú xan' taxi'ibi' rbio ben' niga yaca taxi'ibi' yu'u laxta'o benè'.

²⁵ Na' gucabè' Jesús cabè' pensari racajè'. Quie lena' unè' rëbinè' lèjè':

—Chi zu tu gobierno nacajè' zè cue' rdilalèjè' laguedyijè', na'ra bisibè'jè' zidza. Lëscan' nu yedyi, o nu familia, chi rdilalèjè' laguedyijè', huadztzajè', bira tzu'ujè' tzaže. ²⁶ Cana' nacarèn quie Satanás. Chi Satanás rbionan yaca taxi'ibi' quienan, chi rdilalènan laguedyinan, bisunen inabè'nan zidza. ²⁷ Na' le'e nale rbioga' taxi'ibi' yu'u laxta'o benè' tanun quie yela' huaca quie Beelzebù. Na'ra nia' le'e chi nacan cana', ¿nuzi ru'e yela' huaca quie ja ben' quiele rbiojè' taxi'ibi'? Na'zi rulu'en quiele nequixile cabè' nale. ²⁸ Nè'èdi' rbioja' yaca taxi'ibi' conlè yela' huaca quie Bichi Be quie Diuzi. Lena' rulu'en abdyin yela' huaca quie Diuzi laole, pero birezaquiele abdyinnan.

²⁹ 'Bisaque' tzu'u benè' zan yu'u quie tu ben' tzutzu huala ta si'nè' ta de quienè' chi biuquionè' lè'nè'. Chi uquionè' lè'nè', na'ra huazaque' si'nè' ta de quienè'. Cana' rua' quie xan' taxi'ibi', ruquioga'nan tacuenda bira inabè'nan.

³⁰ 'Nu ben' bizèlè nè'èdi' tzaže, naca quienè' ca quie ben' rudie nè'èdi'. Nu ben' biracalè nè'èdi' rua' dyin quie Diuzi, naca quienè' ca quie ben' rchugu dyin quia'.

³¹ 'Tana' lena' rnia' le'e, zu Diuzi dispuesto si'zenè' yugulu xquia quie ja benè', yugulu di'idza' mala rnèjè', pero chi rna ja benè': "Dyin quie taxi'ibi'" na' dyin quie Bichi Be quie Diuzi na', chi cana' rutasi runiojè' lèbè', bide yela' huazi'ze quiejè' lao Diuzi. ³² Nutezi ben' rnè condre nè'èdi', ben' naca bichi yugulu benè', zu Diuzi dispuesto yezi'zenè' dula' xquia quiejè'. Pero nu ben' rnè: "Dyin quie taxi'ibi'" na' dyin quie Bichi Be quie Diuzi na', biyezi'ze Diuzi dula' xquia de quiejè' dan' unajè' cana'. Tuzioli huanao dula' xquia quiejè' lèjè'.

Unè Jesús quie ben' mala len quie ben' dya'a
(Lc. 6.43-45)

³³ Na' una Jesús:

—Nu yaga dya'a rbian tazixi dya'a, pero nu yaga mala birbian tazixi dya'a. Según cabè' naca tazixi dya'a yaga, lena' rlu'en chi yaga dya'a, chi yaga mala. Ca nu yaga rbian tazixi dya'a, cana' nacarèn quia' como dan' rua' dyin dya'a racalia' benè'. Lena' ruquixile inale dyin quie taxi'ibi' rua'. Birue taxi'ibi' tadya'a. ³⁴ 'Ben' mala gula nacale! 'Bisaque' inale tadya'a como dan' binacale ben' dya'a. Ca naca di'idza' yu'u ru'ale, cana' nacan ta yu'u lu'u guicho laxta'ole. ³⁵ Ben' dya'a rnajè' tadya'a, dan' yu'u tadya'a lu'u guicho laxta'ojè'. Pero le'e rnale tamala, dan' yu'u tamala lu'u guicho laxta'ole. ³⁶ Na'ra rnia' le'e, yugulu di'idza' mala rnè ja benè', huezaca'laon lao Diuzi. ³⁷ Según bi naque di'idza' rnèle dza rdale lao yedyi layu, huachugobè'cazi Diuzi quiele, chi de dula' xquia quiele, chi bide dula' xquia quiele.

Ben' malaja unabajè' ta hue Jesús tu milagro
(Mr. 8.12; Lc. 11.29-32)

³⁸ Na'ra yaca ben' partido fariseo len yaca ben' rusèdi ley quie Moisés, unajè' rëbijè' Jesús: —Maestro, re'enndo' ilè'èndo' huelo' tu milagro tacuenda inezindo' chi naco' ben' use'ela' Diuzi.

³⁹ Na' una Jesús rëbinè' lèjè':

—Yaca ben' yu'u tamala lu'u guicho laxta'ohue, ben' rudyiga Diuzi tzala'la, re'entejè' ilè'èjè' tu milagro ta gaca seña ta inezijè' chi tali use'ela' Diuzi nè'edi'. Pero tuzi milagro ilè'èjè', hualè'èjè' ca milagro bè Diuzi dza uda profeta Jonás lao yedyi layu. ⁴⁰ Ca guca quie Jonás dza na', uyu'unè' lu'u lè'è tu bela ze tzona dza len tzona yela, cana' gacarè quia' nè'èdi', ben' naca bichi yugulu benè'. Huayu'a lu'u yu tzona dza len tzona yela. ⁴¹ Na'ra rnia' le'e, huezuli quie ben' yedyi Nìnive gaojè' le'e xquia dza gaca juicio como dan' lèjè' sí, ptza'jè' pensari quiejè' caora uduxogue' Jonás lèjè' di'idza' quie Diuzi dza na'. Pero le'e, biruzè'nagale quia' ba'ala'cazi nacara' ben' zera ca Jonás. ⁴² Lëscana' huezuli reina quie yaca yedyi nebara Arabia gaohuè' le'e xquia dza gaca juicio como dan' lèbè' sí, uza'nè' yedyi quienè' zionè' zitu' gula ta uzè'nagacè' ca di'idza' unè rey Salomón, ben' rioñe'e. Pero le'e, biruzè'nagale quia' ba'ala'cazi nacara' ben' zera ca rey Salomón.

Unè Jesús quie tu taxi'ibi' rero redyin guicho laxta'o benè'
(Lc. 11.24-26)

⁴³ Na' una Jesús:

—Cati rero bala ja taxi'ibi' lu'u guicho laxta'o ja benè', rdana ga naca bidyi rguilona ga suna. Caora biredzelena ga suna, na'ra rnèna: ⁴⁴ "Hueya'a ga beza'a." Cati abedyinnan beyu'unan lu'u laxta'o ben' na' tatula gan' bronan, caora na' rlè'èna naca ben' na' ca quie tu yu'u dachi neluba dyè'èdi. ⁴⁵ Na'ra uyonan yexi'n nan igadyi laguedyin ta nacara mala ca lèna. Cana' yu'ujan yugujan lu'u laxta'o ben' na'. Cana' racatera mala quienè' quiele cati yu'un tuzin lu'u laxta'onè'. Cana' gacarè quiele nun quie dan' yu'u tamala lu'u guicho laxta'ole.

Bdyin zna' Jesús lënë' bi' bichinë' gan' zënë' rusëdinë' benë'
(Mr. 3.31-35; Lc. 8.19-21)

⁴⁶ Na' neru'elë Jesús benë' di'idza' cati bdyin žnë'ë lënë' yaca bi' bichinë'. Bega'njê' lali'a reguilojê' lëbë' ta hue'lëjê' lëbë' di'idza'. ⁴⁷ Na'ra unë tu ben' zëlë Jesús rëbinë' Jesús:

—Babla' znao' len ja bi' bicho'. Nita'jê' lali'a, re'enjê' hue'lëjê' luë' di'idza'.

⁴⁸ Na' una Jesús rëbinë' ben' udxogüe' lëbë' cati bdyin žnë'ë:

—Babla' zna'a len ja bi' bicha'. Pero nia' le'e, nita'rë ben' naca ca quie zna'a, len ben' naca ca quie bi' bicha' niga.

⁴⁹ Na' blu'e Jesús gan' zë ja ben' quienë' unë' rëbinë' ben' na':

—Ja ben' rale quia', nacajê' ca quie zna'a, ca quie bi' bicha'. ⁵⁰ Con nutezi ben' rue quie xti'idza' Xuza', ben' zu guibá, lëlëjê' nacajê' ca quie bi'bicha', ca quie bi' zana', ca quie zna'a.

13

Unë Jesús tu di'idza' quie ben' bë guza

(Mr. 4.1-9; Lc. 8.4-8)

¹ Na'ra guca dza na' uza' Jesús žan yu'u uyoguë' yeque'në' ru'a nisa lagun. ² Na' como dan' begu'udi' ben' zë gan' re'në', yu'u'unë' lu'u barco ure'në'. Na' bega'n ja benë' ru'a nisa lagun. ³ Na'ra conlë di'idza' ta nacan irupa iyunala unë Jesús psëdinë' leyaquë' cani:

—Uyo tu be'mbyu guza trigo. ⁴ Na' ca ruejê' quie trigo, tu ruziozijë'n layu. Na'ra bala bini trigo yeque'jan tu neza. Na' bdyin bguini aodaoba'n. ⁵ Ibalan yeque'jan lado yo ga bižubatica yu. Na' laolëtejan dan' žuban yu lasi. ⁶ Cati bena oba, na' ubidyin dan' biyu'u luena zitu'. ⁷ Ibalan yeque'jan lado yëchi'. Na' bibë yëchi' lato gue'enin dyë'ëdi. ⁸ Ibalan yeque'jan ga naca yu dya'a. Na' bë'jan usecho dya'a quien. Balan udyian tu gayuhua žuba' quien. Ibalan udyian tzona galo žuba' quien. Ibalan udyian galobechi žuba' quien. ⁹ Chi babele dyë'ëdi, ulezënaga can' rnia' na'.

Una Jesús ga huen dyin di'idza' rusëdinë' benë'

(Mr. 4.10-12; Lc. 8.9-10)

¹⁰ Na'ra ubiga' ja ben' quie Jesús ga zënë' unabajê' lëbë':

—žBixquien' puro di'idza' ta nacan irupa iyunala rusëdio' benë'?

¹¹ Na' una Jesús rëbinë' lëjê':

—Ruzioñe' Diuzi le'e bi re'en ina di'idza' rguixogüe'n quie yela' r nabë' quie Diuzi. Pero yaca ben' binaca ben' quia', biuzioñe' Diuzi lëjê'. ¹² Nu ben' ruzënaga cabë' rnia', huacalë Diuzi lëbë' ta tzioñe'enë' dyë'ëdi. Pero nu ben' biruzënaga cabë' rnia', huala'adyi'jê' cabë' tadao' abejê'. ¹³ Tana' lena' rguixogui'a benë' conlë yaca di'idza' ta nacan irupa iyunala, como dan' ba'ala'cazi rlë'ëjê' cabë' rua', ruezijê' ca ben' birlë'ë, ba'ala'cazi rejê' cabë' rnia', ruezijê' ca ben' bire. ¹⁴ Cana' naca quiejê' cabë' una profeta Isaías dza na' unë': Ruzënagajê' dyë'ëdi, pero birioñe'ejê'.

Rlë'ëjê' dyë'ëdi, pero biracabë'jê'.

¹⁵ Cana' ruejê' dan' yu'u tazidi lu'u guicho laxta'ojê'.

Ruezijê' ca ben' bire, ruezijê' ca ben' netzudi' laohue.

Bire'enjê' ilë'ëjê', nica re'enjê' guejê'.

Bire'enjê' tzioñe'ejê', nica re'enjê' guidajê' ta inaojê' xneza Diuzi yela' na' yezi'ženë' dula' xquia quiejê'.

Can'a una Isaías dza na'.

¹⁶ Pero le'e sí, raca tahuen gula quiele dan' tali re'enle ilë'ële ca rue Diuzi, tali re'enle guele ca rna Diuzi. ¹⁷ Tali ca rnia' le'e, ben' zë, ben' unita' dza na', gu'unjê' ilë'ëjê' cabë' ta rlë'ële, gu'unjê' guejê' cabë' ta rele, pero biužaque'.

Udxogüe' Jesús ca bi re'en inë di'idza' quie ben' bë guza

(Mr. 4.13-20; Lc. 8.11-15)

¹⁸ Na' una Jesús:

—Uzënagale ta inia' le'e ca bi re'en inë di'idza' quie ben' bë guza. ¹⁹ Nu ben' ruzënaga ca naca yela' r nabë' quie Diuzi, pero biralejê' bihue quieyaquë' xti'idza' Diuzi, hue xan' tax'i'ibi' ta gala'adyi'jê' cabë' bejê'. Cana' raca quiejê' ca quie bini trigo yeque'jan tu neza.

²⁰ Lëscan' nu ben' redaohue ruzënaga xti'idza' Diuzi, ²¹ pero bihue quieyaquë'n zidza, naca quiejê' ca quie bini trigo yeque' lado yo ga bižubatica yu biyu'u luena zitu'. Cati raca zëdi quiejê', cati rusaca benë' lëjê' bizinaquezi tanun quie dan' rue quieyaquë' xti'idza' Diuzi, na'ra rusanjën, bira rue quieyaquë'n. ²² Lëscan' nu ben' ruzënaga xti'idza' Diuzi, pero rdëbijê' bi raca quiejê' lao yedyi layu, rza'la'adyi'jê' yela' uña'a, naca quiejê' ca quie bini trigo yeque'n lado yëchi'. Dan' rdëbijê' bi raca quiejê' rza'la'adyi'jê' yela' uña'a, quie lena' biru'en lato huejê' dyin quie Diuzi. ²³ Pero nu ben' ruzënaga xti'idza' Diuzi, na' ralejê'n hue quieyaquë'n, naca quiejê' ca quie bini trigo yeque'n yu dya'a bë'n usecho. Balan rbian tu

gayuhua žuba'. Ibalan rbian tzona galo žuba'. Ibalan rbian galobechi žuba'. Cana' nacajë' ca que bini trigo. Cana' gacarajë' mazara ben' nao xneza Diuzi.

Unë Jesús tu di'idza' quie guixi' mala len quie trigo

²⁴ Na'ra udixogue' Jesús itu di'idza', unë' rëbinë' lëjë' cani:

—Rnia' le'e naca yela' r nabë' quie Diuzi ca que tu ben' guza bini trigo layela quie. ²⁵ Pero du rëla caora rasiñë', uyo tu bi' rudie lëbë' guzanë' bini quie guixi' mala lado trigo layela quie'. Na' beza'në' zeyogue' zan yu'u. ²⁶ Na'ra gu'uni guixi' mala lëbi len trigo. ²⁷ Na' uyo ja mozo quienë' yetixogue'jë' lëbë', najë' rëbijë' lëbë': "Señor, baguzando' puro bini trigo layela quio', ¿ga za' guixi' mala den lado trigo quio'?" ²⁸ Na' una xa'një' rëbinë' lëjë': "Tu ben' rudie në'ëdi' bë cana'." Na' una mozo quienë' rëbijë' lëbë': "¿Re'enlo' tziondo' tzeguelondo' guixi' mala?" ²⁹ Pero unë xan' mozo rëbinë' lëjë': "Bihuele cana', dan' hualorële trigo chan' na' galole guixi' mala. ³⁰ Ulesannan gue'enigaran lëbi. Cati yezi'a usecho quie trigo, cana' hua' mandado zagalo mozo quia' guixi' mala uquiojë'n manojë ibidyin tzeina. Na'tera yezi'jë' trigo yezi'tza'ojë'n zan litya'."

Unë Jesús tu di'idza' quie tu bini mostaza

(Mr. 4.30-32; Lc. 13.18-19)

³¹ Na'ra udixogue' Jesús itu di'idza', unë' rëbinë' lëjë' cani:

—Naca yela' r nabë' quie Diuzi ca que tu bini mostaza ta guza be'mbyu layela quie'. ³² Tali naca bini mostaza tadao' bicu' ca yaca los demás ja bini. Pero cati re'enin racan tu yaga že, caora na' rdyin hguini rueba' lityiba' lao taca'n.

Unë Jesús tu di'idza' quie lë'ëti' levadura

(Lc. 13.20-21)

³³ Lëscan' udixogue' Jesús itu ejemplo, unë' rëbinë' lëjë' cani:

—Naca yela' r nabë' quie Diuzi ca que lë'ëti' levadura. Rutupe nigula levadura len tzona medida yëzo trigo ta tzu'un duze cuba, na' chëžin. —Cana' una Jesús rëbinë' lëjë'.

Con puro di'idza' ta nacan irupa iyunala udixogue' Jesús ja benë'

(Mr. 4.33-34)

³⁴ Na' con puro di'idza' ta nacan irupa iyunala udixogue' Jesús ja benë'. Biudixogue'në' lëjë' con di'idza' binaca di'idza' ta nacan irupa iyunala. ³⁵ Cana' benë' tacuenda uzu di'idza' ca di'idza' udixogue' profeta Isaías cabë' rnën lë'ë guichi la'iya cani: Huaguxogue'në' ja benë' zë di'idza' ta nacan irupa iyunala. Huanëñ' tu ta bineye ja benë' desde dza cati udixu Diuzi yedyi layu.

Udixogue' Jesús cabë' re'en inë di'idza' quie guixi' mala ulë lado trigo

³⁶ Na' gudyi Jesús ja benë':

—Abeyudyi di'idza'.

Na' bedzatzajë' beza'rë Jesús beyu'unë' zan yu'u. Caora na' bebiga' ja ben' quienë' rëbijë' lëbë':

—Re'enndo' huu' cule yexi'idzo' nëto' quie di'idza' rnën quie guixi' mala ulë lado trigo.

³⁷ Na'ra una Jesús rëbinë' lëjë':

—Në'ëdi' naca' bichi yugulu benë', naca quia' ca que ben' raza bini trigo. ³⁸ Na' dyilayu ni naca quien ca que layela ga raza' bini trigo. Na' yaca ben' rue quie xti'idza' Diuzi, naca quiejë' ca que bini trigo. Na' ben' rue cabë' re'en xan' taxi'ibi', naca quiejë' ca que guixi' mala. ³⁹ Na' xan' taxi'ibi' naca quien ca que ben' guza guixi' mala. Bë' rezi'a usecho, lena' rnën quie dza cati iyudyi dyilayu. Na' yaca ángel nacajë' ca que mozo quia' rezil'jë' usecho. ⁴⁰ Cabë' hue ja mozo uzejë' guixi' mala, cana' gaca quie ben' rue cabë' re'en taxi'ibi' bë' iyudyi dyilayu. ⁴¹ Në'ëdi', bichi yugulu benë', huase'ela' yaca ángel quia' tzexil'jë' yugulu ben' ruzze'yela laguedyi, len yugulute yaca los demás ben' napa dula' xquia. ⁴² Na' udze'jë' lëjë' lu'u gui' gabila cuedyiya'jë'. Tanto rei rlajë' gaojë' lejijë'. ⁴³ Pero yaca ben' rue quie xti'idza' Diuzi, huata' xni' quiejë' ca tu rna' xni' oba. Cana' gaca quiejë' zujë' ga r nabë' Xuziro Diuzi tuzioli. Ulehue pensari cabë' nia' le'e, dan' ruen zi tziõñe'ele.

Unë Jesús tu di'idza' quie tu tatzao' negachi'

⁴⁴ Na' una Jesús:

—Yela' r nabë' quie Diuzi nacan ca que tu tatzao' zaca'n za'ala' gula ta negachi' lu'u yu. Na' caora bedzele tu be'mbyu len, becachi'në'n tatula lu'u yu ga bedzelenë'n. Na'ra redaohuetzeguenë' tziõñë' tzegueti'në' yugulu ta de quienë' ta yeya'ohuë' layu na' ga bedzelenë' tu tatzao'.

Unë Jesús tu di'idza' quie tu perla zaca'n za'ala' gula

⁴⁵ Na' una Jesús:

—Yela' rnabè' quie Diuzi nacan ca quie tu ben' re'en ga'o tu perla zaca'n za'ala' gula. ⁴⁶Caora abdzelenè' perla na', na'ra tzionè' tzegueti'nè' yugulu ta de quienè' ta yeya'ohuè' perla na'.

Unè Jesús tu di'idza' quie du yëxo

⁴⁷Na' una Jesús:

—Yela' rnabè' quie Diuzi nacan ca quie du yëxo rudze' benè' lu'u nisadao' ga tzu'u yugu cue' bela. ⁴⁸Caora abedza' bela du yëxo, na'ra rebiojè'n ru'a yu bidyi. Na' rbe'jè' rsèrejè' bia dya'a, redze'jè'ba' lu'u ga'. Na' reru'unjè' tzala'la bia binaca dya'a. ⁴⁹Cana' gaca cati iyudyi quie dyilayu. Huayo ja ángel ta tzesèreyaquè' ben' mala len ben' dya'a. ⁵⁰Na' huaru'unyaquè' yaca ben' mala lu'u gui' gabila cuedyiya'jè'. Tanto rei rla'jè' gaojè' leijè'.

Unè Jesús tu di'idza' quie tu tagula len tu tacubi

⁵¹Na'ra unaba Jesús rëbinè' lëjè':

—¿Baoyoñe'ele yugulu cabè' ta aonia' le'e?

Na' unajè' rëbijè' Jesús:

—Aja' Señor, aoyoñe'endo' yugun.

⁵²Na' una Jesús rëbinè' lëjè':

—Tahuen na' aoyoñe'ele, dan' nu ben' rsèdi guichi la'iya quie Diuzi, na' rioñe'enè' cabè' nan, naca quienè' ca quie ben' xan' yu'u, ben' gabi rdziogue quie. Aozì'nè' tagula ta pca'n xuzinè' quienè'. Lëscan' bënë' gan tazëra tacubi. Tana' lena' bibi rdzioguenè' zan yu'u quienè'.

Cabè' bē Jesús cati bedyinnè' yedyi quienè' Nazaret

(Mr. 6.1-6; Lc. 4.16-30)

⁵³Cati beyudyi bè'lè Jesús leyaquè' di'idza', na' bezè'è zeyogué'. ⁵⁴Na' bedyinnè' yedyi quiè', uzulaohuè' rusèdiè' ja benè' lu'u idao' sinagoga. Na'ra beban ja benè' rëbijè':

—¿Ga uyo ben' niga huesèdi como rioñe'enè' ta zè? ¿Cómo raquè' rue milagro? ⁵⁵Na' zi'i carpintero naquè'. Znè'è naca Maria. Naca bichinè' Santiago, len José, len Simón, len Judas. ⁵⁶Lëscan'a'rè bi' zannè', nita'jabì' ladoro niga. ¿Ga psèdinè' cabè' dan' rnënë' ra'o? —Cana' unajè' quie Jesús.

⁵⁷Pero bibèjè' lëbè' casa cabè' unè'. Na' una Jesús rëbinè' lëjè':

—Con gatezi tzio ben' rguixogue' di'idza' quie Diuzi, nita' ben' hue lëbè' casa. Pero ben' lao yedyi quiè' len ben' naca familia quiè', bihuejè' lëbè' casa. —Cana' una Jesús rëbinè' lëjè'.

⁵⁸Tana' lena', bibè Jesús zè milagro gan', dan' bibèjè' casa quienè'.

14

Cabè' guca cati bëtijè' Juan bautista

(Mr. 6.14-29; Lc. 9.7-9)

¹Na'ra guca dza na' naca Herodes gobernador, ben' rnabè' estado Galilea. Na' udixogue' yaca benè' Herodes cabè' rue Jesús. ²Na'ra una Herodes rëbinè' laguedyiné':

—Ben' rue cana' naquè' Juan bautista. Bebannè' bezè'è ga yu'u ja ben' huati. Tana' de fuerza quiè' ruenè' milagro.

³Na' aozì' Herodes zgula bichinè' Felipe. Lënigula na' laohuè' Herodías. Na' tanun quie Herodías bē Herodes mandado bëxuyaquè' Juan, bdze'jè' lëbè' lu'u dyiguiba, pquiojè' lëbè' caden. ⁴Cana' bē Herodes como dan' una Juan gudyiné' lëbè':

—Bireya'ala' huela'onè' ca nigula quio'.

⁵Na' gu'un Herodes gutinè' Juan, pero bdzebinè' ja benè' dan' rlè'èjè' Juan ben' rnè lao laza Diuzi. ⁶Na' cati uzu dza lani quie Herodes, uyo zi'i nigula Herodías ta bya'abi' lao ja ben' yu'u ja ga raca lani. Lega yaxe Herodes cabè' bëbi'. ⁷Tanto yaxenè' cabè' bëbi' unè' rëbinè' lëbi':

—Con bitezi ta inabo' nē'èdi', naguncaza'n, ruguntia' Diuzi.

⁸Na'ra como dan' abega'n'lëbi' zna'bi' di'idza' cabè' inababi' lëbè', na'ra unabì' rëbibi' Herodes:

—Re'enda' gunlo' nē'èdi' guicho Juan bautista dyian tu lu'u plato.

⁹Cati be rey Herodes cabè' una nigula dao', guquenè' bayèchi'. Pero bënë' mandado huejè' cabè' unababi' lëbè', como dan' cana' abgunnè' Diuzi, babe ben' yu'uja lani ca di'idza' bè'lénè' nigula dao'. ¹⁰Na'ra bënë' mandado yechugojè' luba' Juan ga yu'unè' lu'u dyiguiba. ¹¹Na' yechugojè'n yesanjè' guicho Juan dyian lu'u plato. Bezi' nigula dao' len, beyu'ebi'n zna'bi'.

¹²Na' bdyin ben' quie Juan bezi'jè' cuerpo quienè' ta pcachi'jè'n. Ude na', uyojè' yetixogue'jè' Jesús.

Bgao Jesús ga'yo' mila benë'
(Mr. 6.30-44; Lc. 9.10-17; Jn. 6.1-14)

¹³ Na' cati unezi Jesús cabè' guca quie Juan, na'ra uzè'è zioquè' cuinzè' lu'u barco bdyinnè' ru'a lagun ga bizu ja benè'. Pero cati unezi ja benè' gan' zio Jesús, na' uza'jè' ziojè' ru'a yu bidyi yetilajè' lèbè'. ¹⁴ Cati bero Jesús lu'u barco, blè'èné' nita' ja ben' zè rbezajè' lèbè'. Na' beyèchi'la'adyi'nè' lèjè', beyuenè' ja ben' raca zhue' nu'ajè'. ¹⁵ Como dan' barala, na' uyo ja ben' quie Jesús yeguèdyijè' lèbè':

—Baodze' na'a. Gabi yu'u dyia niga. Na' gudyijè' yeyojè' ja yedyi re' ga'ala' ta ga'ojè' ta gaojè'.

¹⁶ Na' una Jesús rëbinè' lèjè':

—Biruen zi yeyojè'. Ulehue'jè' ta gaojè'.

¹⁷ Na' unajè' rëbijè' Jesús:

—Ga'yo'zi yèta xtila len chopazi bela de. Gabira bide.

¹⁸ Na' una Jesús rëbinè' lèjè':

—Uleguncaran niga.

¹⁹ Na'ra bè Jesús mandado cue' ja benè' lao gui'zi. Na' aozì'nè' ga'yo' yèta xtila len chopa bela. Na' bëxunè'n unè'è guibá rëbinè' Diuzi: "Diuxcalelo'." Na' bzužunè' yèta xtila, bè'nè'n ja ben' quienè', udisijè'n bè'jè'n benè'. ²⁰ Yugulujè' udaojè' beloje' dyè'èdi. Beyudyi bedaojè', bedza' chipchopa ga' naga ta yožo bega'n. ²¹ Ga'yo' mila be'mbyu udaoja, apartela ja nigula len ja xcuidi'.

Uza' Jesús lao nisa
(Mr. 6.45-52; Jn. 6.16-21)

²² Na'ra bè Jesús mandado tzu'u ja ben' quienè' lu'u barco ta cuialaojè' lèbè' tziojè' itzala' lagun. Na' bega'n Jesús ta yese'elè' ja benè' yeyojè' žan yu'u quiejè'. ²³ Bè' beyudyi bese'elè' ja benè' žan yu'u quiejè', na'ra zio Jesús urènè' lao ya'a tzeguelènè' Diuzi di'idza' cuinzinè'. Cati uxin, nezu Jesús na' cuinzinè'. ²⁴ Na' nezu Jesús lao ya'a cati abdyin barco gatzo lagun. Na'ra uzulao rda be bedun', bda'n nisa lè'è barco, redyigan len guzu xcu'udzula, biru'en lato tenan. ²⁵ Na' du balara rza' Jesús lao nisa ubiguè' ga'ala' ga re'jè' lu'u barco. ²⁶ Cati blè'è ja ben' quienè' lèbè' rza'nè' lao nisa, na'ra bdzebijè' uredyia'jè' unèjè':

—jLudza' ben' huati rza' na'!

²⁷ Na' unè Jesús rëbinè' lèjè':

—jNè'èdi' Jesús! jBidzebile!

²⁸ Na' una Pedro rëbinè' Jesús:

—Señor, chi luè' na', ben lato sa' lao nisa guida' gan' zao'.

²⁹ Na' una Jesús rëbinè' lèbè':

—Uda, chi'.

Na' uyèzi Pedro lao barco uzulaohuè' rza'nè' lao nisa ta idyinnè' ga zè Jesús. ³⁰ Caora gucabè' Pedro rda be bedun' fuerte gula, na' bdzebinè' uzulaohuè' bëtoguè' lu'u nisa. Lena' uredyia'nè' rëbinè' Jesús:

—Psela nè'èdi', Señor.

³¹ Na'ra labëxute Jesús nè'è rëbinè' lènè':

—jBizi ledao'zi zudyi'ilèlo' nè'èdi'! jBixquien' rdzebo'?

³² Cati beyu'ujè' lu'u barco, na' uleza be. ³³ Na'ra yaca ben' yu'u lu'u barco, uditzuzibijè' lao Jesús rëbijè' lèbè':

—Luè' sí, tali naco' ži'i Diuzi.

Beyue Jesús ben' raca zhue', ja ben' quie yu nebaba Genesaret
(Mr. 6.53-56)

³⁴ Na' udejè' lao lagun bdyinjè' itzala' lagun ga nebaba Genesaret. ³⁵ Caora bezaque ja ben' nita' na' Jesús na', na'ra use'ela'jè' di'idza' lao yugulu ben' yedyi nita'ja na'. Na' nu'ajè' ben' raca zhue' bdyinjè' ga zè Jesús. ³⁶ Na' unabajè' chi bihue'nè' lato guxujè' siquiera diba zu nì'a žabè'. Na' yugulu ja ben' bëxuja len, beyacajè'.

15

Unè Jesús quie ta nuen benè' badza' lao Diuzi
(Mr. 7.1-23)

¹ Na'ra uza' bala ben' partido fariseo len bala ben' rusèdi ley quie Moisés, uza'jè' ciudad Jerusalén bdyinjè' ga zu Jesús. Na' ubiga'jè' rëbijè' lèbè':

² —jBixquien' birue ja ben' quio' cabè' naca costumbre quie xuzixta'oro? Birguibijè' na'ajè' cati zagaojè' tacuenda ilè'è Diuzi lèjè' nacajè' yèri.

³ Na' una Jesús rëbinè' lèjè':

—¿Bixquien' reru'unle tzala'la cabè' mandado bè Diuzi huero, na' nenaole costumbre ruele ta biuna Diuzi? ⁴ Dza tiempote una Diuzi: “Gapala'nle xuzi zna'le.” Lèscan' una Diuzi: “Nu ben' rnaya' quie xuzi znè'è, reya'ala' gatinè!” ⁵ Pero le'e rnale ru'en lato ina benè' yèbijè' xuzi zna'jè': “Bibi de guna' le'e, dan' yugulu ta de quia' babi'a Diuzi gacan gun quienè!” ⁶ Le'e rnale chi yèbiro xuzi zna'ro cana', bira nacan cuenda quiero gacalèro xuzi zna'ro. Cana' rudyigale tzala'la cabè' mandado bè Diuzi huero, na' nenaole costumbre ruele ta biuna Diuzi. ⁷ ¿Le'e ben'rnè di'idza' de ladzazi! Dyè'èdi udixogue' ben' profeta Isaías cabè' raca quiele caora bzunè' di'idza' lè'è guichi la'ya quie Diuzi dza na'. Lèdi'idza' na' rnèn caniga:

⁸ Lèben' niga rionela'adyi'jè' Diuzi de di'idza'zi, birionela'adyi'jè' nè'èdi' du guicho du la'adyi'jè'.

⁹ Bibi sirve gapala'njè' Diuzi.

Ta racazi la'adyi'jè' rusèdijè' benè', yè' rzi'jè' rnajè' cana' una Diuzi.

¹⁰ Na'ra guzi Jesús ja benè' rëbinè' lèjè':

—Ulezècara nagale ta tzioñe'ele: ¹¹ Ca ta tzu'u lu'u ru'a benè' gaojè', binacajè' badza' lao Diuzi. Pero di'idza' mala rero lu'u ru'ajè', lena' nuen benè' badza' lao Diuzi. —Cana' una Jesús rëbinè' lèjè'.

¹² Na'ra ubiga' ja ben' quie Jesús ga zènè' rëbijè' lèbè':

—¿Bigucabè'lo' bdza' ja ben' partido fariseo cabè' unao' bachi?

¹³ Na' una Jesús rëbinè' lèjè':

—Nacajè' ca quie guixi' mala. Na' bizi puro bini dya'a raza Xuza' Diuzi zu guibá. Yugulu ta biguza Xuza' Diuzi, huadolon len luanan. ¹⁴ Ulesan quiejè'. Nacajè' ca quie ben' laochula, ben' tzhua'a itu ben' laochula. Chi tzhua'a tu ben' laochula itu ben' laochula tu neza, rupatejè' iguinujè' lu'u yèro.

¹⁵ Na' una Pedro rëbinè' Jesús:

—Yexi'idzo' nètò' bi re'en ina di'idza' baonao'.

¹⁶ Na' una Jesús rëbinè' lèjè':

—¿Lente le'e biuyoñe'erèle? ¹⁷ ¿Binezile yugu ta rao benè' zion lu'u lè'èjè', te na' yeguichijè'n binuen lèjè' badza' lao Diuzi? ¹⁸ Pero di'idza' mala rero lu'u ru'ajè', len ulèn laxta'ojè'. Lena' nuen lèjè' badza' lao Diuzi. ¹⁹ Cati rero pensari mala lu'u laxta'ojè', caora na' rutijè' laguedyijè', rdalèjè' nigula quie ben' tula, rdalèjè' nigula cuidi', rbanjè' quie laguedyijè', rzi'jè' yè' laguedyijè', ru'ejè' di'idza' bižo. ²⁰ Chi ruejè' cana', nacajè' badza' lao Diuzi. Pero chi raojè' du bineyèri na'ajè', lena' binuen lèjè' badza' lao Diuzi. —Cana' una Jesús rëbinè' lèjè'.

Tu nigula binaca ben' Israel gulenè' quie Jesús

(Mr. 7.24-30)

²¹ Na' uza' Jesús zioguè'. Na' ga bdyinnè' nacan ga'ala' ga re' ciudad Tiro len ciudad Sidón. ²² Na' uza' tu nigula Cananea, ben' nita' ciudad na', zioguè' bdyinnè' ga zu Jesús. Rbedyiya'nè' unè' rulidzanè' Jesús:

—Señor, zi'i rey David luè', beyèchi'la'adyi' nè'èdi'. Yu'u taxi'ibi' lu'u laxta'o zi'ina' nigula. Lega ruluquen lèbi'.

²³ Pero ni tu di'idza' biunè Jesús. Na' ubiga' ja ben' quie' unajè' rëbijè' lèbè':

—Ulaolo' nigula ni, dan' za'nè' zenaonè' ra'o, rbedyiya'nè'.

²⁴ Na' una Jesús rëbinè' lèbè':

—Lao ja ben' Israelzi aose'ela' Diuzi nè'èdi'. Nacajè' ca quie beco' zi'ila' aoniti tu neza.

²⁵ Na' ubiga' nigula ga zè Jesús, uditzunè' zibinè' laohué' unè' rëbinè' lèbè':

—Señor, gualè nè'èdi'.

²⁶ Na'ra una Jesús rëbinè' lèbè':

—Bireya'ala' si'ro yela' huao ta rega'n rao yaca xcuidi', tzechu'unron ta gao yaca beco' dao'.

²⁷ Pero na' una nigula na' rëbinè' Jesús:

—Sí, Señor, pero lente yaca beco' dao' raoyacaba' yaca pedazo rguino layu ga rao yaca xcuidi'.

²⁸ Na' una Jesús rëbinè' lèbè':

—Zana', dan' rzudyi'ilèlo' nè'èdi' dyè'èdi gula, huacan cabè' re'enlo'. —Cana' una Jesús rëbinè' lèbè'.

Na'ra lèhora na'tezi, beyaca zi'inè' dya'a.

Beyue Jesús ja ben' zè, ben' raca mala quieja

²⁹ Na' uza' Jesús zioguè' udenè' ru'a lagun quie Galilea, bdyinnè' urènè' ure'nè' tu lao ya'a. ³⁰ Na' bdyin ja ben' zè ga zè Jesús. Nu'ajè' nu ben' zi, len ben' laochula, len ben' biraca rnè, len ben' neseco nè'è, len ben' neseco ni'e. Nu'ajè' zè ben' raca zhue'. Na' udixojè' lèjè'

laohuë', beyuenë' lëjë'. ³¹ Cana' beban ja benë' cati blë'ëjë' cabë' bë Jesús quie ben' naca mala quie. Blë'ëjë' benë' ben' biraca inë, blë'ëjë' abelë'ë ben' laochula. Na'ra unajë' rëbijë' laguedyijë': "Naca Diuzi quie ben' Israel ben' ze." Cana' unajë'.

Bgao Jesús tapa mila benë'
(Mr. 8.1-10)

³² Na' guzi Jesús yaca ben' quienë' unë' rëbinë' lëjë':
—Reyëchi'la'adya' yaca ben' niga, dan' baguca tzona dza zulëjë' në'ëdi' niga, abeya ta gaojë'. Bireya'ala' yese'ela'jë' zan yu'u quiejë', dan' binegaojë' usu'unan lëjë' tu neza.

³³ Na' una ja ben' quienë' rëbijë' lëbë':
—Biži huero idzeleru yela' huao ta gao ja ben' zë niga. Gabi yu'u dyia ni.

³⁴ Na' una Jesús rëbinë' lëjë':
—¿Bala yëta xtila de quiele?

Na' unajë' rëbijë' Jesús:
—Gadyizin len tu chopazi bela dao'.

³⁵ Na' ra bë Jesús mandado cue' ja benë' layu. ³⁶ Na' uzi'në' bëxunë' gadyi yëta xtila len ja bela, unë' rëbinë' Diuzi: "Diuxcaleo'". Na'ra bżuzunë'n bë'në'n ben' quie', udisijë'n bë'jë'n yaca benë'. ³⁷ Na' aodaojë' yugulujë' belojë'. Ude beyudyi na', bedza' gadyi chicuiti tayožo bega'n. ³⁸ Na' aodao tapa mila be'mbyu, apartela nigula len xcuidi'. ³⁹ Ude beyudyi udaojë', bese'ela' Jesús lëjë' zan yu'u quiejë'. Na' uyu'unë' lu'u barco uza'në' zionë' yu nebaba Magdala.

16

Ja ben' partido fariseo len ja ben' partido saduceo gu'unjë' hue Jesús tu milagro ta ilë'ëjë'
(Mr. 8.11-13; Lc. 12.54-56)

¹ Na'ra uyo ben' partido fariseo, len ben' partido saduceo yena'jë' Jesús ta huejë' trampa quienë' ta gaojë' lëbë' xquia chi bihue ca ta inabajë' huenë'. Cana' unabajë' huenë' tu milagro quie zan guibá ta ilë'ëjë'. ² Pero na' una Jesús rëbinë' lëjë':

—Como dan' rna' zna guibá du zadze', na'ra inale: "Huen dya'a uxe." ³ Lëscan' cati zë beo zna guibá du ziladao', na'ra inale: "Bihuen dya'a na'a." Pero rnia' le'e, ben' tondo nacale. Banezile bi ta ilë'ële ta yezaque'le chi huen dya'a, chi bihuen dya'a, du na'a, du uxe. Pero binezile bi ta ilë'ële ta yezaque'le bi raca lao yedyi layu dza quiele. ⁴ Yela' ben' mala quiele, yela' psanla'adyi' Diuzi quiele, rnabale hua' milagro ilë'ële. Pero rnia' le'e, tuzi milagro ilë'ële, huëlë'ële gaca quia' cabë' milagro guca quie ben' profeta Jonás.

Te beyudyi una Jesús cana', psannë' lëjë' uza'në' zioguë'.

Bireya'ala' gacaro pensari ca pensari raca ja ben' partido fariseo len ja ben' partido saduceo

(Mr. 8.14-21)

⁵ Na' uza' Jesús lënë' yaca ben' quienë' ziojë' itzala' lagun. Na' agula'adyi' ja ben' quie Jesús hua'ajë' yëta xtila. ⁶ Na'ra una Jesús rëbinë' lëjë':

—Cani rnia' le'e, gapale cuidado quie levadura quie ben' partido fariseo len ben' partido saduceo.

⁷ Na' uzulao ja ben' quie Jesús rëbijë' laguedyijë':

—Quie dan' binu'aro yëta xtila unë' ra'o cana'.

⁸ Caora na' gucabë' Jesús cabë' pensari racajë', na'ra unë' rëbinë' lëjë':

—¿Bixquien' rdëbile quie yëta xtila? ¿Binegalele dyë'ëdi' quia'! ⁹ ¿Binetzioñe'ele cabë' naca quia'? ¿Agula'adyi'le cabë' bia' quie lao ga'yo' yëta xtila? ¿Bireza'la'adyi'le bala ga' naga ta yožo bega'n bezi'le? ¹⁰ ¿Lëzi bireza'la'adyi'le cabë' bia' quie gadyi yëta xtila bżożoga'n udao ja tapa mila ja benë'? ¿Bireza'la'adyi'le bala chicuiti ta yožo bega'n bezi'le? ¹¹ ¿Bixquien' biuyoñe'ele quele quie yëta xtila unia' caora unia' le'e ta gapale cuidado quie levadura quie ben' partido fariseo len ben' partido saduceo?

¹² Na'ra uyofne'ejë' biunë' Jesús quie levadurazi ta rudze'jë' yëta xtila. Unë'rë Jesús quie pensari raca ja ben' partido fariseo len ja ben' partido saduceo. Unë' reya'ala' gapajë' cuidado ta bigacajë' pensari ca pensari raca ja ben' partido fariseo len ja ben' partido saduceo.

Unë Pedro naca Jesús Cristo, ben' use'ela' Diuzi
(Mr. 8.27-30; Lc. 9.18-20)

¹³ Cati bdyinlë Jesús yaca ben' quienë' yu nebaba Cesarea de Filipino, na'ra unë' rëbinë' ja ben' quie':

—¿Biži rna ja benë' naca' në'ëdi', bichi yugulu benë'?

¹⁴ Na'ra una ja ben' quie Jesús rëbinë' lëbë':

—Balajë' rnajë' naco' Juan bautista. Ibalajë' rnajë' naco' tu ben' profeta tula, ben' unita' dza na'la.

¹⁵ Na' una Jesús rëbinë' lëjë':

—¿Cabiži ina le'e naca' në'ëdi'?

¹⁶ Na'ra una Simón Pedro rëbinë' lëbë':

—Luë' naco' Cristo, ži'i Diuzi, ben' neban tuzioli.

¹⁷ Na'ra una Jesús rëbinë' Pedro:

—Tahuen gula baonao', Simón, ži'i Jonás. Quele benë' bzioñe'enë' luë' cabë' naca' në'ëdi', dechan' Xuza' Diuzi zu guibá. ¹⁸ Në'ëdi' rnia' luë' naco' Pedro, ta inaro xti'idza'ro "yo". Con cabë' unao' quia' unao' naca' ži'i Diuzi, cana' cuioga' yaca ben' gale quia', yaca ben' rue quie xti'idza'. Ba'ala'cazi chi yugulu taxi'ibi' huejan dila ta udyiagu'i'jan ja ben' rale quia', bisuejan huejan gan. ¹⁹ Guna' luë' yela' rnabë' quia' ta tzetixogue'lo' ja benë' bi huejë' ta tzu'ujë' ga rnabë' Diuzi. Con cabë' yëbo'jë' huejë', nacan zi huejë'n, na' huazu Diuzi puesto con ca inao'. Lëscan' con cabë' yëbo'jë' bihuejë', nacan zi bihuejë'n, na' lëscan' huazu Diuzi puesto con ca inao'.

²⁰ Na' ra gudyi Jesús lëjë' ta biquixogue'jë' benë' de que lëbë' naquë' Cristo.

Udixogue' Jesús cabë' gaca quie cati gatinë'

(Mr. 8.31—9.1; Lc. 9.22-27)

²¹ Na'ra uzulao Jesús ruxi'idze'në' yaca ben' quië' de que ruen zi yeyonë' ciudad Jerusalén. Ruxi'idze'në' lëjë' cabë' usaca yaca benë', len ja ben' rnabë', len ja xan' pxuzi, len ja ben' rusëdi ley quie Moisés lëbë', na' gutijë' lëbë', pero huebannë' lao tzona dza. ²² Na'ra uquië' Pedro Jesús tzala'la uzulaonë' rdilanë' Jesús rëbinë' lëbë':

—¡Bigue'en Diuzi gaca quio' cabë' nao', Señor! ¡Nica gacazi quio' luë' cana'!

²³ Na'ra uyëcho Jesús ta inë Pedro laohuë' rëbinë' lëbë':

—Bebiga' tzala'la, Satanás. Tazëdi gula ruelo' quia'. Biraco' pensari quie Diuzi. Pensari quie benë' yu'ulo'.

²⁴ Na'ra una Jesús rëbinë' ja ben' quienë':

—Chi nu ben' re'en inao në'ëdi', re'ennan bira inaoyaquë' ca rna pensari quieyaquë'. Re'ennan bidzebiyaquë' naoyaquë' në'ëdi' yugu dza, ba'ala'cazi ruen žudyi guti benë' leyaquë'. ²⁵ Nu ben' rdzebi inao në'ëdi', dan' rdzebinë' gatinë' tanun quia', bihue' Diuzi lëbë' yela' neban tuzioli. Pero nu ben' inao në'ëdi' birdzebinë' gatinë' tanun quia', hue' Diuzi lëbë' yela' neban tuzioli. ²⁶ ¿Biži gan de quie nu benë' anaca quie lao yugulute ta de lao yedyi layu, chi bigata' yela' neban quië' tuzioli? ¿Ca gacala dumí re'ennan ta ga'o yaca benë' yela' naban tuzioli? ²⁷ Naca' bichi yugulu benë'. Huaya'a, pero na' yeguidia' tatula lao yedyi layu, zeyu'a yela' rnabë' quie Xuza'. Caora na' yeguidalia' yaca ángel quienë' ta ichugulia' quie ja benë', quizoga'jë' cabë' bëjë' dza udajë' lao dylalay, chi bëjë' tahuen, chi bëjë' tamala. ²⁸ Tali rnia' le'e, binegati bala le'e nita' niga len në'ëdi' tu binelë'ë inabi'a lao yedyi layu, në'ëdi' bichi yugulu benë'.

17

Ca guca bë' betza' cuin Jesús zaca'lao lao yaca ben' quienë'

(Mr. 9.2-13; Lc. 9.28-36)

¹ Na'ra guca lao xopa dza, uquië' Jesús Pedro, len Santiago, len Juan bi' bichi Santiago, uza'jë' ziojë' tu lao ya'a sibi. ² Na' zë Jesús laojë' cati betza' cuinnë', una' laohuë' ca xni' oba. Na' Zabë' betza'n una'n bezëri gula ca xni' gui'. ³ Na'ra blë'ëjë' labdyinte Moisés len Elías ru'elëjë' Jesús di'idza'. ⁴ Na' una Pedro rëbinë' Jesús:

—Señor, tahuen na' nita'ndo' niga. Chi re'enlo', huendo' tzona yu'u guizidao'. Huendo' tun quio', huendo' itun quie Moisés, len itun quie Elías.

⁵ Na' tu raca zë Pedro nanë' cana', cati za' tu beo bezëri gula bdubin lëjë'. Na' lu'u beo na' bejë' tu rchi' benë' unënë' në':

—Lëži'ina' niga, lega nedý'ëda'në'. Lega rexeda' ca ruenë'. Ulezë'naga cabë' rnanë'.

⁶ Na' cati be ja ben' quie Jesús cana', na' udze'jë' gutajë' layu guzu ru'ala dan' bdzebitzeguejë'. ⁷ Na'ra bebiga' Jesús gan' dejë' na' blapanë' lëjë' unë' rëbinë' lëjë':

—Uleyasa, bidzebile.

⁸ Na' cati beyasajë', rna'jë' tuzi Jesús zënë' na'. Ganura nita' len lëbë'.

⁹ Na' bë' zeza'jë' zeyëzijë' lë'ë ya'a na', una Jesús rëbinë' lëjë':

—Biquixogue'le ja benë' cabë' ta blë'ële guca quia', në'ëdi', ben' naca bichi yugulu benë'. Caora agutia' bebana', na'ra huazaque' quixogue'lejë'.

¹⁰ Na'ra una ja ben' quie Jesús rëbijë' lënë':

—Rna yaca ben' rusëdi ley quie Moisés de que za' guida Elías tanëro, na'ra guida ben' ise'ela' Diuzi. ¿Ta balejë' rnajë' cana'?

11 Na' una Jesús rëbinë' lëjë':
 —Tali na' za' guida Elías tanëro, ucuzeanë' duzete cuenda guida itu ben' ise'ela' Diuzi.
 12 Pero në'ëdi' rnia' le'e, abida Elías, pero bibezaque ja benë' chi lëbë'. Psacajë' lëbë' bizinaquezi. Lëscan' në'ëdi', ben' naca bichi yugulu benë', usacajë' në'ëdi' bizinaquezi.
 13 Na'ra gucabë' ben' quie Jesús unënë' quie Juan bautista caora unë': "Tali na' za' guida Elías tanëro."

Beyue Jesús tu xcuidi' byu yu'ubi' taxi'ibi' mala gula
 (Mr. 9.14-29; Lc. 9.37-43)

14 Cati bedyinjë' ga negu'udi' ja benë', na'ra ubiga' tu be'mbyu gan' zë Jesús uditzunë' zibinë' laohuë' unë' rëbinë' lëbë':

15 —Señor, ¿biyeyëchi'la'adyo' zi'ina'? Racabi' žuguti. Lega rusacan lëbi'. Tazë lasa habzalan lëbi' lao gui' len lu'u nisa. 16 Ni rdehua'abi' lao ja ben' quio', pero birzaque'jë' yeyuejë'bi'.

17 Na' una Jesús rëbinë' ben' zu na':
 —Le'e biralele quia'. Biyu'ule pensari dya'a. ¿Gaca tu tiempo sulia' le'e, na' bigalele quia'? ¿Gaca tu tiempo sulia' le'e, na' birioñe'ele? Yexi'bi' niga.

18 Na'ra udila Jesús taxi'ibi' yu'u lu'u laxta'o xcuidi' byu. Na' bebioguë' lenan. Cana' labeyacatebi'.

19 Ude beyudyi na', uquië' ben' quie Jesús lëbë' tzala'la unajë' rëbijë' lëbë':

—¿Bixquien' biuzaque'ndo' yebiondo' taxi'ibi'?

20 Na' una Jesús rëbinë' lëjë':
 —Biuzaque'le dan' binegalele dyë'ëdi. Tali rnia' le'e, naca bini mostaza tu bini dao' bicu'zi. Na' chi hue quiele xti'idza' Diuzi la'acazi lë'ëti'dao' bicu'zi ca tadao' bicu' naca bini mostaza, huazaque' yëbile tu ya'a: "Beyo yesu na'la", na' huayon. Pues huazaque' huele yugulute. 21 Pero ca naca taxi'ibi' bebioga' na'a, chi biulidzale Diuzi, chi bihuele ubasi, bisaque' cuiolen yeyon.

Udixogue' Jesús tatula cabë' gaca quië' bë' gatinë'
 (Mr. 9.30-32; Lc. 9.43-45)

22 Tu raca rdalë Jesús ben' quienë' estado Galilea, udixogue'në' lëjë' cabë' gaca quienë' dan' naquë' bichi yugulu benë'. Unë' usedyin ja benë' lëbë' lao na'a ja ben' rudie lëbë' 23 ta gutijë' lëbë', pero huebannë' tatula gaca lao tzona dza. Cati be yaca ben' quienë' cabë' unë', guque'jë' bayëchi' gula.

Unë Jesús quie impuesto quie idao' rnabë'ra

24 Na'ra uza' Jesús lënë' ja ben' quië' ziojë' bdyinjë' ciudad Capernaum. Na' uyo ben' huequižu quie idao' rnabë'ra yena'jë' Pedro unajë' rëbijë' lëbë':

—¿Biquižu maestro quiele impuesto quie idao' rnabë'ra?

25 Na' una Pedro rëbinë' lëjë':

—Aja', huaguizunë'n.

Na' uza' Pedro zionë' zan yu'u. Cati bdyinnë' zan yu'u, na' una Jesús rëbinë' lëbë':

—¿Bi ca inao', Simón? ¿Cati ruquižu ja rey impuesto, nuži ruquižujë'? ¿Ruquižujë' ben' yedyi quiejë' o chi ruquižojë' ben' za' yedyi tula?

26 Na' una Pedro rëbinë' lëbë':

—Ruquižujë' ben' za' yedyi tula.

Na' una Jesús rëbinë' lëbë':

—Tana' lena' biruen zi quižu ben' yedyi quie rey impuesto. 27 Pero ta biidza' nitujë' ra'o, quižoro quie impuesto. Na' uyo ru'a lagun, bdze' yëchi' lu'u nisa. Cati guëbi bela len, yeya'ala'n len lëba', caora na' ixa'lo' ru'aba' yedzelelo' centavo ta quižulo' para luë' len në'ëdi' quie impuesto. Na' uyo yetizo'n na'a.

18

¿Nuži ben' nacara ben' belao?
 (Mr. 9.33-37; Lc. 9.46-48)

1 Na'ra bebiga' yaca ben' quie Jesús unajë' rëbijë' lëbë':

—¿Nuži ben' nacara ben' belao entre nëto'?

2 Na' guži Jesús tu xcuidi' byu bzunë'bi' gatzo la'ojë'. 3 Unë' rëbinë' lëjë':

—Tali rnia' le'e, chi biutza'le pensari quiele, galele quie Diuzi ca rale nu xcuidi' quie xuzibi', bisaque' tzirole guibá ga rnabë' Diuzi. 4 Nu ben' rzudyi'ilë Diuzi cabë' rzudyi'ilë xcuidi' xuzibi', lëben' na' nacara ben' belao guibá ga rnabë' Diuzi. 5 Nu ben' rzi' xcuidi' ca bi' niga tanun quia', nuen quienë' lente në'ëdi' rzi'rënë'.

Unë Jesús nacan zudyi gula huero tamala
(Mr. 9.42-48; Lc. 17.1-2)

⁶ Na' una Jesús:

—Nu ben' rudze'yela tu xcuidi' rale quia' ta huebi' tamala, hue Diuzi lëbë' castigo že gula. Tadya'acala quienë' erio tu yo že luba'në' tzechu'unjë' lëbë' lu'u yao že ga naca zitu' gula, quele ca castigo hue Diuzi lëbë'. ⁷ Nacan bayëchi' gula quie ja ben' nita' lao yedyi layu, dan' birdziogue nu rudze'yela lëjë' huejë' tamala. Nita'cazi nu rudze'yela ja benë' huejë' tamala, pero hue Diuzi castigo že gula nu ben' rudze'yela benë' huejë' tamala.

⁸ 'Quie lena', chi rnën le'e huelële ni'a na'ale tamala, nacalan dya'a ichugulen chu'unlen zitu' tzirole guibá ca ben' nedypa ni'a në'ë, quele ca ta tzirole gui' gabila tuziolen len ni'a na'ale. ⁹ Lëscan' chi rnën le'e huelële laole tamala, nacalan dya'a cuiolen chu'unlen zitu' tzirole guibá ca ben' nero yolaohue, quele ca ta tzirole gui' gabila len rupa la'a yolaole.

Unë Jesús tu di'idza' quie beco' zi'ila', bia uniti
(Lc. 15.3-7)

¹⁰ Na' una Jesús:

—Bireya'ala' ilë'ële zi' nu xcuidi' rale quia'. Rnia' le'e zu ángel, ben' rapa ja xcuidi', zujë' lao Xuza' Diuzi zu guibá yugu dza. ¹¹ Në'ëdi', ben' naca bichi yugulu benë', uza'a bida' lao dyilayu tacuenda ute usela' yugu ben' nita' lao yedyi layu como dan' yela' napa xquia quiejë' tziójë' lao gui' gabila.

¹² '¿Bica nale? Chi rapa tu be'mbyu tu gayuhua beco' zi'ila', na' aoniti tuba', ¿quele uca'nnë'jaba' na'azi tu tzediloguë' bia uniti? ¹³ Chi yedzelenë'ba', lega yedaohuenë' biunitiba'. Redaohuenë' quie yaca bia biuniti, pero redaohueteranë' quie bia uniti bedzela. ¹⁴ Lëscan' Xuziro Diuzi zu guibá, bire'ennë' initi ni tu xcuidi'.

Cabë' reya'ala' huero si'zero quie laguedyiro
(Lc. 17.3)

¹⁵ Na' una Jesús:

—Chi bë tu ben' rue quie xti'idza' Diuzi tu tamala quio', reya'ala' hue'lao'në' tu di'idza' rupazile ta inezinë' ca tamala bënë' quio'. Cana' gacalëlo'në' usannë' tamala, huenë' tadya'a. ¹⁶ Pero chi bihuenë' casa quio', na' reya'ala' guëzo' ichopa tzona ben' rue quie xti'idza' Diuzi ta gacajë' testigo. Cana' inita' chopa tzona ben' naca testigo quio' cabë' naca di'idza' hue'lao'në'. ¹⁷ Chi bihuenë' casa quie ja testigo quio', na'ra yëbo' ja yugulu ben' rue quie xti'idza' Diuzi cabë' dan' bënë' quio'. Na' chi bihuenë' casa quie ja yugulu ben' rue quie xti'idza' Diuzi, na'ra reya'ala' ilë'ëlenë' ca nu ben' binuebë' chi zu Diuzi, ilë'ëlenë' ca nu ben' mala gula.

¹⁸ 'Tali rnia' le'e, con cabë' yëbile yaca ben' rue quie xti'idza' Diuzi ta hueyaquë' quie ben' bë tamala, nacan zi hueyaquë'n, huazu Diuzi puesto con ca inale. Lëzi con cabë' yëbile yaca ben' rue quie xti'idza' Diuzi ta bihueyaquë' quie ben' bë tamala, nacan zi bihueyaquë'n, lëscan' huazu Diuzi puesto con ca inale.

¹⁹ 'Lëzi rnia' le'e, chi chopa le'e bega'nle de acuerdo hue'lële Xuza' Diuzi zu guibá di'idza', inabale bi ta re'enle huenë', na' huenë' ca ta unabale huenë'. ²⁰ Lëzi rnia' le'e, ga regu'udi' chopa tzona ben' rale quia', rulidzajë' në'ëdi', nazua' gatzo la'ojë'.

²¹ Na'ra bebiga' Pedro ga zë Jesús unë' rëbinë' lëbë':

—Señor, ¿bala lasa ruen zi si'zia' quie ben' rue quie xti'idza' Diuzi ca tamala ruenë' quia'? ¿Lao gadyi lasazi si'zia' quienë'?

²² Na'ra una Jesús rëbinë' Pedro:

—Quele lao gadyi lasazi si'zelo' quienë', pero con balatezi lasa inabanë'n si'zelo' quienë'.

Bzu Jesús tu ejemplo quie tu mozo, ben' bigu'un si'ze quie laguedyi

²³ Na' una Jesús:

—Na' rnia' le'e cabë' r nabë' Diuzi. Ruenë' ca nu rey, ben' bëlë ja mozo quienë' cuenda gaca tu reya'ala'jë' quienë'. ²⁴ Uzulaonë' ruenë' cuenda len ja mozo quie' cati yexi'në' tunë', ben' reya'ala' quienë' dumi že gula. ²⁵ Pero como bide dumi ta yeguizugüë' quie rey, na'ra bë rey mandado guti'në' yugulu ta de quienë', huenë' dyin sin lazu len nigula quienë' len zi'inë' ta yela' ta reya'ala'në' quie rey. ²⁶ Na'ra uditzužibi mozo na' lao rey na', unabayëchi'në' rëbinë' rey: “Señor, uži'že quia'. Nayequizuga'n duženan.” ²⁷ Na' beyëchi'la'adyi' rey na' lëbë', unë' rëbinë' lëbë': “Huazi'zia' quio', gabi reya'alo' quia'. Anaco' libre.” ²⁸ Cati beronë' gan' zu rey na', na'ra bedilanë' itu mozo laguedyinë', ben' reya'ala' quienë' tu chopa tzona dumi dao'. Na' aoženë' du luba'në' rëbinë' lënë': “;Udižu ta reya'alo' quia'!” ²⁹ Na'ra uditzužibi laguedyinë' unabayëchi'në' rëbinë' lënë': “Señor, uži'že quia'. Nayequizuga'n duženan.” ³⁰ Pero bigu'unne', na' uyonë' yedze'në' lënë' lu'u dyiguiba ta yeguižunë'n. ³¹ Cati blë'ë ja mozo tula cabë' bënë' quienë', lega beyëchi'la'adyi'jë' lënë'

uyojë' yeguëdyjë' rey na' ca ta użacanë'. ³² Na'ra guzi rey na' mozo quië' unë' rëbinë' lënë': "jBen' mala gula naco'! Në'ëdi' uzi'zia' quio' ca ta reya'alo' quia' como dan' unabayëcho' laohua'. ³³ Reya'ala' yeyëchi'la'adyi'rao' laguedyilo' cabë' bia' në'ëdi', beyëchi'la'adya' luë'." ³⁴ Na'ra bdza'tzegue rey na' lënë'. Bënë' mandado udze'jë' lënë' lu'u dyiguiba ta yeguizunë'n ta reya'ala'në' quienë'.

³⁵ Na' bë' beyudyi di'idza' una Jesús, unë' rëbinë' ben' quienë':

—Cabë' bë rey na', cana'rë hue Xuza' Diuzi zu guibá conlë le'e, chi bisi'zele quie laguedyile du guicho du la'adyi'le cabë' tamala bënë' quiele, lëscan' bisi'ze Diuzi le'e cabë' tamala ruele. —Cana' una Jesús rëbinë' lëjë'.

19

Unë Jesús cabë' naca quie ben' rusan laguedyi

(Mr. 10.1-12; Lc. 16.18)

¹ Te beyudyi una Jesús cana', uza'në' estado Galilea, ziolënë' yaca ben' quië' estado Judea itzala' yao Jordán. ² Na' unao ja ben' zë lëbë' ga zioгуë' beyuenë' ja ben' raca žhue'.

³ Na'ra bebiga' chopa tzona ben' partido fariseo ga zë Jesús ta huejë' lëbë' trampa gaojë' lëbë' xquia. Tana' unajë' rëbijë' lëbë':

—¿Ta bala nitu nitu biru'en lato usanjë' nigula quiejë'?

⁴ Na' una Jesús rëbinë' lëjë':

—¿Binena'le cabë' rnë lë'ë la'iya guichi quie Diuzi? ¿Binenezile cabë' bënë' cati ulëchinë' dyilayu, bzaloguë' tu be'mbyu len tu nigula?

⁵ Lëscan' una Jesús rëbinë' lëjë':

—Quie lena' rusan be'mbyu uzi žnë'ë ta sulënë' nigula quienë', gacajë' tuzi. ⁶ Cati banacajë' tuzi, bira naca quiejë' ca quie chopa benë'. Dyin quie Diuzi nuelëjë' tuzi. Tana' lena' biru'en lato usanjë' laguedyijë'.

⁷ Na' unajë' rëbijë' lëbë':

—¿Bixquien', chí', bë' Moisés lato ichisa be'mbyu guichi ga rue'n di'idza' bira re'ennë' sulënë' nigula? Na' hue'në' nigula guichi ta usannë' lënë'.

⁸ Na' una Jesús rëbinë' lëjë':

—Yela' zidi quie ja benë' bë' Moisés lato usanjë' nigula quiejë'. Pero dza ulëchi Diuzi dyilayu, bigu'unnë' hue yaca benë' cana'. ⁹ Në'ëdi' rnia' le'e, chi rusan be'mbyu nigula quië', na' uzi'në' nigula tula, lena' nacan xquia quië' lao Diuzi. Chi psannë' lëbë' dan' udalënë' be'mbyu tula, lena' binacan xquia quië' lao Diuzi. Lëscan' chi yezi' be'mbyu tu nigula psan xquihue, lena' nacan xquia quië' lao Diuzi.

¹⁰ Na' una ben' quië Jesús rëbinë' lëbë':

—Chi nacan cabë' rnao' quie be'mbyu len nigula quienë', bisi'calanë' nigula.

¹¹ Na' una Jesús rëbinë' lëjë':

—Quele yugu ja benë' rioñe'ejë' cabë' rnë lë'ë guichi la'iya quie Diuzi. Yaca ben' bë' Diuzi yela' rioñe'e quie, lëjë' rioñe'ejë'n. ¹² Bala ja be'mbyu binaca quiejë' sulëjë' nigula. Cana' naca quiejë' cati golotejë'. Ibala ja be'mbyu binaca quiejë' sulëjë' nigula, dan' ulio benë' bini quiejë'. Ibala ja benë' bisulëjë' nigula tacuenda huejë' puro dyin quie Diuzi. Nu ben' ruzënaga cabë' rnia', reya'ala' uzë'nagajë' dyë'ëdi.

Bëla'iya Jesús ja xcuidi'

(Mr. 10.13-16; Lc. 18.15-17)

¹³ Na'ra nequië' ja benë' bala ja xcuidi' ga zë Jesús ta guxonë' guichojabi' ta huela'iyannë' lëjabi' hue'lënë' Diuzi di'idza' tanun quiejabi'. Pero ja ben' quienë' uzulaojë' rdilajë' ja ben' nequië' ja xcuidi'. ¹⁴ Na' una Jesús rëbinë' ben' quië':

—Ulesan quiejë'. Guidagara ja xcuidi' sulëjabi' në'ëdi'. Nu ben' tzio ga rnabë' Diuzi ruen zi sudyi'ilëjë' Diuzi cabë' rzudyi'ilë xcuidi' len xuzijabi'.

¹⁵ Na' bëxonë' guicho ja xcuidi' ta bëla'iyannë' lëjabi'. Ude na' uzë'ë zioгуë'.

Tu ben' ru'abe nacanë' ben' uña'a bë'lënë' Jesús di'idza'

(Mr. 10.17-31; Lc. 18.18-30)

¹⁶ Na'ra uyo tu ben' ru'abe yena'në' Jesús. Na' unanë' rëbinë' lëbë':

—Maestro, ben' huen naco'. ¿Ca bi reya'ala' hua' ta gata' yela' neban quia' tuzioli?

¹⁷ Na' una Jesús rëbinë' lënë':

—Ben' huen unao' në'ëdi'. Tahuen na' unao' në'ëdi' cana', como dan' tuzi Diuzi naquë' ben' huen. Na' chi re'enlo' tzio' guibá gata' yela' neban quio' tuzioli, ruen zi hue quio' cabë' naca mandamiento quie Diuzi.

¹⁸ Na' unanë' rëbinë' Jesús:

—¿Ca bi mandamiento reya'ala' hue quia'?

Na' una Jesús rëbinë' lënë':

—Bigutio' benë', bitalao' žgula ben' tula, bicuanlo' quie benë', bisiu' yë'. ¹⁹ Gapala'nlo' xuzi znao', edyë'ëlo' benë' ca nedyë'ëlo' cuinlo'.

²⁰ Na' una ben' ru'abe rëbinë' Jesús:

—Yugulute cabë' nao', rua'nan cati nacatia' xcuidi'. ¿Bizira ta rdziogueda' hua'?

²¹ Na' una Jesús rëbinë' lënë':

—Chi re'enlo' huelo' yugulu ca re'en Diuzi huelo', uyo yeguëti' ta de quio', bë' ja ben' yëchi' centavo quien. Chi huelo' cana', na'ra gata' tadya'a quio' ga zu Diuzi guibá. Na' guido' inaolo' në'ëdi'.

²² Pero cati be ben' ru'abe ca una Jesús, na'ra zeyonë' raquenë' bayëchi' dan' nacanë' ben' uña'a gula.

²³ Na'ra una Jesús rëbinë' ja ben' quië':

—Tali rnia' le'e, zëdi gula nacan tzio yaca ben' uña'a guibá ga zu Diuzi. ²⁴ Rnia' le'e tatula, cabë' nacan zëdi gula te tu camello lu'u ni'a yëchi', cana' nacarën zëdi quie ben' uña'a tzionë' ilë'ënë' ga zu Diuzi guibá.

²⁵ Na' bë' be ja ben' quie Jesús cabë' unë', tu bebanzijë' unajë' rëbijë' laguedyijë':

—¿Ca nuži saque' tzio guibá ga zu Diuzi?

²⁶ Na' una' Jesús rëbinë' lëjë':

—Ca ta bigaca ja benë' huejë', Diuzi sí, racanë' ruenë'n como dan' raca rue Diuzi yugulute.

²⁷ Na'ra una Pedro rëbinë' Jesús:

—Señor, nusando' yugulu ta de quiendo' ta inaondo' luë'. ¿Ca bizi ta gaca quiendo' guibá?

²⁸ Na' una Jesús rëbinë' lëjë':

—Tali rnia' le'e, cati idyin dza yecubi yugulute ta de na'a, cati cui'a në'ëdi', ben' naca bichi yugulu benë', xlatoga', na'ra le'e, ben' unao në'ëdi', caora na' cue'rële lao chipchopa xlatole ta ichugulile lao chipchopa cue' ben' Israel. ²⁹ Rnia' le'e, yugu ben' pshan zan yu'u quie, o chi nu biche, o chi nu zane, o chi nu xuze žnë'ë, o chi nu žgule, o chi nu ži'ine, o chi nu layu quie tanun quia' në'ëdi', hue'ra Diuzi lëbë' tu gayuhua lasa mazara ca ta psannë'. Lëzi hue' Diuzi lënë' yela' neban quienë' tuzioli. ³⁰ Pero bala ben' naca ben' belao niga lao yedyi layu, bira gacajë' ben' belao dza yedyinjë' ga zu Diuzi. Lëscan' bala ben' binaca ben' belao niga lao yedyi layu, huacajë' ben' belao dza yedyinjë' ga zu Diuzi.

20

Unë Jesús tu di'idza' quie ja ben' bë dyin

¹ Na' una Jesús:

—Na' rnia' le'e cabë' rue Diuzi. Ruenë' ca nu ben' xan' layela, ben' uyo balara yegue'lë benë' di'idza' ta yezi'jë' usecho quie bedzuli' quienë'. ² Na' bë'lënë' ben' hue dyin quienë' di'idza' ta quizüguë' lëjë' tu dumi plata tu dza. Ude na' use'elë' lëjë' tzeguejë' dyin layela quienë'. ³ Ude na' uzë'ë žiogüë' ca du las nueve quie zila. Na' blë'ënë' bala ben' rda cana'zi la'o yedyi. ⁴ Na' unë' rëbinë' lëjë': "Uletziorë le'e, tzeguele dyin yezi'le usecho quia'. Naquizüga' le'e quie tu dza quiele." Na' uyojë' hue dyin quienë'. ⁵ Na' uzë'ë žiogüë' tatula ca du la'odza, bënë' cabë' bënë' zila quie ben' hue dyin quienë'. Lëzi uzë'ë žiogüë' tatula ca du las tres quie zadze', bënë' cabë' bënë' la'odza quie ben' hue dyin quienë'. ⁶ Na'ra uzë'ë žiogüë' la'o yedyi tatula ca du las cinco quie zadze'. Na' bedilanë' ibala ja ben' rdaja cana'zi. Na' unë' rëbinë' lëjë': "¿Bixquien' rda le'e niga cana'zi bedu dza, gabi dyin ruele?" ⁷ Na' unajë' rëbijë' lëbë': "Rdando' cana'zi como dan' nitu nunu bida ina nëto' huendo' dyin." Na'ra unë' rëbinë' lëjë': "Uletziorë le'e tzeguele dyin layela quia'. Naquizüga' le'e quie tu dza quiele." ⁸ Cati baodze', na'ra unë' xan' layela rëbinë' ben' quizu mozo: "Guži ja mozo na', quizülo'jë'. Tanëro quizülo' ben' uyu'u cati beyudyite dyin. Na'ra quizülo' ben' uyu'u tanëro." ⁹ Na'ra ude ja ben' yu'u ja dyin ca du las cinco quie zadze'. Na' aodizüguë' lëjë' quie bedu dza quiejë' tu huiu dumi plata. ¹⁰ Na'ra ude ja ben' yu'u ja dyin tanëro. Na' guquejë' huaguižüguë' lëjë' mazara. Pero udizüguë' lëjë' tu huiocazi dumi plata. ¹¹ Bë' uzi'jë' xlažujë' rnëjë' rdza'jë' rëbijë' xa'n layela: ¹² "Ja ben' uyu'u cati beyudyite dyin, ca tu horazi bëjë' dyin. Na' udizülo'jë' lëbi ben' nëto' bëndo' dyin bedu dza aozuendo' tala bedu dza." ¹³ Na' una xan' layela rëbinë' tu ben' uyu'u dyin tanëro: "Bicha', quele tamala bia' quio'. ¿Quele bega'nro di'idza' quizüga' luë' tu dumi plata quie tu dza quio'? ¹⁴ Ni de xlažulo', beyo. Chi re'enda' quizüga' ben' uyu'u cati beyudyite dyin lëbi cabë' aodizüga' luë', abihuena quio'. ¹⁵ ¿O chi bire'enlo' hua' ca re'enda' len dumi quia'? ¿O chi raquežë'lo' në'ëdi' dan' rua' tadya'a?" ¹⁶ Na' una Jesús rëbinë' lëjë':

—Na'ra në'ëdi' rnia' le'e, bala ben' binaca ben' belao niga lao yedyi layu, huacajë' ben' belao dza yedyinjë' ga zu Diuzi. Lëscan' bala ben' naca ben' belao niga lao yedyi layu, bira gacajë' ben' belao dza yedyinjë' ga zu Diuzi. Rëzi Diuzi ben' zë, ben' inao xnezë', pero balazijë' guida inao xnezë'.

Unë Jesús tatula cabë' gaca cati gatinë'

(Mr. 10.32-34; Lc. 18.31-34)

¹⁷ Na' uza' Jesús lënë' chipchopa ben' quienë' ziojë' ciudad Jerusalén. Na' tu neza guzinë' lëjë' tzala'la unë' rëbinë' lëjë':

¹⁸ —Ablë'ële bazioro ciudad Jerusalén gan' usedyin benë' në'ëdi' lao na'a xan' pxuzi, len lao na'a ben' rusëdi ley quie Moisés. Na' rusaque'jë' në'ëdi' nacala ca huejë' gutijë' në'ëdi', ben' naca bichi yugulu benë'. ¹⁹ Na' lëjë' usedyinjë' në'ëdi' lao na'a ben' za' yedyi tula ta utitujë' në'ëdi', gunjë' në'ëdi' zi', uda'jë' në'ëdi' lë'ë yaga cruzo gatia'. Pero huebana' lao tzona dza.

Unaba zna' Santiago len Juan tu cule lao Jesús

(Mr. 10.35-45)

²⁰ Na'ra bebiga' rupa zi'i Zebedeo, Juan len Santiago, len zna'jë' ga zë Jesús. Na' udituz zna'jë' žibinë' lao Jesús ta inabë' lëbë' tu cule. ²¹ Na'ra una Jesús rëbinë' lëbë':

—Žiži dan' re'enlo' hua' quio'?

Na' unë' rëbinë' Jesús:

—Chi bihuu' cule, huelo' mandado cue' ži'ina' niga cuëto' cati bare'lo' xlatolo' rnabë'lo'. Rnaba' huu' mandado cue'bi' tubi' zaquë' yebë, itubi' cue'bi' zaquë' yega'.

²² Na'ra una Jesús rëbinë' lëjë':

—Binezile cabë' dan' aonabale në'ëdi'. ŽHuazuele sacale cabë' usaca benë' në'ëdi'? ŽHuazuele yedzagalaole cabë' yedzagalaohua'?

Na' unajë' rëbijë' lëbë':

—Aja', huazuendo'.

²³ Na' una Jesús rëbinë' lëjë':

—Tali ca nale. Usaca benë' le'e cabë' usacajë' në'ëdi', na' yedzagalaole cabë' yedzagalaohua'. Pero quele në'ëdi' hua' mandado ta cue'le cuëta' tzala' huio. Xuza' Diuzi huenë' mandado nu ben' cue' cuëta' tzala' huio.

²⁴ Cati be ichi ben' quie Jesús cabë' unaba Santiago len bichinë' Juan, na'ra bdza'jë' lëjë'. ²⁵ Pero guži Jesús lëjë' unë' rëbinë' lëjë':

—Le'e nezile dyë'ëdi cabë' rue ja ben' naca gobierno, rnabë'jë' zi'laza. Redaohuejë' huejë' mandado zëdi hue ja benë'. ²⁶ Pero le'e, bireya'ala' huele cana'. Nu ben' rnabë' quie ja ben' rue quie xti'idza' Diuzi, ruen zi gacalëjë' laguedyijë'. ²⁷ Lëscan' nu ben' belao quie ja ben' rue quie xti'idza' Diuzi, ruen zi huejë' pensari bi huejë' ta gata' tadya'a quie laguedyijë'. ²⁸ Huele cabë' rua' në'ëdi', ben' bichi yugulu benë'. Quele bida' ta hue ja benë' tadya'a quia'. Bida' ta hua' tadya'a quiejë', gatia' lao lazajë' gacajë' libre, bira inao dula' xquia quiejë' lëjë'.

Beyue Jesús chopa ben' laochula

(Mr. 10.46-52; Lc. 18.35-43)

²⁹ Cati uza'jë' yedyi Jericó, unao ben' zë gula Jesús. ³⁰ Na' ga udejë' re' chopa ben' laochula cuëta neza. Cati bejë' za' Jesús, na'ra uredyiyajë' unajë' rëbijë' Jesús:

—Señor, ži'i suba xuzixta'oro rey David luë'. Beyëchi'la'adyi'nëto'.

³¹ Na' udila ja benë' lëjë' rëbijë' lëjë' ta cue'jë' chízi. Pero uredyiyajë' zidzo gula unajë' rëbijë' Jesús:

—Señor, ži'i suba xuzixta'oro rey David luë'. Beyëchi'la'adyi' nëto'.

³² Na'ra uleza Jesús guzinë' ja ben' laochula, unë' rëbinë' lëjë':

—Žiži dan' re'enle hua' quiele?

³³ Na' unajë' rëbijë' Jesús:

—Señor, re'enndo' yelë'ëndo'.

³⁴ Na'ra beyëchi'la'adyi' Jesús lëjë', uženë' laojë' labelë'ëtejë' unaojë' Jesús.

21

Cabë' guca cati bdyin Jesús ciudad Jerusalén

(Mr. 11.1-11; Lc. 19.28-40; Jn. 12.12-19)

¹ Na' bdyinjë' yedyi Betfagé ga nacan ga'ala' ga re' ciudad Jerusalén. Lëscan' nacan ga'ala' ga re' tu ya'a laona ya'a Olivos. Na'ra use'ela' Jesús chopa ben' quienë' ² rëbinë' lëjë':

—Uletzio yedyi na'. Na' yedzelele tu burra nerioba' lëba' ži'iba'. Ulexëdyiba' ulequië'ba' niga. ³ Chi ina benë' rëbijë' le'e: “ŽBixquien' iquië'leba'?” na' yëbilejë': “Re'en Señor na' lëba'. Na' laidesantendo'ba' itu chí'.” —Cana' una Jesús rëbinë' lëjë'.

⁴ Cana' guca ta uzu di'idza' quie Diuzi ta bzu ben' profeta lë'ë guichi. Lëdi'idza' nan caniga:

⁵ Uleyëbi ben' ciudad Jerusalén caniga:

“Le'e ben' ciudad Jerusalén, ulena', aza' rey quiele, naquë' ben' gaxo, dyianë' tu burra, ži'i bia ru'a yua'.”

⁶ Na'ra uyo ja ben' quiè', bëjë' cabè' mandado bë Jesús huejë'. ⁷ Na' uquiè'jë' burra len zi'iba' uxubajè' zabajè' xcu'udzuba', na' udyia Jesús lèba', ziojë' bdyinjè' ciudad Jerusalén. ⁸ Ben' zè nita'jë' tu neza udixujè' zabajè' ga ude Jesús. Ibalajè' uchugujè' taca' palma udixurèjë'n tu neza ga udenè'. ⁹ Na' ja ben' zioja dyialao lao Jesús len ja ben' zioja zenao lèbè', uzulaojë' rnèjë' zidzo rnajè':

—Ben' ze luè', zi'i rey David! La'ya naco' zao' lao na'a Diuzi. ¡Ben' ze Diuzi!

¹⁰ Cati uyu'u Jesús ciudad Jerusalén, na' bebane ja benè' unajè' rëbijè' laguedyijè':

—¿Nuži ben' niga?

¹¹ Ibalajè' unajè' rëbijè' lèjë':

—Ben' profeta Jesús, ben' yedyi Nazaret quie estado Galilea.

Belao Jesús ja ben' yu'u huèti' lu'u idao' rnabè'ra

(Mr. 11.15-19; Lc. 19.45-48; Jn. 2.13-22)

¹² Ude na' uyu'u Jesús lu'u idao' rnabè'ra belaohue' ja ben' yu'u huèti' lu'u idao' rnabè'ra na'. Bzalè' ja mesa quie ja ben' rutza' dumi. Lèscan' bzalè' silla quie ja ben' yu'u huèti' paloma. ¹³ Na' unè' rëbinè' lèjë':

—Lè'è guichi la'ya quie Diuzi rnan caniga: “Idao' rnabè'ra quia' nacan ga hue'lè ja benè' Diuzi di'idza'. Pero le'e abetza'len ruelen ca beló ga regu'udi' ben' uban.”

¹⁴ Na' lu'u idao' rnabè'ra ga zè Jesús, ubiga' bala ben' laochula len ben' zi, na' beyuenè' lèjë'. ¹⁵ Pero ja xan' pxuzi len ja ben' rusèdi ley quie Moisés, bdza'jë' cati blè'jëjë' cabè' milagro bë Jesús. Lèscan' bdza'jë' cati bejë' rnè ja xcuidi' zidzo lu'u idao' rnabè'ra najabi': “Ben' ze luè', zi'i rey David.” ¹⁶ Na' bdza'jë' unajè' rëbijè' Jesús:

—¿Abelo' cabè' na ja xcuidi'?

Na' una Jesús rëbinè' lèjë':

—Aja', beda' cabè' rnajabi'. Pero le'e, ¿cómo binelabale cabè' nan quiejabi' lè'è guichi la'ya quie Diuzi? Rnèn nan caniga:

Dyín bë Diuzi rula ja xcuidi' dao', bi' nera'adyi', alabanza huen gula.

¹⁷ Na'ra psan Jesús lèjë' uza'nè' ciudad Jerusalén ziolènè' yaca ben' quiè' yedyi Betania. Na' bega'një' tu yela.

Bdze'de Jesús yaga higo dan' bidyian tazixi

(Mr. 11.12-14, 20-26)

¹⁸ Na' beteyu zila, uzè'è ziolènè' yaca ben' quiè' ciudad Jerusalén. Na' tu neza zioquè' cati uduenè'. ¹⁹ Na' blè'ènè' zu tu yaga higo cuèta neza. Na' udenè' unè'è ta yedzelenè' tazixi quien, pero gabi bedzelenè'. Na' una Jesús:

—Bira cuiacazi yaga ni tazixi.

Na' laobidyite yaga higo. ²⁰ Cati blè'è ja ben' quiè' cabè' guca quie yaga higo, na'ra bebanejë' unajè' rëbijè' Jesús:

—¿Cabizi guca quie yaga higo laobidyiten?

²¹ Na' una Jesús rëbinè' lèjë':

—Tali rnia' le'e, chi rzudyi'ilèle Diuzi du guicho du la'adyi'le, huazaque' huele cabè' bia' quie yaga higo. Na' quele tuzi quie len huele, pero lèscan' huazaque'rè huele mandado te tu ya'a tzion lu'u nisadao', na' huayonan. ²² Con bita inabale lao Diuzi hue'lèlenè' di'idza', chi rzudyi'ilèle Diuzi du guicho du la'adyi'le, gunnè'n quiele.

Cabè' naca quie yela' rnabè' quie Jesús

(Mr. 11.27-33; Lc. 20.1-8)

²³ Na'ra beyu'u Jesús lu'u idao' rnabè'ra tatula. Na' tu zunè' rusèdinè' benè' cati ubiga' ja xan' pxuzi, len ja ben' rnabè' quie ja ben' Israel, unajè' rëbijè' Jesús:

—¿Bi yela' rnabè' de quio'? ¿Nu quie yela' rnabè' blaolo' ben' yu'u huèti' lu'u idao' rnabè'ra?

²⁴ Na' una Jesús rëbinè' lèjë':

—Lèscan' re'enda' inaba' le'e tu di'idza'. Chi iquèbile quia' dyè'èdi, na'ra inia' le'e nu quie yela' rnabè' blaohua' ben' yu'u huèti' lu'u idao' rnabè'ra. ²⁵ ¿Nuži use'ela' Juan ta hue'nè' lao benè'? ¿Use'ela' Diuzi lèbè'? ¿O chi ta racazi la'adyi'nè' bidè'?

Na' uzulaojë' najè' rëbijè' laguedyijè':

—Chi yëbironè': “Diuzi use'elè' lèbè”, na' huanè' ra'o: “¿Bixquien' bigulele quienè'?”

²⁶ Pero chi yëbironè': “Ta racazi la'adyi'nè' bidè'”, caora na' huadza' ja ben' yedyi ra'o, dan' najè' rnè Juan tanun quie Diuzi.

²⁷ Na'ra unajè' rëbijè' Jesús:

—Binezindo' nu ben' use'ela' lèbè'.

Na' una Jesús rëbinè' lèjë':

—Lëscan' në'ëdi', biinia' le'e nu quie yela' rnabë' blaohua' ben' yu'u huëti' lu'u idao' rnabë'ra.

Unë Jesús tu di'idza' quie ben' zu chopa zi'ine

²⁸ Na' una Jesús lëjë':

—¿Bi ca inale ca naca di'idza' inia' le'e? Uzu tu be'mbyu zu chopa zi'inë'. Na' yëbë' tubi': "Zi'ina', tzio' na'a yeziu' usecho quie bedzuli' quia'." ²⁹ Na' una zi'inë' rëbinë' lëbë': "jBinan quia' tza'ala!" Pero ude na' beyuebi' pensari uyocazibi' hue dyin. ³⁰ Na' uyo xuzijabi' yaguëdyinë' itu zi'inë': "Zi'ina', tzio' na'a yeziu' usecho quie bedzuli' quia'." Na' unabi' rëbibi' xuzibi': "Hue'encazi tza'ala." Pero biuyobi'. ³¹ Na' inaba' le'e: ¿Nula zi'inë' bë cabë' re'ennë' huejabi' lao rupatejabi'?

Na' unajë' rëbijë' Jesús:

—Bi' gudyë' tanëro.

Na'ra una Jesús rëbinë' lëjë':

—Tali rnia' le'e, ja ben' nale ben' mala gula, len ja nigula ruti' gusto quie, za' lëjë' yeyu'ujë' ga rnabë' Diuzi ca le'e. ³² Bida Juan bautista udixogue'në' le'e cabë' reya'ala' huele ta hue quiele xti'idza' Diuzi, na' bigulele quienë'. Pero yaca ben' mala gula len ja nigula ruti' gusto quie, lëjë' sí, gulejë' quienë'. Pero le'e ba'ala'cazi blë'ële cabë' bë Juan, biptza'le pensari quie ta galele quienë'.

Unë Jesús tu di'idza' quie ben' mala, ben' hue dyin

(Mr. 12.1-12; Lc. 20.9-19)

³³ Na' una Jesús:

—Uzë nagale ca naca itu di'idza' inia' le'e. Uzu tu xan' layela, ben' guza bedzuli'. Bënë' tu li'o psioquë'n. Lëzi udixonë' tu yo laga' ga usinë' nisa bedzuli'. Bërënë' tu yu'u sibi de yo ga cuia ben' rapa bedzuli'.

Na' pca'nnë'n lao na'a ben' hue dyin, uza'në' zionë' zitu'. ³⁴ Cati bdyin tiempo quie usecho quie bedzuli', na'ra use'elë' ja mozo quienë' tzenabajë' ben' hue dyin quie usecho ta redu'ula' ben' xan' layela yezi'në'. ³⁵ Pero bëxo ben' hue dyin ja ben' uyo. Na' bë'jë' quie tunë', bë'tijë' itunë', na' udijë' yo itunë'. ³⁶ Na' use'ela' xan' layela ja mozo tula. Pero bëcazi ben' hue dyin quiejë' lëbi ca ben' uyo tanëro.

³⁷ Abeyudyi bëjë' cana', use'elë' zi'inë', guquenë' chi huaparajë' zi'inë' bala'ana. ³⁸ Pero cati blë'ë ja ben' hue dyin abdyin zi'i xan' layela, na'ra unajë' rëbijë' laguëdyijë': "Bi' za' ni, lëbi' gaque quiebi' layela. Uletza' gutirobi' ta gaque quiero layela de niga." ³⁹ Cana' bëjë', bëxojë' lëbi', bebiojabi' layela, bë'tijë' lëbi'.

⁴⁰ Na' una Jesús unabanë' lëjë':

—Cati yedyyin xan' layela, ¿bizi' reya'ala' huenë' quie ja ben' hue dyin?

⁴¹ Na' unajë' rëbijë' Jesús:

—Yela' ben' mala quiejë', reya'ala' gutinë' lëjë', biyëchi'la'adyi'në' lëjë'. Reya'ala' uca'nnë'n lao na'a ben' hue dyin, ben' tula, ben' tzesan quie usecho ta redu'ula' ben' xan' layela yezi'në' tiempo quienan.

⁴² Na' una Jesús rëbinë' lëjë':

—¿Binelabale cabë' nan lë'ë guichi la'iya quie Diuzi? Rnan caniga:

Yo laga' uru'un ben' rue huecua', lëyo na' bezi' Diuzi, bzunë'n ga rzulao besu.

Dyyin dya'a bë Diuzi beyuenë'n yo belao ta guxu'n besu.

⁴³ Tana' lena' inia' le'e, como dan' biralele quia', cana' naca quie ca quie ben' rue huecua', ben' uru'un yo. Quie lena' bicuio Diuzi le'e gacale ben' hue dyin quienë'. Na' huabio Diuzi ben' tula, ben' tzesan ca quie usecho ta reya'ala' Diuzi yezi'në'. ⁴⁴ Nu ben' bire'en gale quia', gaca quienë' ca quie ben' bguino lao yo, guquë' hue' ze. Lëscan' nu ben' chu'un në'ëdi' tzala'la, huachugulia' quienë'. Gaca quienë' ca quie ben' pxa'da' yo lënë'.

⁴⁵ Na' cati be ja xan' pxuzi len ja ben' partido fariseo cabë' na ejemplo unë Jesús, na'ra gucabë'jë' rnë Jesús quiejë'. ⁴⁶ Na' gu'unjë' guxujë' Jesús, pero bdzebijë' idza' ja ben' yedyi, dan' na ja ben' yedyi rnë Jesús tanun quie Diuzi.

22

Unë Jesús tu di'idza' quie lani quie huetzagana'

¹ Na' bzu Jesús itu di'idza' unë' rëbinë' lëjë':

² —Na' rnia' le'e cabë' rue Diuzi rnabë'në'. Ruenë' ca nu rey, ben' bë tu lani cati ptzagana' zi'inë'. ³ Na' use'ela' rey ben' tzelidza ja ben' guida lao lani, pero bigu'unjë' guidajë'. ⁴ Na' use'ela' rey na' ben' tula ta tzelidzajë' ja ben' guida lao lani unë' rëbinë' lëjë': "Uleyëbijë' abëtia' ja bëdyihuaga quia', bia naca ja re'ene, bapsiña'a ta gaojë'. Yugun nacan puesto laguideatejë'." ⁵ Pero bibida ben' reya'ala' guida. Tunë' uyonë' layela quienë'. Itunë' uyonë' huëti' quie'. ⁶ Na' los demás, bëxujë' ben' use'ela' rey tzalidza lëjë', bë'jë' lëjë' zi', bë'tijë' lëjë'.

7 Na'ra bdza'tzegue rey na'. Use'elè' soldado quienè' tzeguè'tijè' lèjè', tzezejijè' yedyi quiejè'.
 8 Na' una rey rèbinè' ben' tzelidza: "Yugun nacan puesto guida ja benè'." Pero ben' blidzajè' guidaja, bigu'un rey na'. Na' unè':⁹ "Uletzio tzetale tu neza tzelidzale con nu ben' yedzagale ta guidajè' lani quie huetzagana'." Cana' unè' gudyinè' ben' tzelidza.¹⁰ Na' uza'jè' yetajè' tu neza utupajè' ben' bedzagajè', la'acazi ben' mala, la'acazi ben' dya'a. Cana' bedza' ja benè' zan yu'u quie rey.

¹¹ 'Na'ra uyu'u rey lu'u yu'u ta inè' ben' bdyinja. Na' blè'ènè' re' tu be'mbyu, pero binaconè' zabanè' ca naca žaba ben' bdyin ga raca lani quie huetzagana'.¹² Na' una rey rèbinè' lènè': "Bicha', žbiži guca uyu'ulo' re'lo' ni, binacolo' žabo' ca naca žaba ben' bdyin ga raca lani quie huetzagana'?" Na' ure'nè' chizi.¹³ Na' una rey rèbinè' ben' ru'e laze: "Ulequio ni'na'anè'. Ulechu'unnè' lao lato chula ga cuedyinè' gao leinè'." ¹⁴ Rēzi Diuzi ben' zè, ben' inao xnezè', pero balazijè' guida inao xnezè'.

Unabajè' Jesús ca naca quie impuesto

(Mr. 12.13-17; Lc. 20.20-26)

¹⁵ Na'ra uyo ja ben' partido fariseo bega'njè' di'idza' len laguedyijè' huejè' trampa quie Jesús ta quilojè' di'idza' ta gaojè' lèbè' xquia.¹⁶ Na' use'ela'jè' ibala ben' naca partido quiejè' tuže len bala ben' naca partido Herodes, unajè' rēbijè' Jesús:

—Maestro, nezindo' rnao' tali, rusèdio' benè' ca naca xneza Diuzi. Tuzicazi ca ru'elao' benè' di'idza'.¹⁷ Unacara cabè' naca tu pensari quio': žRnabando' luè' chi run Diuzi lato quizoro impuesto lao rey quie ben' romano?

¹⁸ Na'ra gucabè' Jesús cabè' modo reguilojè' ta huejè' tamala quiè'. Na' unè' rèbinè' lèjè':
 —Ben' huizi' yè' nacale. žBixquien' re'enle huele trampa quia'? ¹⁹ Ulelu'ecara nē'èdi' bi naque dumi ruquizole impuesto.

Na' blu'ejè' lèbè' tu dumi denario.²⁰ Bè' blè'è Jesús len, na' unabanè' lèjè':

—žNu ben' zu laohue lè'è dumi? žBi na letra dyia lè'èn?

²¹ Na' unajè' rēbijè' Jesús:

—Lao rey quie ben' romano zu lè'èn.

Na'ra una Jesús rèbinè' lèjè':

—Ulehue' ben' naca gobiernu ta redu'ulanè' si'nè'. Lèscan' ulehue' Diuzi ta redu'ulanè' si'nè'.

²² Cati bejè' cabè' una Jesús, na'ra tu bega'nzijè' rebanejè'. Na' psanjè' quiè' zeyojè'.

Unabajè' Jesús cabè' raca quie ben' baguti yeban

(Mr. 12.18-27; Lc. 20.27-40)

²³ Lédza na'tezi uyo bala ja ben' partido saduceo yena'jè' Jesús. Na'ra birale ja ben' partido saduceo chi hueban ben' huati. Tana' lena' unajè' rēbijè' Jesús:

²⁴ —Maestro, una Moisés chi guti tu be'mbyu zu žgule, na' ganu ži'inè' zu, reya'ala' yezi' ben' bichinè' xcula ben' guti tacuenda su ži'ijè' lao laza ži'i ben' guti.²⁵ Na' guca dza na' uzu gadyi bichi be'mbyu yedyi quiendo'. Na' ptzagana' ben' nèro, pero gutinè' ganu ži'inè' uzu. Lena' abezi' ben' bichinè', ben' urupe, nigula quienè'.²⁶ Lèscan' guti ben' urupe ganu ži'inè' uzu. Lena' abezi' ben' bichinè', ben' uyune, nigula quienè'. Pero cabè' guca quie ben' nèro len ben' urupe, lèscana' guca quie ben' uyune len los demás yaca bichinè' hasta lao gadyi bichijè'.²⁷ Ude na' gutirè nigula quiejè'.²⁸ Na'ra inabando' luè', cati yeban ja ben' baguti, žnulajè' naquè' quiejè' lèbè' lao gadyijè' como yugujè' uzulèjè' lèbè'?

²⁹ Na' una Jesús rèbinè' lèjè':

—Le'e sí, nequixile como dan' binezile cabè' rnan lè'è guichi la'ya quie Diuzi. Lèscan' binezile ca naca yela' huaca quienè'.³⁰ Cati babeban ja ben' baguti, bisulèjè' laguedyijè' ca žgulajè' ca xquiujè'. Gaca quiejè' ca quie yaca ángel quie Diuzi, ben' yu'uja guibá.³¹ Na' quie ben' baguti yeban, žbinelabale lè'è guichi la'ya quie Diuzi cabè' unè' le'e? Unè' caniga:³² "Naca' Diuzi quie xuzixta'olo' Abraham, len quie xuzixta'olo' Isaac, len quie xuzixta'olo' Jacob." Cana' una Diuzi. Lena' nia' le'e, Diuzi rlè'ènè' lèjè' ca ben' neban, como dan' rlè'è Diuzi tuzicazi ca ben' neban len ben' aguti.

³³ Cati be ja benè' cabè' una Jesús quie ben' guti beban, na'ra tu bebanezijè' cabè' di'idza' rusèdinè' ja benè'.

Unè Jesús quie chopa mandamiento belao

(Mr. 12.28-34)

³⁴ Cati unezi ben' partido fariseo cabè' bē Jesús quie ben' partido saduceo, biubinjè' binajè' yēbijè' Jesús, na'ra begu'udijè' ga zè Jesús.³⁵ Na' tu ben' quiejè', ben' rusèdi quie Moisés, gu'unnè' huenè' trampa quie Jesús. Cana' unè' rèbinè' lèbè':

³⁶ —Maestro, žnula mandamiento nacaran belao quie ley pca'n Diuzi lao na'a Moisés?

³⁷ Na' una Jesús rèbinè' lèbè':

—“Idyë'ëro xa'nro Diuzi du guicho du la'adyi'ro.” ³⁸ Lëlena' nacaran mandamiento belaoa. ³⁹ Derë itu mandamiento nacarën belao. Ilë'ëti'zi birnën lëbi ca mandamiento belaoa. Len rnan caniga: “Idyë'ële laguedyile cabë' nedyë'ële cuinle.” ⁴⁰ Na' nia' le'e duze ca na ley pca'n Diuzi lao na'a Moisés len duze ca una ja ben' profeta dza na', nacan quie chopa mandamiento belao.

Unaba Jesús: ¿Nu ži'inë' naca Cristo?

(Mr. 12.35-37; Lc. 20.41-44)

⁴¹ Tu raca nenegu'uđi' ja ben' partido fariseo, ⁴² na' una Jesús rëbinë' lëjë':

—¿Bi ca nale quie ben' naca Cristo? ¿Nu ži'inë' naquë'?

Na' unajë' rëbijë' lëbë':

—Ži'i rey David naquë'.

⁴³ Na' una Jesús rëbinë' lëjë':

—¿Ca biži guca caora una rey David, du yu'unë' Bichi Be quie Diuzi, unë' naca Cristo Señor quienë'/? Porque cana' una David caora unë' caniga:

⁴⁴ Una Diuzi rëbinë' ben' naca Señor quia':

“Ure' cuëta' zaquë' yebë niga, hasta idyin dza cuëcha' xni'alo' yaca ben' rudie luë'.”

Cana' una rey David. ⁴⁵ Na' rnaba' le'e, ¿cómo naca Cristo ži'i suba rey David, chi cuin rey David unë' naca Cristo Señor quienë'/?

⁴⁶ Na' ni tu di'idza' biubinjë' yëbijë' lëbë'. Desde dza na', bira beyazojë' inabarajë' lëbë' bi di'idza'.

23

Udao Jesús ben' partido fariseo len ben' rusëdi ley quie Moisés xquia

(Mr. 12.38-40; Lc. 11.37-54; 20.45-47)

¹ Na'ra una Jesús rëbinë' ja benë' nita' na' len ja ben' quienë':

² —Ja ben' rusëdi ley quie Moisés, len ja ben' partido fariseo, nacan dyin quiejë' rusëdjë' benë' cabë' nan lë'ë guichi ley ta pca'n Diuzi lao na'a Moisés. ³ Na' reya'ala' hue quiele ca inajë', pero binaole huele cabë' ruejë', como dan' biruejë' tuzi ca najë'. ⁴ Ruejë' ca quie ben' rugua'a yua' ži' gula laguedyi, tu ta bisueyaquë'. Pero biyeyëchi'la'adyi'jë' yaca benë' ni siquiera ledao'zi ta gacalëjë' lëjë'. ⁵ Tuzi ta ilë'ë benë' lëjë' dya'a ruejë', pero bë' ruezijë' raxejë' uda'jë' tu guichi dao' quie Diuzi zbasijë'. Raxejë' utubijë' itu guichi quie Diuzi žichojë'. Raxejë' gacojë' žabajë' tona. ⁶ Re'enjë' cue'jë' ga naca tzao' cati raojë' ga raca lani. Lëscan' re'enjë' cue'jë' ga rbe' ben' bala'ana lu'u idao' sinagoga. ⁷ Re'enjë' gapala'n benë' lëjë' dyë'ëdi du tu neza. Raxejë' yëbi ja benë' lëjë': “Maestro.”

⁸ “Bihuele lato ta ina ja benë' le'e: “Maestro”, porque yugulue naca tuzi bichile, lëscan' tuzi në'ëdi' naca' maestro quiele. ⁹ Lëzi nitu nitu ben' nita' lao yedyi layu, bihuele lato yëbilejë': “Xuza”, porque tuzi Xuziro zu, ben' zu guibá. ¹⁰ Lëscan' bihuele lato ta ina ja benë' le'e: “Xa'na' luë'”, porque tuzi në'ëdi' naca' xa'nle. ¹¹ Na' rnia' le'e, con nu ben' racalë laguedyi, lënë' nacarë' ben' belao ladole. ¹² Porque nu ben' rue že cuine, lëben' na' nacarë' ben' yëchi' lao Diuzi. Pero nu' ben' birue cuine ben' že, lëben' na' nacarë' ben' že lao Diuzi.

¹³ “Le'e ben' rusëdi ley quie Moisés, len le'e ben' partido fariseo, nacan bayëchi' gula quiele! Biruele tuzi ca nale. Ruza'agale hue quie benë' xti'idza' Diuzi. Le'e birue quiele xti'idza' Diuzi, lëscan' bire'enle hue quie ben' tula xti'idza' Diuzi.

¹⁴ “Le'e ben' rusëdi ley quie Moisés, len le'e ben' partido fariseo, nacan bayëchi' gula quiele! Biruele tuzi ca nale. Rgubale yu'u quie ja nigula guti xquihue, pero ta ilë'ë ja benë' le'e ben' rue quie ca rna Diuzi, na' ru'elële Diuzi di'idza' žë.

¹⁵ “Le'e ben' rusëdi ley quie Moisés, len le'e ben' partido fariseo, nacan bayëchi' gula quiele! Biruele tuzi ca nale. Ratale con gatezi ta quilole nu ben' hue quie cabë' ruele. Pero nu ben' usëdile ta hue quie cabë' ruele, huacaterajë' ben' malara ta tziójë' gui' gabila ca le'e.

¹⁶ “Huaca bayëchi' quiele! Re'enle ulu'ele ben' tula ga tziönë', pero ben' laochula le'e. Na' le'e nale: “Čhi ruguntero Diuzi ruzëtoro idao' rnabë'ra chi bi tu ta huero, biruen ži huero. Pero čhi ruguntero Diuzi ruzëtoro oro re' lu'u idao' rnabë'ra, lenan sí, ruen ži huero.” ¹⁷ “Pero inia' le'e, ben' tondo, ben' laochula le'e! Binaca la'iya oro cuinzin. Tanun quie re'n lu'u idao' rnabë'ra, tana' naca la'iyen. Naca idao' rnabë'ra la'iyaran ca oro re' lu'un. ¹⁸ Lëscan' rnarële: “Čhi ruguntero Diuzi ruzëtoro ru'aba chi bi tu ta huero, biruen ži huero. Pero čhi ruguntero Diuzi ruzëtoro gun dyia ru'aba, lenan sí, ruen ži huero.”

¹⁹ “Pero inia' le'e, jben' tondo, ben' laochula le'e! Binaca la'iya gun cuinzin. Tanun quie dyian ru'aba, tana' naca la'iyen. Naca ru'aba la'iyaran ca gun dyia laonan. ²⁰ Čhi ruguntero Diuzi ruzëtoro ru'aba chi bi tu ta huero, quele tuzi ru'aba ruzëtoro como dan' tuzi naca ru'aba len gun. ²¹ Čhi ruguntero Diuzi ruzëtoro idao' rnabë'ra chi bi tu ta huero, quele tuzi idao' rnabë'ra ruzëtoro como tuzi naca idao' rnabë'ra len Diuzi, ben' zu lu'un. ²² Lëscan' chi

ruguntero Diuzi ruzëtoro guibá chi bi tu ta huero, cana' ruzëtorëro Diuzi lënë' xlatoguë' ga re'në'.

²³ 'jLe'e ben' rusëdi ley quie Moisés, len le'e ben' partido fariseo, nacan bayëchi' gula quiele! Biruele tuzi ca nale. Lente ja la'aga' ta ruen zi' yela' huao quiele ru'ele Diuzi tu cue'na quie lao chi cue'na, pero biruele bala quie ta naca belaoa quie mandamiento quie Diuzi. Biruele tali. Bireyëchi'la'adyi'le benë'. Birue quiele quie Diuzi du guicho du la'adyi'le. Tanëro reya'ala' huele ta nacara belao quie Diuzi, na'tera hue'le Diuzi tu cue'na quie lao chi cue'na quie ta de quiele. ²⁴ jLe'e re'enle ulu'ele ben' tula ga tzionë', pero ben' laochula le'e! jLe'e ruele ze ta naca lë'ëti'zi, na' biruele ze ta naca belao!

²⁵ jLe'e ben' rusëdi ley quie Moisés, len le'e ben' partido fariseo, nacan bayëchi' gula quiele! Biruele tuzi ca nale. Rguibile dyë'ëdi xcu'udzula taza len plato. Na' rudze'le lu'un ta rbanle quie benë' rzi'lejë' yë'. ²⁶ Le'e ben' partido fariseo, nacale ca ben' laochula. Nacale ca taza plato neyëri xcu'udzun, pero yu'u lu'un ta bayatza. Uletza' pensari yu'u lu'u guicho laxta'ole, na'tera gacale yëri duzele lao Diuzi.

²⁷ jLe'e ben' rusëdi ley quie Moisés, len le'e ben' partido fariseo, huaca bayëchi' gula quiele! Biruele tuzi ca nale. Nacale ca quie ta rucua'jë' ga de ben' huati. Rudze'jë'n ta bezëri xcu'udzun, pero lu'unan yu'u chita quie ben' huati len ta bayatza. ²⁸ Cana' naca quie le'e. Rlë'ë ja jenë' le'e huen, pero bë' ruezile biruele tuzi ca nale, yu'u pensari mala lu'u guicho laxta'ole.

²⁹ jLe'e ben' rusëdi ley quie Moisés, len le'e ben' partido fariseo, huaca bayëchi' gula quiele! Biruele tuzi ca nale. Le'e rucua'le ba quie ben' huati, ben' udixogue' xti'idza' Diuzi dza na'te. Lëzi ruzetza'ole ba quie ja ben' bë quie xti'idza' Diuzi dza na'te. ³⁰ Na' lëzi rnale rëbile laguedyile: "Chan' ra'o nita'ro dza unita' xuzixta'oro, bigu'unro guti xuzixta'oro ja ben' udixogue' xti'idza' Diuzi." ³¹ Ca di'idza' rnële rulu'en dyë'ëdi nezile bëti xuzixta'ole ben' udixogue' xti'idza' Diuzi dza na'te. ³² Na' le'e re'enle useyudyile huele cabë' uzulao xuzixta'ole.

³³ jLe'e ruele ca rue bëla rgu'idyil' laga cabë' bë xuzixta'ole! ¿Bizi ca huele ta bihue Diuzi le'e castigo tzirole gui' gabila? ³⁴ Quie lena' ise'ela' laole ja ben' quixogue' xti'idza' Diuzi, ben' nezi rusëdi quie Diuzi. Pero le'e gutile balajë', na' ibalajë' uda'le lëjë' lë'ë yaga cruzo. Na' ibalajë' hue'le zi' lu'u idao' sinagoga quiele ulaolejë' tu tu yedyi. ³⁵ Cana' hue Diuzi dula' quiele, dan' bëtile ja ben' quienë', desde dza cati ure' dyilayu caora bëti Caïn Abel, hasta dza bëtijë' Zacarias, ben' naca zi'i Berequías. Bëti xuzixta'ole lëbë' ru'a idao' rnabë'ra ga'ala' ga zu ru'aba. ³⁶ Tali rnia' le'e, huida dula' xquia quie xuzixta'ole, ben' bëti ben' quie Diuzi, gacan zba'aga' le'e.

*Gucayëchi' Jesús cabë' rue yaca ben' ciudad Jerusalén
(Lc. 13.34-35)*

³⁷ Na' una Jesús:

—Ben' ciudad Jerusalén, ben' ciudad Jerusalén, le'e rutile ja ben' rguixogue' xti'idza' Diuzi. Le'e rguile yo ja ben' rse'ela' Diuzi laole. Zë lasa gu'unda' gapa' le'e ca rapa biu zi'iba' zan xilaba', pero bigu'unle. ³⁸ Ilë'ëti'zi idachi ciudad quiele yega'nnan cana'zi. ³⁹ Tana'rnia' le'e, ilë'ëti'zi bira ilë'ële në'ëdi'. Cati idyin dza inale: "Naca la'iya ben' use'ela' Diuzi", na'tera ilë'ële në'ëdi' tatula. —Cana' una Jesús rëbinë' lëjë'.

24

*Una Jesús huabiagui' idao' rnabë'ra
(Mr. 13.1-2; Lc. 21.5-6)*

¹ Na'ra bero Jesús lu'u idao' rnabë'ra, uza'në' zioguë' cati bebiga' ben' quienë' ga zënë'. Na' uzulaojë' rebanejë' ca naca idao' rnabë'ra. ² Na' una Jesús rëbinë' lëjë':

—Ulena' cabë' naca idao' rnabë'ra. Pero tali rnia', huabiagui'n duzeten, ni tu yo bira yega'nnan xcu'udzu laguedyil.

*Pxi'idze' Jesús cabë' gaca cati idyin dza iyudyi dyilayu
(Mr. 13.3-23; Lc. 21.7-24; 17.22-24)*

³ Na'ra uza'jë' ziojë' ga zu tu ya'a laona ya'a Olivos. Na' ure' Jesús cati bebiga' ja ben' quie' ga re'në' tu ganu dyila', unajë' rëbijë' lëbë':

—Re'enndo' inao' nëto' bata cuiagui' idao' rnabë'ra. Lëzi re'enndo' inao' bizi gaca cati yeguido' tatula, na' lëscana'rë cati iyudyi quie dyilayu.

⁴ Na' una Jesús rëbinë' lëjë':

—Gapale cuidado ta bisi' benë' le'e yë'. ⁵ Huida ben' zë inajë' napajë' yela' rnabë' quia'. Lëscan' inajë': "Naca Cristo". Pero huazi'jë' yë' ben' zë. ⁶ Ina ja benë' ga raca dila, ga sulao dila, pero bidzebile, dan' ruen zi gacacazi cana'. Nerdziogue idyin dza iyudyi dyilayu. ⁷ Dila

zè gaca tu yedyi conlè ja ben' yedyi tula. Na' yedyi zè gaca ubin, gaca yela' hue', gaca uzu'.
 8 Cana' gaca cati sulao yedzagalao ja benè'.

9 'Na' usedyin benè' le'e lao na'a ja ben' r nabè' ta usacajè' le'e bizinaquezi, gutijè' le'e. Udie benè' le'e dan' nacale ben' quia'. 10 Lèdza na' usan ben' zè bira galejè' quia'. Udiejè' laguedyijè', usedyinjè' laguedyijè' lao na'a ben' r nabè'. 11 Huida ben' zè, ben' huezi' yè', inajè' r nrojè' tanun quie Diuzi, pero ben' zè si'jè' yè'. 12 Tantozi gaca tazèdi, bira idyè'è yaca benè' laguedyijè'. 13 Pero nu ben' sue biusan inao nè'èdi' dza zunè' lao dyilayu, huazi' Diuzi lèjè' yeyojè' guibá. 14 Huayo ja benè' tzetixogue'jè' xti'idza' Diuzi duze yedyi layu ta inezijè' zu Diuzi dispuesto yeyojè' tzasulèjè' lèbè' ga r nabè'nè'. Te na', yeyudyi quie dyilayu.

15 'Bzu profeta Daniel di'idza' lè'è guichi cabè' naca tu ta udyiagui' benè', ratza Diuzi len. Reya'ala' tziõñe'ele cabè' nia' le'e. Caora ilè'èle badyia tu ta udyiagui' benè', ratza Diuzi len lu'u idao' r nabè'ra, 16 na'ra reya'ala' yežuno ja ben' nita' estado Judea yeyojè' guixi' dao'. 17 Chi nita'jè' lali'a, tanto ruguinte yežunojè', bireya'ala' yeyu'ujè' lu'u yu'u quiejè' si'jè' bi ta de. 18 Lèscana' chi zujè' layela, reya'ala' yežunojè' biyeza'jè' yeyojè' tzezi'jè' žabajè'. 19 Gaca bayèchi' quie ja nigula nu'a zi'ine len ja nigula zu xcuidi' ra'adyi' dza na'. 20 Reya'ala' hue'lèle Diuzi di'idza' ta gacalènè' le'e ta biužunole tiempo ruen zaga, nica dza huezila'adyi'. 21 Cana' lega yedzagalao yaca benè'. Desde dza cati ure' dyilayu, binedzagalao yaca benè' cabè' yedzagalao ben' yežuno dza zeza'. Lèscan', bè' yeyudyi bedzagalaojè', ganura ben' tula yedzagalao cabè' lèjè'. 22 Chi biichugu Diuzi dza yedzagalaojè', biilajè'. Pero huachugu Diuzi dza na' cuenda gacalènè' yaca ben' ulionè'.

23 'Chi ina ja benè' yèbijè' le'e: "Ulena', ni zu Cristo", chi yèbijè' le'e: "Ulena', na' zu Cristo", bigalele quiejè'. 24 Huida ja ben' hui'zi' yè' huejè' cuinjè' Cristo, huejè' cuinjè' ben' inè tanun quie Diuzi. Huejè' milagro tacuenda si'jè' yè' len ben' ulio Diuzi, pero bihuejè' gan si'jè' ben' ulio Diuzi yè'. 25 Baonia' le'e huaca tu ta binegaca. 26 Tana' lena' chi ina benè' yèbijè' le'e: "Ulena', na' zu Cristo lao lato dachi", bitziole na'. Chi yèbijè' le'e: "Ulena', na' zu Cristo lu'u yu'u", bigalele quiejè'. 27 Bigalele quiejè' como dan' cati yeguida' nè'èdi', bichi yugulu benè', hualè'è yaca benè' nè'èdi' cabè' ilè'è benè' xni' yesa cati rëpin ga rlè obidza rdi xni'n hasta ga reyen obidza. 28 Caora rlè'èle recho ja bëchi ladza, cana' inezile de tazigo raojaba'. Lècana' gaca inezile gan' gaca can' baonia'.

Ni nan cabè' gaca cati yeguida Cristo tatula

(Mr. 13.24-37; Lc. 21.25-33; 17.26-30, 34-36)

29 Na' una Jesús:

—Layeyudyite dza yedzagalaojè', na'ra yechula obidza, bira ina' xni' biu', huaguinu bélo gan dyian, huazisi yugulu ta dyia guibá. 30 Hualè'è benè' tu ta binelè'èjè' guibá. Lena' ulu'en abdyin dza yeguida' nè'èdi', bichi yugulu benè'. Na' huabedyi yugulu ja ben' nita' lao yedyi layu, hualè'èjè' nè'èdi', bichi yugulu benè', za'a lu'u beo. Hualè'èjè' taze de yela' huaca quia', taze de yela' r nabè' quia'. 31 Na'ra ise'ela' yaca ángel quia' ta cuedyijè' trompeta quiejè' zidzo gula. Caora na' yegu'udi' ja ben' ulioga' nè'èdi' sa'jè' duze yedyi layu guidajè' ga zua'.

32 'Ulehue pensari ca raca quie yaga higo. Cati naca taca'n re'ene, na' rasi la'aga' quien, na' nezile bazeza' biu' uba. 33 Lèscan' cati ilè'èle araca cabè' baonia' taze de yela' huaca quia' inezile baruen bagozi dza iyudyi quie dyilayu. 34 Tali rnia' le'e, tu bineya ži'i suba ben' nita' na'a, bè' gaca cabè' baonia' le'e. 35 Huade quie ta dyia guibá len lao dyila yu cana'zi, pero quie di'idza' rnia', biten cana'zi. Decazide gacan.

36 'Nunu nezi bata idyin dza iyudyi dyilayu. Binezi ja ángel dyia guibá, binezda' nè'èdi' ži'i Diuzi. Tuzi Xuza' Diuzi nezinè'.

37 'Cabè' guca dza uzu Noé dyilayu, lèscana' gaca cati yeguida' nè'èdi', bichi yugulu benè', tatula. 38 Na' dza na' cati baruen bago gaca juicio nisa, bigulejè'. Nita'jè' ri'o raojè', rutzagana' ja ži'ijè' hasta bdyin dza cati yuu'u Noé lu'u barco quienè'. 39 Na' bigucabè'jè' bi gaca quiejè' hasta dyin dza guca juicio nisa, cana' bi'a nisa yugulujè' gutijè'. Lèscana' gaca cati yeguida' nè'èdi', bichi yugulu benè', tatula. 40 Cati idyin dza na', chi zu chopa benè' layela, na' yequiè' ja ángel tunè', itunè' yega'n. 41 Lèscana' chi zu chopa nigula hueto, na' yequiè' ja ángel tunè', itunè' yega'n.

42 'Ulesu listo como dan' binezile bi hora yeguida' nè'èdi' naca' xa'nle. 43 Ulehue pensari can' nia' le'e. Chi nezi xa'n yu'u bi hora guida ben' uban du rëla, huazunè' listo ta ina'nè' bihuenè' lato tzu'u ben' uban lu'u yu'u quienè' cuannè'. 44 Quie lena', sule listo, como dan' cati ruele pensari biguida', huida', lèhora na' cati guida' nè'èdi', bichi yugulu benè'.

Unè Jesús tu ejemplo quie tu mozo

(Lc. 12.41-48)

45 Na' una Jesús:

—Rnia' le'e tu ejemplo quie tu mozo, ben' rioñe'e ruzu di'idza'. Na' pca'n xa'nnè' lènè' ta ugaonè' ja ben' mozo quienè'. Na' uza'nè' žioguè'. 46 Na' huatzaxe xa'nnè' lènè' cati

yedyinnè' ilè'èné' rue mozo za' cabè' ta bènè' lèbè' mandado. ⁴⁷ Tali rnia' le'e, uca'n xa'nnè' lao na'anè' yugulu ta de quienè'. ⁴⁸ Pero chi biruenè' tahuen, chi raquenè' biyedyinneza xa'nnè', ⁴⁹ chi usacanè' ja mozo quienè' bizinaquezi, chi rdalènè' ben' žudyi tuže hue'e, ⁵⁰ na' yedyin xa'nnè' cati raquenè' biyedyin xa'nnè', ⁵¹ na'ra hue xa'nnè' lèbè' castigo ca castigo hue Diuzi ben' birue tuzi ca nayaquè'. Huayojè' gui' gabila ga cuedyiya'jè', ga gaojè' lejè'.

25

Unè Jesús tu di'idza' quie chi nigula cuidi'

¹ Na' una Jesús:

—Re'enda' inia' le'e tu di'idza' cabè' rue Diuzi inabè'nè' cati idyin dza na'. Nacan ca quie chi nigula cuidi', ben' uza'ja zioja ga raca huetzagana'. Nu'ajabi' lámpara yudzo aceite ta tziojabi' lidyi bibyu utzagana' ta tzelezajabi' lèbi' guidabi'. ² Na' guca ga'yo' nigula listo. Na' iga'yo'jabi' bigucajabi' listo. ³ Na' ja nigula binaca listo bibi'ajabi' tu frasco huio aceite ta yeyudzo lámpara bè' bebidyi aceite quien. ⁴ Pero ja nigula listo bi'ajabi' tu frasco huio aceite len lámpara quiejabi'. ⁵ Na' udzè bi'byu utzagana' guidabi'. Na' unan gasijabi' gusijabi'. ⁶ Na'ra ca du gatzo yela bejabi' rbedyiya' ja benè' unajè': "¡Baza' bi'byu utzagana'! ¡Ulero gapala'nlebi'!" ⁷ Na' uyasa ja nigula cuidi' yugujabi' bga'ala'jabi' lámpara quiejabi'. ⁸ Na' lao ga'yo'jabi' biguca listo gudyijabi' iga'yo'jabi' naca listo rëbijabi' lëjabi': "Ulegun ledao' aceite quiele nêto', dan' bareyula lámpara quiendo'." ⁹ Na'ra una ga'yo'jabi' listo rëbijabi' lëjabi': "Bigunndo'n, dan' chi gunndo'n, bigaquen quiendo' lente le'e. Uletzio tzegue'len ga ruti'nè'n ta gata' quiele." ¹⁰ Na' tu zio ja ga'yo'jabi' biguca listo tzegue'jabi' aceite, tu na' bdyin bi'byu utzagana'. Na' uyu'u iga'yo'jabi' de aceite quie conlè bi'byu utzagana' lu'u yu'u ga raca huetzagana'. Na' besiojè' yu'u. ¹¹ Ude na' bedyin iga'yo'jabi' unajabi' rëbijabi' bi'byu utzagana': "¡Señor, Señor, usalu yu'u tzu'undo'!" ¹² Na' una bi'byu utzagana' rëbibi' lëjabi': "Tali binubè'da' le'e."

¹³ Na' una Jesús rëbinè' ben' quienè':

—Ulehue listo, dan' binezile bi dza, bi hora, yeguida' nê'èdi', bichi yugulu benè', tatula.

Unè Jesús tu di'idza' quie tu xan' mozo, ben' pca'n dumi lao na'ajè'

¹⁴ Na' una Jesús:

—Re'enda' inia' le'e itu di'idza' cabè' rue Diuzi rnabè'nè'. Ruenè' ca tu ben' re'en tzio yedyi tula. Tu zaza'nè' tzionè' gužinè' ja mozo quienè' ta pca'nnè' centavo quienè' lao na'ajè'.

¹⁵ Na' bizi tu ben' mozo quiè' bènè' cadu ga'yo' mila dumi plata. Itunè' bènè' cadu chopa mila dumi plata. Itunè' bènè' cadu tu mila dumi plata. Bènè' quie quiejè' dumi cabè' nezinè' rueljèjè' dyin dumi. Na'ra uzè'è zioquè'. ¹⁶ Ben' mozo, ben' uzi' ga'yo' mila na', bëlènè'n dyin bènè' gan iga'yo' mila ži'inan. ¹⁷ Lëscan' ben' uzi' chopa mila, bëlènè'n dyin bènè' gan ichopa mila ži'inan. ¹⁸ Pero na' ben' uzi' tu mila, uyonè' yecachi'nè'n yeguenè' tu yero ga bdze'nè'n lu'u yu.

¹⁹ Bè' guca zè dza, na' bedyin xan' ja ben' mozo gužinè' lëjè' beyuelènè' lëjè' zubaba. ²⁰ Na' tanèro bdyin ben' uzi' ga'yo' mila yesannè' dumi. Na' unè' rëbinè' xa'nnè': "Señor, benlo'nè' ga'yo' mila. Na' ni de iga'yo' mila ži'inan ta bia' gan." ²¹ Na' una xa'nnè' rëbinè' lèbè': "Tahuen gula cabè' bao'. Mozo dya'a naco', ruzulo' di'idza' quia'. Tadya'a bëlao' tadao' pca'na' lao nao', tana' uca'na' lao nao' tažera, idaohuero suro tuže." ²² Na' taorupe bdyin ben' uzi' chopa mila yesannè' dumi. Na' unè' rëbinè' xa'nnè': "Señor, benlo'nè' chopa mila. Na' ni de ichopa mila ži'inan ta bia' gan." ²³ Na' una xa'nnè' rëbinè' lèbè': "Tahuen gula cabè' bao'. Mozo dya'a naco', ruzulo' di'idza' quia'. Tadya'a bëlao' tadao' pca'na' lao nao', tana' uca'na' lao nao' tažera, idaohuero suro tuže." ²⁴ Pero na' taoyune bdyin ben' uzi' tu mila. Na' unè' rëbinè' xa'nnè': "Señor, nezda' naco' ben' re'en mozo quie ta huejè' dyin gaca ži'inan dumi quio'. Huetzagao' mandado ja mozo quio' ta yezi'jè' usecho gaca ži'inan quio'. ²⁵ Lena' bdzeba' udyiaya'a dumi quio'. Tana' yecacha'n lu'u yu. Na' ni de dumi quio'. Gabi guca quie." ²⁶ Na' una xa'nnè' rëbinè' lënè': "Mozo mala zan huèdi naco'. Nezilo' huetzaguia' mandado ja mozo quia' ta yezi'jè' usecho gaca ži'inan quia'. ²⁷ Tana' reya'ala' huelao' dyin dumi quia' ta gaca ži'inan cuenda cati yela' tatula yezi' dumi quia' len ži'inan." ²⁸ Na' una xa'nnè' rëbinè' ben' nita'ja na': "Uleguba tu mila dumi nezi'nè'. Ulehue'n ben' nezè chi mila. ²⁹ Nu ben' ruelè dyin ta pca'na' lao nê'è, hue'ra'lènè' tažera gacaran sobre. Pero nu ben' biruelè dyin ta pca'na' lao nê'è, hueguba' ta pca'na' lao nê'è. ³⁰ Na'ra uledze' mozo žan huèdi niga lao lato chula ga cuedyinè', ga yedzagalaonè', ga gao leinè'." —Cana' una Jesús rëbinè' lëjè'.

Unè Jesús cabè' huenè' dza gaca juicio

³¹ Na' una Jesús:

—Cati yeguida' nê'èdi', bichi yugulu benê', huabi'a xlatoga'. Hueguidalia' ja ángel quia'. Huapala'n ja benê' nê'èdi'. ³² Na' yegu'udi' yugulu ben' tu tu yedyi de lao dylayu laohua'. Useria' ja benê' cuioga'jê' chopa cue' cabê' rue ben' rapa beco' zî'ila', rbioguê' beco' zî'ila' tzala'la, na' rbioguê' chivo itzala'la. ³³ Cana' huabioga' ben' nao xneza' zaquê' yebê, pero huabioga' ben' binao xneza' zaquê' yega'. ³⁴ Na' inia' yêba' ja ben' zu zaquê' yebê: “Uleda le'e, ben' neyêri laxta'ohue lao Diuzi. Uletzu'u guibá ga arnabê' xuzá, ga pcuezanê' desde dza cati ure'te dylayu. ³⁵ Lena' naca quiele, como dan' cati udua', benle nê'èdi' ta udaohua'. Cati ubilida', benle nê'èdi' ta hua'a. Cati uza'a yedyi tula bla'a zan yu'u quiele, benle posada quia'. ³⁶ Cati bdziogueda' zaba', benle nê'èdi' ta gucua'. Cati guca' zhui'a, cati guta' dyiguiba, bidale bedena'le nê'èdi'.” Cana' yêba' lějê'. ³⁷ Na'ra ina ben' neyêri laxta'ohue lao Diuzi yêbijê' nê'èdi': “Señor, ¿bata blê'èndo' luê' uduelo', na' benndo' ta udaolo'? ¿Bata blê'èndo' luê' ubililo', na' benndo' ta hue' elo'? ³⁸ ¿Bata blê'èndo' luê' uzao' yedyi tula bla'o' zan yu'u quiendo', na' benndo' posada quio'? ¿Bata blê'èndo' bdzioguelo' zabo', na' benndo' gucolo'? ³⁹ ¿Bata blê'èndo' luê' guta'lo' lu'u dyiguiba, na' bedena'ndo' luê'?” ⁴⁰ Na'ra inia' yêba'jê': “Tali rnîa' le'e, yugute ta babêle beyêchi'la'adyi'le bicha', ben' nao xneza', la'acazi ben' yêchi' gula, cana' beyêchi'la'adyi'le nê'èdi'.”

⁴¹ Na'ra inia' yêba' ja ben' nita' zaquê' yega': “Ulebiga' tzala'la le'e ben' yu'u de' lao Diuzi. Uletzio gui' gabila ta bireyula tuzioli ta pceza Diuzi quie xan' taxi'ibi' len ja ángel quienan. ⁴² Lena' gaca quiele tziolo, como dan' cati udua', bibenle nê'èdi' ta gaohua'. Cati ubilida', bibenle nê'èdi' ta yo'oga'. ⁴³ Cati uza'a yedyi tula bla'a zan yu'u quiele, bibenle posada quia'. Cati bdziogueda' zaba', bibenle ta gacua'. Cati guca' zhui'a, guta' lu'u dyiguiba, bibidale bedena'le nê'èdi'.” Cana' yêba' lějê'. ⁴⁴ Na'ra inajê' yêbijê' nê'èdi': “Señor, ¿bata blê'èndo' luê' uduelo'? ¿Bata blê'èndo' luê' ubililo'? ¿Bata blê'èndo' luê' uzao' yedyi tula bla'o' zan yu'u quiendo'? ¿Bata blê'èndo' luê' bdzioguelo' zabo'? ¿Bata blê'èndo' luê' guca' zhue'lo'? ¿Bata blê'èndo' luê' guta'lo' lu'u dyiguiba, na' bibeyêchi'la'adyi'ndo' luê'?” ⁴⁵ Na' inia' yêba'jê': “Tali rnîa' le'e, yugute ta bibêle bibeyêchi'la'adyi'le ja ben' nao xneza', la'acazi ben' yêchi' gula, cana' bibeyêchi'la'adyi'le nê'èdi'.” ⁴⁶ Caora na' tziójê' gui' gabila ta bireyula tuzioli. Pero ja ben' neyêri laxta'ohue lao Diuzi, huayojê' tzesuljê' Diuzi guibá tuzioli. —Cana' una Jesús rëbinê' lějê'.

26

Cabê' bějê' psaque'jê' ta guxujê' Jesús

(Mr. 14.1-2; Lc. 22.1-2; Jn. 11.45-53)

¹ Cati beyudyi una Jesús cana', na' unê' rëbinê' ben' quienê':

² —Como banezile, ichopa dzazi idyin ga'ala' lani pascua. Na' usedyin benê' nê'èdi', bichi yugulu benê', lao na'a ben' rnabê' ta uda'jê' nê'èdi' lê'è yaga cruzo. —Cana' una Jesús.

³ Na'ra caora na', begu'udi' ja ben' naca xan' pxuzi, len yaca los demás ben' rusêdi ley quie Moisés, len ben' rnabê' quie ben' Israel, begu'udi'jê' lali'a palacio quie Caifás, ben' naca xan' pxuzi rnabê'ra iza na'. ⁴ Na' psaque'jê' bi huejê' ta guxujê' Jesús balarazi gutijê' lëbê'. ⁵ Cana' unajê' rëbijê' laguedyijê':

—Bireya'ala' gutironê' tu neraca lani ta biidza' ja benê' ra'o.

Tu nigula blatonê' aceite tza'o' guicho Jesús

(Mr. 14.3-9; Jn. 12.1-8)

⁶ Na'ra uza' Jesús lënê' yaca ben' quiê' ziojê' yedyi Betania uyu'ujê' yu'u quie Simón, ben' guca yela' hue' ta ruzudzo' cuerpo quienê' dza na'. ⁷ Na' ubiga' tu nigula ga re' Jesús lao mesa. Nu' anê' tu frasco yo alabastro yudzo aceite tza'o' ta rla'n zixi zëo. Na' blatonê'n guicho Jesús. ⁸ Cati blê'è ja ben' quie Jesús cabê' bê nigula, na'ra bdza'jê' unajê' rëbijê' laguedyijê':

—¿Bixquien' beditoguê' aceite cana'? ⁹ Reya'ala' guti'nê'n zaca'n dumi ze tacuenda gacalênê' ben' yêchi'.

¹⁰ Na' be Jesús cabê' rnajê', na' unê' rëbinê' lějê':

—¿Bixquien' ruele zêdi nigula niga? Tadya'a bënê' quia'. ¹¹ Nita'cazi ben' yêchi' ladole yugu dza. Pero nê'èdi', baruen bago dza bira sulia' le'e. ¹² Lena' blatonê' aceite rla'n zixi zëo guichoga', dan' baruen bago dza gatia' udze'jê' cuerpo quia' lu'u beló yo. ¹³ Tali rnîa' le'e, con gatítezi tzetixogue' benê' xti'idza' Diuzi inajê' cabê' re'en Diuzi gata' yela' neban quie yaca benê' tuzioli, quixogue'rêjê' cabê' bê nigula niga quia'. Cana' yeza'la'adyi'jê' cabê' bënê' quia'.

Psaque' Judas ta usedyinnê' Jesús lao na'a ben' rnabê'

(Mr. 14.10-11; Lc. 22.3-6)

¹⁴ Na'ra uyo tu ben' quie Jesús, ben' lao Judas Iscariote, yegue'lênê' ja xan' pxuzi di'idza'.

¹⁵ Na' una Judas rëbinê' lějê':

—¿Gaca gunle në'ëdi! chan' usedyina! Jesús lao na'ale?

Na' udižujë' lëbë' galobechi dumi plata. ¹⁶ Na'ra rusaque! Judas nacala huenë' ta usedyinnë' Jesús lao na'a ja xan' pxuzi.

Udao Jesús rtze' lani pascua

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Dza nëro uzu dza lani, dza rao ja ben' Israel yëta xtila biyu'un levadura, bebiga' ja ben' quie Jesús ga zënë' unajë' rëbijë' Jesús:

—¿Ga re'lenlo' usiña'ndo' ta gaoro quie lani pascua?

¹⁸ Na' una Jesús rëbinë' lëjë':

—Uletzio ciudad Jerusalén tzena'le tu ben' zu na'. Na' yëbilenë': “Cani una maestro: Baruen bago dza gatia'. Quie lena' gaolia' ja ben' quia' quie lani pascua zan yu'u quio'.”

¹⁹ Na' bë ja ben' quie Jesús cabë' bënë' lëjë' mandado. Uyojë' psiña'jë' ta gaojë' rtze' quie lani pascua.

²⁰ Cati bagula, bdyin Jesús ure'lënë' ja chipchopa ben' quië' lao mesa. ²¹ Tu raca neyu'ujë' raojë', una Jesús rëbinë' lëjë':

—Tali rnia' le'e, ladole zu tu ben' usedyin në'ëdi' lao na'a ben' rñabë'.

²² Na' guquejë' bayëchi' gula. Na' unë tu huiojë' rëbijë' Jesús:

—Señor, ¿quele në'ëdi' hua' cabë' unao'?

²³ Na'ra una Jesús rëbinë' lëjë':

—Nu ben' udyilë në'ëdi' tuže yëta quie lu'u plato dyia niga, lëbë' usedyinnë' në'ëdi' lao na'a ben' rñabë'. ²⁴ Decazide gaca quia' në'ëdi', bichi yugulu benë', cabë' rnën lë'ë guichi la'iya quie Diuzi. Pero bayëchi' gula ta za' gaca quie ben' usedyin në'ëdi' lao na'a ben' rñabë'. Tadya'acala quienë' chan' biuzunë' lao yedyi layu.

²⁵ Na' una Judas, ben' usedyin Jesús lao na'a ben' rñabë', rëbinë' lëbë':

—Maestro, ¿quele në'ëdi' hua' cabë' unao'?

Na' una Jesús rëbinë' lëbë':

—Aja', luë' na'.

²⁶ Na' tu raca neraojë', bëxu Jesús yëta xtila unë' rëbinë' Diuzi: “Diuxcalelo'.” Na' bžuzunë'n bë'në'n ja ben' quië' unë' rëbinë' lëjë':

—Ulegao, lëlen nacan ca quie cuerpo quia'.

²⁷ Ude na', bëxunë' tu copa vino nisa bedzuli', unë' rëbinë' Diuzi: “Diuxcalelo'.” Na' bë'në'n ja ben' quienë' unë' rëbinë' lëjë':

—Uleyo'on yugulule. Lëlen nacan ²⁸ ca quie ren quia'. Lena' ilatoga' gatia' cuenda yega'n'tza'olë Diuzi le'e tacubi, lëscan' cuenda gata' yela' huezi'ze quie yaca ben' zë. ²⁹ Pero rnia' le'e, bira yo'oga' vino nisa bedzuli' tatula. Hasta que idyin dza zulële në'ëdi' ga rñabë' Xuzza' Diuzi, na'tera yo'oga' tacubi tatula.

Una Jesús cabë' hue Pedro usannë' lëbë'

(Mr. 14.26-31; Lc. 22.31-34; Jn. 13.36-38)

³⁰ Na' ude beyudyi bilajë' tu himno, uza'jë' ziojë' ya'a Olivos. ³¹ Na' una Jesús rëbinë' ja ben' quienë':

—Huasanle në'ëdi' yugulule na'ayela. Gaca quiele ca rnan lë'ë guichi la'iya quie Diuzi: “Hue' Diuzi lato guti ja benë' xan' beco' ži'ila', na'tera huedzatza ja beco' ži'ila' quienë'.” ³² Pero iyudyi guti ja benë' në'ëdi', huebana' tatula, huabialaohua' laole tziolé estado Galilea.

³³ Na'ra una Pedro rëbinë' Jesús:

—Ba'ala'cazi yugulujë' usanjë' luë', pero në'ëdi', biusancaza' luë'.

³⁴ Na' una Jesús rëbinë' Pedro:

—Tali rnia' luë', tu binecuedyi biu na'ayela, huëbo' benë' binubë'lo' në'ëdi' tzona lasa.

³⁵ Na' una Pedro rëbinë' Jesús:

—Ba'ala'cazi chi gutirëjë' në'ëdi' len luë', biyëpa' ja benë' binubë'da' luë'.

Cana'rë una yaca los demás ben' quie Jesús.

Bë'lë Jesús Diuzi di'idza' tu ga lao Getsemaní

(Mr. 14.32-42; Lc. 22.39-46)

³⁶ Na'ra bdyinlë Jesús ja ben' quienë' ga lao Getsemaní, na' unë' rëbinë' lëjë':

—Ni ulecue' tu raca tza'a ni' tzegue'lia' Diuzi di'idza'.

³⁷ Na' uquië' Jesús Pedro len chopa ži'i Zebedeo, udyialaorajë' ilë'ëti' ga uzulao guque Jesús bayëchi' gula. ³⁸ Na' una Jesús rëbinë' lëjë':

—Tanto raqueda' bayëchi' gula, re'ennan gutin në'ëdi'. Le'e yega'nle niga, pero bigasile huele në'ëdi' tuže.

³⁹ Na'ra udyialaoranë' ilë'ëti' gutanë' guzu ru'ala layu, bël'ënë' Diuzi di'idza' unë' rëbinë' Diuzi:

—Xuza' Diuzi, chi saque' ucachi' ucui'olo' në'ëdi' ca naca tazëdi gula baza' gaca quia'. Nacan ca quie tu tasla' gula yo'oga'. Pero bihuelo' cabë' re'enda', huelo' cabë' re'encazo' gaca.

⁴⁰ Na' zeza'në' bedyinnë' ga nita' ja ben' quienë'. Cati blë'ënë' arasijë', na'ra unë' rëbinë' Pedro:

—¿Quele biuzaque'le bigasile ni tu hora ta huele në'ëdi' tuze? ⁴¹ Bigasile. Ulehue'lë Diuzi di'idza' tacuenda bihue xan' taxi'ibi' le'e gan huele xquia ca tazëdi gula baza' quiele. Tali re'enle huelële në'ëdi' tuze, pero nerdzioguele fuerza quie Diuzi ta huele cabë' re'enle huele.

⁴² Na' taorupe zio Jesús yegue'lënë' Diuzi di'idza' unë' caniga:

—Xuza' Diuzi, chi bisaque' te cana'zi ca naca tazëdi gula baza' gaca quia', na'ra gacacazi ca re'enlo'.

⁴³ Na'ra zeza'në' bedyinnë' tatula ga nita' ja ben' quienë', pero nerasijë', dan' lega yu'u bichi gala laojë'. ⁴⁴ Na' psannë' lëjë' zioquë' taoyune lasa yegue'lënë' Diuzi di'idza'. Unë' rëbinë' Diuzi cabë' unë' taorupe. ⁴⁵ Na'ra zeza'në' tatula bedyinnë' ga nita' ja ben' quienë'. Na' unë' rëbinë' lëjë':

—Na'a sí, gasile yezi'la'adyi'le. Abdyin hora usedyin benë' në'ëdi', bichi yugulu benë', lao na'a ben' napaja dula' xquia. ⁴⁶ Ulechasa, tzioro. Baza' ben' usedyin në'ëdi' lao na'a ben' r nabë'.

Bëxujë' Jesús preso

(Mr. 14.43-50; Lc. 22.47-53; Jn. 18.2-11)

⁴⁷ Na' nezë Jesús ru'enë' di'idza' cati bdyin Judas, ben' naca ben' quienë' lao chipchopajë'. Bdyinlënë' ja ben' zë nu'ajë' macheta, nu'ajë' yaga. Bdyinjë' use'ela' ja xan' pxuzi len ja ben' r nabë' lëjë'. ⁴⁸ Na' Judas, ben' usedyin Jesús lao na'ajë', bega'nlnë' lëjë' di'idza' dza na' caora gudyinë' lëjë' cani:

—Con ben' gaohua' tu situ xa'ague, lëben' na' guxule preso.

⁴⁹ Na' ubiga' Judas ga zë Jesús unë' rëbinë' lëbë':

—¡Padiux, Maestro!

Caora na' udaohuë' Jesús tu situ.

⁵⁰ Na' una Jesús rëbinë' lëbë':

—Padiux, bicha'. ¿Bi ruelo' zao' niga?

Na'ra ubiga'jë' bëxujë' Jesús preso uquië'jë' lëbë'. ⁵¹ Caora na' ulio tu ben' quie Jesús macheta quienë', uchugunë' naga ben' naca mozo quie xan' pxuzi. ⁵² Na' una Jesús rëbinë' lënë':

—Bedze' macheta quio' lu'u lidyin. Nu ben' rdilaja conlë macheta, lëlëcazin gutin lënë'.

⁵³ ¿Binezo' ca huelëcazi Xuza' në'ëdi'? Chan' inaba' xuza', ise'elë' mazla tzona galo chi mila ja ángel ta gacalëjë' në'ëdi'. ⁵⁴ Pero chi inaba' xuza' ta ise'elë' ja ángel, na' bisaque' gaca quia' cabë' rnën lë'ë guichi la'iya quie Diuzi ca reya'ala' gaca quia'.

⁵⁵ Na'ra una Jesús rëbinë' ja ben' bdyin bëxu lëbë':

—¿Abrole nu'ale macheta, nu'ale yaga, ta guxule në'ëdi'? ¿Raquela në'ëdi' ben' uban? Yugu dza rbi'a lu'u idao' r nabë'ra rusëdia' benë', pero bibëxule në'ëdi' caora na'. ⁵⁶ Pero cana' guca tacuenda uzu di'idza' cabë' di'idza' quie Diuzi bzu ben' profeta lë'ë guichi dza na'te.

Na'ra psanla'adyi' ja ben' quie Jesús lëbë' bzunojë'.

Psedyinjë' Jesús lao na'a ben' r nabë'

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Na' uquië' ben' bëxu Jesús preso lao Caifás, ben' naca xan' pxuzi r nabë'ra. Lena' negu'udi' ja ben' rusëdi ley quie Moisés, len ja ben' r nabë'. ⁵⁸ Pero zio Pedro naohuë' lëjë' zitu'la, bdyinnë' lali'a yu'ute quie xan' pxuzi r nabë'ra. Na' uyu'unë' ure'në' lado ja policia ta ilë'ënë' cabizi gaca iyudyin.

⁵⁹ Na' rusaque' ja xan' pxuzi, len yugu ja ben' r nabë' quie idao' r nabë'ra bi huejë' ta gaojë' Jesús xquia ta gutijë' lëbë', ba'ala'cazi tafalso gaojë' lëbë' xquia. ⁶⁰ Pero bibezelejë' ca inajë', ba'ala'cazi unë' ja ben' zë di'idza' falso contra lëbë'. Na' beyudyite bdyin chopa testigo falso. ⁶¹ Na' unajë' rëbijë' ben' nita'ja na':

—Lëben' niga unë': “Údyiaya'a idao' r nabë'ra, na' yelisa'n tatula lao tzona dza.”

⁶² Na'ra uzuli xan' pxuzi r nabë'ra, unë' rëbinë' Jesús:

—¿Bixquien' birequëbo'? ¿Bi ca nao' dan' rnëjë' cabë' unao'?

⁶³ Pero chizi bega'n Jesús. Na' una xan' pxuzi r nabë'ra rëbinë' Jesús:

—Rguntia' Diuzi zu guibá, guenë' chi rnao' tali. Unë' nëto' chi tali naco' Cristo, zi'i Diuzi.

⁶⁴ Na' una Jesús rëbinë' lëbë':

—Tali naca' Cristo, ži'i Diuzi, cabè' unao'. Lëscan' inia' le'e, hualë'ële në'ëdi', bichi yugulu benè', cati cui'a zaquë' yebè cuëta Diuzi, ben' de yela' rnabè' že quie. Lëscan' hualë'ële në'ëdi' cati yeguida' tatula lao beo zë žan guibá.

⁶⁵ Na'ra tantozi bdza' xan' pxuzi rnabè'ra, uchezanè' žabè' unè' rëbinè' ja ben' nita' na':

—Rnaya' ben' niga Diuzi cabè' rnè'. Bira rnaban testigo tula. Abele cabè' di'idza' unè' rnaya'nè' Diuzi. ¿Bi ca nale huero quienè'?

⁶⁶ Na' unajè' rëbijè' xan' pxuzi rnabè'ra:

—Napè' dula' xquia, reya'ala' gatinè'.

⁶⁷ Na'ra bda'jè' žen' laohuè', bè'jè' lëbè' zi'. Ibalajè' udijè' laohuè', ⁶⁸ unajè' rëbijè' lëbè':

—Chi naco' Cristo, unacara nu udi luè'.

Una Pedro binubè'nè' Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ Tu neraca cana', ure' Pedro lali'a. Na' ubiga' tu nigula rue dyin lao xa'ne ga re' Pedro unanè' rëbinè' lëbè':

—Lëscana' luè', rdalërao' Jesús, ben' estado Galilea.

⁷⁰ Na'ra una Pedro rëbinè' lënè':

—Binubè'da' nu ben' nao'.

⁷¹ Na' zio Pedro zënë' ru'a puerta cati blè'ë itu nigula zë na'. Na'ra una nigula na' rëbinè' ja ben' zë na':

—Lëscan' lëben' na' rdalërënè' Jesús, ben' yedyi Nazaret.

⁷² Na' una Pedro rëbinè' lëjè':

—Ruguntia' Diuzi binubè'da' ben' na'.

⁷³ Tu chi'zi ude beyudyi na', ubiga' ja ben' nita'ja na' ga zë Pedro, unajè' rëbijè' Pedro:

—Tali luè' nacarao' ben' quie ben' na' como dan' nenate cabè' ruelo' ru'elo' di'idza'.

⁷⁴ Na'ra rugunte Pedro Diuzi hue Diuzi lëbè' castigo chi binacan tali cabè' rnè'. Na' unè' rëbinè' ja ben' nita' na':

—Binubè'da' nu ben' nale cana'.

Caora na' laoredyite tu biu. ⁷⁵ Na' beza'la'adyi' Pedro cabè' una Jesús gudyinè' lëbè': "Tu binecuedyi biu na'ayela, na' tzona lasa yëbo' benè' binubè'lo' në'ëdi'." Na' bero Pedro zionè' uredyinè' zi'laza gula.

27

Psedyinjè' Jesús lao na'a Pilato

(Mr. 15.1; Lc. 23.1-2; Jn. 18.28-32)

¹ Na' cati yani' na', bega'n yugu ja xan' pxuzi, len ja ben' rnabè' quie ben' Israel di'idza' bi huejè' ta gutijè' Jesús. ² Na'ra nuquiojè' Jesús psedyinjè' lëbè' lao na'a Poncio Pilato, ben' naca gobernador:

Cabè' guca guti Judas

³ Cati blè'ë Judas cabè' ruejè' quie Jesús gutijè' lëbè', na'ra beyaquenè' cabè' bënë'. Na' uyonè' yesannè' lao ja xan' pxuzi, len ja ben' rnabè' galobechi dumi plata ta udizujè' lëbè'.

⁴ Na' unè' rëbinè' lëjè':

—Abia' tu xquia, psedyina' tu ben' bibi dula' xquia quie de lao na'ale, na' gutilenè'.

Pero na' unajè' rëbijè' lëbè':

—¿Bi cuenda quie nëto'? Nacan cuenda quio' luè'.

⁵ Na'ra bzala Judas dumi plata lu'u idao' rnabè'ra uyoguè' bdze'nè' du quienè' uzè' ladza ta gutinè'.

⁶ Na' bezi' ja xan' pxuzi dumi plata unajè' rëbijè' laguedyijè':

—Bireya'ala' udze'ro dumi niga lu'u caja ga yu'u gun quie Diuzi, como dan' xlažo quie ben' bëti benè' na'.

⁷ Na'ra labega'ntejè' di'idza' bi huejè' conlè dumi yeya'ojè' tu cue' layu ga ucachi'jè' ben' binaca ben' Israel. Na' layu beya'ojè' laona layu quie ben' rue taza plato dza na'.

⁸ Pero na'a biralaona cana'. Anexuba ja benè' laona layu quie ren. Cana' laona hasta na'adza. ⁹⁻¹⁰ Cana' uzu di'idza' cabè' una profeta Jeremías dza na'. Lëdi'idza' na' rnèn caniga: "Aodizu ben' Israel galobechi dumi plata precio quienè'. Lëdumi aozijè' beya'ojè' tu cue' layu quie ben' rue taza plato. Cana' una Diuzi gudyinè' në'ëdi'." Cana' una profeta Jeremías.

Zë Jesús lao Pilato

(Mr. 15.2-5; Lc. 23.3-5; Jn. 18.33-38)

¹¹ Na'ra uquiè'jè' psedyinjè' Jesús lao na'a ben' naca gobernador. Na' una ben' naca gobernador rëbinè' Jesús:

—¿Naco' rey quie ben' Israel?

Na' una Jesús rëbinë' lëbë':

—Naca' rey quiejë' cabë' unao'.

¹² Cati rao ja xan' pxuzi, len ben' r nabë' Jesús xquia, bibequëbinë'. ¹³ Na' una Pilato rëbinë' Jesús:

—¿Quele birelo' cabë' najë' raojë' luë' xquia?

¹⁴ Pero bibequëbi Jesús tatula. Tana' lena' lega beban gobernador.

Pchugulijë' gati Jesús

(Mr. 15.6-20; Lc. 23.13-25; Jn. 18.38—19.16)

¹⁵ Na' de tu costumbre quiejë' yebio gobernador tu ben' preso yu'u lu'u dyiguiba tu raca lani pascua. Na' yebio gobernador nutezi ben' re'en ja benë' yero. ¹⁶ Na' yu'u tu ben' lao Barrabás lu'u dyiguiba. Nezi ja benë' dyë'ëdi naquë' ben' mala. ¹⁷ Na'ra bë' begu'udi' ja benë', na' una Pilato rëbinë' lëjë':

—¿Ca nuzilajë' re'enle yebioga' lu'u dyiguiba? ¿Re'enle yebioga' Barrabás? ¿O chi re'enle yebioga' Jesús, ben' na use'ela' Diuzi lëbë'?

¹⁸ Cana' unë' rëbinë' lëjë' dan' gucabë'në' yela' zë' quie ben' r nabë' psedyinjë' Jesús lao na'anë'.

¹⁹ Na'ra tu ure' Pilato ga ruenë' justicia, caora use'ela' žgulë' di'idza' gudyinë' lëbë': "Usanlo' quie ben' na, dan' bibi xquia napë'. Uxusa' udiyele cabë' raca quienë'. Lega rdëbida' quio' chi biusanlo'në'."

²⁰ Pero bëlë ja xan' pxuzi len ja ben' r nabë' ja benë' di'idza' ta inabajë' ta yero Barrabás, pero ta gutijë' Jesús. ²¹ Na' una gobernador rëbinë' lëjë' tatula:

—¿Nulajë' lao rupajë' re'enle yebioga' lu'u dyiguiba?

Na' unajë' rëbijë' lëbë':

—Barrabás.

²² Na' unaba Pilato rëbinë' lëjë':

—¿Biži hua' quie Jesús, ben' na use'ela' Diuzi lëbë'?

Na' yugutejë' unajë' rëbijë' Pilato:

—¡Uda'lo'në' lë'ë yaga cruzo!

²³ Na' una Pilato rëbinë' lëjë':

—¿Biži xquia bënë'?

Pero na' unajë' zidzo rëbijë' lëbë':

—¡Uda'lo'në' lë'ë yaga cruzo!

²⁴ Cati gucabë' Pilato bisaque' gaca areglo, lëzi blë'ënë' bdza' ja benë', na' bënë' mandado yexi'jë' nisa udibinë' në'ë lao ja benë', unë' rëbinë' lëjë':

—Binaca cuenda quia' në'ëdi' dan' gatinë'. Rnia' le'le gabi xquia bënë'. Nacan cuenda quiele.

²⁵ Na' una yugujë' rëbijë' lëbë':

—Cuenda quiendo' len ži'indo' nacan dan' gatinë'.

²⁶ Na'ra bebio Pilato Barrabás lu'u dyiguiba. Bënë' mandado udi ja soldado Jesús guidi, na' uda'jë' lëbë' lë'ë yaga cruzo.

²⁷ Na' uquië' ja soldado Jesús lao palacio. Caora na' begu'udi' yugu ja laguedyi soldado quiejë', bzujë' lëbë' gatzo la'ohue. ²⁸ Na' ulëchojë' zabë', bgacojë' lëbë' tu la'ari' žna. ²⁹ Na' bdze'jë' guichoguë' tu coron yëchi', psejë' lëbë' tu xaga zaca' në'ë yebë. Na'ra uditzujë' žibijë' laohuë' rutitujë' lëbë' unajë' rëbijë' lëbë':

—¡Viva luë', Rey quie ben' Israel!

³⁰ Lëscan' bda'jë' lëbë' žen'. Na' begubajë' xaga ženë' udijë'n guicho Jesús. ³¹ Ude beyudyi ptitujë' lëbë', belëchojë' tu la'ari' žna guconë', begacojë' lëbë' žabacazë'. Na' uquië'jë' lëbë' ta uda'jë' lëbë' lë'ë yaga cruzo.

Cabë' guca bda'jë' Jesús lë'ë yaga cruzo

(Mr. 15.21-32; Lc. 23.26-43; Jn. 19.17-27)

³² Na' du tu neza bedilajë' tu ben' yedyi Cirene laonë' Simón. Na' bëjë' mandado hua'anë' yaga cruzo.

³³ Cana' bdyinjë' ga laona Gólgota, ta inaro xti'idza'ro: Ya'a chita guicho ben' huati. ³⁴ Na' bë'jë' ta yo'oguë' vino nequixi tasla' gula. Bë' hue'enë'n ledao' bicu', bigu'unnë' yo'oguë'n.

³⁵ Na' ude beyudyi bda' soldado lëbë' lë'ë yaga cruzo, na'ra bëjë' suerte bë'jë' laze žabë'. Cana' uzu di'idza' bzu ben' profeta lë'ë guichi dza na'. Lëdi'idza' nnan caniga: "Bëjë' suerte bë'jë' laze žaba'." ³⁶ Na'ra ure' soldado ta rapajë' lëbë'. ³⁷ Na' guicho cruzo bdyiajë' tu letrero ga rguixogue'n ca bi xquia bënë' dan' bëtijë' lëbë'. Lë'ë letrero unan caniga: "Jesús, Rey quie ben' Israel."

³⁸ Lëscan' bda'rëjë' chopa ben' uban lë'ë ichopa yaga cruzo. Bzujë' tun zaquë' yebë cuëta Jesús, itun bzujë' zaquë' yega'. ³⁹ Na' ude ja benë' ptitujë' lëbë' ruta guicho laojë'. ⁴⁰ Unajë' rëbjijë' lëbë':

—Luë' unao' udyiaguilo' idao' rñabë'ra, na' yeyuelo'n lao tzona dza, psela cuinlo' na'a. Chi tali zi'i Diuzi luë', beyëzi lë'ë yaga cruzo.

⁴¹ Lëscan' ja xan' pxuzi, len ja ben' rusëdi ley quie Moisés, len ja ben' partido fariseo, len ja ben' rñabë' ptitujë' lëbë'. Na' unajë' rëbjijë' laguedyijë':

⁴² —Pte pselanë' ben' tula, nechan' biuzaque'në' uselanë' cuinnë'. Chi tali naquë' Rey quie ben' Israel, hueyëzë' lë'ë yaga cruzo ta galero quienë'. ⁴³ Lëscan' unë' zudyi'llënë' Diuzi. Ca rusela Diuzi lëbë' na'a chi tali raque Diuzi lëbë' como dan' unë' naquë' zi'i Diuzi.

⁴⁴ Na' lente ben' uban, ben' bda'rëjë' lë'ë yaga cruzo, ptturëjë' lëbë'.

Cabë' guca guti Jesús

(Mr. 15.33-41; Lc. 23.44-49; Jn. 19.28-30)

⁴⁵ Na' bechula lao duze ciudad na'. Cadu la'odza uzulaon, na' beyudyin ca du las tres quie zadzë'. ⁴⁶ Lëhora na'tezi uredyia' Jesús zidzo unë':

—Elí, Elí, ¿lama sabactani? —ta inaro xti'idza'ro: Xuza' Diuzi, Xuza' Diuzi, ¿bixquien' apsanla'adyo' në'ëdi'?

⁴⁷ Na' be ja ben' nita' na' cabë' una Jesús. Na' unajë' rëbjijë' laguedyijë':

—Profeta Elías rëzi ben' niga.

⁴⁸ Caora na' lazote tu ben' zu na' yexi'në' tu ta naca yun' ca zi'ila' laona esponja. Na' bdze'në'n lu'u vino sla' bzunë'n lao yaga ta bdyinnan sibi ga da' Jesús ta supinë'n. ⁴⁹ Pero una ibala ja ben' zë na' rëbjijë' lëbë':

—Psan na'. Ya' ina'ro chi guida Elías uselanë' ben' niga.

⁵⁰ Na' uredyia' Jesús zidzo tatula, gutinë'. ⁵¹ Lëhora na'tezi bre'eza la'ari' zë gatzo lao' idao' rñabë'ra. Babre'ezan gucan chopa la'a. Lëscan' guca uzu' ula'an yo yela. ⁵² Na' beyalo beló yo ga yu'u ben' huati. Beban ja zë ben' baguti, ben' bë quie xti'idza' Diuzi dza uzujë'. ⁵³ Cati abeban Jesús, na'ra brojë' lu'u beló yo, uyojë' ciudad naca la'iya Jerusalén. Na' blë'ë ja ben' zë lëjë'.

⁵⁴ Na' cati blë'ë xan' soldado lënë' ja soldado quienë' cabë' guca uzu' len itu ta guca, na'ra bdzebijë' unajë' rëbjijë' laguedyijë':

—Tali naca ben' ni zi'i Diuzi.

⁵⁵ Na' nita' ja nigula zë zitu' rna'jë' cabë' raca quie Jesús. Gucalëjë' unaojë' lëbë' desde dza uza'në' estado Galilea. ⁵⁶ Na' zëlë lëjë' María Magdalena, len María Zna' Santiago, len José, len Zna' yaca zi'i Zebedeo.

Pcachi'jë' Jesús lu'u beló yo

(Mr. 15.42-47; Lc. 23.50-56; Jn. 19.38-42)

⁵⁷ Cati agula, bdyin tu ben' uña'a, ben' yedyi Arimatea laohuë' José. Naquë' ben' nao xneza Jesús. ⁵⁸ Na' uyonë' yena'në' Pilato unabanë' cuerpo quie Jesús ta tzeacachi'në'n. Na' bë Pilato mandado ta hue'jë' lëbë' cuerpo quie Jesús. ⁵⁹ Na' zi' José cuerpo quie Jesús, bdubinë'n tu la'ari' yëri. ⁶⁰ Na' yehua'anë'n bdze'në'n lu'u tu beló yo ta zabeyudyi bënë'. Na' zaotacorë' ru'a beló yo tu yo ze gula ta naca laga'. Ude beyudyi na', bezë'ë zeyoguë'. ⁶¹ Na' ru'a beló yo na' ure' María Magdalena lënë' itu María tula.

Pca'një' ja soldado ga pcachi'jë' Jesús

⁶² Na' beteyu na' dza saodo, dza huezila'adyi' quiejë', uyo ja xan' pxuzi, len ja ben' partido fariseo yena'jë' Pilato ⁶³ unajë' rëbjijë' lëbë':

—Señor, nëto' reza'la'adyi'ndo' cabë' una ben' huizi' yë' na' cati uzuë', unë' hueza'në' ga de ben' huati huebannë' tatula lao tzona dza. ⁶⁴ Tana' lena' ruen zi' huelo' mandado gapa ja soldado ru'a beló yo lao tzona dza. Cana' bisaque' tzio ja ben' quienë' du rëla tzelanjë' cuerpo quienë' tacuenda yëbjijë' ja benë': "Beza'në' ga de ben' huati bebannë'." Chi huaca hue ben' quienë' cana', mazara yë' si'jë' benë'.

⁶⁵ Na' una Pilato rëbinë' lëjë':

—Ni nita' tu cue' soldado, ben' gapa ja ru'a beló yo. Ulequie'jë' ta gapajë' dyë'ëdi ru'a beló yo.

⁶⁶ Na'ra uyojë' uquie'jë' soldado. Pquichijë' tu sello ga nedila ru'a yo ta nutacojë' ru'a beló. Na' pca'një' ja soldado, ben' rapa ru'a beló yo.

Cabë' guca cati beban Jesús

(Mr. 16.1-8; Lc. 24.1-12; Jn. 20.1-10)

¹ Cati uyani' dza tula du bala dza domingo, uyo María Magdalena lënë' itu María tula yena'jê' ru'a beló yo. ² Caora na' lagucate tu užu' nun quie uyëzi tu ángel quie Diuzi guibá, bdubanë' yo nutacojë' ru'a beló, ure'në' laonan. ³ Na' ruseni' laohuë' ca xni' yesa. Lëscan' žabë' rna'n raca titi' bezëri gula. ⁴ Cati blë'ë ja soldado ángel, na' lega bdzebijë' užizan lëjë' byalajë' layu, gutajë' ca quie ben' huati. ⁵ Na' una ángel rëbinë' ja nigula:

—Bidzebile. Nezda' reguilole Jesús, ben' guti lë'ë yaga cruzo. ⁶ Bira zunë' niga. Abebannë' cabë' unë' gaca quienë'. Uledacara, ulena' ga bdze'jê' cuerpo quienë'. ⁷ Uletzio tzeguedyile ja ben' quienë' abeza'në' ga de ben' huati, abebannë'. Huabialaohuë' le'e tu neza Galilea. Na'te hualë'ële lëbë'. Lena' ruen zi quixogui'a le'e.

⁸ Na' du rdzebi ja nigula, uza'jê' taria gan de beló yo, ziojê' redaohuejê' tzeguedyijê' ja ben' quie Jesús cabë' guca. ⁹ Na' ptilalao Jesús lëjê' tu neza ugapë' diuzi lëjê'. Na' ibiga'jê' gan zë Jesús gutajë' layu bda' ru'ajê' uyonela'adyi'jê' lëbë'. ¹⁰ Na' una Jesús rëbinë' lëjê':

—Bidzebile. Uletzio tzeguedyile ja bicha' ben' quia' ta tziojê' Galilea. Na'te ilë'ëjê' në'ëdi'.

Cabë' una ja soldado guca quie cuerpo quie Jesús

¹¹ Tu raca nezio ja nigula tu neza, uza' bala ja soldado uyojê' ciudad Jerusalén yeguëdyijê' ja xan' pxuzi cabë' guca quiejê'. ¹² Na' uyo ja xan' pxuzi yeguëdyijê' ja ben' rnabë' ta yega'njê' di'idza' bi huejê'. Na' bë'jê' ja soldado dumi že. ¹³ Na' unajë' rëbijê' ja soldado:

—Cani yëbile benë'. Du rëla du rasile, bida ja ben' quie Jesús, bedelanjê' cuerpo quienë'.

¹⁴ Chi inezi gobernador cabë' guca quiele, nëto' gacalëndo' le'e ta bibi zëdi gaca quiele.

¹⁵ Na'ra uzi' ja soldado dumi, uyojê' yeguëdyijê' ja benë' cabë' gudyi xan' pxuzi len ja ben' rnabë' lëjê'. Cabë' una ja soldado guca quie cuerpo quie Jesús, cana' na ja benë' guca quien hasta na'adza.

Use'ela' Jesús ben' quienë' tzetixogue'jê' benë' xti'idzë'

(Mr. 16.14-18; Lc. 24.36-49; Jn. 20.19-23)

¹⁶ Na' uza' ja čiptu ben' quie Jesús ziojê' estado Galilea. Na' bdyinjê' ga zu tu ya'a, ga gudyi Jesús lëjê' tziojê' dza na'te. ¹⁷ Lëgan' na' blë'ëjê' Jesús uyonela'adyi'jê' lëbë'. Na' nita' ja ben' quienë' biralajê' chi lëbë'. ¹⁸ Na' ubiga' Jesús gan' nita' ja ben' quienë' unë' rëbinë' lëjê':

—Apcan' Diuzi lao na'a inabi'a lao duže guibá len duže dylayú. ¹⁹ Tana' lena' inia' le'e, uletzio duže yedyi layu tzetixogue'le ja benë' xti'idza', usëdilejê' inaojê' xneza'. Ulehue' lao ja ben' nao xneza' uzëtole Diuzi, uzëtole në'ëdi', uzëtole Bichi Be quienë'. ²⁰ Na' usëdilejê' huejê' duže cabë' baonia' le'e. Bigala'adyi'le sulia' le'e tuzioli hasta iyudyi dyila yu. Amén.

DI'IDZA' LA'IYA BZU SAN MARCOS LĒ'Ē GUICHI

Udixogue' Juan bautista xti'idza' Diuzi

(Mt. 3.1-12; Lc. 3.1-9, 15-17; Jn. 1.19-28)

¹ Cani guca dza na' cati uzulao Juan udixogue'nē' quie Jesucristo, ben' naca zi'i Diuzi.

² Azio zēra iza bzu profeta Isaías xti'idza' Diuzi lē'ē guichi. Cana' udixogue' Diuzi dan' rnēn caniga:

Huase'ela' tu ben' cuialao neza ga tzio' cuenda tzetixogue'nē' yaca benē' huido' luē'.

³ Huazu ben' na' lao lato dachi ga bidyia yu'u, huanē' zidzo yēbinē' laguedyiné' caniga:

“Huele hueluba neza quiele cuenda huida ben' naca xa'nro, usalole tu neza li.”

⁴ Cana' guca bida Juan lao lato dachi ga bidyia yu'u, bē'nē' lao yaca benē'. Cana' unē' gudyiné' leyaquē' de quie reya'ala' utza'yaquē' pensari quieyaquē', hueyaquē' lato ta hue' Juan laoyaquē' cuenda yezí'ze Diuzi dula' xquia quieyaquē'. ⁵ Uyo yaca ben' quie estado Judea len yaca ben' ciudad Jerusalén, bdyinyaquē' ga zē Juan. Caora uxubalēpiyaquē' ca tamedian bēyaquē', na'ra bē' Juan laoyaquē' lu'u yao Jordán.

⁶ Guco Juan la'ari' de guitza' quie zaba camello. Lēscan' tu cincho guidi bdze'nē' lē'ēnē'. Udaonē' bēchi'zu, hue'enē' bdyin'dao' quie bezu cera ta rdzela guixi' dao'. ⁷ Na'ra udixogue'nē' yaca ben' uyo ga zēnē' gudyiné' leyaquē':

—Ben' zeza'ra zenaō nē'ēdi', nacarē' ben' ze ca nē'ēdi'. Tanto nacarē' ben' ze ca nē'ēdi', ni lē'ēti' bibi zaca' ni siquiera biyeyažoga' cuioga' guidi yu'u ni'anē'. ⁸ Nē'ēdi' ru'a laole conlē nisa, pero ben' zeza'ra zenaō nē'ēdi', udze'nē' Bichi Be quie Diuzi lu'u guicho laxta'ole.

Bē' Juan lao Jesús

(Mt. 3.13-17; Lc. 3.21-22)

⁹ Na'ra uza' Jesús yedyi Nazaret quie estado Galilea zionē' bdyinnē' ga zē Juan. Lēgan' na' bē' Juan laonē' lu'u yao Jordán. ¹⁰ Cati bero Jesús lu'u yao, blē'ēnē' uyalo guibá, blē'ēnē' uyēzi Bichi Be quie Diuzi ca rēzi biu bdyinnē' ga zē Jesús. ¹¹ Na'ra unē' Diuzi ga zuē' guibá unē':

—Luē' naco' zi'ina', nedyē'ēda' luē'. Lega redaohueda' ca ruelo'.

Gu'un xan' taxi'ibi' iquixi Jesús huenē' tamala

(Mt. 4.1-11; Lc. 4.1-13)

¹² Na'ra uquiē' Bichi Be quie Diuzi Jesús lao lato dachi ga bidyia yu'u. ¹³ Lēgan' na' uzunē' lao chopa galo dza ga uzurē' yaca bia guixi'. Na'ra bdyinrē' Satanás ga zē Jesús gu'unnan iquixi Jesús huenē' tamala. Pero na'a use'ela' Diuzi yaca ángel quienē' ta gacalēyaquē' Jesús.

Uzulao Jesús udixogue'nē' yaca benē' xti'idza' Diuzi

(Mt. 4.12-17; Lc. 4.14-15)

¹⁴ Caora baode bdze'yaquē' Juan lu'u dyiguiba, na'ra uza' Jesús zionē' yaca yedyi nebaba Galilea ta tzetixogue'nē' xti'idza' Diuzi. ¹⁵ Na'ra una Jesús gudyiné' leyaquē':

—Babdyin hora cati inabē' Diuzi lao yedyi layu. Reya'ala' utza'le pensari quiele, hue quiele xti'idza' Diuzi.

Guzi Jesús tapa yaca ben' rze bela

(Mt. 4.18-22; Lc. 5.1-11)

¹⁶ Na'ra uza' Jesús zioquē' ru'a lagun Galilea. Na' blē'ēnē' Simón len bichinē' Andrés. Rueyaquē' dyin quieyaquē' rudze'yaquē' du yēxo lu'u nisa ta tzu'u yaca bela. ¹⁷ Na'ra una Jesús rēbinē' leyaquē':

—¡Ulenao nē'ēdi'! Cabē' ruele cuiole bela yu'u lu'u nisa, cana' ulu'ena' le'e cuiole ben' nao xneza Diuzi.

¹⁸ Caora na' lapsanteyaquē' du yēxo quieyaquē', bira užeyaquē' bela, ziolēyaquē' lēbē'.

¹⁹ Bizi cati uza'ra Jesús ilē'ēti', blē'ēnē' chopá zi'i Zebedeo, tunē' laonē' Santiago, itunē' laonē' Juan. Re'yaquē' lu'u barco dao' quieyaquē' reguibayaquē' du yēxo quieyaquē'. ²⁰ Na' caora guzi Jesús leyaquē', pca'nyaquē' barco dao' quieyaquē' lao na'a xuziyaquē' len itu mozo, ziolēyaquē' Jesús.

Bebio Jesús tu bichi be mala

(Lc. 4.31-37)

²¹ Na' uza'yaquē' zioyaquē' bdyinyaquē' yedyi Capernaum. Cati bdyin dza saodo, dza huezila'adyi' quieyaquē', uyu'u Jesús lu'u idao' quieyaquē' laona sinagoga ta usēdinē' yaca ben' bedupa na'. ²² Na'ra tu bebanziyaquē' ca gudyi Jesús leyaquē', como dan' rusēdinē' leyaquē' ca ben' de yela' r nabē' quie cuiñzē', cala ca yaca ben' rusēdi ley pca'n Diuzi lao

na'a Moisés. ²³ Na' lu'u idao' ga zë Jesús bdyin tu ben' yu'u bichi be mala lu'u laxta'onë'. Caora na' urediyia' bichi be mala yu'u ben' na' rëbinan Jesús:

²⁴ —¿Bixquien' zao' niga ga zundo', luë' Jesús, ben' yedyi Nazaret? ¿Quele zao' niga ta tilalao' udyiaguil'lo' nëto'? Nubë'da' luë', naco' ben' la'ya, ben' use'ela' Diuzi.

²⁵ Na'ra udila Jesús lëbin, rëbinë' bichi be mala:

—¿Bira inëlo'! ¿Bero gan' yu'ulo' lu'u laxta'o ben' niga!

²⁶ Caora na' tu rzizizi ben' na' zënë' yu'unë' bichi be mala, na'ra urediyia'n beronan gan yu'un zeyonan. ²⁷ Cana' tu bebanzi yaca benë', du rdzebiyaquë' unëyaquë' rëbiyaquë' laguediyiaquë':

—¿Nuži naca ben' niga? ¿Biži huesëdi cubi ruenë'? ¿Como hasta yaca bichi be mala raleyacan quienë'?

²⁸ Cana' guca luegozi unezi yaca ben' nita' yedyi nebaba Galilea cabë' rue Jesús.

Byue Jesús ben' gula quie Simón Pedro

(Mt. 8.14-15; Lc. 4.38-39)

²⁹ Na'ra cati beroyaquë' idao' sinagoga, uza' Jesús zioquë' len Santiago len Juan bdyinyaquë' lidyi Simón len Andrés. ³⁰ Na' de ben' gula quie Simón lao belaga yu'unë' zla. Quie lena' gudiyiaquë' Jesús cabë' raca quienë'. ³¹ Caora na' ude Jesús gan' de nigula na' lao belaga. Ca bdyin Jesús na', bëxunë' na'a nigula, uchisanë'lëbë'. Ca uyasë', caora na' bero tala yu'unë'. Na'ra bë nigula na' ta udaoyaquë'.

Byue Jesús yaca ben' zë, ben' raca zhue'

(Mt. 8.16-17; Lc. 4.40-41)

³² Na'ra caora gula uxin banaca chula, uquië' yaca benë' nu ben' raca zhue', len nu ben' yu'u bichi be mala lu'u laxta'ohuë', bdyinyaquë' gan' zë Jesús. ³³ Na' bedupa yugulu ben' yedyi na' lali'a yu'u ga zë Jesús. ³⁴ Na' nacala yela' hue' racayaquë', beyue Jesús leyaquë', bebionë' bichi be mala yu'uyaquë'. Bibë'në' lato inëyacan como neziyacan nu naquë'.

Udixogue' Jesús xti'idza' Diuzi yaca yedyi nebaba Galilea

(Lc. 4.42-44)

³⁵ Na'ra du bala cati nenaca chula, uyasa Jesús zionë' ru'a yedyi ta hue'lënë' Diuzi di'idza'. ³⁶ Caora uyasa Simón len yaca compañero quienë', blë'ëyaquë' ganu Jesús dyila', caora na' uza'yaquë' yediloyaquë' lëbë'. ³⁷ Na' cati bedzeleyaquë' lëbë', unëyaquë' rëbiyaquë' lëbë':

—Ben' zë za', rguiloyaquë' luë'.

³⁸ Na'ra una Jesús rëbinë' leyaquë':

—Tzioro lao yedyi tula gan' nacara ga'ala' cuenda quixogue'ria' leyaquë' xti'idza' Diuzi. Tana' lena' bida' lao yedyi layu.

³⁹ Cana' uyo Jesús yugulu yedyi nebaba Galilea, uyu'unë' lu'u idao' sinagoga quieyaquë' udixogue'në' yaca ben' nita' na' xti'idza' Diuzi, bebionë' yaca bichi be mala yu'uyaquë'.

Byue Jesús tu ben' yu'u yela' hue' ca pindo

(Mt. 8.1-4; Lc. 5.12-16)

⁴⁰ Na'ra bebiga' tu ben' yu'u yela' hue' ca pindo gan' zë Jesús, uditzu žibinë' lao Jesús unëyëchi'në' rëbinë' Jesús:

—Uži'ze quia'. Chi re'enlo', huaca yeyuelo' në'ëdi'.

⁴¹ Na'ra beyëchi'la'adyi' Jesús lëbë'. Blinë' në'ë bëxunë' lëbë' unë' rëbinë' lëbë':

—Re'enda' hua' ca nao'. Hueyua' luë' na'a.

⁴² Caora na' lapsante yela' hue' quië' lëbë', labeyacatë'. ⁴³ Na'ra unë Jesús rëbinë' ben' na':

⁴⁴ —Ni tu nunu yëbo' can' babiä' quio'. Tuzi ta rnia', uyo yalu'e cuinlo' lao pxuzi. Na' bë'në' tu ta reya'ala' hue'lo'në' cabë' rnë lë'ë ley quie Moisés dan' babeyëri'lo'. Cana' huelo' ta inëzi yaca benë' babezi yela' hue' yu'ulo'.

⁴⁵ Pero zio ben' na' udixogue'në' laguediyinë' cabë' guca quië'. Quie lena' bira uzaquë' tzeta Jesús zaquë'lao la'o yaca yedyi. Puro ru'a yedyi ga bidyia yu'u udanë'. Pero uza' yaca benë' quie quie yedyi quieyaquë' zioyaquë' bdyinyaquë' ga rda Jesús.

2

Byue Jesús tu ben' ži

(Mt. 9.1-8; Lc. 5.17-26)

¹ Bë' baode chopa tzona dza, na' bdyin Jesús ciudad Capernaum. Tzadi unezi yaca benë' bdyin Jesús žan yu'u quienë'. ² Quie lena' bedupa yaca ben' zë gan' zë Jesús. Tanto bedupa yaca ben' zë, lente lali'a bedza'yaquë'. Na' udixogue' Jesús leyaquë' xti'idza' Diuzi. ³ Na'ra bdyinra itapa benë' len belaga ga zuba tu ben' ži. ⁴ Pero biuzaquë' tzu'ulëyaquë' ben' ži lu'u yu'u gan' zë Jesús, dan' nita' ben' zë. Quie lena' urëyaquë' lun yu'u, udubayaquë' yaga daco' lun yu'u, bzuyaquë' tu yëro ta pchizayaquë' belaga layu ga zuba ben' ži. ⁵ Caora blë'ë

Jesús cabè' bëyaquè' rzudyi'ilëyaquè' lëbè' de que huacanè' yeyuenè' ben' zi, na'ra unè' Jesús rëbinè' ben' zi:

—Bicha', baozi'zia' dula' xquia quio'.

⁶ Bizi bago ure' chopa tzona ben' rusèdi ley ta pca'n Diuzi lao na'a Moisés. Na'ra bëyaquè' pensari unayaquè': ⁷ “¿Bixquien' una ben' niga cana?” Barnaya'nè' Diuzi unè' cana' como dan' tuzi Diuzi huaca si'ze dula' xquia quiero, quele ben' ni.” ⁸ Pero gucabè' Jesús ca naca pensari quieyaquè'. Lena' una Jesús rëbinè' leyaquè':

—¿Bixquien' ruele pensari cana? ⁹ ¿Ca nurlan nacaran yalo hua' quie ben' zi niga? ¿Nacaran yalo chi yëpa'nè': “Aozi'zia' dula' xquia quio'”, o chi yëpa'nè': “Üyasa, bezi' belaga quio', beza' beyo?” ¹⁰ Pues naca' bichi yugulu benè'. Na'ra ulu'ena' le'e de yela' rnabè' quia' lao yedyi layu ta yezi'zia' dula' xquia quie yaca benè'.

Na'ra una Jesús rëbinè' ben' zi:

¹¹ —Rnia' luè', uyasa, bezi' belaga quio', beyo zan yu'u quio'.

¹² Caora na' uyasa ben' zi, bezi'nè' belaga quie', zeyoguè', udenè' gan' nita' yaca benè'. Na' bëyaquè' Diuzi ben' ze unayaquè':

—Ni tu lasa binelè'ëro cabè' bë ben' ni.

Guzi Jesús Leví

(Mt. 9.9-13; Lc. 5.27-32)

¹³ Na' uyo Jesús ru'a lagun Galilea tatula. Caora babedupa ben' zè ga zè Jesús, na'ra psèdinè' leyaquè'. ¹⁴ Bè' beyudyi na', uza' Jesús zionè' udenè' blè'ënè' Leví, zi'i Alfeo, re'nè' ga re' ben' huequiçu. Na' una Jesús rëbinè' lëbè':

—Unao nè'èdi'.

Na'ra uza'nè' ziolënè' Jesús.

¹⁵ Bè' baode chopa tzona dza, uyo Jesús yetaonè' zan yu'u quie Leví. Lëscan' uyorè zè ben' huequiçu len zè ben' de dula' xquia quie, ure'rëlëyaquè' Jesús lënè' yaca ben' quienè'. Guca ben' zè, ben' unao lëbè'. ¹⁶ Pero caora blè'ë yaca ben' rusèdi ley quie Moisés len yaca ben' partido fariseo cabè' rue Jesús, raonè' tzaze len ben' huequiçu len ben' de dula' xquia quie, na'ra unayaquè' rëbiyaquè' ben' quie Jesús:

—¿Bixquien' ri'o rao maestro quiele tzaze len ben' huequiçu len ben' de dula' xquia quie?

¹⁷ Na' cati babe Jesús cabè' unayaquè', na'ra unènè' rëbinè' leyaquè':

—Yaca ben' biraca zhue', biruen zi guida médico ta yeyuenè' leyaquè'. Pero nu ben' raca zhue', sí ruen zi guida médico. Quele za' rëza' ben' nazi bibi xquia rue, dechan' za' rëza' ben' re'en yezi dula' xquia quie.

Unabayaquè' Jesús quie ubasi

(Mt. 9.14-17; Lc. 5.33-39)

¹⁸ Na'ra guca tu dza rue ben' quie Juan bautista len ben' partido fariseo ubasi, na' bdyin chopa tzona benè' ga zè Jesús unayaquè' lëbè':

—¿Bixquien' birue yaca ben' quio' ubasi cabè' rue ben' quie Juan len ben' partido fariseo?

¹⁹ Na' una Jesús gudyinè' leyaquè':

—¿Rnaba' le'e chi rue yaca ben' bdyin ga raca huetzagana' ubasi tu nezu bi' utzagana' len leyaquè'? Tu nezu bi' utzagana' len leyaquè', birueyaquè' ubasi. ²⁰ Pero chi guida ben' rudie ben' utzagana', chi guxuyaquè' lëbi', hueyaquè' lëbi' zi', tzehua'ayaquè' lëbi' ga tula, na'ra hue yaca amigo quie bi' utzagana' ubasi.

²¹ Lëscan' una Jesús rëbinè' leyaquè':

—Bisaque' ta' la'ari' cubi lè'è la'ari' gula chi binetzërin, porque huetzere'nan icanan ru'a la'ari' gula, na' ichezan len mazara. ²² Lëscan' bisaque' ca'ro nupi zixi lu'u bolsa guidi gula, porque bè' sulao ilëbin, huedza'n ichezan len. Cana' huabiagui' lao rupa cue'ten. Quie lena' ruen zi ca'ro nupi zixi lu'u bolsa guidi cubi.

Na' aoditzu yaca ben' quie Jesús dao trigo dza huezila'adyi'

(Mt. 12.1-8; Lc. 6.1-5)

²³ Na'ra bdyin tu dza saodo, dza huezila'adyi' quieyaquè', uza' Jesús lënè' yaca ben' quie' udeyaquè' layela ga neduza trigo. Na' uditzu yaca ben' quie Jesús dao trigo ta gaoyaquè'n.

²⁴ Na'ra una yaca ben' partido fariseo rëbiyaquè' Jesús:

—¿Bixquien' rue yaca ben' quio' dyin rguitzuyaquè' dao quie trigo dza huezila'adyi', dza bireya'ala' huero dyin?

²⁵ Na' una Jesús rëbinè' leyaquè':

—¿Binulabale lè'è guichi cabè' bë rey David dza uduenè' lënè' yaca ben' quie? ²⁶ Uyu'u rey David lu'u idao' rnabè'ra cati naca Abiatar xa'n pxuzi rnabè'ra, uzi'nè' yëta xtila naca la'iya ta ru'eyaquè' Diuzi. Na' udaonè'n bè'nè'n len yaca ben' dzaganè', udaoyaquè' ta bireya'ala' gaoyaquè', ta reya'ala' gao yaca pxuzizi.

²⁷ Na' unë' rëbinë' leyaquë':

—Udixu Diuzi dza huezila'adyi' ta gacalën yaca benë'. Quele udixu Diuzi dza huezila'adyi' ta gaca xa'nyaquë'. ²⁸ Naca' bichi yugulu benë'. De yela' rñabë' quia' hua' mandado bi hue yaca benë' dza huezila'adyi'.

3

Beyue Jesús tu ben' neseco në'ë

(Mt. 12.9-14; Lc. 6.6-11)

¹ Na'ra uyu'u Jesús tatula lu'u idao' sinagoga. Lëgan' na' zë tu ben' neseco në'ë. ² Bizi na' rbë'nao yaca benë' Jesús chi hueyuenë' ben' neseco në'ë dza saodo, dza huezila'adyi', tacuenda gaoyaquë' lëbë' xquia. ³ Na' unë' Jesús gudyinë' ben' neseco në'ë:

—Uda uzë gatzo la'o niga.

⁴ Na'ra una Jesús rëbinë' yaca ben' nita' na':

—¿Bizi reya'ala' huero dza huezila'adyi'? ¿Reya'ala' huero tadya'a o tamala? ¿Reya'ala' uselaro benë' o gutiro benë'?

Pero bega'nyaquë' chizi, bibi unayaquë'. ⁵ Na'ra du rdza'në' una'në' leyaquë' dyë'ëdi. Guquenë' bayëchi' nun quie yela' zidi quieyaquë'. Na' unë' rëbinë' ben' neseco në'ë:

—Bli na'alo'.

Bizi ca blinë' në'ë beyacaten dya'a. ⁶ Na'ra uza' yaca ben' partido fariseo zioyaquë' ta hue'lëyaquë' ben' partido Herodes di'idza' bi hueyaquë' ta gutiyaquë' Jesús.

Bdyin yaca ben' zë ru'a lagun ga zë Jesús

⁷ Pero uza' Jesús zionë' ru'a lagun Galilea. Lëscan' ziorë yaca ben' zë, ben' uza' yedyi nebaba Galilea, unayaquë' Jesús. ⁸ Cati unezi yaca benë' cabë' tahuen gula bë Jesús, na'ra uza'yaquë' yedyi nebaba Judea, len ciudad Jerusalén, len yedyi nebaba Idumea, len yedyi re' itzala'la yao Jordán, len yedyi Tiro, len yedyi Sidón, bdyinyaquë' ga zënë' ta ilë'ëyaquë' lëbë'. ⁹ Quie lena' bë Jesús mandado yaca ben' quië' ta tzioyaquë' tzexi'yaquë' tu barco ga tzu'unë' como dan' ben' zë pquiyaquë' lëbë'. ¹⁰ Cana' guca quienë' como dan' tanto beyuenë' yaca ben' raca zhue', pquiyaquë' bëxuyaquë' lëbë' ga zë'. ¹¹ Na' caora blë'ë yaca bichi be mala lëbë', uditzu žibiyacan uredyia'yacan unayacan Jesús:

—Ži'i Diuzi luë'.

¹² Pero uđila Jesús leyacan ta biyëbiyacan benë' naquë' ži'i Diuzi.

Bë Jesús nombrar chipchopa ben' quienë'

(Mt. 10.1-4; Lc. 6.12-16)

¹³ Na'ra uza' Jesús zionë' ga zu tu lë'ë ya'a. Lëgan' na' guži Jesús ben' re'ennë' gaca nombrar ben' quienë'. Na' uza'yaquë' zioyaquë' bdyinyaquë' ga zë Jesús. ¹⁴ Na'ra bënë' nombrar chipchopa ben' gaca ben' quienë', ben' rue lëbë' tuže, ben' ise'ela' ta quixogue'yaquë' xti'idza' Diuzi. ¹⁵ Lëscan' bënë' yela' rñabë' ta yeyueyaquë' ben' raca zhue', lëscan' ta cuioyaquë' yaca bichi be mala yu'u yaca benë'. ¹⁶ Cani naca lista quie chipchopa ben' ulionë': Ulionë' tu ben' lao Simón, ben' uxubanë' laohuë' Pedro. ¹⁷ Ulionë' tu ben' lao Santiago len bichinë' Juan. Nacayaquë' ži'i Zebedeo. Uxubanë' laoyaquë' Boanerges, ta inaro xti'idza'ro: Ži'i hueziu' como dan' nacayaquë' ben' rgüin'. ¹⁸ Lëscan' ulionë' tu ben' lao Andrés, len tu ben' lao Felipe, len tu ben' lao Bartolomé, len tu ben' lao Mateo, len tu ben' lao Tomás, len itu ben' lao Santiago, ži'i Alfeo, len tu ben' lao Tadeo, len itu ben' lao Simón, ben' naca partido cananeo. ¹⁹ Lëscan' ulionë' Judas Iscariote, ben' psedyin Jesús lao na'a yaca ben' rñabë'.

Unayaquë' yu'u Jesús taxi'ibi'

(Mt. 12.22-32; Lc. 11.14-23; 12.10)

Beyudyi ulio Jesús chipchopa ben' quienë', ziolënë' leyaquë' bdyinyaquë' žan yu'u. ²⁰ Na' tantozi bedupa ben' zë tatula ga zënë', bibë'n lato ni siquiera ta gaoyaquë'. ²¹ Cati unezi yaca familia quienë' cabë' raca quienë', uza'yaquë' tzexi'yaquë' lëbë', como dan' nayaquë' naquë' ben' luco.

²² Lëscan' yaca ben' rusëdi ley quie Moisés, ben' uza' ciudad Jerusalén, unayaquë' rëbiyaquë' laguedyiaquë':

—Bayu'u ben' ni Beelzebú, ben' naca xan' yaca bichi be mala. Yela' huaca quie xan' taxi'ibi' raca rbionë' yaca bichi be mala.

²³ Na'ra guži Jesús leyaquë' unë' gudyinë' leyaquë' cani.

—¿Bizi hue xan' taxi'ibi' Satanás ta yebionë' laguedyidi taxi'ibi'? ²⁴ Chan' tu cue' gobierno gaca zë cue' partido, chan' tilalëyaquë' laguedyiaquë' ben' naca partido, bisue gobierno huen dyin zidza. ²⁵ Lëscan' chi tu cue' familia raca rdilalëyaquë' familia quieyaquë',

bisueyaquë' tzu'uyaquë' žan yu'u tzaže zidza. ²⁶ Chi cuin Satanás rdyiaguin'nan dyin quienan, bisaque' sue dyin quienan zidza, hueyudyi huedu quien.

²⁷ Bisaque' tzu'u benë' lu'u yu'u quie tu ben' tzutzu huala ta cubayaquë' ta de quienë' chi zuë' žan yu'u. Tanëro rnaban uquioyaquë' lëbë', na'ra huazaque' cubayaquë' ta de quienë'.

²⁸ Tu ta naca li rnia' le'e, zu Diuzi dispuesto si'ženë' bitezi tamala rue yaca benë'. Lëscan' zuë' dispuesto si'ženë' bitezi di'idza' mala rnë yaca benë', ²⁹ pero nu ben' na di'idza' contra Bichi Be quie Diuzi, biyezi'ze Diuzi leyaquë', huanao dula' xquia quieyaquë' leyaquë' tuzioli.

³⁰ Cana' una Jesús gudyinë' leyaquë', dan' unayaquë' yu'unë' bichi be mala.

Ga zë Jesús bdyin žnë'ë len bi' bichinë'

(Mt. 12.46-50; Lc. 8.19-21)

³¹ Na' beyudyi una Jesús, bdyin žnë'ë len yaca bi' bichinë' yu'u ga re'në', pero bega'nyaquë' lali'a dan' nadza' benë' lu'u yu'u. Na' gudyiyaquë' ben' ulidza lëbë'. ³² Biži yaca ben' re' neyëcho ga re' Jesús unayaquë' rëbiyaquë' Jesús:

—Abdyin žnao' len yaca bi' bicho', rguiloayaquë' luë'.

³³ Na' una Jesús rëbinë' leyaquë':

—¿Nuži naca žna'a? ¿Nuži naca bi' bicha'?

³⁴ Caora na' una' Jesús yaca ben' re' neyëcho ga re'në', unëné' rëbinë' leyaquë':

—Yugu le'e ben' re' niga, nacale ca quie žna'a, nacale ca quie bi' bicha'. ³⁵ Në'ëdi' rnia' nutezi ben' rue quie cabë' re'en Xuza', naquë' ca bi' bicha', ca bi' zana', ca žna'a.

4

Bzu Jesús tu di'idza' quie ben' raza bini trigo

(Mt. 13.1-9; Lc. 8.4-8)

¹ Bezulao Jesús tatala usëdinë' yaca benë' ru'a lagun Galilea. Tanto bdupa ben' zë, uyu'u Jesús tu lu'u barco dao' zën lao nisa. Na' ure' Jesús lu'u barco na', pero bega'n yaca benë' ru'a lagun. ² Con di'idza' ta nacan irupa iyunala psëdi Jesús leyaquë'. Cani unë' psëdinë' leyaquë':

³ —Uzëcara nagale ca nia' le'e. Uyo tu ben' raza bini trigo. ⁴ Según ca razayaquë' bini trigo, ruzalë' bini trigo layu. Na'ra bala bini trigo yaque'n tu neza ga bdyinte yaca bguini besa'oba'n udaoba'n. ⁵ Ibala bini trigo yaque'n ga de yo, ga binacan tubelaozi yu. Na'ra lëbini na' laolënezatan dan' yaque'n ga binacan tubelaozi yu. ⁶ Pero cati bena oba zi', na'ra byëtzona ubidyin como dan' biuyu'u luena zitu' lu'u yu. ⁷ Ibala bini trigo yaque'n ga ilë guixi' yëchi'. Na' bë' gu'unin, bibë guixi' yëchi' lato gue'eni bini trigo dyë'ëdi. Quie lena' bibi usecho bë'nän. ⁸ Pero ibala bini trigo yaque'n ga naca tubelaozi yu ga ulëna gu'unin dyë'ëdi bë'nän usecho dya'a. Bala ddyigo' bi'an galobechi bini, ibalan bi'an tzona galo bini, ibalan bi'an tu gayuhua bini.

⁹ Na'ra una Jesús:

—Le'e babe ulezë nagale can' unia'.

Una Jesús ga hue dyin di'idza' rusëdinë' benë'

(Mt. 13.10-17; Lc. 8.9-10)

¹⁰ Na' cati ude beyudyi na', bega'n Jesús lënë' chipchopa ben' quienë' len itu chopo ben' zë ga'ala' ga zë'. Na'ra unabayaquë' Jesús bi re'en ina di'idza' gudyinë' leyaquë'. ¹¹ Lena' unë' Jesús rëbinë' leyaquë':

—Ruzioñe' Diuzi le'e bi re'en ina di'idza' rguixogue'n quie yela' rnabë' quienë'. Pero quie yaca ben' biruzënaga cabë' rnia', rnia' leyaquë' conlë puro di'idza' ta naca irupa iyunala ¹² como dan' ba'ala'cazi rlë'ëyaquë' dyë'ëdi, rueziaquë' ca ben' birlë'ë, ba'ala'cazi reyaquë' dyë'ëdi, rueziaquë' ca ben' bire, como dan' bire'enaquë' utza'yaquë' pensari quieyaquë' yezi'ze Diuzi dula' xquia quieyaquë'.

Ga bexi'idzë' Jesús bi re'en ina di'idza' quie ben' guza bini trigo

(Mt. 13.18-23; Lc. 8.11-15)

¹³ Na' una Jesús rëbinë' leyaquë':

—¿Biuyoñe'ele bi re'en ina di'idza' ta nacan irupa iyunala quie ben' guza bini trigo? ¿Biži huele ta tzioñe'ele bi re'en ina di'idza' binenia' le'e? ¹⁴ Naca ben' raza bini trigo ca quie ben' rguixogue' xti'idza' Diuzi. ¹⁵ Bala benë' nacayaquë' ca quie bini trigo yaque'n tu neza bezi' bguini aodaoba'n. Ruzënagayaquë' xti'idza' Diuzi, pero beyudyi bzënagayaquë'n, lardyinte xan' taxi'ibi' ta cuionë' ca di'idza' uyu'u lu'u guicho laxta'oyaquë'. ¹⁶ Ibala benë' nacayaquë' ca quie bini trigo yaque'n lao yo ga binacan tubelaozi yu. Ruzënagayaquë' raxeyaquë' xti'idza' Diuzi. ¹⁷ Pero binacayaquë' ca quie bini trigo yu'un luena zitu' lu'u yu. Birega'n xti'idza' Diuzi lu'u guicho laxta'oyaquë'. Cati rue yaca benë' leyaquë' bizinaquezi nun quie

ruzënegajë' xti'idza' Diuzi, na'ra rusanyaquë' bira rue quieyaquë' xti'idza' Diuzi. ¹⁸ Ibalá benë' nacayaquë' ca quie bini trigo yaque'n ga rlë guixi' yëchi'. Ruzënegayaquë' xti'idza' Diuzi. ¹⁹ Pero rza'la'adyi'yaquë' ta de lao yedyi layu. Nun quie rzi' dumí quieyaquë' leyaquë' yë', lega re'enyacuë' gata' quieyaquë' zë cosa. Quie lena' binacayaquë' ca quie bini trigo ru'en usecho. ²⁰ Pero ibalá benë' ruzënegayaquë' xti'idza' Diuzi, rue quieyaquë' len. Nacayaquë' ca quie bini trigo yaque'n ga naca tubelaozi yu. Balayaquë' nacayaquë' ca quie dyigo' bi'an galobechi bini, ibalayaquë' nacayaquë' ca quie dyigo' bi'an tizona galo bini, ibalayaquë' nacayaquë' ca quie dyigo' bi'an tu gayuhua bini.

Bzu Jesús tu di'idza' quie tu lámpara
(Lc. 8.16-18)

²¹ Lëscan' una Jesús rëbinë' leyaquë':
—Nunu uga'ala' lámpara ta utacaron caja, ni ta ucachi'ron zan belaga. Ruen zi uzuro lámpara sibi ta cuëchin žni' dužete. ²² Cana' nacarën quie yaca benë'. Yugulu ta pcachi' yaca benë', huadyin dza yebio Diuzi ta pcachi'yaquë', na' cuionë'n zaca'lao ta ilë'ë ja benë' len. Lëscan' yugulu di'idza' negachi' rnë yaca benë', huadyin dza quixogue' Diuzi ca di'idza' negachi' unayaquë'. ²³ Ulezë'naga ca rnia'.

²⁴ Lëscan' unë' rëbinë' leyaquë':
—Ulehue quiele cabë' babele baonia'. Cabë' ruele racalële laguedyile, cana' hue Diuzi iyacalënë' le'e. Na' mazara iyacalë Diuzi le'e, ben' ruzë'naga xti'idzë'. ²⁵ Nu ben' hue quie ta tzioñe'enë' bi na xti'idza' Diuzi, uzioñe'era Diuzi lëbë' mazara. Pero nu ben' bihue quie ta tzioñe'enë' bi na xti'idza' Diuzi, hueguba Diuzi hasta tadao' lë'ëti' baoyoñe'enë'.

Bzu Jesús tu di'idza' cabë' rlë bini trigo

²⁶ Lëscan' una Jesús rëbinë' leyaquë':
—Naca yela' rnabë' quie Diuzi ca quie bi raca quie bini trigo cati raza benë' len lu'u yu. ²⁷ Bë' beyudyi bënë' guza, caora na' rezë'ë redyinnë' zan yu'u ratanë' rasinë' quie rtze', rasanë' quie zila. Cana' ruenë' rde dza tu rlë bini trigo re'enina, binezi ben' na' birue bini trigo ta ilëna gue'enina. ²⁸ Na'ra tu cuinzi yu rsegulan bini. Tanëro rlën len la'aga' dao' quien. Na' bë' banacan tahuala, ilë dao quien. Bë' bardatzta dao quien, cana' cuian trigo. ²⁹ Cati aobidyi trigo, na'ra rchugujë'n rezi'jë'n, dan' babdyin dza quie usecho quien.

Bzu Jesús tu di'idza' quie tu bini dao' bicu'
(Mt. 13.31-32; Lc. 13.18-19)

³⁰ Lëscan' una Jesús rëbinë' leyaquë':
—¿Con bidan' utitalëbi yela' rnabë' quie Diuzi? ¿Con bi di'idza' re'ennan ta uzioñe'eda' le'e? ³¹ Naca yela' rnabë' quie Diuzi ca quie tu bini mostaza ta raza benë' lu'u yu. Naca bini mostaza bini dao' bižu gula. ³² Pero cati bayu'un lu'u yu, hualëna hue'enina gacan tu yaga že gula. Tanto naca tona xu'uzan quien, hasta huida yaca bguini, bia dyia xile, ta yezila'adyi'ba' ga žë žula quien.

Puro lao na'a di'idza' ta nacan irupa iyunala psëdi Jesús yaca benë'
(Mt. 13.34-35)

³³ Cana' una Jesús psëdinë' yaca benë' xti'idza' Diuzi. Bzunë' zë di'idza' ta gacalën leyaquë' ta tzioñe'eyaquë'. ³⁴ Puro lao na'a di'idza' ta nacan irupa iyunala psëdi Jesús yaca benë', pero cati zuë' tuzinë' len yaca ben' quie', caora na' pxi'idze'në' leyaquë' bi re'en ina di'idza' ta nacan irupa iyunala.

Udila Jesús be bedun' len nisa
(Mt. 8.23-27; Lc. 8.22-25)

³⁵ Cati bagula uxin banaca chula, na' una Jesús rëbinë' yaca ben' quie':
—Ya' tziuro itzala' lagun.
³⁶ Na'ra udeyaquë' ga žë yaca ben' na', uyu'uyaquë' lu'u barco ga ure' Jesús uza'yaquë' zioyaquë' itzala' lagun. Lëscan' ziorë ichopa tzona barco nu'an benë' len leyaquë'. ³⁷ Binedyinyaquë' itzala' lagun cati uzulao rda tu be bedun' fuerte gula. Tanto raca be bedun', ben gan uyudzo nisa lu'u barco, ilë'ëti'zi bibedza' nisa lu'u barco. ³⁸ Na' zaquë' žbam barco ure' Jesús rasinë' lao xcugonë'. Pero psebë yaca ben' quie' lëbë', unayaquë' rëbियाquë' lëbë':

—¡Maestro! ¿Birdëbilo' gala' gatiro lu'u nisa?

³⁹ Na'ra uyasa Jesús udilanë' be bedun'. Lëscan' unë' gudyinë' nisa:

—¡Ure' chizi! ¡Bira huu' žëdi!

Caora na' uleza be bedun', bega'n chizi lao lagun. ⁴⁰ Na'ra una Jesús rëbinë' yaca ben' quie':

—¿Bixquien' rdzebile? ¿Bixquien' biralele ute usela Diuzi ra'o?

⁴¹ Pero bega'n yaca ben' quienë' rdzebियाquë' unayaquë' rëbियाquë' laguedyiyaquë':

—¿Nuzi naca ben' niga como hasta be bedun' len nisa ralen quiené?

5

Beyue Jesús tu ben' yu'u bichi be mala
(Mt. 8.28-34; Lc. 8.26-39)

¹ Na'ra bdyin Jesús lèné' yaca ben' quiené' itzala' lagun gan' nita' yaca ben' Gadara. ² Ca ro Jesús lu'u barco, labdyinte tu ben' yu'u bichi be mala gan' zè Jesús. Babroné' ga dyia yaca beló ga rucachi'yaquè' ben' huati. ³ Yugu dza, yugu yela, zuné' na' ga dyia beló. Ni tu ben' nita' na' biuzueyaquè' uquiyoaqué' lèbè' con caden. ⁴ Zè lasa pquiyoaqué' lèné' con caden na'ané' len ni'ané', pero uchugunè'n bzužu pquinonè'n. Nitu nunu uzue ucaxo lèbè'. ⁵ Yugu dza, yugu yela, udané' ga dyia beló du lè'é ya'a, rbedyiya'nè' rzi'nè' yo rguiné' cuinnè'. ⁶ Caora blè'énè' Jesús zitu'la, na'ra uyu'unè' be zionè' yeditzu žibiné' lao Jesús. ⁷ Na' uredyiya' bichi be mala yu'unè' rëbina Jesús:

—¿Bixquien' zao' niga? Luè' Jesús, ži'i Diuzi tu sibi. Rnabayëcha' luè' lao Diuzi ta biutzagalaolo' nè'èdi'.

⁸ Cana' una bichi be mala rëbina Jesús como dan' gudyi Jesús len:

—Bichi be mala luè', bero ben' ni.

⁹ Na' unaba Jesús rëbinè' len:

—¿Bi laolo'?

Na' bequëbina rëbina Jesús:

—Xopa mila laohua' dan' nacando' zè.

¹⁰ Lëscan' unabayëchi'nè' Jesús ta biuse'ela' Jesús leycan ga naca zitu'. ¹¹ Biži ga'ala' gan' zè Jesús nita' yaca cuchi zè lao leda'. Rqui'nyacaba' ta yedzeleyacaba' bi gaoyacaba'. ¹² Na' unabayëchi' yaca bichi be mala rëbiyacan Jesús:

—Huu' cule ise'elo' nëto' gan' nita' yaca cuchi. Ben lato tzu'undo' leycaba'.

¹³ Na'ra bë' Jesús lato ta tzu'uyacan lu'u yaca cuchi. Cana' beroyacan be'mbyu beyu'uyacan yaca cuchi. Na' nita' cadu chopa mila cuchi lao leda' na'. Caora beyu'u yaca bichi be mala lu'u yaca cuchi, na' uxitiyacaba' beyëziyacaba' lè'é leda' uyu'uyacaba' lu'u nisa ga gutiyacaba'.

¹⁴ Na' biži bžuno yaca ben' rapa cuchi. Du rdzebiyaquè' yetixogue'yaquè' du tu neza len la'o yedyi bi guca. Lena' bdyin yaca bené' ta ina'yaquè' na'. ¹⁵ Na' caora bdyinyaquè' ga zè Jesús, blè'ëyaquè' ben' babero yaca bichi be mala. Blè'ëyaquè' are'nè' chizi, banaconè' žabané', babeyu'unè' pensari. Na' lega bdzebiyaquè'. ¹⁶ Na' yaca ben' blè'é cabè' bë Jesús, udixogue'yaquè' yaca ben' bdyin na' cabè' guca quie ben' uyu'u bichi be mala, lëscan' cabè' guca quie yaca cuchi. ¹⁷ Na'ra unabayëchi'yaquè' Jesús ta biyega'nnè' yu nebaba yedyi quieyaquè'.

¹⁸ Caora beyu'u Jesús lu'u barco, unaba ben' bero yaca bichi be mala chi bigun Jesús lato ta tziolèné' Jesús gan' tzioguè'. ¹⁹ Pero bibè' Jesús lèbè' lato. Lena' unè' gudyi'nè' ben' na':

—Beyo žan yu'u quio' yetixogue' familia quio' cabè' guca quio' beyëchi'la'adyi' Diuzi luè'.

²⁰ Na'ra zeyonè' tzetixogue'nè' yaca ben' nita' gan' de chi yedyi quie yu laona Decápolis yugulu cabè' bë Jesús quiené'. Na'ra caora be yaca bené' can' unè', bega'nyaquè' be-banziyaquè'.

Beseban Jesús ži'i Jairo, beyuenè' nigula bda' zbe zabè
(Mt. 9.18-26; Lc. 8.40-56)

²¹ Na'ra beyu'u Jesús lu'u barco užè'é zionè' itzala' lagun. Caora bdyinnè' na', babedupa ben' zè gan' zënè'. Na' bega'n Jesús ru'a lagun na'. ²² Na' bdyin tu xan' idao' sinagoga laonè' Jairo gan' zè Jesús. Caora blè'énè' Jesús, uditzu žibiné' laohué'. ²³ Na' unabayëchi'nè' rëbinè' Jesús:

—Barati ži'ina'. Chi huu' cule, žbisao' ta ideda'lo' nao' ži'ina' cuenda yeyuelo'bi' ta bigatibi'?

²⁴ Na'ra ziolè Jesús lèbè', pero lëscan' ziorè yaca ben' zè pqui'yaquè' Jesús. ²⁵ Na' entre yaca ben' ziolè Jesús uzu tu nigula raca quie biu' quiené' chopa tzona lasa tu biu'. Bazio chipchopa iza ren quiené' cana'. ²⁶ Uyonè' yenè' zè ben' médico, beya dumi quiené' bënë' gasto, pero biuži' yela' hue' quiené' remedio. Na' remedio uži'nè', bigucalën lèbè', bdyiagu'n mazara lèbè', izi'ra bëna. ²⁷ Na'ra babe nigula na' cabè' reyue Jesús ben' raca žhue'. Quie lena' yesènè' xcu'udzu Jesús ga zè yaca bené', bda'nè' žbenè' zabè'. ²⁸ Cana' bë nigula na' como dan' guquenè': "Chi uda' žbia' žaba Jesús, hueyaca'." ²⁹ Na'ra caora bda'nè' žbenè' žaba Jesús, bebidyi ren, bero yela' hue' yu'unè', gucabè'nè' babeyacanè'. ³⁰ Lëscan' gucabè' Jesús babeyuenè' nu ben' raca žhue' conlè yela' huaca quiené'. Quie lena' beyëchoguè' rnè'é yaca ben' zè xcu'udze', unè' rëbinè' leyaquè':

—¿Nuzi bda' zbe zaba'?

³¹ Na'ra una yaca ben' quië' rëbïyaquë' lëbë':

—Rlë'èlo' ruqui' yaca benë' luë', na'ra nao', “¿Nuži bda' žbe në'ëdi'?”

³² Pero una' Jesús yaca ben' zë na' ta idzelenë' nu ben' bda' žbe lëbë'. ³³ Na'ra unezi nigula bi guca quienë'. Quie lena' du ržizinë', du rdzëbinë', bebïga'në' uditzu žibinë' lao Jesús, gudyinë' lëbë' cabë' guca quienë'. ³⁴ Na' una Jesús rëbinë' nigula na':

—Zana', babeyacu' nun quie rzudyi'ilëlo' në'ëdi'. Beyo žan yu'u quio', bira idëbo'. Apsan yela' hue' quio' luë'.

³⁵ Neru'elë' Jesús nigula na' di'idza' cati bdyin chopa tzona ben' uza' yu'u quie ben' naca xan' idao' sinagoga. Na' unayaquë' rëbïyaquë' xan' sinagoga:

—Baguti ži'ilo'. Bira cule huelo' maestro žëdi.

³⁶ Pero bibë Jesús casa ca unayaquë'. Na' unë' rëbinë' xan' sinagoga:

—Bidzebo'. Sudyi'ilëlo' në'ëdi'.

³⁷ Na'ra bibë' Jesús lato tziolë yaca ben' zë na' len lëbë'. Na' uquië'në' Pedro, len Santiago, len Juan bichi Santiago. ³⁸ Cati bdyinyaquë' ru'a yu'u quie xan' sinagoga, blë'ë Jesús nita' ben' zë, yu'uyaquë' ru'be, rbedyïya'yaquë'. ³⁹ Caora uyu'u Jesús lënë' tzona ben' quië' lu'u yu'u na', unë' rëbinë' yaca ben' nita' na':

—¿Bixquien' ru'ule ru'be rbedyïya'le? Ba'ala'cazi agutibi', raca quiebi' ca quie bi' rasizi.

⁴⁰ Pero bžidyïyaquë' ca una Jesús. Caora na' bë Jesús mandado yeroyaquë' lu'u yu'u. Na' uquië' Jesús tzona ben' quië' len xuzi žna' bidao' huati. Uyu'uyaquë' lu'u cuarto ga de bi' huati. ⁴¹ Na' bëxu Jesús na'abi' unë' rëbinë'bi':

—Talita cumi —ta inaro xti'idza'ro: Zana', rnia' luë', uyas.

⁴² Caora beyudyi' una Jesús cana', uyas nigula dao' bedabi'. Baozubi' chipchopa iza. Na' bega'n xuzi žna' bidao' tu bebanzitzegueyaquë'. ⁴³ Pero gudyi Jesús leyaquë' ta biquixogue'yaquë' yaca benë' cabë' bënë' quie bidao' huati. Lëscan' bënë' mandado ta hue'yaquë'bi' ta gaobi'.

6

Ca guca cati uda Jesús yedyi Nazaret

(Mt. 13.53-58; Lc. 4.16-30)

¹ Na'ra uza' Jesús zionë' bedyinnë' yedyi quienë' lënë' yaca ben' quienë'. ² Caora guca dza saodo, den huezila'adyi' quieyaquë', uyu'u Jesús lu'u idao' sinagoga ta usëdinë' yaca ben' bdupa na'. Na' tu rebanzi yaca ben' bžënaga can' unë'. Lena' unayaquë' rëbïyaquë' laguedyïyaquë':

—¿Gaži yešëdi ben' niga? ¿Biži bënë' banaquë' ben' de yela' rioñe'e quie? ¿Biži ruenë', ruenë' ta binelë'ëro? ³ Pues naca ben' niga ben' rcha'a yaga. Ži'i María naquë'. Naca Santiago, len José, len Judas, len Simón bi' bichinë'. Ni nita' ladoro yaca bi' zannë'.

Quie lena' bibëyaquë' casa quienë'. ⁴ Lena' una Jesús rëbinë' leyaquë':

—Nu ben' rguixogue' xti'idza' Diuzi, rapala'ncazi yaca benë' lëbë'. Pero ben' yedyi quienë', len familia quienë', len ben' zu žan yu'u quienë', birapala'nyaquë' lëbë'.

⁵ Quie lena' bibë Jesús yela' huaca quienë' ladoyaquë'. Tu chopazi ben' raca žhue' bda'në' në'ë' beyunenë' leyaquë'. ⁶ Na' bebanzi Jesús dan' tu bžënazïyaquë' can' unë', na' bibëyaquë' lëbë' casa. Na'ra uza' Jesús zïoguë' yaca yedyi nita' ga'ala', uzulaonë' rguixogue'në' yaca ben' nita' yaca yedyi na' xti'idza' Diuzi.

Use'ela' Jesús yaca ben' quienë' ta tzetixogue'yaquë' xti'idza' Diuzi

(Mt. 10.5-15; Lc. 9.1-6)

⁷ Caora na' betupa Jesús chipchopa ben' quienë', bënë' yela' huaca quienë' ta yebïoyaquë' yaca bichi be mala yu'u benë'. Na'ra chopa huioyaquë' use'elë' leyaquë' tu tu yedyi. ⁸ Na'ra bënë' mandado bihua'ayaquë' bi cosa tu neza. Bënë' mandado tuzi xaga hua'ayaquë'. Bihua'ayaquë' ni yëxo, ni yëta, ni dumi. ⁹ Reya'ala' udeyaquë' huaracho, reya'ala' gacoyaquë' tu cue'zi žabayaquë'. ¹⁰ Na' una Jesús rëbinë' leyaquë':

—Lu'u yu'u gan' idyinle, na' yega'nle hasta que yeza'le yeyole yedyi tula. ¹¹ Caora abdyinle tu yedyi, chi bire'en yaca benë' si'yaquë' le'e dyë'ëdi, chi bire'enyacuë' uzënazayaquë' quiele, na'ra yerole gan', usisile ni'ale ta gasi bëxte dyia ni'ale ta ulu'en quieyaquë' dula' quiezïyaquë' nena' dula' xquia quieyaquë' leyaquë'. Nacan tali ca rnia' le'e, cati abdyin dza gaca juicio, huedzagalaura ben' bibžënaga quiele mazara ca ben' ciudad Sodoma len ben' ciudad Gomorra.

¹² Na'ra zïoyaquë' tzetixogue'yaquë' benë' gudyïyaquë' leyaquë' ca re'en Diuzi utza'yaquë' pensari quieyaquë'. ¹³ Lëscan' bebïoyaquë' yaca bichi be mala yu'u yaca benë', bžuyaquë' aceite guicho yaca ben' raca žhue', beyacayaquë'.

Ca guca cati guti Juan bautista

(Mt. 14.1-12; Lc. 9.7-9)

¹⁴ Na'ra bdyin dza be rey Herodes cabè' rue Jesús nun quie ru'e yaca benè' di'idza' cabè' ruenè'. Na' guque rey Herodes pensari nè':

—Babeban Juan bautista. Quie lena' ruenè' milagro. —Cana' una rey Herodes na'.

¹⁵ Na' una bala benè' rèbiyaquè' laguedyiyaquè':

—Naquè' Elías, ben' uidxogue' xti'idza' Diuzi dza na'.

Na' ibala yaca benè' unayaquè':

—Naquè' ben' rguixogue' xti'idza' Diuzi cabè' bè ben' unita' tiempote.

¹⁶ Caora be rey Herodes cabè' una yaca benè', na'ra unè':

—Ben' na' naquè' Juan, ben' bia' mandado uchuguyaquè' luba'nè'. Na'ra babebannè' tatula. —Cana' una rey Herodes na'.

¹⁷ Lécana' bè rey Herodes, bènè' mandado bèxo yaca soldado Juan bdze'yaquè' lèbè' lu'u dyiguiba. Nun quie žgulanè' Herodías bènè' mandado pquiyoaquè' lèbè' con caden lu'u dyiguiba. Pues guca Herodías žgula ben' tula, ben' lao Felipe. Pero baoži' rey Herodes žgula Felipe, bazulènè' lèbè'. ¹⁸ Quie lena' una Juan dza na'te gudyinè' rey Herodes:

—Bireya'ala' sulao' nigula quie bi' bicho' Felipe.

¹⁹ Quie lena' lega udie Herodías Juan gu'unnè' gutinè' lèbè', pero biubinnè' bi huenè' ta gutinè' lèbè'. ²⁰ Cana' guca quie Herodías como dan' nezi rey Herodes naca Juan ben' huen, ben' la'ya. Quie lena' bdzebi Herodes bibè'nè' lato hue nigula na' tamala Juan. Lëscan', ba'ala'cazi biuyoñe'e rey Herodes dyè'èdi cabè' gudyi Juan lèbè', bzènaquè' quienè' con gusto. ²¹ Pero bdyin dza rbè'nidyi Herodías cabè' huenè' ta gati Juan. Lédza na' bè rey Herodes tu lani quie dza cumpleaños quienè'. Bè'nè' ta gao yaca ben' rnabè' lao na'anè', len yaca ben' naca xan' soldado quienè', len yaca los demás ben' belao, ben' nita' yedyi nebaba Galilea. ²² Na' uyu'u tu nigula dao', bi' naca ži'i Herodías, gan' raca lani na' ta uya'abi' zaquè'lao lao yaca ben' na'. Caora na' lega yaxe Herodes len yaca ben' raolènè' rtze' cabè' bya'a nigula dao' na'. Na' una Herodes rëbinè' bi' nigula dao':

—Con bitezi ta inabo' nè'èdi', naguna'n.

²³ Na'ra bguntenè' Diuzi hue'nè' nigula dao' con ta inababi', ba'ala'cazi inababi' gatzto yedyi ga rnabè'nè'. ²⁴ Na' bero nigula dao' yeguèdyibi' zna'bi' rëbibi' lèbè':

—¿Biži inaba' rey na'?

Na' una zna'bi' rëbinè' lëbi':

—Unaba guicho Juan bautista.

²⁵ Na'ra beyu'u nigula dao' ga re' rey na', na' gudyibi' lènè':

—Re'enda' laguntegazo' guicho Juan bautista tu lu'u plato.

²⁶ Na' guqueyèchi' rey Herodes dan' unaba nigula dao' guicho Juan. Pero como babguntenè' lao Diuzi, babe yaca ben' zè lao lani quienè' ca ta unè' gudyinè' nigula dao', biuzaque' yëbinè'bi' bihue'nè'n. ²⁷ Quie lena' luegozi bènè' mandado uyo tu soldado ta tzexi'nè' guicho Juan. ²⁸ Na' uyo soldado uyu'unè' lu'u yu'u dyiguiba, uchugunè' luba' Juan, zeyu'anè'n tu lu'u plato ga raca lani, bè'nè'n nigula dao' na'. Na' uyo nigula yesambi'n lao zna'bi'.

²⁹ Cati unezi yaca ben' quie Juan agutinè', caora na' uza'yaquè' yexi'yaquè' cuerpo quienè' ta pcachi'yaquè' lèbè'.

Bgao Jesús lao ga'yo' mila benè'

(Mt. 14.13-21; Lc. 9.10-17; Jn. 6.1-14)

³⁰ Bè' beyudyi na', bedyin yaca ben' quie Jesús gudyiyaquè' lèbè' yugulu ta bëyaquè' psèdiyaquè' yaca benè'. ³¹ Na' una Jesús rëbinè' leyaquè':

—Ületza' tziuro ru'a yedyi ga binita' benè' cuenda yezila'adyi'ro.

Cana' una Jesús dan' tantozi rdyin ben' rdyin, zaza' ben' zaza', ni siquiera bibè'nan lato ta gaoyaquè'. ³² Na'ra uza' Jesús lènè' yaca ben' quiè', uyu'uyaquè' lu'u barco ta tzioyaquè' ru'a yedyi ga nunu nita'. ³³ Pero blè'è yaca ben' zè azio Jesús bezaqueyaquè' lèbè'. Quie lena' uyu'uyaquè' be, uza'yaquè' quie quie yedyi quieyaquè' zioyaquè' bdyinyaquè' rbezayaquè' ga idyin Jesús. ³⁴ Caora bdyin Jesús na', blè'ènè' nita' ben' zè rbezayaquè' lèbè'. Na' beyèchi'la'adyi'nè' leyaquè', como dan' naca quieyaquè' ca quie yaca beco' ži'ila' neniti xa'ne. Na'ra bezulao Jesús rusèdinè' leyaquè' di'idza' zëra. ³⁵ Caora baoya' dza, baza' rdze', una yaca ben' quiè' rèbiyaquè' lèbè':

—Bardze' barala, quele biyu'u dyia niga. ³⁶ Mejorla yese'elo' yaca benè' yeyoyaquè' la'o yedyi ga'ala' ta ga'oyaquè' ta gaoyaquè', porque bide ta gaoyaquè' niga.

³⁷ Na' una Jesús rëbinè' yaca ben' quiè':

—Ülehue' ta gaoyaquè'.

Na' unayaquè':

—¿Re'enlo' tzegue'endo' chopa gayuhua dumi denario yëta xtila ta gaoyaquè'?

³⁸ Na' una Jesús rëbinè' leyaquè':

—¿Bala yêta xtila nu'ale? Uletzio tzena'le.

Na'ra caora uneziyaquë' unayaquë' Jesús:

—Ga'yo' yêta xtila len chopa bela.

³⁹ Na' bē Jesús mandado ure' yaca benë' tu cue' huiyoaqué' lao guiži. ⁴⁰ Na' gan' ure'yaquë', ure' ben' ure' tu gayuhua. Na' re' ben' ure'rë' igatzo gayuhua. ⁴¹ Caora na' uzi' Jesús lao ga'yo' yêta xtila len chopa bela. Bë' bazënë'n, unë'é' ladza rëbinë' Diuzi diuxcalelo'. Na' bžuzunë'n bë'n laze. Bë'në'n yaca ben' quie' ta udisiyaquë'n gao yaca benë'. Lëscan' bžuzurënë' yaca bela ta gaoyaquë'. ⁴² Na' udao yuguluteyaqué', udaoyaquë' ca tu beloyaquë'. ⁴³ Bega'nra ichipchopa ga' naga yêta xtila yužo len bela yužo ta beziyaquë'n. ⁴⁴ Naca yaca ben' udao ca du ga'yo' mila be'mbyu, apartela nigula len xcuidi'.

Uza' Jesús lao nisa

(Mt. 14.22-27; Jn. 6.16-21)

⁴⁵ Na' bē Jesús mandado yeyu'u yaca ben' quienë' lu'u barco cuenda cuialaonezayaquë' lëbë' idiyinaquë' gan' de ciudad Betsaida, tu rëbi Jesús yaca benë' ta yeyoyaquë' žan yu'u quieyaquë'. ⁴⁶ Caora bedzatza yaca benë', uza'në' zionë' lë'é' ya'a ta hue'lënë' Diuzi di'idza'. ⁴⁷ Biži barala uxin zio yaca ben' quie Jesús bega'nyaquë' gatzo la'o lagun. Na' bega'n Jesús nezënë' ru'a yu bidyi quie lagun. ⁴⁸ Na' blë'é' Jesús raca rdilalë' ben' quienë' be bedun', biru'en lato ta usa'yaquë' barco lao lagun. Na' ilë'ëti'zi tzeni', bebiga' Jesús ga re'yaquë' lu'u barco rza'në' lao nisa ta tenë' ga re' barco na'. ⁴⁹ Cati blë'ëyaquë' zio Jesús rzë'é' tu lao nisa, guqueyaquë' chi ludza' ben' huati. ⁵⁰ Na' lega bdzebiyaquë' urediyi'yaquë'. Pero una Jesús rëbinë' leyaquë':

—Bidzebile, në'ëdi' za' niga.

⁵¹ Caora uyu'u Jesús lu'u barco gan' yu'uyaquë', na' lapsante be bedun'. Pero lega rebanetzegueyaquë'. ⁵² Cana' guca quieyaquë', como dan' binetziõe'eyaquë' cabë' yela' huaca bē Jesús quie yêta xtila. Nenacan zidi lu'u guicho laxta'oyaquë'.

Byue Jesús yaca ben' raca zhue' yu nebaba Genesaret

(Mt. 14.34-36)

⁵³ Na'ra zioyaquë' bdyinaquë' ru'a lagun ga de yaca yedyi nebaba Genesaret. Lëgan' na' pquioyaquë' barco quieyaquë' ru'a lagun. ⁵⁴ Caora broyaquë' lu'u barco labezaquete yaca ben' nita' na' Jesús na'. ⁵⁵ Na' uyu'uyaquë' be, uyoyaquë' yugu yedyi de na', yexi'yaquë' yaca ben' raca zhue', uxubayaquë' leyaquë' lao belaga, yesanyaquë' leyaquë' ga neziyaquë' zu Jesús. ⁵⁶ Con ga ude Jesús, chi yedyi dao', chi yedyi že, chi ciudad, udixoyaquë' belaga gan' žuba ben' raca zhue' du tu neza, unabayaquë' cule hue' Jesús lato ta uda'yaquë' siquiera tacayaquë' ni'a zabanë'. Na' yugu ben' bda' taque žabanë', bero yela' hue' yu'uyaquë'.

7

Una Jesús quie ta nuen benë' badza' lao Diuzi

(Mt. 15.1-20)

¹ Na'ra guca dza bdyin bala ben' naca partido fariseo len bala ben' rusëdi ley quie Moisés, ben' uza' ciudad Jerusalén, bebiga'yaquë' ga zë Jesús. ² Na' blë'ëyaquë' rao bala ben' quie Jesús du binequibi na'ayaquë'. Quie lena' udaoyaquë' leyaquë' xquia. ³ (Cani rue yaca ben' naca partido fariseo len yaca los demás ben' Israel. Nenaoyaquë' costumbre quie xuzixta'oyaquë', bigaoyaquë' chi binequibi na'ayaquë' zë lasa. Pero quele rguibi na'ayaquë' dan' nacan besu, dechan' dan' inayaquë' cana' yeyëri laxta'oyaquë' lao Diuzi. ⁴ Lëscan', caora rioyaquë' lao ye'eya redyinaquë' žan yu'u, bigaoyaquë' chi binegazuyaquë' yao. Lëscan' dera zë costumbre nenaoyaquë', rguibiyaquë' nu taza, nu candi, nu yaca traste de guíba. Lente belaga quieyaquë' rguibiyaquë' como dan' inayaquë' cana' yeyërin lao Diuzi.) ⁵ Na'ra una yaca ben' naca partido fariseo len yaca ben' rusëdi ley quie Moisés, rëbiyaquë' Jesús:

—¿Bixquien' binao yaca ben' quio' costumbre quie xuzixta'oro? Raoyaquë' du binequibi na'ayaquë'.

⁶ Na'ra una Jesús rëbinë' leyaquë':

—Dyë'ëdi una Moisés cabë' ruele, biruele cabë' nale. Cana' una Moisés caora bzunë' di'idza' lë'é' guichi nan ca niga: Yaca ben' niga rapala'nyaquë' Diuzi de di'idza'zi, birapala'nyaquë' lëbë' du guicho du la'adyi'yaquë'.

⁷ Bibi sirve rionla'adyi'yaquë' Diuzi.

Puro mandado quie benë' rusëdiyaquë' nayaquë' mandado quie Diuzi na'.

⁸ Lëscan' unarë Jesús:

—Le'e rutele di'idza' quie Diuzi tzala'la tacuenda huele costumbre quie xuzixta'ole. Lena' rguibile candi quiele, rguibile vaso quiele. Lena' dera costumbre ta naca lëbizi quiele ruele quie xuzixta'ole.

⁹ Lëscan' unaranë':

—Rutele tzala'la ca naca mandamiento quie Diuzi ta inaole costumbre quiele. ¹⁰ Dyë'ëdi rnën lë'ë guichi bë Moisés: "Reya'ala' gapala'nle xuzile len zna'le." Lëscan' rnën: "Nu ben' rudze'de' xuzi znë'ë, reya'ala' gatinë'." ¹¹ Pero le'e nale chi yëbi benë' xuzi znë'ë: "Bide ta gacalia' le'e, como dan' yugulu ta de quia' nacan gun quie Diuzi." ¹² Na'ra le'e nale chi yëbi benë' xuzi znë'ë cana', biruen zi gacalënë' xuzi znë'ë. ¹³ Cana' rutele tzala'la ca naca mandamiento quie Diuzi ta inaole costumbre quiele. Lëscan' rusëdile zi'ile ta inaorëyacabi' hueyacabi' cabë' ruele. Lëscan' zëra costumbre de quiele nacan lëbi ca costumbre naole quie xuzixta'ole.

¹⁴ Na'ra beyëzi Jesús yaca benë' tatula unë' rëbinë' leyaquë':

—Ulezëcara nagale ta tzioñe'ele cabë' rnia'. ¹⁵ Quele ta gao yaca benë' nuen leyaquë' badza' lao Diuzi, dechan' pensari median rero lu'u guicho laxta'oyaquë', lëlena' nuen leyaquë' badza' lao Diuzi. ¹⁶ Nu le'e re'en ye, ulezë nagale.

¹⁷ Na'ra uza' Jesús zionë' bdyinnë' zan yu'u quienë'. Caora na' unaba yaca ben' quie' lëbë' ca bi re'en ina di'idza' unë' bachi. ¹⁸ Na' unë' rëbinë' leyaquë':

—¿Lëscan' le'e birioñe'ele? ¿Binezile ta rao yaca benë' binuen leyaquë' badza' lao Diuzi, ¹⁹ como biru'un lu'u laxta'oyaquë', dechan' ru'un lu'u lë'ëyaquë', te na' rguichiyaquë'n?

Cana' una Jesús pxi'idze'në' ra'o yugulu yela' hua'o nacan ta gaoro, binuen ra'o badza' lao Diuzi. ²⁰ Lëscan' una Jesús cani:

—Yaca pensari median rero lu'u guicho laxta'o benë', lëlena' nuen leyaquë' badza' lao Diuzi. ²¹ Nun quie pensari median rero lu'u guicho laxta'o benë', quie lena' rtilayaquë' nigula cuidi', rbnyaquë' quie laguediyaquë', rutiyaquë' laguediyaquë', rtilayaquë' žgula laguediyaquë', ²² rza'la'adyi'yaquë' ta de quie laguediyaquë', rueyaquë' tabayatza, rzi'yaquë' yë', rguiloyaquë' nigula yugu dza, racazë'jé' laguediyaquë', rueyaquë' že cuinyaquë', biyu'uyaquë' gracia. ²³ Cana' naca tamala rero lu'u guicho laxta'o yaca benë' nuen leyaquë' badza' lao Diuzi.

Bebio Jesús bichi be mala yu'u zi'i nigula, ben' Sirofenicia
(Mt. 15.21-28)

²⁴ Na'ra uza' Jesús gan' zioquë' bdyinnë' ga naca yu nebaba ciudad Tiro len ciudad Sidón. Bdyinnë' tu lu'u yu'u zu na', pero bigu'unnë' inezi yaca benë' gan' bdyinnë', pero bedzelecazi yaca benë' gan' bdyinnë'. ²⁵ Lëscan' laonezite tu nigula yu'u zi'inë' bichi be mala ga bdyin Jesús. Quie lena' uza'në' bdyinnë' ga zë Jesús uditzu žibinë' laohuë'. ²⁶ Na'ra lë'nigula na' binaquë' ben' Israel, naquë' ben' Sirofenicia. Bidë' unabë' chi biyebio Jesús bichi be mala yu'u zi'inë'. ²⁷ Na' una Jesús rëbinë' nigula na':

—Tanëro ruen zi gacalia' yaca ben' Israel, ben' naca ca quie ži'ina', como dan' binacan huen si'ro yela' hua'o ta gao yaca xcuidi', na' tzechu'unro'n ta gao yaca beco' dao'.

²⁸ Na' una nigula rëbinë' Jesús:

—Laga can' nao', Señor, pero lente yaca beco' dao' raoyacaba' yaca pedazo rguino layu ga rao yaca xcuidi'.

²⁹ Na'ra una Jesús rëbinë' lëbë':

—Tahuen baonao'. Beyo zan yu'u quio'. Babero bichi be mala yu'u ži'ilo'.

³⁰ Caora na' bezë'ë zeyoguë' bdyinnë' zan yu'u, blë'ënë' žuba ži'inë' nigula lao belaga, babero bichi be mala yu'ubi'.

Reyue Jesús tu ben' xcuedzo, ben' rcaca ru'e

³¹ Na'ra uza' Jesús yu nebaba ciudad Tiro, len yu nebaba ciudad Sidón. Udenë' ga re' chi yedyi bdyinnë' ru'a lagun Galilea. ³² Lëgan' na' ga bdyinnë', bdyin yaca ben' nequië' tu ben' xcuedzo, ben' rcaca ru'e. Unabayaquë' chi biudë'ë në'ë ben' na'. ³³ Na'ra ubiga' Jesús tzala'la len ben' na', pqui Jesús zbenë' lu'u naga ben' na', blëpinë' zen' quienë' zbenë' bda'në'n lao ludyi ben' xcuedzo, ben' rcaca ru'e. ³⁴ Caora na' unë'ë guibã, uzi'la'adyi'në' unë' rëbinë' ben' na':

—¡Efata! —ta inaro di'idza' quiero; ¡Beyalo!

³⁵ Caora na' beyalo naga ben' na' barenë'. Lëscan' beyaca ludyinë' benënë' dyë'ëdi. ³⁶ Na'ra bë Jesús mandado yaca ben' quie' ta biyëbiyaquë' can' bënë' quie ben' na'. Pero ca bënë' leyaquë' mandado, cana' mazara gudyiyaquë' yaca benë' cabë' bë Jesús quie ben' na'. ³⁷ Lega bega'nyaquë' bebanyaquë' cabë' ruenë' unayaquë' rëbiyaquë' laguediyaquë':

—Yugulu ta rue Jesús nacan dya'a. Hasta yaca ben' xcuedzo, reyuenë' leyaquë' reyeyaquë', lëscan' hasta yaca ben' birnë, reyuenë' leyaquë' renëyaquë'.

8

Bgao Jesús tapa mila benë'
(Mt. 15.32-39)

¹ Guca dza na' bedupa yaca ben' zë gan' zë Jesús. Na' babeya ta nu'ayaquë' ta gaoyaquë'. Lena' guzi Jesús yaca ben' quienë', unë' rëbinë' leyaquë':

² —Bareyëchi'la'adya' yaca ben' nita' niga, dan' bazio tzona dza na'a nita'lëyaquë' në'ëdi', na' babeya ta nu'ayaquë' ta gaoyaquë'. ³ Chan' yese'ela'yaquë' zan yu'u quieyaquë' binegaoyaquë', usu'unan leyaquë' tu neza, dan' balayaquë' uza'yaquë' zitu'.

⁴ Na' una yaca ben' quie Jesús rëbiyaquë' lëbë':

—¿Pero bizi huero ta gao yaca ben' nita' niga ga bidyia yu'u?

⁵ Na' una Jesús rëbinë' leyaquë':

—¿Bala yëta xtila nu'ale?

Na' bequëbiyaquë':

—Gadyin nu'ando'.

⁶ Na'ra bë Jesús mandado ure' yaca benë' layu, uzi'në' yëta xtila nu'a yaca ben' quië', blidzë' Diuzi rëbinë' lëbë': "Xcalelo!" Na' bzužuguë'n bënë'n yaca ben' quië' ta udisiyaquë'n bë'yaquë'n yaca benë'. ⁷ Lëscan' nu'a ben' quienë' chopa tzona bela dao'. Na' uzi' Jesús lëba', blidzë' Diuzi ta bëla'iyänë'ba', bënë' mandado ta udisi yaca ben' quienë' leyacaba', bë'yaquë'ba' yaca benë'. ⁸ Na' udao'yaquë' hasta beloyaquë'. Bizi tayuzo bega'n sobre igadyi chicuiti gucan. ⁹ Na' yaca ben' udao gucayaquë' cadu tapa mila. Na' bë Jesús mandado yedzatzayaquë' zeyoyaquë' zan yu'u quieyaquë'. ¹⁰ Caora na' uyu'unë' lu'u barco lënë' yaca ben' quië' uza'yaquë' zioyaquë' yu nebaba Dalmanuta.

Unabayaquë' ulu'e Jesús tu yela' huaca quienë'
(Mt. 16.1-4; Lc. 12.54-56)

¹¹ Na'ra bdyin yaca ben' naca partido fariseo gan' zë Jesús, uyu'ulë'yaquë' lëbë' huenë. Na' ta hueyaquë' lëbë' prueba unabayaquë' ulu'enë' leyaquë' tu yela' huaca quienë' ladza ta ilë'ëyaquë'. ¹² Na' uzi'la'adyi' Jesús unë' gudyinë' leyaquë':

—¿Bixquien' re'en yaca ben' nita' na'a ilë'ëyaquë' hua' tu yela' huaca quia' ladza? Tali rnian' le'e, bihua' tu yela' huaca quia' ladza ta ilë'ëyaquë'.

¹³ Na' pca'n Jesús yaca ben' naca partido fariseo, beyu'unë' lu'u barco lënë' yaca ben' quië', zioyaquë' itzala' lagun.

Una Jesús quie levadura quie ben' naca partido fariseo
(Mt. 16.5-12)

¹⁴ Bizi gula'adyi' yaca ben' quie Jesús ta nu'ayaquë' ta gaoyaquë'. Tuzi yëta xtila bi'ayaquë' lu'u barco na'. ¹⁵ Na' una Jesús rëbinë' leyaquë':

—Huele pensari. Gapale cuidado cabë' naca levadura quie ben' naca partido fariseo, len ben' naca partido Herodes.

¹⁶ Na' una yaca ben' quie Jesús rëbiyaquë' laguëdyiyaquë':

—Dan' rdzioguero yëta xtila ta gaoro, lena' unë' cana'.

¹⁷ Pero gucabë' Jesús ca naca pensari quieyaquë' biuyoñe'eyaquë' cabë' unë'. Cana' unë' rëbinë' leyaquë':

—¿Bixquien' nale rdzioguele yëta xtila ta gaole? ¿Bixquien' binetzioñe'ele, nica reyuele pensari? ¿Bixquien' naca zidi lu'u guicho laxta'ole? ¹⁸ ¿Quele birlë'ële dyë'ëdi cabë' rua'? ¿Quele birele dyë'ëdi cabë' rnian'? ¿Quele agula'adyi'le? ¹⁹ Cati bzužuga' ga'yo' yëta xtila bia' laze ta gao ga'yo' mila be'mbyu, ¿bala ga' naga ta yuzo bega'n?

Na' unayaquë':

—Chipchopa ga' naga.

²⁰ Na' una Jesús rëbinë' leyaquë':

—Lëscan' cati bzužuga' gadyi' yëta xtila bia' laze ta gao tapa mila be'mbyu, ¿bala chicuiti nadza' bega'n?

Na' unayaquë':

—Gadyi' chicuiti.

²¹ Na'ra una Jesús rëbinë' leyaquë':

—¿Binetzu'ule pensari ca naca yela' huaca quia'?

Beyue Jesús tu ben' laochula, ben' yedyi Betsaida

²² Na'ra bdyinyaquë' yedyi Betsaida ga uquië' yaca ben' yedyi na' tu ben' laochula ga zë Jesús. Na' unabayaquë' Jesús tu cule ta udë'ë në'ë lao ben' laochula. ²³ Na' uze Jesús na'a ben' laochula uquië'në' lëbë' ru'a yedyila. Tanëro bda'në' zen' lao ben' laochula, na'tera bda'në' në'ë lao ben' na', unabane' lëbë' chi barelë'ënë'. ²⁴ Na' una ben' laochula rëbinë' Jesús:

—Barelë'ëda' yaca benë'. Rna'yaquë' ca quie yaca yaga, pero rza'yaquë'.

²⁵ Na'ra bedä' Jesús në'ë lao ben' laochula tatula. Con cana' bena' ben' na' dyë'ëdi, beyaca laohuë', belë'ënë' dyë'ëdi. ²⁶ Na' bë Jesús mandado zeyo ben' na' zan yu'u quië', unë' rëbinë' lëbë':

—Bitzatao' la'o yedyi. Biyëbo' benë' cabë' bia' quio' beyaca laolo'.

Una Pedro naca Jesús ben' Cristo, ben' use'ela' Diuzi

(Mt. 16.13-20; Lc. 9.18-21)

²⁷ Na' uza' Jesús ziolënë' yaca ben' quië' yedyi Cesarea de Filipino. Na' du tu neza unaba Jesús rëbinë' leyaquë':

—¿Cabizi rna yaca benë' naca' në'ëdi'?

²⁸ Na' una yaca ben' quië' rëbiyaquë' Jesús:

—Rna balayaquë' naco' Juan bautista, babebanlo' tatula. Ibalayaquë' rnayaquë' naco' Elías, na' ibalayaquë' rnayaquë' naco' itu ben' udixogue' xti'idza' Diuzi tiempote.

²⁹ Na'ra una Jesús rëbinë' leyaquë':

—Na' le'e, ¿nuži nale naca'?

Na' una Pedro rëbinë' Jesús:

—Luë' naco' ben' Cristo, ben' use'ela' Diuzi.

³⁰ Pero bë Jesús mandado ta nitu nunu yëbiyaquë' nu naquë'.

Una Jesús ca gaca bë' bagatinë'

(Mt. 16.21-28; Lc. 9.22-27)

³¹ Na'ra uzulao Jesús rusëdinë' yaca ben' quië' cabë' gaca quienë' yedzagalaoatzeguenë' gatinë' dza zaza'ra. Gudyinë' leyaquë' naquë' bichi yugulu benë', usebi'n yaca ben' gula, len yaca xan' pxuzi, len yaca ben' rusëdi ley quie Moisés lëbë'. Lëscan' gudyinë' leyaquë' gutiyaquë' lëbë', pero huebannë' tatula gaca lao tzona dza. ³² Cana' una Jesús gudyinë' leyaquë'. Na'ra uquië' Pedro Jesús tzala'la tu neza uzulaonë' rdilanë' Jesús, dan' una Jesús can'. ³³ Pero beyëcho Jesús unë'ë dyë'ëdi yaca ben' quië', udilë' Pedro rëbinë' lëbë':

—Ubiga' tzala'la Satanás. Biraco' pensari quie Diuzi, raco' pensari quie benë'zi.

³⁴ Na'ra guzi Jesús yaca ben' quië' len yaca los demás ben' nita' na', unë' gudyinë' leyaquë':

—Chi nu yaca benë' re'en inao në'ëdi', ruen zi bira inoayaquë' ca rna pensari quieyaquë'. Ruen zi bidzebiyaquë' inoayaquë' në'ëdi' yugu dza, ba'ala'cazi ruen zudyi guti yaca benë' leyaquë'. ³⁵ Nu ben' rdzebi inao në'ëdi', dan' rdzebinë' gatinë' tanun quia', bihue' Diuzi lëbë' yela' neban tuzioli. Pero nu ben' inao në'ëdi', birdzebinë' gatinë' tanun quia' len tanun quie xti'idza' Diuzi, hue' Diuzi lëbë' yela' neban tuzioli. ³⁶ ¿Bizi gan de quie nu ben' anaca quië' lao yugulute ta de lao yedyi layu, chi bigata' yela' neban quienë' tuzioli? ³⁷ ¿Ca gacala dumi re'ennan ta ga'o yaca benë' yela' neban tuzioli? ³⁸ Chi nu ben' chu'unla'adyi' në'ëdi' yedue'yaquë' hue quieyaquë' can' rnia' zaca'lao lao yaca ben' nita' lao yedyi layu, ben' birue quie xti'idza' Diuzi, ben' rue xquia, lëscan' në'ëdi', bichi yugulu benë', huaru'unla'adya' leyaquë' cati yeguida' inabi'a lao yedyi layu ca rey. Zeyu'a yela' huaca quie Xuza' Diuzi len yaca ángel naca la'ia quienë'.

9

¹ Lëscan' una Jesús rëbinë' leyaquë':

—Tali rnia' le'e, binegati bala le'e nita' niga len në'ëdi' tu binelë'ële ca naca yela' rnabë' quie Diuzi.

Cabë' guca bë' betza' cuin Jesús zaca'lao lao yaca ben' quienë'

(Mt. 17.1-13; Lc. 9.28-36)

² Guca lao xopa dza, uza' Jesús uquië'në' Pedro, len Santiago, len Juan zioyaquë' urëyaquë' lao leda' ga zu tu ya'a ze. Caora badyiayaquë' laona, na' bazë Jesús zaca'lao lao yaca ben' quië' cati betza' cuinnë'. ³ Na' guca žabanë' tu la'ari' bezëri di. Ni tu yaca ben' rguibi la'ari' bisaque'yaquë' quibiyaquë' la'ari' gacan bezëri ca guca žabanë'. ⁴ Na' blë'ëyaquë' abdyin Elías len Moisés ru'elëyaquë' Jesús di'idza'. ⁵ Na'ra una Pedro rëbinë' Jesús:

—Maestro, tahuen na' nezëndo' lëndo' luë' niga. Ben lato huendo' tzona yu'u dao' de guiži. Huendo' tun quio', itun quie Moisés, itun quie Elías.

⁶ Na' bega'n ben' quie Jesús rdzebiyaquë'. Pero dan' unë Pedro na', binezinë' bi në'. ⁷ Na'ra bdyin tu beo bđubin leyaquë' gan' nita'yaquë'. Bizi lado beo na' beyaquë' rchi' Diuzi unë' rëbinë' leyaquë':

—Lëži'ina' niga, lega nedyë'ëda'në'. Ulezë'naga cabë' rnanë'.

⁸ Caora na' blë'ëyaquë' ituzi Jesús zënë', ganura blë'ëyaquë'.

⁹ Na' cati reyëziyaquë' lë'ë ya'a, bë Jesús mandado nitu nunu yëbiyaquë' cabë' blë'ëyaquë' hasta quie gatinë' na' yebannë' lëbë', ben' naca bichi yugulu benë'. ¹⁰ Quie lena' nitu

nunu gudyiyaquë' cabë' blë'ëyaquë' gan', pero hë'yaquë' di'idza' entre lëziyaquë' como dan' biuyoñe'eyaquë' bi na di'idza' quië' caora unë' gatinë' na' yebannë' tatula. ¹¹ Na' unayaquë' rëbiyaquë' Jesús:

—¿Tabala na' ca ina yaca ben' rusëdi ley quie Moisés de que tanëro ruen zi yeguida Elías, na'tera guida ben' ise'ela' Diuzi?

¹² Na'ra una Jesús rëbinë' leyaquë':

—Tabala na' hueguida Elías tanëro ta yecubinë' yugulute. ¿Quele binezile dan' rna lë'ë guichi la'iya quie Diuzi cabë' gaca quia' në'ëdi', bichi yugulu benë'? Rnën lë'ë guichi na' dan' yedzagalaohua' usaca' yaca benë' në'ëdi' bizinaquezi. ¹³ Pero rnia' le'e, babida ben' naca Elías, pero na' psaca'yaquë' lëbë' bizinaquezi laga con ca rna lë'ë guichi la'iya quie Diuzi.

Beyue Jesús tu bi'byu yu'u bichi be mala

(Mt. 17.14-21; Lc. 9.37-43)

¹⁴ Ude beyudyi na', zeza'yaquë' bdyinyaquë' ga nita' yaca los demás ben' quie Jesús. Na' blë'ëyaquë' nita' ben' zë gan'. Na' nita'rë yaca ben' rusëdi ley quie Moisés uyu'uyaquë' huenë len yaca ben' quie Jesús. ¹⁵ Caora blë'ëyaquë' Jesús, bega'nyaquë' bebanziyaquë', uyu'uyaquë' be, bdyinyaquë' ga zë Jesús, gapayaquë' lëbë' diuzi. ¹⁶ Na' una Jesús gudyinë' yaca ben' quië':

—¿Bizi una ben' rusëdi ley quie Moisés uyu'uyaquë' huenë len le'e?

¹⁷ Caora na' una tu ben' zë ga'ala' rëbinë' Jesús:

—Maestro, nequi'ta tu zi'ina' byu niga. Yu'ubi' bichi be mala, biraca inëbi', biraca yebi'.

¹⁸ Con gatezi rede yela' hue' xi'ibi' da'abi', rguinlëbi' yu. Bë' debi' layu, rullio rulibibi', rao leibi', raca bdyin' ru'abi'. Dan' raca quiebi' cana', bayëchi' gula raca quiebi'. Aonaba' yaca ben' quio' chi biyebioyaquë' bichi be mala yu'ubi', pero biuzaque'yaquë'.

¹⁹ Na' una Jesús rëbinë' yaca ben' nita' na':

—¿Ay, le'e ben' birale! ¿Bala iza re'ennan yega'nlia' le'e hasta que galele cabë' rnia'? ¿Bala iza re'ennan sueda' sulia' le'e? Uletzexi'bi' guidabi' niga.

²⁰ Na' yexi'yaquë'bi'. Caora blë'ë bichi be mala Jesús, hë' na' guca quie bi'byu ca züguti. Na' bgu'umbi' layu, rżizibi', rdulabi', raca bdyin' ru'abi'. ²¹ Na' unaba Jesús rëbinë' xuzibi':

—¿Gaca bazio na' ulëna?

Bizi unë xuzibi':

—Nenacatebi' xcuidi' ulëna. ²² Zë lasa babzalan lëbi' lagui', babzalan lëbi' lu'u yao ta udyiaguin' lëbi', pero birzaque'n. Na' chan' gaco' yeyuelo'bi', yeyëchi'la'adyo' nëto' gacalëlo' nëto'.

²³ Na'ra una Jesús gudyinë' lëbë':

—Binao' chan' gaco'. Chi rzudyi'ilëlo' në'ëdi', huaca huelo' yugulute.

²⁴ Bizi na' unë xuzi xcuidi' na' zidzo rëbinë' Jesús:

—Rzudyi'ilia' luë', gacalao' në'ëdi' ta sudyi'ilia' luë' mazara.

²⁵ Caora blë'ë Jesús bdupa yaca ben' zë ga zënë', na' udilanë' bichi be mala unë' rëbinë'n:

—Dyin quio' bire birnë bi' niga. Rnia' luë', bero gan' yu'ulo' na', bira huelao'bi' tatula.

²⁶ Na' uredyia' bichi be mala pxizin bi'byu tatula, bega'mbi' debi' ca ben' huati. Lena' una yaca ben' nita' na':

—Bagutibi'.

²⁷ Na'ra bëxo Jesús na'abi' ta bechisanë'bi', bezubi'.

²⁸ Ude beyudyi na', caora uyu'u Jesús lënë' yaca ben' quië' lu'u yu'u, na' unayaquë' rëbiyaquë' Jesús:

—¿Bixquien' biuzaque'ndo' yebiondo' bichi be mala?

²⁹ Na' una Jesús rëbinë' leyaquë':

—Ca naca bichi be mala bebioga', chi bihue'lële Diuzi di'idza', chi bihuele ubasi, biyeron.

Tatula una Jesús cabë' gaca quienë' bë' gatinë'

(Mt. 17.22-23; Lc. 9.43-45)

³⁰ Na' beza' Jesús lënë' yaca ben' quië' zioyaquë' yedeyaquë' estado Galilea. Na' bigu'un Jesús inezi yaca benë' yedeyaquë' gan' na', ³¹ dan' ruzioñe'enë' yaca ben' quienë', gudyinë' leyaquë' cabë' gaca quië', ben' naca bichi yugulu benë'. Na'ra gudyinë' leyaquë' usedyin yaca benë' lëbë' lao na'a ben' rnabë' ta gutiyaquë' lëbë', pero gaca lao tzona dza huebannë' tatula. ³² Pero biuyoñe'e yaca ben' quië' can' unë' gudyinë' leyaquë'. Na' bibeyažoyaquë' inabayaquë' lëbë'.

Unë Jesús quie ben' nacara belao

(Mt. 18.1-5; Lc. 9.46-48)

³³ Bizi bdyin Jesús lènè' yaca ben' quiè' ciudad Capernaum tatula, beyu'uyaquè' lu'u yu'u gan' uza'yaquè'. Na' una Jesús rëbinè' yaca ben' quiè':

—¿Bizi di'idza' ru'elèle laguedyile dan' zeza'le huenè' cati zeza'ro tu neza?

³⁴ Pero bibequëbiyaquè' bega'nyaquè' chizi dan' zeza'yaquè' rnëyaquè' tu neza quie nula leyaquè' nacara ben' belao. ³⁵ Na' ure' Jesús gudyinè' yaca chipchopa ben' quienè' ta ibiga'yaquè' gan' re'nè'. Na' unè' rëbinè' leyaquè':

—Nu le'e re'en gaca ben' belaoa entre le'e, ruen zi gaquè' ben' zenaote quie le'e, ben' gacalè laguedyi.

³⁶ Na'ra guzi Jesús tu xcuidi' bzunè'bi' gatzo la'o gan' nita'yaquè'. Te na' uzi'nè'bi' bdyianè'bi' lazibinè' unè' gudyinè' leyaquè':

³⁷ —Nu ben' rzi' tu xcuidi' ca bi' niga lao laohua' nè'èdi', rzi'rènè' nè'èdi'. Na' tu ben' rzi' nè'èdi', quele tuza' nè'èdi' rzi'nè', lëscan' rzi'rènè' ben' pse'ela' nè'èdi'.

*Nu ben' birue condre ra'o, nacacazi quieyaquè' ca quie ben' rnëcule ra'o
(Lc. 9.49-50; Mt. 10.42)*

³⁸ Na'ra una Juan rëbinè' Jesús:

—Maestro, bablè'èndo' rda tu benè' rzëtoguè' rnanè' laolo' rebiogué' bichi be mala yu'u benè'. Na'ra gudyindo'nè' bira huenè'n dan' binaquè' tu cue' quiero.

³⁹ Pero una Jesús rëbinè' leyaquè':

—Gabi yëbile nu ben' rue cana', como dan' chi nu yaca benè' rueyaquè' yela' huaca rzëtoyaquè' laohua', quele condre nè'èdi' rnëyaquè'. ⁴⁰ Nu ben' birue condre ra'o, nacacazi quieyaquè' ca quie ben' rnëcule ra'o. ⁴¹ Nutezi ben' gun le'e bi cosa siquiera tu vaso nisa nun quie nacalè ben' quia', huaguižucazi Diuzi lëbè'.

*Nacan zudyi gula chi huero xquia
(Mt. 18.6-9; Lc. 17.1-2)*

⁴² 'Nutezi ben' rudze'yela tu xcuidi' rale quia' ta huebi' xquia, hue Diuzi lëbè' castigo huala gula. Tadya'acala quienè' irio tu yo že len du luba'nè' tzechu'un yaca benè' lëbè' lu'u yao že, quele ca castigo hue Diuzi lëbè'. ⁴³ Chi rnën le'e huelèle na'ale tamala, nacaran dya'a ichugulen tziolè guibá ca ben' nedyipa nè'è, quele ca zu rupa na'ale tziolè gui' gabila ga bireyulan, ⁴⁴ ga gao bëla benè' tuzioli, bireyula gui'. ⁴⁵ Lëscan' chi rnën le'e huelèle ni'ale tamala, nacaran dya'a ichugurëlen tziolè guibá ca ben' nedyipa ni'e, quele ca zu rupa ni'ale tziolè gui' gabila bireyulan, ⁴⁶ ga gao bëla benè' tuzioli, bireyula gui'. ⁴⁷ Lëscan' chi rnën le'e huelèle laole tamala, nacaran dya'a cuiolen tziolè guibá ca ben' nero yolaohue, quele ca ta tziolè gui' gabila len rupa la'a yolaole, ⁴⁸ ga gao bëla benè' tuzioli, bireyula gui'.

⁴⁹ 'Cabè' rudze' benè' zedi' lu'u bè'èla', cana' udze' Diuzi gui' lu'u benè'. ⁵⁰ De ga hue zedi' dyin, pero chan' aodyiagui'n, bira huen dyin, ¿bizi huero ta iyacan huen dyin tatula? Quie lena' bigacale ca ben' aodyiagui', ben' birue dyin, mejorla nita'lèle laguedyile dyè'èdi, bitilale.

10

*Una Jesús quie ben' rsan laguedyi
(Mt. 19.1-12; Lc. 16.18)*

¹ Na'ra uza' Jesús lènè' yaca ben' quiè' ciudad Capernaum zioyaquè' estado Judea, lëscan' zioyaquè' tzala'la yao Jordán. Con ga zioyaquè' redupa yaca benè' gan' zè Jesús. Na' ca modo quie Jesús, bezulaonè' rusëdinè' yaca benè'. ² Bizi na' bdyin chopa tzona ben' naca partido fariseo gan' na' ta hueyaquè' trampa quie Jesús iguionè' lao di'idza' quienè'. Quie lena' unabayaquè' lëbè' chi ru'en lato usan yaca benè' nigula quieyaquè'. ³ Na' una Jesús bequëbinè' leyaquè':

—¿Bi na lè'è guichi bë Moisés?

⁴ Na' unayaquè' rëbiyaquè' lëbè':

—Bè' Moisés lato hue yaca benè' tu guichi ta usanyaquè' nigula quieyaquè'.

⁵ Na'ra una Jesús rëbinè' leyaquè':

—Yela' zidi quie yaca benè' bë' Moisés lato usanyaquè' nigula quieyaquè'. ⁶ Pero binacan cana' dza na' caora ulèchi Diuzi dyilayu udixonè' yugulu ta de. "Lédza na' bzalogué' chopá benè', tu be'mbyu len tu nigula." ⁷ Quie lena' rsan yaca be'mbyu xuzi znè'è ta rzulènè' nigula quienè'. ⁸ Cana' naca quieyaquè' ca quie tuzi benè'. Bira nacayaquè' chopá, dechan' nacayaquè' ca quie tuzi benè'. ⁹ Quie lena' bireya'ala' usan yaca benè' laguedyiaquè' como dan' bë Diuzi gacayaquè' tuzi.

¹⁰ Bizi caora bedyin Jesús lènè' yaca ben' quiè' lu'u yu'u, na' unabarayaquè' Jesús quie ben' rsan laguedyi. ¹¹ Na' una Jesús:

—Nu ben' rsan nigula quie, na' rzulënë' nigula tula, nacan xquia quienë' lao Diuzi, bënë' yela' stu' quie nigula quienë'. ¹² Lëscan' chi rsan nigula be'mbyu quienë', na' rzulënë' be'mbyu tula, nacan xquia quienë' lao Diuzi, bënë' yela' stu' quie be'mbyu quienë'.

Bëla'ya Jesús yaca xcuidi'

(Mt. 19.13-15; Lc. 18.15-17)

¹³ Na'ra bdyin yaca benë' gan' zë Jesús nequië'yaquë' zi'yaquë' ta uda'në' në'ë guichoy-acabi' huela'iyane' leyacabi'. Pero udila yaca ben' quie Jesús yaca ben' nequië' zi'ine. ¹⁴ Caora blë'ë Jesús udila yaca ben' quië' leyaquë', na' bdza'në' unë' rëbinë' yaca ben' quië': —Biudzunle yaca xcuidi'. Guidagarayacabi' ni como dan' ca naca quieyacabi', rue quieyacabi' ca rna xuziyacabi', lëcana' nacarën quie ben' zio rue quie Diuzi. ¹⁵ Tali rnia' le'e, chi nu yaca ben' birue quieyaquë' xti'idza' Diuzi ca rue xcuidi' quie xuzibi', bisaque' yeyoyaquë' guibá gan' zu Diuzi.

¹⁶ Na' bdyia Jesús tu huio xcuidi' lažibinë' bdë'ë në'ë guichoyacabi' bëla'iyane' yuguluy-acabi'.

Tu ben' uña'a bë'lënë' Jesús di'idza'

(Mt. 19.16-30; Lc. 18.18-30)

¹⁷ Na'ra caora beyu'tu Jesús neza azeyolënë' yaca ben' quië', na' bdyin tu ben' uyu'u be, uditzu žibinë' lao Jesús unë' rëbinë' lëbë':

—Maestro, ben' huen naco'. Nainao', žca biži reya'ala' hua' ta gata' yela' neban quia' tuzioli'?

¹⁸ Na' una Jesús:

—Žbixquien' nao' naca' ben' huen? Tahuencazi nao' cana', como tuzi Diuzi naquë' ben' ben' huen. ¹⁹ Luë' banežilo' ca rna lë'ë guichi la'iya quie Diuzi: “Biutilo' nigula quie ben' tula. Bigutio' benë'. Bicuanlo' quie benë'. Bisiu' benë' yë'. Udapala'n xuzo' len žnao'.”

²⁰ Na'ra unë' ben' na' rëbinë' Jesús:

—Yugulu ca rnao', rue quiecaza'n za'caza' naohua'n desde nacatia' xcuidi'.

²¹ Caora na' una' Jesús laohuë' nedyë'ënë' lëbë', unë' rëbinë' lëbë':

—De tu ta nerdzioguelo' huelo'. Bëti' yugulu ta de quio', na' uzi' dumi na', bë' yaca ben' yëchi' len. Cana' gunra Diuzi tažera quio' bë' yedyinlo' guibá. Na' uda unao në'ëdi' gaco' ben' quia'.

²² Pero cati be ben' na' can' una Jesús, na' bega'nnë' guquenë' beyëchi' gula, como dan' naquë' ben' uña'a huala gula.

²³ Na' una' Jesús yaca ben' quië' unë' rëbinë' leyaquë':

—Žëdi gula nacan quie ben' uña'a ta yeyoyaquë' guibá gan' zu Diuzi.

²⁴ Na'ra bebanzi yaca ben' quie Jesús cabë' unë' quie ben' uña'a. Pero tatula unë' rëbinë' leyaquë':

—Bicha', žëdi gula nacan ta yeyo ga zu Diuzi yaca ben' rzudyi'ilë dumi quieyaquë' ta gacalën leyaquë' yeyoyaquë' guibá. ²⁵ Nacaran yalo te tu camello naga yëchi', quele ca ta tzu'u ben' uña'a guibá gan' zu Diuzi.

²⁶ Na' bebanzi yaca ben' quie Jesús unayaquë' rëbiyaquë' laguediyaquë':

—Chi nacan žëdi gula quie ben' uña'a, žnuži saque' yeyo guibá gan' zu Diuzi?

²⁷ Na' una' Jesús leyaquë' unë':

—Tu ta bisaque' hue yaca benë', Diuzi sí, huazaque'në' huenë'n, como dan' raza Diuzi ruenë' yugulute.

²⁸ Na' una Pedro rëbinë' Jesús:

—Señor, nëto' hapca'ndo' yugulu ta de quiendo' cuenda za'ndo' naondo' luë'.

²⁹ Na' una Jesús rëbinë' leyaquë':

—Nacan tali can' rnia' le'e. Con nuti'tezi ben' pca'n nu yu'u quieyaquë', nu bichi, nu zane, nu xuzi, nu žnë'ë, nu žgule, nu ži'ine, nu layela quie, nun quie naoyaquë' në'ëdi' rue quieyaquë' xti'idza' Diuzi, ³⁰ hueyu'era Diuzi tu gayuhua mazara quieyaquë' dza rdayaquë' lao yedyi layu. Hueyu'era Diuzi quieyaquë' nu yu'u, nu bichi, nu zane, nu žnë'ë, nu ži'ine, nu layela quie, ba'ala'cazi rue yaca benë' lëyaquë' bizinaqueži. Lëscan' hue' Diuzi lëyaquë' yela' neban tuzioli bë' bayedyinyaquë' guibá gan' zu Diuzi. ³¹ Pero bala ben' naca ben' belao niga lao yedyi layu, bira gacayaquë' ben' belao dza yedyinyaquë' ga zu Diuzi. Lëscan' bala ben' binaca ben' belao niga lao yedyi layu, huacayaquë' ben' belao dza yedyinyaquë' ga zu Diuzi.

Una Jesús tatula cabë' gaca bë' gatinë'

(Mt. 20.17-19; Lc. 18.31-34)

³² Na' bë' beza' Jesús lënë' yaca ben' quië', zeyu'uyaquë' neza ta yedyinyaquë' ciudad Jerusalén. Na' udyialao Jesús lao yaca ben' quië'. Na' tu bebanzi yaca ben' quië' birdzebi

Jesús tzionè' ciudad Jerusalén. Na' unao yaca ben' quienè' lèbè' du rdzebiyaquè' bi gaca quieyaquè'. Na' guzi Jesús leyaquè' ta tzezeyaquè' lèbè' gudyinè' leyaquè' bi gaca quienè' ciudad Jerusalén. ³³ Cana' una Jesús rëbinè' leyaquè':

—Ulezëcara nagale. Tzioro Jerusalén ga usaca' yaca benè' nè'èdi', ben' naca bichi yugulu benè', tamala. Usedyinyaquè' nè'èdi' lao na'a yaca xan' pxuzi len yaca ben' rusèdi ley quie Moisés. Huachugubè'yaquè' quia' inayaquè' reya'ala' gatia'. Na' usedyinyaquè' nè'èdi' lao na'a yaca ben' uza' yedyi tula. ³⁴ Na' utitu yaca ben' uza' yedyi tula nè'èdi'. Hueyaquè' nè'èdi' zi', uda'yaquè' zen' laohua', gutiyaquè' nè'èdi'. Pero bè' gaca lao tzona dza, huebana' tatula.

Unaba Santiago len Juan tu cule lao Jesús

(Mt. 20.20-28)

³⁵ Na'ra Santiago len Juan, ben' zi'i Zebedeo, ubiga'yaquè' ga zè Jesús unayaquè' rëbiyaquè' lèbè':

—Maestro, re'enndo' gunlo' ca ta inabando' luè'.

³⁶ Na' una Jesús rëbinè' leyaquè':

—¿Bizi re'enle guna' le'e'?

³⁷ Na' unayaquè' rëbiyaquè' Jesús:

—Re'enndo' guno' lato ta cue'ndo' tzala' huio cuëtala' ga tzere'lo' inabè'lo' lao yedyi layu.

³⁸ Na' una Jesús rëbinè' leyaquè':

—Binezile cabizi inabale guna'. ¿Huazuele sacale cabè' usaca benè' nè'èdi'? ¿Huazuele yedzagalaole cabè' yedzagalaohua'?

³⁹ Na' bequèbiyaquè' rëbiyaquè' Jesús:

—Huazuendo'.

Na' bizi una Jesús rëbinè' leyaquè':

—Tali na' ca nale. Usacacazi benè' le'e cabè' usacayaquè' nè'èdi', lëscan' yedzagalaocazile cabè' yedzagalaohua'. ⁴⁰ Pero bisaque' guna' le'e lato cue'le tzala' huio cuëta' ga tzeri'a como dan' binaca parte quia' guna' le'e lato cue'le cuëta'. Naca parte quie Diuzi hue'nè' lato nu ben' cue' cuëta' lè'ëna'.

⁴¹ Na'ra cati unezi yaca los demás ben' quie Jesús cabè' unaba Santiago len Juan hue'nè' quieyaquè', na' bdza'yaquè' leyaquè'. ⁴² Pero guzi Jesús leyaquè' unè' rëbinè' leyaquè':

—Le'e nezile dyè'èdi cabè' rue yaca ben' naca gobierno, rnabè'yaquè' zi'laza. Lega rueyaquè' mandado zèdi ta rue yaca benè'. ⁴³ Pero le'e bireya'ala' huele cana'. Nu le'e re'en gaca ben' ze entre le'e, reya'ala' gaquè' ben' gaxo, ben' gacalè laguedyi. ⁴⁴ Nu le'e re'en gaca ben' belao entre le'e, reya'ala' gaquè' ca quie mozo quiele. ⁴⁵ Hasta nè'èdi', ben' naca bichi yugulu benè', quele bida' ta gaca yaca benè' ca yaca como quia', bida' ta gaca' ca quie mozo quieyaquè'. Lëscan' bida' ta gatia' quizuga' quie xquia quieyaquè' cuenda gata' yela' neban quieyaquè' tuzioli.

Beyue Jesús ben' laochula, ben' lao Bartimeo

(Mt. 20.29-34; Lc. 18.35-43)

⁴⁶ Na' bdyin Jesús lènè' yaca ben' quiè' yedyi Jericó. Caora udeyaquè' yedyi, na' bazèyaquè' ru'a yedyi, caora na' bdupa yaca ben' zè gan' zènè'. Bizi cuëta neza ure' tu ben' laochula, ben' lao Bartimeo. Naquè' zi'i Timeo, ure'nè' tu neza rnabè' caridad. ⁴⁷ Na'ra caora benè' baza' Jesús, ben' yedyi Nazaret, uzulaonè' rnènè' zidzo rëbinè' Jesús:

—¡Jesús, zi'i suba rey David, yeyèchi'la'adyo' nè'èdi'!

⁴⁸ Na' udila yaca benè' lèbè' gudyiyaquè' ta cue'nè' chizi, pero unèrè' zidzora ure-dyiya'nè':

—Zi'i suba rey David, yeyèchi'la'adyo' nè'èdi'.

⁴⁹ Na' bizi uleza Jesús unè' rëbinè' yaca ben' nita' na':

—Uleyèbi ben' na' guidé' ni.

Na' uyoyaquè' yexi'yaquè' lèbè' gudyiyaquè' lèbè':

—Bidzebo', uzuli, ya', como dan' rëzi Jesús luè'.

⁵⁰ Na' ulëchonè' gabán quienè', laozulitenè' zionè' ga zè Jesús. ⁵¹ Na'ra una Jesús rëbinè' lèbè':

—¿Bizi re'enlo' hua' quio'?

Na' una ben' laochula:

—Maestro, re'enda' yeyuelo' laohua'.

⁵² Na' una Jesús rëbinè' lèbè':

—Dan' rzudyi'ilèlo' nè'èdi', quie lena' babeyaca laolo'. Baoca, yeyo.

Bizi caora una Jesús cana', beyaca laohuè' belè'ënè', ziolènè' Jesús tu neza.

11

*Cabè' guca bè' uyo Jesús ciudad Jerusalén**(Mt. 21.1-11; Lc. 19.28-40; Jn. 12.12-19)*

¹ Na'ra bdyinyaquè' ga zu tu ya'a laonan ya'a Olivos. Baruen bago ta idyinyaquè' ciudad Jerusalén. Lèscan' banacaten ga'ala' len yedyi Betfagé len yedyi Betania. Na' use'ela' Jesús chopa ben' quiè' ² unè' rèbinè'yaquè':

—Uletizu yedyi re' ni'. Bè' zaidyinle ru'a yedyi, huadzelele tu burra dao' nerioaba' nunu necua lèba'. Na' ixèdyileba' yequiè'leba' nila. Yeyudyi uhuenaba' dyin, natzesanleba'.

³ Chi inaba yaca benè' le'e bixquien' rexèdyileba', na' yèbilyaquè': Re'en xa'nndo' lèba'. Bè' yeyudyi uhuenè'ba' dyin, cana' idesanndo'ba'.

⁴ Na' uza'yaquè' bdyinyaquè' tu neza gan' zè burra dao' nerioaba' cuèta ru'a yu'u. Na' pxèdyiyaquè'ba'. ⁵ Bizì na' unè' yaca ben' nita' bago unayaquè' rèbiyaquè' ben' quie Jesús:

—¿Bixquien' rxèdyile burra dao' na'?

⁶ Na'ra bequèbiyaquè' gudyiyaquè' yaca ben' nita' na' cabè' gudyi Jesús leyaquè'. Na'ra psan yaca benè' leyaquè' yequiè'yaquè' burra dao'. ⁷ Na' zeza'yaquè' bedyinleyaquè' ga zè Jesús. Ulèchyaquè' gabán quieyaquè' uxubayaquè'n xcu'udzu burra dao', udyia Jesús lèba'.

⁸ Na' uza'yaquè' zioyaquè' uduxu yaca benè' gabán quieyaquè' tu neza ta gapala'nyaquè' lèbè'. Lèscan' uchugo yaca benè' bena yaga dyia la'aga' uduxuyaquè'n tu neza gan' te Jesús.

⁹ Na' yaca ben' zenao lèbè' tu neza len yaca ben' udyialao lao len lèbè', uzulaoyaquè' rbedyiyayaquè' unayaquè':

—¡Naca Xuziro Diuzi ben' ze! ¡Ben' la'iya naco', bido' tanun quie Diuzi!

¹⁰ ¡La'iya naca xlato' ta zeza'ra lao xlato xuzixta'oro rey David! ¡Naca Xuziro ben' ze!

¹¹ Cana' bdyin Jesús ciudad Jerusalén, uyu'unè' lu'u idao' r nabè'ra zu na'. Te beyudyi una'nè' duze cabè' naca na', na' zeza'lènè' lao chipchopa ben' quienè' zioyaquè' yedyi Betania dan' baza' rdze'.

*Bdze'de' Jesús yaga higo ta bidyan tazixi**(Mt. 21.18-19)*

¹² Na' beteyu zila, beza'nè' Betania ziolènè' yaca ben' quiè' cati uduenè'. ¹³ Na' blè'è Jesús zitu' zu tu yaga higo badyian la'aga'. Na' uyoguè' ta inè'è chi bidyan tazixi. Pero bibi tazixi dyian, puro la'aga' dyian dan' quele tiempo quien. ¹⁴ Na' unè' Jesús gudyinè' yaga:

—Desde na'a bira cuialo' tazixi ta gao yaca benè'.

Bizi na' be yaca ben' quiè' cabè' unè' rèbinè' yaga.

*Blaos Jesús yaca ben' yu'u huèti' ru'a idao' r nabè'ra**(Mt. 21.12-17; Lc. 19.45-48; Jn. 2.13-22)*

¹⁵ Na'ra bdyinyaquè' ciudad Jerusalén, uyo Jesús tatula ru'a idao' r nabè'ra, blaohuè' yaca ben' yu'u huèti' gan'. Bzalanè' layu mesa quie yaca ben' rutzá' dumi. Bzalanè' silla que yaca ben' ruti' biu. ¹⁶ Bibè' Jesús lato ta te yaca benè' len yua' quieyaquè' ru'a idao' r nabè'ra na'. ¹⁷ Na' una Jesús rèbinè' yaca ben' yu'u huèti':

—Lè'è guichi la'iya quie Diuzi rnan cani: “Lu'u idao' r nabè'ra ni nacan ga ulidza ben' quie yugulu nación Diuzi.” Pero le'e aptza'len ruelen ca quie beló ga yu'u ben' uban.

¹⁸ Na' yeguedyi yaca benè' yaca xan' xuzi len yaca ben' rusèdi ley quie Moisés cabè' bè Jesús quie yaca ben' yu'u huèti' ru'a idao' r nabè'ra. Na' uzulaoyaquè' reguilola'adyi'yaquè' bi hueyaquè' ta guti'yaquè' Jesús, dan' rdzebiyaquè' lèbè' nun quie yaca ben' ca na Jesús rusèdinè' leyaquè'. ¹⁹ Na' baoya' dza, zeza' Jesús ziolènè' yaca ben' quiè' zeyoyaquè' Betania.

*Ca guca quie yaga higo aobidyin**(Mt. 21.20-22)*

²⁰ Caora uyenì' dza tula, beza'yaquè' uyu'uyaquè' neza blè'èyaquè' aobidyin yaga higo lente lue quien. ²¹ Na' beza'la'adyi' Pedro cabè' una Jesús quie yaga higo, na' unè' rèbinè' Jesús:

—Maestro, una'cara, aobidyin yaga higo bdze'de'lo'.

²² Na' una Jesús rèbinè' leyaquè':

—Sudyi'ilèle Diuzi. ²³ Tali rnia' le'e, con nutezi ben' yèbi ya'a niga: “Beyo, yeyu'u lu'u nisadao'”, na' chi du guicho du la'adyi'yaquè' rzudyi'ilèyaquè' Diuzi, huenè' ca yèbiyaquè' ya'a, na'ra huaca quie ya'a ca yèbiyaquè'n. ²⁴ Quie lena' rnia' le'e, cati hue'lèle Diuzi di'idza' ta inabalenè' bi cosa, chi rzudyi'ilèle Diuzi du guicho du la'adyi'le gun Diuzi ca ta inabalenè', na'ra guncazinè'. ²⁵ Lèscan' cati hue'lèle Diuzi di'idza', chi nede tu tamala bè yaca benè' quiele, yezi'zele quieyaquè'. Cana' huezi'zerè Xuziro Diuzi zu guibá dula' xquia quiele. ²⁶ Pero chi biyezi'zele quieyaquè', lèscan' biyezi'ze Xuziro Diuzi zu guibá dula' xquia quiele.

Unabayaquë' Jesús nu ben yela' rñabë' quienë'
(Mt. 21.23-27; Lc. 20.1-8)

²⁷ Na'ra beza'yaquë' zioyaquë' bedyinyaquë' ciudad Jerusalén tatula. Na' caora uyu'u Jesús lu'u idao' rñabë'ra rdanë' na', caora na' bdyin yaca xan' pxuzi len yaca ben' rusëdi ley quie Moisés ga rdë'. ²⁸ Na' unayaquë' rëbiyaquë' Jesús:

—Una nëto', ¿nu ben yela' rñabë' quio', dan' bablaolo' ben' yu'u huëti' lu'u idao' rñabë'ra?

²⁹ Na' una Jesús gudyinë' leyaquë':

—Lëscan' re'enda' inaba' le'e tu di'idza'. Chi yequëbile ta inaba' le'e, na' inia' le'e nu ben yela' rñabë' quia' dan' bia' cana'. ³⁰ Na' inaba' le'e: ¿Nuzi use'ela' Juan ta bënë' lao yaca benë'? ¿Use'ela' Diuzi lëbë' o ta racazi la'adyi'në' bidë'?

³¹ Na'ra uzulaoyaquë' rtzaloyaquë' ru'elëyaquë' lague'dyiaquë' di'idza' nayaquë':

—¿Cabizi yëbironë'? Chan' yëbironë': “Diuzi use'elë' lëbë'”, tana' huanë' ra'o: “¿Bixquien' bigulele quienë'?” ³² Pero bisaque' yëbironë': “Ta racazi la'adyi'në' bidë'.”

Na' bdzebiyaquë' yëbiyaquë' Jesús can', como dan' neziyaquë' huadza' yaca benë' leyaquë' nun quie rna yaca benë' naca Juan ben' use'ela' Diuzi, ben' rguixogüe' xti'idzë'. ³³ Quie lena' unayaquë' rëbiyaquë' Jesús:

—Binezindo'.

Na'ra una Jesús rëbinë' leyaquë':

—Lëscan' në'ëdi', biinia' le'e nu ben yela' rñabë' quia', dan' bablaohua' ben' yu'u huëti' lu'u idao' rñabë'ra.

12

Bzu Jesús tu di'idza' quie yaca ben' hue dyin, yaca ben' mala
(Mt. 21.33-46; Lc. 20.9-19)

¹ Na'ra una Jesús di'idza' ni rëbinë' benë':

—Uzu tu ben' guza bedzuli' layela quienë'. Lëscan' psioguë'n ulëchinë'n corale, udixunë' tu yo laga' ga usinë' nisa bedzuli'. Lëscan' bënë' tu yu'u de yo ga cuia benë' ta gapayaquë' bedzuli' quienë'.

Na'ra bënë'n lao na'a yaca benë' naca ladyinë'ë, uza'në' zioguë' zitu'. ² Bizi cati bdyin biu' quie usecho quie bedzuli', na' bese'ela' xan' layela tu ben' zu laohuë' ta tzenabanë' tu ta redu'ulanë' si'në' quie bedzuli' quienë'. ³ Pero belacala bë'yaquë' zi' ben' use'ela' xa'nyaquë'. Na' beza'në' gabi zeyu'anë'. ⁴ Na'ra bese'ela' ben' xan' layela ben' tula zioguë'. Pero lagazi udiyaquë' lëbë' yo, bë'yaquë' guicho ben' na' zi', ptasi bnioyaquë' lëbë'. ⁵ Na' bizi bese'ela' xan' layela ben' tula zioguë', pero bë'tiyaquë' lënë'. Te na' bese'ela' xan' layela ben' zë, uyo tu huio tu huioyaquë'. Con bala ben' use'ela' xan' layela bë'yaquë' zi', ibalayaquë' bë'tiyaquë'.

⁶ Bizi ga beyudyicala uzu tu zi'i xan' layela, lega nedyë'ënë' lëbë'. Na' use'elë' zi'inë' unë': “Decazide gapala'nyaquë' zi'ina'.” ⁷ Pero bë' blë'ë yaca ben' naca ladyinë'ë layela babdyin zi'i xa'nyaquë', na'ra unayaquë' rëbiyaquë' lague'dyiaquë': “Bi' niga, gaca quiebi' layu niga cati bagati xuzibi'. Uletza' gutirobi' cuenda si'ro layu niga gacan quiero.” ⁸ Na' bë'xoyaquë'bi' bë'tiyaquë'bi', ulioyaquë'bi' gan' de layela.

⁹ Na'ra unaba Jesús yaca benë' nita' na' unë':

—¿Cabizi reya'ala' hue ben' naca xan' layela? Decazide huedyinnë' gan' de layela quienë' ta gutinë' yaca ben' nu'enë' ladyinë'ë, hue'në' yaca ben' tula gaca ladyina'ayaquë' layela quienë'.

¹⁰ Lëscan' una Jesús rëbinë' leyaquë':

—¿Binena'le ca rnën lë'ë guichi quie Diuzi? Cani rnën:

Yo laga' ta baoru'un yaca ben' hue huëcua', lëyo na' besi' Diuzi bzunë'n ga naca belao, ga rzulao bezu.

¹¹ Cana' bë' Diuzi.

Nacan tadya'a gula.

Nacan zi' ta yebanziro.

¹² Na'ra gu'unyaquë' guxuyaquë' Jesús udze'yaquë' lëbë' lu'u dyiguiba como dan' gucabë'yaquë' unë' Jesús di'idza' na' condre leyaquë'. Pero como dan' bdzebiyaquë' bi hue yaca benë' quieyaquë', psanyaquë' quienë', beza'yaquë' zeyoyaquë'.

Unabayaquë' Jesús ca naca quie impuesto
(Mt. 22.15-22; Lc. 20. 20-26)

¹³ Ude beyudyi na', use'ela'yaquë' chopa tzona ben' naca partido fariseo len ichopa tzona ben' naca partido quie rey Herodes ta tzenabayaquë' Jesús di'idza' ta hueyaquë' trampa quienë' chi biguionë' lao di'idza' quienë' ta saque' gaoyaquë' lëbë' xquia. ¹⁴ Quie lena' bdyinyaquë' gan' zë Jesús unayaquë' rëbiyaquë' lëbë':

—Maestro, banezindo' luè' rusèdio' yaca benè' di'idza' naca li. Na' biru' cuenda bi naque yaca benè' sino rusèdio' leyaquè' tali xneza Diuzi. Unacara nètò': ¿Ru'en lato quízoro quie impuesto quie ben' naca gobierno romano? ¿Reya'ala' quízoron o chi bireya'ala' quízoron?

¹⁵ Pero gucabè' Jesús ca naca pensari mala yu'uyaquè' birueyaquè' ca rnayaquè'. Na' unè' rëbinè' leyaquè':

—¿Bixquien' re'enle cuèchile trampa quia'? Uletzexi' tu dumi plata ta ina'a.

¹⁶ Na'ra yexi'yaquè' tu dumi plata. Na' caora blè'èn'è'n, unè' rëbinè' leyaquè':

—¿Nu guicho, nu laohue da' lè'èn'?

Na' bequëbiyaquè' unayaquè' Jesús:

—Da' lè'èn' guicho laohue ben' naca gobierno quie ben' romano.

¹⁷ Na'ra una Jesús rëbinè' leyaquè':

—Ulehue' ben' naca gobierno ta redu'ulanè' si'nè'. Lëscan' ulehue' Diuzi ta redu'ulanè' si'nè'.

Na' tu bebanziyaquè' can' unè'.

Unabayaquè' Jesús quie ben' baguti beban

(Mt. 22.23-33; Lc. 20.27-40)

¹⁸ Tana' uyorè yaca ben' partido Saduceo gan' zè Jesús. Na' leyaquè' rnayaquè' biyeban yaca ben' baguti. Quie lena' unayaquè' rëbiyaquè' Jesús:

¹⁹ —Maestro, ca naca di'idza' bzu Moisés lè'è guichi, rnèn chi baguti tu be'mbyu, na' bega'n' zgulanè' tu cuinzè', nunu zì'iyaquè' uzu, reya'ala' yezi' bichinè' nigula quie ben' baguti tacuenda yezu xcuidi' yezi' lao ben' baguti. ²⁰ Na' ugunro guca gadyi bichiyaquè'. Na' ben' nèro uzi'nè' nigula quienè'. Pero ni tu zì'iyaquè' biuzu gutinè'. ²¹ Na' bizi ben' urupe bezi'nè' nigula quie ben' bichinè', ben' baguti. Lèzi gutirènè', nunu zì'iyaquè' uzurè. Na' bizi ben' uyune bezi'rènè' nigula quie ben' bichinè', ben' baguti. Lèzirè gutirènè' nunu zì'iyaquè' uzurè. ²² Cana' guca quie lao gadyiteyaquè', yaca ben' uzulè nigula. Gabeyudyicala quie nigula gutirènè'. ²³ Na'ra chi tali na' yeban yaca ben' huati, ¿ca nurlayaquè' naca zgulayaquè' nigula na', como dan' lao gadyi bichiyaquè' uzulèyaquè' lèbè'?

²⁴ Na' bequëbi Jesús rëbinè' leyaquè':

—Lega nequixile como dan' binezile cabè' rnèn lè'è guichi la'iya quie Diuzi. Lëscan' binezile cabè' naca yela' huaca quie Diuzi. ²⁵ Cati babeban yaca ben' baguti, na' bira sulèyaquè' laguediyayaquè' ca zgulayaquè', ca xquiuyaquè'. Gaca quieyaquè' ca quie yaca ángel quie Diuzi, ben' yu'uyaca guibá. ²⁶ Pero quie ben' baguti yeban, ¿binelabale lè'è guichi la'iya quie Diuzi cabè' gudyi Diuzi Moisés dza na' caora uzè Moisés gan' re' yaga ra'ala' gui' birena? Lëgan' na' una Diuzi rëbinè' Moisés: “Naca' Diuzi quie xuzixta'olo' Abraham, len quie xuzixta'olo' Isaac, len quie xuzixta'olo' Jacob.” ²⁷ Cana' una Diuzi gudyinè' leyaquè', ba'ala'cazi bagutiyaquè' azio zè iza caora. Lena' rulu'en rlè'è Diuzi leyaquè' ca ben' neneban, quele ca ben' baguti. Tana' lena' lega nequixile.

Una Jesús quie tu mandamiento r nabè'ra

(Mt. 22.34-40)

²⁸ Na'ra bdyinrè tu ben' rusèdi ley quie Moisés. Dyè'èdi babenè' cabè' di'idza' bequëbi Jesús yaca benè'. Na' como nezinè' dyè'èdi requèbi Jesús bi pregunta rnaba yaca benè', unè' rëbinè' lèbè':

—¿Ca nurla mandamiento r nabè'ran ra'o hue quiero len?

²⁹ Na' una Jesús rëbinè' lèbè':

—Cani naca mandamiento r nabè'ran ra'o: “Ulezècara nagale, le'e ben' Israel. Tuzi Diuzi quiero zu, ganura Diuzi tula zu. ³⁰ Reya'ala' idyè'èro Diuzi quiero du guicho du la'adyi'ro.” Lena' naca mandamiento r nabè'ran ra'o. ³¹ Lëscan' derè itu mandamiento nacan belo reya'ala' hue quiero. Cani rnèn: “Reya'ala' idyè'èro laguedyiro cabè' nedyè'èro cuinro.” Tuzi len naca mandamiento r nabè'ra quiero, hue quiero len.

³² Na'ra una ben' rusèdi ley quie Moisés rëbinè' Jesús:

—Tahuen gula na' cabè' unao', Maestro. Nacan tali unao' tuzi Diuzi zu, ganura Diuzi tula zu. ³³ Lëscan' zaca'ran lao Diuzi idyè'èronè' du guicho du la'adyi'ro, lëscan' idyè'èro laguedyiro ca nedyè'èro cuinro. Lena' zaca'ran lao Diuzi quele ca yaca bia rutiro ruzeiro ru'aba ta hue'roba' Diuzi.

³⁴ Na'ra caora be Jesús cabè' di'idza' dya'a una ben' na', na' unè' rëbinè' lèbè':

—Ilè'èti'zi nerdzioguelo' gaco' ben' tzu'u guibá ga r nabè' Diuzi.

Na'ra nitu yaca ben' nita' na' beyazoyaquè' inabayaquè' lèbè' di'idza' mazara.

Naca ben' Cristo Señor quie rey David

(Mt. 22.41-46; Lc. 20.41-44)

³⁵ Na'ra rusèdi Jesús yaca ben' bdupa lu'u idao' r nabè'ra, unè' rëbinè' leyaquè':

—¿Ca biži ina yaca ben' rusèdi ley quie Moisés, como nayaquè' naca Cristo ži'isuba rey David? ³⁶ Porque cuin rey David, du yu'unè' Bichi Be quie Diuzi, unè' cani: Una Diuzi rëbinè' ben' naca Señor quia': "Ure' cuèta' zaquè' yebè niga hasta idyin dza cùècha' xni'alo' yaca ben' rudie luè'."

³⁷ Quie lena' r naba' le'e, ¿cómo naca Cristo ži'isuba rey David, chi cuin rey David unè' naca Cristo Señor quienè'?

Biži lega redaohue yaca benè' can' una Jesús.

Udao Jesús xquia yaca ben' rusèdi ley quie Moisés

(Mt. 23.1-36; Lc. 11.37-54; 20.45-47)

³⁸ Na'ra ca rusèdi Jesús yaca benè', unè' rëbinè' leyaquè':

—Gapale cuidado bihuele ca rue yaca ben' rusèdi ley quie Moisés. Lega rexeyaquè' la'ari' naca tona. Lega rexeyaquè' gapala'n yaca benè' leyaquè' ga rdayaquè' tu neza.

³⁹ Lega rexeyaquè' cue'yaquè' ga rbe' ben' bala'ana chi lu'u idao' sinagoga, chi ga raca lani. ⁴⁰ Židza rulidzayaquè' Diuzi cuenda ilè'è yaca benè' leyaquè' ben' quie Diuzi, pero bè' rueziaquè' dan' regulola'adyi'yaquè' bi hueyaquè' ta cubayaquè' ta de quie yaca nigula baguti xquiuhue. Quie lena' huera Diuzi leyaquè' tu castigo huala gula.

Una Jesús quie tu nigula guti xquiuhue bdze'nè' gun quie idao'

(Lc. 21.1-4)

⁴¹ Na' guca tu dza zè Jesús lu'u idao' r nabè'ra blè'ènè' rudze' yaca benè' dumi quieyaquè' lu'u caja ga yu'un gun quie idao'. Blè'ènè' rudze' zè ben' uña'a yalao dumi lu'u caja na'.

⁴² Lëscan' blè'ènè' bdze' tu nigula guti xquiuhue chopa dumi dao' lasi de cobre ta zaca'n ledao'zi lu'u caja na'. ⁴³ Na'ra guži Jesús yaca ben' quie', unè' gudyinè' leyaquè':

—Tali rnia' le'e, nigula na' naquè' ben' yèchi' gula, aguti xquiuhue', pero ca naca dumi bdze'nè' lu'u caja, nacanaran dumi že quele ca ta bdze' yaca ben' uña'a. ⁴⁴ Ta bega'nnan sobre quieyaquè' bdze'yaquè' lu'u caja na'. Pero lë'nigula ben' yèchi', bdze'nè' ca tu dumi dao' dezi quienè' ta ra'onè' ta raonè'.

13

Una Jesús huabiagui' idao' r nabè'ra

(Mt. 24.1-2; Lc. 21.5-6)

¹ Na'ra cati bro Jesús lu'u idao' r nabè'ra, unè' tu ben' quienè' rëbinè' lëbè':

—¡Maestro, una' ca naca badan yo necua' besu, una' ca naca badan idao' r nabè'ra.

² Pero na' una Jesús rëbinè' lëbè':

—Bablè'èlo' ca re' idao' r nabè'ra niga nacan taže. Pero huadyin dza ni tu yo bira yega'nnan lao laguedyin, huabiagui' dužeten.

Ga ru'en di'idza' cabè' gaca cati baruen bago iyudyi dylayau

(Mt. 24.3-28; Lc. 21.7-24; 17.22-24)

³ Na'ra uza'yaquè' žioyaquè' ga zu ya'a Olivos tzala' berobayu gan' re' idao' r nabè'ra. Biži na' caora ure' Jesús gan', bebiga' Pedro, len Santiago, len Juan, len Andrés, beroyaquè' tzala'la len Jesús unayaquè' rëbiyaquè' lëbè':

⁴ —Re'enndo' inao' nèto' bata gaca can' unao'. ¿Cabizi seña gata' cati baruen bago iyudyi yedyi layu?

⁵ Na' una Jesús rëbinè' leyaquè':

—Gapale cuidado tacuenda nunu si' le'e yè', ⁶ porque huida ben' zè inayaquè' nun quia' bidayaquè', inayaquè' nacayaquè' Cristo, pero yè' rzi'yaquè'.

⁷ Pero cati rele rna yaca benè' raca dila yaca yedyi len yaca yedyi tula, rnyaquè' ruen žudyi gaca dila mazara yedyi, biidzèbile, porque re'en ca re'ena gacan can', pero nezura ta gaca tu bineyudyi yedyi layu. ⁸ Huadila yaca yedyi conlè yaca yedyi tula, huadila yaca gobierno conlè yaca gobierno tula. Gaca uzu' ni'nila. Lëzi huata' ubin, huata' žèdi lao yedyi layu. Pero cala beyudyi na' ta yedzagalao yaca benè', dechan' uzulaozin na' cabè' ta yedzagalaoyaquè'.

⁹ 'Gapale cuidado porque usedyin yaca benè' le'e lao na'a yaca ben' r nabè', lëscan' huaguiaquè' le'e lu'u yaca idao' sinagoga. Usedyinyaquè' le'e lao yaca ben' naca gobernador, len lao yaca ben' naca rey ta uquèpiyaquè' le'e dan' naole hue quiele xti'idza'. Cana' huaguixogue' leyaquè' xti'idza' Diuzi tanun quia' nè'èdi'. ¹⁰ Žayeyudyi quie yedyi layu, huaguixogue' yaca benè' xti'idza' Diuzi duže yedyi layu. ¹¹ Lëscan' cati tzhèua'ayaquè' le'e lao na'a yaca ben' r nabè', bidèbile quie biži dan' yèbileyaquè', ni siquiera bihuele pensari. Yèbileyaquè' ca di'idza' udze' Diuzi guichole lèhora na', porque quele le'e cuinle inèle, dechan' Bichi Be quie Diuzi gunnè' ta yeyèbileyaquè'. ¹² Lëscan' usedyin benè' hasta bi'

bichiyaquë' lao na'a yaca ben' rñabë' ta gutiyaquë' leyaquë'. Lëzi usedyin benë' zi'iyacuë' lao na'a ben' rñabë', hasta usedyin yaca xcuidi' xuzi zna'yaquë' cuenda guti yaca ben' rñabë' leyaquë'. ¹³ Huadie yaca ben' nita' lao yedyi layu le'e, dan' naole xneza'. Pero nu ben' nao në'ëdi' du guicho du la'adyi', ben' biusan në'ëdi' hasta dza gatië', huata' yela' neban quienë' tuzioli.

¹⁴ Bzu profeta Daniel di'idza' lë'ë guichi dza tiempote rguixogue'n quie ta naca bay-atza gula, ta rudyiagui' benë'. (Reya'ala' tzioñe'e nu ben' rulaba di'idza' ni.) Caora ilë'ële badyian ga bireya'ala' cuian, na' racate baguin izuno yaca ben' nita' estado Judea tzioyaquë' ga zu ya'a. ¹⁵ Lëscan' lëdza na', chi nita' yaca benë' lali'a quie yu'u quieyaquë', bireya'ala' yeyu'uyaquë' lu'u yu'u ta si'yaquë' bi cosa quieyaquë', reya'ala' laizunoteyaquë'. ¹⁶ Lëzi chi nita' yaca benë' layela quieyaquë' rueyaquë' dyin, bireya'ala' yeyoyaquë' zan yu'u ta si'yaquë' ni zabayaquë', reya'ala' laizunoteyaquë'. ¹⁷ Gaca beyëchi' gula quie yaca nigula nu'a zi'ine len yaca nigula ruga'adyi' zi'ine dza gaca can' rnia'. ¹⁸ Ulidzale Diuzi ta bigaca quiele izunole biu' zaga. ¹⁹ Cana' rnia' como dan' baza' dza lega huala gula yedzagalao yaca benë'. Na' yedzagalaorayaquë' quele ca yaca los demás benë'. Desde ulëchi Diuzi dyilayu, bibedzagalao yaca benë' cabë' yedzagalao yaca ben' nita' dza yeyudyi yedu quie yedyi layu. ²⁰ Chi bihue Diuzi uchugunë' dza yedzagalaoyaquë', ni tuyaquë' bisueyaquë', huabiagui' yuguluyaquë'. Pero huachugu Diuzi dza na' nun quie nedyë'ënë' yaca ben' quienë', ben' ulioguë' gaca ben' quienë'.

²¹ Chi ina yaca benë' rëbiyaquë' le'e: "Ulena'cara, ni zu Cristo", o "Ulena'cara, na' zu Cristo", bigalele quieyaquë'. ²² Huida yaca ben' huizi' yë' inayaquë' nacayaquë' Cristo, inayaquë' nacayaquë' ben' rguixogue' xti'idza' Diuzi. Hueyaquë' milagro, hueyaquë' seña tacuenda si'yaquë' yë' hasta yaca ben' ulio Diuzi. ²³ Pero le'e, ulehue listo. Lena' baonia' le'e ca ta binegaca quiele cuenda inezile sule listo.

Cabë' gaca bë' yeguida Jesús, ben' naca bichi yugulu benë'

(Mt. 24.29-35, 42-44; Lc. 21. 25-36)

²⁴ Pero lëdza na', cati beyudyi bedzagalaotzegue yaca benë', huechula obidza bira gata' xni' quie te dza, lëscan' huechula biu' bira gata' xni' biu'. ²⁵ Lëscan' huaguinu yaca beló dyian guibá. Huazisi yugulu ta dyia guibá huaguinun. ²⁶ Na'ra hualë'ë yaca benë' në'ëdi', bichi yugulu benë'. Hualë'ëyaquë' yeguida' lao beo zë ladza, zeyu'a yela' huaca quia'. ²⁷ Na' ise'ela' yaca ángel quia' ta tzetupayaquë' yaca ben' quia', yaca ben' ulioga', la'acazi nita'yaquë' zitu' lao yedyi layu, la'acazi nita'yaquë' zitu' guibá —Cana' una Jesús.

²⁸ Lëscan' una Jesús rëbinë' leyaquë':

—Ulehue pensari cabë' naca quie yaga higo. Caora badyia benue len la'aga' cubi quien, banezile baza' biu' yo. ²⁹ Lëscan' caora rlë'ële baraca lao yedyi layu cabë' rnia' le'e niga, huanezile baza' bago dza yeyudyi dyilayu, ilë'ëti'zi rdziogue. ³⁰ Tali rnia' le'e, tu bineya zi'i suba ben' nita' na'a bë' gaca cabë' baonia' le'e. ³¹ Huade quie ta dyia guibá len lao yedyi layu cana'zi, pero ca naca di'idza' rnia', biten cana'zi. Decazide gacan.

³² Pero ca bi hora, ca bi dza yeguida' tatula, nitu nunu nezi. Binezi yaca ángel zu guibá, binezi ni siquiera në'ëdi', zi'i Diuzi. Tuzi Xuza' Diuzi nezinë' bë' gaca yeguida' tatula.

³³ Quie lena' ulesu listo, gapale cuidado, uleulidza Diuzi yugu dza como dan' binezile bë' yeguida' lao yedyi layu. ³⁴ Banaca quia' ca quie tu ben' uza' zio zitu'. Caora binetzionë', rca'nnë' mozo quië' zan yu'u quië' ta gapayaquë' ta de quienë', bë'në' bi dyin hueyaquë'. Lëscan' pca'nnë' tu mozo ta së' cuëta ru'a yu'u ta cuezë' bë' yela'në'. ³⁵ Ulesu listo como dan' binezile bë' yeguida' tatula. Binezile chi yeguida' zadzë', chi yeguida' du gatzo yela, chi yeguida' cati rbedyi biu, chi yeguida' du zila. ³⁶ Gapale cuidado ta sule puesto caora yeguida'. ³⁷ Ca ta rnia' le'e, lëscan' rñeria' yugulu benë': Ulesu listo.

14

Beguilola'adyi'yaquë' bi hueyaquë' ta gutiyaquë' Jesús

(Mt. 26.1-5; Lc. 22.1-2; Jn. 11.45-53)

¹ Na'ra ichopa dza gala' lani pascua cati gaoyaquë' yëta xtila binequixi levadura. Na' beguilola'adyi' yaca xan' pxuzi len yaca ben' rusëdi ley quie Moisés bi hueyaquë' ta guxuyaquë' Jesús balarazi gutiyaquë' lëbë'. ² Na' unayaquë' rëbiyaquë' laguedyiyaquë':

—Biguxuro Jesús tu raca lani cuenda na' biidza' yaca ben' yedyi bitilalëyaquë' ra'o.

Bdze' tu nigula aceite rla' zixi zeo guicho Jesús

(Mt. 26.6-13; Jn. 12.1-8)

³ Na'ra caora bedyin Jesús lënë' yaca ben' quië' yedyi Betania, na' uyu'unë' lidyi tu ben' lao Simón, ben' yu'u yela' hue' ca pindo. Bi'zi caora bare'yaquë' lao mesa gaoyaquë', bdyin tu nigula nu'ë frasco de yo laona alabastro. Lu'u frasco na' nedza'n tubelaozi aceite rla' zixi zeo laonan nardo. Na' aceite na' ruhueyaquë'n dyin rla'oyaquë'n yaca ben' huati. Na' ula'

nigula frasco na' blatoguè' aceite guicho Jesús. ⁴ Na' bala ben' re' na' bdza'yaquè' unayaquè' rëbiyaquè' laguedyiaquè':

—¿Bixquien' bedito nigula ni aceite? ⁵ Mejorla chi bëti'nèn' como dan' zaca'n tzona gayuhua dumi denario tacuenda si'nè' dumi hue'nèn' yaca ben' yèchi'.

Na' udilayaquè' nigula na'.

⁶ Pero na' una Jesús rëbinè' leyaquè':

—Ulesan quie nigula. ¿Bixquien' ruelëlenè' zèdi? Tadya'a gula babènè' quia'. ⁷ Nita'cazi yaca ben' yèchi' conlè le'e yugu dza. Con batatezi re'enle, huaca gacalèle leyaquè'. Pero në'èdi' bisua' len le'e tuzioli. ⁸ Ca ta huaca hue nigula ni, cana' bènè' quia'. Badyialaonè' blatoguè' aceite rla' zixi zèo cuerpo quia' quie dza gatia' igacha'. ⁹ Tali rnia' le'e, con gatatezi rguixogue' yaca benè' xti'idza' Diuzi duze yedyi layu, huanëyaquè' cabè' bë nigula ni para në'èdi', cana' yeza'la'adyi' yaca benè' cabè' bènè' quia'.

Bega'nlè Judas di'idza' len yaca xan' pxuzi ta usedyinnè' Jesús lao na'ayaquè'
(Mt. 26.14-16; Lc. 22. 3-6)

¹⁰ Na'ra uyo Judas Iscariote yegue'lènè' yaca xan' pxuzi di'idza' cuenda yega'nlènè' leyaquè' di'idza' ta usedyinnè' Jesús lao na'ayaquè'. Na' naca Judas ben' quie Jesús entre chipchopa ben' naca ben' quienè'. ¹¹ Na' legà bedaohue yaca xan' pxuzi cabè' gudyi Judas leyaquè'. Bega'nlëyaquè' lèbè' di'idza' ta hue'yaquè' lèbè' dumi. Na'ra uzulao Judas beguilola'adyi'nè' bi huenè' usedyinnè' Jesús lao na'a yaca xan' pxuzi.

Udaoyaquè' rtze' quie lani pascua

(Mt. 26.17-29; Lc. 22.7-23; Jn. 13.21-30; 1 Co. 11.23-26)

¹² Bizi dza nèro quie lani pascua udaoyaquè' yèta xtila binequixi levadura, bëtiyaquè' tu beco' zi'ila' ta beza'la'adyi'yaquè' ca guca quie xuzixta'oyaquè' dza uza'yaquè' nación Egipto. Lèdza na' una yaca ben' quie Jesús rëbiyaquè' lèbè':

—¿Gaži re'enlo' tziondo' tzaquendo' ta gaoro rtze' quie lani pascua?

¹³ Na'ra use'ela' Jesús chopa ben' quienè' gudyinè' leyaquè':

—Uleyo ciudad Jerusalén. Bè' baidyinle hualè'èle tu be'mbyu zeyu'a tu re'e yudzon nisa. Lèben' na' reya'ala' inaole. ¹⁴ Cati babeyu'unè' lu'u yu'u, reya'ala' yèbile xan' yu'u ga beyu'unè': “Cani una Maestro: ¿Gaži zu lu'u cuarto ga gaolènè' yaca ben' quiè' rtze' quie lani pascua?” ¹⁵ Na'ra hualu'e xan' yu'u le'e tu lu'u cuarto naca chopa xcuia. Lègan' na' tzaquèle ta gaoro.

¹⁶ Na' uza' chopa ben' quie Jesús zioyaquè' ciudad Jerusalén. Caora bedyinyaquè' guca quieyaquè' laga ca gudyi Jesús leyaquè' gaca. Na' tu lu'u cuarto na' bëyaquè' ta gaoyaquè' rtze' quie lani pascua.

¹⁷ Caora bagula, bedyin Jesús lènè' yaca ben' quiè' gan' gaoyaquè'. ¹⁸ Na' cati baore'yaquè' ta gaoyaquè', una Jesús rëbinè' yaca ben' quiè':

—Tali rnia' le'e, ladoro ni re' tu ben' raolèro tuze, ben' usedyin në'èdi' lao na'a yaca ben' rnabè'.

¹⁹ Bizi uzulao raqueyèchi'yaquè' uzulaoyaquè' rnabayaquè' tu huioyaquè' lèbè':

—¿Quele në'èdi' hua' cabè' nao' na'?

²⁰ Na' una Jesús rëbinè' leyaquè':

—Entre lao chipchopale niga, huro tu ben' laguedyiro hue can' rnia'. Tzaže rudyilènè' në'èdi' yèta xtila lu'u plato niga. ²¹ Pues cani gaca quia' në'èdi', bichi yugulu benè', decazide gaca quia' cabè' na lè'è guichi la'iya quie Diuzi. Pero bayèchi' gula gaca quie ben' usedyin në'èdi' lao na'a ben' rnabè'. Nacaran dya'a quienè' chi bigolocalanè'.

²² Tu neraoyaquè' rtze', uzi' Jesús tu yèta xtila, bëla'yanè'n bzužunè'n udisinè'n bë'nèn' yaca ben' quiè'. Na' unè' gudyinè' leyaquè':

—Ulegaona. Naca yèta xtila niga ca quie cuerpo quia'.

²³ Lèzi uzi' Jesús tu vaso nisa bedzuli'. Beyudyi bëla'yanè'n, bë'nèn' yaca ben' quiè' tu huioyaquè' lao yuguluyaquè'. ²⁴ Na'ra una Jesús rëbinè' leyaquè':

—Naca nisa bedzuli' ni ca quie ren quia'. Lena' ilatoga' gatia' cuenda yega'ntza'olè Diuzi le'e tacubila. Lena' ilatoga' cuenda gata' yela' huezi'ze quie ben' zè lao Diuzi. ²⁵ Tali rnia' le'e, bira yo'oga' vino nisa bedzuli' tatula. Hasta idyin dza zulèle në'èdi' ga rnabè' Diuzi, na'tera yo'oga' tacubi tatula.

Unè Jesús cabè' hue Pedro huananè' binubè'nè' lèbè'

(Mt. 26.30-35; Lc. 22.31-34; Jn. 13.36-38)

²⁶ Ude beyudyi bilayaquè' tu alabanza, na' uza'yaquè' zioyaquè' ga zu ya'a Olivos.

²⁷ Na'ra una Jesús rëbinè' leyaquè':

—Yugulule usanla'adyi'le në'èdi' na'ayela. Cabè' rnèn lè'è guichi la'iya quie Diuzi cani: “Hua' mandado gati ben' naca xa'n zi'ila', na' yedzatza yaca beco' zi'ila' quienè'.”

²⁸ Pero cati bagutia' bebana', na'ra huabialaohua' laole tu neza Galilea.

²⁹ Na' una Pedro rëbinë' lëbë':

—Ba'ala'cazi usanla'adyi' yugulu benë' le'e, pero në'ëdi' biusanla'adya' luë'.

³⁰ Na' una Jesús rëbinë' Pedro:

—Tali rnia' luë'. Na'ayela, cati zacuedyi biu chopa lasa, huëbo' yaca benë' binubë'lo' në'ëdi' tzona lasa.

³¹ Biži unë Pedro du guicho du la'adyi'në' rëbinë' Jesús:

—Ba'ala'cazi re'ennan gatilia' luë' tuže, pero biyëpa' yaca benë' binubë'da' luë'.

Na' lëscan' cana' una yaca los demás ben' quië' con ca beyaquë' gudyi Pedro Jesús.

Bë'lë Jesús Diuzi di'idza' ga lao Getsemaní

(Mt. 26.36-46; Lc. 22.39-46)

³² Na' uza'yaquë' zioyaquë' bdyinyaquë' tu ga lao Getsemaní. Na' una Jesús rëbinë' leyaquë':

—Ulecueza ni. Huaya'a ta hue'lia' Diuzi di'idza'.

³³ Biži uquië'në' Pedro, len Santiago, len Juan, uza'yaquë' ilë'ëti'. Caora bdyinyaquë' na', lega uzulaon rutëbin lëbë', lega gucayëchi'tzeguenë'. ³⁴ Lena' una Jesús rëbinë' leyaquë':

—Lega raqueda' bayëchi'. Baruen gutin në'ëdi'. Ulecueza në'ëdi' niga. Bigasile.

³⁵ Na'ra udenë' ilë'ëti' gan' nita' yuna ben' quië', gutanë' ruzu ru'ala layu, blidzë' Diuzi chi bisaque' ucachi' ucui'o Diuzi ca tazëdi gula za' gaca quië'. ³⁶ Na' blidzë' Diuzi unë':

—Xuza' Diuzi, huaco' huelo' yugulute. Ucachi' ucui'olo' ca tazëdi gula za' gaca quia'. Pero bihuelo' cabë' re'enda' në'ëdi', huelo' cabë' re'encazo' gaca.

³⁷ Na'ra uyasa Jesús beza'në' bedyinnë' gan' de yuna ben' quië', blë'ënë' barasiyaquë'. Na' una Jesús rëbinë' Pedro:

—Simón, ¿barasio'? ¿Quele biuzuelo' ina'huialo' ni tu hora? ³⁸ Bigasile. Ruen zi ulidzale Diuzi tacuenda bihue taxi'ibi' le'e gan huele xquia' ca tazëdi gula baza' quiele. Tali re'enle huelële në'ëdi' tuže, pero nerdzioguele fuerza ta huele cabë' re'enle.

³⁹ Na'ra zio Jesús tatula gan' baoyoguë', na' blidzë' Diuzi tatula unë' gudyinë' lëbë' ca di'idza' unë' tanëro. ⁴⁰ Na' beza'në' bedyinnë' tatula gan' de yuna ben' quië'. Blë'ënë' nerasiyaquë' nun quie dan' yu'u bichi gula laojë'. Lena' bibequëbiyaquë' ca di'idza' gudyi Jesús leyaquë'. ⁴¹ Na' uza' Jesús zionë' tatula ta hue'lënë' Diuzi di'idza'. Caora bedyinnë' ta beyuna lasa gan' de yuna ben' quië', unë' rëbinë' leyaquë':

—Na'a sí, tahuencazi gasile yezila'adyi'le. Zelao tu cana'zi. Babdyin hora usedyinyaquë' në'ëdi', ben' naca bichi yugulu benë', lao na'a yaca ben' de dula' xquia quie. ⁴² Ulechasa, tzioro. Baza' ben' usedyin në'ëdi' lao na'ayaquë'.

Bëxyaquë' Jesús bëyaquë' lëbë' preso

(Mt. 26.47-56; Lc. 22.47-53; Jn. 18.2-11)

⁴³ Biži bineyudyi ina Jesús cana', caora labdyinte Judas, ben' naca ben' quie Jesús lado chipchopa ben' quienë'. Na' bdyinlënë' ben' zë, ben' use'ela' yaca xan' pxuzi, len yaca ben' rusëdi ley quie Moisés, len los demás yaca ben' rnabë'. Nu'ayaquë' macheta len yaga. ⁴⁴ Na' bega'nle Judas leyaquë' di'idza' huenë' seña ta ulu'enë' leyaquë' nu ben' naca Jesús. Lena' unë' gudyinë' leyaquë':

—Nu ben' gaohua' xague psitu, lëben' na' naca Jesús. Laguxutelenë' iquië'lenë' dyë'ëdi.

⁴⁵ Na' ca bdyinnë' gan' zë Jesús bebiga'në' unë' rëbinë' lëbë':

—Maestro, Maestro.

Na'ra udaohuë' psitu xaguë'. ⁴⁶ Caora na' bëxyaquë' Jesús bëyaquë' lëbë' preso.

⁴⁷ Biži ulio tu ben' quie Jesús macheta quienë' udinë'n uchugunë' naga criado quie ben' rnabë'ra quie yaca xan' pxuzi. ⁴⁸ Na'ra una Jesús rëbinë' yaca ben' nita' na':

—¿Barza'le nu'ale macheta, nu'ale yaga ta guxule në'ëdi' huele në'ëdi' preso ca quie ta guxule huele preso tu ben' uban? ⁴⁹ Yugu dza zulia' le'e lu'u idao' rnabë'ra psëdia' yaca benë', pero bibëxule në'ëdi' caora na'. Pero re'en ca re'ena uzun xti'idza' Diuzi ca rnën lë'ë guichi la'iya quie Diuzi.

⁵⁰ Na'ra yaca ben' quie Jesús psanla'adyi'yaquë' lëbë', bžunoyaquë'.

Bžuno tu ben' ru'abe du guidinë'

⁵¹ Biži bdyin tu bi'byu gan'. Na' nadubinë' tu la'ari' yua' naonë' Jesús. Biži na' bëxyaquë' lëbë', ⁵² pero udubanë' la'ari' yua' nadubinë', bžunonë' dú guidinë'.

Zë Jesús lao yaca ben' rnabë'

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Na'ra uquië'yaquë' Jesús ga re' ben' naca xan' pxuzi rnabë'ra. Na' begu'udi' yaca xan' pxuzi, len yaca ben' rnabë', len yaca ben' rusëdi ley quie Moisés. ⁵⁴ Biži unao Pedro Jesús

zitu'la. Bdyinnè' lali'a yu'u quie ben' naca xan' pxuzi r nabè'ra. Na' ure'nè' ru'a gui' len yaca policia ta yedze'enè'.

⁵⁵ Na'ra yaca xan' pxuzi len yaca los demás ben' r nabè', beguilola'adyi'yaquè' ta gaoy-aquè' Jesús xquia cuenda gata' causa gutiyaquè' lèbè', pero biuzaque'yaquè'. ⁵⁶ Balayaquè' unèyaquè' di'idza' falso conlè Jesús, pero biunèyaquè' tuzi ca inèyaquè'. ⁵⁷ Na' uzuli ibalayaquè' unèrèyaquè' di'idza' falso conlè lèbè' rèbiyaquè' laguediyiyaquè':

⁵⁸ —Nèto' bendo' unè' udyiagui'nè' idao' r nabè'ra quie xuzixta'oro, unè' cati gaca lao tzona dza, yeyuenè' idao' r nabè'ra tula, ta bibè yaca benè'.

⁵⁹ Pero nica ca unayaquè' quie idao' r nabè'ra, biuyu'urè' xnezi ca unayaquè'.

⁶⁰ Na'ra uzuli ben' naca xan' pxuzi r nabè'ra unè' rèbinè' Jesús:

—¿Bixquien' birequèbo'? ¿Bi ca nao' quie di'idza' rnèyaquè' conlè luè'?

⁶¹ Pero uzè Jesús chizi, bibequèbinè'. Tatula una ben' naca xan' pxuzi r nabè'ra rèbinè' Jesús:

—¿Naco' ben' Cristo, zi'i Diuzi la'ia?

⁶² Na' una Jesús rèbinè' lèbè':

—Nè'èdi' ze. Lèscan' hualè'èle nè'èdi', ben' naca bichi yugulu benè', cati bari'a zaquè' yebè cuèta lè'è Diuzi, ben' de yela' huaca quie. Lèscan' hualè'èle nè'èdi' cati yeguida' lao yedyi layu tu lao beo zè ladza.

⁶³ Na'ra nun quie dan' lega bdza' ben' naca xan' pxuzi r nabè'ra, pchezè' z abè' unè' rèbinè' yaca ben' nita' na':

—¿Cabizira testigo re'ennan inè conlè ben' niga? ⁶⁴ Babele unè' di'idza' ta inaya'nè' Diuzi. ¿Bizi huero quienè'?

Na' unayaquè' yuguluyaquè' de que reya'ala' gatinè'.

⁶⁵ Na'ra uzulaoyaquè' bda'yaquè' lèbè' zen', pcachi'yaquè' laohuè' udyibiyaquè' lèbè' begoro, unayaquè' gudiyiyaquè' lèbè':

—¡Una nuži udyibi luè' begoro!

Lèscan' udyibirè yaca policia lèbè' begoro.

Una Pedro binubè'nè' Jesús

(Mt. 26.69-75; Lc. 22.56-62; Jn. 18.15-18, 25-27)

⁶⁶ Ga zè Pedro lali'a bdyin tu criada quie ben' naca xan' pxuzi r nabè'ra. ⁶⁷ Bizi caora blè'è bi' criada re' Pedro redzè'ènè' cuèta gui', na' una'bi' lèbè' dyè'èdi unabi':

—Lèzi luè' naco' ben' quie Jesús, ben' yedyi Nazaret.

⁶⁸ Na' una Pedro gudiyinè' lèbi':

—Binubi'a ben' na', nica nezda' bi inao'.

Na' beronè' zènè' cuèta ru'a yu'u. Caora na' uredyi biu tu. ⁶⁹ Bizi tatula una' bi' criada Pedro unèbi' rèbibi' yaca ben' nita' na':

—Naca ben' ni tuze len leyaquè'.

⁷⁰ Pero tatula unè Pedro binubè'nè' Jesús. Na' guca itu chi' cati una yaca ben' nita' na' gudiyiyaquè' Pedro:

—Talicazi naco' tuze len leyaquè', como dan' naco' ben' Galilea rnèlo' ca rnè ben' Galilea.

⁷¹ Na' una Pedro bdze'de'nè' cuinnè' bguntenè' Diuzi gudiyinè' leyaquè':

—Binubi'a nu ben' nale cana'.

⁷² Caora na' laoredyite biu taorupe. Na'ra beza'la'adyi' Pedro cabè' gudyi Jesús lèbè' unè': "Ca zacuedyi biu chopa lasa, huèbo' yaca benè' binubè'lo' nè'èdi' tzona lasa." Caora na' beyuenè' pensari cabè' una Jesús, na' uredyinè'.

15

Zè Jesús lao Pilato

(Mt. 27.1-2, 11-14; Lc. 23.1-5; Jn. 18.28-38)

¹ Caora baoyani' dza tula, bedupa yaca xan' pxuzi, len yaca ben' gula, len yaca ben' rusèdi ley quie Moisés, len yaca los demás ben' r nabè', bëyaquè' junta. Pquioyaquè' Jesús uquiè'yaquè' psedyinyaquè' lèbè' lao na'a Pilato. ² Na' unaba Pilato rèbinè' Jesús:

—¿Tabala naco' rey quie ben' Israel?

Na'ra bequèbi Jesús rèbinè' Pilato:

—Ca unao', cana' naca' quia'.

³ Bizi na' udao yaca xan' pxuzi Jesús xquia ze. ⁴ Lena' una Pilato rèbinè' Jesús:

—¿Bixquien' birequèbo'? Huala rao yaca ben' niga luè' xquia.

⁵ Pero bega'n Jesús chizi, bibequèbinè'. Quie lena' biubin Pilato bi pensari huenè' quie Jesús.

Pchugubè'yaquè' gati Jesús

(Mt. 27.15-31; Lc. 23.13-25; Jn. 18.38-19.16)

⁶ Na' de tu costumbre quie Pilato yebionè' tu ben' preso yu'u lu'u dyiguiba tu raca lani pascua. Na' yebio Pilato nutezi ben' re'en yaca benè' yero. ⁷ Na'ra lu'u dyiguiba yu'u yaca ben' bēti benè', ben' udilalē gobierno. Na' yu'urè tu ben' lao Barrabás lu'u dyiguiba, ben' nuelē leyaquè' tuze. ⁸ Na' bdyin yaca benè' ga zē Pilato unabayaquè' chi biyebionè' tu ben' yu'u lu'u dyiguiba según ca naca costumbre. ⁹ Cana' una Pilato rēbinè' leyaquè':

—¿Re'enle yebioga' ben' na naquè' rey quie ben' Israel?

¹⁰ Cana' una Pilato, porque gucabè'nè' yela' zè' quie yaca xan' pxuzi psedyinyaquè' Jesús laohuè'. ¹¹ Na' bega'n yaca xan' pxuzi di'idza' ta yēbiyaquè' yaca benè' ta inabayaquè' yebio Pilato Barrabás. ¹² Na' una Pilato rēbinè' yaca ben' nita' na':

—¿Bizi re'enle hua' quie ben' na naquè' rey quie ben' Israel?

¹³ Na' urediyiya'yaquè' bequēbiyaquè':

—jUda'lo'nè' lè'è yaga cruzo!

¹⁴ Bizi na' una Pilato gudyinè' leyaquè':

—¿Bizi xquia bènè'?

Pero tatula urediyiya'yaquè':

—Uda'lo'nè' lè'è yaga cruzo.

¹⁵ Na'ra como bigu'un Pilato idza' yaca benè' lèbè', bzuè' di'idza' bebioguè' Barrabás lu'u dyiguiba. Lēscan' bènè' mandado qui yaca soldado Jesús guidi, na'tera uda'yaquè' lèbè' lè'è yaga cruzo gatinè'.

¹⁶ Bizi uquiè' yaca soldado Jesús zioyaquè' bdyinyaquè' lali'a quie palacio (di'idza' quieyaquè' laona pretorio). Na' guziyaquè' yaca los demás ben' naca soldado laguēdyiyaquè'. ¹⁷ Caora na' hgacoyaquè' Jesús tu la'ari' morado, bdze'yaquè' tu coron yèchi' guichonè'. ¹⁸ Lēscan' urediyiya'yaquè' ptituyaquè' lèbè' unayaquè':

—jViva rey quie ben' Israel!

¹⁹ Caora na' udiyaquè' yaga guichonè', bda'yaquè' zen' laohuè', ptituyaquè' uditzu zibiyaquè' bëyaquè' ca quie ben' rapala'n lèbè'. ²⁰ Beyudyi ptituyaquè' lèbè', na' belèchoyaquè' la'ari' morado, begacoyaquè' lèbè' žabè', uquiè'yaquè' lèbè' ta uda'yaquè' lèbè' lè'è yaga cruzo gatinè'.

Bda'yaquè' Jesús lè'è yaga cruzo

(Mt. 27.32-44; Lc. 23.26-43; Jn. 19.17-27)

²¹ Na' du tu neza gan' zioyaquè', bedzagayaquè' tu ben' yedyi Cirene laohuè' Simón, ben' xuzi Alejandro len Rufo. Bezè'è layela ga uyoguè'. Na'ra bē yaca soldado mandado bi'anè' yaga cruzo nu'a Jesús.

²² Na' zioyaquè' bdyinyaquè' ga laona Gólgota (ta inaro xti'idza'ro: Ya'a chita guicho ben' huati). ²³ Bizi bē'yaquè' lèbè' vino nequixi tasla' gula laona mirra, pero bigu'unnè' yo'onè'n. ²⁴ Na'ra bda' yaca soldado lèbè' lè'è yaga cruzo. Te beyudyi na', bëyaquè' sorteo ca nu xlažoyaquè' gaca quieyaquè' žaba Jesús.

²⁵ Baruen las nueve te dza cati bda'yaquè' Jesús lè'è yaga cruzo. ²⁶ Na' guicho cruzo bdyiyaquè' tu letrero ga rguixogue'n bi causa de quienè' dan' bētiyaquè' lèbè'. Lè'è letrero rnēn caniga: “Rey quie ben' Israel.” ²⁷ Lēzi bda'rēyaquè' chopa ben' uban lè'è yaga cruzo. Bzuyaquè' tun zaquè' yebè' cuēta Jesús, itun bzuyaquè' zaquè' yega'la. ²⁸ Cana' guca quienè' bzun di'idza' ca rnēn lè'è guichi la'iya quie Diuzi cani: “Pscayaquè' lèbè' ca ben' mala.”

²⁹ Na'ra ptasi bnio yaca ben' rede gan' neda' Jesús lè'è yaga cruzo. Urediyiya'yaquè' tu rtulazi guichoyaquè' unayaquè' rēbiyaquè' Jesús:

—Luè' nao' huadyiaguilo' idao' r nabè'ra, na'tera yecubo'n gaca lao tzona dza, ³⁰ psela cuinlo', beyēzi lè'è yaga cruzo.

³¹ Lēscan' ptitu yaca xan' pxuzi len yaca ben' rusēdi ley quie Moisés lèbè', unayaquè' dudyiyaquè' laguēdyiyaquè':

—Pselanè' ben' tula, na' bigaquè' uselanè' cuinnè'. ³² Chi Cristo luè', chi rey quie ben' Israel luè', beyēzi lè'è yaga cruzo ilè'èndo', na'tera galendo' quio'.

Hasta ichopa yaca ben' neda'lè yaga cruzo cuēta lè'è Jesús, ptasi bniorēyaquè' lèbè'.

Ca guca cati guti Jesús

(Mt. 27.45-56; Lc. 23.44-49; Jn. 19.28-30)

³³ Caora barga'ala' la'odza, bechula lao duze ciudad na' hasta reda tzona. ³⁴ Caora na' urediyiya' Jesús unè':

—Eloi, Eloi, ¿lama sabactani? —ta inaro xti'idza'ro: Xuzax' Diuzi, Xuzax' Diuzi, ¿bixquien' bapsanla'adyo' nē'èdi'?

³⁵ Na'ra una yaca ben' nita' bago rēbiyaquè' laguēdyiyaquè':

—Ulezè' nagale, rēžinè' Elias.

³⁶ Na' laziote tu ben' nita' na' yexi'nè' tu ta naca yun' ca ži'ila' laona esponja. Na' bdze'nè'n lu'u vino sla' bzunè'n lao yaga ta bdyinnan sibi ga da' Jesús ta supinè'n. Pero una bala yaca ben' nita' na':

—Psan quienè'. Ya' ina'ro chi guida Elías ta uchizanè' lèbè'.

³⁷ Na'ra uredyia' Jesús gutinè'. ³⁸ Caora na', bre'eza la'ari' na'alan lu'u idao' r nabè'ra, gacan chopla la'a. ³⁹ Na' uzè' xan' yaca soldado zaquè'lao lao Jesús. Caora blè'ènè' cabè' uredyia' Jesús gutinè', unè' rëbinè' laguedyinè':

—Tali naca ben' ni ži'i Diuzi.

⁴⁰ Lèzi lëgan' na' nita'rè yaca nigula rna'yaquè' Jesús zitu'la. Ladoyaquè' na' zu María Magdalena, len María zna' Santiago bi' nèchi', len José, len Salomé. ⁴¹ Lèleyaquè' unaoyaquè' Jesús cati udanè' lao yaca yedyi nebaba Galilea gualèyaquè' lèbè'. Lèzi nita'rè yaca nigula tula, ben' uyolènè' Jerusalén.

Pcachi'yaquè' Jesús

(Mt. 27.57-61; Lc. 23.50-56; Jn. 19.38-42)

⁴² Na' gula rdze' dza bëyaquè' ta gaoyaquè' quie dza huezila'adyi'. ⁴³ Bdyin tu ben' yedyi Arimatea laonè' José. Naquè' tu ben' r nabè' entre yaca ben' r nabè' quie ben' Israel. Rbezè' dza inabè' Diuzi lao duže yedyi layu. Na' beyažoguè' uyoguè' ga zu Pilato yenabanè' chi bihue'nè' lato tzechachi'nè' cuerpo quie Jesús. ⁴⁴ Na' bebanzi Pilato lagutite Jesús. Na' gužè' ben' naca xan' soldado unabanè' lèbè' chi tali baguti Jesús. ⁴⁵ Caora gudyi xan' soldado Pilato tali na' baguti Jesús, na'ra bè'nè' lato ta yeyu'a José cuerpo quie Jesús. ⁴⁶ Na' uyo José yegue'nè' tula'ari' ta yetupanè' cuerpo quie Jesús. Na' beži'nè' cuerpo quie Jesús betubinè'n la'ari', bdze'nè'n lu'u tu beló yo ta uqui'n yaca benè' según ca naca costumbre quieyaquè'. Na' uži'nè' tu yo ta'a, bda'nè'n ru'a beló yo. ⁴⁷ Biži María Magdalena, len María zna' José, blè'èyaquè' gan' bdžè' José cuerpo quie Jesús.

16

Ca guca cati beban Jesús

(Mt. 28.1-10; Lc. 24.1-12; Jn. 20.1-10)

¹ Caora baode dza saodo, dza huezila'adyi' quieyaquè', uyo María Magdalena, len María zna' Santiago, len Salomé ta ga'oyaquè' aceite rla' žixi žeo ta ula'oyaquè' cuerpo quie Jesús. ² Na' caora uyani' zila dao' dza domingo, dza nëro quieyaquè', uyoyaquè' gan' zu beló yo gan' de cuerpo quie Jesús. ³ Na' unayaquè':

—ŽNuži yëbiro ta cubayaquè' yo ta'a da' ru'a beló?

⁴ Cati bdyinyaquè' gan', blè'èyaquè' bira da' yo ta'a ru'a beló yo. ⁵ Na' uyu'uyaquè' lu'u beló yo, blè'èyaquè' tu ángel nacanè' ca tu forma bi'byu ru'abe. Re'nè' zaquè' yebè lu'u beló yo, naconè' tu la'ari' bezèri. Na' lega bdzebiyaquè'. ⁶ Na'ra unè' ángel na' rëbinè' leyaquè':

—Bidzebile. Baza'le dena'le Jesús, ben' yedyi Nazaret, ben' guti lè'è yaga cruzo. Bira denè' niga, babebannè'. Ulena'cara ga udixoyaquè' cuerpo quienè'. ⁷ Uleyo uletzeğüdyi Pedro len yaca los demás yaca ben' quie Jesús de que huabialaohuè' laole neza Galilea. Hualè'elenè' gan' con ca rnia'.

⁸ Biži na' bero yaca nigula lu'u beló yo. Du rdzebiyaquè' du ržiziyaquè' uyu'uyaquè' be. Nitu nunu ben' bedilayaquè' tu neza bigudyiyaquè' cabè' blè'èyaquè' como can' rdzebiyaquè'.

Ptilalao Jesús María Magdalena

(Jn. 20.11-18)

⁹ Biži beyudyi beban Jesús dza domingo, dza nëro quieyaquè', tanëro ptilalaohuè' María Magdalena, ben' bebio Jesús gadyi bichi be mala. ¹⁰ Na'ra uyo María tzetixogue'nè' yaca ben' unao Jesús dza na'. Bega'n'yaquè' guqueyèchi'yaquè' uredyiaquè' nun quie dan' guti Jesús. ¹¹ Na' cati beyaquè' cabè' gudyi María leyaquè' de que beban Jesús, blè'è María lèbè', biguleyaquè' quienè'.

Ptilalao Jesús chopla ben' nao xnezanè'

(Lc. 24.13-35)

¹² Te beyudyi na', betza' cuin Jesús yetilalaohuè' chopla ben' zio layela, ben' nao xnezè'. ¹³ Na' lëscan' uyoayaquè' yetixogue'yaquè' yaca los demás ben' nao xneza Jesús de que babebannè', den' biguleyaquè' quieyaquè'.

Use'ela' Jesús yaca ben' quiè' ta tzetixogue'yaquè' xti'idza' Diuzi

(Mt. 28.16-20; Lc. 24.36-49; Jn. 20.19-23)

¹⁴ Te beyudyi na', ptilalao Jesús yaca chiptu ben' quienè' tu re'yaquè' lao mesa neraoy-aquè'. Na'ra udilanè' leyaquè' nun quie yela' zidi quieyaquè' biguleyaquè' quie ben' gudyi leyaquè' blè'èyaquè' lèbè' bebannè'. ¹⁵ Na' una Jesús gudyinè' leyaquè':

—Uletzio lao duže yedyi layu tzetixogue'le yugulu benë' xti'idza' Diuzi. ¹⁶ Na' nu ben' gale quia', ben' nao xneza', ben' si' laohue, huazi' Diuzi lëbë' guibá. Pero nu ben' bigale quia', ben' binao xneza', huachugubë' Diuzi quienë' yeyonë' gui' gabila. ¹⁷ Cani naca seña hue yaca ben' inao xneza'. Du rzëtöyaquë' laohua' huebioyaquë' yaca bichi be mala yu'u yaca benë'. Huacayaquë' inayaquë' di'idza' quie ben' tula. ¹⁸ Chi guxuyaquë' bëla rgui'idyi', bibi hueba' quieyaquë'. Chi yo'oyaquë' tu ta naca veneno, bibi huena quieyaquë'. Chi uda' na'ayaquë' yaca ben' raca žhue', hueyacayaquë'.

Beyëpi Jesús ladza zeyonë' guibá

(Lc. 24.50-53)

¹⁹ Bë' beyudyi unë Señor quiero Jesús cana', beyëpinë' ladza zeyonë' guibá ga re'në' zaquë' yebë quie Diuzi. ²⁰ Na' uza' yaca ben' quie Jesús ta quixogue'yaquë' xti'idza' Diuzi duže yedyi layu. Gucalë Señor quiero Jesús leyaquë', bënë' yela' huaca quienë' ta ulu'en xti'idza' Diuzi na' rguixogue'yaquë'. Amén.

DI'IDZA' LA'IYA BZU SAN LUCAS LĒ'Ē GUICHI

Ga rzulao di'idza'

¹ Yaca ben' zē babzuyaquē' di'idza' lē'ē guichi ta yu'u ni'a xnezi con ca guca quiendo' dza na'. ² Bzuyaquē' di'idza' lē'ē guichi ca ta una yaca ben' blē'ē cabē' guca desde dza zasu Jesús. Lēleyaquē' udixogue'rēyaquē' di'idza' la'iya quie Diuzi. ³ Lēscan' nē'ēdi' unaba'yudya' dyē'ēdi cabē' guca desde dza ga uzulaon quie Jesús. Lēlena' raqueda' tahuen na' hua' itu guichi ni ta ise'ela'n laolo' bicha' Teófilo. ⁴ Lēlena' rua' cuenda inezile dyē'ēdi nacan di'idza' li ca ta udixogue'yaquē' luē'.

Ga rguixogue' tu ángel cabē' gaca bē' su Juan bautista

⁵ Lēdza na' uzu rey Herodes rnabē'nē' estado Judea, zurē itu ben' naca pxuzi laonē' Zacarias. Naquē' tu cue' len yaca ben' nao pxuzi lao Abías. Naca nigula quie Zacarías zī'i suba Aarón, ben' gucarē pxuzi dza na'te. Lēbē' laohuē' Elisabet. ⁶ Blē'ē Diuzi leyaquē' ben' dya'a. Bzuyaquē' di'idza' ca rna ley yu'u di'idza' la'iya quie Diuzi. Lēlena' nunu saque' gao leyaquē' xquia. ⁷ Pero nunu zī'iyaquē' uzu, dan' guca Elisabet ben' bidyi. Lao rupayaquē' nacayaquē' ben' gula.

⁸ Bīzi bdyin dza babedula' turno quie tu cue' pxuzi ben' nacalē Zacarías tzaže. Babedula' turno rioyaquē' lu'u idao' rnabē'ra, dan' nacayaquē' pxuzi ta hue'lēyaquē' Diuzi di'idza'. ⁹ Ca costumbre quie yaca pxuzi bedula' Zacarías uyu'uguē' lu'u idao' rnabē'ra ta udze'nē' dzen yalo lao becugo. ¹⁰ Bīzi caora rei dzen yalo lao becugo, na'ra nita' yaca ben' zē lali'a rlidzayaquē' Diuzi. ¹¹ Caora na' ptilalao tu ángel quie Diuzi bazēguē' zaquē' yebē lao becugo. ¹² Bīzi caora blē'ē Zacarías tu ángel, tu bdzebinē', bira ubinnē' bi nē'. ¹³ Na'ra una ángel rēbinē' Zacarías:

—Zacarías, bidzebo', babe Diuzi ca naca oración quio' rnaló'. Nigula quio' Elisabet hua' zī'inē' huazu zī'ilo' ixubo' laobi' Juan. ¹⁴ Lega yedaohuela'obi'. Lēscan' yedaohuerē yaca ben' zē cati bazubi'. ¹⁵ Cana' gaca quiele dan' huacabi' ben' zē, huacabi' ben' bala'ana lao Diuzi. Biyo'obi' vino, biyo'obi' ta xudyibi'. Huayu'ubi' Bichi Be que Diuzi desde yu'utebi' lu'u lē'ē zna'bi'. ¹⁶ Huacalēbi' yaca ben' zē, ben' Israel, ta yetza'yaquē' pensari quieyaquē' ta yenaoyaquē' xneza Diuzi. ¹⁷ Lēbi' cuialaonezabi' ta quixogue'bi' benē' baza' ben' ise'ela' Diuzi. Con ca bē profeta Elías, bēnē' yela' huaca quie Diuzi, cana' huerē zī'ilo' yedze'bi' pensari quie Elías lu'u guicho laxta'o yaca benē' ta bitilalē xuziyaquē' len zī'iyaquē', lēscan' ta galerē yaca ben' birale que Diuzi. Cana' huebi' tacerenda chezila'adyi' yaca benē' yezi'yaquē' ben' ise'ela' Diuzi.

¹⁸ Bīzi na' unaba Zacarías ángel:

—¿Cabīzi hua' ta inezda' gaca quia' cabē' baonao'? Porque nē'ēdi' banaca' ben' gula. Lēscana' ben' gula naca nigula quia'.

¹⁹ Na'ra una ángel rēbinē' lēbē':

—Nē'ēdi' laohua' Gabriel. Rua' mandado rue Diuzi. Use'elē' nē'ēdi' ta detixogui'a luē' ca tadya'a hue Diuzi quio'. ²⁰ Ca naca bigulelo' can' baonia' luē', huega'nlo' bira gaca inēlo' hasta que idyin dza galo xcuidi' quio'. Uzun di'idza' can' baonia' cati idyin dza.

²¹ Bīzi yaca ben' nita' lali'a, rbezayaquē' ta yero Zacarías rebanyaquē' dan' rdzētzegue Zacarías lu'u idao' rnabē'ra. ²² Babero Zacarías lu'u idao' rnabē'ra bedapa' ru'anē' bira guca inēnē'. Bīzi yaca benē' gacabē'yaquē' guca quie' ca ben' uxusa. Blē'ēnē' tu ta blē'ēnē' lu'u idao' rnabē'ra. Bīzi sefazi ruenē' rlu'enē' benē' bira guca inēnē'.

²³ Babeyudyi ca tu dza uzunē' lu'u idao' rnabē'ra, na' bezē' zeyoguē' žan yu'u quienē'. ²⁴ Ude beyudyi guca can', žgulē' Elisabet, banu'a zī'inē', bega'nne' zunē' žan yu'u quienē' lao ga'yo' biu'. ²⁵ Na'ra unē': “Ca ta bacuan bē Diuzi quia' ta bira inē yaca benē' quia' bizinaquezi.”

Udixogue' tu ángel cabē' gaca galo Jesús

²⁶ Bīzi bezu lao xopa biu' bē'lē ángel Gabriel Elisabet di'idza', bese'ela' Diuzi lēbē' tatula lao yedyi Nazaret ga nebaba Galilea. ²⁷ Bese'elē' lēbē' ta tzanē'ē tu nigula cuidi', ben' binehuebē' be'mbyu. Lēlēbi' laobi' María. Lēnigula na' banapabi' di'idza' len bi' lao José ta utzaganal'yacabi'. Naca José zī'i suba rey David. ²⁸ Bīzi uyu'u ángel lu'u yu'u ga zu María, unē' rēbinē' lēbi':

—Padiux, raxetzague Diuzi ca ruelo'. Zucazi Diuzi rnē'ē luē'. Huelá'iya Diuzi luē' ca nurla yaca nigula tula.

²⁹ Na'ra cati blē'ē María ángel, tu bebanzibi' cabē' gudyi ángel lēbi'. Cana' guquebi': “¿Bixquien' una ángel nē'ēdi' cana'?” ³⁰ Na'ra una ángel rēbinē' lēbi':

—María, bidzebo' huacalécaci Diuzi lué'. ³¹ Na'ra huayu'u bdao' byu lu'u yu'uzixo'. Na' ixubo' laobi' Jesús. ³² Huacabi' ben' ze lao Diuzi. Huacabi' zi'i Diuzi zu guibá. Hue' Diuzi yela' rñabè' quienè' ta inabè'nè' ca unabè' xuzixta'onè' rey David. ³³ Cana' inabè'nè' tuzioli yaca ben' Israel. Biyeyudyi yedu yela' rñabè' quienè'.

³⁴ Bi'zi unabá María ángel:

—¿Como gaca quia' con ca baonao', den' binesulia' be'mbyu?

³⁵ Bi'zi una ángel rëbinè' María:

—Huayèzi Bichi Be quie Diuzi ga zulo'. Ca idubi tu beo, cana' huadubi yela' huaca quie Diuzi zu sibi lué'. Lëbdao' su na', huacabi' ben' naca la'ya quie Diuzi, huacabi' zi'i Diuzi. ³⁶ Lëzi ben' diadza quio' Elisabet, huazurè zi'inè' ba'ala'cazi banaquè' ben' gula, ben' una yaca benè' naquè' nigula bidyi. Bi'zi na'a lao xopa biu' banu'a zi'inè'. ³⁷ Para Diuzi bibi zëdi gaquenè' tu ta huenè'.

³⁸ Na'ra una María rëbibi' ángel:

—Nacacaza' ben' hue dyin quie Diuzi. Hue'encazi huegara Diuzi quia' cabè' baonao'.

Na'ra beza' ángel zeyoguè'.

Uyo María yeyubibi' Elisabet

³⁹ Lëdza na', laozate María ziobi' yedyi ga zu ya'a, yedyi nebaba Judea. ⁴⁰ Bi'zi cati bdyimbi' ga zu lidyi Zacarias, na' uyu'ubi' lu'u yu'u rgapabi' diuzi Elisabet. ⁴¹ Caora be Elisabet bgapa María lëbè' diuzi, cana' lba bdao' yu'u lu'u yu'uzixinè'. Bi'zi caora na' uyu'u Bichi Be quie Diuzi lëbè'. ⁴² Na'ra unè Elisabet zidzo rëbinè' María:

—Babèla'ya Diuzi lué' cala ca nurla yaca nigula. Lëzi babèla'yanè' zi'ilo'. ⁴³ ¿Nu'zi naca' nè'èdi' babido' idenao' nè'èdi'? Naco' lué' zna' ben' ise'ela' Diuzi. ⁴⁴ Ca naca bido' rgapo' nè'èdi' diuzi, caora na' bda bdao' yu'u lu'u yu'uzixa' redaohuebi'. ⁴⁵ Tadya'a gula gaca quio' bagulelo' con can' baona Diuzi como dan' uzucazin di'idza' can' baonanè'.

⁴⁶ Na'ra una María:

Raxeda' rnia' naca Diuzi ben' ze gula.

⁴⁷ Redaohue guicho laxta'ohua' ca rue Diuzi, ben' ute usela nè'èdi'.

⁴⁸ Babeyèchi'la'adyi' Diuzi nè'èdi', naca' ben' hue dyin quienè'.

Huana yaca ben' zaza' zanita' tahuen gula guca quia'.

⁴⁹ Naca Diuzi ben' rñabè' lao yugulute.

Tadya'a gula bënë' quia'.

Naca Diuzi ben' la'ya.

⁵⁰ Tuzioli reyèchi'la'adyi'nè' yaca ben' rapala'n lëbè'.

⁵¹ Bënë' yela' huaca quienè'.

Pcaxonè' yaca ben' rue ze cuine.

⁵² Beguhè' yela' rñabè' quie yaca ben' rñabè', bënë'n yaca ben' yèchi', ben' ruzu di'idza' quie'.

⁵³ Yaca ben' udue, bipca'nnè' leyaquè' sin gaoyaquè', pero yaca ben' uña'a, bega'nnyaquè' biguta' ta gaoyaquè'.

⁵⁴ Gucalènè' yaca ben' yedyi Israel, yaca ben' quienè'.

Bigulala'adyi'nè' leyaquè' beyèchi'la'adyi'nè' leyaquè'.

⁵⁵ Cana' bënë' ca naca di'idza' bega'nlnènè' xuzixta'oro, bënë' ca naca di'idza' bega'nlnènè' Abram len diadza quienè' para tuzioli.

⁵⁶ Bi'zi guca lao tzona biu' uzu María lidyi Elisabet. Ude na' beza'bi' zeyobi' lidyibi'.

Ca guca cati baozu Juan bautista

⁵⁷ Bi'zi bdyin uya' biu' ta su bdao' quie Elisabet, na' uzu tu bidao' byu quie'. ⁵⁸ Bè' unezi yaca ben' diadza quienè', len yaca ben' lao yedyi baozu bdao' quienè', bdyinyaquè' dena'yaquè' lëbè' ca tahuen gula guca quienè'. ⁵⁹ Bi'zi guca lao xuna dza, bdyin yaca ben' uzu tu xèdyidao' cuin bdao' según ca naca ley quieyaquè'. Cana' gu'unyaquè' yeyu'eyaquè' laobi' ca lao xuzibi' Zacarías. ⁶⁰ Na'ra una zna' bdao':

—Biyeyu'ero laobi' lao xuzibi'. Hue'ro laobi' Juan.

⁶¹ Bi'zi unayaquè' rëbiyaquè' lëbè':

—¿Bixquien' ilaobi' Juan? Ni tu yaca ben' diadza quio' bizu yaca ben' lao cana'.

⁶² Na'ra bëyaquè' seña unabayaquè' xuzi bdao' ta ineziyaquè' ca bi'zi re'en xuzibi' ilaobi'. ⁶³ Na'ra unabanè' tu yaga ta'a bzuguè' letra bzunè': "Laobi' Juan." Bi'zi tu bega'nziyaquè' bebanyaquè' can' guca. ⁶⁴ Bi'zi caora na' benè Zacarías, ruenè' Diuzi ben' ze. ⁶⁵ Bega'n yaca ben' lao yedyi tu bebanziyaquè'. Na' bè'lè yaca ben' nita' yedyi nebaba Judea laguedyiaquè' di'idza' cabè' guca quieyaquè'. ⁶⁶ Ca naca lao yugulu ben' unezi, gucayaquè' pensari unayaquè' rëbiyaquè' laguedyiaquè':

—¿Ca bi'zi gaca quie xcuidi' na'?

Cana' unajè' dan' talicazi bèla'ya Diuzi lëbi'.

Bë Zacarías Diuzi ben' ze

⁶⁷ Na'ra Zacarías, ben' naca xuzi bdao', du yu'unë' Bichi Be quie Diuzi, unë' cabë' re'en Diuzi inënë'. Lëlena' unë' cani:

⁶⁸ Ben' ze naca Diuzi quie ben' ra'o, ben' Israel, como dan' babidë' len ra'o, nacaro ben' quienë', bapte pselanë' ra'o.

⁶⁹ Baose'elë' tu ben' ute usela ra'o, ben' de yela' huaca quie.

Lëlebë' naquë' zi'i suba rey David, ben' naca siervo quie Diuzi.

⁷⁰ Cana' naca di'idza' bega'n'lë Diuzi xuzixta'oro tiempote.

Conlë yaca ben' udixogue' di'idza' la'iya quienë', cana' udixogue' Diuzi bin' huenë'.

⁷¹ Unë' ute uselanë' ra'o quie yaca ben' rudie rdza' ra'o.

⁷² Unë' yeyëchi'la'adyi'në' yaca ben' naca xuzixta'oro.

Bigala'adyi'në' huenë' cabë' di'idza' naca la'iya bega'n'lënë' leyaquë'.

⁷³ Lëscan' para ra'o, bega'n'lënë' ra'o di'idza'.

Cana' naca di'idza' bega'n'lë Diuzi xuzixta'oro Abraham.

⁷⁴ Unë' ute uselë' ra'o bibi hue yaca ben' rudie rdza' ra'o para naoro xnezë' sin idzebiro.

⁷⁵ Cana' gacaro ben' hue quie lëbë', ben' naca la'iya quienë' dza rdaro lao yedyi layu.

⁷⁶ Na'ra luë' zi'ina', huaco' ben' quixogue' xti'idza' Diuzi zu guibá, como dan' huabi-alanezo' lao ben' ise'ela' Diuzi ta tzetixogue'lo' benë' de que huida ben' ise'ela' Diuzi.

⁷⁷ Cana' huelo' cuenda inezi yaca ben' Israel cabë' bë Diuzi ta ute uselanë' ra'o, yezi'zenë' dula' xquia quiero.

⁷⁸ Tanun quie nedyë'ë Xuziro Diuzi ra'o reyëchi'la'adyi'në' ra'o, aose'elë' tu ben' uzioñe'e ra'o desde guibá ga zuë'.

⁷⁹ Cana' bë Diuzi cuenda tzioñe'e yaca ben' rda lao lato lao chula, yaca ben' ruen žudyi gatiyaca.

Cana' bë Diuzi quiero cuenda gacalënë' ra'o, yedzeleru naoro xnezë', cue' chizi lu'u guicho laxta'oro.

Cana' una Zacarías dza na'.

⁸⁰ Bizi xcuidi' gu'unibi' labezi, gucabi' bi' huala, yu'ubi' Bichi Be quie Diuzi. Na'ra uzubi' lao lato ga bdyia yu'u hasta bdyin dza uzulaobi' rguixogue'bi' yaca ben' Israel xti'idza' Diuzi.

2*Ca guca bë' uzu Jesús*

(Mt. 1.18-25)

¹ Bizi lao dza na', uzu tu ben' naca gobierno, ben' rnabë'ra laohuë' Augusto. Na' bënë' mandado ta guca censo quie lao duže yedyi con ga rnabë'në'. ² Lëcenso na' gucan tanëro caora uyo Cirenio gobernador quie yu nebaba Siria. ³ Gucan quie lao yugulute yaca ben' con gatezi nita'yaquë' de yeyoyaquë' lao yedyi ga golo'yaquë' tacuenda tzu'u laoyaquë' lao lista. ⁴ Cana' guca bero José yedyi Nazaret ga nebaba Galilea zioquë' yedyi Belén ga nebaba Judea. Lëgan' na' ga golo rey David como dan' naca José ben' diadza quie rey David. ⁵ Bedyin José len María Belén para tzu'u laoyaquë' lao lista. Naca María bi' banapalë di'idza' José ba'ala'cazi banu'a zi'ibi'. ⁶ Bizi banita'yaquë' Belén na', bdyin dza golo bdao' quie María. ⁷ Bizi golo bdao' nëro quie María. Beyudyi na' bezi'yaquë' bdao' betubiyaquë'bi' la'ari' bexubayaquë'bi' lao yaga žan yu'u ga yu'u bëdyihuaga. Cana' guca quieyaquë', dan' biguta' lato lu'u yu'u quie yaca benë' gasiyaquë'.

Ptilalao yaca ángel yaca ben' rapa beco' zi'ila'

⁸ Bizi ga'ala' ga re' Belén nita' yaca ben' rapa beco' zi'ila'. Rega'n'lëyaquë' beco' zi'ila' quieyaquë' layela ta rapayaquë'ba' yedu yela. ⁹ Lëcana' labdyinte tu ángel quie Diuzi gan' nita' yaca ben' rapa beco' zi'ila'. Caora na' bdyin yela' huaca quie Diuzi ulëchin xni' gan' nita'yaquë'. Lega bega'nyaquë' bđzebiyaquë'. ¹⁰ Na'ra una ángel rëbinë' leyaquë':

—Bidzebile, porque në'edi' nu'a tu di'idza' dya'a nacan ta yedaohue lao yugulute benë'. ¹¹ Lëlena' rnia' le'e agolo tu bdao' yedyi Belén ga golo rey David. Lëbdao' na' ute uselabi' yaca benëchi'. Bagolo ben' naca Cristo, ben' use'ela' Diuzi. ¹² Ta inezile nacan tali ca rnia', huedzelele bdao' bđubibi' la'ari' žubabi' lao yaga žan yu'u ga yu'u bëdyihuaga.

¹³ Bizi yesazi bdyinra yaca ángel zëra, ben' za' guibá gan' zë ángel, ruejë' Diuzi ben' ze unayaquë':

¹⁴ ¡Ben' ze Diuzi zu sibi!

¡Huaca tadya'a gula quie yaca ben' nita' lao yedyi layu, ben' hue quie Diuzi!

¹⁵ Bizi babeyudyi na', beyëpi yaca ángel guibá. Na' bega'n yaca ben' rapa beco' zi'ila' nayaquë' rëbiyaquë' laguedyiaquë':

—Huayoro tzena'ro can' guca yedyi Belén con ca baona Diuzi ra'o.

¹⁶ Cana' uza'yaquë' zioyaquë' taria bdyinyaquë' ga zu María len José len bdao' žubabi' lao yaga žan yu'u ga yu'u yaca bëdyihuaga. ¹⁷ Ca blë'ëyaquë' bdao', cana'ra bë'yaquë' di'idza' con can' gudyi ángel leyaquë' cabë' guca uzu bdao'. ¹⁸ Ca naca be lao yugulute yaca ben' nita' gan', lega bebanyaquë' can' una yaca ben' rapa beco' ži'ila'. ¹⁹ Biži María nezizi lu'u laxta'onë' ca naca una yaca benë'. Cana' gucanë' pensari ca unajë'. ²⁰ Na' beza' yaca ben' rapa beco' ži'ila' zeyoyaquë' rueyaquë' Diuzi ben' ze ca ta beyaquë' len ca ta blë'ëyaquë'. Bzucazi Diuzi di'idza' con ca una ángel gudyinë' leyaquë'.

Blu'eyaquë' bdao' pxuzi lu'u idao' rnabë'ra

²¹ Guca lao xuna dza bzuyaquë' bdao' tu xëdyidao' ca costumbre quieyaquë'. Biži na' pxubayaquë' lao bdao' JESUS cabë' una ángel ilaobi' tu binehua'a María bdao'. ²² Biži baoya' dza ta yeyëri nigula segün ca rna lë'ë guichi yu'u ley quie Moisés. Caora na' uza'yaquë' ziolëyaquë' bdao' ciudad Jerusalén ta ulu'eyaquë' bdao' pxuzi lu'u idao' rnabë'ra. ²³ Bëyaquë' cana' bzuyaquë' di'idza' con ca naca ley quie Diuzi yu'u lë'ë guichi. Cani rnan lë'ë guichi: “Naca yugulu bdao' byu nëro bi' naca la'iya lao Diuzi.” ²⁴ Lena' uyoyaquë' yehua'ayaquë' biu ta uzio pxuzi ren quieba' lao becugo ga zu idao' rnabë'ra. Bzuyaquë' di'idza' cabë' rguixogue'n lë'ë guichi la'iya quie Diuzi cani: “Reya'ala' tzhua'ale lao pxuzi tu pare biu lasi, na' chi bizu biu lasi, hua'ale chopa paloma dao'.” Cana' rnën lë'ë guichi.

²⁵ Lëtiempo na' uzu tu ben' lao Simeón zunë' Jerusalén. Naquë' ben' dya'a, rapala'nnë' Diuzi, rbezanë' dza guida ben' ise'ela' Diuzi, ben' ute usela ben' Israel. Yu'ucazi Simeón Bichi Be quie Diuzi. ²⁶ Babzioñe'e Bichi Be quie Diuzi lëbë' de que tu binegatinë' hualë'ënë' ben' naca Cristo, ben' ise'ela' Diuzi. ²⁷ Conlë Bichi Be quie Diuzi ziolë Simeón lu'u idao' rnabë'ra. Biži cati ziolëyaquë' bdao' lu'u idao' rnabë'ra ta uzuyaquë' di'idza' con ca na lë'ë guichi ley. ²⁸ Lëhora na' uzi' Simeón bdao' bnidaguë' bdao' uxubanë'bi' lao zichonë' bëguë' Diuzi ben' ze unë'.

²⁹ Xuza' Diuzi, huaca usanlo'në' gatia' cue' chizi lu'u guicho laxta'ohua', dan' babzulo' di'idza' con ca unao' në'ëdi', naca' ben' rue ca mandado re'leno' hua'.

³⁰ Conlë laohua' bablë'ëda' ben' ute usela yaca benëchi'.

³¹ Aose'elo'në' bidë' lao yedyi layu cuenda ilë'ë yaca benëchi' lëbë'.

³² Naquë' ca xni' gui' useni' ta ilë'ë ben' rda lao lato lao chula, yaca ben' binaca ben' Israel. Nun quienë' gapala'n yaca ben' nita' lao yedyi layu yaca ben' Israel, yaca ben' naca ben' quio'.

³³ Na' beban José len žna' bdao' cabë' una Simeón quie bdao'. ³⁴ Na'ra bëla'iya Simeón bdao' gudyinë' María žna' Jesús:

—Naca laza xcuidi' quio' usanla'adyi' Diuzi ben' Israel, yaca ben' bichezila'adyi' lëbi'. Lëzi nacarë lazabi' yezi' Diuzi ben' Israel, yaca ben' chezila'adyi' lëbi'. Huaca quiebi' bichezila'adyi' ben' zë lëbi'. ³⁵ Lëcana' ulu'en ca naca pensari yu'u lu'u laxta'o quie quie yaca benë'. Den' para quio' luë', huacan bayëchi'. Huacan ca quie chezi tu espada huen chopa la'a laxta'olo'.

³⁶ Lëgan' na' uzu tu nigula laohuë' Ana. Uduxogue'rënë' di'idza' la'iya quie Diuzi. Banaquë' ben' gula, naquë' ži'i Fanuel, ben' diadza quie Aser. Nenacatë' cuidi' uzi' xquiuhuë' lëbë'. Uzulëne' xquiuhuë' lao gadyi iza, ude na' guti xquiuhuë'. ³⁷ Biži tu litza' bega'nnë' napë' tapa galo tapa iza. Pero hipsanla'adyi'në' quie idao' rnabë'ra. Zucazë' te dza len rtze' rulidzë' Diuzi ruenë' ubasi. ³⁸ Cana' bdyin Ana gan' zëyaquë' rëbinë' Diuzi diuxcalelo'. Na'ra uzulaohuë' rguixogue'në' ca naca quie bdao' Jesús para yaca ben' nita' rbeza dza guida ben' ise'ela' Diuzi, ben' ute usela yaca ben' Israel.

Bedyinyaquë' yedyi Nazaret

³⁹ Babeyudyi guca lao yugulute cabë' mandado rue ley quie Diuzi, na'ra beza'yaquë' zeyoyaquë' estado Galilea bedyinyaquë' yedyi quieyaquë' Nazaret. ⁴⁰ Na' biži gu'uni bdao', gucabi' bi' huala, bi' rioñe'e. Bëla'iya Diuzi lëbi'.

Cabë' guca bega'n Jesús lu'u idao' rnabë'ra

⁴¹ Yugu iza rio José len žna' Jesús ciudad Jerusalén ga ra'ala' lani pascua ta rezala'adyi' yaca ben' Israel dza uza' xuzixta'oyaquë' nación Egipto. ⁴² Cati uya' Jesús lao chipchopa iza, uyolëbi' xuzi žna'bi' lani ciudad Jerusalén con ca naca biu' benëbi' quieyaquë' rueyaquë' lani pascua. ⁴³ Biži babeyudyi lani, beza' José len žna' Jesús zeyoyaquë' bigucabë'yaquë' chi bega'n Jesús ciudad Jerusalén. ⁴⁴ Gucayaquë' pensari zeza' Jesús len yaca ben' zeza' uyorë lani. Cana' guca lao tu dza beza'yaquë'. Caora rna'yaquë' ganu Jesús zeza', udayaquë' rguiloayaquë'bi' lado diadza quieyaquë', len yaca ben' nubë'yaquë', den' ganu Jesús zeza' leyaquë'. ⁴⁵ Nunu bedzeleyaquë'. Na' beza'yaquë' zeyoyaquë' ciudad Jerusalén tatula ta yeguiloyaquë'bi'.

⁴⁶ Bizi guca lao tzona dza na', bedzeleyaquë'bi' lu'u idao' rñabë'ra. Re'bi' lado yaca ben' rusëdi di'idza' yu'u lu'u guichi la'ya quie Diuzi. Rzë'nagabi' ca rñayaquë' rñababi' leyaquë' tu chopa di'idza'. ⁴⁷ Ca naca yugulu ben' rzë'naga can' nabi', tu bega'nziyaquë' bebanziyaquë' ca naca yela' rioñe'e quiebi', lëzi bebanziyaquë' ca naca di'idza' bedyi'ibi' gudyibi' leyaquë'. ⁴⁸ Bizi caora blë'ë xuzi žna'bi' lëbi', tu bega'nziyaquë' bebanyaquë'. Na'ra unë žna'bi' rëbinë' lëbi':

—Zi'ina', žbixquien' bao' cana'? Rdëbindo' quio'. Aodalia' xuzo' regulondo' luë'.

⁴⁹ Cana'ra una Jesús rëbinë' leyaquë':

—žBixquien' rdale regulole në'ëdi'? žBinezile ruen zi uzua' di'idza' hua' mandado que Huza'?

⁵⁰ Bizi leyaquë' biuyoñe'leyaquë' can' una Jesús.

⁵¹ Cana' beza'yaquë' zeyoyaquë' yedyi Nazaret, pero ralecazi Jesús quie xuzi žna'bi'. Na' žna'bi' nudze'në' lu'u guicho laxta'onë' cabë' bë Jesús. ⁵² Ca naca Jesús na' gu'unibi' uya'abi' pensari. Blë'ë Diuzi lëbi' nacabi' bi' huen. Lëzi blë'erë yaca benë' nacabi' bi' huen.

3

Udixogue' Juan bautista xti'idza' Diuzi lao lato ga bidyia yu'u

(Mt. 3.1-12; Mr. 1.1-8; Jn. 1.19-28)

¹ Bizi guca lao chi'inu' iza uzu tu ben' lao Tiberio, naquë' gobierno rñabë'ra. Caora na' uzurë itu ben' lao Poncio Pilato, naquë' gobierno quie estado Judea. Lëzi uzurë itu ben' lao Herodes, naquë' gobierno quie estado Galilea. Lëzi uzurë tu bichi Herodes, ben' lao Felipe, naquë' gobierno quie yu nebaba Iturea len yu nebaba Traconite. Lëzi uzurë itu ben' lao Lisania, naquë' gobierno quie yu nebaba Abilinia. ² Lëscan' lëiza na', naca Anás len Caifás yaca pxuzi rñabë'ra. Bizi Diuzi bë'në' tu di'idza' Juan, ži'i Zacarias. Na' zu Juan lao lato ga bidyia yu'u. ³ Cana' uyo Juan lao duže ru'a yao Jordán unë' rëbinë' benë': "Reya'ala' yetza'le pensari quiele cuenda yezi'ze Diuzi dula' xquia quiele, cana'ra hua' laole." ⁴ Gucan can' ca bzu Isaías di'idza' lë'ë guichi la'ya quie Diuzi dza na'. Naquë' ben' udixogue' xti'idza' Diuzi unë':

Huazu ben' na' lao lato dachi ga bidyia yu'u, huanë' zidzo rëbinë' lagueidyinë' caniga: "Huele hueluba neza quiele cuenda huída ben' naca xa'nro, usalole tu neza li.

⁵ Yesedza'le ga naca pozo, yeyuele ba'a ga naca loma, yebiölile ga naca neza yuco, yupa'ale ga naca neza stëbi.

⁶ Cana' ilë'ë lao yugulute benëchi' ca hue Diuzi ta ute uselanë' leyaquë'."

⁷ Na'ra cati bdyin yaca benë' ga zë Juan ta hue'në' laoyaquë', lëscan' bdyinrë yaca ben' rñabë' quieyaquë'. Cana' una Juan rëbinë' leyaquë':

—jCa naca bëla bia mala, cana' nacarële! žCa nuzi udixogue' le'e ta ilale ca naca tu castigo huala gula baza' bago ilë'ële? ⁸ Ulehue quiele tadya'a cuenda ulu'en talicazi aptza'le pensari quiele. Bira inale: "Bihue Diuzi ra'o castigo nun quie nacaro ži'i suba Abraham." Porque rnia' le'e, hasta len yo niga huazaque' hue Diuzi yaca ben' naca ži'isuba Abraham. ⁹ Ca naca quie yaga birbia tazixi, cana' naca quiele. Bade yebandyo puesto ta ichugon yaca yaga birbia tazixi tzu'un tzeina lagui'.

¹⁰ Na'ra unaba yaca benë' nayaquë':

—žCabizi re'enlo' huendo'?

¹¹ Na'ra una Juan rëbinë' leyaquë':

—Chi de chopa cue' žabale, ulesi' tu cue'n ulehue'n ben' bide žabe. Lëscan' nu yela' huao quiele, ulehue'n ben' bide ta gao.

¹² Bizi bdyinrë yaca ben' huequizu ta hue' Juan laoyaquë'. Bizi unayaquë' rëbiyaquë' Juan:

—Maestro, žcabizi ca huendo'?

¹³ Na'ra una Juan rëbinë' leyaquë':

—Ca tu ruezi mandado lao ley uquizule yaca benë', bira uquizuleyaquë' de mazara.

¹⁴ Lëzi unabarë bala yaca ben' naca soldado unayaquë':

—Bizi nëto', žcabizi ca huendo'?

Na'ra una Juan rëbinë' leyaquë':

—Bicubale bicuanle quie benë'. Ni ta utzebile gaole leyaquë' xquia, chi bibi rueyaquë'. Lëscan' ulechezila'adyi' ca tu ta ražule.

¹⁵ Na' bizi yaca benë' raqueyaquë' Juan naquë' ben' Cristo. ¹⁶ Na'ra una Juan rëbinë' lao yuguluteyaquë':

—Tali në'ëdi' ru'a laole con nisa, pero zaza'ra ben' udze' Bichi Be quie Diuzi lu'u guicho laxta'o ben' rue quie xti'idza' Diuzi. Pero ben' birue quie xti'idza' Diuzi, udze'në' lëjë' lao gui' gabila. Dera yela' rñabë' quie' ca në'ëdi'. Tanto naquë' ben' belao, ni lë'ëti' bibi zaca' ni siquiera biyeyazoga' cuioga' guidi yu'u ni'anë'. ¹⁷ Bazënë' beladzo' ta ulubë' trigo. Te na'

yetupé¹ trigo yezi'tza'onè'n. Lèzi utuparè' guixi' uzalanè'n lagui' ga tzeina lao gui' bireyula. —Cana' una Juan gudyinè' leyaquè'.

¹⁸ Lèscan' gudyinè' leyaquè' di'idza' zèra unè' udixogue'nè' yaca benè' di'idza' la'ya quie Diuzi. ¹⁹ Lèzi udilarè' Herodes, ben' naca gobièrno, dan' bezulènè' Herodías žgula bichinè' Felipe. Lèzi udilarènè' lèbè' dan' bèranè' tamala. ²⁰ Na' bizi Herodes, lao laza uzè'aguè' quie Juan, bèrèlè' mazara tamala, bdze'guè' Juan lu'u dyiguiba.

Ca guca bè' Juan lao Jesús

(Mt. 3.13-17; Mr. 1.9-11)

²¹ Ca zatzio Juan lu'u dyiguiba, cati nezènè' ru'enè' lao benè', lèzi bè'nè' lao Jesús. Ca zè Jesús rlidzè' Diuzi, cana' uyalo guibá. ²² Bizi caora na' ga zè Jesús, uyèzi Bichi Be quie Diuzi ca rèzi biu. Na'ra unè' Diuzi ga zuè' guibá unè':

—Zi'ina' luè'. Nedyè'èda' luè'. Lega redaohueda' ca ruelo'.

Ga rguixogue'n quie xuzixta'o Jesucristo

(Mt. 1.1-17)

²³ Jesús bazunè' ca du galobechi iza cati uzulaonè' udixogue'nè' di'idza' la'ya quie Diuzi. Según ca una yaca benè' naquè' zi'i José, dechan' naquè' zi'i suba Elí, ben' naca xuzi María. ²⁴ Na' naca Elí zi'i Matat, na' naca Matat zi'i Leví, na' naca Leví zi'i Melqui, na' naca Melqui zi'i Jana, na' naca Jana zi'i José, ²⁵ na' naca José zi'i Matatías, na' naca Matatías zi'i Amós, na' naca Amós zi'i Nahum, na' naca Nahum zi'i Esli, na' naca Esli zi'i Nagai, ²⁶ na' naca Nagai zi'i Maat, na' naca Maat zi'i Matatías, na' naca Matatías zi'i Semei, na' naca Semei zi'i José, na' naca José zi'i Judá, ²⁷ na' naca Judá zi'i Joana, na' naca Joana zi'i Resa, na' naca Resa zi'i Zorobabel, na' naca Zorobabel zi'i Salatiel, na' naca Salatiel zi'i Neri, ²⁸ na' naca Neri zi'i Melqui, na' naca Melqui zi'i Adi, na' naca Adi zi'i Cosam, na' naca Cosam zi'i Elmodam, na' naca Elmodam zi'i Er, ²⁹ na' naca Er zi'i Josué, na' naca Josué zi'i Eliezer, na' naca Eliezer zi'i Jorim, na' naca Jorim zi'i Matat, ³⁰ na' naca Matat zi'i Leví, na' naca Leví zi'i Simeón, na' naca Simeón zi'i Judá, na' naca Judá zi'i José, na' naca José zi'i Jonán, na' naca Jonán zi'i Eliaquim, ³¹ na' naca Eliaquim zi'i Melea, na' naca Melea zi'i Mainán, na' naca Mainán zi'i Matata, na' naca Matata zi'i Natán, ³² na' naca Natán zi'i rey David, na' naca rey David zi'i Isái, na' naca Isái zi'i Obed, na' naca Obed zi'i Booz, na' naca Booz zi'i Salmón, na' naca Salmón zi'i Naasón, ³³ na' naca Naasón zi'i Aminadab, na' naca Aminadab zi'i Aram, na' naca Aram zi'i Esrom, na' naca Esrom zi'i Fares, na' naca Fares zi'i Judá, ³⁴ na' naca Judá zi'i Jacob, na' naca Jacob zi'i Isaac, na' naca Isaac zi'i Abraham, na' naca Abraham zi'i Taré, na' naca Taré zi'i Nacor, ³⁵ na' naca Nacor zi'i Serug, na' naca Serug zi'i Ragau, na' naca Ragau zi'i Peleg, na' naca Peleg zi'i Heber, na' naca Heber zi'i Sala, ³⁶ na' naca Sala zi'i Cainán, na' naca Cainán zi'i Arfaxad, na' naca Arfaxad zi'i Sem, na' naca Sem zi'i Noé, na' naca Noé zi'i Lamec, ³⁷ na' naca Lamec zi'i Matusalén, na' naca Matusalén zi'i Enoc, na' naca Enoc zi'i Jared, na' naca Jared zi'i Mahalaleel, na' naca Mahalaleel zi'i Cainán, ³⁸ na' naca Cainán zi'i Enós, na' naca Enós zi'i Set, na' naca Set zi'i Adán, na' naca Adán zi'i Diuzi.

4

Gu'un xan' taxi'ibi' iquixi Jesús huenè' tamala

(Mt. 4.1-11; Mr. 1.12-13)

¹ Du yu'u Jesús Bichi Be quie Diuzi zeyoguè' ru'a yao Jordán tatula. Pquiè' Bichi Be quie Diuzi lèbè' lao lato ga bidyia yu'u. ² Bizi guca uzuguè' lao lato lao chopa galo dza. Na' uyo xan' taxi'ibi' gan' zènè' re'ennan ta iquixi Jesús huenè' tamala. Ca tu lao dza uzunè' na', biudaonè' lega uduenè'. ³ Na'ra una xan' taxi'ibi' rëbin lèbè':

—Chi dula'adyo' naco' zi'i Diuzi, bè yo niga iyacan yèta ttila.

⁴ Na'ra rëbi Jesús len:

—Lè'è guichi la'ya quie Diuzi rnan caniga: “Cala yela' huaози uteban yaca benè', lèscan' ca naca di'idza' rnè Diuzi, utebannan leyaquè'.”

⁵ Bizi na'a, xan' taxi'ibi' uquiè'n lèbè' lao ya'a sibi, na' blu'en lèbè' lao duze yedyi layu.

⁶ Bizi una xan' taxi'ibi' rëbin lèbè':

—Guna' luè' lao yugulu yela' rnabè' quie yedyi layu niga nun quie nacan ladyina'a. Na' hua'a len nu ben' raxeda' hua'a len. ⁷ Chi quitzo žibo' laohua' tzionla'adyo' nè'èdi', na' guna' lao yuguluten luè'.

⁸ Na'ra una Jesús rëbinè'n:

—Bebiga' tzala'la, Satanás, porque lè'è guichi ga yu'u di'idza' la'ya quie Diuzi rnan caniga: “Tuzi Diuzi tzionla'adyi'ro uzuro di'idza' ca mandado ruenè'.”

⁹ Ude na' uquiè' xan' taxi'ibi' lèbè' ciudad Jerusalén, urèlèna lèbè' guicho lun idao' rnabè'ra. Na' unan rëbin lèbè':

—Chi dula'adyo' naco' zi'i Diuzi, uxiti gan' niga para layu. ¹⁰ Bigaco' zi' iguinolo' layu como cana' rnan lè'è guichi la'ya quie Diuzi nan:

Ise'ela' Diuzi ángel quiené' ta ina'yaquè' luè' ta bibi gaca quio'.

¹¹ Hueyuxuyaquè' luè' ta bibi gaca quio', ni yo bihuenan zi' ni'alo'.

¹² Na'ra una Jesús rëbinè'n:

—Lèzi rnarèn lè'è guichi la'ya rnan: “Bihuenële Diuzi bizinaquezi chi uzunè', chi biuzunè' di'idza' cabè' unè'.”

¹³ Bizi bira ubin xan' taxi'ibi' bihuenta ta iquixi Jesús huenè' tamala, cana' guca bebigan' zeyon bibènan Jesús zèdi tu chi'.

Uzulao Jesús psëdinè' yaca benè' estado Galilea

(Mt. 4.12-17; Mr. 1.14-15)

¹⁴ Bizi Jesús, du yu'unè' Bichi Be quie Diuzi, zeyoguè' bedyinnè' estado Galilea. Cana' guca gudyi yaca ben' laguedyiyaquè' quie quie yedyi re' ga'ala' cabè' rue Jesús. ¹⁵ Psëdinè' leyaquè' lu'u idao' con ga yedyi uyoguè'. Yuguluyaquè' udapala'njè' lèbè'.

Beyo Jesús yedyi Nazaret

(Mt. 13.53-58; Mr. 6.1-6)

¹⁶ Na'ra beyo Jesús yedyi Nazaret ga bgulanè'. Bizi dza saodo, dza huezila'adyi' quieyaquè', uyu'unè' lu'u idao' sinagoga ca rionè' yugu dza huezila'adyi'. Na' uzulinè' rlabè' lè'è guichi ga yu'u di'idza' la'ya quie Diuzi. ¹⁷ Na' bè'yaquè' lèbè' guichi la'ya ta bzu profeta Isaías. Caora blinè'n, na' yetilè' ga rnan cani:

¹⁸ Yu'ucazi Bichi Be quie Diuzi nè'èdi' nun quie dan' ulionè' nè'èdi' ta quixogui'a di'idza' la'ya quienè' yaca ben' yèchi'.

Lèzi use'ela'rè' nè'èdi' ta yeyuezia' yaca ben' raca bayèchi' quie,

lèzi ta hua' libre ca ben' nao xquia quieyaquè' leyaquè',

lèzi ta yelè'è yaca ben' nechula laohue, lèzi ta ute usela' yaca ben' baozaca zi',

¹⁹ lèzi ta quixogui'a yaca benè' babdyin dza hue Diuzi tu cule ze quieyaquè'.

²⁰ Ude na' betubinè' guichi yu'u di'idza' la'ya quie Diuzi, beyu'enè'n ben' naca cuenda lu'u idao' sinagoga, na' bebe'nè'. Bizi yugulu yaca ben' yu'u lu'u idao' sinagoga, bega'nziyaquè' rebanyaquè' rna'yaquè' lèbè'. ²¹ Cana' unè' gudyinè' leyaquè':

—Ca naca na'a, babzun di'idza' lè'è guichi bablaba' bele. —Cana' unè'.

²² Na'ra yugulu benè' unèyaquè' dya'a quienè', tu bega'nyaquè' bebanziyaquè' ca naca di'idza' dya'a gula unè Jesús. Na' bizi nayaquè' rëbiyaquè' laguedyiyaquè':

—¿Cala bi' niga zi'i José?

²³ Na'ra una Jesús rëbinè' leyaquè':

—Tali huanale nè'èdi' cani: “Chi tali naco' ben' rue milagro, bè itun ni ilè'èndo'.” Lèscan' inale nè'èdi': “Ca ta babendo' bao' milagro yedyi Capernaum, cana' bèrè itun niga yedyi quio' ilè'èndo'.”

²⁴ Bizi nernè Jesús rëbinè' leyaquè':

—Tali ca rnia' le'e, con gatezi de yedyi rda ben' rguixogue' xti'idza' Diuzi, hualè'è yaca benè' lèbè' dya'a. Na' bizi ben' lao yedyi quienè' biilè'èyaquè' lèbè' dya'a. ²⁵ Tali ca rnia' le'e, unita' zè nigula guti xquiuhue yedyi quie yaca ben' Israel dza na' caora uzu profeta Elías. Lèdza na' biben nisayo lao tzona iza yugatzo. Lega ubin huala gula guta' lao yedyi quiejè'.

²⁶ Pero biuse'ela' Diuzi Elías con garla nita' nigula guti xquiuhue. Tuzi yedyi Sarepta, na' uzu tu nigula guti xquiuhue, lègan' na' use'ela' Diuzi Elías ga rega'nnan ga'ala' para yedyi Sidón. ²⁷ Lèzirè unita' zè ben' yu'u yela' hue' ca mal de pindo yedyi Israel caora uzurè ben' naca profeta Eliseo dza na'. Na'ra lèdza na' nurla nuyaca ben' yu'u yela' hue' ca mal de pindo beyaca. Tuzi Naamán, ben' za' yu' nebaba Siria, lèben' na' beyaca.

²⁸ Ca naca yaca ben' yu'u lu'u idao' sinagoga, bdza'tzegueyaquè' babeyaquè' can' una Jesús. ²⁹ Na'ra uzuliyaquè' bëxoyaquè' lèbè' lao yedyi uquiè'yaquè' lèbè' lao ya'a zu cuèta yedyi ta utulayaquè' lèbè' zanle. ³⁰ Pero tu brozi Jesús ladoyaquè' zioguè' ga tula.

Beyue Jesús ben' yu'u bichi be xi'ibi'

(Mr. 1.21-28)

³¹ Bizi na' bdyin Jesús yedyi Capernaum ga nebaba Galilea. Lègan' na' uyu'unè' idao' sinagoga ta psëdinè' yaca benè' dza huezila'adyi'. ³² Bizi yaca benè' tu bebanziyaquè' ca di'idza' rnè' rusëdinè' leyaquè' como dan' cabè' rna ben' rnabè', cana' unè'.

³³ Bizi lu'u idao' sinagoga zè tu ben' yu'u bichi be xi'ibi'. Lèben' na' uredyiyi'nè' unè':

³⁴ —Psan nèto'. ¿Bixquien' zao' ta huelo' nèto' zèdi? Jesús ben' yedyi Nazaret luè'. ¿Cala zao' udyiagu'lo' nèto'? Nubè'da' luè' naco' ben' la'ya, ben' use'ela' Diuzi.

³⁵ Na'ra udila Jesús bichi be xi'ibi' rëbinè'n:

—¿Chizi, bero ben' na' gan' yu'tulo'!

Caora na' bero bichi be xi'ibi' be'mbyu gan' yu'una, bgu'unnë' layu, denë' zaquë'lao yaca ben' nita' rna'. Na' beron zeyon, ni lë'ëti' bibi zi' guquë'. ³⁶ Na' bega'n yuguluyaquë' bdzebiyaquë' nayaquë' rëbiyaquë' laguedyiyaquë':

—¿Cabiñi una ben' niga? De yela' rnabë' quienë' rnabë'në' yaca taxi'ibi' reron ga yu'uyacan benë'.

³⁷ Na' cana' guca unezi yaca benë' nita' lao duze yedyi rega'n ga'ala' cabë' bë Jesús.

Byue Jesús ben' gula quie Simón Pedro

(Mt. 8.14-15; Mr. 1.29-31)

³⁸ Bizi babero Jesús lu'u idao' sinagoga zioguë' zan yu'u quie Simón. Bizi ben' gula quie Simón yu'unë' zla huala. Na'ra unabayëchi'yaquë' lao Jesús ta tzanë'ë lëbë'. ³⁹ Na'ra ude Jesús zionë' gan' de ben' yu'u tala huala. Caora udila Jesús xan' zla, cana' beron, laoyasatenë' bë' laze ta udao'yaquë'.

Byue Jesús ben' zë, ben' raca zhue'

(Mt. 8.16-17; Mr. 1.32-34)

⁴⁰ Baza' rdze' yehua'a yaca benë' ben' yu'u nacala yela' hue' gan' zë Jesús. Na'ra caora bda' në'ë quie quieyaquë', cana' beyacayaquë'. ⁴¹ Ca naca yaca ben' raca zhue', lëzirë bero bichi be xi'ibi' rbedyiyayacan nayacan rëbiyacan Jesús:

—Luë' naco' zi'i Diuzi.

Bizi udila Jesús leyacan bibë'në' lato inëyacan dan' neziyacan lëbë' naquë' Cristo, ben' use'ela' Diuzi.

Uda Jesús rguixogue'në' xti'idza' Diuzi estado Galilea

(Mr. 1.35-39)

⁴² Baoyani' dza tula, bro Jesús zioguë' ru'a yedyila ta sunë' tuzë'. Bizi yaca benë' reguiloyaquë' lëbë' na' bedzeleyaquë' gan' zënë'. Re'enyacuë' yega'n Jesús sunë' lënë' leyaquë' gan'. ⁴³ Na'ra una Jesús rëbinë' leyaquë':

—De tza'a yedyi tula ta tzetixogu'i' yaca benë' ca rnabë' Diuzi reya'ala' hue quieyaquë' xti'idzë'. Quie lena' use'ela' Diuzi në'ëdi'.

⁴⁴ Cana' uyo Jesús udixogue'në' xti'idza' Diuzi lu'u idao' sinagoga quie yaca yedyi estado Galilea.

5

Ca tu milagro bë Jesús con yaca ben' rze bela

(Mt. 4.18-22; Mr. 1.16-20)

¹ Bizi bdyin dza uzëguë' ru'a nisa lagun Genesaret. Lega bdyin yaca ben' zë gula hasta rquidi'yaquë' lëbë' dan' re'enyacuë' uzë'nagayaquë' xti'idza' Diuzi. ² Na'ra blë'ë Jesús chopa barco dachi zën bago ru'a nisa. Bero yaca ben' rze bela lu'un, re'yaquë' ru'a lagun rguibiyacuë' duyëxo ta rzye'yaquë' bela. ³ Na' uyu'u Jesús tu lu'u barco. Bizi barco na' nacan quie Simón. Na' gudyinë' Pedro ta udyiganë'n ta bicue'n ga'ala' ru'a nisa. Na' ure'në' laona uzulahuë' rusëdinë' yaca benë'. ⁴ Babeyudyi psëdinë' yaca benë', na' unë' rëbinë' Simón:

—Ya'lë barco ni ga naca zitu' lao lagun niga. Na' uledze' yëxo quiele lu'u nisa tacuenda tzu'un bela.

⁵ Na' una Simón rëbinë' lëbë':

—Maestro, bedu yela uyu'undo' ta sendo' bela, pero ni tuba' bibdula' quiendo'. Den' chi luë' nao', udzi'a yëxo lu'u nisa.

⁶ Bizi babdze'yaquë' yëxo lu'u nisa uyu'una bela zë gula. Tanto bedza'n uyu'un bela na', urugu du lë'ë yëxo. ⁷ Cana' bëlëyaquë' na'ayaquë' seña ta guida ben' yu'u lu'u barco tula ta gacalëyaquë' leyaquë'. Na'ra zioyaquë' psedza'yaquë' bela lao rupate barco. Tanto yela' zi'i quieyacan, bare'en yetuyacan lu'u nisa. ⁸ Bizi bë' blë'ë Simón Pedro can' guca, na' uditzu zibinë' ure'në' lao Jesús unë' rëbinë' lëbë':

—Bibi zaca' conlë luë', porque naca' ben' napa dula' xquia.

⁹ Una Simón can', dan' bdzebinë' lente yaca ben' zëlënë'. Blë'ëyaquë' can' guca uzëyaquë' bela zë gula. ¹⁰ Lëzi Santiago len bichibi' Juan, zi'i Zebedeo, nacayaquë' tuzi len Simón, bdzebitzegueyaquë'. Na'ra una Jesús rëbinë' Simón:

—Bidzebo', desde na'a cabë' ruele cuiole bela yu'u lu'u nisa, cana' ulu'ena' le'e cuiole ben' nao xneza Diuzi.

¹¹ Bizi babedyinyacuë' len barco quieyaquë' ru'a nisa, na' pca'nyaquë'n uzi'yaquë' uza'yaquë' ziolëyaquë' Jesús.

Byue Jesús ben' yu'u yela' hue' ca mal de pindo

(Mt. 8.1-4; Mr. 1.40-45)

¹² Biži bazu Jesús lao yedyi, bdyin tu ben' yu'u yela' hue' ca mal de pindo. Biži bē' blē'ēnē' Jesús, uditzu žibinē' ure'nē' bda'te laohuē' layu unabayēchi'nē' rēbinē' Jesús:

— Señor, chi re'enlo' huaca yeyuelo' nē'ēdi'.

¹³ Na'ra bda' na'a Jesús ben' na' rēbinē' lēbē':

— Re'enda' yeyua' luē'.

Ca unē' cana', biži labēzite yela' hue' naca ca mal de pindo yu'u ben' na'. ¹⁴ Na'ra bē Jesús mandado rēbinē' lēbē':

— Ni tu nunu yēbo' can' babia' quio'. Tuzi ta rnia' luē', uyo yalu'e cuinlo' lao pxuzi. Na' bē' pxuzi tu ta reya'ala' hue'lo'nē' ca ta rnabē' lē'ē guichi ley quie Moisés tanun quie babeyēriilo'. Huelo' can' ta inezi yaca benē' babeži yela' hue' yu'u'ulo'.

¹⁵ Pero mazeru unēzi yaca benē' cabē' rue Jesús. Bdyin ben' zē gula gan' zēnē' ta rzēnagayaquē' ca rnē', lēzirē ta yeyuerēnē' nacala yela' hue' yu'uyaquē'. ¹⁶ Biži zio Jesús lao lato ga binita' yaca benē'. Lēgan' na' rulidzē' ru'elēnē' Diuzi di'idza'.

Beyue Jesús tu ben' zi

(Mt. 9.1-8; Mr. 2.1-12)

¹⁷ Biži bdyin tu dza rusēdi Jesús yaca benē'. Lēgan' na' re' yaca ben' naca partido fariseo len yaca ben' rsēdi ley quie Moisés. Uza'yaquē' yedyi quie estado Galilea len yedyi quie estado Judea, len ciudad Jerusalén. Biži na'a, conlē yela' huaca quienē', gucalē Diuzi Jesús, beyuenē' yaca ben' raca žhue'. ¹⁸ Lēscana' bdyin yaca ben' nu'a ben' ži lao belaga. Re'enyacuē' udze'yaquē' lēbē' lu'u yu'ute ta quixoyaquē' lēbē' lao Jesús. ¹⁹ Biži biuzaquē'yaquē' tzu'ulēyaquē' ben' ži lu'u yu'u dan' nita' ben' zē gula. Na' urēyaquē' lun yu'u udubayaquē' teja, bzuyaquē' tu yero cuenda pchizayaquē' belaga ga žuba ben' ži, psedyinyaquē' lēbē' gatzo lao' ga nita' benē' zaquē'lao lao Jesús. ²⁰ Caora blē'ē Jesús rueyaquē' pensari huaca Jesús yeyuenē' ben' ži, na'ra unē' rēbinē' lēbē':

— Rnia' luē', aoži'žia' dula' xquia quio'.

²¹ Biži yaca ben' rsēdi ley quie Moisés, len yaca ben' naca partido fariseo, gucayaquē' pensari unayaquē': “žNuži ben' niga rnaya'nē' Diuzi rnē' can'? Ni tu benē' bisaque' yezi'žeyaquē' dula' xquia quie laguedyiaquē'. Tuzi Diuzi naquē' ben' yezi'že quiero.”

²² Na'ra banezi Jesús cabē' naca pensari racayaquē'. Na' una Jesús rēbinē' leyaquē':

— žBixquien' racale pensari cana'? ²³ žCa nurlan nacaran yalo hua' quie ben' ži niga? žNacaran yalo chi yēpa'nē': “Aoži'žia' dula' xquia quio'”, o chi nacaran yalo yēpa'nē': “Uyasa, beži' belaga quio', beza', beyo”? ²⁴ Pues cani hua' ta ulu'ena' le'e de yela' rnabē' quia', naca' bichi yugulu benē', ta yezi'žia' dula' xquia quie yaca ben' nita' lao yedyi layu.

Na'ra unē' rēbinē' ben' ži:

— Rnia' luē', beyasa, beži' belaga quio', beyo žan yu'u quio'.

²⁵ Cana' labeyasate ben' ži zaca'lao yaca ben' nita' rna', beži'nē' yada quiē' ga uzubanē'. Na' bezē'ē zeyoguē' žan yu'u quiē' ruenē' Diuzi ben' že. ²⁶ Biži lao yugulute yaca ben' nita' rna', bēyaquē' Diuzi ben' že. Tu bebanziyaquē' can' guca quie ben' ži. Du rdzēbiyaquē' unayaquē' rēbiyaquē' laguedyiaquē':

— Tu ta binelē'ēro babē ben' niga.

Ulio Jesús Leví

(Mt. 9.9-13; Mr. 2.13-17)

²⁷ Ude beyudyi bē Jesús can', uzē'ē žioguē' blē'ēnē' tu ben' huequižu laonē' Leví. Lēben' na' re'nē' ga rquizuguē' benē'. Na' unē' rēbinē' lēbē':

— Uda, unao nē'ēdi'.

²⁸ Biži uzuli Leví pca'nnē' ta de quienē' žioguē' naohuē' Jesús.

²⁹ Ude na', bē Leví tu lani že žan yu'u quienē' ruenē' Jesús ben' že. Lēzi bdyinrē mazara ben' huequižu, len yaca ben' tula ure'yaquē' lao mesa. ³⁰ Biži yaca ben' naca partido fariseo, len yaca ben' rsēdi ley quie Moisés udilayaquē' ben' quie Jesús unayaquē' rēbiyaquē' leyaquē':

— žBixquien' raole ri'olēle tzaže len yaca ben' huequižu, len yaca ben' de dula' xquia quie?

³¹ Na'ra una Jesús rēbinē' leyaquē':

— Ben' zu dya'a, ben' biraca žhue', biruen ži guida ben' yeyue lēbē'. Pero ben' raca žhue', ruen ži guida ben' yeyue lēbē'. ³² Cala bida' rbioga' yaca ben' raca pensari bibi dula' xquia quie de, dechan' bida' rbioga' yaca ben' nezi de dula' xquia quie tacuenda yetza'yaquē' pensari quieyaquē'.

Unabayaquē' Jesús quie ubasi

(Mt. 9.14-17; Mr. 2.18-22)

³³ Na'ra unabayaquē' rēbiyaquē' Jesús:

—Ablè'èndo' yaca ben' quie Juan len yaca ben' naca partido fariseo, rueyaquè' ubasi rli dzayaquè' Diuzi yugu dza, na' yaca ben' quio', ¿bixquien' ri' o raoziyaquè', biruejè' ubasi? ³⁴ Na'ra una Jesús rëbinè' leyaquè':

—¿Re'enle hue yaca ben' naca amigo, yaca ben' babdyin gan' raca huetzagana' ubasi tu nezu ben' utzagana' len yaca amigo quienè'? ³⁵ Bizi rnia' le'e, huadyin dza cati bira zulè ben' utzagana' len yaca amigo quienè'. Lëscana'ra hue yaca amigo quienè' ubasi.

³⁶ Lëzi unè Jesús itu ejemplo cani:

—Bireya'ala' yeda' la'ari' cubi lè'è la'ari' gula cati binetzèri la'ari' cubi. Huaza'laoran ichezan la'ari' gula, udyiagu'ran len, biyega'nnan lëbizi. ³⁷ Lëscan' bireya'ala' ca'ro nupi zixi tu lu'u guidi bolsa gula, porque chi ca'ro nupi zixi lu'u guidi bolsa gula, huachezan len huabiagu' lao rupa cue'n. ³⁸ Lena' re'ennan tzudzu nupi zixi lu'u bolsa guidi cubi ta sibe'n zi dza, birezan. Lëcana' bicuiagu' lao rupaten. ³⁹ Lëscan' quie nu ben' ri' o puro nupi huala bire' enyaquè' yo' oyaquè' nupi zixi. Huanayaquè': "Nupi huala nacaran huen ta yo'oro."

6

Uditzu ben' quie Jesús lao trigo dza huezila'adyi'

(Mt. 12.1-8; Mr. 2.23-28)

¹ Bizi guca tu dza huezila'adyi', uza' Jesús lënè' yaca ben' quienè' zioyaquè' udeyaquè' layela ga neduza trigo. Na' uditzu yaca ben' quienè' laon ta rchibiyaquè'n ta gaoyaquè'n.

² Na'ra una yaca ben' naca partido fariseo rëbiyaquè' Jesús:

—¿Bixquien' ruele dyin uditzule lao bini trigo na'a dza huezila'adyi', dza bireya'ala' huero dyin?

³ Na'ra una Jesús rëbinè' leyaquè':

—¿Binelabale lè'è guichi la'iya quie Diuzi cabè' bè rey David dza uduenè' lënè' yaca benè' quienè'? ⁴ Uyu'unè' lu'u idao' r nabè'ra, uzi'nè' yèta xtila naca la'iya ta ru'e pxuzi Diuzi. Na' udao rey David len, lëscan' bè'nè'n yaca ben' dzaganè'. Caora na' udaoyaquè' ta bireya'ala' gaoyaquè'. Udaoyaquè' ta reya'ala' gao pxuzizi.

⁵ Na' unè Jesús rëbinè' leyaquè':

—Nè'èdi', bichi yugulu benè', de yela' r nabè' quia' ta hua' mandado bi hue yaca benè' dza huezila'adyi'.

Buye Jesús tu ben' neseco në'è

(Mt. 12.9-14; Mr. 3.1-6)

⁶ Bizi bezu itu dza, dza huezila'adyi', uyu'u Jesús lu'u idao' sinagoga bezulaohuè' rusèdiguè' benè'. Bi zi na'a zè tu ben' neseco në'è yebè. ⁷ Lëzi zèrè ben' rsèdi ley quie Moisés, len yaca ben' naca partido fariseo, rbe'naoyaquè' chi hueyue Jesús ben' neseco në'è dza huezila'adyi' tacuenda ga gaoyaquè' lëbè' xquia. ⁸ Pero banezi Jesús ca naca pensari quieyaquè'. Na'ra unè' blidzè' ben' na'a bidyi:

—Rnia' luè', uzuli uda, desè gatzo lao' ni.

Na'ra ude ben' neseco në'è, yasè'nè' gatzo lao'. ⁹ Na'ra una Jesús rëbinè' leyaquè':

—Re'ender inabacara' le'e tu di'idza' ¿ca bidan' reya'ala' huero dza huezila'adyi'? ¿Ru'en lato huero tahuen o huero tamala? ¿Ru'en lato ute uselaro benè' o chi gutiro benè'?

¹⁰ Bizi Jesús una'nè' yaca ben' nita' gan' zènè'. Ude na' unè' rëbinè' ben' neseco në'è:

—Bli na'alo'.

Caora bli na'a ben' neseco në'è, beyacaten dya'a. ¹¹ Bizi yaca ben' nita' na', lega bdza'tzegueyaquè' unayaquè' rëbiyaquè' lague dyiyaquè':

—¿Ca bizi huero quie ben' niga ta bira huenè' ca ruenè'?

Ulio Jesús lao chipchopa ben' gaca ben' quienè'

(Mt. 10.1-4; Mr. 3.13-19)

¹² Bizi bezu dza tula uza' Jesús uyoguè' ga zu tu ya'a ta hue'lënè' Diuzi di'idza'. Lao bedu yela bè'lënè' Diuzi di'idza'. ¹³ Bizi baoyeni' dza tula, guzinè' yaca ben' quiè', ulioguè' lao chipchopa yaca ben' gaca ben' quiè', ben' gaca apóstol. ¹⁴ Lëyaca ben' rguixogue'n laohue niga: Ulioguè' Simón, na' uxuba Jesús laohuè' Pedro. Lëscan' ulioguè' Andrés, bi' bichi Simón, len Santiago, len Juan, len Felipe, len Bartolomé, ¹⁵ len Mateo, len Tomás, len Santiago zi'i Alfeo, len Simón, ben' naca tu cue' partido cananista, ¹⁶ len Judas, bi' bichi Santiago, len Judas Iscariote, ben' usedyin Jesús lao na'a yaca ben' r nabè'.

Psèdi Jesús yaca ben' zè

(Mt. 4.23-25)

¹⁷ Na' beyèzi Jesús lao ya'a len yaca ben' quienè'. Yazèyaquè' ga naca yu lachi'. Lëgan' na' nita' ben' zè. Lëgan' na' zèrè ben' uza' estado Judea, len ben' nita' ciudad Jerusalén, len yaca ben' uza'rè bago ru'a nisadao' ga re' yedyi Tiro len yedyi Sidón. Lëleyaquè' bdyinyaquè' ta

uzēnagayaquē' bi na Jesús len ta yeyue Jesús yaca ben' raca zhue'. ¹⁸ Yaca ben' redzagalao, yaca ben' yu'u bichi be xi'ibi', beyue Jesús leyaquē' beyacayaquē'. ¹⁹ Lao yugulu yaca benē' re'enaquē' uda' na'ayaquē' Jesús, dan' nezियाquē' con yela' huaca quienē' yeyuenē' leyaquē' chi bi yela' hue' yu'uyaquē'.

Ca gaca ta yedaohuero len ca gaca ta biyedaohuero
(Mt. 5.1-12)

²⁰ Na'ra una' Jesús yaca ben' quienē' na' unē':

—Yedaohue le'e chi racayēchi'le ca naca dula' xquia babēle, dan' naca quiele ga r nabē' Diuzi.

²¹ Yedaohue le'e chi re'enle gata' ta yu'u ni'a xnezi quie Diuzi cabē' gue'en ben' rdue gaohue', porque dan' gata'cazi quiele ca re'enle gata'.

Yedaohue le'e chi racayēchi'le rbedyile ca dula' xquia de lao yedyi layu, porque dan' huadyin dza sule gusto uzīdyile.

²² Yedaohue le'e cati rudie benē' le'e, cati rbioyaquē' le'e tzala'la, cati utasi unioyaquē' le'e, cati inēyaquē' nacale ben' mala tanun quie dan' naole nē'ēdi', ben' naca bichi yugulu benē'. ²³ Reya'ala' yedaohuetzeguele bē' gaca quiele cana', dan' huata' tu tadya'a gula quiele cati bazule guibá. Con can' psaca xuzixta'o yaca ben' nita' na'a, udila unēlēyaquē' yaca ben' udixogue' xti'idza' Diuzi, cana' usacarēyaquē' le'e.

²⁴ Beyēchi' gula nacan quie le'e, ben' uña'a, ben' binao xneza Diuzi, porque ca tu ta dezi lao dylayu niga naca quiele, bira gata' mazara.

²⁵ Beyēchi' gula nacan quie le'e, ben' detzague ta gao, ben' birlidza Diuzi, porque huadyin dza tuele, bira gata' ta gaole.

Beyēchi' gula nacan quie le'e, ben' redaohue ružidyi, ben' birue quie xti'idza' Diuzi, porque huadyin dza cuedyile cabē' bayēchi' za' gaca quiele.

²⁶ Beyēchi' gula nacan quie le'e, chi ilē'ē yugulu benē' le'e ben' dya'a, dechan' bi-nacale ben' dya'a, porque cana' bē xuzixta'o ben' niga, blē'ēyaquē' ben' dya'a ben' nazi rguxogue'yaquē' xti'idza' Diuzi, den' ben' huizi' yē'.

Reya'ala' idyē'ēro yaca ben' rudie ra'o
(Mt. 5.38-48; 7.12)

Na' una Jesús rēbinē' leyaquē':

²⁷ —Pero le'e ben' ružēnaga ca rnia', reya'ala' idyē'ēle yaca ben' rdza' rgūin' le'e, huele tadya'a lēle ben' rudie le'e. ²⁸ Inabale tadya'a lao Diuzi quie ben' rudze'de' le'e, ulidzale Diuzi gaca tahuen quie ben' rutasi runio le'e. ²⁹ Chi nu benē' rgapa' xagale, ulehue'nē' itzala'n capanē'. Chi nu benē' rguba gabán quiele, ulehue'nē' lente camisa quiele. ³⁰ Ulehue' nutezi benē' ta inabayaquē' le'e. Chi nu yaca ben' aozī'yaquē' ta de quiele, biyenabalen. ³¹ Ulehuelē yaca benē' con cabē' re'enle huelē yaca benē' le'e.

³² Chi le'e nedyē'ēle tuzi ben' nedyē'ē le'e, bihuele pensari tadya'a ruele, porque lente yaca ben' mala ruerēyaquē' can'. ³³ Chi le'e ruele tadya'a len tuzi ben' rue tadya'a len le'e, bihuele pensari tadya'a ruele, porque lente yaca ben' mala ruerēyaquē' can'. ³⁴ Chi le'e hue'le presta tuzi ben' runrē le'e presta, bihuele pensari tadya'a ruele, porque lente yaca ben' mala ru'erēyaquē' presta tuzi ben' ru'erē presta leyaquē'. ³⁵ Pero le'e, reya'ala' idyē'ēle ben' rudie le'e, reya'ala' huelēle yaca benē' dya'a, reya'ala' hue'leyaquē' ta inabayaquē' presta, biinabale yeyueyaquē' laohue quiele. Chi huele cabē' rnia', tazera gun Diuzi quiele. Chi huele cabē' rnia', lena' ulu'en tali nacale ben' quie Diuzi zu sibi. Rnia' le'e, huele ca rue Diuzi, porque naca Diuzi ben' dya'a gula. Tuzi ca rue Diuzi ruenē' tadya'a lente yaca ben' birēbi lēbē' diuxcalelo', ben' birue tahuen. ³⁶ Reya'ala' idyē'ēle yaca benē' cabē' nedyē'ē Xuziro Diuzi yaca benē'.

Bireya'ala' inēbizoro quie laguedyiro
(Mt. 7.1-5)

Na' una Jesús:

³⁷ —Biinēbizole quie laguedyile, cana' biyeyue bizo Diuzi len le'e. Biudyiagui'le laguedyile, yela' na' biudyiagui'rē Diuzi le'e. Yezi'zele quie laguedyile, yela' na' yezi'zerē Diuzi quiele. ³⁸ Hue'le ta de quiele ben' bide quie, cana' yeyun Diuzi le'e ta de quienē'. Ca rue Diuzi biyeyunnē' lē'ēt'zin, hueyunnē' mazara ta yuñ'a'a ta de quienē'. Con ca huelēle laguedyile, cana' huelē Diuzi le'e.

³⁹ Na'ra una Jesús unē' tu chopa di'idza' ni:

—¿Huazaque' usa' tu ben' laochula itu ben' laochula? ¿Cala huaguinu lao rupateyaquē' lu'u ga naca stēbi? ⁴⁰ Nu ben' bineyudyi huesēdi quie, binegaquē' ca raca maestro quienē'. Pero nu ben' babeyudyi huesēdi quie, na'ra gacanē' ca tu raca maestro quienē'.

⁴¹ ¿Como dyè'èdi rna'le bëbi dao' yu'u lu'u lao bi' bichile? ¿Na' laole le'e, birna'le yu'un bicho yaga? ⁴² ¿Como reyažole rèbile bi' bichile: "Bicha', ben lato yebioga' bëbi dao' yu'u laolo"? ¿Na' birezaquele quiele cuinle yu'un bicho yaga? ¡Le'e ben' birue tuzi ca nale! Tanëro ulebïo bicho yaga yu'u lu'u laole, cana'ra hualè'ële dyè'èdi ta yebiola bëbi dao' yu'u lao bi' bichile.

Según ca naca ta rbialao yaga, rlè'ëro chi yaga dya'a, chi yaga median
(Mt. 7.17-20; 12.33-35)

Na' una Jesús:

⁴³ —Birbia yaga dya'a tu ta naca sla'. Lëzirë birbia tazixi yaga median. ⁴⁴ Pues quie quie yaga rlè'ëro chi yaga dya'a, chi yaga median, según ca naca ta rbialaon. Bicuia higos lao yaga yëchi'. Lëscan' bicuia bedzuli' lao luba yëchi'. ⁴⁵ Lëzi be'mbyu huen, di'idza' huen rero lu'u laxta'onè' rnènè'. Na' bëzi be'mbyu mala, di'idza' mala rero lu'u laxta'onè' rnènè'. Porque dan' según ca naca ta yu'u lu'u laxta'o benè', chi tahuen, chi tamala, cana' iron lu'u laxta'oyaquè' inëyaquè'.

Ga ru'en di'idza' quie lao rupa cue' ga bëyaquè' yu'u
(Mt. 7.24-27)

Na' una Jesús:

⁴⁶ —¿Bixquien' nale në'èdi', "Señor, Señor", na' birue quiele ca rnia'? ⁴⁷ Nia' le'e ca naca quie ben' nao në'èdi', ben' rue quie ca nia'. ⁴⁸ Lëcana' naca quie ben' bë yu'u quie, pqui'nnè' zitu' lu'u yu ta pcuta'nè' besu quie yu'u. Caora baben tu yusiu' huala, biužaque'n usuri'n besu, dan' yu'un zitu' yu. ⁴⁹ Na' bëzi ben' re ca rnia', pero biruenè' në'èdi' casa ca rnia', naca quiè' ca quie ben' pcuta' besu delao yuzi. Caora baben tu yusiu' huala, caora na' pquinun besu, bguinu yu'u, bega'nten lao lato.

7

Beyue Jesús ben' criado quie ben' romano, ben' naca xan' soldado
(Mt. 8.5-13)

¹ Bizi cati beyudyi unë Jesús gudyinè' yaca benè', na' bezè'ë zïoguè' yedyi Capernaum. ² Lëgan' na' zu tu ben' romano, ben' rnabè' soldado, naquè' capitán. Bizi zu tu criado quienè', ben' nedyè'ënè', tahuala raca žhue'nè', bagazi gatinè'. ³ Bizi cati be capitán babdyin Jesús gan', na' use'elè' tu ben' rnabè' quie yaca ben' Israel ta inabayëchi'nè' chi biguida Jesús yeyuenè' ben' de raca žhue'. ⁴ Bizi bè' bdyinyaquè' ga zè Jesús, na' unëyëchi'yaquè' rëbiyaquè' lëbè':

—Ben' naca xan' soldado, naquè' ben' huen, zaca'nè' huelo' ca cule re'ennè', ⁵ dan' rlè'ënè' yaca ben' yedyi quiero ben' huen. Lëlëbè' bënè' mandado bëyaquè' idao' sinagoga quiero.

⁶ Na'ra uza' Jesús ziolënè' leyaquè'. Bizi baidyinyaquè' bago žan yu'u quie xan' soldado, na' use'ela' xan' soldado yaca ben' nacalënè' amigo rëbiyaquè' Jesús:

—Señor, ni tu bigaco' zëdi, porque bibi zaca' ta guido' tzu'ulo' lu'u yu'u quia'. ⁷ Tana' lena' bibeyažoga' guida' cuina' dena'a luè'. Con tu di'idza'zi inao' iyaca criado quia' hueyacabi'. ⁸ Bizi zu ben' rnabè' në'èdi'. Lëzirë nacaria' ben' rnabè' quie soldado. Cati hua' mandado ga tziyoaquè', huayoyaquè'. Lëzi cati hua' mandado guidayaquè', huidayaquè'. Lëzi cati rueria' mandado criado quia', ruebi' yugute ta rua'bi' mandado.

⁹ Cati be Jesús ca una xan' soldado, tu bebanzi Jesús ca unè'. Na'ra una'nè' ga nita' yaca ben' nao lëbè', unè' rëbinè' leyaquè':

—Tali nacan. Ni tu yaca ben' Israel, binelè'ëda' ben' hue quie cabè' rue ben' niga, rzudyi'ilënè' në'èdi'.

¹⁰ Bizi bè' bedyin yaca ben' use'ela' xan' soldado žan yu'u quiè', bedyinyaquè' rna'yaquè' babeyaca ben' criado, ben' raca žhue'.

Beseban Jesús zi'i nigula nati xquiuhue

¹¹ Baode guca can', na' uza' Jesús ziolënè' yaca ben' quienè' yedyi lao Naïn. Lëzi ziorë ben' zè len leyaquè'. ¹² Bizi cati bdyin Jesús bago ru'a yedyi, blè'ënè' banu'ayaquè' ben' huati ta tzacachi'yaquè' lëbi'. Bizi bi' guti nacabi' zi'i nigula nati xquiuhue. Tuzi bi' na' uzu quienè'. Ziolë yaca ben' zè, ben' lao yedyi, len nigula na'. ¹³ Bizi bè' blè'ë Jesús nigula na', beyëchi'la'adyi'nè' lëbè', unè' rëbinè' lëbè':

—Bicuedyo'.

¹⁴ Na' ubiga' Jesús yeda' në'è lè'ë caja quie bi' huati. Cana' uleza yaca ben' nu'a lëbi'. Na'ra unë Jesús rëbinè' bi' huati:

—Xcuidi', rnia' luè': ¡Beyasa!

¹⁵ Caora na' uyasabi' gan' debi' lu'u caja quiebi', are'bi', rnëbi'. Na'ra beyu'e Jesús lëbi' zna'bi'. ¹⁶ Biži caora blë'ë yaca ben' nita' na', lega bdzebiyaquë'. Bëyaquë' Diuzi ben' ze unayaquë' rëbiyaquë' lagueydiyaquë':

—Babla' tu ben' rue yela' huaca, ben' use'ela' Diuzi ladoro gan' nita'ro.

Lëzi unarëyaquë':

—Diuzi baose'elë' ben' ni ta gacalënë' ben' Israel, ben' yedyi quienë'.

¹⁷ Cana' guca unezi yaca ben' quie estado Judea, len yaca ben' yedyi re' bago con can' bë Jesús.

Aose'ela' Juan ben' quienë' ta yenabayaquë' Jesús tu di'idza'

(Mt. 11.2-19)

¹⁸ Biži be Juan cabë' yela' huaca bë Jesús nun quie gudyi ben' quienë' lëbë' cabë' rue Jesús. ¹⁹ Cana' gužinë' chopa ben' quienë' ta uyoyaquë' yenabayaquë' Jesús chi tali naquë' ben' una Diuzi ise'ela'në', ben' rbezayaquë' guida, o chi cala lëbë'. ²⁰ Yaca ben' use'ela' Juan bdyinyaquë' ga zë Jesús rëbiyaquë' lëbë':

—Use'ela' Juan bautista nëto' ta denabando' luë' chi naco' ben' una Diuzi ise'ela'në', o chi reya'ala' nita'ndo' cuezando' guida ben' tula.

²¹ Biži caora nita'lëyaquë' Jesús, blë'ëyaquë' beyue Jesús nacala yela' hue' mala yu'u yaca benë', beyacayaquë'. Lëzi blë'ëyaquë' bebionë' bichi be xi'ibi' yu'u yaca benë', blë'ëyaquë' beyuenë' yaca ben' laochula, ben' birlë'ë, belë'ëyaquë'. ²² Na'ra una Jesús rëbinë' yaca ben' quie Juan:

—Uleyo uletzetixogue' Juan ca ta babia' bablë'ële babele. Uleyëbinë' quie yaca ben' laochula, barelë'ëyaquë', lëscan' quie yaca ben' zi, baredayaquë', lëscan' quie yaca ben' yu'u yela' hue' ca mal de pindo, areyëriyaquë', lëscan' quie yaca ben' xcuedzo, bareyeyaquë', lëscan' quie yaca ben' baguti, rebanyaquë' tatula. Na' biži yaca ben' yëchi', rguixogui'ayaquë' di'idza' la'iya quie Diuzi. ²³ Yedaohue yaca ben' biyeyati inao në'ëdi'. —Cana' una Jesús gudyinë' ben' quie Juan.

²⁴ Biži cati zeyo yaca ben' use'ela' Juan, na' uzulao Jesús rëbinë' yaca benë' ca naca quie Juan, unë' rëbinë' leyaquë':

—¿Nuži uyole yena'le lao lato ga bidyia yu'u? ¿Uyole yena'le tu ben' yun'la'adyi' ca raca tu zisi rzizi rdan bë' rda be bedun'? ²⁵ Chi biuyole yena'le ben' yun'la'adyi', ¿nuži uyole yena'le? ¿Uyole yena'le ben' zutzao', ben' naco la'ari' dya'a? Le'e dyë'ëdi banezile ben' naco la'ari' dya'a, ben' zu lu'u yu'u dya'a, nita'yaquë' lao' yedyi ga zu rey, binita'yaquë' lao lato ga bidyia yu'u. ²⁶ Pues ca rnia' le'e, ¿nuži uyole yena'le? ¿Uyole yena'le ben' rguixogue' di'idza' la'iya quie Diuzi? Talicazi rguixogue' Juan di'idza' la'iya quie Diuzi. Nacarë' ben' ze ca ben' udixogue' xti'idza' Diuzi dza na'tela. ²⁷ Lëquie Juan rnën lë'ë guichi la'iya quie Diuzi cani: Huase'ela' ben' cuialao neza tzetixogue'në' yaca benë' yëbinë' leyaquë' cani:

“Ca rue ben' rluca neza, ben' rue dya'a xnezí, cana' huele utza'le pensari quiele, dan' baza' ben' ise'ela' Diuzi.”

Cana' rnën lë'ë guichi la'iya quie Diuzi. ²⁸ Na'ra ca rnia' le'e, entre lado yaca ben' nita' lao yedyi layu niga, nunura ben' udixogue' xti'idza' Diuzi zu nacara ze ca Juan. Na' biži, ben' zu guibá, ben' birnabë'tica ga zu Diuzi, nacaranë' ze ca Juan.

²⁹ Na' biži yaca ben' huequižu, ben' bë' Juan laohue, len yaca los demás ben' bë' Juan laohue, caora beyaquë' ca una Jesús, bezaqueyaquë' naca Diuzi ben' rue tali, ben' rue ta yu'u ni'a xnezí. ³⁰ Na' biži yaca ben' partido fariseo, len yaca ben' rusëdi ley quie Moisés, yaca ben' bibë lato hue' Juan laohue, bigu'unyaquë' ca tadya'a gu'un Diuzi hue Juan quieyaquë'. ³¹ Na' una Jesús rëbinë' yaca ben' na':

—¿Ca bi ejemplo ulu'en cabë' naca pensari quie yaca ben' nita' na'a? ¿Ca bi ejemplo rnaban ta hua' di'idza' cabë' rueyaquë'? ³² Rue yaca ben' nita' na'a ca quie xcuidi' re' lao ye'eya rëbiyacabi' lagueydiyacabi': “Rcuedyindo' flauta, na'ra biquitule biuya'ale. Rulando' canción bayëchi', lëscan' biuredyile.” ³³ Cana' naca quiele, porque bida Juan bautista, biudaonë' pan, bihue'enë' vino, na' le'e unale yu'unë' bichi be xi'ibi'. ³⁴ Lëzi në'ëdi', bichi yugulu benë', bida' raohua' ri'oga', na' le'e unale naca ben' ri'o raolë'ë, ben' naca amigo quie ben' de dula' xquia quie, len yaca ben' huequižu. ³⁵ Pero yaca ben' naocazi xneza Diuzi, lëleyaquë' rulu'ëyaquë' ca naca quie yela' rioñe' quie Diuzi.

Jesús unë'ë' di'idza' ni zan yu'u quie Simón, ben' naca partido fariseo

³⁶ Biži gudyi tu ben' naca partido fariseo Jesús chi biguidë' zan yu'u quienë' ta gaohué'. Na'ra bdyin Jesús uyunë' lu'u yu'u ure'në' lao mesa. ³⁷ Lëlao yedyi na' zu tu nigula mala. Caora unezinë' babdyin Jesús zan yu'u quie ben' naca partido fariseo, na'ra uzë'ë zan yu'u quie' nu'ë tu frasco alabastro yudzón aceite rla' žixi žeo. ³⁸ Na' ure'në' xni'a Jesús uzulaonë' rbedyinë', rla'onë' nisa rero laohué' ni'a Jesús. Ude na' rzi'në' guitza' guichonë' resebidyinë' ni'a Jesús, raonë' situ ni'a Jesús, uži'në' aceite rla' žixi žeo, bla'onë'n ni'a Jesús.

³⁹ Biži ben' naca partido fariseo, ben' bē' ta udao Jesús, cati blē'ēnē' cabē' bē nigula, na' guquē' pensari unē': "Chi tali ben' niga naquē' ben' use'ela' Diuzi, huacabē'nē' ca naca nigula rqui' lēnē', dan' naquē' nigula mala." ⁴⁰ Na'ra una Jesús rēbinē' Simón:

—Simón, re'lenda' inia' luē' tu di'idza'.

Na'ra una Simón rēbinē' Jesús:

—Una nē'ēdi', maestro.

⁴¹ Na'ra una Jesús rēbinē' lēbē':

—Uzu chopa be'mbyu reya'ala'yaquē' dumi quie ben' rue presta dumi. Tunē' reya'alē' ga'yo' gayuhua dumi plata. Na' itunē' reya'alē' gatzo gayuhua. ⁴² Na' como lao rupayaquē' biuzaque'yaquē' yeyu'eyaquē' ben' unabayaquē' presta dumi, quie lao rupateyaquē' bezi'ze ben' unabayaquē' presta dumi. Na'ra rnaba' luē' tu di'idza': Lao rupayaquē', Ꝁca nulayaquē' lao rupayaquē' reya'ala' gacayaquē' agradecer mazara quie ben' na'?

⁴³ Na'ra una Simón rēbinē' Jesús:

—Raqueda' ben' reya'ala' yalao quie ben' bē presta dumi.

Na'ra una Jesús rēbinē' lēbē':

—Napo' rson cabē' unao'.

⁴⁴ Biži beyēcho Jesús rna'nē' gan' zē nigula, unē' rēbinē' Simón:

—ꝀRlē'ēlo' nigula niga? Nē'ēdi' baoyu'a lu'u yu'u quio', na' bibenlo' nisa tzēri ni'a. Na' nigula niga baodibinē' ni'a con nisa uredyinē' besebidyinē'n con guitza' guichonē'. ⁴⁵ Baoyu'a lu'u yu'u quio', na' biudaolo' situ xaga' ca naca costumbre de quiero. Pero desde uyu'a lu'u yu'u quio', birsan nigula ni raonē' situ ni'a. ⁴⁶ Bibla'olo' aceite guichoga' ca naca costumbre de quiero, na' nigula niga babla'onē'n ni'a aceite rla' zixi zeo. ⁴⁷ Quie lena' rnia' luē', ca tu ta nedyē'ē nigula niga nē'ēdi', lena' rulu'en nezinē' de yela' huenitilao quienē' ca nacala tamala babēnē'. Pero nu ben' bē lē'ēti'zi tamala, lēzi lē'ēti'zi nedyē'ēnē' ben' bezi'ze quienē'.

⁴⁸ Na'ra una Jesús rēbinē' nigula:

—Abezi'zia' ca naca dula' xquia babao'.

⁴⁹ Na' biži yaca ben' dyiarē lao mesa, yaca ben' bdyinrē udao, unayaquē' laguedyiyaquē':

—ꝀNuži naca ben' niga yezi'zenē' quie dula' xquia quie benē'?

⁵⁰ Na'ra una Jesús rēbinē' nigula:

—Dan' rzudyi'ilēlo' nē'ēdi', babeyēri'lo' lao Diuzi. Beyo, bira idēbilo' quie dula' xquia quio'.

8

Gualē yaca nigula Jesús

¹ Ude beyudyi uzu Jesús lidyi Simón, na' uza'lēnē' lao chipchopa ben' quienē'. Zioyaquē' yedyi tu yedyi rguixoguenē' yaca benē' cabē' naca yela' r nabē' quie Diuzi. ² Lēzi ziorē yaca nigula len Jesús. Lēyaca nigula beyue Jesús yela' hue' yu'uyaquē', bebionē' bichi be xi'ibi' yu'uyaquē'. Ladoyaquē' na' ziorē ben' lao María Magdalena. Lēlēbē' bebio Jesús gadyi bichi be xi'ibi' uyu'unē'. ³ Lēzi ziorē tu nigula lao Juana, Ꝁgula ben' lao Chuza, ben' naca gobierno quie rey Herodes. Lēzi ziorē itu nigula lao Susana, len yaca nigula bē'rē ta de quieyaquē' ta gualēyaquē' Jesús.

Ga una Jesús tu di'idza' quie ben' raza bini trigo

(Mt. 13.1-9; Mr. 4.1-9)

⁴ Biži ca zioyaquē' yedyi tu yedyi bdyin yaca ben' zē ga zē Jesús. Caora babdupa ben' zē gan' zēnē', na'ra unē' tu di'idza' ta nacan irupa iyunala rēbinē' leyaquē' cani:

⁵ —Zio tu ben' gaza bini trigo. Caora rزالانē' bini trigo ca costumbre quieyaquē', bala bini yaque'n tu neza, na' ude ja benē' bliojē'n, lēscan' aodaorē yaca bguini len. ⁶ Ibalā bini trigo yaque'n lao yo ga Ꝁuba tzaye'zi yu. Bē' ulēn ubidyin, dan' binacan tubelaozi yu. ⁷ Ibalā bini trigo yaque'n ga rlē guixi' yēchi'. Biži guixi' yēchi' gu'unin, na' bdyiaguin bini trigo. ⁸ Ibalā bini trigo yaque'n ga naca tubelaozi yu. Gu'unin huen bē'n usecho dya'a. Udyian tu gayuhua bini trigo quie lao tu ni'an.

Beyudyi unē Jesús di'idza' unē' zidzo unē':

—Le'e babe, ulezē nagale can' rnia'.

Una Jesús ga huen dyin di'idza' rusēdinē' benē'

(Mt. 13.10-17; Mr. 4.10-12)

⁹ Na'ra unaba yaca ben' quie Jesús ga huen dyin di'idza' unē'. ¹⁰ Na'ra unē' rēbinē' yaca ben' quie':

—Uziōñe'cazi Diuzi le'e ca naca quie yela' r nabē' quienē'. Na' yaca ben' tula, rēba' leyaquē' conlē di'idza' ta nacan irupa iyunala como dan' ba'ala'cazi rlē'ēyaquē', rueyaquē' ca ben' birlē'ē, ba'ala'cazi reyaquē', rueyaquē' ca ben' birioñe'e.

Ga bexi'idzè' Jesús quie di'idza' unè'
(Mt. 13.18-23; Mr. 4.13-20)

Na' una Jesús:

¹¹ Cani naca quie di'idza' ta nacan irupa iyunala: Bini trigo ruen ca quie xti'idza' Diuzi. ¹² Na' bini yaque' tu neza, ruen ca quie benè' babzè'naga xti'idza' Diuzi, pero bizi za' xan' taxi'ibi' reguban ca naca di'idza' babeyaqué' ta bira hue quieyaqué'n, biyeyèriyaqué' lao Diuzi. ¹³ Na' bini yaque' lao yo ga žuba tzaye'zi yu, ruen ca quie ben' babzè'naga xti'idza' Diuzi, na' uyezila'adyi'yaqué'n bè quieyaqué'n tu chi'. Pero dan' nacayaqué' ca quie lue bini biuyu'un zitu' yu, quie lena' tu chi'zi bè quieyaqué'n. Cati guta' zèdi quieyaqué', na' psanyaqué', bira bè quieyaqué'n. ¹⁴ Na' bini yaque' ga rlè guixi' yèchi', ruen ca quie ben' bzè'naga xti'idza' Diuzi, pero bibè quieyaqué'n. Naoziyaqué' neza quieyaqué', rdèbiyaqué' quie dza rdayaqué' lao yedyi layu, rza'la'adyi'yaqué' ta de lao dylilayu. Lèlèyaqué' naca quieyaqué' ca quie bini bibè' usecho. ¹⁵ Na' bini yaque' lao tubelaozi yu, ruen ca quie ben' bzè'naga xti'idza' Diuzi, na' bèyaqué' quieyaqué'n. Du guicho du la'adyi'yaqué' naoyaqué'n. Lèlèyaqué' naca quieyaqué' ca quie bini bè' usecho dya'a.

Unè Jesús tu di'idza' quie tu lámpara
(Mr. 4.21-25)

Na' una Jesús:

¹⁶ —Nunu uga'ala' lámpara ta utacoron caja, ni ta ucachi'ron žan belaga. Ruen zi uzuro lámpara sibi ta useni'n ta ilè'è ben' za' tzu'u lu'u yu'u. ¹⁷ Cabè' naca quie lámpara, cana' nacarèn quie yaca benè'. Yugulu ta pcachi' yaca benè', huadyin dza yebio Diuzi ta pcachi'yaqué', cuionèn' zaca'lao ta ilè'è ja benè' len. Lèscan' yugulu di'idza' negachi' rnè yaca benè', huadyin dza quixogue' Diuzi ca di'idza' negachi' unayaqué'.

¹⁸ Ulezè nagale dyè'èdi. Nu ben' rue quie ta tzioñe'enè' bi na xti'idza' Diuzi, uzioñe'era Diuzi lèbè' mazara, pero nu ben' bihue quie ta tzioñe'enè' xti'idza' Diuzi, hueguba Diuzi hasta tadao' baoyoñe'enè'.

Unè Jesús quie znè'è len bi' bichinè'
(Mt. 12.46-50; Mr. 3.31-35)

¹⁹ Bizi bdyin zna' Jesús len yaca bi' bichinè' gan' zènè', pero biuzaque' tzu'uyaqué' lu'u yu'u dan' nita' yaca ben' zè gula gan' zènè'. ²⁰ Na'ra tu ben' zè gan' zènè' unè' rëbinè' lèbè': —Lali'a babdyin znao' len yaca bi' bicho'. Re'enyayé' hue'lèyaqué' luè' di'idza'.

²¹ Bizi una Jesús rëbinè' yaca ben' nita' rzè'naga:

—Con nu ben' rzè'naga rue quienè' xti'idza' Diuzi, lèleyaqué' naqué' ca quie zna'a, ca quie bi' bicha'.

Udila Jesús be bedun'
(Mt. 8.23-27; Mr. 4.35-41)

²² Bizi dza tula uyu'u Jesús lènè' yaca ben' quiè' lu'u barco, na' unè' rëbinè' leyaqué':

—Tzioro tzala'la lagun.

²³ Na'ra uza'yaqué' zioyaqué' tzala'la lagun. Na' tu zaidyinrayaqué' guta' Jesús gusinè'. Cana' uzulao rda tu be bedun' huala gula lao nisa, baredza' nisa lu'u barco bare'ennan yeton. ²⁴ Na'ra psebè yaca ben' quienè' lèbè', unayaqué' rëbiyaqué' lèbè':

—jMaestro! jMaestro! jBareto barco lu'u nisa!

Cana' uyasa Jesús udilanè' be bedun' ta rda lao nisa. Lècana' lapsanten laore'ten chizi.

²⁵ Na'ra unè' rëbinè' yaca ben' quienè':

—jBixquien' biuzudyi'llèle Diuzi ta ute uselanè' ra'o?

Bizi leyaqué' du rdzebiyaqué', unayaqué' rëbiyaqué' laguedyiyaqué':

—jNuži ben' niga rnabè'nè' be bedun' len nisa ralen quienè'?

Beyue Jesús tu ben' yedyi Gadara, ben' yu'u bichi be mala
(Mt. 8.28-34; Mr. 5.1-20)

²⁶ Bizi bdyinyaqué' yu nebaba Gadara ta re'n tzala' lagun gan' nebaba estado Galilea. ²⁷ Biži bè' bero Jesús lu'u barco, caora na' ubiga' tu ben' yedyi na'. Baoca zi dza yu'unè' bichi be xi'ibi'. Rdanè' du guidinè', biraconè' zabanè'. Nica zuzè' žan yu'u, den' zunè' ga rcachi'yaqué' ben' huati. ²⁸ Cati blè'ènè' Jesús, na' uditzu žibinè' ure'nè' lao Jesús uredyia'nè' rëbinè' Jesús:

—jBixquien' zao' niga huelo' nè'èdi? Nubè'da' luè' Jesús, ži'i Diuzi zu guibá. Rnabayècha' laolo' ta biutzagalaolo' nè'èdi'.

²⁹ Cana' una ben' na' dan' bè Jesús mandado ta yero bichi be xi'ibi' yu'unè', dan' rnabè'cazin yu'un lèbè'. Biži baoca zè lasa rquioyaqué' lèbè' na'anè' len ni'anè', pero ružuzu ruquinonè'n, ržunonè' rquiè'n lèbè' lao lato ga bidyia yu'u. ³⁰ Na'ra unaba Jesús len:

—¿Bi laolo'?

Na' bequëbin rëbin lëbë':

—Xopa mila laohua'.

Cana' unan dan' neyë yaca taxi'ibi' uyu'u ben' na'. ³¹ Na'ra una yaca bichi be xi'ibi' unabayëchi'yacan ta biuse'ela' Jesús leyacan lu'u yero zitu' gula ga yedzagalaoyacan.

³² Lëgan' na' nita' cuchi zë lao ya'la yu'uyacaba' huao. Na' unabayëchi'yacan Jesús ta tzetzu'uyacan yaca cuchi. Na'ra bënë'në' lato leyacan tzetzu'uyacan cuchi. ³³ Cana' guca bero yaca bichi be xi'ibi' ben' na', zioyacan yetzu'uyacan cuchi. Biži ca uyu'uyacan cuchi, uxitiyacaba' lu'u barranca bguinuyacaba' lu'u nisa ga gutiyacaba'.

³⁴ Biži caora blë'ë yaca ben' rapa cuchi cabë' guca quieyacaba', na' bdzebiyaquë' uza'yaquë' zioyaquë' tzetixogue'yaquë' yaca ben' lao yedyi len yaca ben' zio layela cabë' guca. ³⁵ Cana' zio yaca benë' tzena'yaquë' cabë' guca. Cati bdyinyaquë' gan' zë Jesús, blë'ëyaquë' ben' uyu'u bichi be xi'ibi'. Blë'ëyaquë' are'në' chizi xni'a Jesús, anaconë' zabanë', abeyu'unë' pensari. Caora na', tu bega'nziyaquë' bdzebiyaquë'. ³⁶ Ca naca yaca ben' blë'ë, udixogue'yaquë' cabë' guca quie ben' uyu'u bichi be xi'ibi' beroyacan gan' uyu'uyacan. ³⁷ Nun quie can' guca, gudyi yaca ben' yedyi Gadara ta yeza' Jesús yeyoguë' ga tula, dan' rdzebiyaquë' can' guca. Na' beza' Jesús beyu'unë' lu'u barco zeyoguë'. ³⁸ Pero tu bineza' Jesús, unabayëchi' ben' uyu'u bichi be xi'ibi' chi bisaque' tziolënë' lëbë' con ga zioquë'. Biži una Jesús gudyinë' lëbë':

³⁹ —Bigaca sao'. Beyo žan yu'u quio', yetixogue' yaca ben' nita' žan yu'u quio' con cabë' bë Diuzi quio' beyaco'.

Na'ra beza'në' zeyoguë' udixogue'në' yaca benë' lao yedyi con cabë' bë Jesús beyuenë' lëbë'.

*Ni ru'en di'ida' quie nigula bda' zbe zaba Jesús len quie ži'i Jairo, bi' guti
(Mt. 9.18-26; Mr. 5.21-43)*

⁴⁰ Biži cati bdyin Jesús tatula ga uzë'ë itzala' lagun, biži yaca benë' bezi'yaquë' lëbë' dyë'ëdi dan' nita'yaquë' rbezayaquë' lëbë'. ⁴¹ Lëscan' bdyin tu ben' lao Jairo, naquë' ben' napa dyin lu'u idao' sinagoga. Lëlëbë' bdyinnë' uditzu žibinë' žni'a Jesús. Na' unabë' cule lao Jesús ta tzio Jesús žan yu'u quienë'. ⁴² Unë' cana' dan' zu tuzi ži'inë' nigula. Lëži'inë' nigula na' chipchopa iza zubi', na' debi' raca žhue'bi' bagatibi'. Ca naca zio Jesús lënë' leyaquë' lado yaca benë', lega rquidi' yaca benë' lëbë' gan' zionë' yu'unë' neza.

⁴³ Lëladoyaquë' na' zio tu nigula zu uba'a aoca lao chipchopa iza. Aoyonë' lao médico zë, bënë' gasto dumi quië'. Ni tu médico biuzaque'yaquë' yeyueyaquë' lëbë'. ⁴⁴ Lëlëbë' yasë' bago xcu'udzu Jesús bda'në' žbenë' zaba Jesús. Ca bda'në' žbenë' zaba Jesús, laolezate quie uba'a quienë'.

⁴⁵ Biži una Jesús rëbinë' leyaquë':

—¿Nuži bda' žbe zaba'?

Na'ra una yugo yaca benë' zë na' rëbiyaquë' Jesús:

—Nunu bda' žbe žabo'.

Lëscan' una Pedro len yaca ben' laguedyinë', rëbiyaquë' lëbë':

—Maestro, rquidi' yaca benë' luë' de lao rupala'ate, na' como rnao': “¿Nuži bda' žbe zaba'?”

⁴⁶ Na'ra una Jesús:

—Zu tu ben' bda' žbe zaba', dan' gucabë'da' bro yela' huaca quia' beyaca ben' bda' žbe zaba'.

⁴⁷ Biži cati blë'ë nigula gucabë' Jesús can' bë nigula, du rdzebinë' bdyinnë' uditzu žibinë' žni'a Jesús. Na' unë' udixogue'në' zaquë'lao lao yaca benë', dan' bda'në' žbenë' zaba Jesús. Lëzi udixogue'rënë' beyacanë' caora bda'në'n. ⁴⁸ Biži una Jesús rëbinë' nigula:

—Zana', dan' zudyi'ilëlo' në'ëdi', babeyaco'. Beyo, cue' chizi lu'u guicho laxta'olo'.

⁴⁹ Caora zë Jesús nernënë', cati bdyin tu ben' uza' žan yu'u quie Jairo, ben' napa dyin lu'u idao' sinagoga. Na' unë' rëbinë' Jairo:

—Baguti ži'ilo'. Bira cule huelo' Maestro žëdi.

⁵⁰ Biži cati be Jesús ca unë', na' unë' rëbinë' Jairo:

—Biüdzebo'. Sudyi'ilëlo' në'ëdi' con lëzin hueyaca ži'ilo'.

⁵¹ Cati bdyinyaquë' žan yu'u quie Jairo, bibë'në' lato nurla tzu'ulënë' lu'u yu'u. Na' uyu'ulënë' Pedro, len Jacobo, len Juan, len xuzi žna' xcuidi'. ⁵² Biži rbedyi lao yuguluyaquë' raca beyëchi' quieyaquë' quie bi' huati. Na' una Jesús rëbinë' leyaquë':

—Bicuedyile. Le'e nale bagutibi', pero në'ëdi' nia' rasizibi'.

⁵³ Biži yaca benë' bžidziyaquë' quienë', dan' unë' can', dan' baneziyaquë' banati xcuidi'. ⁵⁴ Na'ra bëxo Jesús na'a xcuidi' huati, na' unë' židzo unë':

—Xcuidi', uyasa.

⁵⁵ Ca unë' cana', babeban xcuidi' labeyasatebi'. Na' bē Jesús mandado ta hue'yaquë' ta gao xcuidi'. ⁵⁶ Biži xuzi žna' xcuidi' huati, tu bega'nziyaquë' bebanyaquë' can' guca. Na' gudyi Jesús leyaquë':

—Ni tu nunu yëbile cabë' bia' quie bi' huati.

9

Use'ela' Jesús lao chipchopa ben' quienë'

(Mt. 10.5-15; Mr. 6.7-13)

¹ Na'ra betupa Jesús lao chipchopa ben' quienë' bē'në' yela' huaca quienë' ta yebioyaquë' bichi be xi'ibi' yu'u yaca benë', lëscan' ta yeyueyaquë' nacala yela' hue' yu'u yaca benë'. ² Use'ela'në' leyaquë' tzetixogue'yaquë' yaca benë' de que baza' dza inabë' Diuzi lao yaca ben' nita' lao yedyi layu, lëzi ta yeyueyaquë' ben' raca žhue'. ³ Na'ra una Jesús rëbinë' leyaquë':

—Bë' baziole yu'ule neza, ni tu bibi hua'ale, ni tu yaga, ni tu yëxo, ni ta gaole, ni dumi. Nica hua'ale chopa cue' žabale, tu cue'zin hua'ale. ⁴ Ga idyinle žan yu'u quie benë' ga gasile, biutzale. Tuzi ga gasile hasta que idyin dza yeza'le. ⁵ Chi ga bire'enyacuë' yezi'yaquë' le'e, uleza' lao yedyi, gusile bëxte yu dyia ni'ale ta gacan tu seña de que bibë quieyaquë' xti'idza' Diuzi.

⁶ Na' beza'yaquë' zioyaquë' lao dužete yedyi ta quixogue'yaquë' ca hue Diuzi ta gata' yela' neban quiejë' tuzioli, lëzi ta yeyueyaquë' yaca ben' raca žhue' lao duže gan' rdayaquë'.

Cabë' bē Herodes bënë' mandado bëtiyaquë' Juan

(Mt. 14.1-12; Mr. 6.14-29)

⁷ Caora na' Herodes, ben' naca gobernador, unezinë' lao dužete cabë' rue Jesús. Na' rdëbinë' raquë' pensari, dan' rna yaca benë' rnayaquë' quie Jesús naquë' Juan bautista babebannë' tatula. ⁸ Na' balayaquë' rnayaquë' quie Jesús naquë' profeta Elías abela'në' tatula. Na' ibalayaquë' rnayaquë' quie Jesús naquë' ben' udxogoe' xti'idza' Diuzi tiempote, ben' beban tatula. ⁹ Biži una Herodes rëbinë' laguedyinë':

—Në'ëdi' bia' mandado ichuguyaquë' luba' Juan agutinë'. ¿Na' nuži ben' rda ruenë' cabë' ca di'idza' ru'e yaca benë'?

Na'ra Herodes gu'unnë' ilë'ënë' Jesús.

Bgao Jesús lao ga'yo' mila be'mbyu

(Mt. 14.13-21; Mr. 6.30-44; Jn. 6.1-14)

¹⁰ Biži bē' bedyin yaca ben' quienë' gan' zu Jesús, caora na' gudyiyaquë' lëbë' con can' bëyaquë' gan' uyoyaquë'. Na'ra uquië' Jesús leyaquë' ziolënë' leyaquë' tu lao lato ga rega'nnan ga'ala' yedyi Betsaida. ¹¹ Bë' unezi yaca benë' azioguë' ru'a yedyila, na' zioyaquë' gan' zënë'. Na' bezi'në' leyaquë' udxogoe'në' leyaquë' quie yela' rnabë' quie Diuzi. Lëzi beyuerënë' yaca ben' raca žhue'.

¹² Biži bardze' bara' dza, ubiga' yaca ben' quië' gan' zënë' rëbiyaquë' lëbë':

—Gudyi yaca benë' yeyoyaquë' con ga re' yedyi ga'ala' ta tzetilyaquë' ta gaoyaquë' ta yezila'adyi'yaquë', porque gan' zëro niga, bide ta gaoyaquë'.

¹³ Na'ra una Jesús rëbinë' yaca ben' quienë':

—Ulehue' yaca benë' ni ta gaoyaquë'.

Na'ra unayaquë' rëbiyaquë' Jesús:

—Binu'ando' tazë. Ga'yo'zi yëta xtila len ichopa bela ta nu'ando'. Lëzin de chi bitziondo' tzegue'ndo' mazara ta gao yaca ben' niga. —Cana' unayaquë' rëbiyaquë' Jesús.

¹⁴ Na' biži nita' ca du ga'yo' mila be'mbyu gan' zë Jesús. Na'ra una Jesús rëbinë' yaca ben' quienë':

—Uleyëbiyaquë' cue'yaquë' lao gatzo gayuhua huioyaquë'.

¹⁵ Cana' ure'yaquë' lao gatzo gayuhua huioyaquë' lao yuguluyaquë'. ¹⁶ Na'ra uži' Jesús lao ga'yo' yëta xtila len lao chopo bela bazënë'n. Na' unë'ë ladza unë' rëbinë' Diuzi "Diuxcalelo'." Ude na', bē'në'n yaca ben' quienë' ta quisiyaquë'n hue'yaquë' ta gao yaca ben' re'. ¹⁷ Biži udao yuguluteyaquë' beloyaquë'. Ude na' besedza'yaquë' chipchopa ga' naga yaca ta yozo began'.

Una Pedro naca Jesús ben' Cristo, ben' use'ela' Diuzi

(Mt. 16.13-19; Mr. 8.27-29)

¹⁸ Biži bdyin tu dza zulë Jesús yaca ben' quienë' tu cuinziyaquë' cati bē'lë Jesús Diuzi di'idza'. Na' unë' rëbinë' yaca ben' quienë':

—¿Nuži na yaca benë' naca' në'ëdi'?

¹⁹ Na'ra una yaca ben' quienë' rëbiyaquë' lëbë':

—Balayaquë' nayaquë' luë' naco' Juan bautista, na' ibalayaquë' nayaquë' naco' Elías. Pero ibalayaquë' nayaquë' naco' ben' udixogue'rë xti'idza' Diuzi tiempote, ben' beban.

²⁰ Caora na' unë' rëbinë' yaca ben' quienë':

—¿Na'a le'e, nuži nale naca' në'ëdi'?

Na' unë Pedro:

—Luë' naco' ben' Cristo, ben' use'ela' Diuzi.

Una Jesús ca gaca quienë' cati gatinë'

(Mt. 16.20-28; Mr. 8.30-9.1)

²¹ Biži Jesús unë' gudyinë' leyaquë' dyë'ëdi ta biyëbiyaquë' benë' naquë' ben' Cristo, ben' use'ela' Diuzi. ²² Na' unë' rëbinë' leyaquë':

—Në'ëdi', bichi yugulu benë', lega yedzagalaohua'. Yaca ben' r nabë', len yaca xan' pxuzi, len yaca ben' rsëdi ley quie Moisés, huaru'unla'adyi'yaquë' në'ëdi', gutiyaquë' në'ëdi'. Pero te gaca lao tzona dza, huebana'.

²³ Lëzi unarë' rëbinë' leyaquë':

—Chi nu yaca ben' re'en inao në'ëdi', ruen zi bira inaoyaquë' ca rna pensari quieyaquë'. Ruen zi biidzebiyaquë' naoyaquë' në'ëdi' yugu dza, ba'ala'cazi ruen zudyi guti ja benë' leyaquë'. ²⁴ Chi nu yaca ben' rdzebi inaoyaquë' në'ëdi', dan' rdzebiyaquë' gatiyaquë' tanun quia', bigata' yela' neban quiejë' tuzioli. Pero nu yaca ben' bibdzebi inaoyaquë' në'ëdi', bibdzebiyaquë' gatiyaquë' tanun quia', lëlëyaquë' huata'cazi yela' neban quieyaquë' tuzioli.

²⁵ ¿Biži gan de quie nu benë' anaca quie' lao yugulute ta de lao yedyi layu, chi bigata' yela' neban quie' tuzioli? ²⁶ Chi nu ben' chu'unla'adyi' në'ëdi' yedue'yaquë' hue quieyaquë' can' baonia', lëzi në'ëdi', bichi yugulu benë', huaru'unla'adya' leyaquë' cati yeguida' inabi'a lao yedyi layu ca rey. Zeyu'a yela' huaca quie Xuza' Diuzi len yaca ángel naca la'iya quienë'.

²⁷ Tali ca rnia' le'e, binegati bala le'e nita' niga len në'ëdi' tu binelë'ële ca naca yela' huaca quie Diuzi.

Ca guca bë' betza' cuin Jesús zaca'lao lao yaca ben' quienë'

(Mt. 17.1-8; Mr. 9.2-8)

²⁸ Biži bë' guca lao xuna dza una Jesús cana', urënë' tu lao ya'a ta hue'lënë' Diuzi di'idza'. Na' uquië'në' Pedro, len Santiago, len Juan. ²⁹ Biži ca uzulaonë' ru'elënë' Diuzi di'idza', cana' betza' laohuë' len žabanë' gucan bezëri di. ³⁰ Caora na' labdyinte Moisés len Elías ga zë Jesús, ru'elëyaquë' lëbë' di'idza'. ³¹ Na' tu xni' ze ure' gan' zëyaquë' tu ru'elëyaquë' lëbë' di'idza' unayaquë' ca gaca quienë' gatinë' ciudad Jerusalén. ³² Ba'ala'cazi Pedro len ben' laguedyinë' barnatzegen gasiyaquë', bega'nyaquë' rna'yaquë' ca naca yela' huaca quie Jesús blu'en ga zënë' len chopa ben' ru'elënë' di'idza'. ³³ Biži bë' beza' yaca ben' bë'lë Jesús di'idza', na' una Pedro rëbinë' Jesús:

—Maestro, tahuen na' zundo' lëndo' luë' niga. Ben lato huendo' tzona yu'u dao' de guiži. Huendo' tun quio', itun quie Moisés, itun quie Elías. —Cana' una Pedro den' binezinë' bi në'.

³⁴ Biži ca naca ru'e Pedro di'idza', bdyin tu beo bdubin leyaquë' gan' nita'yaquë'. ³⁵ Biži lado beo na' beyaquë' rchi' Diuzi unë' rëbinë' leyaquë'.

—Lëzi'ina' niga, ben' nedyë'ëda'. Ulezë'naga quie' cabë' në' na'.

³⁶ Ude beyaquë' rchi' Diuzi, blë'ëyaquë' ituzi Jesús zënë' na'. Ganura nita' len lëbë'. Na' bega'nyaquë' bira unëyaquë'. Lëzi bibi gudyiyaquë' yaca benë' ca guca quieyaquë' ca blë'ëyaquë'.

Byue Jesús tu bi' yu'u bichi be xi'ibi'

(Mt. 17.14-21; Mr. 9.14-29)

³⁷ Biži bezu dza tula, beyëziyaquë' ga zu ya'a. Caora na' uyo ben' zë gula yetilalaoyaquë' Jesús. ³⁸ Na'ra unë tu ben' zë ladoyaquë' unëguë' zidzo:

—Maestro, bë tu cule, ina'lo' ži'ina' niga. Zelao tuzi lëbi' naca ži'ina'. ³⁹ Yu'ubi' tu bichi be mala ruxun lëbi' rbedyia'abi'. Rde na' reru'unnan lëbi' layu, raca bdyin' ru'abi'. Lega rulëtzaquen lëbi', bire'ennan usanan lëbi'. ⁴⁰ Bagudya' yaca ben' quio' ta yebioyaquë' bichi be mala yu'ubi', pero biuzaque'yaquë'.

⁴¹ Na'ra una Jesús rëbinë' yaca benë':

—¡Le'e, ben' zidi yaladyi', biralele! ¿Ca balala dza re'ennan sëlia' le'e sueda' can' ruele? Yaxi' ži'ilo' dehua'abi' niga.

⁴² Biži cati bdyin bi' yu'u taxi'ibi' bago gan' zë Jesús, udi taxi'ibi' lëbi' layu, pxizeran lëbi'. Na'ra udila Jesús bichi be xi'ibi' yu'ubi' beron zeyon beyacabi'. Ude na' beyu'enë'bi' xuzubi'.

⁴³ Biži bega'n yugulu ben' nita' na' bebanyaquë' ca naca yela' huaca quie Diuzi bë Jesús.

Udixogue' Jesús tatula ca gaca bë' gatinë'

(Mt. 17.22-23; Mr. 9.30-32)

Tu reban yaca benë', na' una Jesús rëbinë' yaca ben' quienë':

⁴⁴—Ulezënaga dyë'ëdi con can' nia'. Në'ëdi', bichi yugulu benë', usedyin yaca benë' në'ëdi' lao na'a ben' rudie në'ëdi'.

⁴⁵ Bizi yaca ben' quienë' biuyoñe'eyaquë' ca unë'. Binedyin hora ta tzioñe'eyaquë' can' unë'. Lëzi bireyazoyaquë' inabayaquë' yexi'idzë' leyaquë' cabizi unë'.

Una Jesús ca nurla ben' quienë' nacara belao

(Mt. 18.1-5; Mr. 9.33-37)

⁴⁶ Bizi yaca ben' quie Jesús rtzaloyaquë' unayaquë':

—¿Nurla ra'o gacararo belao cati idyinro ga zu Diuzi?

⁴⁷ Pero nezi Jesús ca naca pensari racayaquë'. Lëcana' uzi'në' tu xcuidi' bzënë'bi' cuëta lë'ënë'. ⁴⁸ Na'ra unë' rëbinë' yaca ben' quienë':

—Chi nu yaca ben' rezi' xcuidi' niga tanun quia', lëscan' rezi'rëyaquë' në'ëdi'. Chi nu yaca ben' rezi' në'ëdi', lëscan' rezi'rëyaquë' ben' use'ela' në'ëdi'. Quie lena', nu le'e racalëlaguedyi, biruele belao cuinle, lëben' na' nacarë' ben' belao entre le'e lao yugulule.

Nu ben' birue condre ra'o, nacacazi quieyaquë' ca quie ben' rnëcule ra'o

(Mr. 9.38-40)

⁴⁹ Na'ra una Juan rëbinë' Jesús:

—Maestro, bablë'ëndo' rda tu ben' rzëtoguë' laolo' rebioquë' bichi be xi'ibi' yu'u benë'. Begadyindo'në' udilalëndo'në', dan' ruenë' cana' birdalënë' ra'o.

⁵⁰ Na'ra una Jesús rëbinë' Juan:

—Bihuegadyile ben' rue can', dan' nu ben' birue condre ra'o, nacacazi quieyaquë' ca quie ben' rnëculë ra'o.

Jesús udilë' Santiago len Juan

⁵¹ Bizi baruen Jerusalén dza yeyo Jesús guibá, na' uzë'ë du la'adyi'në' bdze'në' neza zionë' ciudad Jerusalén. ⁵² Na' aose'elë' ben' quienë' udyialaoyaquë' zioyaquë' tu yedyi quie estado Samaria ta quiloyaquë' lato ga idyinyaquë'. ⁵³ Bizi yaca ben' Samaritano, bigu'unyaquë' hueyaquë' lato ta yega'nyaquë' gan', dan' nezियाquë' bazioyaquë' ciudad Jerusalén. ⁵⁴ Bizi cati be yaca ben' quie Jesús cabë' bë yaca ben' Samaritano, na'ra una Santiago len Juan rëbiyaquë' Jesús:

—Señor, ¿re'enlo' guëziro gui' za' guibá ta uzeina utachin leyaquë' cabë' bë profeta Elías dza na'la?

⁵⁵ Na'ra una Jesús leyaquë' udilanë' leyaquë' unë' rëbinë' leyaquë':

—Le'e binezile ca pensari calëla yu'u'ule, dan' unale cana'. ⁵⁶ Në'ëdi', bichi yugulu benë', cala bida' ta aodyiaya' yaca benë', bida' ta ute usela' leyaquë'.

Na' uzi'yaquë' zioyaquë' yedyi tula.

Ni rnan quie ja ben' nao Jesús

(Mt. 8.19-22)

⁵⁷ Bizi azioyaquë' yu'uyaquë' neza cati bdyin tu ben' unë' rëbinë' Jesús:

—¿Señor, huaza'lia' luë' con gatezi tzio'?

⁵⁸ Na'ra una Jesús rëbinë' lëbë':

—Zu beló ga rasi yaca be'eza'. Lëzi dyiarë lidyi bguini ga rasiyacaba'. Pero në'ëdi', bichi yugulu benë', bizu lidya' ga idyina' sua'.

⁵⁹ Na'ra una Jesús rëbinë' ben' itu:

—Uda, unao në'ëdi'.

Na' bequëbinë' rëbinë' Jesús:

—Señor, ben në'ëdi' lato tzetapa' xuza', dan' bagatinë'.

⁶⁰ Na'ra una Jesús rëbinë' lëbë':

—Bë lato ucachi' yaca ben' birue quie xti'idza' Diuzi xuzo'. Pero na' luë', uda ta quixogue'lo' benë' xti'idza' Diuzi ca naca yela' rnabë' quienë'.

⁶¹ Na'ra una itu ben' rëbinë' Jesús:

—Señor, re'enda' inaohua' luë', pero ben lato tzeguedya' yaca ben' zu žan yu'u, chi usanyaquë' në'ëdi' ta inaohua' luë'.

⁶² Na'ra una Jesús rëbinë' lëbë':

—Nu ben' birna' tuzi xneza' inaonë' në'ëdi', chi reyëchonë' rna'në' xcu'udzule, lena' rulu'en rnan quienë' inaonë' neza tula. Na' binaca quienë' ga zu Diuzi rnabë'në'.

¹ Bë' ude unë Jesús di'idza', na' ulioguë' itzona galo chi benë' ta use'ela'në' chopá huioyaquë' zioyaquë' yedyi tu yedyi ta udyialaonezayaquë' con gan' tzio Jesús. ² Na'ra unë' rëbinë' leyaquë':

—Tali rnia' le'e, nita' ben' zë, ben' rbeza uzënaga xti'idza' Diuzi, naca quieyaquë' ca quie usecho. Pero tu chopaziyaquë' naca ben' rezi' usecho quie Diuzi, ben' rguixogüe' xti'idzë'. Tana' lena', ruguin inabale Diuzi ise'elë' mazara ben' yezi' usecho, ben' quixogüe' xti'idzë'. ³ Na' uletzio le'e. Yeza'la'adyi'le rse'ela' le'e naca quiele ca quie beco' zi'ila' tzirole lado yaca ben' naca ca lobo. ⁴ Bihua'ale dumi, bihua'ale yëxo, bihua'ale ni itu cue' guidi uliole. Lëzi bitzële hue'lële yaca benë' zë di'idza' tu neza gan' ziole. ⁵ Cati bayu'ule lu'u yu'u quie benë', reya'ala' inale yëbile xan' yu'u: "Huabëchi Diuzi chizi lu'u guicho laxta'ole gan' zule niga." ⁶ Chi rezi'yaquë' le'e dyë'ëdi, cana' huabe' chizi lu'u guicho laxta'oyaquë'. Pero chi birezi'yaquë' le'e dyë'ëdi, bicue' chizi lu'u guicho laxta'oyaquë'. ⁷ Cati idyinle yu'u gan' idyinle, na'azi sule, na'azi gaole yo'ole con ta runyaquë'. Nu ben' rye dyin, napë' derecho quizu xa'nnë' lëbë'. Tuzi yu'u gan' idyinle na' yega'ne. ⁸ Cati idyinle tu yedyi ga rezi'yaquë' le'e, ulegao ta udyiayaquë' laole gaole. ⁹ Lëzi yeyuele ben' raca zhue' yedyi gan' idyinle yëbileyaquë': "Babdyin dza hue quiele xti'idza' Diuzi." ¹⁰ Chi yedyi gan' bdyinle bigu'unyaquë' yezi'yaquë' le'e, uleta lao neza quieyaquë' inale cani: ¹¹ "Bëxte yu quie yedyi ni uda'n lu'u huaracho quiendo', usisindo'n yedyibin ta nacan tu seña bibë quiele xti'idza' Diuzi. Ruen zi inezile babdyin dza hue quiele xti'idza' Diuzi." ¹² Rnia' le'e, dza gaca juicio, huata'ra castigo huala quie ben' yedyi bibezi' le'e. Huacaran mazara cabë' bë Diuzi quie yaca ben' ciudad Sodoma dza na'la.

Ni rnën quie yaca yedyi bibë quie xti'idza' Diuzi

(Mt. 11.20-24)

Na' una Jesús:

¹³ —jBayëchi' gula gaca quie le'e, ben' yedyi Corazín! jLëzi bayëchi' gula gaca quie le'e, ben' yedyi Betsaida! Chi blë'ë ben' yedyi Tiro len ben' yedyi Sidón ca yela' huaca bë Diuzi lao le'e, biunaoyaquë' huerayaquë' tamala quieyaquë' dza na'la. Chi blë'ëyaquë', abetza'yaquë' pensari quieyaquë', gucoyaquë' la'ari' gaso, bdyiayaquë' de guichoyaquë' ta ulu'en baneziyaquë' ca tamala bëyaquë'. ¹⁴ Quie lena', cati bdyin dza hue Diuzi juicio, huata'ra castigo huala gula quiele, cala ca castigo gaca quie ben' yedyi Tiro len ben' yedyi Sidón. ¹⁵ Na'ra le'e, ben' yedyi Capernaum, biinale rlë'ë Diuzi le'e ben' huen yeyole guibá, dechan' le'e yeyole lao gui' gabila.

Na' una Jesús rëbinë' yaca ben' quië':

¹⁶ —Nu yaca ben' ruzënaga quiele, cana' ruzënarëyaquë' quia'. Nu yaca ben' rusebi' le'e, cana' rusebi'rëyaquë' në'ëdi'. Chi nu ben' rusebi' në'ëdi', cana' rusebi'rëyaquë' ben' use'ela' në'ëdi'.

Cabë' guca cati bdyin tzona galo chi ben' quie Jesús

¹⁷ Na'ra cati bdyin tzona galo chi yaca ben' use'ela' Jesús, redaohueyaquë' unayaquë' rëbiyaquë' lëbë':

—Señor, lente yaca bichi be xi'ibi' guleyacan quiendo' cati bzëtondo' laolo'.

¹⁸ Na'ra una Jesús rëbinë' leyaquë':

—Blë'ëda' bguino xan' taxi'ibi' Satanás zan guibá, uyëzin ca rëzi bdyito hueziu'. ¹⁹ Na'ra guna' le'e yela' huaca quia' ta nuliole yaca bëla, na' nuliole yaca xuni', bibi hueyacaba' quiele. Lëscan' guna' le'e yela'huaca quia' ta huele gan xan' taxi'ibi' bihuelënan le'e. ²⁰ Tahuen na' rale yaca taxi'ibi' quiele. Pero lena' binacaten ta yedaohuele. Nacaran ta yedaohuele dan' bazu laole lë'ë guichi quie Diuzi de guibá.

Bedaohue Jesús unë'ë

(Mt. 11.25-27; 13.16-17)

²¹ Lëhora na', du yu'u Jesús Bichi Be quie Diuzi, lega redaohuenë' unë':

—Xuzá' Diuzi, naco' ben' ze, naco' ben' rnabë' guibá len lao yedyi layu. Luë' pcacho' yela' huaca quio' quie yaca ben' na rioñe'e. Na' blu'elo' yela' huaca quio' yaca ben' rale quio' ca rue xcuidi' ralebi' quie xuzibi'. Cana' bao' xuzá', dan' cana' re'lenlo' gaca.

²² Lao na'a babën xuzá' yugulute. Nunu nuebë' në'ëdi' ca nuebë' xuzá' në'ëdi'. Lëscan' nunu nuebë' xuzá' ca nuebë'a xuzá'. Yaca ben' baolioga', lëleyaquë' nuebë'yaquë' xuzá'.

²³ Bi'zi una' Jesús yaca ben' quienë', unë' rëbinë' lëziyaquë':

—Tahuen gula naca quie le'e, dan' rlë'ële cabë' rua'. ²⁴ Rnia' le'e can', dan' yaca ben' zë, ben' udxogüe' xti'idza' Diuzi dza na', len yaca ben' naca rey, gu'unyaquë' ilë'ëyaquë' ca naca ta rlë'ële, pero biblë'ëyaquë'. Gu'unyaquë' yeyaquë' ca naca ta rele, pero bibeyaquë'.

Ga unë Jesús quie ben' Samaria

²⁵ Biži tu dza tula, uyo tu ben' rusèdi ley quie Moisés gan' zè Jesús ta huenè' Jesús prueba ca bi di'idza' yequëbinè'. Na' unè' rëbinè' Jesús:

—Maestro, ¿ca bi reya'ala' hua' ta gata' yela' neban quia' tuzioli?

²⁶ Na'ra una Jesús rëbinè' lëbè':

—¿Biži rna lè'è guichi ley quie Moisés? ¿Ca bi ca inao' rnèn?

²⁷ Na'ra bequëbi ben' rusèdi ley quie Moisés unè' rëbinè' Jesús:

—“Reya'ala' idyè'ëro Diuzi quiero du guicho du la'adyi'ro. Lèzi reya'ala' idyè'ëro laguedyiro cabè' nedyè'ëro cuinro.”

²⁸ Biži una Jesús rëbinè' lëbè':

—Lagazi unao'. Chi hue quio' ca unao', huata' yela' neban quio' tuzioli.

²⁹ Pero ben' rusèdi ley quie Moisés, gu'unnè' gacalènè' cuinnè' cabè' di'idza' gudysinè' Jesús. Cana' unè' rëbinè' Jesús:

—¿Nuži ben' naca laguedya'?

³⁰ Na'ra una Jesús rëbinè' lëbè':

—Uza' tu ben' ciudad Jerusalén zionè' yedyi Jericó. Biži tu neza gan' zionè', na' bro yaca ben' uban ulanyaquè' ta nu'è. Bè'yaquè' lëbè' zi', pca'nyaquè' lëbè' du guidinè'. Bega'nnè' tu neza, ilè'èti'zi bigutinè'. ³¹ Biži na' zio tu pxuzi tu neza gan' de ben' na'. Biži bè' blè'ènè' ben' de tu neza, na' udenè' tzala'la zioquè' yu'unè' neza. ³² Lëscan' uderè tu ben' naca ži'i suba Levi gan' de ben' naca zi'. Lèzi cati blè'ènè' ben' na', tu udezine' zionè' yu'unè' neza. ³³ Lèzi zio tu ben' uza' tu yedyi quie estado Samaria tu neza gan' de ben' naca zi'. Biži ca blè'ènè' lëbè' gan' denè', na' beyèchi'la'adyi'nè' lëbè'. ³⁴ Na'ra ubiga'nè' gan' de ben' naca zi', bla'onè' aceite len vino gan' naca hue'. Ude na' ptubinè' la'ari' lao hue'. Na' pcuènè' lëbè' xcu'udzu bia quienè' uquiè'nè' lëbè' con gan' idyinyaquè' yega'nyaquè'. Lëgan' na' unè'è lëbè'. ³⁵ Biži bezu dza tula, tu binesè'è, ulio ben' Samaria chopa dumi plata bè'nè'n ben' naca xan' yu'u gan' bdyinyaquè'. Na' unè' rëbinè' lëbè': “Gapo' na' hue'lo' ta gao ben' niga. Chi biguque dumi niga, na' aozalaora' quizuga' bè' yedia' tatula.”

³⁶ Na' una Jesús rëbinè' ben' rusèdi ley quie Moisés:

—Pues rnaba' luè', lao yuna yaca ben' ude na', ¿ca nurlayaquè' naca ben' laguedyi ben' guca zi'?

³⁷ Na'ra una ben' rsèdi ley quie Moisés rëbinè' Jesús:

—Ben' beyèchi'la'adyi' ben' guca zi'.

Na'ra una Jesús rëbinè' lëbè':

—Beyo, bèrè con cabè' bè ben' na', ben' beyèchi'la'adyi' ben' guca zi'.

Ga bdyin Jesús lidyi Marta len María

³⁸ Na' uza' Jesús uyu'unè' neza zionè' bdyinnè' ga de tu yedyi. Lëgan' na' zu tu nigula laonè' Marta. Lëlèbè' bezi'nè' Jesús žan yu'u quienè'. ³⁹ Na' zu tu žila Marta laonè' María. Ure'nè' xni'a Jesús ta uzënananè' cabè' rna Jesús. ⁴⁰ Pero lega rdyine Marta quie dyin quienè' rusiña'nè' ta gaoyaquè'. Na'ra ubiga'nè' ga re' Jesús unè' rëbinè' lëbè':

—Señor, ¿bixquien' birdèbilo' quia' n'è'èdi'? Apca'n žila' María n'è'èdi'. Tuza' rua' dyin niga. Gudyi žila' tu di'idza' yeguidabi' gacalèbi' n'è'èdi'.

⁴¹ Na'ra una Jesús rëbinè' lëbè':

—Marta, Marta, lega rdyinelo' rdèbilo' quie dyin quio'. ⁴² Pero ta uzënarago xti'idza' Diuzi nacaran belao. Cabè' rue María, re'bi' ruzënanagabi' can' nia', lena' nacaran huen. Bisaque' yëpa'bi': “Beyo, bicue'lo' rzënarago' can' rnia'.”

11

Ga psèdi Jesús yaca ben' quienè' ta hue'lëyaquè' Diuzi di'idza' (Mt. 6.9-15; 7.7-11)

¹ Biži bdyin tu dza uzu Jesús tu lao lato ga bè'lènè' Diuzi di'idza'. Bè' beyudyi bè'lènè' Diuzi di'idza', na' unè' tu ben' quienè' rëbinè' lëbè':

—Señor, psèdi nètò' cabè' huendo' ta hue'lèndo' Diuzi di'idza' cabè' bè Juan psèdinè' yaca ben' quienè'.

² Na'ra una Jesús rëbinè' yaca ben' quienè':

—Cati hue'lèle Diuzi di'idza', inale cani:

Xuzindo' Diuzi zulo' guibá, naca la'iya laolo'.

Rbezando' guida dza inabè'lo' lao yedyi layu cabè' rnabè'lo' guibá ga zulo'.

³ Guno' ta gaondo' quie na'adza cabè' ta rdzioguendo'.

⁴ Bezi'ze quiendo' tamala bèndo' cabè' rezi'zendo' tamala bè yaca benè' len nètò'.

Gacalao' nètò' ta biiguinondo' lao tamala, ucuaa ucui'olo'tamala za' gaca quiendo'. Amén.

⁵ Lèzi unarè Jesús rëbinè' leyaquè':

—Ugunro lao tu le'e tzirole gatzo yela lidyí tu amigo quiele yëbilenë: “Amigo, ben nê'ëdi' tzona yêta xtila⁶ como dan' babla' tu bi' amigo quia' zan yu'u. Na' bibi de ta hua'abi' gaobi'.”⁷ Lëzi ugunro bequëbi ben' zu lu'lu' yu'u unë': “Bi'huelo' nê'ëdi' zëdi, dan' baneyeyo yu'u quia'. Lëzi arasi yaca xcuidi' quia' r'zabayacabi' lao cama len nê'ëdi'. Bisaque' chasa' guna' luë' dan' rnabo'.”⁸ Pues rnia' le'e, chi lëbë' biuyasë' hue'në' ta rnaba ben' na', ba'ala'cazi naquë' bi' amigo quienë', re'en ca re'ennan chasë' hue'në' yugulu ta rdziogue amigo quienë' tacuenda bira bizëdi huenë' lëbë'.⁹ Cani rnia' le'e: Ulenaba Diuzi ta rdzioguele, na' gunnë'n. Ulequilo tali quie Diuzi, na' huadzelan. Ulelidza Diuzi gan' zunë', na' huenë' quiele.¹⁰ Ruen zi huele cana', porque nu ben' rnaba Diuzi ta rdzioguenë', na' hue'në'n. Lëscan' nu ben' rguilo tali quie Diuzi, na' huadzelenë'n. Lëscan' nu ben' rulidza Diuzi gan' zunë', na' huenë' quienë'.

¹¹ ¿Bi ca nale le'e xuzi xcuidi'? ¿Hue'le zi'ile yola lao laza inababi' yêta xtila? Lëzi, ¿hue'le zi'ile bëlala lao laza inababi' bela? ¹² Lëzi, ¿hue'le zi'ile xuni'la lao laza inababi' chita? ¹³ Chi le'e, ben' rda lao yedyi layu niga, chi nezile hue'le zi'ile tu tadya'a, na' bi'zi Xuzile Diuzi zu guibá, neziranë' ca le'e hue'në' benë' tu tadya'a, hasta udze'në' Bichi Be quienë' lu'u guicho laxta'o yaca ben' unaba len.

Ga una benë' bebio Jesús bichi be xi'ibi' conlë yela' huaca quie xan' taxi'ibi'
(Mt. 12.22-30; Mr. 3.19-27)

¹⁴ Bi'zi bdyin tu dza bebio Jesús tu bichi be xi'ibi' yu'u tu ben' bero. Caora bero bichi be xi'ibi' gan yu'un, labeyacate ben' na', benë'në'. Na'ra bega'n yaca benë' bebanyaquë' cabë' guca quienë'. ¹⁵ Cana' una bala benë' rëbiyaquë' laguedyiaquë':

—Conlë yela' huaca quie Beelzebú, ben' naca xan' taxi'ibi', rebio ben' niga bichi be xi'ibi' yu'u yaca benë'.

¹⁶ Bi'zi ibalayaquë' unabayaquë' hue Jesús tu yela' huaca quie Diuzi zan guibá chi tali naquë' ben' use'ela' Diuzi. ¹⁷ Pero banezi Jesús cabë' pensari raca yaca benë'. Na' unë' rëbinë' leyaquë':

—Chi tu cue' gobierno gaca zë cue' partido, chi tilälëyaquë' laguedyiaquë' ben' naca partido, bisue gobierno inabë'yaquë' zidza. Lëzi chi gata' dila quie yaca ben' zan yu'u, huaroyaquë' huadzatzayaquë', bira saque' suyaquë' tuzi. ¹⁸ Lëzi cana' nacarë quie Satanás. Chi rbio Satanás laguedyí bichi be xi'ibi'n yu'u benë', bira saque' inabë'nann zidza. Nia' le'e cana', como dan' nale conlë yela' huaca quie Beelzebú rebio'ga' bichi be xi'ibi' yu'u yaca benë'. ¹⁹ Pero chi nacan tali ca nale, ¿bi'zi nale quie yaca ben' naca le'e tuze, yaca ben' rebio bichi be xi'ibi' yu'urë yaca benë'? Lena' huanayaquë' le'e bisaque' taxi'ibi' yebion laguedyí xi'ibi'n. ²⁰ Pero conlë yela' huaca quie Diuzi rebio'ga' bichi be xi'ibi' yu'u yaca benë'. Lena' ulu'en azëcazi ladole yela' huaca quie Diuzi.

²¹ 'Baruen quie Satanás ca quie tu ben' huala, ben' nuxu espada quie, ben' rapa lao yugulute ta de quie. Bisaque' tzu'u ben' tula si' ta de quienë'. ²² Na'ra chi guida tu ben' hualara ca lëbë', ben' dera yela' huaca quie, huenë' gan ucaxonë' lëbë'. Cana' cubanë' espada quienë' ta rzugadyilenë'. Cana' si'në' lao yugulute ta de quienë'.

²³ 'Nu ben' birnë'cule nê'ëdi', condre nê'ëdi' zënë'. Lëzi nu ben' biracalë nê'ëdi', condre nê'ëdi' ruenë'.

Ni rnan quie tu bichi be xi'ibi' beron beyu'un
(Mt. 12.43-45)

Na' una Jesús:

²⁴ —Bi'zi cati bero tu bichi be xi'ibi' ga yu'un benë', na' rdan tu lao lato bidyi rguilon ga tzu'unan yezila'adyi'n. Bi'zi cati birdzela ga tzu'un, na' racan pensari: “Hueya'a tatula gan' broga' ta yeyu'a tatula.” ²⁵ Bi'zi bë' yedyinnan gan' brona be'mbyu, anaca quienë' ca quie tu zan yu'u neluba dya'a, bega'nnan dya'a gula. ²⁶ Na'ra tzion tzaxi'n igadyí bichi be xi'ibi' nacara mala ca len. Na'ra tzu'u yuguluyacan be'mbyu. Bi'zi ben' na' huacara mala quienë' cabë' naca quienë' tanëro.

Ni rnën quie ben' naca huen quie

²⁷ Tu rnë Jesús rëbinë' benë', na' unë tu nigula zidzo rëbinë' Jesús:

—Naca huen quie nigula bi'a bga'adyi' luë'.

²⁸ Na'ra una Jesús rëbinë' lëbë':

—Nacara huen quie ben' re rzënaga ca rna Diuzi, na' rue quieyaquë'n.

Unaba ben' mala ulu'e Jesús tu yela' huaca za' guibá
(Mt. 12.38-42; Mr. 8.12)

²⁹ Bi'zi bdyinra yaca ben' zë gan' zë Jesús, na' uzulaonë' unë' rëbinë' leyaquë':

—Ben' mala naca ben' nita' na'a. Rnabarëyaquë' hua' yela' huaca ta za' guibá ilë'ëyaquë'. Pero bihua' yela' huaca ta za' guibá ca re'ënyaquë'. Ca yela' huaca bë Diuzi lënë' profeta

Jonás, cana' huerënë' lënë' në'edi'. ³⁰ Cabè' guca quie Jonás, bē Diuzi yela' huaca len lēbē' ta blu'enē' yaca ben' nita' yedyi Nínive ga use'ela' Diuzi lēbē', lēzi cana' gacarē quia' nē'edi', bichi yugulu benē'. Hue Diuzi len nē'edi' tu yela' huaca ta ulu'enē' yaca ben' nita' na'a de que use'ela'nē' nē'edi'. ³¹ Dza gaca juicio cati ichuguli Diuzi quie yaca ben' nita' na'a, lēcana' guida nigula rnabē' lao yedyi nebaba Arabia ta ichugubē'nē' quiele. Cana' huenē' como dan' lēbē' uzē'ē' yedyi re' zitu' zioquē' yezēnaguē' ca ta rioñe'e Salomón dza na'la. Pero ladole zua' nē'edi', ben' rnabē'ra ca Salomón, na' le'e biruzēnagale quia'. ³² Lēzi dza gaca juicio cati ichuguli Diuzi quie yaca ben' nita' na'a, lēcana' guida yaca ben' unita' yedyi Nínive dza na'la ta ichugubē'yaquē' quiele. Cana' hueyaquē' como dan' leyaquē' betza'yaquē' pensari quieyaquē' caora cati bdyin Jonás udixogue'nē' leyaquē' xti'idza' Diuzi. Pero ladole zua' nē'edi', ben' rnabē'ra ca Jonás, na' le'e biruzēnagale quia'.

Una Jesús quie ben' yu'u pensari quie Diuzi
(Mt. 5.15; 6.22-23)

Na' una Jesús:

³³ —Ni tule biuga'ala'le lámpara ucui'olen ga negachi', nica quixolen zan caja. Ruen zi ixubalen sibi ta useni'n ta ilē'ē yaca ben' za' tzu'u yu'u. ³⁴ Naca laole ca quie tu lámpara rseni'n lu'u guicho laxta'ole. Chi ina'le dyē'ēdi hue quiele xti'idza' Diuzi, lena' rulu'en quiele yu'u pensari quie Diuzi lu'u guicho laxta'ole. Pero chi biina'le dyē'ēdi, chi bihue quiele xti'idza' Diuzi, lena' rulu'en quiele rdale lao lato lao chula. ³⁵ Gapale cuidado hue quiele xti'idza' Diuzi ta bitale lao lato lao chula. ³⁶ Chi rue quiele du guicho du la'adyi'le xti'idza' Diuzi, cana' tziōñe'ele ca naca tali quie Diuzi, cana' gaca quiele ca quie ben' zē lámpara ta useni'n ilē'ēnē' ga zionē'.

Ga rao Jesús xquia yaca ben' partido fariseo, len yaca ben' rusēdi ley quie Moisés
(Mt. 23.1-36; Mr. 12.38-40; Lc. 20.45-47)

³⁷ Bizi babeyudyi unē Jesús cana', na'ra gudyi tu ben' partido fariseo Jesús ta tzionē' zan yu'u quienē' ta gaonē'. Na' zio Jesús uyu'unē' lu'u yu'u quienē' yaque'nē' ru'a mesa. ³⁸ Na'ra tu bebanzi ben' partido fariseo rnē'ē ta biudibi na'a Jesús tu zagaonē'. Biunao Jesús ca naca costumbre unaoyaquē' rnayaquē' dan' rguibi na'ayaquē', cana' neyēriyaquē' lao Diuzi. ³⁹ Na'ra una Jesús rēbinē' lēbē':

—Le'e ben' partido fariseo, rguibile xcu'udzu plato taza quiele, pero le'e yu'u pensari mala lu'u guicho laxta'ole, rbanle ruele tamedian quie laguedyile. ⁴⁰ ¡Le'e ben' zidi! Binezile re'en Diuzi huerēle yēri lu'u guicho laxta'ole? ⁴¹ Pero chi re'enle huele yēri lu'u guicho laxta'ole, ulehue' ta de quiele yaca ben' yēchi'. Na'tera gacale yēri duzele.

⁴² ¡Bayēchi' gula naca quie le'e, ben' partido fariseo! Bizi lente guixi' cuan ru'ele Diuzi tu cue'n quie lao chi cue'na. Pero biruele bala ta yu'u ni'a xnezi quie Diuzi, nica nedyē'ēle Diuzi. Len a' zaca'ra huele, cala ca ta ru'ele Diuzi tu cue'n quie lao chi cue'na, pero rupaten reya'ala' huele.

⁴³ ¡Bayēchi' gula naca quie le'e, ben' partido fariseo! Lega raxele cue'le silla ga rbe' yaca ben' bala'ana lu'u idao' sinagoga. Na' lēzi lega raxele gapala'n benē' le'e ga ziole yu'u neza.

⁴⁴ ¡Bayēchi' gula naca quie le'e, ben' rusēdi ley quie Moisés, len le'e, ben' partido fariseo! Le'e biruele tuzi ca nale. Naca quiele ca quie yerobá nadacon bēbi. Na' bizi yaca benē' rdeyaquē' laonan bineziyaquē' chi yerobá na'.

⁴⁵ Na'ra una tu ben' rusēdi ley quie Moisés rēbinē' Jesús:

—Maestro, ca di'idza' unēlo', lēzi rnērao' condre nēto'.

⁴⁶ Na'ra una Jesús rēbinē' leyaquē':

—¡Bayēchi' gula naca quie le'e, ben' rusēdi ley quie Moisés! Ruele cabē' rue ben' rucua' yua' zi'i gula lao laguedyín tu ta bisueyaquē'. Re'enle inao yaca benē' le'e, hue quieyaquē' ca inale, na' inale cana' re'en Diuzi hueyaquē', ba'ala'cazi zēdi gula nacan ta hue quieyaquē' len. Na'ra le'e ni lē'ēti' biyeyēchi'la'adyi'le yaca benē' gacalēle leyaquē' ta hue quieyaquē' len.

⁴⁷ ¡Bayēchi' gula naca quie le'e, ben' rusēdi ley quie Moisés! Como dan' cabē' bē xuzixta'ole dza na'la bētiyaquē' nu ben' uda udixogue' xti'idza' Diuzi, cana' re'enle huerēle. ⁴⁸ Nacale de acuerdo con can' bē xuzixta'ole. Chi le'e uzurēle dza uzu xuzixta'ole, lēzi bētile yaca ben' uda udixogue' xti'idza' Diuzi. Gucalēle lēbizi xuzixta'ole.

⁴⁹ 'Yela' rioñe'e quie Diuzi unē' cani: “Huase'ela' yaca ben' quixogue' di'idza' quia' laoyaquē'. Na'ra gutiyaquē' balayaquē', na' hualaoyaquē' ibalayaquē'.” ⁵⁰ Pero le'e, ben' nita' na'a, huazi' Diuzi cuenda quiele quie yela' guti' quie yugulu yaca ben' udixogue' xti'idza' Diuzi, desde dza ure' lao yedyi layu. ⁵¹ Pues desde dza ulato ren quie Abel hasta dza bētiyaquē' Zacarías lu'u idao' xcu'udzu becugo, lēlena' huazi' Diuzi cuenda quiele.

⁵² ʔBayëchi' gula naca quie le'e, ben' rusëdi ley quie Moisés! Le'e ruza'agale tziõñe'e yaca benë' xti'idza' Diuzi. Le'e birioñe'ele xti'idza' Diuzi, nica ru'ele lato tziõñe'e yaca ben' re'en tziõñe'e len. —Cana' una Jesús gudyinë' leyaquë'.

⁵³ Bë' una Jesús can' gudyinë' leyaquë', na'ra bdza'tzeguera yaca ben' rusëdi ley quie Moisés, len yaca ben' partido fariseo. Caora na' uzulaoyaquë' rueyaquë' lëbë' zëdi un-abayaquë' lëbë' mazara di'idza'. ⁵⁴ Lega rbe'naoyaquë' lëbë' re'enyacuë' hueyaquë' trampa quie Jesús ca di'idza' yequëbinë' tacuenda ga gaoyaquë' lëbë' xquia.

12

Ga unë Jesús quie ben' rlidza Diuzi de di'idza' ladzazi

¹ Bizi banita' ben' zë gula ga zë Jesús. Tantozi babdupa ben' zë, barquidi'yaquë' laguediyayaquë'. Na'ra una Jesús rëbinë' yaca ben' quienë':

—Gapale cuidado bihuele ca rue yaca ben' naca partido fariseo, dan' nacayaquë' ben' rlidza Diuzi de di'idza' ladzazi. ² Yugulu ta bë yaca benë' negachi'zi, decazide yezacalaon quieyaquë' lao Diuzi cabë' bëyaquë'. Ni tu ta bë yaca benë' raqueyaquë' chi nunu blë'ë, decazide yezacalaon quieyaquë' lao Diuzi cabë' bëyaquë'. ³ Yugulu ca naca di'idza' negachi' rna yaca benë', huadyin dza yezacalaon quieyaquë' lao Diuzi cabë' di'idza' unayaquë'. Lëzi yugulu di'idza' raque yaca benë' di'idza' negü'io, huadyin dza inezi yugulu benë' cabë' di'idza' unayaquë'.

Ni ru'en di'idza' quie nu ben' reya'ala' idzebiro

(Mt. 10.26-31)

Na' una Jesús:

⁴ —Le'e amigo quia', rnia' le'e: Biidzebile nu ben' re'en guti le'e, como dan' bë' bagutiyaquë' le'e, bira bide bihueyaquë' quiele. ⁵ Ta rnia' le'e nu ben' reya'ala' idzebile. Reya'ala' idzebile Diuzi como dan' de yela' rnabë' quienë' yezi'në' yela' neban quie yaca benë', na' uzde'në' leyaquë' lu'u gui' gabila.

⁶ Lëscan' rnia' le'e: ¿Cala ruti'yaca benë' ga'yo' bguini dao' lao chopa dumi dao' lasi? Na' bizi la'acazi nacaba' bguini dao' bizu, birala'adyi' Diuzi quieyacaba'. ⁷ Ta rnia' le'e, hasta guitza' guichole nulaba Diuzi lao yuguluten. Biidzebile, zaca'rale lao Diuzi mazara ca yaca bguini dao'.

Ni ru'en di'idza' quie yaca ben' birnë cule Jesucristo

(Mt. 10.32-33; 12.32; 10.19-20)

Na' una Jesús:

⁸ —Ta rnia' le'e, nu ben' rnë cule në'ëdi' lao yaca ben' nita' lao yedyi layu, lëzi në'ëdi', bichi yugulu benë', huania' cule leyaquë' lao yaca ángel quie Diuzi. ⁹ Pero nu yaca ben' bichezila'adyi' në'ëdi' lao yaca ben' nita' lao yedyi layu, lëzi në'ëdi' bichezila'adya' leyaquë' lao yaca ángel quie Diuzi.

¹⁰ 'Nu ben' rnëxi'ibi' condre në'ëdi', bichi yugulu benë', ru'en lato yezi'ze Diuzi quieyaquë'. Pero nu ben' rnëxi'ibi' condre Bichi Be quie Diuzi, biyezi'ze Diuzi quieyaquë'.

¹¹ 'Cati usedyinyaquë' le'e lao na' a ben' napa dyin lu'u idao' sinagoga, o chi lao na'a yaca juez, o chi lao na'a yaca ben' rnabë', bidëbile bi di'idza' inale yequëbile yëbilyaquë'. ¹² Cati idyin hora inale yequëbile yëbilyaquë', caora na' huacalë Bichi Be quie Diuzi le'e bi inale yequëbile yëbilyaquë'.

Ca rue zudyi quie ben' uña'a

¹³ Bizi lado yaca ben' na', uzë tu benë' unë' rëbinë' Jesús:

—Maestro, aguti xuxa'. Gudyi ben' bicha' gunnë' ta de quie zuza' ca tu ta redu'uleda' si'a.

¹⁴ Na'ra una Jesús rëbinë' lëbë':

—Rnia' luë', binacan dyin quia' para hua'a laze quiele quie ta de quie xuzile.

¹⁵ Lëscan' unë' rëbinë' leyaquë':

—Gapale cuidado ta bisa'la'adyi'le ta de lao yedyi layu, como dan' nacaran belo quiele gata' yela' neban quiele tuzioli, cala ca ta sa'la'adyi'le ta de lao yedyi layu.

¹⁶ Na'ra una Jesús tu ejemplo cani:

—Uzu tu ben' uña'a. Guzanë' lao yu quienë'. Lega guca usecho quienë'. ¹⁷ Bizi ben' uña'a guquë' pensari unë': “¿Ca bizi hua'?” Bide ga udzi'a usecho quia', dan' lega gucana.”

¹⁸ Lena' guquë' pensari unë': “Banezda' ca ta hua'. Uquinuga' yu'u ga udzi'a usecho, bigaquen. Lena' huera' tazera tacuenda gaquen ga udzi'a usecho quia' len yugulu ta de quia'.” ¹⁹ Lëscan' guquë' pensari unë' cuinzinë': “Lega guca usecho quia'. Huaquen lao zë iza. Quie lena' abdyin hora yezila'adya', zua' contento, yo'oga', gaohua'.” ²⁰ Pero na' una Diuzi rëbinë' ben' uña'a: “Ben' tondo luë', na'ayela gatio'. Na' yugulu ta de quio', çnuzi gaca

quie len?" ²¹ Cana' nacan quie ben' uña'a chi rcuezanë' quië' cuinzinë' dza rdanë' lao yedyi layu. Na' bizi Diuzi rlë'ënë' lëbbë' ben' yëchi' gula.

Rna'cazi Diuzi ben' nao xnezë'

(Mt. 6.25-34)

²² Beyudyi una Jesús cana', unë' rëbinë' yaca ben' quienë':

— Con ca rnia' le'e, bidëbile ga za' ta gaole. Bidëbile ga za' ta gaole. ²³ Nacaran belao hue quiele xti'idza' Diuzi dza rdale lao yedyi layu, cala ca ta idëbile ga za' ta gaole, ta gaole. ²⁴ Ulena'cara ca raca quie yaca bguini. Birazara'nyacaba', biruerëyacaba' ga udze'yacaba' ta gaoba', den' rgaocazi Diuzi leyacaba'. Na' bizi le'e, jzaca'rale ca yaca bguini! ²⁵ Nitu nitule, ba'ala'cazi rdëbitzeguele, bisaque' uda'rale ni itu hora ta yezurale lao yedyi layu bë' beya dza quiele. ²⁶ Na' chi ni ilë'ëti' bisaque' uda'rale yezurale lao yedyi layu bë' beya dza quiele, çbixquien' rdëbile ga za' ta gaole, ga za' ta gaole?

²⁷ Ulena'cara ca re'eni yaca yo. Birueyacan dyin, bira'aban yëla. Na' bizi rnia' le'e, ni rey Salomón, ba'ala'cazi guconë' la'ari' tza'o', la'ari' baquitu, bibetilan lëbizi yela' baquitu quie yo. ²⁸ Cabë' rue Diuzi rapë' yo ta de lao layëla, ba'ala'cazi gaca tu chopo dza huabidyin tzu'un lagu' tzeina, cana' huaparë' Diuzi le'e, pero mazara le'e, ben' rdëbi ga za' ta gaole, ga za' ta gaole. ²⁹ Quie lena', bitale idëbile quilole ga za' ta gaole, ga za' ta yo'ole. ³⁰ Bihuele cana', dan' cana' rue yaca ben' rda lao yedyi layu, rdëbiyaquë' bi ta gata' quieyaquë'. Pero zucazi Xuziro Diuzi, rnë'ë le'e, banezinë' bi ta rdzioguele. ³¹ Ta nacaran belao hue quiele inaole xneza Diuzi, lëcana' gunnë' lao yugulute ta rdzioguele.

Una Jesús ga reya'ala' gata' yela' uña'a quiero

(Mt. 6.19-21)

Na' una Jesús:

³² — Bidzebile, nacale ca quie beco' zi'ila' quia', bia napa'. Ba'ala'cazi naca tu chopale, lega redaohue Xuziro Diuzi gunnë' lato yedyinle ga zunë' rnabë'në'. ³³ Uleguti' ta de quiele. Dumí dan' guti'le ta de quiele, na' ulehue'n ben'bide quie. Cana' huacara tadya'a quiele guibá, gun Diuzi quiele ta de guibá. Na' ta gata' quiele guibá, bisaque' cuan benë' len, nica nu tzu'u udyiagui' len. ³⁴ Con ga re'enle gata' yela' uña'a quiele, chi lao yedyi layu, chi guibá, lena' ulu'en ca bi pensari racale, chi quie cuinzinë', chi quie Diuzi.

Reya'ala' suro puesto cuezaro yeguida Cristo

Na' una Jesús:

³⁵ — Ulesu listo, ulehue ca rue ben' ruga'ala' lámpara quie, barbezë' chi ben' idyin zan yu'u. ³⁶ Reya'ala' huele ca rue ben' zu rapa zan yu'u quie xa'ne, ben' rbeza bë' yedyin xa'nnë' gan' tziogue' ga raca huetzagana'. Rbezë' ulidza xa'nnë' lëbbë' ru'a yu'u ta isalogue' ta yeyu'u xa'nnë'. ³⁷ Tahuen gula naca quie ben' rapa yu'u bë' yedyin xa'nnë', ilë'ënë' zuë', rnë'ë birasinë'. Lëlena' nacan tali rnia' le'e, cuin xa'nnë' huabëchinë' lëbbë' lao mesa, hue'në' laze ta gao ben' rapa yu'u. ³⁸ Lëzi tahuen gula naca quie ben' rapa yu'u chi zuë' rnë'ë birasinë' bë' yedyin xa'nnë', ba'ala'cazi du gatzo yela, ba'ala'cazi du bala. ³⁹ Uzë'nagale ca rnia' le'e ni. Chi tu ben' xan' yu'u ineziguë' bi hora idyin ben' uban, na'ra sunë' inë'ë bigasinë', bihue'në' lato ta tzu'u ben' uban lu'u yu'u ta cuannë' ta de quienë'. ⁴⁰ Na' bizi le'e, ulesu listo cuezale yeguida', como dan' caora bibi pensari racale yeguida', lao durpendizi yeguida' lao yedyi layu në'ëdi', bichi yugulu benë'.

Ni rnën quie ben' bzu di'idza' len ben' bibzu di'idza'

(Mt. 24.45-51)

⁴¹ Na'ra una Pedro rëbinë' Jesús:

— ¿Señor, unëlo' di'idza' ta nacan irupa iyunala para nëto'zi o chi unëlo'n lao duzetela?

⁴² Na'ra una Jesús rëbinë' lëbbë':

— Rnia' di'idza' ta nacan irupa iyunala para nutezi ben' rioñe'e, para nutezi ben' ruzu di'idza' ca rna xa'nnë'. Lëben' na' hue xa'nnë' ladyina'anë' ta inë'ë ben' nita' zan yu'u quienë' ta hue'në' ta gaoyaquë' caora idyin hora gaoyaquë'. ⁴³ Tahuen gula gaca quie ben' zu rapa yu'u quie xa'nnë', chi bë' yedyin xa'nnë' ilë'ënë' rzuguë' di'idza' con can' gudyinë' xa'nnë' lëbbë'. ⁴⁴ Tali ca rnia', ben' naca xan' yu'u, hue'në' ladyina'a yugulu ta de quienë' lao na'a ben' udapa yu'u quie'. ⁴⁵ Bizi chan' ben' zu rapa zan yu'u quie xa'nnë', chi racanë' pensari huadzë xa'nnë' biyedyinnezë', chi sulaonë' tilalënë' inë'lënë' yaca ben' rue dyin zan yu'u quie xa'nnë', chi sulaocalanë' gaonë' yo'onë' xudyinë', ⁴⁶ na'ra bë' yedyin xa'nnë' dza birbezë' yedyin xa'nnë', hualë'ënë' can' ruenë', huenë' lëbbë' tu castigo huala gula, ise'elë' lëbbë' ta tzionë' lado yaca los demás ben' bibzu di'idza' quie'.

⁴⁷ Nu ben' zu lao xa'nnë' nezinë' ca ta re'en xa'nnë' huenë', den' bibzunë' di'idza' huenë' ca gu'un xa'nnë', huata' castigo huala gula quienë'. ⁴⁸ Pero nu ben' zu lao xa'nnë', pero binezinë' ca ta re'en xa'nnë' huenë', pues ba'ala'cazi reya'ala' gata' castigo quienë' cabë'

bënë!, pero dan! biunezinë! can! bënë!, yubë'ëzi castigo gata! quienë!. Nu ben! bē! Diuzi taze, lëlëbë! yenaba Diuzi yeyu'enë! tazëra. Lëscan! nu ben! pca'n Diuzi tazë lao nē'ë, lëlëbë! yenaba Diuzi usedyinnë! tazëra lao nē'ë.

Una Jesús huaro yaca benë! chopa cue!
(Mt. 10.34-36)

Na! una Jesús:
49 —Nē'ëdi! bida! ta cuëcha! ca quie gui! lao yedyi layu. Lena! re'entzegueda! ga'ala'n na'a. 50 Baza! dza gatia! lè'ë yaga cruza. Lega rutëbin nē'ëdi! rbeza! bē! yeyudyi gatia!. 51 Na! rnìa! le'e, ¿raquele bida! lao yedyi layu ta bira gata! zëdi huedila quiele? Rnìa! le'e, cala lena! bida!, dechan! bida! ta iro chopa cue! yaca ben! nita! lao yedyi layu. 52 Ga sulaon na'a, ga sulaon quie dza zaza'ra. Huaca quie lao ga'yo! ben! nita! zan yu'u, huaroyaquë! chopa cue!. Tzonayaquë! huaca condre quie chopayaquë!. Na! ichopayaquë! huaca condre quie tzonayaquë!. 53 Huaca xuzi zna! xcuidi! condre quie ži'iyaquë!. Na! huaca ži'iyaquë! condre quie xuzi zna'yacabi!. Huaca zna! be'mbyu condre quie žualidyinë!. Na! huaca žualidyinë! condre quie ben! gula quiebi!.

Reya'ala! huero pensari cabë! raza quiero
(Mt. 16.1-4; Mr. 8.11-13)

54 Na'ra una Jesús rëbinë! yaca ben! nita! na':
—Cati rlë'ële rasa beo ga reguin obidza, lena! inale huen nisayo, na'ra huen cabë! nale. 55 Lëzi cati rlë'ële baza! be tzala! ga reguin obidza, lena! inale huen žla, na'ra huen cabë! nale. 56 Le'e ben! rlidza Diuzi de di'izda! ladzazi, banezile huele pensari can! hue beo len can! hue be, žna! bixquien! binezile huele pensari can! raza quiele dza rdale lao yedyi layu?

Reya'ala! yega'ntza'olëro ben! reya'ala'ro quie
(Mt. 5.25-26)

Na! una Jesús:
57 —¿Bixquien! biracale pensari ca naca tali ca reya'ala! huele? 58 Chi zu tu ben! reya'ala! le quie, na! re'ennë! quizole quienë! uquië'në! le'e lao ben! napa dyin, ruen zi yega'ntza'ole laonë! tu neza tu binedyinke lao ben! napa dyin. Chi baziolënenë! lao juez, hue juez mandado udze! policia le'e lu'u dyiguiba. 59 Na! rnìa! le'e, gabi yerole hasta que quizole yugulute ca ta reya'ala! le.

13

Nacan belao yetza'ro pensari quiero

1 Lëhora na! bdyin yaca benë! rëbiyaquë! Jesús can! bē Pilato bëtinë! chopa tzona ben! estado Galilea. Pquixinë! ren quieyaquë! len ren quie bia guixi! ta bdyiayaquë! lao becugo quie idao! r nabë'ra zu ciudad Jerusalén. 2 Na! una Jesús rëbinë! leyaquë!:

—¿Ca biži pensari racale cabë! guca quie yaca ben! Galilea? ¿Raquele nacarayaquë! ben! bëra tamala quie, cala ca yaca ben! lao yedyi quiele? 3 Na'ra rnìa! le'e, binacan can!. Na! le'e, chi biyetza! le pensari quiele inaole xneza Diuzi, biyezi! Diuzi le'e. 4 ¿Ca biži pensari racale cabë! guca quie yaca chi'inu'betzona yaca ben! yati bdaco! torre Siloë leyaquë? ¿Raquele nacarayaquë! ben! de dula! xquia quie, cala ca yaca los demás ben! nita! lao ciudad Jerusalén? 5 Lena! rnìa! le'e, binacan can!. Na! le'e chi biyetza! le pensari quiele inaole xneza Diuzi, biyezi! Diuzi le'e.

Unë Jesús tu di'izda! quie tu yaga higo bidyian tazixi

6 Na'ra una Jesús tu ejemplo ni:
—Uzu tu be'mbyu zu tu yaga higo quienë! lao layela quienë!. Na'ra uzë'ë žiogüë! tzena'në'n chi badyian higo, na! blë'ënë! ni tu higo bidyia lao yaga. 7 Na'ra una ben! zu yaga higo quie, rëbinë! ben! rapa layela quië!: “Una'cara, azio tzona iza rida! dena'a yaga higo ni chi dyian tazixi, pero ni tu higo binelë'ëda! cuialaonan. Mejorla ichugulo'n, ¿bixquien! ru'eron lato zun layu niga, chi birbian higo?” 8 Na'ra una ben! rapa layela rëbinë! xa'nnë!: “Señor, psan quien, biichuguron zazugaran itu iza na'a. Ta hua! cuëcha! tu pozo žannan tacuenda udyia'n bena. 9 Con ca hua! quien, a ver chi bicuian tazixi. Pero chi bicuian tazixi, na'tera ichuguron.”

Beyue Jesús tu nigula xcu'udzu bego dza huezila'adyi'

10 Uzu tu dza saodo, dza huezila'adyi! quieyaquë!, uyu'u Jesús lu'u idao! sinagoga ga rsëdinë! yaca benë!. 11 Lëgan! na! zë tu nigula raza žhue'në!. Azio chi'inu'betzona iza uyu'unë! tu bichi be xi'ibi!, na! beca'nnan lëbë! bego, bira guca yelinë!. 12 Biži cati blë'ë Jesús lëbë!, na! gužinë! lëbë! unë! rëbinë! lëbë!:

—Nigula, hueyua! luë! ca naca yela! hue! yu'ulo'.

¹³ Na'ra bda' na'ané' xcu'udzu nigula. Caora bda'né' në'ë nigula, labelitené'. Na' uzulaoné' ruené' Diuzi ben' ze. ¹⁴ Pero lega bdza' ben' napa dyin lu'u idao' sinagoga, dan' beyue Jesús ben' xcu'udzu bego dza huezila'adyi'. Na'ra uné' ben' napa dyin lu'u idao' sinagoga rëbiné' yaca bené':

—Xopa dza nacan ta huero dyin. Lédza na' reya'ala' guida ben' raca žhue' ta iyacayaqué', cala na'adza huezila'adyi'.

¹⁵ Na'ra una Jesús rëbiné' lëbë':

—Lué' ben' rlidza Diuzi de di'idza' ladzazi, ¿cala rxëdyo' huaga quio' o burro quio' ta tzhua'alo'ba' yo'oba' nisa dza huezila'adyi'? ¹⁶ Na' nigula niga naquë' ži'i suba Abraham. Na' biži xan' taxi'ibi' Satanás nuquion lëbë' nuen bego xcu'udzuné' azio chi'inu'betzona iza. Na' biži lué', ¿bixquien' nao' bireya'ala' yexëdya' tanuquio xan' taxi'ibi' nigula ni dza huezila'adyi'?

¹⁷ Biži caora una Jesús can', bedue'tzegue yaca ben' rue condre lëbë'. Pero yaca los demás bené', lega redaohueyaquë' blë'ëyaquë' ca yela' huaca babë' Jesús.

Unë Jesús tu di'idza' quie bini mostaza

(Mt. 13.31-32; Mr. 4.30-32)

¹⁸ Na'ra una Jesús rëbiné' yaca bené':

—¿Ca biži hua' ta yexi'idza' le'le ca naca ga rnabë' Diuzi? ¿Ca bi di'idza' re'ennan inia' le'le ta inezile dyë'ëdi? ¹⁹ Nacan ca quie tu bini mostaza ta guza tu bené' lao layu quié'. Na' biži bini mostaza, la'acazi tu bini dao' bicu', pero gu'unin gucan tu yaga ze gula. Na' bdyin yaca bia xila bëyacaba' lidyiba' lao taca'n.

Unë Jesús tu di'idza' quie levadura

(Mt. 13.33)

²⁰ Lëscan' una Jesús rëbiné' leyaquë':

—¿Ca bi di'idza' re'ennan inia' le'le ta inezile dyë'ëdi ca naca ga arnabë' Diuzi? ²¹ Nacan ca quie tu levadura ta rzi' nigula rla'adyi'në'n con tzona medida yezo. Conlë lena' rëžin duže cuba racan taže.

Ga unë Jesús quie ru'a yu'u naca gui

(Mt. 7.13-14, 21-23)

²² Na'ra uza' Jesús yuu'uné' neza tatula zioné' ciudad Jerusalén. Na' ga rdyinné' tu tu yedyi neza ciudad Jerusalén uzulaoné' rguixogue'né' xti'idza' Diuzi. ²³ Na'ra unaba tu bené' lëbë' rëbiné' lëbë':

—Señor, ¿huezí' Diuzi ben' zë yeyoyaquë' guibá o chi tu chopaziyaquë'?

²⁴ Na'ra una Jesús rëbiné' lëbë':

—Naca gui ru'a yu'u guibá. Dula'adyi'le ulehue quiele tacuenda saque' tzu'ule lëru'a yu'u naca gui. Rnia' le'le, ben' zë gula inita' gue'enyacuë' tzu'uyacuë', pero bisaque'.

²⁵ Caora bapsio ben' xan' yu'u na', biži le'le inita'le lali'a, na' ibiga'le ru'a yu'u, uxidyile ru'a yu'u, na' inale: “Señor, isalolo' ru'a yu'u niga.” Na' biži ben' xan' yu'u inënë' lu'u yu'ute yëbiné' le'le: “Binubë'da' nu le'le.” ²⁶ Na'ra le'le inale yëbile ben' xan' yu'u: “Aodaolëndo' luë', bahue'elëndo' luë' tuzi. Lëzi psëdio' yaca bené' yedyi quiendo' xti'idza' Diuzi.” ²⁷ Na'ra inë ben' xan' yu'u yëbiné' le'le: “Baonia' le'le, binubë'da' le'le. Uleyo bira huele në'ëdi' zëdi, le'le ben' mala.” ²⁸ Quie lena' cuedyile ži'laza gula gao leile caora ilë'ële Abraham, len Isaac, len Jacob, len yaca los demás ben' udixogue' xti'idza' Diuzi dza na'la anita'yaquë' guibá, na' biži le'le, naca bayëchi' quiele inita'le lali'a. ²⁹ Rnia' le'le, huida yaca ben' uza' lao duže yedyi layu yegu'udi'yaquë' guibá ta cue'yaquë' lao mesa quie Diuzi ta gaoyaquë'. ³⁰ Bala ben' nita' lao yedyi layu niga, binacajë' ben' ze, pero huacajë' ben' ze dza yedyinjë' ga zu Diuzi. Lëscan' bala ben' naca ben' ze lao yedyi layu niga, bira nacajë' ben' ze dza yedyinjë' ga zu Diuzi.

Uredyi Jesús cabë' bë yaca ben' nita' ciudad Jerusalén

(Mt. 23.37-39)

³¹ Lédza na' bdyin yaca ben' partido fariseo gudyiyaquë' Jesús:

—Uza' uyo ga tula, dan' re'en rey Herodes gutiné' lué'.

³² Na' una Jesús rëbiné' leyaquë':

—Uleyo uletzeguëdyi lëben' mañoso ca rnia' le'le, nia': “Itu chopa tzona dza sua' yebioga' bichi be xi'ibi' yu'u yaca bené', yeyueria' yaca ben' raca žhue'. Na' baruen bago dza iyudyi hua' dyin quia'.” ³³ Pero decazide hua' dyin cabë' dyin cabë' dyin naguen Diuzi hua'. Nerdziogue itu chopa tzona dza ga idyintia' ciudad Jerusalén como dan' lëciudad na' nacan ciudad ga rutiyaquë' ben' rguixogue' xti'idza' Diuzi.

³⁴ Le'le ben' ciudad Jerusalén, rutilé yaca ben' za' rguixogue' xti'idza' Diuzi. Lëzi le'le ben' ciudad Jerusalén, rguile yo yaca ben' use'ela' Diuzi laole. Zë lasa gu'unda' gapa' le'le

cabè' rue nu biu bena', rapaba' zi'iba', rguëdyiba' zi'iba' zan xilaba'. Pero na' le'e, bigu'unle.
³⁵ Lena' apsanla'adyi' Diuzi le'e. Na'ra rnìa' le'e, ibaba dza bira ilè'èle nè'èdi'. Hasta quie idyin dza yëbile nè'èdi': "Ben' naca la'ya luè', ben' use'ela' Diuzi, na'tera ilè'èle nè'èdi' tatula."

14

Beyue Jesús tu ben' yu'u gui

¹ Biži bezu dza tula, dza huezila'adyi'. Caora na' zio Jesús ta gaohuè' zan yu'u quie ben' napa dyin, ben' naca partido fariseo. Na'ra rbè'nao yaca ben' laguedyinè' chi bi hue Jesús dza huezila'adyi'. ² Na' lëgan' na' zè tu ben' yu'u yela' hue' gui. ³ Na'ra una Jesús rëbinè' yaca ben' rusèdi ley quie Moisés, len yaca ben' naca partido fariseo:

—¿Biži na lao ley? ¿Ru'en lato yeyua' ben' raca zhue' dza huezila'adyi'?

⁴ Caora na' bega'nyaquè' chizi, bira unëyaquè'. Na'ra bëxunè' na'a ben' yu'u gui, beyuenè' lëbè'. Ude na' una Jesús gudyinè' ben' beyuenè': "Aoca, beyo." ⁵ Na' una Jesús gudyinè' ben' partido fariseo:

—Chi nu le'e rguino burro o huaga quiele lu'u barranca, ba'ala'cazi nacan dza huezila'adyi', ¿quele huayole tzalioleba'?

⁶ Na'ra bira ubinyaquè' bi yëbियाquè' lëbè'.

Ga unë Jesús quie ben' rue lani

⁷ Bè' blè'è Jesús ca rue yaca ben' bdyin ga zè'è, blè'è'nè' rserëyaquè' ga cue'yaquè' re'ënyaquè' cue'yaquè' ga cue' ben' bala'anara. ⁸ Na' unè' rëbinè' leyaquè' tu di'idza':

—Cati ziole ga raca huetzagana', bicue'le ga rbe' ben' bala'anara. Biži chan' zaza'ra ben' nacara belao cue'nè' gan' re'lo' na'. ⁹ Biži bare'lo' ga rbe' ben' bala'anara, na' inè' ben' rue lani yëbinè' luè': "Uzuli, bè' lato cue' ben' niga gan' bare'lo'." Cati inanè' luè' cana', cana' yedue'lo' yeyolo' tzare'lo' xcu'udzula. ¹⁰ Na' ca ta reya'ala' huele cati tziolè lani, cue'le xcu'udzutela. Na'ra cati ilè'è ben' rue lani re'lo' xcu'udzutela, na'ra inè' luè': "Amigo, ude nila cue'lo' ga rbe' ben' bala'anara." Cana' gaca bala'ana quiele len yaca ben' bare' lao mesa. ¹¹ Na' rnìa' le'e, nu ben' rue ze cuine, huadyin dza hue Diuzi lëbè' ben' yube'ëzi. Na' biži nu ben' rue yube'ëzi cuine, huadyin dza hue Diuzi lëbè' ben' ze. —Cana' una Jesús rëbinè' leyaquè'.

¹² Lëzi unèrë Jesús rëbinè' ben' rue lani:

—Cati huelo' lani biguëzo' ben' naca amigo quio', ni bi' bicho', ni xuzi znao', nica ben' uña'a, como dan' huadyin dza yeyueyaquè' laohue quio', gunrëyaquè' ta gaolo'. Conlè lëzin yeyuen laohue quio'. ¹³ Na' ca ta reya'ala' huelo' cati huelo' lani, reya'ala' guëzo' yaca ben' yëchi', len yaca ben' ca guicho ca lao, len yaca ben' zi, len yaca ben' laochula. ¹⁴ Chi huelo' cana', cana' gata' tahuen gulara quio' yedaohuelo' bè' idyin dza useban Diuzi ben' bè' quie xti'idza'nè'. Huata' tadya'a quio' lao Diuzi dan' bè'lo' ta udao yaca ben' raca bayëchi' quie, ba'ala'cazi bide dumi ta quizoyaquè'n ni ta yeyueyaquè' laohue quio'.

Ga unë Jesús tu di'idza' quie ben' rëzi ben' gao yaca

¹⁵ Biži bè' be tu ben' re' lao mesa cabè' una Jesús, na'ra unè':

—Lega gaca huen quie ben' gao yela' huo ga zu Diuzi rnabè'nè'.

¹⁶ Na'ra una Jesús rëbinè' lëbè':

—Uzu tu be'mbyu dza na', bè'nè' laze ta gao yaca ben' zè, ben' guëzinè'. ¹⁷ Bè' beyudyi bapcuezè' ta gao yaca benè' guëzinè', na' use'ela'nè' criado quienè' unè' rëbinè' lëbè': "Uyo, yexi' yaca ben' guida gao yaca. Banaca laze ta gaoyaquè'." ¹⁸ Biži yaca ben' rëzinè' ta gao, unabayaquè' ta yezi'zenè' quieyaquè'. Na'ra ben' nêro unè' gudyinè' criado quie ben' na': "Zabeyudyi hua'a tu layu. Len re'enda' tzena'a. Ta nacan' nia' luè' yëbo'nè' yezi'zenè' quia'." ¹⁹ Na' unè' ben' urupe rëbinè' ben' zio txexi' lëbè': "Baozia' ga'yo' pare bëdyihuaga. Lëba' tza'lia' hua'ba' prueba. Lena' nia' bisaque' sa'a, yezi'zenè' quia'." ²⁰ Na' una ben' uyune rëbinè' ben' zio txexi' lëbè': "Zabeyudyi ptzagana'a. Yela' na' bisaque' sa'a." ²¹ Biži bè' bedyin criado, na' uidxogue'nè' xa'nnè' cabè' gudyi yaca benè' lëbè'. Na'ra bdza'tzegue xa'nnè' unè' rëbinè' criado quie: "Uyo yena' la'o yedyi, yexi' yaca ben' yëchi', len yaca ben' ca guicho ca lao, len yaca ben' zi, len yaca ben' laochula." ²² Na'ra bedyin criado quie ben' na' unè' rëbinè' lëbè': "Señor, babia' ca mandado bao'. Pero nerunnan lato guidara benè'." ²³ Na'ra una xa'nnè' tatula rëbinè' lëbè': "Uyo yena' la'o yedyi du tu neza. Bè bala iquiè'lo'yaquè' cuenda yedza' yaca benè' lu'u yu'u quia'." ²⁴ Yela' na' rnìa', ni tu yaca ben' baguza' tanèro, ben' bibida gao quia', bira de lato gaoyaquè' ta pcueza'."

Ruen zi inaoro xneza Cristo

²⁵ Ben' zè gula zenaoyaquè' Jesús. Na'ra unè' rëbinè' leyaquè':

²⁶ —Chi nu ben' re'en inao në'èdi', ruen zi idyë'ëranë' në'èdi' cala ca xuzë', ca žnëë, ca žgulanë', ca ži'inë', ca bi' bichinë', ca bi' zannë', cala ca yela' neban quienë'. Chi binedyë'ëranë' në'èdi' cala ca familia quienë', ca yela' neban quienë', bisaque' gacanë' ben' quia'. ²⁷ Nu ben' rdzebi inao xneza' nun quie ruen žudyi guti benë' lëbë', bisaque' gacanë' ben' quia'. ²⁸ Chi le'e re'enle huele tu yu'u žcala reya'ala' huele pensari usaque'le chi huaque dumi quiele ta useyudyile yu'u? ²⁹ Chi tu ben' uzulaohue rcua'në' lu'u yu barbëchinë' xni'a besu, na' biži chi biguque dumi quienë' ta useyudyinë' yu'u, na' yaca ben' ilë'ë, utituyaquë' užidyiyaquë' lëbë'. ³⁰ Na' inayaquë' quienë': "Ben' niga aozulaonë' ruenë' yu'u quienë', na' biguque dumi quienë' ta useyudyinë'n." ³¹ Chi zu tu rey, na' zu itu rey re'ennë' tilalënë' lëbë'. Na' napë' chi mila soldado. Na' biži itu rey napë' galo mila soldado quienë'. Caora cati baza' tilarëyaquë', žcala reya'ala' huenë' pensari chi huaque chi mila soldado quienë' ta tilalënë' ben' napa galo mila soldado? ³² Chi bapsaquenë' bisuenë' tilalënë' itu rey, na'ra tu nezu itu rey zitu', reya'ala' ise'ela'në' tu ben' tzio lao lazë' ta tzeguedyinë' itu rey ta yega'n'tza'oyaquë' bitilayaquë'. ³³ Lena' unia' le'e ta inezile nuti'tezile re'enle inaole në'èdi', chi bisule puesto ta usanle yugulu ta de quiele inaole në'èdi', bisaque' gacale ben' quia'.

Ga ru'en di'idza' quie zedi' bira nacan sna'a
(Mt. 5.13; Mr. 9.50)

Na' una Jesús:

³⁴ —De ga hue zedi'dyin chi nacan sna'a. Pero chi bira nacan sna'a, žca biži huero ta iyacan sna'a? ³⁵ Bibi dyin huena, ni para quie layu, ni para bena. Nacan ta chu'unro. Nule babe, ulezë'naga cabë' baonia'.

15

Unë Jesús tu ejemplo quie tu beco' ži'ila' bia uniti
(Mt. 18.10-14)

¹ Biži yaca ben' zë, ben' huequižu len yaca ben' nao neza mala, begu'udi'yaquë' zë lasa gan' zë Jesús ta uzë'nagayaquë' cabë' unë'. ² Na' biži yaca ben' partido fariseo, len yaca ben' rusëdi ley quie Moisés, rtzaloyaquë' can' rue Jesús, unayaquë' rëbiyaquë' laguediyaquë':

—Ben' niga rezi'në' yaca ben' nao neza mala, raolënë' leyaquë' tzaže.

³ Na' tu di'idza' ni una Jesús rëbinë' leyaquë':

⁴ —Chi zu tu gayuhua beco' ži'ila' quiele, na' aoniti tuba', žcala uca'nle yaca bia biuniti ga nita'yacaba' dya'a? žCala huayole tzedilole itu bia neniti hasta que yedzeleleba? ⁵ Bë' yedzeleleba' žcala lega yedaohuele huezi'leba' yequië'leba' žan yu'u? ⁶ Na' bë' bedyinle žan yu'u quiele žcala guëžile yaca ben' naca amigo quiele? žCala yëbilyaquë': "Huero lani, dan' babedzelelda' beco' ži'ila' quia', bia uniti?" ⁷ Lena' rnia' le'e, cabë' guca quie xan' beco' ži'ila', cana' nacarë quie Diuzi. Yedaohueranë' quie tu ben' betza' pensari quie, ben' unao neza mala, na' inaoñë' xneza Diuzi, cala ca yaca ben' zë, yaca ben' ziocazi nao xnezë'.

Unë Jesús tu di'idza' quie tu dumi ta uniti

Na' itu di'idza' ni una Jesús rëbinë' leyaquë':

⁸ —Lëzi rnia' le'e, chi zu tu nigula de chi dumi plata quië', na' bëxo tun, žcala uga'ala'në' lámpara quië', ulubanë' lu'u yu'u quienë' dyë'èdi, yeguilonë'n hasta que yedzelenë'n? ⁹ Na' biži bë' bedzelenë'n, lega bedaohuenë'. Na' guëžinë'yaca amiga quienë' inë' yëbinë' leyaquë': "Huero tu lani, dan' babedzelelda' dumi quia' ta uniti." ¹⁰ Lëzi rnia' le'e, can' guca bedaohue nigula, cana' yedaohuerë yaca ángel quie Diuzi cati yetza' pensari quie tu ben' unao neza mala, na' inaoñë' xneza Diuzi.

Unë Jesús tu di'idza' quie tu ben' uzu chopa ži'inë' byu

¹¹ Lëscan' una Jesús rëbinë' leyaquë':

—Uzu tu be'mbyu uzu chopa ži'inë' byu. ¹² Na' biži ži'inë' byu, bi' nëchi'la, unab'i rëbibi' xuzibi': "Xuza', žbigunlo' në'èdi' ta redu'uleda' si'a? Na'ra xuzibi' bë'në' laze, bë'në'bi' ta redu'ulebi' si'bi'. ¹³ Biži guca tu chopa tzona dza, ptupa ži'inë' nëchi' ta de quiebi' bi'abi' yuguluten. Na' uza'bi' ziobi' yedyi re' zitu' ga beditobi' dumi quiebi' uyu'ubi' pensari mala ca bëbi'. ¹⁴ Pero bë' beditobi' yugulu ta de quiebi', na' bdyin dza guca tu ubin huala yedyi na'. Bira guta' ta gaobi', na' lega uduebi'. ¹⁵ Na'ra uza'bi' ziobi' tzetilobi' bi dyin huebi' lao tu ben' zu lao yedyi gan' bdyimbi'. Na' biži ben' na' use'ela'në'bi' ga de layu quienë' ta gapabi' cuchi quienë'. ¹⁶ Tanto uduebi' gu'umbi' gaobi' ca ta bë'yaquë' yaca cuchi ta gaoba'. Pero na' lëbi' nunu bë' ta gaobi'. ¹⁷ Na'ra gucabi' pensari: "jNacala ben' zë ruëyaquë' dyin žan yu'u quie xuza', birdziogueyaquë' ta gaoyaquë'! jNa' niga në'èdi' ruda'a huatia' yela' rdue quia'! ¹⁸ Yeza'cala' yeya'a žan yu'u quie xuza' ta yëpa'në': Xuza', uži'že quia'. Baoquixa' lao Diuzi. Baoquixa' laolo'. ¹⁹ Bira bizaca' inao' në'èdi' naca' ži'ilo'. Bë në'èdi' cuenda ca nu ben' rue dyin quio'." ²⁰ Na'ra beza'bi' beyu'ubi' neza zeyobi' žan yu'u quie xuzibi'.

'Nezeza'bi' tu neza zitu' caora blè'è xuzibi' bazeza'bi'. Na' beyèchi'la'adyi'nè' lèbi' zionè' udèdyinè'bi' udaonè'bi' situ xagabi'. ²¹ Na' bizi' una bi'byu na' rëbibi' xuzibi': "Xuza', uzi'ze quia'. Baoquixa' lao Diuzi. Baoquixa' laolo'." ²² Na' bizi' una xuzibi' rëbinè' yaca bi' criado quiè': "Uletzio cuiole tu cue' la'ari' dya'ara ta ugacolebi'. Lèzi uletzexi' tu anillo ta udze'le zhebi' len itio cue' guidi ta udze'le ni'abi'. ²³ Lèzi uletzio txexi'le tu bèdyihuaga, bia nacara nu'unu, bia gutiro gaoro ta huero lani. ²⁴ Cana' huero como dan' zi'ina' niga anaca quiebi' ca quie tu ben' baguti beban. Aonitibi', pero na'abela'bi' bazulèbi' ra'o niga." Na' uzulaoyaquè' rueyaquè' lani.

²⁵ Na' bizi' zi'inè' bi' huaca, nega'mbi' layela. Bè' beza'bi' layela bedyimbi' bago gan' zu yu'u, bebi' rgüedyi raca hueya'a. ²⁶ Na'ra guzibi' tu criado quie xuzibi' unababi' lèbi' bi guca žan yu'u. ²⁷ Na' una bi' criado rëbibi' lèbi': "Babela' bi' bicho'. Na' bè xuzo' mandado babètyaqué' tu bèdyihuaga nu'unu, dan'abela' bi' bicho' dya'a, bibi guca quiebi'." ²⁸ Na' bizi' bi' bichibi' huaca, lega rdza'bi' bire'embi' yeyu'ubi' lu'u yu'u. Lena' bro xuzibi' unaban' cule laobi' ta yeyu'ubi' lu'u yu'u. ²⁹ Na'ra una bi' bichibi' huaca rëbibi' xuzibi': "Luè' nezo' dyè'èdi gula azio zè iza zua' rua' dyin quio'. Bireguitzoga' di'idza' quio'. Ni tu lasa bibenlo' nè'èdi' ni tu chivo ta gutia' hua' lani gaolia' yaca bi' amigo quia'. ³⁰ Na' ži'ilo' niga,abela'bi' tatula. Baoyobi' beditobi' dumi babè'lo'bi' conlè yaca nigula mala. Na' luè' babetio' bèdyihuaga nu'unu ta gaole huele lani." ³¹ Na'ra una xuzibi' rëbinè'bi': "Zi'ina', zucazo' ni len nè'èdi' yugu dza. Tana' lena' yugulu ta de quia' nacacazin quio'. ³² Pero nacacazin huen huero lani yedaohuero, dan'abela' bi' bicho'. Naca quiebi' ca quie ben' baguti beban. Aonitibi' bela'bi' bazulèbi' ra'o tatula." —Cana' una Jesús gudyinè' leyaquè'.

16

Unè Jesús tu di'idza' quie tu ben' guca ladyinè'è quie xa'ne, bèguè tamala

¹ Lèzi cani una Jesús rëbinè' yaca ben' quienè':

—Uzu tu ben' uña'a zu tu ben' nu'enè' ladyina'anè' ta de quienè'. Na' bizi' una yaca benè' unayaquè' rëbiyaquè' lèbè': "Ben' nu'elo' ladyinè'è ta de quio', lega rueditoguè' ta de quio'." ² Na'ra ben' naca xa'nnè' guzinè' lèbè' yëbinè' lèbè': "žBizi' bèlo' conlè ta de quia' de que na yaca benè' rueditolo' ta de quia'? Besio cuenda quie dyin babao', dan' bira re'enda' gaca ladyinao' ta de quia'." ³ Na' bizi' ben' naca ladyinè'è ta de quie xa'ne, na' guquè' pensari: "žCa bizi' hua' chi yeguba xa'na' xchina'/? Biraca' hua' dyin guixi'. Lèzi reduè'da' ta'a tu tu yu'u inaba' ta gaohua'. ⁴ Na'a banezda' ca hua' cuenda inita' ben' gacalè nè'èdi' cati babeguba xa'na' xchina'." ⁵ Na'ra guzinè' tu huio yaca ben' reya'ala' quie xa'nnè'. Na'ra unabè' ben' nëro rëbinè' lèbè': "žGaca tu reya'alo' quie ben' xa'na'/?" ⁶ Na'ra bequëbinè' unè': "Reya'ala' tu gayuhua frasco aceite." Na' una ben' naca ladyinè'è rëbinè' lèbè': "Ni zia' guichi nexubo' lao xa'na'. Caga na'a ure' bè itu guichi de gatzo gayuhuazi." ⁷ Bizi' na' unè' rëbinè' ben' urupe: "Na' luè', žgacazi reya'alo' quie xa'na'/?" Na'ra una ben' na': "Reya'ala' tu gayuhua bolsa bini trigo." Na'ra unè' rëbinè' lèbè': "Ni zia' guichi nexubo' lao xa'na'. Caga na'a bè itu guichi de tapa galozì." ⁸ Na' bizi' xan' ben' na', bezaquenè' ca bè ben' bènè' ladyinè'è, naquè' listo ta si'nè' benè' yè'.

Na' una Jesús rëbinè' yaca ben' quienè':

—Lëcana' nacan quie yaca ben' rda birnao xneza Diuzi, lega rzebila'adyi'yaquè' nacayaquè' listo ta si'yaquè' benè' yè', cala ca yaca ben' rda rnao xneza Diuzi.

⁹ žCabizi' re'enle inia' le'e quie ben' guca ladyinè'è? žRe'enle inia' le'e huele ca lèbè' si'le ben' yè' cuenda gata' dumi quiele hue'len yaca ben' re'enle gaca amigo quiele? žRe'enle inia' le'e cana' huele tacuenda gacalè amigo quiele le'e ta yezi' Diuzi le'e sulënen' tuziozi'?

¹⁰ Bigaca inia' le'e can', como dan' chi nu ben' rapa dyè'èdi' tadoo' lè'èti' nu'e xa'nnè' lèbè', lena' ulu'ena quienè' gaparè' dyè'èdi' tazëra hue' xa'nnè' lèbè'. ¹¹ Lèzi chi le'e ziole rueditole con ganzi ta de quiele lao yedyi layu niga, žcómo na'a gue'enrèle gun Diuzi le'e ta de quienè' guibá?

¹² Chi le'e biziole gapale dyè'èdi' ta de quie ben' tula, žbixquien' raquiele gun Diuzi ta gata' quiecazile? ¹³ Nu ben' rue dyin lao xa'ne, bisaque' uzunè' chopo xa'nnè'. Huata' zèdi quiè' quie lao rupa yaca ben' xa'nnè'. Tuè' huatzaxenè', na' ituè' bitzaxenè'. Tuè' biuzunè' di'idza' quiè', na' ituè' uzunè' di'idza' quiè'. Chi rza'la'adyi'le dumi, bisaque' huele dyin quie Diuzi. —Cana' una Jesús gudyinè' leyaquè'.

¹⁴ Bizi' yaca ben' naca partido fariseo, unita'yaquè' rzënegayaquè' can' una Jesús quie dumi. Dan' lega rexeyaquè' gata' dumi quieyaquè', tana' lena' uzulaoyaquè' rtituyaquè' lèbè'. ¹⁵ Na'ra una Jesús rëbinè' leyaquè':

—Le'e, lega re'enle ilè'è yaca benè' le'e ben' huen. Pero nezi Diuzi ca naca pensari mala yu'u lu'u guicho laxta'ole. Rapa yaca benè' le'e bala'ana, pero Diuzi ratzanè' ca ruele.

Ga rnën quie ley len quie yela' mabè' quie Diuzi

Na' una Jesús:

¹⁶—Hasta dza uzu Juan lao yedyi layu unabè' ley quie Moisés len di'idza' ca una yaca ben' profeta. Desde lèdza na' rguixogue' yaca benè' de que baza' dza inabè' Diuzi lao yedyi layu. Lècana' baregu'udi' yaca ben' zè, yaca ben' re'en hue bala inabè' Diuzi leyaquè'.

¹⁷ 'Pero ca naca quie lao ley, nacaran yalo yeyudyi yedu quie guibá len yedyi layu, cala ca biuzun di'idza' ca rnan lè'è guichi ga yu'u ley quie Diuzi.

Unè Jesús quie ben' rsan laguedyi
(Mt. 19.1-12; Mr. 10.1-12)

Na' una Jesús:

¹⁸—Chi tu be'mbyu bapsannè' nigula zulènè', na' bezi'nè' nigula tula, aoquixinè' nacan xquia quienè' lao Diuzi. Na' lèzi, chi tu be'mbyu bezi'nè' nigula psan xquiuhue, aoquixinè' nacan xquia quienè' lao Diuzi.

Ga una Jesús quie tu ben' uña'a len tu ben' yèchi' lao Lázaro

Na' una Jesús:

¹⁹—Lèscan' inia' le'e, uzu tu ben' uña'a guconè' la'ari' dya'a, la'ari' baquitu. Na' bizi ruenè' lani yugu dza, udaonè' tadya'a gula. ²⁰ Lèscan' uzu tu ben' yèchi' gula laonè' Lázaro. Lega dyianè' yedzo' zidzo. Na' rbe'nè' layu ru'a yu'u quie ben' uña'a yugu dza. ²¹ Bizi ben' yèchi' rbezè' rnè'è chi hue' ben' uña'a lè'èti' ta began' udaohuè'. Na' yaca beco' ubiga'yacaba' riè'èyacaba' yedzo' dyianè'. ²² Bizi bdyin dza guti Lázaro. Na'ra bequie' yaca ángel lèbè' ta sunè' guibá gan' zu Abraham. Na' lèzi ben' uña'a gutinè' pcachi'yaquè' lèbè' lu'u yu. ²³ Na'ra uyu'unè' lu'u gui' gabila ga redzagalaohuè'. Cati bechisa laonè' rnè'è zitu' ga zu Abraham len Lázaro. ²⁴ Na'ra uredyiyane' zidzo unè': "Xuzá Abraham, beyèchi'la'adyi' nè'èdi', use'ela' Lázaro ula'onè' zbenè' nisa ta guidè' dedze'nè'n lu'u ru'a yeya'ala' lè'èti' gan' yu'a niga, porque lega tahuala redzagalahua' gan' yu'a lagui' niga." ²⁵ Na'ra una Abraham gudyinè' lèbè': "Zi'ina', beza'la'adyi' guca dya'a gula quio' dza uzulo' lao yedyi layu. Na' bizi Lázaro niga, biguca dya'a quienè'. Lena' rezila'adyi'nè' zunè' niga len nè'èdi'. Na' luè' redzagalaolo' gan' yu'ulo'. ²⁶ Lèzi zu tu barranca ga nita'ndo' niga. Na' bisaque' guidando' ga zulo'. Lèzi luè' bisaque' guido' niga." ²⁷ Na'ra unè ben' uña'a rëbinè' Abraham: "Rnabayècha' laolo', xuzá Abraham, ta ise'elo' Lázaro zan yu'u quie xuzá' ²⁸ gan' nita' ga'yo' bi' bicha' ta yëbinè' leyacabi' can' raca quia' niga tacuenda biguidayacabi' gan' yu'a niga redzagalahua'." ²⁹ Na'ra una Abraham rëbinè' lèbè': "Decazi guichi ga yu'u xti'idza' Diuzi ta pca'nnè' lao na'a Moisés len yaca los demás ben' udixogue' xti'idzè'. Lena' reya'ala' hueyaquè' bala ulabayaquè'n." ³⁰ Na'ra unè ben' na' rëbinè' Abraham: "Nacan tali ca nao', xuzá' Abraham, pero chi tzio tu ben' baguti beban tzetixogue'nè' leyacabi', cana' yetza'yacabi' pensari quieyacabi'." ³¹ Na'ra una Abraham rëbinè' lèbè': "Chi bihueyacabi' bala cabè' di'idza' yu'u lè'è guichi la'iya quie Diuzi ta pca'nnè' lao na'a Moisés, len yaca los demás ben' udixogue' xti'idzè', nica yetza'yacabi' pensari quieyacabi' ba'ala'cazi tzio tu ben' baguti beban tzetixogue'nè' leyacabi'."

17

Ruen zudyi gula quie ben' udze'yela laguedyi
(Mt. 18.6-7, 21-22; Mr. 9.42)

¹ Na' una Jesús rëbinè' yaca ben' quie':

—Birdziogue nu ben' udze'yela laguedyi ta inèn leyaquè' hueyaquè' tamala. Pero hue Diuzi tu castigo huala gula quie ben' udze'yela laguedyi. ² Quie nu ben' rudze'yela xcuidi', huacaran huen quienè' chi uquiyoaquè' tu yo ze luba'nè', nica uzalayaquè' lèbè' lu'u yao ze gatinè' lu'u nisa, cala ca castigo hue Diuzi lèbè'. ³ Ulegapa caudado cabè' ruele.

'Uletila bi' bichile chan' uquixibi' bëbi' condre le'e. Na' chi betza'bi' pensari quiebi', ulezi'ze quiebi'.

⁴ 'Ba'ala'cazi baoquixibi' babèbi' condre le'e gadyi lasa lao tu dza, ba'ala'cazi gadyi lasa bidabi' unabi' le'e: "Uzi'ze quia', bira hua' cana'", ulezi'ze quiebi'.

Ruen yaca ben' quie Jesús zi sudyi'ilèyaquè' Diuzi dyè'èdi

⁵ Na' una yaca ben' quie Jesús rëbiyaquè' lèbè':

—Gacalao' nètota' ta sudyi'ilèndo' Diuzi dyè'èdi.

⁶ Na' una Jesús rëbinè' leyaquè':

—Chi tali sudyi'ilèle Diuzi, la'acazi lè'èti'zi, huazaque' yëbile tu yaga: "Uza', uyo yetzu'u lu'u yao ze", na' yaga hualen quiele cabè' yëbilen.

Ga ru'en di'idza' ca reya'ala' hue ben' nao xneza Diuzi

Na' una Jesús:

⁷ —Chi zu tu ben' rue dyin žan yu'u quiele ¿cala tanëro reya'ala' usiña'në' ta gaole, te na' huazaque' gaorënë', ba'ala'cazi babënë' dyin bedu dza? ⁸ ¿Cala tali na' yëbilyaquë': "Psiña' ta gaohua', te aodaohua' bahua'a, natera huazaque' gaolo' yo'olo'?" ⁹ ¿Cala tali na' biyëbile ben' rue dyin žan yu'u quiele: "Diuxcalele babële ca ta re'enda' huele", como dan' ca ta reya'ala' huecaziyaquë' bëyaquë'?" ¹⁰ Lëscan' cana' nacarën quie le'e. Caora babeyudyi babële yugulu ca una Diuzi le'e, na'tera reya'ala' yëbile Diuzi: "Nacando' ben' bibi zaca'te inao' nëto' diuxcalele, como dan' ca ta reya'ala'cazi huendo' bëndo'." —Cana' una Jesús gudyinë' leyaquë'.

¹¹ Na' uza' Jesús uyu'unë' neza ta zionë' ciudad Jerusalén udenë' lao beza' estado Galilea ga sulao estado Samaria. ¹² Bë' bdyinnë' gan' de tu yedyi, lëgan' na' bro chi ben' yu'u yela' hue' ca mal de pindo. Bega'nyaquë' zitu' con gan' zë Jesús. ¹³ Na' urediyya'yaquë' zidzo rëbiyaquë' lëbë':

—Jesús, Maestro, yeyëchi'la'adyo' nëto' ca nacando'!

—Cati blë'ë Jesús leyaquë' cabë' nacayaquë', unë' rëbinë' leyaquë':

—Uletzio uletzelu'e cuinle lao pxuzi.

Caora na' uza'yaquë' zioyaquë'. Biži tu neza gan' zioyaquë' beži yela' hue' yu'uyaquë'. ¹⁵ Na'ra bë' blë'ë tunë' babezinë' ca naca yela' hue' yu'unë', na' bebi'në' zeyonë' gan' zë Jesús unë'në' zidzo ruenë' Diuzi ben' že. ¹⁶ Na' ure'në' uditzu žibinë' lao Jesús, bda'te laohue layu ta rëbinë' Jesús: "Diuxcalelo'." Lëben' na' naquë' ben' estado Samaria. ¹⁷ Na'ra una Jesús rëbinë' lëbë':

—¿Cala chi le'e beyaca? ¿Ganaži iga yaca ben' beyacarë? ¹⁸ Lëben' niga, ben' binaca ben' Israel, ¿tuzi lëbë' bebi'në' zeza'në' niga ta ruenë' Diuzi ben' že?

¹⁹ Na'ra una Jesús rëbinë' lëbë':

—Bezuli, beyo. Dan' rzudyi'ilëlo' Diuzi, lena' babeži yela' hue' yu'ulo'.

*Udixogue' Jesús ca gaca bë' yeguidë' tatula lao yedyi layu
(Mt. 24.23-28, 36-41)*

²⁰ Na' bdyin tu dza una yaca ben' partido fariseo rëbiyaquë' Jesús:

—¿Bata sulao inabë' Diuzi lao yedyi layu?

Na' una Jesús rëbinë' leyaquë':

—Bide bi ilë'ële cati sulao inabë' Diuzi lao yedyi layu. ²¹ Bisaque' yëbile benë': "Barnabë' Diuzi yedyi ni' o "Barnabë' Diuzi yedyi na'" como dan' pensari yu'u lu'u guicho laxta'ole, lena' inabë' Diuzi.

²² Na' bezu dza tula una Jesús rëbinë' yaca ben' quienë':

—Huadyin dza cati gue'enle sulia' le'e siquiera itu dzaze, pero bisaque'. ²³ Lëdza na' ina yaca benë' le'e: "Bazunë' ni" o "Bazunë' na'" na' bigalele quieyaquë'. Bitzirole inaole leyaquë' ga tzioyaquë'. ²⁴ Cabë' rlë'ële quie bdyito hueziu' ratzo rtinan žan guibá, cana' ilë'ële në'ëdi', bichi yugulu benë', cati idyın dza yeguida' lao yedyi layu. ²⁵ Pero ca naca na'a, ruen ži yedzagalaotzaguia' usebi' yaca ben' nita' na'a në'ëdi'. ²⁶ Cabë' bë yaca ben' unita' lao yedyi layu tiempote caora uzu Noé, cana' huerë yaca ben' inita' lao yedyi layu caora yeguida' tatula në'ëdi', bichi yugulu benë'. ²⁷ Ri'o raoyaquë', rtzagana'yaquë', rtzagana'rë ži'yaquë' hasta bdyin dza uyu'u Noé len familia quienë' lu'u barco quienë'. Lëcana' ben yusiu' huala gula, guca juicio quie nisa, guti lao yuguluteyaquë'. ²⁸ Lëzi cana' bërë yaca ben' unita' lao yedyi layu tiempote caora uzu Lot. Ri'o raoyaquë', ra'o ruti'yaquë', razara'nyaquë' rueyaquë' yu'u quieyaquë'. ²⁹ Pero cati bro Lot ciudad Sodoma, lëcana' bžexo Diuzi juicio gui', uyëzin žan guibá, bëtın yuguluteyaquë'. ³⁰ Lëzi cana' gacarë quie yaca benë' inita' dza bë' yeguida' lao yedyi layu në'ëdi', bichi yugulu benë'.

³¹ Lëdza bë' yeguida' tatula, chi inita' yaca benë' lali'a, bireya'ala' yeyu'uyaquë' lu'u yu'u quieyaquë' ta cuioyaquë' ta de quieyaquë' nun quie dan' ruen baguinzi ižunoyaquë'. Lëscan' chi ziorëyaquë' layela, bireya'ala' yeyoyaquë' žan yu'u quieyaquë' nun quie dan' ruen baguinzi ižunoyaquë'. ³² Bigalala'adyi'le cabë' guca quie žgula Lot. ³³ Nu ben' rdzebi gati, yela' na' binaoyaquë' në'ëdi', bigalata' yela' neban quieyaquë' tuzioli. Pero nu yaca ben' birdzebi gati, yaca ben' nao në'ëdi', huata' yela' neban quieyaquë' tuzioli.

³⁴ Cani rnia' le'e, lëyela cati yeguida' tatula, useria' yaca ben' nao në'ëdi', na' iquië' yaca ángel leyaquë'. Por ejemplo, chi rasi chopa benë' tzaže lao belaga, iquië' yaca ángel tunë', na' yega'n itunë'. ³⁵ Chi zu chopa nigula rutuyaquë' tzaže lao guichi, iquië' yaca ángel tunë', na' yega'n itunë'. ³⁶ Chi zu chopa be'mbyu rueyaquë' dyin tzaže layela, iquië' yaca ángel tunë', na' yega'n itunë'.

³⁷ Bë' beyaquë' can' unë', na'ra unayaquë' rëbiyaquë' lëbë':

—¿Gaži gaca can' baonao', Señor?

Na'ra bequëbinë' rëbinë' leyaquë':

—Caora rlë'ële rêcho yaca bëchi ladza, cana' inezile de ta zigo raoyacaba'. Lëcana' gaca inezile gan' gaca can' baonia'.

18

Una Jesús tu di'idza' quie tu nigula bagui xquiuhue len tu juez mala

¹ Una Jesús tu di'idza' ni psëdinë' yaca ben' quienë' ca ta reya'ala' hue'lëyaquë' Diuzi di'idza' yugu dza. Bireya'ala' yeyatiyaquë', bireya'ala' usanla'adyi'yaquë' ulidzayaquë' Diuzi. ² Na'ra unë' rëbinë' leyaquë':

—Bizi de tu yedyi ga uzu tu juez birapala'nnë' Diuzi, nica rapala'nnë' benë'. ³ Lëlao yedyi na', lëzi uzurë tu nigula, ben' baguti xquiuhue. Riotezi rionë' lao juez ta rnabë' huenë' justicia quië' len quie ben' raca dilalënë'. ⁴ Baguca zë lasa bigu'un juez huenë' justicia quie nigula. Bizi na'ra guca juez pensari unë': "Ba'ala'cazi nunu rdzeba', nica Diuzi, nica yaca benë', ⁵ por nun quie dan' nigula niga rdazi rdë' ruenë' në'ëdi' zëdi, tana' lena' huacalia'në' hua' justicia quië' cuenda bira guidë' hueranë' në'ëdi' zëdi. Bardanë'ëda' rdazi rdanë' ruenë' në'ëdi' zëdi."

⁶ Na' una Jesús rëbinë' leyaquë':

—Cana'la bë juez mala pensari ca unë'. ⁷ Na' nia' le'e, ¿bizi raquele ca hue Diuzi? ¿Raquele bigacalë Diuzi yaca ben' quienë', ben' rulidza lëbë' yugu dza yugu yela? ¿Raquele huadzë Diuzi bigacalënë' yaca ben' quienë'? ⁸ Rnia' le'e, bitzë Diuzi. Labezi gacalënë' yaca ben' quië'. Pero cati yeguida' në'ëdi', bichi yugulu benë', ¿huadzeleda' ben' rzudyi'lë Diuzi, lao yedyi layu?

Una Jesús tu di'idza' quie tu ben' partido fariseo len tu ben' huequižu

⁹ Lëzi itu di'idza' ni una Jesús quie yaca ben' rlë'ë cuine ben' dya'a, na' rlë'ëyaquë' laguediyayaquë' ben' mala. Na' una Jesús:

¹⁰ —Uyo chopa benë' lu'u idao' rnabë'ra ta ulidzayaquë' Diuzi. Tunë' naquë' ben' partido fariseo. Na' itunë' naquë' ben' huequižu pquižunë' benë' mazara ca ta redu'ulanë' si'në'. ¹¹ Bizi zutezi ben' partido fariseo rulidzanë' Diuzi unë' cani: "Xuza' Diuzi, nia' diuxcalelo' como dan' binaca' ca ben' uban, binaca' ca ben' mala, binaca' ca ben' rutilë' nigula quie ben' tula. Binaca' ca ben' huequižu niga. ¹² Në'ëdi' rua' ubasi chopa lasa lao tu xman. Na' runa' tu cue' lao chi cue' ca tu ta rua' gan." Cana' unë' gudyinë' Diuzi. ¹³ Na' bizi ben' huequižu, bega'nnë' zë' zitu'la gan' zë ben' fariseo. Nica reyažonë' yechisa laonë' ladza. Na' uzulaonë' rcdyininë' ru'achu'unnë' unë' rëbinë' Diuzi: "Xuza' Diuzi, beyëchi'la'adyi' në'ëdi' como dan' de dula' xquia quia'." ¹⁴ Na'ra inia' le'e, bezi'ze Diuzi dula' xquia de quie ben' huequižu, zeyoguë' žan yu'u quienë'. Bizi quie ben' partido fariseo nenaocazi dula' xquia quië' lëbë'. Rnia' le'e, nu ben' rue že cuine, huadyin dza hue Diuzi lëbë' ben' yube'ëzi. Na' bizi nu ben' rue yube'ëzi cuine, huadyin dza hue Diuzi lëbë' ben' že.

Bëla'ya Jesús yaca xcuidi'

(Mt. 19.13-15; Mr. 10.13-16)

¹⁵ Na' guca dza bdyin yaca benë' gan' zë Jesús, nequië'yaquë' xcuidi' quieyaquë' ta uquichinë' na'anë' ta huela'iyane' leycabi'. Na' bizi cati blë'ë yaca ben' quie Jesús nequië'yaquë' xcuidi' quieyaquë', na' udilayaquë' leyaquë'. ¹⁶ Na'ra guži Jesús yaca ben' quienë' rëbinë' leyaquë':

—Biudzunle yaca xcuidi'. Guidagarayacabi' ni como dan' ca naca quieyacabi', rue quieyacabi' quie xuziyacabi', lëcana' nacarën quie ben' zio rue quie xti'idza' Diuzi. ¹⁷ Tali ca rnia' le'e, chi nu yaca ben' birue quieyaquë' xti'idza' Diuzi ca rue xcuidi' quie xuzibi', bisaque' yeyoyaquë' guibá gan' zu Diuzi.

Tu ben' uña'a bë'lënë' Jesús di'idza'

(Mt. 19.16-30; Mr. 10.17-31)

¹⁸ Bizi bdyin tu ben' rnabë' gan' zë Jesús, na' unë' rëbinë' lëbë':

—Maestro, ben' huen naco'. Nainao', ¿ca bizi reya'ala' hua' ta gata' yela' neban quia' tuziolí?

¹⁹ Na' una Jesús rëbinë' lëbë':

—¿Bixquien' nao' naca' ben' huen? Tahuencazi nao' cana', como tuzi Diuzi naquë' ben' huen. ²⁰ Luë' banezilo' ca rna lë'ë guichi la'ya quie Diuzi: "Biutilo' nigula quie ben' tula. Bigutio' benë'. Bicuanlo' quie benë'. Bisiu' benë' yë'. Lëzi udapala'n xuzo' len žnao'."

²¹ Na'ra unë ben' na' rëbinë' Jesús:

—Yugulu ca rnao', ruequiecaza' len za'caza' naohua'n desde nacatia' xcuidi'.

²² Bë' be Jesús can' unë', na'ra unë' rëbinë' lëbë':

—De tu ta nerdzioguelo' huelo'. Bëti' yugulu ta de quio', na' bë'n yaca ben' yëchi'. Cana' gunra Diuzi taže quio' bë' yedyinlo' gan' zunë' guibá. Na' uda unao në'ëdi' gaco' ben' quia'.

²³ Na' bizi bè' be ben' na' ca una Jesús, na' bega'nnè' guquenè' beyèchi' gula, como dan' naquè' ben' uña'a huala gula. ²⁴ Caora blè'è Jesús guquyèchi'nè', na'ra unè' rèbinè' yaca benè':

—Zèdi gula nacan quie yaca ben' uña'a ta yeyoyaquè' guibá gan' zu Diuzi. ²⁵ Nacaran yalo te tu camello naga yèchi', cala ca ta yeyu'u ben' uña'a guibá gan' zu Diuzi.

²⁶ Na' yaca ben' be can' unè', unayaquè' rèbiyaquè' lèbè':

—Chi nacan zèdi gula yeyu'u yaca ben' uña'a guibá gan' zu Diuzi, ¿ca nuzi saque' yeyu'u?

²⁷ Na'ra una Jesús rèbinè' leyaquè':

—Tu ta bisaque' hue yaca benè', Diuzi sí, huazaque'nè' huenè'n.

²⁸ Na' bizi unè' Pedro rèbinè' Jesús:

—Señor, nèto' bapca'nndo' yugulu ta de quiendo' cuenda za'ndo' inaondo' luè'.

²⁹ Na'ra una Jesús rèbinè' lèbè':

—Nacan tali can' rnia' le'e. Con nuti'tezi ben' pca'n nu yu'u, nu xuzi, nu znè'è, nu bichi, nu zgule, nu zi'ine tanun quie dan' bazionè' naonè' xneza Diuzi, ³⁰ hueyu'era Diuzi tazera quienè' dza rdanè' lao yedyi layu cala ca tu ta pca'nnè'. Na' bè' yedyinnè' guibá gan' zu Diuzi, hue'nè' lèbè' yela' neban tuzioli.

Una Jesús tatula cabè' gaca quiè' gatinè'

(Mt. 20.17-19; Mr. 10.32-34)

³¹ Na' guzi Jesús lao chipchopa ben' quienè' ubiga'yaquè' tzala'la unè' rèbinè' leyaquè':

—Uletza' tzioro ciudad Jerusalén ga uzu di'idza' ca di'idza' bzu yaca ben' quie Diuzi lè'è guichi dza na'te. Lè'è lèguichi na' rguixogue'n cabè' usaca' yaca benè' nè'èdi', bichi yugulu benè'. ³² Na' yaca ben' yedyi quia' usedyinyaquè' nè'èdi' lao na'a ben' tula ta uti-tuyaquè' utasi unioyaquè' nè'èdi', uda'yaquè' zen' laohua'. ³³ Lèzi huaguiyaquè' gutiyyaquè' nè'èdi'. Bizi bè' gaca lao tzona dza, huebana' yeroga' gan' ucachi'yaquè' nè'èdi'. ³⁴ Pero yaca ben' quie Jesús biuyofne'eyaquè' cabè' gudyi Jesús leyaquè'. Binacan quieyaquè' ta tzioñe'eyaquè' can' unè'.

Byue Jesús tu ben' laochula, ben' yedyi Jericó

(Mt. 20.29-34; Mr. 10.46-52)

³⁵ Bagazi idyinyaquè' yedyi Jericó, na' re' tu ben' laochula tu neza gan' zioyaquè' rnanè' caridad. ³⁶ Bizi bè' be ben' laochula rde yaca ben' zè gula, caora na' unabanè' yaca ben' bin' guca dan' rdezi rdeyaquè'. ³⁷ Na'ra unayaquè' rèbiyaquè' lèbè':

—Huade Jesús, ben' yedyi Nazaret, gan' re'lo' niga.

³⁸ Quie lena' unè' zidzo:

—Jesús, Zi'i suba rey David, beyèchi'la'adyi' nè'èdi'!

³⁹ Bi'zi yaca ben' dyialao laohuè', rdilayaquè' lèbè' ta bira inènè', pero unèrè' zidzora unè':

—Zi'i suba rey David, beyèchi'la'adyi' nè'èdi'.

⁴⁰ Bi'zi uleza Jesús, bènè' mandado yexi'yaquè' ben' laochula. Caora bdyinnè' ga'ala' gan' zè Jesús, na'ra unaba Jesús lèbè':

⁴¹ —¿Ca bizi re'lenlo' hua' quio'?

Na' bequèbi ben' laochula nè':

—Señor, re'enda' yelè'èda'.

⁴² Na'ra una Jesús rèbinè' lèbè':

—Babayaco', barelè'èlo' na'a nun quie rzudyi'ilèlo' Diuzi.

⁴³ Ca tu beyudyizi unè' cana', labelè'ète ben' laochula, uzi'nè' zionè' naonè' Jesús ruenè' Diuzi ben' ze. Lèzi yaca ben' blè'è can' bènè' quie ben' laochula, bëyaquè' Diuzi ben' ze.

19

Uyo Jesús lidyi Zaqueo

¹ Na'ra bè' bdyin Jesús yedyi Jericó udenè' lao yedyi na'. ² Lèlao yedyi na' uzu tu ben' uña'a laonè' Zaqueo. Nacanè' xan' ben' huequi'zu. ³ LèZaqueo re'ennè' ilè'ènè' Jesús cuenda huebè'nè' lèbè'. Pero birzaque'nè' ilè'ènè' lèbè', dan' lega bgu'udi' yaca ben' zè gula. Na' lèbè' naquè' ben' chaco, binaquè' ben' huego'. ⁴ Na'ra zionè' taria udyialaonè' bdyinnè' gan' zu tu yaga laona sicómoro cuèta neza gan' zio Jesús. Bi'zi na' urènè' lao yaga ta ilè'ènè' Jesús dyè'èdi'. ⁵ Bizi cati bdyin Jesús gan', bechisa laonè' rna'nè' lao yaga gan' dyia Zaqueo. Na' unè' rèbinè' lèbè':

—Zaqueo, labe beyèzi gan' dyialo' como dan' zan yu'u quio' idyina' na'.

⁶ Bi'zi Zaqueo labezi beyèzinè' gan' dyianè' lao yaga. Bedaohuenè' bequie'nè' Jesús zan yu'u quienè'. ⁷ Bè' blè'è yaca benè' bazio Jesús zan yu'u quie Zaqueo, na'ra uzulaoyaquè' rtzaloyaquè' rèbiyaquè' laguedyiyaquè' unayaquè' bazio Jesús yedyinnè' zan yu'u quie tu ben' huezi' yè', ben' mala gula. ⁸ Na'ra bare'yaquè' lu'u lidyi Zaqueo, uzulinè' unè' rèbinè' Jesús:

—Señor, hua' yaca ben' yèchi' gatzo ta de quia'. Chi baozia' benè' yè' ulana' quieyaquè', na' yeyu'ayaquè' lao tapa cue' ta aozia' quieyaquè'.

⁹Na'ra una Jesús rëbinè' Zaqueo:

—Lena' rulu'en tali abetza'lo' pensari quio', na' barue quio' xti'idza' Diuzi. Banaco' dugalo zi'i suba Abraham. ¹⁰Nè'èdi', bichi yugulu benè', bida' lao yedyi layu ta ute usela' ben' ruen zudyi quie yeyoyaquè' lao guì' gabila.

Una Jesús tu di'idza' quie ben' bè' ben' gaca ladyinè'è dumi

¹¹Tu nerzënaga yaca benè' ca rna Jesús, unè' itu di'idza' dan' barega'n ga'ala' ga re' ciudad Jerusalén, lëscan' dan' guqueyaquè' il'è'èti'zi rdziogue ta idyin dza inabè' Diuzi lao yedyi layu. ¹²Na'ra unè' rëbinè' leyaquè':

—Uzu tu ben' bala'ana. Na' uzè'è zionè' yedyi re' zitu' ta cuioyaquè' lëbè' gaquè' rey yedyinnè' tatula ta inabè'nè' lao yedyi quienè'. ¹³Pero tu zaironè' sa'nè', na' guzínè' lao chi yaca ben' hue'nè' ladyinè'è. Na' bè'nè' quie quieyaquè' tu dumi ze. Tana' unè' gudyinè' leyaquè': "Ulehue negocio conlè dumi babèna' le'e. Na' bè' yeguida' huero cuenda." ¹⁴Na' biži yaca ben' lao yedyi quienè', lega rudieyaquè' lëbè'. Caora na' use'ela'yaquè' yaca benè' zio zenaoyaquè' lëbè' ta yëbiyaquè' ben' re' yedyi gan' zioyaquè': "Birexendo' ben' ni ta gaquè' rey quiendo'." ¹⁵Pero gucacazinè' rey quieyaquè'. Ude na' bedyinnè' lao yedyi quienè'. Cati bedyinnè', na' guzínè' yaca ben' nu'enè' ladyinè'è dumi quienè' ta inezinè' gaca tu ta bëlëyaquè' gan dumi quienè'. ¹⁶Na'ra unè' ben' nêro rëbinè' lëbè': "Señor, dumi benlo' nê'èdi', babèlia'n gan ichi cue' mazara ca tu ta benlo' nê'èdi'." ¹⁷Na'ra una rey na' rëbinè' lëbè': "Tahuen gula babao'. Na' nun quie bzulo' di'idza' bao' huen conlè lè'èti'zi pca'na' lao na'alo', na'ra gaco' ben' rnabè' quie lao chi yedyi." ¹⁸Lëzi bdyin ben' urupe unè' rëbinè' rey na': "Señor, dumi quio' benlo' nê'èdi', babèlia'n gan iga'yo cue' mazara ca tu ta benlo' nê'èdi'." ¹⁹Na'ra una rey na' rëbinè' lëbè': "Gaco' ben' rnabè' lao ga'yo' yedyi." ²⁰Biži bdyin ben' uyune unè' rëbinè' rey na': "Señor, ni zeyu'a dumi benlo' nê'èdi'. Ptuba'n la'ari' bdze'tza'ohua'n. ²¹Bibèlia' dumi quio' negocio, dan' rdzeba' chan' initin idza'lo' nê'èdi', dan' nezda' naco' ben' reguè'è bire'enlo' initi ta de quio'. Nezda' ruelao' dumi quio' negocio ga gacan seguro hue guichon." ²²Na'ra una rey na' rëbinè' ben' na': "Ben' mala gula naco'. Con can' rnao' rulu'en quio' aoquixo' bibè quio' huelo' ca re'lenda'. Chi nezò' naca' ben' reguè'è, ben' rue negocio ga gacan seguro hue guichon, ²³¿bixquien' biyelècho' dumi quia' lao banco tacuenda hue guichon yez'i'a dumi quia' len guichon bè' yela' zan yu'u?" ²⁴Na'ra una rey na' gudyinè' yaca ben' nita' na': "Ulesì' dumi bi'a ben' na', na' ulehue'na ben' bi'a chi dumi." ²⁵Na' unayaquè' rëbiyaquè' rey na': "Pero Señor, badecazi chi dumi quienè'." ²⁶Na' una rey na' rëbinè' leyaquè': "Nu ben' rue quie ca ta pca'n xa'nnè' ladyinè'è, lëlèbè' hue'ra xa'nnè' lëbè' mazara. Pero nu ben' birue quie ca ta pca'n xa'nnè' ladyinè'è, hueguba xa'nnè' ca ta bè'nè' lëbè'. ²⁷Pero ca naca yaca ben' rudie nê'èdi', yaca ben' birexe gaca' rey quieyaquè', uletzexi'yaquè' gutileyaquè' zaquè' laohua' ni."

Bdyin Jesús ciudad Jerusalén

(Mt. 21.1-11; Mr. 11.1-11; Jn. 12.12-19)

²⁸Bè' beyudyi una Jesús cana', beyu'uyaquè' neza tatula uza'yaquè' zioyaquè' ciudad Jerusalén. ²⁹Cati baruen bago idyinyaquè' yedyi Betfagé len yedyi Betania, ga nacan ga'ala' gan' zu tu ya'a Olivos, lëgan' na' use'ela'nè' chopa ben' quienè'. ³⁰Na' unè' gudyinè' leyaquè':

—Uletzio yedyi re' ni' ga'ala'. Bè' idyinle gan', huatzaxacale tu burra nerrioba', bia nitu nunu necuia. Uxèdyileba' nadahua'aleba' niga. ³¹Chi il'è'è yaca benè' le'e inayaquè' le'e bixquien' rxèdyileba', na' reya'ala' yëbilyaquè' re'en Señor lèba' ta cuianè'ba'.

³²Na'ra uza' yaca ben' quie Jesús zioyaquè' gan' use'ela'nè' leyaquè'. Na' laga guca quieyaquè' cabè' gudyi Jesús leyaquè' yexacayaquè' lëgan' nerio burra. ³³Na' caora barxèdyiyaquè' burra, cana' bdyincazi xan' burra, na' unè' rëbinè' leyaquè':

—¿Bixquien' rxèdyile burra quia'?

³⁴Na'ra unayaquè' rëbiyaquè' lëbè':

—Re'en Señor lèba' ta cuianè'ba'. Bè' idyinnè' gan' ziondo', nadesanndo'ba'.

³⁵Na' bequiè'yaquè'ba' gan' zè Jesús, uxubayaquè' zabayaquè' xcu'udzu burra ta udyianè' lèba'. ³⁶Tu neyu'u Jesús neza zionè' ciudad Jerusalén, ulèchayaquè' zabayaquè' udixuyaquè'n tu neza gan' tenè'. ³⁷Caora bdyinyaquè' gan' zu leto quie ya'a Olivos, cana' uzulao yaca ben' zio nao Jesús unëyaquè' zidzo. Lega redaohueyaquè' bëyaquè' Diuzi ben' ze ca naca yela' huaca bènè' bl'è'èyaquè'. ³⁸Lena' unayaquè' zidzo:

—Ben' naca la'iya ben' niga. Naquè' rey quiero. Diuzi use'ela'nè' lëbè'. Redaohue yaca ben' nita' guibá ca ruenè'. Naca Diuzi ben' ze gula. —Cana' unayaquè'.

³⁹Na' biži nita' bala yaca ben' partido fariseo lado yaca ben' zio nao Jesús. Na' unayaquè' rëbiyaquè' lëbè':

—Maestro, reya'ala' tilo' yaca ben' za' nao luè' niga ta bira inayaquè' can' nayaquè'.

⁴⁰ Na' bequèbi Jesús rëbinè' leyaquè':

—Rnia' le'e, chi yega'n yaca ben' niga chizi, huanè yaca yo ni zidzo lao lazayaquè'.

⁴¹ Cati bdyinyaquè' ga'ala' ga re' ciudad Jerusalén, na' blè'ènè' ciudad na', na' uredyinè'.
⁴² Quie lao ciudad na' unè' canì:

—Bida' ta ucuasa ucui'oga' le'e cue' chizi laxta'ole tuzioli, pero bire'enle birezaquele nè'èdi'. Quie lena' baode quiele na'a. ⁴³ Baza' dza gaca bayèchi' gula quiele. Huala' yaca ben' zè, yaca ben' rudie le'e. Huayèchayaquè' lao ciudad quiele uza'agayaquè' le'e. ⁴⁴ Gutiyaquè' le'e len z'gulale len z'i'ile. Yela'te uquinuyaquè' yu'u quiele. Cana' gaca quiele como dan' bibè quiele nè'èdi' dza bida' gu'unda' sulia' le'e tuze.

Blaò Jesús yaca ben' yu'u huèti' lu'u idao' rnaè'ra
(Mt. 21.12-17; Mr. 11.15-19; Jn. 2.13-22)

⁴⁵ Na'ra uyu'u Jesús lu'u idao' rnaè'ra blaonè' yaca ben' yu'u ra'o ruti'. ⁴⁶ Na' unè' rëbinè' leyaquè':

—Lè'è guichi gan' yu'u di'idza' la'iya quie Diuzi nan canì: “Lu'u idao' rnaè'ra ni nacan ga rlidza yaca benè' Diuzi.” Pero le'e abetza'len ruelen ca quie beló ga yu'u ben' uban. —Cana' una Jesús gudyinè' leyaquè'.

⁴⁷ Pero yugu dza rio Jesús lu'u idao' rnaè'ra ruxi'idze'nè' yaca benè'. Pero yaca xan' pxuzi, len yaca ben' rusèdi ley quie Moisés, len yaca ben' napa dyin quie lao yedyi, regulola'adyi'yaquè' rna'yaquè' ca hueyaquè' ta gutiyaquè' lèbè'. ⁴⁸ Pero biubinyaquè' bi hueyaquè' ta gutiyaquè' lèbè', como dan' nita' yaca ben' zè gula rexeyaquè' uzènagayaquè' can' rnè'.

20

Bè'yaquè' di'idza' quie yela' rnaè' quie Jesús
(Mt. 21.23-27; Mr. 11.27-33)

¹ Biži bdyin tu dza zè Jesús lu'u idao' rnaè'ra ruxi'idzè' yaca benè' ca re'en Diuzi hueyaquè' ta yeyèri laxta'oyaquè' laohuè'. Na' bdyin yaca xan' pxuzi, len yaca ben' rusèdi ley quie Moisés, len yaca ben' napa dyin quie yulao'. ² Na'ra unayaquè' rëbiyaquè' lèbè':

—Una nètò' ¿nu ben yela' rnaè' quìo', dan' bablaolo' yaca ben' yu'u huèti' lu'u idao' rnaè'ra?

³ Na' una Jesús rëbinè' leyaquè':

—Lèscan' re'enda' inaba' le'e tu di'idza'. Na' yequèbile quia': ⁴ ¿Nuži use'ela' Juan bautista? ¿Use'ela' Diuzi lèbè' o ta racazi la'adyi'nè' bidè'?

⁵ Na'ra uzulaoyaquè' rtzaloyaquè' ru'elèyaquè' lagueadyiyaquè' di'idza' unayaquè':

—¿Cabizi yëbironè'? Chan' yëbironè': “Diuzi use'elè' lèbè'”, na' huanè' ra'o: “¿Bixquien' bigulele quienè'?” ⁶ Na' chi yëbironè': “Ta racazi la'adyi'nè' bidè'”, na' huadza' yaca benè' ra'o, ruen žudyi huaguiyaquè' ra'o yo, gutiyaquè' ra'o como dan' rnayaquè' use'ela' Diuzi Juan rguixogue'nè' xti'idzè'.

⁷ Na'ra unayaquè' rëbiyaquè' Jesús:

—Binezindo' nu ben' use'ela' Juan bautista.

⁸ Lèzi unarè Jesús rëbinè' leyaquè':

—Lèscan' nè'èdi' lèbinia' le'e nu ben yela' rnaè' quia' bablaohua' yaca ben' yu'u huèti' lu'u idao' rnaè'ra.

Una Jesús tu di'idza' quie ben' mala, ben' guca ladyin'è quie xa'ne
(Mt. 21.33-44; Mr. 12.1-11)

⁹ Na'ra una Jesús itu di'idza' ni rëbinè' yaca benè':

—Uzu tu ben' guzanè' bedzuli' lao layu quienè'. Ude na' pca'nnè'n lao na'a yaca ben' gaca ladyin'è layela quienè'. Na' uzè'è žiogué' yedyi re' zitu'. ¹⁰ Biži cati bdyin biu' quie usecho quie bedzuli', na' bese'ela' xan' layela tu ben' zu laohuè' ta tzenabanè' tu ta redu'ulanè' si'nè' quie bedzuli' quienè'. Pero bela'cala bè'yaquè' zi' ben' use'ela' xa'nyaquè'. Na' beza'nè' gabi zeyu'anè', bedyinè' lao xa'nnè'. ¹¹ Na'ra bese'ela' ben' xan' layela ben' tula žiogué'. Pero lèzi utasi unioyaquè' lèbè', bè'yaquè' lèbè' zi', gabi bè'yaquè' lèbè'. Na' zeyogué' bedyinè' lao xa'nnè', gabi zeyu'anè'. ¹² Biži ben' xan' layela, tatula bese'ela'nè' ben' tula, ben' uyune. Lèzi bërèyaquè' lèbè' hue', blaoyaquè' lèbè', gabi zeyu'anè'.

¹³ Pues guca ben' xan' layela pensari unè': “¿Ca bižira hua'? Na' ise'ela' ži'ina' bi' nedyè'èda'. Cati ilè'èyaquè' lèbi', chica huapala'nyaquè' lèbi'.” ¹⁴ Pero bè' blè'è yaca ben' naca ladyin'è layela babdyin ži'i xa'nyaquè', na'ra unayaquè' rëbiyaquè' lagueadyiyaquè': “Bi' niga gaca quiebi' layu niga cati bagati xuzibi'. Uletza' gutirobi' cuenda si'ro layu niga gacan quiero.” ¹⁵ Na'ra bëxoyaquè'bi', ulioyaquè'bi' gan' de layela, bëtियाquè' lèbi'.

Na'ra unaba Jesús yaca ben' nita' na' tu di'idza' unè':

—¿Cabizi hue xan' layela len leyaquë'? ¹⁶ Pues huedyinnë' gan' de layela quienë' ta gutinë' yaca ben' nu'enë' ladyinë'ë, hue'në' yaca ben' tula gaca ladyina'ayaquë' layela quienë'.

Na'ra caora be yaca benë' cabë' una Jesús, na' unayaquë' rëbiyaquë' lëbë':

—Birda chi tamala ca tamala bë yaca ben' guca ladyinë'ë layela.

¹⁷ Na'ra una' Jesús leyaquë' unë' rëbinë' leyaquë':

—Chi nacan can' rnaie, ¿ga huen dyin di'idza' yu'yu lë'ë guichi la'iya quie Diuzi rnën caniga?:

Yo laga' ta baoru'un ben' hue huecua', lëyo na' bezi' Diuzi bzunë'n ga naca belao, ga rzulao besu.

¹⁸ Na' rnia' le'e, nu yaca ben' iguino lëlaoy yo na', huayožo iguinoyaquë'. Lëscan' chi iguino yo idacon leyaquë', huatzutzon leyaquë'.

Unabayaquë' Jesús ca naca quie impuesto

(Mt. 21.45-46; 22.15-22; Mr. 12.13-17)

¹⁹ Na'ra yaca xan' pxuzi, len yaca ben' rusëdi ley quie Moisés, gu'unayaquë' guxuyaquë' Jesús luegozi, dan' bezaqueyaquë' quieyaquë' unë Jesús di'idza' quie yaca ben' guca ladyinë'ë layela. Pero bibeyažoyaquë' bi hueyaquë' quienë', dan' rdzebiyaquë' bi hue yaca benë' quieyaquë'. ²⁰ Biži cabë' beguilola'adyi'yaquë' bëyaquë', use'ela'yaquë' ben' ruezı cuine ca ben' bala'ana ta tzenabayaquë' Jesús di'idza' chi iquixinë' inë' calëla tacuenda ga saque' gaoyaquë' lëbë' xquia lao ben' naca gobierno. ²¹ Quie lena' bdyinyaquë' gan' zë Jesús unayaquë' rëbiyaquë' Jesús:

—Maestro, banezindo' luë' rxi'idze'lo' yaca benë' di'idza' naca li. Na' biru' cuenda bi naque yaca benë', sino rxi'idze'lo' benë' tali ca naca xneza Diuzi. ²² Unacara nëto': ¿Ru'en lato quizoro quie impuesto quie ben' naca gobierno romano? ¿Huaguižoron o biquizoron?

²³ Pero banezi Jesús ca naca pensari mala yu'uyaquë' regulola'adyi'yaquë' bi hueyaquë' quienë'. Na' unë' rëbinë' leyaquë':

—¿Bixquien' re'enle cuëchile trampa quia'? ²⁴ Uleulu'ecara në'ëdi' tu dumi. ¿Nu guicho, nu laohue da' lë'ën?

Na'ra unayaquë' rëbiyaquë' lëbë':

—Da' lë'ë dumi nu guicho, nu lao ben' naca gobierno.

²⁵ Na' una Jesús rëbinë' leyaquë':

—Ulehue' ben' naca gobierno ta redu'ulanë' si'në'. Lëscan' ulehue' Diuzi ta redu'ulanë' si'në'.

²⁶ Na' gabi uzaque'yaquë' ga iquixi Jesús ca di'idza' rnë' lao benë'. Bela'cala tu bantzayaquë' can' unë'. Babira biubinyaquë' bi yëbiyaquë' lëbë'.

Unabayaquë' Jesús quie ben' baguti beban

(Mt. 22.23-33; Mr. 12.18-27)

²⁷ Ude na' uyorë yaca ben' partido saduceo gan' zë Jesús. Na'ra rna yaca ben' partido saduceo biyeban yaca ben' baguti. Quie lena' unayaquë' rëbiyaquë' Jesús:

²⁸ —Maestro, ca naca di'idza' bzu Moisés lë'ë guichi, rnën chi baguti tu be'mbyu, na' bega'n žgulanë' tu cuinzë', nunu ži'yaquë' uzu, ruen zi yezi' bi' bichinë' nigula quie ben' baguti tacuenda yezu xcuidi' yezi' lao ben' baguti. ²⁹ Na' ugunro guca gadyi bichiyaquë'. Na' ben' nëro uzi'në' nigula quienë'. Pero ni tu ži'yaquë' biuzu gutinë'. ³⁰ Na' biži ben' urupe bezi'në' nigula quie ben' bichinë', ben' baguti. Lëzi gutirënë', nunu ži'yaquë' uzurë'. ³¹ Na' biži ben' uyune bezi'rënë' nigula quie ben' bichinë', ben' baguti. Lëzirë gutirënë' nunu ži'yaquë' uzurë'. Cana' guca quie lao gadyiteyaquë', yaca ben' uzulë nigula. ³² Ga beyudyicala quie nigula, gutirënë'. ³³ Na'ra chi tali na' yeban yaca ben' huati, ¿ca nurlayaquë' naca žgulayaquë' nigula na', como dan' lao gadyi bichiyaquë' uzulëyaquë' lëbë'?

³⁴ Na' bequëbi Jesús rëbinë' leyaquë':

—Lao yedyi layu niga rzulë be'mbyu nigula, lëscan' rzulë nigula be'mbyu. ³⁵ Pero yaca ben' yeban yeyo guibá ga zu Diuzi, bira sulëyaquë' laguëdyiyaquë' ca nu žgulayaquë', ca nu xquiuyaquë'. ³⁶ Lëscan' bira gatiyaquë'. Cabë' bigati yaca ángel, cana' bigatirëyaquë'. Tali nacayaquë' ži'i Diuzi, dan' babebanyaquë' huatzezulëyaquë' Diuzi tuzioli. ³⁷ Na' rguixogue' yaca di'idza' bzu Moisés lë'ë guichi de que yeban yaca ben' baguti. Caora zë Moisés gan' re' yaga ra'ala' gui' bireina, lëgan' na' una Diuzi gudyinë' Moisés: "Naca' Diuzi quie xuzixta'olo' Abraham, len quie xuzixta'olo' Isaac, len quie xuzixta'olo' Jacob." ³⁸ Cana' una Diuzi quieyaquë', ba'ala'cazi bagutiyaquë' azio zë iza caora. Lena' rulu'en rlë'ë Diuzi leyaquë' ca ben' neneban, cala ca ben' baguti. Pues rlë'ë Diuzi yugulu benë' ca yaca ben' neban. Birlë'ënë' leyaquë' ca ben' baguti.

³⁹ Biži bala yaca ben' rusëdi ley quie Moisés, ben' nita' na', ruzënegayaquë' bi na Jesús, unayaquë' rëbiyaquë' Jesús:

—Tahuencazi cabë' baonao', Maestro.

⁴⁰ Na' bizi bira biubinyaquë' bi di'idza' inabayaquë' lëbë'.

Naca ben' Cristo Señor quie rey David

(Mt. 22.41-46; Mr. 12.35-37)

⁴¹ Na'ra una Jesús rëbinë' leyaquë':

—Nacan tali ca nale, nale naca ben' Cristo zi'i rey David. ⁴² Pero cuin rey David, caora bzunë' di'idza' lë'ë guichi Salmos, unë' cani:

Una Diuzi rëbinë' ben' naca Señor quia': "Ure' cuëta' zaquë' yebë niga,

⁴³ hasta idyin dza cuëcha' xni'alo' yaca ben' rudie luë'."

⁴⁴ Quie lena' rnaba' le'e: ¿Cómo naca ben' Cristo zi'i rey David, chi cuin rey David unë' naca ben' Cristo Señor quienë'?

Udao Jesús xquia yaca ben' rusëdi ley quie Moisés

(Mt. 23.1-36; Mr. 12.38-40; Lc. 11.37-54)

⁴⁵ Na' ben' zë nita' bzënegayaquë' ca una Jesús caora unë' rëbinë' yaca ben' quienë':

⁴⁶ —Gapale cuidado bihuele ca rue yaca ben' rusëdi ley quie Moisés. Lega rexeyaquë' gacoyaquë' la'ari' naca tona. Lega rexeyaquë' gapala'n yaca benë' leyaquë' ga rdayaquë' tu neza. Lega rexeyaquë' cue'yaquë' ga rbe' ben' bala'ana, chi lu'u idao' sinagoga, chi ga raca lani. ⁴⁷ Zidza rulidzayaquë' Diuzi cuenda ilë'ë yaca benë' leyaquë' ben' quie Diuzi, pero bë' rueziaquë' reguilola'adyi'yaquë' bi hueyaquë' ta cubayaquë' ta de quie yaca nigula baguti xquiuhue. Quie lena' huera Diuzi leyaquë' tu castigo huala gula.

21

Una Jesús quie tu nigula guti xquiuhue bdze'në' gun quie idao'

(Mr. 12.41-44)

¹ Na' guca tu dza zë Jesús lu'u idao' rnabë'ra blë'ënë' rudze' yaca ben' uña'a dumi quieyaquë' lu'u caja ga yu'un gun quie idao' rnabë'ra. ² Lëzi blë'ënë' bdze' tu nigula guti xquiuhue chopa dumi dao' lasi de cobre lu'u caja na'. ³ Na' una Jesús rëbinë' yaca ben' quienë':

—Tali rnia' le'e, nigula na' naquë' ben' yëchi', aguti xquiuhue', pero ca naca dumi bdze'në' lu'u caja, nacaran dumi ze cala ca ta bdze' yaca ben' uña'a. ⁴ Ta bega'nnan sobre quieyaquë' bdze'yaquë' lu'u caja na', pero lë'nigula ben' yëchi', bdze'në' ca tu dumi dao' dezi quienë' ta ra'onë' ta raonë'.

Una Jesús huabiagui' idao' rnabë'ra

(Mt. 24.1-2; Mr. 13.1-2)

⁵ Na'ra yaca ben' quie Jesús, bëlëyaquë' laguedyiaquë' di'idza' unayaquë' quie idao' rnabë'ra de que nacan badan gula, len yo necua' besu, len tu ta psala'adyi' yaca benë' bë'yaquë' quie idao'. ⁶ Na'ra una Jesús rëbinë' leyaquë':

—Huadyin dza iguino duze ca ta rna'le niga. Ni tu yo bira yega'nnan xcu'udzu laguedyin.

Ga ru'en di'idza' cabë' gaca baruen bago dza iyudyi dyilayu

(Mt. 24.3-28; Mr. 13.3-23)

⁷ Na'ra yaca ben' quie Jesús unabayaquë' Jesús rëbiyaquë' lëbë':

—Maestro, ¿bata gaca can' rnao'? ¿Ca bizi gaca ta ulu'en nëto' cati baruen bago dza gaca can' rnao'?

⁸ Na' una Jesús rëbinë' leyaquë':

—Gapale cuidado ta bisi' yaca benë' le'e yë'. Porque huida ben' zë inayaquë': "Në'ëdi' naca' Cristo." Lëscan' inayaquë': "Abdyin hora yeyudyi yedu quie dyila yu." Pero bigalele quieyaquë'. ⁹ Lëzi cati babele baouzulao huedila, rdilalë nación conlë itu nación, lëscan' rdilalë benë' conlë gobierno quieyaquë', bidzebile. Huata'cazi huedila quie lao yedyi layu, pero nerdziogue idyin dza yeyudyi yedu quie lao yedyi layu.

¹⁰ Lëscan' una Jesús rëbinë' leyaquë':

—Huaca dilalë tu nación itu nación. Huaca dilalë tu yedyi itu yedyi. ¹¹ Lëscan' ni'nizi quie lao yedyi layu huaca uzu' huala, huata' ubin, huata' yela' hue'. Lëscan' hualë'ë yaca benë' ta utzebin leyaquë' za'n guibá huazën ladza.

¹² Pero tu zagaca can', guxu yaca benë' le'e hueyaquë' le'e bizinaquezi. Iquië'yaquë' le'e lu'u yaca idao' sinagoga ta gaoyaquë' le'e xquia. Lëscan' udze'yaquë' le'e lu'u dyigu-iba, usedyinyaquë' le'e lao na'a ben' naca gobierno dan' baralele baza'le naole në'ëdi'.

¹³ Cana' gaca quiele tacuenda inële cule në'ëdi' laoyaquë'. ¹⁴ Bidëbile ca bi yëbilyaquë' cuenda gacalële cuinle laoyaquë'. ¹⁵ Bidëbile como dan' gacalia' le'e bi di'idza' yeqüëbile yeyëbilyaquë' cuenda inita' yaca ben' rudie le'e chizi, bira ibinyaquë' bi inayaquë' le'e.

¹⁶ Hasta ben' naca familia quiele, len ben' naca amigo quiele, huazi'yaquë' le'e yë'.

Useydin nu xuzile, nu bichile, nu diadza quiele, nu amigo quiele le'e lao na'a ben' r nabè'. Gutiyaquè' bala le'e. ¹⁷ Huadi yaca ben' nita' lao yedyi layu le'e dan' naole xneza'. ¹⁸ Pero bibi gaca quiele, ni tu guitza' guichole bicuiagui'n. ¹⁹ Chi hue quiele biusanla'adyi'le naole xneza', huata' yela' neban quiele tuzioli.

²⁰ 'Cati ilè'ële baneyèchote yaca soldado ciudad Jerusalén, huanezile baruen bago dza udyiaguè'yaquè' lao ciudad na'. ²¹ Na'ra yaca ben' nita' estado Judea, ruguinte izunoyaquè' tziyoyaquè' ga zu ya'a. Lèscan' yaca ben' nita' ciudad Jerusalén, ruguinte eroyaquè' tziyoyaquè' huazuno. Lèscan' yaca ben' nita' lao layela, bireya'ala' yeyoyaquè' ciudad Jerusalén. ²² Lèdza gaca can' nacan dza hue Diuzi castigo. Nacan dza uzucazi yugulu di'idza' ca di'idza' yu'u lè'è guichi la'ya quie Diuzi. ²³ Huaca bayèchi' gula quie yaca nigula nu'a bdao', len yaca nigula ruga'adyi bdao' dza gaca can'. Lega yedzagalao yaca ben' Israel, hue Diuzi leyaquè' tu castigo huala gula. ²⁴ Na' guti yaca soldado balayaquè'. Na' ibalayaquè' uquiyoaquè' hueyaquè' leyaquè' preso iquie'yaquè' leyaquè' yaca yedyi zè, yedyi tula. Tana' lena' inabè' yaca ben' za' yedyi tula lao ciudad Jerusalén hasta idyin dza bira hue Diuzi lato inabè'yaquè' lao ciudad na'.

Ca guca bè' yeguida ben' naca bichi yugulu benè' lao yedyi layu tatula
(Mt. 24.29-35, 42-44; Mr. 13.24-37)

Na' una Jesús:

²⁵ —Ude na' huata' ta naca seña ladza. Huechula obidza, bira gata' xni' biu', huaguino yaca bélo. Huaca tondo yaca ben' nita' lao yedyi layu. Huadzebiyaquè' yeyaquè' xchi' nisadao' ruen ru'be huala gula ga rbiga' r dan ru'a yu bidyi. ²⁶ Huayun'yaquè' tanto idzebiyaquè' ca gaca quieyaquè' lao yedyi layu. Huazisi huaguino yaca bélo dyian guibá. ²⁷ Lècana' hualè'è yaca ben' nita' lao yedyi layu nè'èdi', bichi yugulu benè'. Hualè'èyaquè' yeguida' lao beo zè ladza. Hualè'èyaquè' nè'èdi' de yela' huaca quia'. ²⁸ Cati baraca can' rnia', na'ra bidzebile, reya'ala' yechisa guichole ina'le ladza como dan' ilè'èti'zi rdziogue ute usela' le'e ca ta raza quiele.

²⁹ Lèzirè unè Jesús ita di'idza' ni, unè' rëbinè' leyaquè':

—Ulena'cara ca raza quie yaga higo o bitezi yaga tula. ³⁰ Cati ilè'ële bagusin la'aga' gula, barebian la'aga' re'ene quien, banezile baza' biu' oba. ³¹ Lèzirè cati ilè'ële baraca cabè' rnia' le'e, reya'ala' inezile baza' dza inabè' Diuzi lao yedyi layu.

³² 'Tali rnia' le'e, tu bineya zi'isuba ben' nita' na'a, bè' gaca cabè' rnia' le'e. ³³ Huade quie ta dyia guibá len lao yedyi layu cana'zi, pero ca naca di'idza' rnia' le'e, biten cana'zi. Decadize huazun di'idza' cabè' rnia' le'e.

³⁴ 'Ulegapa cuidadao, bihue'le lato gacale zidi tzu'u pensari mala lu'u guicho laxta'ole. Bihuele tabayatza, bihuele hue'e, bidèbile quie ta gaole, bidèbile quie ta gacole, yela' na' biyebanle dza yeguida'. ³⁵ Porque cabè' rdzebi bia guixi' bè' rdacoba' lu'u trampa, cana' yedzebi yaca ben' nita' lao duze yedyi layu dza yeguida'. ³⁶ Lena' nia' le'e, ulesu listo. Ulehue'lè Diuzi di'idza' yugu dza, yugu yela, cuenda ucuaa ucui'onè' le'e ca tamala za' gaca lao yedyi layu. Ulehue quiele cuenda yetilalaole nè'èdi', bichi yugulu benè'. —Cana' una Jesús rëbinè' leyaquè'.

³⁷ Ruxi'idze' Jesús yaca benè' lu'u idao' r nabè'ra te dza. Na' biži quie sadze' rionè' ga zu ya'a lao Olivos ga reguesinè'. ³⁸ Biži yaca ben' zè rdyinyaquè' yugu zila lu'u idao' r nabè'ra ta rzènegayaquè' ca di'idza' ruxi'idzè' leyaquè'.

22

Beguilola'adyi'yaquè' bi hueyaquè' ta gutiyaquè' Jesús
(Mt. 26.1-5, 14-16; Mr. 14.1-2, 10-11; Jn. 11.45-53)

¹ Na' baruen bago ta hue yaca ben' Israel lani pascua ta gaoyaquè' yèta xtila binequixi levadura. ² Biži yaca xan' pxuzi len yaca ben' rusèdi ley quie Moisés, lega reguilola'adyi'yaquè' bi hueyaquè' ta gutiyaquè' Jesús. Pero bireyažoyaquè', dan' rdzebiyaquè' idza' yaca benè' leyaquè'.

³ Na' biži tu ben' naca ben' quie Jesús lado ichiptu yaca ben' quie Jesús bè'nè' lato uyu'u xan' taxi'ibi' Satanás lu'u laxta'onè'. Lèben' na' laonè' Judas Iscariote. ⁴ Na' uyo Judas tzegue'lènè' di'idza' yaca xan' pxuzi, len yaca ben' napa dyin quie idao' r nabè'ra ta yeguilola'adyi'yaquè' bi hueyaquè' ta usedyinnè' Jesús lao na'ayaquè'. ⁵ Leyaquè' lega bedaohueyaquè' bega'nlèyaquè' lèbè' di'idza' ta hue'yaquè' lèbè' dumi. ⁶ Na' uzulaonè' beguilola'adyi'nè' bi huenè' ta usedyinnè' Jesús lao na'ayaquè' cati nunu ben' nita'.

Ga ru'en di'idza' ca gaoyaquè' quie lani pascua
(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Bdyincazi dza bëyaquë' lani pascua cati gaoyaquë' yëta xtila ta binequixi levadura, lëscan' gutirëyaquë' beco' zi'ila' quie lani pascua. ⁸ Lena' una Jesús rëbinë' chopa ben' quienë', Pedro len Juan:

—Uletzio ta ucuezale ta gaoro rtze' quie lani pascua.

⁹ Na'ra unabayaquë' rëbiyaquë' lëbë':

—¿Gaži re'enlo' tziondo' ta tzacuezando' ta gaoro?

¹⁰ Biži na' una Jesús rëbinë' leyaquë':

—Uletzio ciudad Jerusalén. Caora babdyinle ru'a ciudad, lëgan' na' yedilale tu be'mbyu zeyu'a tu re' yudzo nisa. Lëben' na' inaole gan' zeyonë' yedyinnë' žan yu'u. ¹¹ Na' tzu'ule yëbile ben' naca xan' yu'u: “Cani na Maestro: ¿Gaži zu lu'u yu'u ga gaolëndo'në' rtze' quie lani pascua?” ¹² Na'ra ulu'enë' le'e tu lu'u yu'u že de chopa xcua ga baneluban banacan dya'a. Lëgan' na' ucuezale ta gaoro.

¹³ Na' uza'yaquë' zioyaquë' gucan laga con can' gudyi Jesús leyaquë'. Lëgan'na' pcueza-yaquë' ta gaoyaquë' rtze' quie lani pascua.

¹⁴ Cati bdyin hora gaoyaquë' quie rtze', na' uza' Jesús ziolënë' yaca ben' quienë' uyu'uyaquë' lu'u yu'u ure'yaquë' lao mesa. ¹⁵ Na'ra una Jesús rëbinë' leyaquë':

—Lega bare'enda' gaolia' le'e rtze' quie lani pascua tu zagatia'. ¹⁶ Rnia' le'e, bira gaolia' le'e rtze' quie lani pascua. Caora babzu di'idza' ca una Diuzi arnabë'në' lao yedyi layu, cana'tera gaolia' le'e rtze' quie lani pascua tatula.

¹⁷ Na'ra uži'në' tu copa, bazënë'n lao në'ë, unë' rëbinë' Diuzi:

—Diuxcalelo'.

Ude na' unë' rëbinë' leyaquë':

—Uleguxun tu tule, uleyo'on. ¹⁸ Rnia' le'e, bira yo'oga' nisa quie bedzuli'. Caora babdyin dza arnabë' Diuzi lao yedyi layu, cana'tera yo'oga' nisa bedzuli' tatula.

¹⁹ Na' uži'në' tu yëta xtila bazënë'n lao në'ë unë' rëbinë' Diuzi:

—Diuxcalelo'.

Ude na' unë' rëbinë' leyaquë':

—Lëyëta xtila ni nacan ca quie cuerpo quia'. Huatia' cuenda gata' yela' huezi'že quiele lao Diuzi. Cabë' aodaoro rtze' niga, cana' huerële ta yeza'la'adyi'le në'ëdi' cabë' bia' quiele.

²⁰ Lëzirë, ude beyudyi udaoyaquë', bezi'në' itu copa unë' rëbinë' leyaquë':

—Naca nisa bedzuli' yudzu copa ni ca quie ren quia'. Lena' ilatoga' gatia' cuenda yega'ntza'olë' Diuzi le'e tacubila. Lena' ilatoga' cuenda gata' yela' huezi'že quiele lao Diuzi.

²¹ 'Pero tu ben' re' len në'ëdi' lao mesa ni, lëben' na' usedyinnë' në'ëdi' lao na'a ben' rudie në'ëdi'. ²² Në'ëdi', bichi yugulu benë', banugunnan gatia'. Pero bayëchi' gula gaca quie ben' usedyin në'ëdi' lao na'a ben' rudie në'ëdi'.

²³ Na'ra unayaquë' rëbiyaquë' laguedyiyaquë':

—¿Nuži ra'o usedyinronë' lao na'a ben' rudie lëbë'?

Ga bëyaquë' tu huenë quie nulayaquë' gacara belao

²⁴ Na'ra yaca ben' quie Jesús uyu'uyaquë' huenë len laguedyiyaquë' ca nulayaquë' gacara ben' belao entre leyaquë'. ²⁵ Pero na' una Jesús rëbinë' leyaquë':

—Yaca ben' naca gobierno lao yedyi layu niga, lega dyiabë'yaquë' hue yaca benë' ca ta re'enyacuë'. Na' nayaquë' nacayaquë' ben' belao. ²⁶ Pero na' le'e bireya'ala' huele ca rueyaquë'. Bireya'ala' hue cuinle ben' belao. Reya'ala' gacalële laguedyile. Reya'ala' ilë'ële cuinle ca ben' criado. Chi huele cana', tali na' nacale ben' belao ca re'en Diuzi. ²⁷ Quie lao ben' nita' lao yedyi layu niga, rbe'cazi xa'nyaquë' lao mesa ta gaoyaquë' ta rudya criado quieyaquë'. Pero në'ëdi', la'acazi naca' xa'nle, zua' ladole rua' ca quie criado quiele.

²⁸ Na' como dan' bipsanla'adyi'le në'ëdi' dza cati quia zëdi gula quia', ²⁹⁻³⁰ quie lena', guna' le'e lato cue'le gaole yo'ole len në'ëdi' lao mesa quia' ga yedyina' inabi'a. Lëscan' guna' le'e lato cue'le ga gaca xlatole ichugolile quie lao chipchopa cue' ben' Israel. Cabë' bë Xuza', pca'nnë' yela' rnabë' quienë' ta inabi'a, cana' hueria' quiele, uca'na' yela' rnabë' quia' ta inabë'le.

Ga una Jesús quie Pedro huananë' binubë'në' lëbë'

(Mt. 26.31-35; Mr. 14.27-31; Jn. 13.36-38)

³¹ Lëzi unë' Jesús:

—Simón, Simón, re'en xan' taxi'ibi' Satanás huelën le'e prueba, chi usanla'adyi'le në'ëdi', chi bisanla'adyi'le në'ëdi'. Re'ennan usisin le'e ca rsisi benë' bini trigo. ³² Pero bablidza' Diuzi ta gacalënë' luë' ta bisanla'adyo' në'ëdi'. Na'ra cati barenaolo' xneza' tatula, na' utipalo' yaca ben' bicho', ben' nao xneza', ta inaorayaquë' mazara xneza'.

³³ Na'ra una Simón rëbinë' Jesús:

—Zucaza' dispuesto tzalia' luë', ba'ala'cazi udze'yaquë' ra'o lu'u dyiguiba, o chi gutiyaquë' ra'o.

³⁴ Na' una Jesús rëbinë' lëbë':

—Pedro, rnìa' luè', bala tu binecuedyi biu, huanao' tzona lasa binubë'lo' në'ëdi'.

Baidyin hora yedzagalao Jesús

³⁵ Na'ra una Jesús rëbinë' leyaquë':

—Cati use'ela' le'e ga uyole dza na', bibi'ale yëxo, bibi'ale dumi, bibi'ale itu cue' guidi ta uliolo, ¿bdzioguele bi ta bdzioguele?

Na' unayaquë' rëbiyaquë' Jesús:

—Bibi bdzioguendo'.

³⁶ Biži una Jesús rëbinë' leyaquë':

—Babetza' ca nia' huele. Chi de yëxo quiele, reya'ala' hua'alén, lëzi hua'arële dumi. Chi bide macheta quiele, guti'le gabán quiele ta ga'ole macheta quiele hua'alén. ³⁷ Lena' rnìa' le'e, decazide uzun di'idza' gan' rnën quia' lë'ë guichi la'ya quie Diuzi cani: "Hualé'ëyaquë' në'ëdi' ben' mala." Pues uzucazi yugulu di'idza' gan' rnën quia' lë'ë guichi la'ya.

³⁸ Na'ra unayaquë' rëbiyaquë' lëbë':

—Señor, decazi chopa macheta quiendo'.

Na' bequëbi Jesús unë':

—Conlë lëcazin hue'ennan.

Bë'lë Jesús Diuzi di'idza' ga laona Getsemani

(Mt. 26.36-46; Mr. 14.32-42)

³⁹ Na'ra ca rue Jesús yugu rdze', uza'në' zionë' gan' zu ya'a lao Olivos. Lëscan' uza'rë yaca ben' quienë' ziolëyaquë' lëbë'. ⁴⁰ Bë' bdyinyaquë' gan', na'ra unë' rëbinë' leyaquë':

—Ulidzale Diuzi cuenda yezi'le fuerza ta bihue xan' taxi'ibi' le'e gan bihuele xquia ca tazëdi baza' gaca quiele.

⁴¹ Lëgan' na' bega'n yaca ben' quienë' udyialao Jesús ilë'ëti' ca tu ga rdyin yo cati reru'unron. Na' ure'në' uditzu zibinë' layu blidzë' Diuzi. ⁴² Na' unë' rëbinë' Diuzi:

—Xuza' Diuzi, inaba' laolo' ucuasa ucu'olo' në'ëdi' ca tazëdi gula baza' gaca quia'. Nacan ca quie tu ta naca sla' ruen zi yo'oga'n. Pero zua' dispuesto gaca quia' cabë' re'lenlo' luè', cala ca re'enda' në'ëdi'. ⁴³ Biži na' bdyinte tu ángel za' guibá gan' zënë', gucalënë' lëbë' bezi'në' fuerza. ⁴⁴ Na' tanto bedzagalaonë' guquenë' bayëchi' gula, gucanë' nisa yesa blaton layu nacan ca ren quienë' tu rlidzë' Diuzi du guicho du la'adyi'në'.

⁴⁵ Biži bë' beyudyi blidzë' Diuzi, na' bezulinë' zeyoguë' gan' nita' yaca ben' quienë', blë'ënë' barasiyaquë', dan' banexaqueyaquë' tanto rdëbiyaquë' racayëchi'yaquë'. ⁴⁶ Lena' una Jesús rëbinë' leyaquë':

—¿Bixquien' rasizile? Ulechasa ulelidza Diuzi cuenda yezi'le fuerza ta bihue xan' taxi'ibi' le'e gan bihuele xquia ca tazëdi gula baza' gaca quiele.

Guxuyaquë' Jesús

(Mt. 26.47-56; Mr. 14.43-50; Jn. 18.2-11)

⁴⁷ Nerna Jesús ru'elënë' yaca ben' quië' di'idza' cati bdyin Judas gan' zënë' dyialaotenë' lao yaca ben' ziolënë' lëbë' tuze. Lëcana' ubiga'në' gan' zë Jesús udaonë' situ xaganë'. Naca Judas tuze len ichiptu yaca ben' quie Jesús. ⁴⁸ Na'ra una Jesús rëbinë' lëbë':

—Judas, con tu situ baodaolo' xaga', ¿lena' babao' entregar në'ëdi', bichi yugulu benë'?

⁴⁹ Na' biži cati blë'ë yaca ben' quie Jesús bi raca quienë', na'ra unayaquë' rëbiyaquë' lëbë':

—Señor, ¿re'lenlo' cuiondo' macheta quiendo' tilalëndo' leyaquë'?

⁵⁰ Biži na' ulio tu ben' quie Jesús macheta quienë', udinë' ben' criado quie xan' pxuzi, uchugunë' naguë' yebë'. ⁵¹ Pero na' una Jesús rëbinë' lëbë':

—Psan quieyaquë', cana'zi.

Ude na' bda' Jesús në'ë naga ben' na', labeyacaten. ⁵² Na'ra una Jesús gudyinë' yaca xan' pxuzi, len yaca ben' napa dyin quie idao' rñabë'ra, len yaca los demás ben' rñabë', ben' ziorë guxu lëbë':

—¿Cala ben' uban raquale naca' dan' nu'ale macheta, nu'ale yaga za'le guxule në'ëdi'?

⁵³ Cati uzulia' le'e lu'u idao' rñabë'ra yugu dza, nica beyazole guxule në'ëdi'. Pero na'ra abdyin hora quiele cati huelële në'ëdi' ca ta rnan quiele le'e, ben' rda lao lato laochula.

Una Pedro binubë'në' Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Na' bëxuyaquë' lëbë' uquië'yaquë' lëbë' zan yu'u quie xan' pxuzi. Na' ziorë Pedro zitu'la zenaonë' leyaquë'. ⁵⁵ Cati bdyinyaquë' na', ulëchiyaquë' gui' lali'a gan' rbe'yaquë' neyëchoyaquë' ru'a gui' ta yedze'eyaquë'. Na' ure'rë Pedro ladoyaquë'. ⁵⁶ Biži tu nigula, bi' naca criada, bë' blë'ëbi' Pedro re'në' ru'a gui', na' bega'mbi' rna'bi' lao Pedro. Beyudyi una'bi' lëbë' dyë'ëdi', na' unëbi' rëbibi' lëbë':

—Lëzi ben' re' niga, naquë' ben' quie ben' na'.

⁵⁷ Na' una Pedro rëbinë' lëbë':
 —Nígula, binubë'da' ben' nao' can'.
⁵⁸ Bë' guca itu chi', blë'ë ben' tula Pedro gan' re'në'. Na' una ben' na' rëbinë' lëbë':
 —Lëzi luë' nacarao' ben' quieyaquë'.
 Pero na' una Pedro rëbinë' lëbë':
 —Binaca' ben' quieyaquë'. Binubë'da' ben' na'.
⁵⁹ Biži bë' guca ca itu hora, na' unë itu ben' nita' na' rëbinë' Pedro:
 —Tali naca ben' ni ben' quie ben' na', como dan' nacaré' ben' estado Galilea.
⁶⁰ Na'ra una Pedro rëbinë' ben' una cana':
 —Binezda' quie ben' rnao', binubë'da' ben' na'.
 Lëcana', caora nernë Pedro cana', na' uredyi biu. ⁶¹ Na' beyëcho Jesús una'në' lao Pedro. Caora na' beza'la'adyi' Pedro con ca una Jesús gudyinë' lëbë': "Bala tu binecuedyi biu, huanao' tzona lasa binubë'lo' në'ëdi'." ⁶² Na'ra ubiga' Pedro tzala'la zionë' ga uredyinë' zi'laza gula.

Ga ru'en di'idza' cabë' bëyaquë' ptituyaquë' Jesús
 (Mt. 26.67-68; Mr. 14.65)

⁶³ Na' yaca ben' napa Jesús, ptituyaquë' lëbë', udyibiyaquë' lëbë' begorro. ⁶⁴ Lëscan' pquioyaquë' la'ari' laohuë', udyibiyaquë' laohuë', unayaquë' rëbiyaquë' lëbë':
 —Unacara nu udyibi luë'.
⁶⁵ Lëscan' lega di'idza' zi' unëyaquë' gudyiyaquë' lëbë'.

Psediyinaquë' Jesús lao na'a yaca ben' rna'bë'
 (Mt. 26.59-66; Mr. 14.55-64; Jn. 18.19-24)

⁶⁶ Biži bë' uyan' dza tula, bedupa yaca ben' napa dyin, len yaca xan' pxuzi, len yaca ben' rusëdi ley quie Moisés, uquië'yaquë' Jesús ziolëyaquë' lëbë' gan' re' yaca ben' napa dyin. Na' unabayaquë' rëbiyaquë' lëbë':

⁶⁷ —Unacara nëto' ¿naco' ben' na Diuzi ise'elë'?
 Na'ra bequëbi Jesús rëbinë' leyaquë':
 —Chan' inia' le'e naca' ben' na Diuzi ise'elë', nica galele quia'. ⁶⁸ Lëzi chi inaba' le'e tu di'idza', nica yequëbile quia', nica usanle në'ëdi'. ⁶⁹ Pero baza' dza huatzeri'a në'ëdi', bichi yugulu benë', zaquë' yebë cuëta Diuzi, ben' dera yela' rna'bë' quie.

⁷⁰ Biži lao yuguluteyaquë' unayaquë' rëbiyaquë' lëbë':

—¿Naco' ži'i Diuzi?
 Na' bequëbi Jesús rëbinë' leyaquë':
 —Sí, naca' ži'i Diuzi con can' nale.

⁷¹ Na'ra unayaquë' rëbiyaquë' laguedyiaquë':
 —¿Ca nura testigo re'ennan guida? Cuincapiro babero cabë' baona ben' niga.

23

Psediyinaquë' Jesús lao Pilato
 (Mt. 27.1-2, 11-14; Mr. 15.1-5; Jn. 18.28-38)

¹ Na'ra yugulu yaca ben' re' gan', uzuliyaquë' uquië'yaquë' Jesús tzahua'ayaquë' lëbë' lao Pilato, ben' naca gobernador. ² Lëgan' na' udaoyaquë' lëbë' xquia, unayaquë' rëbiyaquë' Pilato:

—Ben' niga rudze'yelanë' yaca ben' yedyi quando' rëbinë' leyaquë' bireya'ala' quizoro impuesto quie gobierno romano. Lëzi nanë' naquë' ben' use'ela' Diuzi, na' nanë' naquë' rey quando'.

³ Na'ra unaba Pilato Jesús rëbinë' lëbë':
 —¿Tabala naco' rey quie ben' Israel?

Na' bequëbi Jesús rëbinë' Pilato:
 —Naca' cabë' unao'.

⁴ Na'ra una Pilato rëbinë' yaca xan' pxuzi, len yaca los demás ben' nita' na':
 —Gabi dula' de quie ben' niga.

⁵ Na' bizi leyaquë' unërayaquë' zidzo gula rëbiyaquë' Pilato:

—Con ga baodenë' rudze'yelanë' yaca benë'. Pues barudze'yelanë' yaca ben' quie yaca yedyi quie estado Judea len yaca ben' quie yaca yedyi quie estado Galilea. Na' babla'në' niga ta udze'yelanë' yaca ben' lao ciudad niga.

Psediyinaquë' Jesús lao Herodes

⁶ Bë' be Pilato can' unayaquë' quie Jesús, na' unabanë' leyaquë' chi tali naca Jesús ben' quie estado Galilea. ⁷ Na' caora bequëbiyaquë' tali naquë' ben' quie estado Galilea, na' use'ela'në' Jesús lao Herodes, dan' naca Herodes gobernador quie estado Galilea, lëscan'

dan' bazurè Herodes ciudad Jerusalén. ⁸ Bizi bē' blē'ē Herodes bdyin Jesús gan' zunē', lega redahuenē' como dan' azio zē dza re'ennē' ilē'ēnē' lēbē'. Babenē' can' na yaca benē' can' ruenē'. Lena' re'ennē' ilē'ēnē' lēbē' chi bihuenē' tu milagro. ⁹ Na' uzulaonē' rnananē' Jesús zē pregunta, pero bibequēbi Jesús quienē'. ¹⁰ Lēgan' na' bdyinrē yaca xan' pxuzi, len yaca ben' rusēdi ley quie Moisés, udaoyaquē' lēbē' xquia. Di'idza' zēra bēyaquē' condre Jesús. ¹¹ Bizi Herodes len yaca soldado quienē' uzulaoyaquē' rueyaquē' lēbē' bizinaquezi. Bgacoyaquē' lēbē' tu la'ari' tzaol' ca quie la'ari' raco rey ta utituyaquē' lēbē'. Ude na' bese'ela'yaquē' lēbē' tatula lao Pilato. ¹² Du dza na'la, Herodes len Pilato, biyu'uyaquē' dya'a bigucayaquē' amigo, pero caora na' beyacayaquē' amigo.

Ga uchugubē'yaquē' gati Jesús

(Mt. 27.15-26; Mr. 15.6-15; Jn. 18.39-19.16)

¹³ Na' bē Pilato mandado bedupa yaca xan' pxuzi, len yaca ben' napa dyin, len yaca ben' lao yedyi. ¹⁴ Na'ra una Pilato rēbinē' leyaquē':

—Le'e badehua'ale ben' niga ni, nale rudze'yelanē' yaca benē', pero bapquēpa' lēbē' zaquē' lao le'e, na' le'e bablē'ēle bibi dula' de quienē' con ca inale raole lēbē' xquia. ¹⁵ Lēscan' Herodes pquēpinē' lēbē' bibi falta de quienē' bese'ela'nē' lēbē' niga. Bablē'ēle bibi dula' de quienē' cuenda hua' mandado guti yaca soldado lēbē'. ¹⁶ Quie lena' hua' mandado qui yaca soldado lēbē' guidi, na'tera usana'nē'. —Cana' una Pilato rēbinē' leyaquē'.

¹⁷ Na' bizi bē' ga'ala' lani, de yebio Pilato tu ben' naca preso lu'u dyiguiba con ca gue'en yaca benē'. Cana' naca costumbre quieyaquē' yebioyaquē' tu ben' naca preso dza lani pascua. Bizi Pilato gu'unnē' usannē' Jesús. ¹⁸ Pero yaca ben' nita' na' uzulaoyaquē' uredyia'yaquē' unēyaquē' zidzo:

—;Biusanlo' ben' na'! ;Yebiolo' Barrabás!

¹⁹ Bizi ben' lao Barrabás yu'unē' lu'u dyiguiba, dan' udilalēnē' yaca ben' rnanē' quie lao yedyi, lēzi bētinē' benē'. ²⁰ Na' como gu'un Pilato usannē' Jesús, bē'lēnē' yaca ben' nita' na' mazara di'idza'. ²¹ Pero uredyia'yaquē' zidzo unayaquē':

—;Uda'lo'nē' lē'ē yaga cruzo! ;Uda'lo'nē' lē'ē yaga cruzo!

²² Na'ra tabeyuna lasa una Pilato rēbinē' leyaquē':

—;Bizi tamala babēnē'? Bibi dula' de quienē' cuenda hua' mandado guti yaca soldado lēbē'. Quie lena' hua' mandado qui yaca soldado lēbē' guidi, na'tera usana'nē'.

²³ Pero na' unēra yaca benē' zidzora uredyia'yaquē' rēbiyaquē' Pilato ta huenē' mandado uda'yaquē' Jesús lē'ē yaga cruzo. Tanto uredyia' yaca ben' nita' na' len yaca xan' pxuzi, bēyaquē' gan gucan cabē' gu'unyaquē'. ²⁴ Cana' guca bē Pilato mandado cabē' unabayaquē' huenē'. ²⁵ Cana' guca ulio Pilato con ben' gu'unyaquē' yero lu'u dyiguiba, ben' guca dilalē ben' napa dyin, ben' bēti benē'. Cana' guca psedyin Pilato Jesús lao na'a yaca ben' hue bizinaquezi conlē lēbē'.

Bda'yaquē' Jesús lē'ē yaga cruzo

(Mt. 27.32-44; Mr. 15.21-32; Jn. 19.17-27)

²⁶ Caora bē' nequiē'yaquē' Jesús ta uda'yaquē' lēbē' lē'ē yaga cruzo, na' bēxoyaquē' tu ben' lao Simón, ben' yedyi Cirene, ben' zeza' layela. Na' bēyaquē' mandado bi'anē' yaga cruzo zionē' nu'anē'n zioquē' zenaohuē' Jesús.

²⁷ Na' yaca ben' zē gula zioyaquē' zenaoyaquē' leyaquē'. Lēscan' zenaonigula zē zioyaquē' rbedyia'yaquē' raqueyaquē' beyēchi', dan' rusacayaquē' Jesús bizinaquezi.

²⁸ Na' bizi Jesús beyēchi'nē' unē' rēbinē' leyaquē':

—Le'e nigula ciudad Jerusalén, bicuedyile por nē'ēdi'. Yela'cala cuedyile por le'e len Zi'ile.

²⁹ Porque baza' dza gaca bayēchi' gula quiele. Na' tanto gaca bayēchi' quiele, bisule gusto chi zu Zi'ile, bisule gusto chi nu'ale bdaol', bisule gusto chi ruga'adyile xcuidi'. ³⁰ Lēdza na' tanto idzebile bi gaca quiele, hueguilole ga ucachi'laole ga naca lē'ē ya'a. ³¹ Nia' le'e chi ruelēyaquē' yaga ya'a bizinaquezi, ;bizira huelēyaquē' yaga bidyi?

³² Lēzi nequiē'rēyaquē' chopa yaca ben' bē tamala ta gutiyaquē' leyaquē' tzaže len Jesús.

³³ Na' cati bdyinyaquē' ga laona chita guicho ben' huati, lēgan' na' bda'yaquē' lēbē' lē'ē yaga cruzo. Lēzirē bda'rēyaquē' chopa yaca ben' bē tamala. Tunē' bda'yaquē' zaquē' yebē, na' itunē' bda'yaquē' zaquē' yega'. ³⁴ Cati baruda'yaquē' Jesús lē'ē yaga cruzo unē' rēbinē' Diuzi:

—Xuza' Diuzi, bezi'ze quieyaquē', dan' bineziyaquē' bi rueyaquē'.

Ude beyudyi na', bē yaca soldado tu sorteo entre leyaquē' ca nulayaquē' gaca quie zaba Jesús. ³⁵ Bizi yaca ben' nita' na', bega'nnyaquē' rna'yaquē' lēbē'. Na' lente yaca ben' napa dyin rutituyaquē' lēbē' unayaquē' rēbiyaquē' laguedyiaquē':

—Gucalēnē' ben' tula, gacalēgaranē' cuinnē' chi tali naquē' ben' Cristo, ben' use'ela' Diuzi.

³⁶ Lēscan' ptturē yaca soldado lēbē'. Bēbiga'yaquē' gan' dē'ē, rzi'yaquē' vino naca sla' ruyo'oyaquē' lēbē'. ³⁷ Unayaquē' rēbiyaquē' lēbē':

—Chi tali naco' rey quie ben' Israel, pte psela cuinlo'.

³⁸ Lè'è yaga cruzo zaquè' ga zu guichoguè', bda'yaquè' tu yaga ta'a dyian letra griego, len letra latín, len letra hebreo. Lè'è yaga ta'a rnan caní: “Ben' ní naquè' rey quie yaca ben' Israel.”

³⁹ Bizi tu ben' bē tamala, ben' da'rè cuēta lè'ènè' lè'è yaga cruzo, pttitürè'nè' Jesús rēbinè' lèbè':

—Chi tali naco' ben' Cristo, pte psela cuinlo' len nēto'.

⁴⁰ Pero ben' itu laguēdyinè' udilanè' lèbè' unè' rēbinè' lèbè':

—¿Nica rdzebo' Diuzi hora cati gatio'? ⁴¹ Ca naca ra'o de dula' xquia quiero, na'a redzagalaoro barguizoro ca naca tamala bēro. Ta reya'ala'cazi gata' castigo quiero, pero ben' niga redzagalaonè', den' bibi tamala de bēnè'.

⁴² Na'ra unè' gudyinè' Jesús:

—Jesús, cati bazulo' gan' inabè'lo', yeza'la'adyo' quia' nē'èdi'.

⁴³ Na' una Jesús rēbinè' lèbè':

—Tali rnia' luè', na'a dza bazulo' len nē'èdi' guibá gan' zu Diuzi.

Ca guca guti Jesús

(Mt. 27.45-56; Mr. 15.33-41; Jn. 19.28-30)

⁴⁴ Bizi cati baruen cadu gatzo dza, bechula lao duže ciudad na' hasta reda tzona quie sadze'. ⁴⁵ Bechula lao ubidza. Caora na' bre'za la'ari' zè gatzo lao' idao' r nabè'ra gucan chopa la'a. ⁴⁶ Na'ra urediyia' Jesús unè' rēbinè' Diuzi:

—Xuza' Diuzi, ruca'na' bichi be quia' lao na'alo'.

Ude beyudyi unè' cana', gutinè'.

⁴⁷ Bizi ben' naca capitán quie yaca soldado romano, cati bablè'ènè' can' guca quie Jesús, bēnè' Diuzi ben' že unè':

—Tali ben' niga naquè' ben' huen, bibi tamala bēnè'.

⁴⁸ Na' bizi yaca ben' bida blè'è yaca can' guca quie Jesús, zeyoyaquè' žan yu'u r bibiyaquè' ru'achu'uyaquè', dan' raqueyaquè' beyèchi' cabè' bēyaquè' quie Jesús. ⁴⁹ Pero yaca ben' unao Jesús, lenrè yaca nigula unao lèbè' desde dza uza'nè' estado Galilea, bega'nyaquè' nita'yaquè' zitu'la rna'yaquè' can' guca quienè'.

Pcachi'yaquè' Jesús

(Mt. 27.57-61; Mr. 15.42-47; Jn. 19.38-42)

⁵⁰ Lēgan' na' uzurè tu ben' dya'a, ben' rue quie xti'idza' Diuzi laonè' José. Naquè' ben' yedyi lao Arimatea quie estado Judea. Napè' dyin, naquè' ben' rnabè' quie yaca ben' Israel.

⁵¹ Lēben' lao José rbezè' dza guida ben' ise'ela' Diuzi ta inabè'nè' lao yedyi layu. Bibè'nè' tuzi cabè' bē yaca los demás ben' naparè dyin. ⁵² Na'ra uyonè' yenabanè' lao Pilato chi bihue'nè' lato ta yechisanè' cuerpo quie Jesús. ⁵³ Na' ude bechisanè' cuerpo quie Jesús lè'è yaga cruzo, betubinè' lèbè' la'ari', bdze'nè' lèbè' tu lu'u yero beló yo ta zapqui'inyaquè', nitu nunu nedze'yaquè' gan'. ⁵⁴ Lédza na' nacan dza vierna cati rucuezayaquè' ta gaoyaquè' quie dza huezila'adyi'. Baodze' bagazi sulao dza huezila'adyi'.

⁵⁵ Na' yaca nigula unao Jesús desde dza uza'nè' estado Galilea, uyoayaquè' yena'yaquè' gan' bdze'yaquè' cuerpo quienè'. ⁵⁶ Ude beyudyi na', beza'yaquè' zeyoyaquè' žan yu'u quieyaquè' bapcuezayaquè' aceite rla' žixi žeo len güento ta ilèpiyaquè' cuerpo quie Jesús. Ude beyudyi bēyaquè' can', bezila'adyi'yaquè' según ca rnan lè'è guichi la'iya quie Diuzi.

24

Ga ru'en di'idza' cabè' guca cati beban Jesús

(Mt. 28.1-10; Mr. 16.1-8; Jn. 20.1-10)

¹ Na' bala baza' reni' dza domingo, zio yaca nigula gan' de yero beló yo gan' pcachi'yaquè' Jesús. Nu'ayaquè' acete rla' žixi žeo ta pcuezayaquè'. ² Bizi bē' bdyinyaquè' gan', rna'yaquè' baneyalo ru'a yero beló yo. Bira da' yo laga' ru'a yero gan' bda'yaquè'n. ³ Na'ra uyu'uyaquè' yero beló yo rna'yaquè' bira de cuerpo quie Señor Jesús gan'. ⁴ Lega bega'nyaquè' bdzebiyaquè'. Bira biubinyaquè' bi hueyaquè'. Caora na' blè'èyaquè' bazè chopa be'mbyu zaquè' laoyaquè' nacoyaquè' la'ari' bezèri di ta raca titi'. ⁵ Na' bizi bezèta' laoyaquè' layu, lega bdzebiyaquè'. Na' una yaca be'mbyu rēbiyaquè' leyaquè':

—¿Bixquien' rdale reguilole tu ben' naban gan' rucachi'yaquè' ben' huati? ⁶ Bira denè' niga. Babebannè' zunè' tatula. Uleza'la'adyi' can' unè' le'e cati nezulè'nè' le'e estado Galilea. ⁷ Lédza na' unè' gudyinè' le'e decazide usedyin yaca benè' lèbè' lao na'a yaca ben' rnabè', na' uda'yaquè' lèbè' lè'è yaga cruzo, pero bē' gaca lao tzona dza, huebannè' tatula lèbè', ben' bichi yugulu benè'.

⁸ Lēcana' beza'la'adyi'yaquè' ca una Jesús gudyinè' leyaquè'. ⁹ Ude beyudyi na', beroyaquè' lu'u yero beló yo beza'yaquè' zioyaquè' udixogue'yaquè' lao chiptu yaca ben' quie

Jesús, len yaca los demás ben' nao xneza Jesús can' guca quieyaquë'. ¹⁰ Na' lëyaca nigula, ben' uyo yetixogue' yaca ben' quie Jesús, tuë' laohuë' María Magdalena, ituë' laohuë' Juana, ituë' laohuë' María, naquë' žna' Santiago. Lëscan' uyorë yaca nigula naca laguediyaquë'. ¹¹ Na' biži yaca ben' quie Jesús guqueyaquë' calëla can' gudyi yaca nigula leyaquë'. Biguleyaquë' quieyaquë'.

¹² Den' uyocazi Pedro uy'u' unë' be zionë' taria gan' de yero beló yo. Na' bë' una'në' lu'u yero beló yo, blë'ënë' la'ari' ta ptubiyaquë' cuerpo quie Jesús, bega'nnan re'nan cuinzn. Na'ra tu bebanzinë' can' blë'ënë' beza'në' zeyoguë' žan yu'u quienë'.

Neza zio Emaús ptilalao Jesús chopa ben' unao lëbë'

(Mr. 16.12-13)

¹³ Lëdza na'atezi, beza' chopa yaca ben' unao xneza Jesús ciudad Jerusalén, zeyoyaquë' yedyi quieyaquë' laona Emaús. Na' ciudad Jerusalén para yedyi quieyaquë' nacan tzona legua. ¹⁴ Zioyaquë' ru'eyaquë' di'idza' ca bë yaca ben' ciudad Jerusalén psacayaquë' Jesús. ¹⁵ Biži tu rza'yaquë' zioyaquë' ru'eyaquë' di'idza', cati ubiga' cuin Jesús cuëta leyaquë' baziolënë' leyaquë' tzaže. ¹⁶ Pero ba'ala'cazi blë'ëyaquë' lëbë', bibezaqueyaquë' chi lëbë'. ¹⁷ Na'ra una Jesús rëbinë' leyaquë':

—¿Biži guca rnële yu'ule neza? ¿Bixquien' raqueyëchi'le?

¹⁸ Na' tu ben' ziolë laguedyi laonë' Cleofas unënë' rëbinë' Jesús:

—Banezi yugulu benë' can' guca ciudad Jerusalén nionasigazi. ¿Cala zurao' luë' ciudad Jerusalén, na' biunezo' bin' guca?

¹⁹ Na'ra unaba Jesús leyaquë':

—¿Cabiži guca gan'?

Na' unayaquë' rëbiyaquë' lëbë':

—Guca tu tamala gula quie tu ben' lao Jesús, ben' yedyi Nazaret. Guquë' ben' udixogue' xti'idza' Diuzi. Bënë' yela' huaca, psëdinë' yaca benë' di'idza' dya'a. Yaxe Diuzi len yaca benë' can' bënë'. ²⁰ Pero yaca xan' pxuzi, len yaca los demás ben' napa dýin quiero, psedyinyaquë' lëbë' lao na'a ben' bda' lëbë' lë'ë yaga cruzo bëtiyaquë' lëbë'. ²¹ Pero nëto' guquendo' naquë' ben' use'ela' Diuzi ta ute uselanë' ra'o ben' Israel cuando bira inabë' yaca ben' naca gobierno romano ra'o. Na' biži azio lao tzona dza bëtiyaquë' lëbë'. ²² Pero na'a zila, bala yaca nigula nacalëndo' tuzi unaondo' lëbë', uyoyaquë' lu'u beló yo gan' pcachi'yaquë' lëbë'. Na' bega'nndo' rebanendo' ca gudyiyaquë' nëto' blë'ëyaquë' gan'. ²³ Bela'yaquë' udixogue'yaquë' nëto' bide cuerpo quienë' lu'u yero beló yo gan' pcachi'yaquë' lëbë'. Unayaquë' blë'ëyaquë' chopa ben' naca ángel, ben' una babeban Jesús zunë' tatula. ²⁴ Lëzirë ibala be'mbyu laguedyindo', ben' unao lëbë', uyoyaquë' uyuyayaquë' lu'u yero beló yo, na' blë'ëyaquë' nacan tali can' una yaca nigula, pero na' biblë'ëyaquë' Jesús.

²⁵ Na'ra una Jesús rëbinë' leyaquë':

—Taze nerdzioguele tzioñe'ele cabë' na xti'idza' Diuzi. Lega ruen zëdi quiele galele yugulu cabë' una yaca ben' udixogue' xti'idza' Diuzi dza na'la. ²⁶ ¿Biži binezile rnan lë'ë guichi la'iya quie Diuzi yedzagalao ben' ise'ela' Diuzi gatinë', te na' yebannë' tatula hue Diuzi lëbë' ben' zera? —Cana' una Jesús rëbinë' leyaquë'.

²⁷ Na'ra uzulaonë' ruxi'idze'në' leyaquë' ca na di'idza' la'iya quie Diuzi gan' rguixogue'n quie ben' ise'ela' Diuzi. Conlë di'idza' bzu Moisés lë'ë guichi uzulaonë' ruxi'idze'në' leyaquë', bzalaorë' unarë' mazara hasta gan' bzu yaca profeta di'idza' lë'ë guichi.

²⁸ Bë' bdyinyaquë' yedyi gan' zioyaquë', labëtenë' badyinzi ta së'ë tzu'unë' neza tatula. ²⁹ Pero leyaquë' bdyiabë'yaquë' quienë' ta yega'nnë' len leyaquë'. Lena' unayaquë' rëbiyaquë' lëbë':

—Bega'nlë nëto' niga. Baza' rchula bahuen rtze'.

Na'ra bega'nnë' len leyaquë' gan'. ³⁰ Caora baore'lënë' leyaquë' lao mesa ta gaoyaquë' rtze', na' uži'në' tu yëta xtila unë' rëbinë' Diuzi diuxcalelo'. Beyudyi na', bžozoguë'n bënë'n leyaquë'. ³¹ Lëcana' beyeni' laoyaquë' bezaqueyaquë' lëbë'. Na' biži lëbë' tu beyulazinë', bira blë'ëyaquë' lëbë'. ³² Na'ra unayaquë' bë'yaquë' di'idza' lao rupayaquë' unëyaquë':

—¿Cala tali na' bedaohue guicho laxta'oro caora za'lënë' ra'o tu neza ruxi'idze'në' ra'o quie di'idza' zu lë'ë guichi la'iya quie Diuzi?

³³ Na'ra labeyu'uteyaquë' neza tatula, zioyaquë' ciudad Jerusalén gan' yetilayaquë' nita' yaca chiptu ben' quie Jesús, len yaca los demás ben' unao lëbë'. ³⁴ Na' una yaca ben' bgu'udi' gan', rëbiyaquë' ben' zabdyin:

—Nacan tali babeban Señor quiero. Bablë'ë Simón lëbë'.

³⁵ Na' unayaquë' rëbiyaquë' leyaquë' can' guca quieyaquë' tu neza bë'lëyaquë' Jesús di'idza', pero bibezaqueyaquë' chi lëbë' hasta bžozonë' yëta xtila bë'në'n leyaquë'.

Ptilalao Jesús yaca ben' quienë'

(Mt. 28.16-20; Mr. 16.14-18; Jn. 20.19-23)

³⁶ Bizi nenita'teyaquè' neru'eyaquè' di'idza' cati bdyin Jesús yēsazi bazēnē' ladoyaquè' blidzanē' leyaquè'unē':

—Cue' chizi laxta'ole.

³⁷ Pero lega bdzebiyaquè' guqueyaquè' blē'èyaquè' ludza' ben' huati. ³⁸ Lena' una Jesús rēbinē' leyaquè':

—¿Bixquien' rǒzebile? ¿Bixquien' raquele cala nē'ēdi'? ³⁹ Ulena'cara na'a len ni'a, nē'ēdi'cazi. Ney'a nē'ēdi' naca' benē', binaca' ludza' ben' huati. Tu ludza' ben' huati binacan bē'ēla', biyu'un chita can' rlē'ēle naca'.

⁴⁰ Tu ru'elēnē' leyaquè' di'idza', blu'enē' leyaquè' nē'ē len ni'anē'. ⁴¹ Pero como dan' bine-galeyaquè' chi lēbē', bega'nyaquè' rebaneyaquè' redaohueyaquè', unē' rēbinē' leyaquè':

—¿Bide lē'ēti' quiele gunle lē'ēti' gaohua'?

⁴² Na'ra bē'yaquè' lēbē' tu naga bela banegūechi len tu yēta quie bezo yudzu bdyin'dao'.

⁴³ Na'ra uzi'nē'n udaonē'n zaquē'lao leyaquè'. ⁴⁴ Na' unē' rēbinē' leyaquè':

—Baguca quia' cabē' can' baonia' le'e gaca quia' dza na'la, dza cati nezulia' le'e. Agudya' le'e decazide uzun yugulu di'idza' can' rnan quia' nē'ēdi' lē'ē guichi bē Moisés, len guichi bē yaca profeta, len guichi Salmos.

⁴⁵ Na'ra pxi'idze'nē' leyaquè' can' na lē'ē guichi la'iya quie Diuzi. ⁴⁶ Lena' unē' rēbinē' leyaquè':

—Cani rnēn lē'ē guichi la'iya quie Diuzi. Rnan decazide gati ben' ise'ela' Diuzi lao yedyi layu. Te beyudyi na', yebannē' tatula gaca lao tzona dza. ⁴⁷ Lēscan' rnan lē'ē guichi la'iya quie Diuzi ruen dyiabē' tzio yaca ben' quienē' tzetixogue'yaquè' yaca ben' nita' lao duže yedyi layu de que reya'ala' yetza'yaquè' pensari quieyaquè' inaoyaquè' nē'ēdi' cuenda yezi'ze Diuzi dula' xquia quieyaquè'. Ciudad Jerusalén reya'ala' sulaoyaquè' quixogue'yaquè', na'tera tzioyaquè' yedyi tula. ⁴⁸ Le'e nacale testigo quia' blē'ēle baguca quia' can' rnan lē'ē guichi la'iya quie Diuzi. ⁴⁹ Na' ise'ela' Bichi Be quie Diuzi ta tzu'unē' lu'u guicho laxta'ole can' una Xūza' huenē' quiele. Quie lena' cuezale niga ciudad Jerusalén hasta que chezi Bichi Be quie Diuzi tzu'unē' lu'u guicho laxta'ole cuenda gata' yela' huaca quiele. —Cana' una Jesús gudyinē' leyaquè'.

Beyēpi Jesús zeyonē' guibá

(Mr. 16.19-20)

⁵⁰ Bizi na' uquiē' Jesús leyaquè' broyaquè' lao ciudad Jerusalén uza'yaquè' bdyinyaquè' yedyi Betania. Ude beyudyi na', uchisanē' nē'ē bēla'iyānē' leyaquè'. ⁵¹ Bē' beyudyi bēla'iyānē' leyaquè', na' beyēpinē' ladza yeyonē' guibá. ⁵² Na' uyonla'adyi'yaquè' lēbē' gan'. Ude beyudyi na', beza'yaquè' zeyoyaquè' ciudad Jerusalén tatula. Na' lega redaohueyaquè', ⁵³ riocaziyaquè' yugu dza lu'u idao' rnabē'ra rulidzayaquè' rueyaquè' Diuzi ben' ze. Amén.

DI'IDZA' LA'IYA BZU SAN JUAN LĒ'Ē GUICHI

Ben' naca xti'idza' Diuzi guquë' be'mbyu

¹ Caora binecua' lao yedyi layu, bazucazi tu ben' naca xti'idza' Diuzi. Lëben' na' zulënë' Diuzi tuze, lëscan' naquë' Diuzi. ² Desde aodixu Diuzi yedyi layu, bazulanë' nacalënë' Diuzi tzaže. ³ Conlë lëbë' bë Diuzi yugulu ta de lao yedyi layu. Ni tu ta bë Diuzi bibënnë'n sin lëbë'. ⁴ Por lëbë' de yela' neban quiero. Naquë' ca quie tu gui' ta useni'n ulu'en xnezaro ga rdaro. ⁵ Lëgui' na' rseni'n quie yaca ben' rda lao lato lao chula. Nitu nitu nunu saque' usula len.

⁶ Uzu tu ben' lao Juan, ben' use'ela' Diuzi. ⁷ Bidë' udixogue'në' benë' unë' huida tu ben' naca ca quie gui' rseni'n ga naca chula. Lëcana' guca Juan testigo de que huida ben' naca ca quie gui' rseni'n ga naca chula. ⁸ Juan binaquë' ben' zaza', ben' naca ca gui' rseni'n ga naca chula. Nacazë' tu testigo ta use'ela' Diuzi ta quixogue'në' quie ben' zaza', ben' naca ca quie gui' rseni'n ga naca chula. ⁹ Na'ra babidacazi ben' naca ca quie gui' rseni'n ga naca chula, ben' ru'e di'idza' li, ben' ruzioñe'e yaca ben' nita' lao yedyi layu.

¹⁰ Bidanë' lao yedyi layu. Udixogue'në' benë' di'idza' la'iya quie Diuzi. Ba'ala'cazi conlë lëbë' bë Diuzi yugulu ta de lao yedyi layu, bibezaque yaca benë' chi lëbë'. ¹¹ Lëbë' uzunë' lao yedyi quienë', na' biži yaca ben' lao yedyi quienë', biuyezila'adyi'yaquë' lëbë'. ¹² Pero con bala ben' uyezila'adyi' lëbë', lëben' na' bë'në' derecho gacayaquë' ži'i Diuzi. ¹³ Pero netza' quie yaca ben' gaca ži'i Diuzi, porque cala mandado quie benë' gacajë' ži'i Diuzi, cala dan' golojë' nita'jë' lao yedyi layu gacajë' ži'i Diuzi, dechan' Diuzicazi bë cana' gacajë' ži'i Diuzi.

¹⁴ Ben' naca xti'idza' Diuzi guquë' tu be'mbyu. Uzunë' lado ra'o tu chi'. Blë'ëndo' yela' huaca quienë', blë'ëndo' tuzi lëbë' naquë' ži'i Diuzi, ben' nedyë'ë ra'o, ben' ru'e di'idza' li. ¹⁵ Unë' Juan udixogue'në' quie ben' na' unë':

—Quie ben' na' unia' caora nia' ben' zaza'ra zenao në'ëdi', nacarë' ben' že ca në'ëdi' como bazulanë' caora uzua' në'ëdi'. —Cana' una Juan.

¹⁶ Yela' ben' huen quienë' taže na' bënë' quiero bëla'ayanë' ra'o yuguluro. ¹⁷ Lao na'a Moisés pca'n Diuzi ley quienë'. Pero lao na'a Cristo neziro nedyë'ë Diuzi ra'o, neziro ca naca tabala quie Diuzi. ¹⁸ Nitu nitu nunu nuebë' Diuzi. Tuzi ži'inë', ben' dugalo nacalë Diuzi tuze, lënë' ruzioñe'enë' ra'o ta huebë'ro Diuzi.

Užë Juan cule quie Jesucristo

(Mt. 3.11-12; Mr. 1.7-8; Lc. 3.15-17)

¹⁹ Yaca ben' Israel, yaca ben' nita' ciudad Jerusalén, use'ela'yaquë' yaca pxuzi len yaca ben' naca familia quie Leví ta yenabayaquë' Juan chi naquë' ben' Cristo.

²⁰ Biži dyë'ëdi unë':

—Cala në'ëdi' ben' Cristo.

²¹ Na'ra tatula unayaquë' rëbiyaquë' lëbë':

—¿Nuži naco' luë' chi'? ¿Naco' ben' profeta, o chi naco' ben' lao Elías?

Na' biži una Juan rëbinë' leyaquë':

—Cala Elías në'ëdi'.

Pero tatula unayaquë' rëbiyaquë' Juan:

—¿Naco' ben' profeta, ben' zaza'ra?

Na'ra bequëbinë' unanë':

—Cala në'ëdi'.

²² Biži tatula rëbiyaquë' lëbë':

—¿Nuži naco' luë' chi'? Deyeyu'ando' tu di'idza' quio' ta inezi yaca ben' use'ela' nëto'. ¿Cabizi inao'? ¿Nuži naco' luë'?

²³ Na'ra una Juan rëbinë' leyaquë':

—Naca' tu ben' rnë zidzo lao lato ga bidyia yu'u. Nia' can' con ca baona profeta Isaías, ben' uzu dza na'te, nia': "Usalole tu neza li, dan' baza' xa'nro, ben' use'ela' Diuzi."

²⁴ Na' biži yaca ben' uyo yegue'lë Juan di'idza', nacayaquë' ben' use'ela' yaca ben' partido fariseo. ²⁵ Na'ra unayaquë' rëbiyaquë' lëbë':

—Chi binaco' ben' Cristo, ni Elías, ni ben' profeta, ¿na'a bixquien' ru'elo' lao yaca benë'?

²⁶ Na'ra una Juan rëbinë' leyaquë':

—Tali ru'a lao yaca benë' con nisa, pero entre ladole huida tu ben' binubë'le. ²⁷ Zaza're' zenaohuë' në'ëdi'. Tanto naquë' ben' zera ca në'ëdi', ni lë'ëti' bibi zaca' ni siquiera biyeyazoga' cuioga' guidi yu'u ni'anë'. —Cana' una Juan.

²⁸ Lëcana' užacayaquë' lao lato laona Betábara, ga rega'nnan ga'ala' ga de yao Jordán, con gan' bë' Juan lao yaca benë'.

Jesucristo, ben' naca ca beco' ži'ila', bia naca gun quie Diuzi

²⁹ Biži beteyu blë'ë Juan baza' Jesús ga'ala'. Na' unë' rëbinë' yaca ben' nita' na':
—Ulena', lëben' ni naquë' ca beco' zi'ila', bia naca gun quie Diuzi. Lëlëbë' cubë' dula' xquia
quie yaca benë' nita' lao yedyi layu. ³⁰ Quie ben' niga unia' caora nia': "Ben' zaza'ra zenao
në'ëdi', nacarë' ben' ze ca në'ëdi', como dan' bazulanë' caora uzua' në'ëdi'." ³¹ Biži në'ëdi'
biunezda' nu naquë', pero za' ru'a lao yaca ben' Israel con nisa tacuenda ineziyaquë' nu
naquë'.

³² Lëzi unarë Juan:

—Blë'ëda' uyezi Bichi Be quie Diuzi, za'në' guibá ca uyezi biu, yasënë' ga zë Jesús. ³³ Biži
në'ëdi' biunezda' nu naquë'. Pero ben' use'ela' në'ëdi' ta za' ru'a lao yaca benë' unë' rëbinë'
në'ëdi': "Cati ilë'ëlo' Bichi Be quia' chezinë' tzasënë' ga zë tu be'mbyu, lëben' na' udze'në'
Bichi Be quie Diuzi lu'lu' laxta'o yaca benë'." ³⁴ Blë'ëda' guca quie ben' ni con ca una Diuzi.
Quie lena' naca' testigo lëlëbë' naquë' zi'i Diuzi.

Udilo Jesús yaca ben' inao lëbë'

³⁵ Biži beteyu tula, zë Juan len chopa yaca ben' nao lëbë'. ³⁶ Cati blë'ënë' ude Jesús gan'
zënë' unë':

—Ulena', lëben' ni naquë' ca beco' zi'ila', bia naca gun quie Diuzi.

³⁷ Lao rupate yaca ben' zio nao Juan, beyaquë' ca una Juan. Na'ra zioyaquë' unaoyaquë'
Jesús. ³⁸ Na'ra beyëcho Jesús una'në' xcu'udzunë' blë'ënë' zio yaca benë' zenao lëbë'. Na'
unë' rëbinë' leyaquë':

—¿Cabizi' rguilole?

Na'ra unëyaquë' rëbiyaquë' lëbë':

—Maestro, ¿gazi idyinlo'?

³⁹ Na'ra una Jesús:

—Uleda, hualë'ële gan' idyina'. Na'ra uzi'yaquë' ziolëyaquë' lëbë' blë'ëyaquë' gan'
bdyinnë'. Lëgan' na' bega'n'lëyaquë' lëbë' dan' uyë'ënë' dza, baruen cadu reda tapa quie
zadze'.

⁴⁰ Biži lado chopa ben' be ca una Juan unaoyaquë' Jesús, zu tunë' laohuë' Andrés, bi' bichi
Simón Pedro. ⁴¹ Cana' laoyote Andrés yedilonë' ga zu bichinë' Simón, na' gudyinë' lënë':

—Abedilando' ben' use'ela' Diuzi, ben' naca Cristo.

⁴² Na'ra uquië' Andrés bi' bichinë' Simón gan' zë Jesús. Biži caora blë'ë Jesús Andrés len
Simón, unë' rëbinë' Simón:

—Luë' Simón, zi'i Jonás, ixuba' laolo' Cefas, ta inaro: Pedro.

Ulio Jesús Felipe len Natanael, gucajë' ben' nao lëbë'

⁴³ Lëzirë beteyu tula, Jesús uzi'në' zionë' Galilea. Lëgan' na' bedilanë' Felipe, na' gudyinë'
lëbë':

—Unao në'ëdi' gaco' ben' quia' —unë' rëbinë' lëbë'.

⁴⁴ Na'ra ben' yedyi Betsaida naca Felipe. Lëlao yedyi na' zurë Andrés len Pedro. ⁴⁵ Biži
Felipe bedilanë' Natanael në' rëbinë' lëbë':

—Bedilando' tu ben' rnën quie lë'ë guichi bë Moisés, len yaca guichi bë yaca ben' profeta.
Lëben' na' laohuë' Jesús, zi'i José, ben' yedyi Nazaret.

⁴⁶ Na'ra una Natanael rëbinë' Felipe:

—¿Cabizi' tu tahuen ero lao yedyi Nazaret?

Na'ra bequëbi Felipe:

—Uda, ilë'ëlo'.

⁴⁷ Caora blë'ë Jesús baza' Natanael, na'ra unë Jesús cani:

—Baza' tu ben' naca dugalo ben' Israel, ben' birzi' yë'.

⁴⁸ Biži Natanael unë' rëbinë' Jesús:

—¿Cómo nubë'lo' në'ëdi'?

Na'ra una Jesús rëbinë' lëbë':

—Bala blë'ëda' luë' ga re'lo' zan yaga higo tu binequixogue' Felipe luë'.

⁴⁹ Na'ra una Natanael rëbinë' Jesús:

—Maestro, luë' naco' zi'i Diuzi, ben' za' inabë' yaca ben' Israel.

⁵⁰ Biži una Jesús rëbinë' Natanael:

—¿Bagulelo' dan' nia' blë'ëda' luë' ga re'lo'?

⁵¹ Lëzi unarë Jesús rëbinë' leyaquë':

—Tali rnia' le'e, naca' bichi yugulu benë', na' hualë'ële tzalo guibá chezi yeyëpi yaca ángel
idyinjë' gan zua' lao yedyi layu.

2

Yedyi Caná ga nebaba Galilea bëyaquë' huetzagana'

¹ Guca lao tzona dza, na' guca huetzagana' yedyi Caná quie estado Galilea. Biži yedyi na' zurè žna' Jesús, blè'ènè' caora na'. ² Biži gan' guca huetzagana', bèrèjè' Jesús invitar len yaca ben' quienè'. ³ Biži na' guca bebidyi vino nisa bedzuli' ta ri'oyaquè'. Na'ra una žna' Jesús rëbinè' lèbè':

—Babebidyi vino, gabira yudzon.

⁴ Na'ra una Jesús rëbinè' žnè'è:

—Žna'a, žbixquien' nao' nè'èdi' cana'? Binedyin hora ulu'ena' benè' yela' huaca quia'.

⁵ Na' biži unè' žnè'è rëbinè' yaca ben' ru'e laze:

—Ulehue yugulu con ta ruebi' le'e mandado huele —nè' rëbinè'yaquè'.

⁶ Biži gan' nita'yaquè' na', nita'rè xopa yeso' yela de yo. Ca biu' benèbi quie yaca ben' Israel, lèyeso' na' nacan ta yudzon nisa ta rguubiyaquè' cuinyaquè' lente ta de quieyaquè'. Lao tu huiona yudzon cadu gatzo gayuhua litro o cadu tzona galo chi litro nisa. ⁷ Na'ra una Jesús rëbinè' yaca ben' ru'e laze:

—Usedza'le yeso' na' nisa.

⁸ Caora bedza' lao xopa yeso', na' una Jesús rëbinè' yaca ben' ru'e laze:

—Ulecuion, ulehue' ben' naca xan' lani.

Biži laoda'teyaquè'n yehua'ayaquè'n bè'yaquè'n ben' xan' lani. ⁹ Biži ben' naca xan' lani, byubinè' nisa babeyacan vinola, pero binezinè' ga za'n. Tuzi yaca ben' ru'e laze baneziyaquè' ga za'n. Cana' guca guži ben' naca xan' lani bi' utzagana' ¹⁰ unè' rëbinè'bi':

—Yaca benè' rue nu lani ru'ecaziyaquè' tanèro vino naca dya'a. Caora ri'o yaca ben' rida lani ta zila, na' ru'eyaquè' vino sisa. Na' biži luè', pca'nlo' vino dya'a hasta na'tera baoliolo'n barequisio'n —nè' rëbinè' bi'byu.

¹¹ Cana' naca milagro nèro bè Jesús yedyi Caná quie estado Galilea, ga uzulaonè' blu'enè' yela' huaca quienè'. Dan' bènè' cana', lècana' gule yaca ben' zio nao lèbè'.

¹² Ude beyudyi na', uzè'è ziolènè' žnè'è, len bichinè', len yaca ben' quienè' yedyi lao Capernaum. Lègan' na' bega'nyaquè' baba dza.

Blaol Jesús yaca ben' yu'u huèti' lu'u idao' rñabè'ra

(Mt. 21.12-13; Mr. 11.15-18; Lc. 19.45-46)

¹³ Dan' bazu bago ga'ala' lani pascua ta reza'la'adyi'yaquè' ca guca bro xuzixta'oyaquè' nación Egipto, lècana' uza' Jesús bdyinnè' ciudad Jerusalén. ¹⁴ Ca bdyinnè' lali'a quie idao' rñabè'ra ciudad Jerusalén, na' blè'ènè' nita' yaca ben' ruti' huaga, len ben' ruti' beco' ži'ila', len ben' ruti' biu. Lèscan' blè'ènè' yaca ben' rutz'a' dumi. ¹⁵ Biži cati blè'è Jesús ca rue yaca ben' yu'u huèti' lali'a idao' rñabè'ra, na' uzi'guè' tu guidi udinè' blaonè' yaca ben' yu'u ruti' lente huaga lente beco' ži'ila' quieyaquè'. Na' quie ben' retza' dumi, uru'unnè' mesa quieyaquè' layu, gusi dumi layu. ¹⁶ Na'ra gudyinè' yaca ben' ruti' biu rëbinè' leyaquè':

—jUlecuba yugulu ta de niga! jBihuele yu'u quie ye'eya yu'u quie Xuza'!

¹⁷ Cana' beza'la'adyi' yaca ben' quiè' can' rñèn lè'è guichi la'iya quie Diuzi cani: “Tanto rdèbida' quie yu'u quio', raqueda' bayèchi' ca tamala rue yaca benè' quien.”

¹⁸ Na'ra una yaca ben' Israel rëbiyaquè' Jesús:

—Blu'e nèt'o' tu seña ta inezindo' de yela' rñabè' quio' dan' blaolo' yaca ben' yu'u huèti' lali'a idao'.

¹⁹ Na'ra una Jesús rëbinè' leyaquè':

—Chi le'e udyiagu'le idao' rñabè'ra niga, nè'èdi' yechiza' tu tacubi gaca lao tzona dza.

²⁰ Biži una yaca ben' Israel rëbiyaquè' lèbè':

—Yaca ben' bè idao' rñabè'ra niga, bëyaquè'n lao chopa galo xopa iza, žna' como luè' nao' gaca lao tzona dza yechizalo' tu tacubi? —Cana' unayaquè' rëbiyaquè' Jesús.

²¹ Pero caora unè' Jesús cana', cala quie idao' na' unènè', quie cuinzinè' unènè'. ²² Biži caora guti Jesús bebannè' tatula, caora na' lèlena' beza'la'adyi' yaca ben' unao lèbè' con ca unè'. Lèlena' guleyaquè' ca rñèn lè'è guichi la'iya quie Diuzi lente ca una Jesús gudyinè' leyaquè'.

Nezi Jesús bi pensari yu'u lu'u guicho laxta'o benè'

²³ Caora uzu Jesús ciudad Jerusalén, caora na' guca lani pascua. Lècana' yaca ben' zè gu-leyaquè' quienè' dan' blè'èyaquè' yela' huaca quienè'. ²⁴ Biži Jesús gucabè'nè' biguleyaquè' dula'adyi'yaquè', dan' nezinè' bi pensari yu'u lu'u guicho laxta'o yaca benè'. ²⁵ Lèlena' birnaban nu yèbi Jesús bi pensari yu'u lu'u guicho laxta'o yaca benè'.

3

Nicodemo ru'elènè' Jesús di'ida'

¹ Uzu tu ben' partido fariseo laonè' Nicodemo. Naquè' ben' rñabè' quie yaca ben' Israel.

² Biži Nicodemo uyonè' rdze' ga zu Jesús rëbinè' lèbè':

—Maestro, banezindo' luë' naco' ben' use'ela' Diuzi ta uzioñe'elo' nêto', dan' nitu nitu nunu nehue yela' huaca ca ruelo' luë' chi Diuzi bizulênë' luë' tza:ze.

³ Na'ra una Jesús rëbinë' lëbë':

—Tali ca rnia' luë', chi nu ben' bigalo taorupe, bisaque' yedyinnë' guibá ga r nabë' Diuzi.

⁴ Bizi Nicodemo unë' rëbinë' Jesús:

—¿Bizi hue tu ben' gula galonë' taorupe? ¿Huazaque' yeyu'unë' lu'u lë'ë znë'ë ta galonë' taorupe?

⁵ Na'ra una Jesús rëbinë' lëbë':

—Chi nu ben' biralo conlë nisa, na'tera lëscan' conlë Bichi Be quie Diuzi, bisaque' yedyinnë' guibá ga r nabë' Diuzi. ⁶ Nu ben' rzu de zi'i be'mbyu, nacacazë' be'mbyu. Pero nu ben' rzu de Bichi Be quie Diuzi, nacacazë' ben' yu'u Bichi Be quie Diuzi lu'u laxta'ohue. ⁷ Biyebanelo' con can' rnia' luë': “Rnaban galo benë' taorupe.” ⁸ Cabë' quie be, rdanan ni, rdanan na', rero xchí'nan, pero na' bineziro gala' za'n, gala' zion. Lëcana' nacaré quie yaca ben' ralo lao na'a Bichi Be quie Diuzi.

⁹ Na'ra na Nicodemo rëbinë' Jesús:

—¿Cabiži gaca ca unao'?

¹⁰ Biži Jesús në' rëbinë' lëbë':

—Naco' tu maestro quie ben' Israel, ¿cómo binezo' con ca baonia' luë'? ¹¹ Tali ca rnia' luë', ca ta nezindo' baonando' nacando' testigo ca ta blë'endo', pero na' le'e biralele cabë' baonando'. ¹² Chi binezile ca naca baonia' le'e bi raca lao yedyi layu, ¿cabiži huele para inezile ta inia' le'e bi raca guibá?

¹³ Nitu nunu uyo guibá yedyin quixogue' benë' bi raca guibá. Tuza' në'ëdi', bichi yugulu benë', idetixogue'na' benë' bi raca guibá. ¹⁴ Cabë' bë Moisés bëguë' tu bëla de bronce, bda'guë'ba' lë'ë yaga sibi, lëcana' gacaré quia' në'ëdi', bichi yugulu benë', uda'rë benë' në'ëdi' lë'ë yaga cruzo. ¹⁵ Cana' gaca quia' tacuenda gata' yela' neban tuzioli quie nu ben' gale quia'.

Ni nan ca nedyë'ë Diuzi ra'o

¹⁶ Bizi tanto nedyë'ë Diuzi yaca benë' nita' lao yedyi layu, use'elë' tu litza' zi'inë' tacuenda nutezi ben' nao xnezë', bicuiagu'yaquë', den' gata' yela' neban quiejë' tuzioli. ¹⁷ Cala use'ela' Diuzi zi'inë' lao yedyi layu ta huenë' castigo quie yaca benë', den' use'ela' Diuzi lëbë' ta ute uselanë' leyaquë' hue'në' yela' neban quiejë' tuzioli.

¹⁸ Nu yaca ben' nao xneza zi'i Diuzi, bihue Diuzi castigo quieyaquë'. Pero nu yaca ben' binao xneza zi'inë', huata'cazi castigo quieyaquë', dan' biunaoyaquë' xneza ben' naca tu litza' zi'inë'. ¹⁹ Nu yaca ben' biunao xneza zi'inë', baochuguli Diuzi quieyaquë' huata' castigo quiejë', porque cati bdyin zi'inë' lao yedyi layu bzioñe'enë' quie Diuzi, caora na' yaxerayaquë' tayaquë' lao lato lao chula, biguleyaquë' quienë'. ²⁰ Yugulute yaca ben' rue tamedian rudieyaquë' ben' ruzioñe'e quie Diuzi. Bire'enyayquë' naoyaquë' xnezë', porque dan' rdzebiyaquë' su be ca tamedian rueyaquë'. ²¹ Pero yaca ben' nao tali, raxeyaquë' naoyaquë' xneza ben' ruzioñe'e quie Diuzi, porque dan' cana' su be de que rueyaquë' tadya'a cabë' re'en Diuzi hueyaquë'.

Barenë Juan quie Jesús tatula

²² Bë' beyudyi na', uza' Jesús ziolênë' yaca ben' quienë' estado Judea. Lëgan' na' bega'nyaquë' tu chi' ga bë'yaquë' lao yaca benë'. ²³ Lëzirë zu Juan ru'enë' lao yaca benë' gan' lao Enón, gan' de nisa zila. Nacan ga'ala' para yedyi Salim. Lëgan' na' bedupa yaca benë', na' bë' Juan laoyaquë'. ²⁴ Cana' guca caora binedze'yaquë' Juan lu'u dyiguiba.

²⁵ Bizi bala yaca ben' quie Juan uyu'ulëyaquë' tu ben' Israel huenë' ru'eyaquë' di'idza' ca costumbre naoyaquë' quie idao' ta gacan yëri lao Diuzi. ²⁶ Na'ra uyoayaquë' rëbiyaquë' Juan: —Maestro, ben' uzulë luë' itzala' yao Jordán, lëben' unao' nêto' dza na', ben' zë baru'enë' laohue, bazioyaquë' lënë'.

²⁷ Biži una Juan rëbinë' leyaquë':

—Ni tu nunu de yela' r nabë' quie, chi cala Diuzi bë'në'n lao në'ë. ²⁸ Le'e banezile dyë'ëdi ca unia'. Binaca' ben' Cristo. Naca' ben' rguixogue' benë' de que huida ben' Cristo. ²⁹ Cristo naquë' ca quie ben' utzagana'. Lëzirë yaca ben' nao xnezë', naca quieyaquë' ca quie nigula utzagana'. Në'ëdi' naca' ca quie amigo quie ben' utzagana'. Biži ben' naca amigo quie ben' utzagana', redaohuenë' uzënaquë' yenë' bi na ben' utzagana'. Quie lena' redaohueda' rzënaga' yeda' bi na ben' Cristo. ³⁰ Lëbë' ziorë' raquë' ben' zera ca në'ëdi', reya'ala' ta' puro zanle.

Ni rnën quie ben' za' guibá

³¹ Ben' za' guibá, ar nabë'në' lao yugulute benë'. Ben' ralo lao yedyi layu, nacacazë' ben' dugalo de lao yedyi layu. Raquë' pensari quie ta raca lao yedyi layu. ³² Pero ben' za' guibá,

ru'enè' di'idza' ca ta blè'ènè' len ca ta benè'. Biži na' yaca benè' biraleyaquè' quienè' cabè' nanè' na'. ³³ Chi nu ben' ralenè' ca di'idza' na ben' za' guibá, lena' ulu'en ralenè' bi na Diuzi. ³⁴ Ben' use'ela' Diuzi, rnèguè' di'idza' quie Diuzi. Dula'adyi'cazi yu'unè' Bichi Be quie Diuzi lu'u guicho laxta'onè'. ³⁵ Xuziro Diuzi nedyè'ècazinè' ži'inè'. Nu'eguè' yugulute ta de lao na'a ži'inè'. ³⁶ Nu yaca ben' nao xneza ben' Cristo ži'i Diuzi, baguta' yela' neban quieyaquè' tuzioli. Pero quie nu yaca benè' binao xneza ži'i Diuzi, bibi yela' neban tuzioli gata' quieyaquè', yela'cala hue Diuzi lèyaquè' tu castigo huala gula.

4

Jesús ru'elènè' tu nigula ben' Samaria di'idza'

¹ Biži bdyin dza blè'è yaca ben' fariseo de que unao ben' zèra Jesús ca ben' unao Juan. Lèži bè' Jesús lao ben' zèra ca Juan. ² Pero cala Jesús bè'nè' lao benè', dechan' yaca ben' quienè', lèlèyaquè' bè'yaquè' lao yaca benè'. ³ Caora gucabè' Jesús ca rna yaca ben' fariseo, na' uzè'è estado Judea žiogué' bdyinnè' estado Galilea.

⁴ Con gan' zionè' re'ennan tenè' estado Samaria. ⁵ Cana' bdyinnè' yedyi Sicar quie estado Samaria. Nacan ga'ala' gan' de layu bè' Jacob ži'inè' José cana'te gula. ⁶ Biži bdyinnè' gan' re' pozo nisa ta ulèchi xuzixta'onè' Jacob. Na' como dan' banexaquenè' yu'unè' neza, caora na' ure'nè' ru'a pozo aruen cadu gatzo dza. ⁷⁻⁸ Biži yaca ben' quienè' žioyaquè' la'o yedyi ta ga'oyaquè' ta gaoyaquè'. Cana' guca bdyin tu nigula ben' Samaria ta cuioquè' nisa gan' re' pozo. Na'ra una Jesús rēbinè' nigula:

—Ben nisa yo'oga'.

⁹ Na'ra una nigula na' rēbinè' Jesús:

—¿Cómo luè', ben' Israel, rnabo' nē'ēdi', ben' Samaritana, nisa yo'olo'?

(Cana' una nigula gadyinè' Jesús dan' biyu'ulé ben' Samaria tuzi len ben' Israel.) ¹⁰ Biži una Jesús rēbinè' nigula:

—Chan' inežilo' ca rue run Diuzi, lēži chan' nubè'rao' nu ben' rnaba luè' nisa ta yo'oguè', na' huanabacazo' nē'ēdi' nisa yo'olo', guncaza' nisa neban.

¹¹ Na'ra una nigula rēbinè' Jesús:

—Señor, bibi nu'acazo' ta cuiolo' nisa. Lēži dan' re'n zitu', tana' lena' rnia' luè' žgaži tzexiu' nisa nao' nisa neban na'? ¹² Ulèchi xuzixta'oro Jacob pozo niga ga hue'enè' cuinnè' len ži'inè' len yaca bia guixi' udapè'. Nia' luè', žbiži rnabè'ro' luè' ca lēbè'?

¹³ Na' biži Jesús nē' rēbinè' nigula:

—Lao yugulute yaca ben' yo'o nisa niga, bicuezan ta rbiliyaquè'n, hui'oyaquè'n tatula. ¹⁴ Pero nu yaca ben' yo'o nisa hua' nē'ēdi', bira ibiliyaquè'. Huaca quieyaquè' ca quie tu ga ralo nisa lu'u laxta'oyaquè' tacuenda gata' yela' neban quiejè' tuzioli.

¹⁵ Na'ra una nigula rēbinè' Jesús:

—Señor, ben nisa nao' guno' yo'oga', yela' na' bira guida' ru'a pozo ni idelioga' nisa.

¹⁶ Biži unè' Jesús rēbinè' nigula:

—Beyo yexi' xquiulo' guidalao'nè' gan' niga.

¹⁷ Na'ra una nigula rēbinè' lēbè':

—Nunu xquiuhua' zu.

Na' biži una Jesús rēbinè' lēbè':

—Tali ca unao' nao' ganu xquiulo' zu. ¹⁸ Na' biži nē' nia', baozulao' lao ga'yo' be'mbyu. Na' ben' zulao' na'a, cala xquiulo'. Lèlèna' nacacazin tali ca unao'.

¹⁹ Bè' be nigula ca una Jesús, unè' rēbinè' lēbè':

—Señor, rlè'ēda' luè' naco' tu ben' quie Diuzi. ²⁰ Nē'ēdi' nia' de que uyonla'adyi' yaca ben' xuzixta'ondo' Diuzi gan' zu ya'a niga. Na' biži le'e, ben' Israel, nale ciudad Jerusalén, lēgana' reya'ala' tzionla'adyi' yaca benè' Diuzi.

²¹ Biži una Jesús rēbinè' nigula:

—Nigula, gule can' nia' na', huadyin dza tzionla'adyi'le Diuzi, pero cala niga gan' zu ya'a guidale, lēscan' cala ciudad Jerusalén tziote. ²² Le'e ben' Samaritano, binežile nu tzionla'adyi'le, pero nēto' banezcazindo' nu tzionla'adyi'ndo'. Conlè yaca ben' Israel pca'n Diuzi di'idza' quienè' tacienda ineži yaca benè' bi re'en Diuzi huejè' ta yeyèri laxta'ojè' laohuè'. ²³ Baruen bago idyin hora cati yaca ben' rionla'adyi' Diuzi tzionla'adyi'yaquè' lēbè' conlè Bichi Be quienè', lēscan' conlè di'idza' li cabè' re'en Diuzi. Lèyaca ben' rue cana', raxe Diuzi tzionla'adyi'yaquè' lēbè'. ²⁴ Naca Diuzi ben' bichi be. Lèlena' yaca ben' rionla'adyi' lēbè', reya'ala' tzionla'adyi'yaquè' lēbè' conlè bichi be quieyaquè', lēscan' conlè di'idza' li cabè' re'en Diuzi.

²⁵ Na'ra una nigula rēbinè' lēbè':

—Pues nē'ēdi' banezda' de que huida ben' naca Cristo. Lēscan' cati guidè', uzioñe'enè' ra'o lao yugulute.

- ²⁶ Na'ra una Jesús rëbinë' lëbë':
—Në'ëdi' naca' ben' Cristo, ben' ru'elë luë' di'idza'.
- ²⁷ Na'ra cati bdyin yaca ben' quienë' gan' zënë', tu bebanziyaquë' ru'elë Jesús di'idza' nigula Samaritana. Pero bibeyažocaziyaquë' bi yëbiyaquë' lëbë' bi di'idza' ru'elënë' nigula.
- ²⁸ Cana' guca pca'n nigula re'e quienë', bezë'ë žiogüë' la'o yedyi quienë' yetixogue'në' yaca ben' yedyi na' unë' rëbinë' leyaquë':
²⁹ —Ya' tzioro ilë'ëro tu be'mbyu laga unë' në'ëdi' ca naca ta babia'. ¿Cala lëbë' naquë' ben' Cristo?
- ³⁰ Na'ra uza' yaca ben' lao yedyi yenä'yaquë' gan' zë Jesús. ³¹ Tu zadyinra ben' lao yedyi, caora na' una yaca ben' quie Jesús rëbiyaquë' lëbë':
—Maestro, ¿biraolo' lë'ëti'?
- ³² Na'ra unë' rëbinë' leyaquë':
—Le'e binezile decazi ta gaohua'.
- ³³ Na'ra uzulao yaca ben' quienë' rëbiyaquë' laguedyiyaquë':
—¿Cala biblë'ëro babida yaca ben' bedehua'a ta udaohuë'?
- ³⁴ Biži una Jesús rëbinë' yaca ben' quië':
—Ruzua' di'idza' quie ben' use'ela' në'ëdi'. Lëlena' gaca quia' ca quie ben' baodao.
- ³⁵ 'Na' le'e nale: “Neru'en lato itapa biu' ta yezi'ro usecho.” Na' biži në'ëdi' nia': “Ulena'cara ca naca quie layela como dan' bade yeza bidyi baguca yezi'ron.” ³⁶ Ca naca quie ben' bezi' usecho, cana' huazi'guë' xlažoguë'. Huazulëcazinë' Diuzi tuzioli. Tana' lena' redaohue lao rupateyaquë', ca ben' raza, ca ben' yezi' usecho. ³⁷ Nacan tali ca na benë': “Tuë' raza, na' ituë' yezi'në' usecho.” ³⁸ Biži në'ëdi' ise'ela' le'e ta yezi'le usecho quie Diuzi ga biguzale. Nacan ta guza ben' tula, ben' ruerë dyin quie Diuzi. Na' biži le'e redaohuele yezi'le usecho quie Diuzi. Re'en Diuzi inao yaca benë' xnezë'. —Cana' una Jesús rëbinë' leyaquë'.
- ³⁹ Na' biži yaca ben' zë, ben' Samaria, ben' nita' yedyi Sicar, guleyaquë' quie Jesús dan' una nigula: “Unanë' në'ëdi' yugulu ca ta babia'.” ⁴⁰ Biži cati bdyin yaca ben' Samaria gan' zë Jesús, caora na' unë'yëchi'yaquë' para yega'n'lë Jesús leyaquë'. Na'ra bega'n Jesús uzulënë' leyaquë' lao chopa dza. ⁴¹ Lëcana' guca gulera yaca ben' zë quie Jesús beyaquë' ca unanë'. ⁴² Na'ra unayaquë' rëbiyaquë' nigula:
—Na'ra bagulendo' quienë'. Cala rquincara luë' inao' nëto' bidë'. Banezindo' ca naca di'idza' ru'enë'. Banezindo' talicazi lëbë' naquë' ben' Cristo, ben' ute usela yaca ben' nita' lao yedyi layu. —Cana' nayaquë' rëbiyaquë' nigula.
- Jesús beyuenë' ži'i ben' naca empleado quie gobierno*
- ⁴³ Ude lao chopa dza uzulënë' leyaquë' estado Samaria, na' uzë'ë zionë' estado Galilea.
- ⁴⁴ Cana' guca uza'në' bdyinnë' estado Galilea. Na'ra cuinnë' unë' cabë' raza quie yaca ben' rguixogue' di'idza' la'iya quie Diuzi. Birapala'n ben' lao yedyi quienë' lëbë'. ⁴⁵ Pues cati bdyinnë' estado Galilea, na' yaca ben' nita' gan' bdyinnë', bezi'yaquë' lëbë' dyë'ëdi como dan' baoyoyaquë' ciudad Jerusalén dza na' cati raza lani quie pascua, blë'ëyaquë' cabë' bënë' cati uyoguë' ciudad Jerusalén.
- ⁴⁶ Biži na' bdyinnë' ciudad Caná quie estado Galilea. Lëgana' bexinoguë' nisa beyuenë'n vino. Na'ra ciudad Capernaum zu tu ben' rnabë' naquë' empleado quie gobierno rey. Na' zu tu ži'inë' raza žhue'bi'. ⁴⁷ Caora uzezi ben' empleado uza' Jesús estado Judea bdyinnë' estado Galilea, na' uzë'ë žiogüë' tzeguedyinë' Jesús ta tzionë' žan yu'u quienë' ta yeyuenë' ži'i ben' na', porque debi' raza žhue'bi' bagatibi'.
- ⁴⁸ Na'ra una Jesús rëbinë' ben' na':
—Le'e bigalele chi biilë'ële tu seña quie yela' huaca hua'.
- ⁴⁹ Biži una ben' naca empleado:
—Señor, chi huu' cule, latziotero antes na'a binegati ži'ina'.
- ⁵⁰ Biži Jesús unë' rëbinë' lëbë':
—Beyo žan yu'u quio'. Bigati ži'ilo'.
- Biži ben' empleado gulënë' ca gudyi Jesús lëbë'. Na' bezë'ë zeyoguë' žan yu'u quië'. ⁵¹ Cati zeyoguë' gatzo neza, binedyinnë' žan yu'u quienë', caora na' bedzaganë' yaca ben' zulaohuë'. Na' biži unayaquë' rëbiyaquë' ben' xa'nyaquë':
—Hueyaca ži'ilo', bigatibi'.
- ⁵² Biži ben' empleado unabë' yaca ben' zulaohuë' unë':
—¿Ca biži hora berobi' tala?
Na'ra yaca ben' zulaonë' rëbiyaquë' lëbë':
—Niogue ca reda tu quie zadžë', cana' bezubi' dya'a berobi' tala.

⁵³ Biži ben' empleado xuzi xcuidi' raca žhue', bezaquenë' caora gudyi Jesús lëbë': "Hueyaca zi'ilo' bigatibi'", lëhora na' labeyacatebi'. Cana' guca gulenë' quie Jesús. Lëscan' gule yugulute yaca ben' nita' žan yu'u quienë'.

⁵⁴ Lëcana' guca laorupe lasa blu'eguë' seña quie yela' huaca quienë' caora cati uzë'ë estado Judea bdyinnë' estado Galilea.

5

Beyue Jesús tu ben' zi, ben' ciudad Betesda

¹ Ude beyudyi beyue Jesús yaca ben' raca žhue', na'tera guca dza raca laní quie ben' Israel. Tana' uza' Jesús zionë' ciudad Jerusalén. ² Ga bdyinnë' ciudad Jerusalén, na' re' na' tu pozo nisa. Na' di'idza' hebreo lao pozo nisa na' pozo nisa Betesda. Nu'an ga'yo' ru'a yu'u ga ru'u benë'. Rega'nnan ga'ala' ga zu tu ru'a yu'u belao. Lëru'a yu'u na' nezi'laona ru'a yu'u quie beco' zi'ila'. ³ Lëlugar na' nita' yaca ben' zë, ben' raca žhue', len ben' laochula, len ben' ži, len ben' neseco biraca sa'. Rbezayaquë' bë' chechu ta nisa. ⁴ Rbezayaquë' gan' dan' bayu'u rdyin ángel ga re' pozo nisa ta utanë'n. Biži ben' yubi tzu'u tanëro lu'u nisa caora sulao chechu tanan, lëben' na' laiyacate con biti'tezi yela' hue' racanë'. ⁵ Lëgan' na' de tu ben' raca žhue' azio lao galobechi xuna iza raca žhue'në'. ⁶ Biži Jesús bdyinnë' blë'ënë' de ben' na' raca žhue'në', gucabë'në' azio zë iza raca žhue'në'. Na'ra una Jesús rëbinë' ben' raca žhue':

—¿Re'lenlo' yero yela' hue' yu'ulo' ta yeyaco'?

⁷ Na'ra una ben' raca žhue' rëbinë' Jesús:

—Señor, nunu dyila' udze' në'ëdi' lu'u pozo nisa cati sulao tanan. Biži në'ëdi', cati re'enda' tzu'a tanëro, laru'ute ben' tula. —në' rëbinë' Jesús.

⁸ Biži una Jesús rëbinë' lëbë':

—Uyasa, uži' da'a quio', beda.

⁹ Biži ca una Jesús cana', labeyasate ben' raca žhue', bezi'guë' da'a quië' nu'anë'n rdalë'në'n. Pero dza rezila'adyi' bë' Jesús cana'. ¹⁰ Lena' una yaca ben' Israel rëbiyaquë' ben' beyaca:

—Na'adza nacan dza huezila'adyi'. Biru'en lato talo' hua'alo' da'a quio'.

¹¹ Na'ra bequëbi ben' beyaca unë' rëbinë' leyaquë':

—Ben' beyue në'ëdi' unë': "Uyasa, uži' da'a quio' beda."

¹² Na'ra unayaquë' rëbiyaquë' lëbë':

—¿Nuži ben' una luë' cana'?

¹³ Biži ben' beyaca biunezinë' bi lao ben' beyue lëbë', dan' labeza'te Jesús udenë' zionë' lado ben' zë. ¹⁴ Biži zio Jesús lu'u idao' r nabë'ra. Lëgana' bedilanë' ben' beyuenë', na' unë' rëbinë' lëbë':

—Canaca na'a babeyaco', bira huelo' bizinaquezi ta bira gaca quio' ta hualara can' baguca quio'.

¹⁵ Cana' guca uyo ben' beyaca yeguëdyinë' yaca ben' Israel, unë' rëbinë' leyaquë':

—Jesús na', lëbë' beyuenë' në'ëdi'.

¹⁶ Bë' unezi yaca ben' Israel cabë' una ben' beyaca, caora na' rnaojë' Jesús re'enaquë' gutijë' lëbë', dan' beyuenë' ben' ži dza huezila'adyi'. ¹⁷ Na' biži Jesús unë' rëbinë' leyaquë':

—Dan' rue Xuza' Diuzi dyin yugu dza, lëlena' hueria' dyin yugu dza.

¹⁸ Ca be yaca ben' Israel ca una Jesús can', mazara bdza'yaquë' gu'unyaquë' gutiyaquë' lëbë', dan' bibë'në' casa quie ley quie dza huezila'adyi'. Lëscan' bënë' cuinnë' ca Diuzi caora unë' quie Diuzi naca Diuzi Xuzinë'.

Udixogüe' Jesús quie yela' r nabë' quienë', unë' naquë' ži'i Diuzi

¹⁹ Na'ra una Jesús rëbinë' leyaquë':

—Tali ca rnia' le'e, në'ëdi' ži'i Diuzi, bibi de hua' chan' bizu Diuzi conlë në'ëdi'. Ca ta blë'ëda' rue Xuza', lëlena' rueria' në'ëdi'. Can' rue Xuza', cana' rueria' në'ëdi' ži'inë'. ²⁰ Pues Diuzi nedyë'ënë' në'ëdi' ži'inë', rlu'enë' në'ëdi' rua' yugulu ta ruenë'. Zaza'ra ulu'enë' në'ëdi' ži'inë' tu ta nacara že, tu ta binelë'ële huebanle cati ilë'ëlen. ²¹ Cabë' rue Xuza', resebannë' ben' baguti, lëscana' në'ëdi' ži'inë', hua'a benë' yela' neban tuzioli, ben' re'enda' gata' yela' neban quie. ²² Cala Xuza' ichugobë'në' quie yaca benë'. Lao na'a në'ëdi' ži'inë' napca'nnë' yela' r nabë' quienë' ta ichugobi'a quie yaca benë'. ²³ Bë Xuza' cana' tacuenda lao yugulute yaca benë' gapala'nyaquë' në'ëdi' ži'i Diuzi cabë' rapala'nyaquë' Xuza'. Chi nu yaca benë' birapala'nyaquë' në'ëdi' ži'i Diuzi, lëlena' rulu'en birapala'nyaquë' Xuza', ben' use'ela' në'ëdi'.

²⁴ Tali ca rnia', con nu ben' rzënaga can' baonia', lena' rulu'en raleyaquë' quie ben' use'ela' në'ëdi', na' de yela' neban quië' tuzioli, bigata' castigo quienë'. Naca quienë' ca quie ben' baguti beban tatula, bira gatinë'. ²⁵ Tali ca rnia', abdyin dza uzë'naga yaca ben'

birale quia' cabè' di'idza' rnia' nè'èdi' zì'i Diuzi. Naca quieyaquè' ca quie ben' nati, dan' biraleyaquè' quia' cabè' di'idza' rnia'. Nu yaca ben' uzènaga di'idza' gale quia' cabè' rnia', hue' Diuzi leyaquè' yela' neban tuzioli. ²⁶ Napa Xuza' yela' rnabè' ta hue'nè' lèjè' yela' neban tuzioli. Lèzi baben Xuza' Diuzi nè'èdi' zì'inè' yela' rnabè' ta hua'a yaca benè' yela' neban tuzioli. ²⁷ Lèzi benrè Xuza' Diuzi nè'èdi' yela' rnabè' ta ichugobi'a quie yaca benè' dan' naca' bichi yugulu benè'. ²⁸ Biyebanle can' baonia', huadyin dza ye yugulute yaca ben' huati rchi'a cati inia'. ²⁹ Lèhora na' yero yaca ben' huati lu'u yèroba. Na' bizi yaca ben' bè dya'a hueyata' yela' neban quieyaquè' para tuzioli. Pero na' bizi yaca ben' bè dula' xquia, useban Diuzi leyaquè' ta huenè' leyaquè' castigo.

Ni rnan ga za' yela' rnabè' quie Jesús

³⁰ Bibi de hua' cuinza'. Rchugobi'a quie yaca benè' ca ta una Diuzi nè'èdi' hua'. Tana' rchugobi'a hua' tu ta yu'u ni'a xnezi. Cala ta racazi la'adya' hua' den' hua' ca re'en Xuza', ben' use'ela' nè'èdi'. ³¹ Chi rnia' cule quia' cuinza', lena' bibi sirve ta ulu'en nu naca'. ³² Pero zu itu ben' rnè cule nè'èdi' naquè' testigo quia'. Na' ca ta rnènè' cule quia' nè'èdi', lena' ulu'en nu naca'. ³³ Bizi le'e use'ela'le yaca ben' uyo yenaba Juan. Na' ca ta bequèbi Juan nacan tali. ³⁴ Biruguinze inè tu benè' cule nè'èdi'. Ca di'idza' rnia' le'e, nacan ta galele quia' gata' yela' neban quie tuzioli. ³⁵ Ca di'idza' una Juan nacan ca quie yèri ra'ala' rseni'n. Bizi le'e, yedaohuele bzènagale ca di'idza' unè' tu chi'zi. ³⁶ Decazira cule quia' nè'èdi' ta nacaran belao ca di'idza' una Juan ta ulu'en nu naca'. Bia' yela' huaca quia' tuz ca una Xuza' nè'èdi' hua'. Lèlena' ulu'en le'e tali use'ela' Xuza' nè'èdi'. ³⁷ Lèzi Xuza', ben' use'ela' nè'èdi', zènè' cule conlè nè'èdi' ta ulu'en le'e nu naca' la'acazi nitu lasa bibelexchi'nè', biblè'è lao cuinle lènè'. ³⁸ Cabè' le'e binetzu'u di'idza' quie Diuzi lu'u guicho laxta'ole. Biralele quia' nè'èdi' naca' ben' use'ela' Diuzi. ³⁹ Le'e rusèdile dyè'èdi ca rna lè'è guichi la'ya quie Diuzi como dan' raquale chi rusèdilen dyè'èdi, cana' gata' yela' neban quie tuzioli. Na' bizi lè'è guichi na' rnècazin quia' nè'èdi'. ⁴⁰ Pero le'e, bire'enle guidale naole nè'èdi' ta gata' yela' neban quie tuzioli.

⁴¹ Tuzi nacalia' Diuzi la'acazi gapale nè'èdi' bala'ana, la'acazi bigapale nè'èdi' bala'ana. ⁴² Lèscan'ra nubè'da' le'e. Nezda' binedyè'èle Diuzi. ⁴³ Tanun quie Xuza' bida' lao yedyi layu, pero na' le'e biueyzi'adyi'le nè'èdi'. Bizi chan' za' ben' tula ta racazi la'adyi'nè' ben' na'la gue'enle. ⁴⁴ Cabizi huele inaole xneza Diuzi, chi lao laza huele ta gue'en tuzi Diuzi le'e, na' ruele ta gue'en yaca benè' le'e. ⁴⁵ Biinale chi nè'èdi' huaohua' le'e xquia lao Diuzi. Cuin Moisés, ben' nale sulèle dya'a lao Diuzi, lèbè' gaonè' le'e xquia lao Diuzi. ⁴⁶ Bizi chan' ralele quie Moisés cabè' unè', lèscana' reya'ala' galerèle quia', como dan' bzu Moisés di'idza' lè'è guichi ta rguixogue'n quie nè'èdi'. ⁴⁷ Bizi chan' le'e biralele cabè' di'idza' bzu Moisés lè'è guichi, ¿cabizi huele galele cabè' di'idza' rnia' le'e?

6

Bgao Jesús lao ga'yo' mila benè'

(Mt. 14.13-21; Mr. 6.30-44; Lc. 9.10-17)

¹ Te beyudyi una Jesús cana', uzè'è zioquè' itzala' lagun Galilea. Lèlagun na' nezi'laona lagun Tiberias. ² Bizi yaca ben' zè gula zioyaquè' naoyaquè' lèbè', dan' blè'èyaquè' ca naca yela' huaca quienè' reyuènè' yaca ben' raca Zhue'. ³ Cana' guca ure Jesús zionè' ga zu tu ya'a. Lao ya'a na' ure'nè' lènè' yaca ben' quienè'. ⁴ Baruen bago quie lani pascua quie yaca ben' Israel. ⁵ Cati una' Jesús ca yaca ben' zè nao lèbè', na'ra unè' rëbinè' Felipe:

—¿Ca gazi tzexi'ro ta gao yaca ben' zè gula niga?

⁶ Jesús bènè' pruebazi Felipe a ver bi ca inanè', dan' dyè'èdi banezinè' cuinnè' ca huenè'. ⁷ Na'ra unè' Felipe rëbinè' Jesús:

—Nica gaquezi lao chopa gayuhua dumi denarios ta ga'oro yèta xtila ta gao yaca ben' niga. Ni tu bicho huion bigaquen gaoyaquè'.

⁸ Na'ra una Andrés, bi' bichi Simón Pedro, ben' nao Jesús, unè' rëbinè' lèbè':

⁹ —Ni zu tu xcuidi' nu'abi' ga'yo' yèta xtila len chopa bela, pero nia' ¿ca bizi huero gaquen gao lao yugulute ben' nita' niga?

¹⁰ Na'ra una Jesús rëbinè' leyaquè':

—Uleyèbi lao yuguluteyaquè' cue'yaquè'.

Bizi gan' ure'yaquè', na' de guizi ya'a. Na' ure' yaca lao ga'yo' mila be'mbyu. ¹¹ Ude na' uzi' Jesús yèta xtila na', bazènè'n bè'lènè' Diuzi di'idza' unè': "Diuxcalelo", na' bè'nè'n yaca ben' quienè'. Na' bizi yaca ben' quienè', udisiyaquè'n bè'yaquè'n ca tu yaca ben' re' gan' nita'yaquè'. Lèzi cana' bèrè' quie bela, udaoyaquè' ca tu rnan quieyaquè'. ¹² Bè' beyudyi udaoyaquè' beloyaquè', na' una Jesús rëbinè' yaca ben' quienè':

—Uletupa, ulezi' ca tu ta bega'n ta bigaca ditoguen.

¹³ Cana' guca yezi'yaquë' tayožo gucan lao chipchopa ga' naga ca tu ta bega'n udaoyaquë' quie lao ga'yo' yëta xtila. ¹⁴ Na' biži yaca benë' blë'ëyaquë' ca naca yela' huaca bë Jesús, unayaquë' rëbiyaquë' lagueyiaquë':

—Tali ben' ni naquë' ben' use'ela' Diuzi lao yedyi layu ta quixogue'në' ra'o xti'idza' Diuzi.

¹⁵ Na' como gucabë' Jesús bare'enyacuë' iquie'yaquë' lëbë' tziönë' rey quieyaquë' a la fuerza, cana' uza' Jesús lënë' yaca ben' quie' zionë' urënë' tu ya'a.

Ni nan cabë' bë Jesús uza'në' lao nisa

(Mt. 14.22-27; Mr. 6.45-52)

¹⁶ Caora aodze' bare'en ixin, uza'yaquë' zioyaquë' ru'a nisa lagun. ¹⁷ Biži yaca ben' quie Jesús, uyu'uyaquë' lu'u barco azioyaquë' lao nisa ta idyinyaquë' ciudad Capernaum. Na' baruen chula, nunu Jesús bdyin gan'. ¹⁸ Biži lu'u nisa gan' zioyaquë' na', uzulao raca tu be bedun' huala gula, bi'a be nisa rxitin ladza. ¹⁹ Caora aruen ga'yo' xopa kilómetro aozalëyaquë' barco, blë'ëyaquë' rza' Jesús lao nisa, azioquë' bago gan' re'yaquë' lu'u barco. Biži cana' guca bdzebitzegueyaquë'. ²⁰ Na'ra una Jesús rëbinë' leyaquë':

—Në'ëdi' za' niga, bidzebile.

²¹ Biži redaohueyaquë' ta tzu'u Jesús lu'u barco gan' yu'uyaquë'. Ca uyu'u Jesús lu'u barco itu chi'zi bdyinyaquë' ru'a nisa gan' zioyaquë'.

Ca bë yaca benë' beguiloayaquë' Jesús

²² Beteyu tula, biži bega'n yaca benë' ru'a nisa lagun gan' uza' yaca ben' quie Jesús. Na' biži beza'la'adyi'yaquë' uyu'u yaca ben' quie Jesús tuzi barco de ru'a nisa. Lëzirë beza'la'adyi'rëyaquë' bizio Jesús lënë' yaca ben' quienë' lu'u barco. ²³ Na' bdyin yaca barco tula gan', barco ta uza' ciudad Tiberias. Rega'nnan ga'ala' gan' udaoyaquë' yëta xtila len bela, gan' bë'lë Jesús Diuzi di'idza' gudyinë' lëbë': "Xcalelo'". ²⁴ Biži caora blë'ëyaquë' nunu Jesús lënë' yaca ben' quienë' zu gan', na' uyu'uyaquë' yaca barco de gan' zioyaquë' ciudad Capernaum ta yeguiloayaquë' Jesús.

Naca Jesús ca quie yëta xtila nu'an yela' neban tuzioli

²⁵ Cati bdyinyaquë' itzala' lagun, bedilayaquë' Jesús unayaquë' rëbiyaquë' lëbë':

—Maestro, ¿ca bata blao' niga?

²⁶ Na'ra una Jesús rëbinë' leyaquë':

—Tali ca rnia' le'e, le'e rdale reguilole në'ëdi' dan' aodaole abelole. Cala reguilole në'ëdi' dan' agulele quie yela' huaca bia' blë'ële. ²⁷ Biquilole tuzi yela' huao yedu yebidyi. pero ulequilorë yela' huao biyedu yebidyi, yela' huao nu'an yela' neban tuzioli. Lëyela' huao na' guna' le'e. Në'ëdi', bichi yugulu benë', bablu'e Xuza' Diuzi le'e cabë' ruzua' di'idza' quie'. —Cana' guca una Jesús rëbinë' leyaquë'.

²⁸ Biži rnabayaquë' lëbë' rnayaquë':

—¿Ca biži reya'ala' huendo' ta huendo' ca re'en Diuzi?

²⁹ Na'ra una Jesús rëbinë' leyaquë':

—Ca ta re'en Diuzi huele, re'ennë' galele quia' në'ëdi', ben' use'elë'.

³⁰ Biži unayaquë' rëbiyaquë' lëbë':

—¿Cabiži yela' huaca huelo' ta ulu'elo' ilë'ëndo' galendo' quio'? ³¹ Lena' rnando' dan' yaca ben' xuzixta'oro udaoyaquë' yëta xtila lao maná lao lato ga bidyia yu'u con cabë' ca rnan lë'ë guichi la'ya quie Diuzi: "Diuzi bë'në' ta udaoyaquë' yëta xtila za' guibá." —Cana' gudyiyaquë' Jesús.

³² Na'ra una Jesús rëbinë' leyaquë':

—Tali ca rnia' le'e. Cala Moisés bë'në' yëta xtila za' guibá, dechan' Xuza' Diuzi bë'në'n ta udaoyaquë'. Lëzi Xuza' Diuzi gunnë' le'e yëta xtila ta za' guibá. ³³ Lëyëta xtila gun Diuzi za'ten de guibá nu'an yela' neban tuzioli para yaca ben' nita' lao yedyi layu.

³⁴ Na'ra unayaquë' rëbiyaquë' lëbë':

—Señor, guncazo' yëta xtila nao guno'.

³⁵ Biži una Jesús rëbinë' leyaquë':

—Në'ëdi' naca' lëyëta xtila nu'an yela' neban tuzioli. Con nu yaca ben' guida nao në'ëdi', biyeyudyi yedu yela' neban quieyaquë'. Huaca quieyaquë' ca quie ben' bitue, ben' birbili.

³⁶ Con can' baonëcaza' le'e, ba'ala'cazi bablë'ële në'ëdi', biralele quia'. ³⁷ Nu yaca ben' gun Xuza' Diuzi guida nao në'ëdi', biyesebi'ayaquë'. ³⁸ Në'ëdi' za' guibá ta uzua' di'idza' quie Xuza', ben' use'ela' në'ëdi'. Hua' cabë' unanë', bihua' ta racazi la'adya'. Hua' cabë' mandado bë Xuza'. ³⁹ Ca re'en Xuza' Diuzi, ben' use'ela' në'ëdi', re'ennë' ni tu yaca benë' guida nao në'ëdi' bicuiagui'yaquë'. Re'ennë' usebancaza' leyaquë' dza gaca juicio. ⁴⁰ Ca re'en Xuza' Diuzi, ben' use'ela' në'ëdi', re'ennë' gata'cazi yela' neban tuzioli quie yaca ben' gale quia' në'ëdi' ži'inë'. Huasebana'yaquë' dza gaca juicio. —Cana' una Jesús rëbinë' leyaquë'.

⁴¹ Con ca be yaca ben' Israel una Jesús unè' naquè' ca quie yèta xtila za' guibá, lena' udyiala'adyi'yaquè' Jesús. ⁴² Na' nayaquè':

—¿Cala ben' niga Jesús, zi'i José? ¿Cómo nè' naquè' ben' za' guibá, dechan' nubè'ro xuzinè' len zna'nè'?

⁴³ Na'ra una Jesús rëbinè' leyaquè':

—Ulesan, biinële con ganzi quia'. ⁴⁴ Nunu guida nao nè'èdi', chi biben Xuza', ben' use'ela' nè'èdi', leyaquè'. Na' lènè'èdi' usebancaza' leyaquè' dza gaca juicio. ⁴⁵ Lu'u libro ga yu'u di'idza' bzu yaca ben' udxogue' xti'idza' Diuzi rnan cani: “Diuzi ruzioñe'enè' lao yugulu yaca benè'.” Tana' rnia', con nu yaca ben' rznèga ca na di'idza' quie Xuza', uzioñe'e Xuza' leyaquè'. Lèyaca ben' na' guidayaquè' inaoyaquè' nè'èdi'.

⁴⁶ 'Nitu nitu yaca benè' binelè'èyaquè' Xuza'. Tuza' nè'èdi', ben' uza' ga zunè', bablè'èda'nè'. ⁴⁷ Tali ca rnia' le'e, nu yaca ben' gale quia', badecazi yela' neban quieyaquè' tuzioli. ⁴⁸ Naca' ca quie yèta xtila nu'an yela' neban tuzioli. ⁴⁹ Yaca ben' xuzixta'oro udaoyaquè' yèta xtila lao maná lao lato ga bidyia yu'u, pero bè' bdyin dza gatiyaquè' gutiyaquè'. ⁵⁰ Pero nè'èdi' rnia' quie yèta xtila uza' guibá, con nu yaca ben' gao len, bigaticaziyaquè'. ⁵¹ Nè'èdi' naca' ca quie yèta xtila uza' guibá nu'an yela' neban tuzioli. Con nu yaca ben' gao lèyèta xtila nebancaziyaquè' tuzioli. Cuina' gatia' tacuenda gata' yela' neban quie yaca benè'. Quie lena' bè'èla' quia' nacan ca yèta xtila nu'an yela' neban tuzioli. —Cana' una Jesús rëbinè' leyaquè'.

⁵² Bi'zi yaca ben' Israel bè'lèyaquè' laguedyiaquè' di'idza' unayaquè':

—¿Cómo na ben' niga gunnè' bè'èla' quienè' gaoro?

⁵³ Na'ra una Jesús rëbinè' leyaquè':

—Tali ca rnia' le'e, nè'èdi' bichi yugulu benè', chi le'e bigaole bè'èla' quia', chi le'e biyo'orèle ren quia', bigata' yela' neban quiele. ⁵⁴ Nu yaca ben' gao bè'èla' quia' yo'o ren quia', de yela' neban quieyaquè' tuzioli. Nè'èdi' huesebana'yaquè' dza gaca juicio. ⁵⁵ Bè'èla' quia' nacan dugalo yela' huao gaole. Lèzirè ren quia' nacarèn dugalo ta yo'ole. ⁵⁶ Nu yaca ben' gao bè'èla' quia', yo'o ren quia', zulècaziyaquè' nè'èdi' tzaže, lèzi nè'èdi' zulía'yaquè' tzaže. ⁵⁷ Xuza', ben' use'ela' nè'èdi', nebancazinè'. Na' bi'zi nè'èdi', nebana' por nun quienè'. Lèzi cana' gacarè quie ben' gao bè'èla' quia', nebanyaquè' por nun quia' nè'èdi'. ⁵⁸ Nè'èdi' rnia' quie yèta xtila za' guibá. Con nu yaca ben' gao lèyèta xtila na', badecazi yela' neban quieyaquè' tuzioli. Pero quie yèta xtila lao maná ta udao yaca ben' xuzixta'oro, ba'ala'cazi udaoyaquè'n, cati bdyin dza gatiyaquè' gutiyaquè'.

⁵⁹ Cana' una Jesús rëbinè' leyaquè', lu'u idao' sinagoga ciudad Capernaum.

Ga ru'en di'idza' quie yela' neban tuzioli

⁶⁰ Ca be yaca ben' can' unao Jesús, na' unayaquè' rëbiyaquè' laguedyiaquè':

—Zèdi gula naca ca di'idza' unè' ra'o. ¿Nu'zi nezi bidan' unènè'?

⁶¹ Bi'zi Jesús gucabè'nè' ca pensari racayaquè' ru'eyaquè' di'idza' de que tziojè' contra lèbè'. Na'ra unè' rëbinè' leyaquè':

—¿Quele resebi'le can' baonia'? ⁶² ¿Cabizi huele chi ilè'èle nè'èdi', bichi yugulu benè', yeyèpa' yeya'a guibá ga zua' dza na'? ⁶³ Bichi Be quie Diuzi, lèbè' runnè' yela' neban quiele. Bibi de hue bè'èla' zuba' quiele lao Diuzi. Ca di'idza' baonia' le'e, lèdi'idza' na' nacan tali, rnèn quie Bichi Be quie Diuzi, ben' run yela' neban. ⁶⁴ Pero nenita' bala le'e biralele quia'.

Cana' una Jesús rëbinè' leyaquè', dan' nezinè' desde caora na'te nu ben' gale quienè', nu ben' bigale quienè'. Lèzi nezinè' nu ben' usedyin lèbè' lao na'a yaca ben' guti lèbè'. ⁶⁵ Bi'zi una Jesús rëbinè' leyaquè':

—Lena' yania' le'e can', ni tu yaca benè' bisaque' guidayaquè' naoyaquè' nè'èdi', chi Xuza' bibènnè' yaca ben' sa'lè nè'èdi'. —Cana' una Jesús rëbinè' leyaquè'.

⁶⁶ Cana' guca apsanla'adyi' yaca ben' zè Jesús, yaca ben' unao lènè'. Bira uyoyaquè' inaoyaquè' lèbè' con ga zioguè'. ⁶⁷ Cana' guca una Jesús rëbinè' lao chipchopa ben' quienè', ben' bega'n:

—Lèzi le'e, ¿re'enle ibiga'le tzala'la, bira inaole nè'èdi'?

⁶⁸ Na'ra una Simón Pedro rëbinè' lèbè':

—Señor, ¿ca nu'zila ben' tzio'lèndo', como tuzo' luè' rnao' di'idza' rguixogue'n quie yela' neban tuzioli? ⁶⁹ Ca naca nèto', bagulendo' quio'. Nezindo' luè' naco' ben' Cristo zi'i Diuzi, ben' neban tuzioli.

⁷⁰ Na'ra una Jesús rëbinè' leyaquè':

—Banebioga' lao chipchopa le'e gacale ben' quia', pero bi'zi ladole ni, zu tule nuelè tuže len bichi be xi'ibi'.

⁷¹ Ca una Jesús cana', unè' quie Judas Iscariote, zi'i ben' lao Simón. Lèjudas na' naquè' tuže len ichiptu yaca ben' quie Jesús. Lèbè' usedyinnè' Jesús lao na'a yaca ben' guti lèbè'.

7

Yaca bi' bichi Jesús biguleyaquë' quienë'

¹ Beyudyi guca can', uza' Jesús zioquë' estado Galilea. Bire'ennë' sunë' estado Judea, dan' lëgan' na' rda yaca ben' Israel re'enyacuë' gutiyaquë' lëbë'. ² Dan' baruen bago quie lani quie yu'u guizi, ³ na'ra una yaca bi' bichi Jesús rëbinë' lëbë':

—Biyega'nlo' niga, beyo estado Judea tacuenda yedilo' yaca ben' rnao luë' ta inezirëyaquë' cabë' ruelo'. ⁴ Chi re'enlo' inezi yaca benë' cabë' ruelo', bihuelo' negachi'zi. Na' como baruelo' tu ta binelë'ë yaca benë', bza'lao bënan zaca'lao ta ilë'ë yaca benë'. —Cana' unayaquë' rëbiyaquë' lëbë'.

⁵ Nica yaca bi' bichi Jesús biguleyaquë' quienë'. ⁶ Bi'zi una Jesús rëbinë' leyaquë':

—Binedyin hora ulu'ena' yaca benë' ca ta hua' ilë'ëyaquë'. Pero ca naca le'e, huazaquë' tziolo lani bitezi hora. ⁷ Yaca ben' nita' lao yedyi layu biudze'la'adyi'yaquë' le'e. Pero ca naca në'ëdi', si, udze'la'adyi'yaquë' në'ëdi', dan' rguixogui'a ca naca tamedian rueyaquë'. ⁸ Uletzio le'e lani. Bisa' në'ëdi' na'a, dan' binedyin hora sa'a.

⁹ Ude beyudyi una Jesús cana', bega'ncazinë' estado Galilea.

Uyo Jesús lani quie yu'u guizi

¹⁰ Ude uza' yaca bi' bichi Jesús zioyaquë' lani, na'tera uza'rënë' zionë' lani, pero biuyoguë' zaquë'lao, uyoguë' negachi'zi. ¹¹ Bi'zi yaca ben' Israel reguiloayaquë' lëbë' ga raca lani unayaquë' rëbiyaquë' laguedyiaquë':

—¿Ga'zi zio Jesús?

¹² Bi'zi yaca ben' zë unëyaquë' quie Jesús. Balayaquë' unayaquë' naquë' ben' huen. Na' ibalayaquë' unayaquë' binaquë' ben' huen, unayaquë' rdanë' rzi'në' yë' yaca benë'.

¹³ Bi'zi yaca benë' rnëyaquë' negachi'zi quie Jesús, dan' rdzebiyaquë' ye yaca ben' rnabë' quieyaquë'.

¹⁴ Araca gatzo lani cati uyu'u Jesús lu'u idao' rnabë'ra zu na', na' uzulahuë' rusëdiguë' yaca benë'. ¹⁵ Na' du rebanyaquë' unayaquë' rëbiyaquë' laguedyiaquë':

—¿Cómo ben' niga rueguë' zi rioñe'e? ¿Ga'zi uyonë' huesëdi'?

¹⁶ Na'ra una Jesús rëbinë' leyaquë':

—Ca di'idza' rusëdia' le'e niga, binacan di'idza' quia' cuinza', nacan di'idza' quia' len ben' use'ela' në'ëdi'. ¹⁷ Chi nu yaca ben' re'en hue ca re'en Diuzi, lena' huaneziyaquë' cabë' naca di'idza' rnïa', chi tuze rnëlia' Diuzi, o chi rnïa' ta racazi la'adya'. ¹⁸ Nu ben' rnë' ta racazi la'adyi'në' re'ennë' para gue'en ja benë' lëbë'. Pero nu ben' rnële' Diuzi tuze, ru'enë' di'idza' li, birzi'në' yë'.

¹⁹ ¿Quele Moisés bënë' le'e ley quie Diuzi? Na' bi'zi le'e birue quiele cabë' na ley na'. ¿Ca bixquien' re'enle gutile në'ëdi'?

²⁰ Na' bi'zi una yaca benë' rëbiyaquë' lëbë':

—Yu'ulo' bichi be quie taxi'ibi'. ¿Ca nu'zi re'en guti luë' dan' nao' can'?

²¹ Na' una Jesús rëbinë' leyaquë':

—Le'e rebanele cabë' bia' yela' milagro quia' tu dza huezila'adyi'. ²² Bi'zi Moisés bënë' mandado bzu xuzixta'oro tu xëdyidao' cuin xcuidi'dao' byu. Pero tanëro xuzixta'otelaro bë' can', cala Moisés. Lëscan' le'e ruzule tu xëdyidao' xcuidi'dao' byu quiele, ba'ala'cazi dza huezila'adyi'. ²³ Le'e naole ruele ca una Moisés, ruzule tu xëdyidao' xcuidi'dao' byu quiele ba'ala'cazi dza huezila'adyi' tacuenda uzucazole di'idza' ca unë'. Na' bi'zi në'ëdi', dan' beyua' tu ben' zi dza huezila'adyi', lena' rdza'tzeguale në'ëdi'. ²⁴ Biichugulile con ganzi. Cati ichugulile, ulechuguli tu ta yu'u ni'a nxezi quie. —Cana' una Jesús rëbinë' leyaquë'.

Unë Jesús quie ga zë'ë

²⁵ Bi'zi bala yaca ben' nita' ciudad Jerusalén unayaquë' rëbiyaquë' laguedyiaquë':

—¿Cala ben' niga reguilo yaca ben' rnabë' ta gutiyaquë' lëbë'? ²⁶ Zaca'lao za' ja ben' zë na' zënë' rnënë'. Bibi reya'zo yaca ben' rnabë' bihueyaquë' quienë'. ¿Cala baneziyaquë' tali naquë' Cristo? ²⁷ Ra'o baneziro dyë'ëdi' ga yedyi golonë'. Pero cati guida ben' Cristo, nica neziro ga yedyi galoguë'. —Cana' unayaquë' rëbiyaquë' laguedyiaquë'.

²⁸ Cana' guca zë Jesús lu'u idao' rnabë'ra quie yaca ben' Israel rusëdinë' leyaquë', na' benë' ca rna yaca benë'. Na'ra unënë' zidzo rëbinë' leyaquë':

—Cabë' le'e banubë'le në'ëdi', banezile ga gologa'. Pero cala bida' ta racazi la'adya'. Bida' tanun quie ben' zu tuzioli, ben' binubë'le. ²⁹ Pero në'ëdi', nubë'da'në'. Uza' ga zunë'. Lë'ëbë' use'ela'në' në'ëdi'. —Cana' una Jesús rëbinë' leyaquë'.

³⁰ Cana' guca gu'unayaquë' guxuyaquë' hueyaquë' lëbë' preso, pero bibeya'zoayaquë' guxuyaquë' lëbë', dan' binedyin dza idyinnë' lao na'ayaquë'. ³¹ Pero yaca ben' zë, guleyaquë' quienë'. Na'ra unayaquë':

—Talicazi ben' ni naquë' ben' Cristo. Por nun quie yela' huaca quienë' bënë', lena' aoneziro naquë' ben' Cristo. ¿Ca nuzira guida huera yela' huaca ca lëbë'?

Yaca ben' partido fariseo, ben' rnabë' yaca, use'ela'yaquë' policia ta tzeguëxoyaquë' Jesús

³² Caora be yaca ben' partido fariseo ca di'ida' ru'e yaca benë', na' leyaquë' len xan' pxuzi, use'ela'yaquë' yaca policia lu'u idao' rnabë'ra ta tzeguëxoyaquë' Jesús. ³³ Na'ra una Jesús rëbinë' yaca benë':

—Dza nababa dzazi zulia' le'e niga, te na' yeya'a gan' zu ben' use'ela' në'ëdi'. ³⁴ Le'e huadale yeguilole në'ëdi', pero biyedzelele në'ëdi', dan' bisaque' guidale gan' yeya'a.

³⁵ Na' biži yaca ben' Israel rnabayaquë' rëbiyaquë' laguediyaquë':

—¿Ca gaži yeyo ben' niga, na' ra'o biyedzelerero gan' yeyoguë'? ¿Huayoguë' gan' nita' yaca ben' quiero, ben' uza' yaca zio yaca yedyi griego? ¿Cala huayonë' usëdinë' yaca ben' griego? ³⁶ ¿Ca biži re'en ina di'ida' unë' ra'o: "Le'e huadale yeguilole në'ëdi', pero biyedzelele në'ëdi', dan' bisaque' guidale gan' yeya'a."?

Rnë Jesús quie yao nu'an yela' neban

³⁷ Mero dza yeyuyi lani nacan dza belao. Lëdza na' uzuli Jesús unë' zidzo rëbinë' yaca benë':

—Con nu yaca ben' rbili, ruen zi inaoyaquë' në'ëdi' tacuenda gata' ta yo'oyaquë'. ³⁸ Con nu ben' rale quia', gaca quienë' con ca rnë lë'ë guichi la'iya quie Diuzi: "Huaca laxta'oyaquë' ca quie ga de yao nu'an yela' neban."

³⁹ Caora cati una Jesús cana', quie Bichi Be quie Diuzi unë'. Na' huadyin dza huayu'u Bichi Be quie Diuzi lu'u guicho laxta'o yaca ben' rue quie quie xti'ida' Jesús, pero binedyin dza gaca can' dan' bineyo Jesús guibá ta tzeque'në' cuëta lë'ë Diuzi.

Ga rbio yaca benë' zë cue' laguediyaquë'

⁴⁰ Entre bala yaca benë' be ca una Jesús, na' biži unayaquë' rëbiyaquë' laguediyaquë':

—Tali ben' niga naquë' ben' rguixogue' xti'ida' Diuzi, ben' una Diuzi ise'ela'në'.

⁴¹ Balayaquë' unayaquë':

—Lëlëbë' naquë' ben' Cristo, ben' use'ela' Diuzi.

Na' ibalayaquë' unayaquë':

—¿Quele, cala estado Galilea za' ben' Cristo? ⁴² Lë'ë guichi la'iya quie Diuzi rnën quie ben' Cristo naquë' ben' Zi'isuba rey David, ben' galo yedyi Belén, mero yedyi ga uzu rey David. —Cana' unayaquë' rëbiyaquë' laguediyaquë'.

⁴³ Cana' guca, dan' brojë' zë cue' unayaquë' di'ida' udeudela quie Jesús. ⁴⁴ Lena' balayaquë' gu'unayaquë' guxuyaquë' Jesús ta udze'yaquë' lëbë' lu'u dyiguiba, pero bibeyažoyaquë'.

Yaca ben' rnabë' biguleyaquë' quie Jesús

⁴⁵ Yaca ben' naca policia, ben' napa dyin quie idao' uyoyaquë' regunni'ajë' Jesús bedyinyaquë' ga nita' yaca ben' partido fariseo len yaca xan' pxuzi. Biži na' una yaca ben' partido fariseo len yaca xan' pxuzi rëbiyaquë' policia:

—¿Bixquien' bibequië'le lëbë'?

⁴⁶ Na'ra bequëbi yaca policia rëbiyaquë' leyaquë':

—Nitu nitu nunu rnë ca lëbë'.

⁴⁷ Na'ra una yaca ben' partido fariseo rëbiyaquë' leyaquë':

—¿Lente le'e babë'le lato uzi'në' le'e yë'? ⁴⁸ ¿Biži binezile nitu yaca ben' rnabë', lëzi nitu ben' partido fariseo, biguleyaquë' quienë'? ⁴⁹ Biži yaca ben' yedyi bineziyaquë' ca na lë'ë guichi la'iya quie Diuzi. Lëlena' dan' nacayaquë' ben' yu'u de'. —Cana' una yaca ben' rnabë' rëbiyaquë' yaca policia.

⁵⁰ Biži Nicodemo naquerë' ben' partido fariseo, ben' uyo yegue'lë di'ida' Jesús rtze', unë' rëbinë' yaca ben' laguedyinë':

⁵¹ —Según ca naca ley quiero, biru'en lato ichugobë'ro quie yaca benë' chi bineyero bi rueyaquë'.

⁵² Biži unayaquë' rëbiyaquë' Nicodemo:

—¿Lëzi luë', za'rao' estado Galilea? Psëdin una' lë'ë guichi la'iya quie Diuzi, hualë'ëlo' biuza' ben' ise'ela' Diuzi estado Galilea.

⁵³ Na'ra beza'yaquë' zeyoyaquë' žan yu'u quie quieyaquë'.

8

Ni nan quie nigula zu xquiuhue, rtilë' ben' tula

¹ Biži Jesús uzi'në' zioquë' ga zu ya'a laona ya'a Olivos. ² Cati yani' dza tula, zeyo Jesús lu'u idao' rnabë'ra. Na' begu'udi' yaca benë' gan' zënë'. Biži na' ure'në' rusëdinë' leyaquë'. ³ Na'ra yaca ben' rusëdi ley quie Moisés len yaca ben' partido fariseo, uquië'yaquë' tu

nigula, ben' rdalë be'mbyu binaca xquiuhue. Bablë'ë benë' bin' bë nigula na' len be'mbyu. Cana' guca dan' bëxoyaquë' nigula na' lado ben' zë gan' nita'yaquë'. ⁴ Na'ra unayaquë' rëbiyaquë' Jesús:

—Maestro, bablë'ë yaca benë' bin' bë nigula ni, aptilë' be'mbyu binaca xquiuhue'. ⁵ Rnën lë'ë guichi ley quie Moisés de quie reya'ala' gutiro con yo ben' rue cabë' bë nigula niga. ¿Cabizi nao' luë'? —una yaca ben' na' gudyjé' Jesús.

⁶ Unayaquë' can' ta yeyaquë' cabizi yequëbi Jesús. Reguilola'adyi'yaquë' ta gaoyaquë' lëbë' xquia. Na' bizi Jesús byëchonë' layula uzulaonë' bënë' letra layu conlë zbenë'. ⁷ Como dan' r nabazi rnabayaquë' lëbë', cana' guca bezulinë' unë' rëbinë' leyaquë':

—Nutezi le'e bibi xquia nehua', tanëro le'e ulequi nigula ni yo.

⁸ Na' bizi beyëchonë' tatula layu. Bënë' letra tatula layu conlë zbenë'. ⁹ Bizi yaca ben' nita' ga zë Jesús, bë' beyaquë' bi una Jesús, gucabë'yaquë' pensari quieyaquë' raon leyaquë' xquia. Cana' guca beza' tu huio tu huioyaquë'. Tanëro beza' yaca ben' gula, cana' guca beza' lao yuguluteyaquë'. Bega'n nigula ituzinë' gan' zë Jesús. ¹⁰ Caora bezuli Jesús, blë'ënë' nuranu yaca benë' dyila'. Bizi ituzi nigula bega'n gan' zë Jesús. Na'ra una Jesús rëbinë' nigula:

—Nigula, ¿ganazi yaca ben' rao luë' xquia? ¿Quele nitu nunu ichugobë' quio'?

¹¹ Bizi una nigula na' rëbinë' lëbë':

—Nunu ichugobë' quia', Señor.

Na'ra una Jesús rëbinë' lëbë':

—Nica në'ëdi' biichugobi'a quio'. Pues na' beyo, bira huu' bizinaquezi.

Jesús naquë' ca quie tu gui' ta useni'n quie yugulu ben' rda lao lato lao chula

¹² Unë Jesús tatula rëbinë' yaca benë':

—Naca' ca quie tu gui' ta useni'n quie yugulu ben' rda lao lato lao chula. Chi nu yaca benë' nao në'ëdi', bitayaquë' lao lato lao chula. Huadayaquë' ga rseni' xni' gui', ga idzeleyaquë' yela' neban tuzioli.

¹³ Na'ra una yaca ben' partido fariseo rëbiyaquë' Jesús:

—Luë' rnëlo' cule quio' cuinzo'. Ca di'idza' rnëlo' na' bibizaca'n.

¹⁴ Bizi una Jesús rëbinë' leyaquë':

—Ba'ala'cazi rnia' cule quia', pero zaca' di'idza' rnia', dan' banezda' gan' za'a, banezda' gan' yeya'a. Pero ca naca le'e, nica nezizile gan' za'a, nica nezizile gan' yeya'a. ¹⁵ Le'e rchugobë'le cabë' raca lao yedyi layu. Pero ca naca në'ëdi', nitu nitu nunu rchugobi'a quie.

¹⁶ Pero chi ichugobi'a quie benë', hua' tu ta yu'u ni'a xnezi dan' cala cuinza' ichugobi'a, ichugobë'lëcaza' Xuza', ben' use'ela' në'ëdi'. ¹⁷ Lu'u libro ga yu'u ley quiele, rnën quie chopa ben' naca testigo. Chi tuzi ca rnayaquë', lena' nacan tali cabë' rnëyaquë'. ¹⁸ Bizi nia' le'e, në'ëdi' rnia' cule quia', lëzi rnërë Xuza', ben' use'ela' në'ëdi', cule quia'.

¹⁹ Na'ra unayaquë' rëbiyaquë' lëbë':

—¿Gaži nao' zu xuzo'?

Bizi una Jesús rëbinë' leyaquë':

—Cabë' le'e, binubë'le në'ëdi'. Lëzi cana' binubë'le Xuza'. Chi le'e nubë'le në'ëdi', lëzi cana' huebë'rële Xuza', ben' use'ela' në'ëdi'. —Cana' una Jesús rëbinë' leyaquë'.

²⁰ Una Jesús cana' tu nersëdinë' yaca benë' lu'u idao' rnabë'ra ga zuba tu caja ga rudze'yaquë' gun. Pero nituyaquë' bibeyažoyaquë' guxoyaquë' lëbë', dan' binedyin hora idyinnë' lao na'ra yaca ben' rnabë'.

Na Jesús: "Nitule bisaque' yeza'le gan' yeya'a"

²¹ Una Jesús tatula rëbinë' leyaquë':

—Në'ëdi' hueya'a guibá ga uza'a. Le'e hueguilole në'ëdi', pero huatile du nao dula' xquia quiele le'e. Nitule bisaque' yeza'le gan' yeya'a.

²² Le'ra una yaca ben' Israel rëbiyaquë' lagueyiyaquë':

—¿Cala gutinë' cuinnë'? ¿Cala lena' dan' unanë': "Bisaque' yeza'le gan' yeya'a"?

²³ Na'ra una Jesús rëbinë' leyaquë':

—Le'e za'le lao yedyi layu niga, pero në'ëdi' naca' ben' za' guibá. Le'e nacale quie ben' lao yedyi layu niga, pero në'ëdi' binaca' quie ben' lao yedyi layu niga. ²⁴ Tana' lena' rnia' le'e, huatile du nao dula' xquia quiele le'e. Huatile conlë dula' xquia quiele chi biralele ca nia' nu naca'.

²⁵ Na'ra unayaquë' rëbiyaquë' Jesús:

—¿Nuži naco' luë'?

Na' una Jesús:

—Desde dza na'te, baonia' le'e nu naca'. ²⁶ Tazë de ta inia' le'e, lëzi tazë de ta ichugulia' quiele le'e. Xuza', ben' use'ela' në'ëdi', rnëguë' puro di'idza' naca li. Ca di'idza' baonia' le'e, lëdi'idza' na' beda' una Xuza' në'ëdi'. —Cana' una Jesús rëbinë' leyaquë'.

²⁷ Pero na' yaca ben' biuyoñe'eyaquë' cati unë Jesús quie Xuzinë'. ²⁸ Tana' lena' unë' rëbinë' leyaquë':

—Cati baolisale në'ëdi' sibi, në'ëdi' bichi yugulu benë', lëcana' inezile nuži naca'. Lëzi inezirële cala ta racazi la'adya' rua', den' rnëcaza' ca ta bzioñe'e Xuza' në'ëdi'. ²⁹ Xuza', ben' use'ela' në'ëdi', zulëcazë' në'ëdi' tuže. Birsannë' në'ëdi' zua' tuza', dan' ruzucaza' di'idza' cabë' rnanë'. —Cana' una Jesús rëbinë' leyaquë'.

³⁰ Ca be yaca benë' ca una Jesús, caora na' gule yaca ben' zë quienë'.

Ni rnën quie yaca ben' rale len yaca ben' birale

³¹ Biži una Jesús rëbinë' yaca ben' Israel con bala yaca ben' rale quienë':

—Chi le'e naole hue quiele can' rnia' le'e, nacacazile ben' quia'. ³² Lena' huanezcazile nacan tali ta una Diuzi. Lena' dan' gacale libre. —Cana' una Jesús rëbinë' leyaquë'.

³³ Na'ra unayaquë' rëbiyaquë' lëbë':

—Nëto' nacando' zi'isuba Abraham. Desde dza na'te banacando' libre. ¿Cómo luë' nao' gacando' libre?

³⁴ Na'ra una Jesús rëbinë' leyaquë':

—Tali ca rnia', nu ben' rue xquia, naca quieyaquë' ca quie ben' nada'o. Naca xquia quieyaquë' ca quie xa'nyaquë'. ³⁵ Nu ben' nada'o, binaquë' familia quie xa'nnë'. Pero nu ži'i xa'nnë', nacacazibi' familia quie xa'ne. ³⁶ Chi yeži ži'i Diuzi xquia quiele, talicazi nacale libre. ³⁷ Banezda' le'e nacale ben' ži'isuba Abraham, pero re'enle gutile në'ëdi', dan' rsebi'le di'idza' rnia' le'e. ³⁸ Në'ëdi' rnia' cabë' una Xuza' në'ëdi'. Pero na' le'e ruzule di'idza' cabë' mandado rue ben' naca xuzile le'e. —Cana' una Jesús rëbinë' leyaquë'.

³⁹ Na'ra unayaquë' rëbiyaquë' Jesús:

—Abraham naquë' xuzindo'.

Biži una Jesús rëbinë' leyaquë':

—Chi nacale dugalo ži'i Abraham, huerële can' bënë'. ⁴⁰ Ba'ala'cazi aonia' le'e di'idza' li ca ta una Diuzi në'ëdi', na' le'e re'enle gutile në'ëdi'. Bibë Abraham cana'. ⁴¹ Le'e ruele laga ca rue ben' naca xuzile.

Na'ra unayaquë' rëbiyaquë' Jesús:

—Binacando' ži'i ben' tula. Tuzi Diuzi naquë' xuzindo'.

⁴² Biži una Jesús rëbinë' leyaquë':

—Chi tali naca Diuzi xuzile, huadyë'ële në'ëdi' dan' uza' ga zu Diuzi. Cala bida' ta racazi la'adya', den' bida' tanun quie Diuzi. ⁴³ ¿Bixquien' bire'enle yele con ca rnia'? Pues nia' le'e, birele dan' bire'enle hue quiele con ca rnia'. ⁴⁴ Xan' taxi'ibi' naca xuzile. Lena' dan' re'enle huerële cabë' ruenan. Desde cana'te rutinan benë', biruenan tali. Ca pensari yu'u laxta'onan, cana' rzi'nän yë'. Nacanan ben' huizi' yë'. Nacarënan xuzi yugulu ben' huizi' yë'. ⁴⁵ Dan' rnia' le'e ta naca tali, ta yu'u ni'a xnezi, quie lena' bire'enle galele quia'. ⁴⁶ ¿Nuži le'e ulenacara chi në'ëdi' de dula' quia'? Chi rnia' ta naca tali, ¿bixquien' biralele quia'? ⁴⁷ Nu ben' naca quie Diuzi, uzënağayaquë' xti'idza' Diuzi. Pero le'e, dan' binacale ben' quie Diuzi, lena' bire'enle uzënağale hue quiele xti'idza' Diuzi. —Cana' una Jesús rëbinë' leyaquë'.

Tu binegalo Abraham bazucazi Cristo

⁴⁸ Na'ra una yaca ben' Israel rëbiyaquë' Jesús:

—¿Cala tali rnando' naco' ben' samaritano bayu'ulo' bichi be xi'ibi'?

⁴⁹ Biži una Jesús rëbinë' leyaquë':

—Biyu'a bichi be xi'ibi'. Ca ta rua', rua' Xuza' ben' ze. Na' biži le'e, rutasi runiole në'ëdi'.

⁵⁰ Në'ëdi' bihua' cuina' ben' ze, pero zucazi ben' rue në'ëdi' ben' ze. Lëbë' ichugobë'në' quiele. ⁵¹ Tali ca rnia' le'e, chi nu yaca ben' hue quie di'idza' rnia', bigaticazinë'.

⁵² Na'ra una yaca ben' Israel rëbiyaquë' lëbë':

—Baguquelindo' yu'ucazo' bichi be xi'ibi'. Pues Abraham len yaca ben' udixogue' xti'idza' Diuzi, gutiyaquë'. Na' biži luë' nao': "Chi nu yaca benë' hue quie di'idza' rnia', bigaticazinë'." ⁵³ ¿Nacaro' luë' ben' ze ca xuzixta'ondo' Abraham? Lëbë' gutinë', lëzirë gutirë yaca los demás ben' udixogue' xti'idza' Diuzi, na'a ¿ca nuži nao' naco' luë'?

⁵⁴ Na'ra una Jesús rëbinë' leyaquë':

—Chi rua' cuina' ben' ze, bibi zaca'n ca nia'. Pero Xuza', ben' nale naca Diuzi quiele, lënë' ruenë' në'ëdi' ben' ze. ⁵⁵ Në'ëdi' nia' le'e binubë'le lëbë', pero në'ëdi' si, nubë'da' lëbë'. Chi inaro de que nia' binubë'da' lëbë', lena' nacaria' ben' huizi' yë' ca le'e. Pero biinia' can', como dan' nacan tali nubë'da' lëbë', ruzua' di'idza' quienë'. ⁵⁶ Bedaohue xuzixta'ole Abraham dza blë'ënë' bdyina' yedyi layu.

⁵⁷ Na'ra una yaca ben' Israel rëbiyaquë' Jesús:

—Binedyinlo' gatzo gayuhua iza, ¿cómo luë' nao' blë'ëlo' xuzixta'ondo' Abraham?

⁵⁸ Na'ra una Jesús rëbinë' leyaquë':

—Tali ca rnia' le'e, tu binegalo xuzixta'ole Abraham, bazucaza' nē'ēdi'. —Cana' una Jesús rēbinē' leyaquē'.

⁵⁹ Bizi na' uzi'yaquē' yo gu'unyaquē' quiyaquē'n Jesús. Na' ubiguē' tzala'la lu'u idao' rnabē'ra beroguē' bedenē' zioquē' ladoyaquē'.

9

Beyue Jesús tu ben' laochula

¹ Gan' uzi' Jesús zionē' blē'ēnē' tu ben' laochulacazi nacatē' gologuē' naquē' xcuidi'.

² Na'ra una yaca ben' quie Jesús rēbiyaquē' lēbē':

—Maestro, ¿bixquien' golo ben' niga nechula laohuē'? ¿Nu quie dula' xquia guca laohuē' can'!? ¿Dula' xquia quie xuzē', o chi dula' xquia quie cuinzē'?

³ Na'ra una Jesús rēbinē' yaca ben' quiē':

—Cala gucan quie dula' xquia quie cuinzē', ni quele dula' xquia quie xuzinē'. Gucan can' tacuenda inezi yaca benē' cabē' hue Diuzi yela' huaca quienē' gacalēnē' lēbē'. ⁴ Na' nia' le'e na'a te dza naca baguin racaten dyabē' hua' dyin quie Xuz'a, ben' use'ela' nē'ēdi'. Cati baodze', nuran saque' hue dyin. ⁵ Tu raca zua' lao yedyi layu, naca' ca quie gui' rseni'n ga naca chula ta il'ē'ē yaca benē'.

⁶ Ude beyudyi una Jesús cana', uru'unē' zen' layu, bēnē' ledao' gun' conlē' zen' quienē'. Ude na' uzi'nē'n blēpinē'n lao ben' laochula. ⁷ Na'ra una Jesús rēbinē' ben' laochula:

—Uyo yetibi laolo' lu'u pozo nisa lao Siloé, ta inaro xti'idza'ro: Pozo nisa quie ben' uyo lao laza ben' tula.

Biži uyo ben' laochula yetibinē' laohuē', na' biži bedyinnē' zan yu'u quienē' baoyalo laohuē' barlē'ēnē'. ⁸ Na'ra yaca ben' nita' ga'ala' ga zu ben' abeyalo laohue, len yacara los demás ben' tula, ben' bezaque chi lēnē' reque'nē' rnabē' gun, caora na' unayaquē' rēbiyaquē' laguedyiaquē':

—¿Cala ben' niga reque' rnaba gun yugu dza?

⁹ Bala yaca benē' unayaquē':

—Lēlēbē'.

Ibalayaquē' unayaquē':

—Lēbē' raquero.

Pero biži cuincazi ben' beyalo laohue unē':

—Lēnē'ēdi'.

¹⁰ Na'ra unabayaquē' lēbē':

—¿Biži bao' ta belē'ēlo'?

¹¹ Na'ra bequēbinē' rēbinē' leyaquē':

—Lēben' lao Jesús bēnē' gun' blēpinē'n laohua'. Bē' beyudyi blēpinē' gun' laohua', na'ra unē' nē'ēdi': “Uyo yetibi laolo' lu'u pozo nisa lao Siloé.” Biži na' uya'a yetiba' laohua', cana' guca' barlē'ēda'.

¹² Na'ra unabayaquē' lēnē':

—¿Ganaži ben' nao' cana'?

Na'ra unē':

—Binezda' gala zionē'.

Yaca ben' partido fariseo, pquēpiyaquē' ben' beyalo laohue bi guca quienē'

¹³ Na'ra uquiē'yaquē' ben' beyalo laohue psedyinyaquē' lēbē' gan' nita' yaca ben' partido fariseo. ¹⁴ Cana' bēyaquē', dan' beyue Jesús laohue ben' na' dza saodo, dza huezila'adyi'.

¹⁵ Na'ra pquēpiyaquē' ben' beyalo laohue ca guca dan' belē'ēnē'. Cani unē' rēbinē' leyaquē': —Blēpigūē' gun' laohua'. Ude na' uya'a yetiba'n. Cana' guca belē'ēda'.

¹⁶ Na'ra una bala yaca ben' partido fariseo:

—Ben' nao' bē can', binaquē' ben' quie Diuzi, dan' bibēnē' bala dza huezila'adyi' quiero. Na' biži ibalayaquē' unayaquē':

—Chi naquē' ben' napa dula' xquia, ¿cabiži guca bēnē' yela' huaca ta belē'ē ben' niga?

Cana' guca unēyaquē' di'idza' udeudela. ¹⁷ Na'ra unayaquē' rēbiyaquē' ben' beyalo laohue:

—¿Cabiži nao' luē' quie ben' nao' beyue laolo'?

Na'ra unē' rēbinē' leyaquē':

—Nē'ēdi' rnia' naquē' ben' use'ela' Diuzi. —Cana' unē' rēbinē' yaca ben' partido fariseo.

¹⁸ Pero bigulecaziyaquē' chi tali guquē' ben' laochula. Na' tacuenda yezacalao bi guca quienē', guziyaquē' xuzi zna' ben' beyalo laohue. ¹⁹ Na'ra unabayaquē' xuzi zna' ben' na' rēbiyaquē' leyaquē':

—¿Ži'ile ni unale nechula laonē' cati uzutenē'? Chi nale nechula laonē', ¿cómo barlē'ēnē' na'a?

²⁰ Na' biži unayaquē' rēbiyaquē' leyaquē':

—Nando' zi'indo'. Nezindo' desde bdao'tenë' nechula laonë'. ²¹ Binezcazindo' bi guca dan' barlë'ënë'. Nica nezizindo' nu ben' bē ta belë'ënë'. Banacanë' ben' huaca. Ulenabacaranë' lēnë'. Huananë' cuinnë' bi guca quienë' dan' barelë'ënë'.

²² Cana' una xuzi zna' ben' beyalo laohue, dan' rdzebiyaquë' bi hue yaca ben' r nabë', como dan' banuzi'a yaca ben' r nabë' bihue'yaquë' lato tzu'u ben' lu'u idao' sinagoga, ben' rale quie Jesús naquë' ben' Cristo. ²³ Tana' lena' unayaquë' rëbiyaquë' yaca ben' r nabë': "Banaquë' ben' huaca. Ulenabacaranë' lēnë'."

²⁴ Biži yaca ben' r nabë' gužiyaquë' tatula ben' beyalo laohue, unayaquë' rëbiyaquë' lēbë': —Tali una nēto', dan' huecazi Diuzi ca inao'. Biži nēto' banezindo' ben' na' naquë' ben' de dula' xquia quie.

²⁵ Na'ra una ben' beyalo laohue rëbinë' leyaquë': —Binezcazida' chi naquë' ben' de dula' xquia quie, o chi bede dula' xquia quienë'. Zelao na' ta nezda', guca' ben' laochula, biži na'a' barelë'ēda'.

²⁶ Lena' unabayaquë' lēbë' tatula: —¿Biži bēnë' quio' dan' nao' beyuenë' luë'?

²⁷ Na'ra unë' rëbinë' leyaquë': —Baonia' le'e can' bēnë', pero bibi bala ruele quia'. ¿Bixquien' r nabale nē'ēdi' tatula? ¿Cala re'enle inao' rē lēbë', gacale ben' quienë'?

²⁸ Biži mazara bdza' yaca ben' r nabë' lēbë' rëbiyaquë' lēbë': —Luë' naolo' ben' na'. Biži nēto' naondo' rzundo' di'idza' ca una Moisés. ²⁹ Nēto' banezindo' dyë'ēdi' ca bē Diuzi bē'lēnë' Moisés di'idza'. Pero quie ben' na', nica nezindo' ga za'në'.

³⁰ Na'ra unë' ben' beyalo laohue rëbinë' leyaquë': —Nacan ta yebanero ca nale, nale binezile ga za'në'. ¿Cómo binezile ga za' tu ben' guca beyuenë' nē'ēdi' barlë'ēda' na'a? ³¹ Dyë'ēdi' neziro bire Diuzi yaca ben' napa dula' xquia. Con tuzi yaca ben' rionla'adyi' lēbë', yaca ben' rue quie xti'idzë', lējë' re Diuzi quiejë'. ³² Desde ure'te lao yedyi layu, nunu nehue cabë' bē ben' niga, bēnë' ta yelë'ē tu ben' laochulacazi nacatë' gologuë'. ³³ Chi ben' na' biuza'në' tziōnë' lao Diuzi, bibi de huenë' cuinzinë'.

³⁴ Na'ra una yaca ben' partido fariseo rëbiyaquë' lēbë': —Yela' ben' mala quio' naco' can' gololo'. ¿Na' como luë' re'enlo' yexi'idze'lo' nēto' uzioñë'elo' nēto'?

Can' guca ulioyaquë' lēbë' lu'u idao' sinagoga.

Ben' birale quie Jesús naca quieyaquë' ca quie ben' laochula

³⁵ Biži Jesús unezinë' ulio yaca ben' partido fariseo ben' baoyalo laohue lu'u idao' sinagoga. Na' bedila Jesús lēbë' unë' rëbinë' lēbë':

—¿Ralelo' quie ben' naca zi'i Diuzi?

³⁶ Na'ra una ben' baoyalo laohue rëbinë' Jesús:

—Señor, una nu ben' na' tacuenda galeda' quienë'.

³⁷ Na'ra una Jesús rëbinë' lēbë':

—Nē'ēdi', ben' ru'elë' luë' di'idza', naca' ben' na'.

³⁸ Caora na' uditzo žibinë' lao Jesús rëbinë' lēbë':

—Baraleda' quio', Señor.

³⁹ Na' biži una Jesús rëbinë' lēbë':

—Nē'ēdi' bida' lao yedyi layu ta hua' juicio. Lëzirë bida' tacuenda yelë'ē yaca ben' birlë'ē. Pero quie yaca ben' bire'en gale quia', bida' ta yechula laohueyaquë'.

⁴⁰ Biži bala yaca ben' partido fariseo nita'yaquë' ga'ala' ga zē Jesús, bē' beyaquë' can' unanë', na'tera unayaquë' rëbiyaquë' lēbë':

—¿Biži ca nao'? ¿Nacarëndo' ben' laochula?

⁴¹ Na'ra una Jesús rëbinë' leyaquë':

—Chi tali binezile bi ruele, bide dula' xquia quiele. Pero como dyë'ēdi' banezile bi ruele, lena' decazi dula' xquia quiele.

10

Una Jesús tu di'idza' quie beco' zi'ila' len quie ben' rapa lēba', ben' naca xa'mba'

¹ Tali ca rnia' le'e, nu ben' bitzu'u ru'a corrale ga yu'u beco' zi'ila', den' negachi' ru'unë' xcu'udzule, lēben' na' naquë' ben' uban, ben' re'en cuan beco' zi'ila'. ² Ben' ru'u ru'a corrale, ga yu'u beco' zi'ila', lēben' na' naquë' dugalo ben' rapa beco' zi'ila', ben' naca xa'mba'. ³ Ben' rapa ru'a corrale, rsaloguë' ru'a corrale ta tzu'u ben' rapa beco' zi'ila', ben' naca xa'mba'. Biži rezaque yaca beco' zi'ila' xchi' ben' rapa lēba', ben' naca xa'mba'. Rëžiguë' tu tuba' según cabë' laoba' quie quiejaba' ta cuioguë'ba' lu'u corrale. ⁴ Rde reyudyi rbioguë'

lao yuguluteba', na' rebialao ben' rapa lëba' laoyacaba'. Biži leyacaba' yenaoyacaba' ben' rapa lëba', ben' naca xa'mba' dan' rezaqueyacaba' xchi'në'. ⁵ Pero binaoyacaba' ben' binubë'yacaba'. Huažunoyacaba' lëbë', dan' binubë'yacaba' xchi'në'. Rezaqueyacaba' cala ben' rapa lëba', ben' naca xa'mba'. —Cana' una Jesús rëbinë' yaca benë'.

⁶ Lëtu di'idza' ni gudyi Jesús yaca benë', pero biži biuyofne'ejë' bi na di'idza' una Jesús quie xa'n beco' zi'ila'.

Jesús naquë' dugalo ben' rapa beco' zi'ila', ben' naca xa'mba'

⁷ Na'ra una Jesús tatula rëbinë' leyaquë':

—Tali ca rnia' le'e, në'ëdi' naca' ca quie ru'a corrale ga ru'u yaca beco' zi'ila'. ⁸ Yaca ben' babida caora bineguida', gu'unyaquë' cuanyaquë' yaca beco' zi'ila'. Pero biži yaca beco' zi'ila' bibëyacaba' bala inaoyacaba' leyaquë'. ⁹ Dan' naca' ca quie ru'a corrale, lena' con nu yaca ben' tzu'u lu'u ru'a corrale gan' zua', lëlëyaca ben' na' gata' yela' neban quiejë' tuzioli. Huaca quieyaquë' ca quie yaca beco' zi'ila' ru'u rero lu'u corrale ga de guiži ya'a ta gaoyacaba'.

¹⁰ Rida yaca ben' uban ta cuanyaquë' gutiyaquë' udyiagu'yaquë' yaca benë'. Pero bida' në'ëdi' ta gata'cazi yela' neban quieyaquë' tuzioli. ¹¹ Në'ëdi' naca' dugalo ben' rapa beco' zi'ila', ben' naca xa'mba'. Zua' puesto gatia' tacuenda bicuiagu'ya'caba'. ¹² Pero nu ben' rue dyin de lažo, cati llë'ënë' za' lobo, caora na' izunoguë' uca'nnë' yaca beco' zi'ila', dan' binaquë' dugalo ben' rapa beco' zi'ila', ben' naca xa'mba'. Binacayacaba' bia quienë'. Cana' gaca guida lobo guxuba' utzatzaba' yaca beco' zi'ila'. ¹³ Pero ben' binaca xa'mba' rueguë' dyin de lažo, lena' uzunoguë' bibi cuenda huenë' quie yaca beco' zi'ila'.

¹⁴⁻¹⁵ Në'ëdi' naca' dugalo ben' rapa beco' zi'ila', ben' naca xa'mba'. Cabë' Xuza' nubë'në' në'ëdi', cana' nubë'da' Xuza'. Lëzirë cabë' nubë'da' yaca ben' naca ca quie beco' zi'ila' quia', cana' nubë'yaquë' në'ëdi'. Zua' puesto gatia' tacuenda bicuiagu'yaquë'. ¹⁶ Lëzirë nita' yaca ben' tula nacarëyaquë' ca quie beco' zi'ila' quia'. Bizuyaquë' ni len në'ëdi'. Lena' huatzazi'ayaquë' guidayaquë' ta sulëyaquë' në'ëdi', dan' baraleyaquë' quia'. Nacarëyaquë' tuzi len yaca los demás ben' barale quia'. Cana' iyacayaquë' tu zezi, na' tuza' në'ëdi' gaca' xa'nyaquë'.

¹⁷ Xuza' nedyë'ënë' në'ëdi' dan' zua' puesto gatia', te na' yezi'a yela' neban quia' tatula.

¹⁸ Nunu rzaque' guti në'ëdi' chi bihua'yaquë' lato. Gusto quia' zua' puesto gatia', te na' yezi'a yela' neban quia' tatula. Cana' mandado bë Xuza' në'ëdi'.

¹⁹ Ude beyudyi be yaca ben' Israel ca una Jesús, na'tera unëyaquë' udeudela. ²⁰ Yaca ben' zë unëyaquë' quienë' rëbiyaquë' laguedyiaquë':

—¿Bixquien' ruele bala rzënegale quienë'? Yu'u bichi be xi'ibi' lu'u laxta'onë', naquë' ben' loco.

²¹ Biži ibalayaquë' unayaquë':

—Nu ben' yu'u bichi be xi'ibi', birnënë' ca rnë ben' ni. ¿Quele, chi ben' yu'u bichi be xi'ibi', bisaque'në' yeyuenë' ben' laochula ta yelë'ënë'?

Yaca ben' Israel besebi'yaquë' Jesús

²² Biži bdyin dza hue yaca ben' Israel lani ta yeza'la'adyi'yaquë' dza guca la'ya idao' rnabë'ra quieyaquë'. Biu' bëyaquë' lani, nacan biu' zaga. ²³ Uyu'u Jesús lu'u idao' rnabë'ra rdanë' bago ru'a idao' nezi'laonan ru'a idao' Salomón. ²⁴ Biži yaca ben' rnabë' quie ben' Israel uyëchyaquë' Jesús rnayaquë' rëbiyaquë' lëbë':

—¿Bataži iyudyi rutëbilo' nëto' ca di'idza' inao' nëto'? Chi luë' naco' ben' Cristo, una nëto' tu lasagazi.

²⁵ Na'ra una Jesús rëbinë' leyaquë':

—Baonia' le'e, pero biralele. Ca naca yela' huaca babia' conlë Xuza', lena' rulu'enan le'e nu naca'. ²⁶ Pero le'e biralele quia', dan' binacale ben' naca beco' zi'ila' quia' ca ta baonëcaza' le'e. ²⁷ Biži yaca ben' naca beco' zi'ila' quia', rzënegayaquë' di'idza' rnia'. Në'ëdi' nubë'da' leyaquë', cana'ra guidayaquë' inaoyaquë' në'ëdi'. ²⁸ Në'ëdi' hua'yaquë' yela' neban tuzioli ta bicuiagu'caziyaquë'. Nitu nitu nunu saque' cuba leyaquë' lao na'a como dan' ²⁹ Xuza' bënnë' leyaquë' në'ëdi'. Nacara Xuza' ben' zëra ca yaca benë'. Nitu nitu nunu saque' cuba leyaquë' lao na'a Xuza'. ³⁰ Xuza' len në'ëdi' nacando' tuze. —Cana' una Jesús rëbinë' leyaquë'.

³¹ Biži yaca ben' rnabë' quie ben' Israel, tatula uzi'yaquë' yo, gu'unyaquë' quieyaquë' Jesús. ³² Pero una Jesús rëbinë' leyaquë':

—Zë lasa bia' tadya'a delante lao le'e conlë yela' huaca quie Xuza'. Chi bia' tadya'a, ¿bixquien' re'enle quile në'ëdi' yo?

³³ Na'ra unayaquë' rëbiyaquë' Jesús:

—Cala re'enndo' quindo' luë' yo dan' babao' tadya'a, pero dan' rnaya'lo' Diuzi ca rnao'. Benë'cazi naco', na' ruelo' cuinlo' ca Diuzi.

³⁴ Na'ra una Jesús rëbinë' yaca ben' rnabë':

—Lë'ë guichi ga bzu Moisés di'idza' la'ya quie Diuzi, rguixogue'n ca una Diuzi rëbinë' yaca benë' cani: "Le'e nacale ca yaca diuzi." ³⁵ Cana' una Diuzi quie yaca ben' uzënaga quienë' unë' rëbinë' leyaquë': "Le'e nacale ca yaca diuzi." Na' bizi baneziro di'idza' licazi zun lë'ë guichi la'ya quie Diuzi. ³⁶ Chi Diuzi ulioguë' në'ëdi' use'ela'në' në'ëdi' lao yedyi layu niga, çbixquien' le'e nale rnaya' Diuzi dan' nia' naca' zi'i Diuzi? ³⁷ Chi birzua' di'idza' cabë' rna Xuza' në'ëdi', bigalecazile quia'. ³⁸ Pero chi rzua' di'idza' cabë' rna Xuza' në'ëdi', ruen zi galele quia' por nun quie len tacuenda inezile tu lasagazi nacalia' Xuza' tuze, lëscan' nacalë Xuza' në'ëdi' tuze. —Cana' una Jesús rëbinë' leyaquë'.

³⁹ Bizi yaca ben' rnabë', tatula gu'unyaquë' guxuyaquë' Jesús ta hueyaquë' lëbë' preso, pero aode ulanë' lao na'a yaca ben' na'.

⁴⁰ Bizi beyo Jesús tatula itzala' yao Jordán. Na' bega'nnë' gan' bë' Juan lao yaca benë' dza na'te. ⁴¹ Yaca ben' zë uyoyaquë' yena'yaquë' Jesús. Na'ra unayaquë' rëbiyaquë' laguedyiaquë':

—Ba'ala'cazi bibë Juan yela' milagro, pero yugulu ca ta unë' quie ben' niga nacan tali.

⁴² Na'ra yaca ben' zë uyo gan' zënë', guleyaquë' quienë'.

11

Ni rmën cabë' guca cati guti Lázaro

¹ Na' uzu tu ben' guca zhue', ben' lao Lázaro. Naquë' ben' yedyi Betania lënë' chopa zannë', María len Marta. ² LëMaría na' uyonë' dza na'te yelatonë' aceite rla' zixi zëo ni'a Jesús. Ude na' besebidyinë'n conlë guitza' guichonë'. ³ Cana' guca use'ela' rupa zan Lázaro tu ben' uyo gan' zu Jesús unë' rëbinë' lëbë':

—Señor, raca zhue' Lázaro, ben' naca amigo quio'.

⁴ Bë' be Jesús ca una ben' na', na' unë' rëbinë' lëbë':

—Ca naca yela' hue' racanë', bisuen gutin lëbë'. Raca zhue'në' tacuenda ulu'en ca naca yela' huaca quie Diuzi, lente yela' huaca quia' në'ëdi' zi'i Diuzi. —Cana' una Jesús rëbinë' lëbë'.

⁵ Ba'ala'cazi nedyë'ëtzeque Jesús Lázaro len Marta len žilanë' María, ⁶ bilaoyotenë' caora benë' raca zhue' Lázaro. Bega'nnë' uzurë' ichopa dza gan' zuë'. ⁷ Guca lao chopa dza unë' rëbinë' yaca ben' quienë':

—Uletza' tzioro tatula estado Judea.

⁸ Na'ra una yaca ben' quie Jesús rëbiyaquë' lëbë':

—Maestro, ta zaracagazi gu'un yaca ben' quiaquë' luë' yo gan' nao' tzioro. Na' bizi luë', žre'lenlo' tzioro tatula?

⁹ Bizi una Jesús rëbinë' leyaquë':

—Nu'acazi chipchopa hora lao tu dza. Chi ra'o rdaro te dza, bicha'oro dan' rseni' xni' obidza. ¹⁰ Pero chi ra'o rdaro lao chula, decazide huacha'oro, dan' birseni' xni' obidza ilë'ëro.

¹¹ Te beyudyi una Jesús cana', na'ra unë' rëbinë' yaca ben' quië':

—Ben' amigo quiero Lázaro, barasinë', pero huaya'a usebia'në'.

¹² Na'ra una yaca ben' quienë' rëbiyaquë' lëbë':

—Señor, chi lëbë' rasizinë', hueyacanë'.

¹³ Pero unë' Jesús can' dan' baguti Lázaro, cala rasizinë'. Bizi raque yaca ben' quienë' de que rasizi Lázaro. ¹⁴ Na'ra una Jesús dyë'ëdi' rëbinë' leyaquë':

—Baguticazi Lázaro. ¹⁵ Redaohueda' dan' biuzua' na' ta ilë'ëda' cati guti Lázaro. Redaohueda' dan' cabë' guca quienë' nacan ta gacalën le'e ta galeralë quia' në'ëdi'. Pues na' uletza' tzioro gan' denë'.

¹⁶ Bizi Tomás, ben' uxubayaquë' laohue ben' guidi', unë' gudyinë' laguedyinë', ben' quie Jesús:

—Uletza' tziolëronë' ta gatilëronë' tzaže.

Naca Jesús ben' useban yaca ben' huati

¹⁷ Caora bdyin Jesús gan', bazio lao tapa dza babgachi'la Lázaro lu'u beló yo. ¹⁸ Yedyi Betania rega'n ga'ala' ga re' ciudad Jerusalén. Nacan chopa legua yugatzo. ¹⁹ Zë yaca ben' Israel uyoyaquë' gan' nita' Marta len María, reyuežeyaquë' leyaquë' dan' guti zanyaquë'.

²⁰ Bë' be Marta baza' Jesús, na' uyoguë' yelezanë' lëbë'. Pero María bega'nnë' žan yu'u quienë'. ²¹ Na'ra una Marta rëbinë' Jesús:

—Señor, chan' zucalo' lao' nëto' niga, beyaca Lázaro zanndo', bigutinë'. ²² Nezda' yugulu ta inabo' Diuzi, guncazinë'n luë'.

²³ Na'ra una Jesús rëbinë' lëbë':

—Bi' zanle huebannë' tatula.

²⁴ Na' bequëbi Marta rëbinë' Jesús:

—Banezda' hueban bi' zana' dza iyudyi lao yedyi layu, dza yeban yugulu yaca ben' baguti.

²⁵ Bi'zi una Jesús rëbinë' lëbë':

—Në'ëdi' naca' ben' useban yaca ben' huati, yeyu'ayaquë' yela' neban tatula. Con nu benë' gale quia', ba'ala'cazi gatiyaquë', huebanyaquë' tatula. ²⁶ Nia' luë' yaca ben' neban, yaca ben' rale quia', tuzioli bitziojë' lao gui' gabila. ¿Bagulelo' can' baonia'?

²⁷ Na'ra una Marta rëbinë' Jesús:

—Señor, raleda' quio' luë' naco' ben' Cristo, ži'i Diuzi. Luë' naco' ben' una Diuzi ise'ela'në' lao yedyi layu. —Cana' unë' rëbinë' Jesús.

Uredyi Jesús gan' pcachi'yaquë' Lázaro

²⁸ Ude beyudyi una Marta can', uzë'ë yeguëdyinë' ben' zilanë' María. Unë' di'idza' balanzi rëbinë' lëbë':

—Baza' Maestro, guëzinë' luë'.

²⁹ Ca be María ca una Marta, laoza'tenë' zionë' gan' zë Jesús. ³⁰ Binetzu'u Jesús la'o yedyi. Tu neza nenita'lënë' yaca ben' quië' ga bedilanë' Marta. ³¹ Yaca ben' bdyin žan yu'u, caora blë'ëyaquë' uzuli María uza'në' zionë' taria, lëscan' uži'rëyaquë' xnezayaquë' zioyaquë' naoyaquë' lëbë'. Guqueyaquë' chi zionë' cuedyinë' gan' pcachi'yaquë' Lázaro.

³² Bi'zi cati bdyin María gan' zë Jesús, uditzu žibinë' lao Jesús, unë' rëbinë' lëbë':

—Señor, chan' zucalo' lao' nëto' niga, beyaca Lázaro zanndo', bigutinë'.

³³ Bi'zi cati blë'ë Jesús rbedyi María len yaca ben' zio nao lëbë', rdëbinë' guca beyëchi' lu'u laxta'onë'. ³⁴ Na'ra una Jesús rëbinë' leyaquë':

—¿Ga mero pcachi'lenë'?

Na' bi'zi unayaquë':

—Señor, ya' ilë'ëlo'.

³⁵ Bi'zi na' uredyi Jesús. ³⁶ Na'ra una yaca ben' ziorë nao:

—Ulena', lega nedyë'ënë' lëbë'.

³⁷ Bi'zi bala yaca ben' ziolë leyaquë' unayaquë':

—Ben' niga bënë' ta belë'ë ben' birlë'ë, ¿cómo na' bibi bënë' ta iyaca Lázaro ta bigatinë'?

Ni rnën cabë' bë Jesús psebannë' Lázaro

³⁸ Bi'zi Jesús racatzeguenë' beyëchi' tatula. Na' ubiga'në' bago ru'a beló yo gan' pcachi'yaquë' Lázaro. Na' da' tu yo ze ru'a beló. ³⁹ Lena' una Jesús rëbinë' leyaquë':

—Ulecuba yo da' ru'a beló.

Bi'zi Marta, žan ben' huati, unë' rëbinë' Jesús:

—Señor, bazio lao tapa dza gutinë', barla'në' žigo.

⁴⁰ Na'ra una Jesús rëbinë' lëbë':

—¿Cala baonia' luë', chi ralelo' can' baonia', hualë'ëlo' hue Diuzi yela' huaca quienë'?

⁴¹ Caora na' udubayaquë' yo da' ru'a beló. Bi'zi na' una Jesús sibi ladza, blidzanë' Diuzi: —Xuza', diuxcalelo' dan' relo' cati nia' luë'. ⁴² Nezcazida' relo' cati rnia' luë'. Pero por nun quie yaca ben' nita' niga, lena' bë'lia' luë' di'idza' zaquë'lao laoyaquë' tacuenda uzë'nagayaquë' ineziyaquë' luë' use'elo' në'ëdi'.

⁴³ Ude beyudyi unë Jesús can', na' unë' zidzo unë':

—Lázaro, bero gan' delo' na'.

⁴⁴ Caora na' bero Lázaro gan' denë'. Nedubi la'ari' na'anë' len ni'anë'. Lëzi bdaco la'ari' laohuë'. Na'ra una Jesús rëbinë' leyaquë':

—Ulexëdyi la'ari' dubi na'anë' len ni'anë'. Ulesannë' yeyoguë'.

Bapsaqueyaquë' ca hueyaquë' guxuyaquë' Jesús

(Mt. 26.1-5; Mr. 14.1-2; Lc. 22.1-2)

⁴⁵ Yaca ben' ziolë María gan', blë'ëyaquë' cabë' bë Jesús besebannë' Lázaro. Lëcana' yaca ben' zë guleyaquë' quienë'. ⁴⁶ Bi'zi balayaquë' uyoyaquë' yetixogue'yaquë' yaca ben' partido fariseo cabë' bë Jesús. ⁴⁷ Na'ra yaca ben' partido fariseo len yaca xan' pxuzi bedupayaquë' bëyaquë' junta len yaca los demás ben' rnabë'. Na'ra unayaquë' rëbiyaquë' laguedyiyaquë':

—¿Ca bi'zi huero quie ben' na'? Lega ruenë' yela' huaca ta binelë'ëro. ⁴⁸ Chi hue'roguë' lato tanë' huenë' can', na' huanao yaca ben' zë lënë'. Bi'zi huadza' yaca ben' rnabë' quie ben' romano, huase'ela'yaquë' soldado udyiagu'yaquë' idao' rnabë'ra quien' lente ciudad quiero. —Cana' unayaquë' rëbiyaquë' laguedyiyaquë'.

⁴⁹ Bi'zi ben' naca xan' pxuzi lëiza na', ben' lao Caifás, unë' gudyinë' leyaquë':

—Le'e netondole ca di'idza' rnale. ⁵⁰ Nica nenezile nacaran dya'a quiero gati tuzi benë' lao laza yaca ben' yedyi, cala ca ta gati yuguluro. —Cana' una Caifás.

⁵¹ Dan' lëiza na' nacanë' xan' pxuzi unë' can'. Pero cala cuenta quienë' unë' can'. Biunezinë' unë' cuenta quie Diuzi cati unë' gati Jesús lao laza yaca ben' Israel. ⁵² Pero cala tuzi lao laza ben' Israel gati Jesús, lëscan' gati Jesús lao laza yugulu yaca ben' gale quienë', yaca ben' nedzatta nita' yaca yedyi tula. ⁵³ Lëdza na' psaque yaca ben' rnabë' quie ben' Israel ca hueyaquë' gutiyaquë' Jesús.

⁵⁴ Cana' guca bira uza Jesús zaquë'lao len yaca ben' Israel. Tana' uzë'ë estado Judea zioquë' yedyi lao Efraín ga nacan ga'ala' lao lato ga bidyia yu'u. Lëgan' na' bega'n'lënë' yaca ben' quië'.

⁵⁵ Baruen bago ta hueyaquë' lani ta reza'la'adyi'yaquë' quie xuzixta'oyaquë' caora broyaquë' nación Egipto. Tana' lena' yaca ben' zë, yaca ben' yedyi, uza'yaquë' zioyaquë' ciudad Jerusalén ta yeyëriyaquë' cuinyaquë' lao Diuzi según costumbre quieyaquë'. ⁵⁶ Na'ra yaca ben' na' rdayaquë' reguiloyaquë' Jesús. Caora rioyaquë' lu'u idao' rnabë'ra, na' unayaquë' rëbiyaquë' laguedyiaquë':

—¿Biži raquële? ¿Huida Jesús lani, o chi biguidanë'?

⁵⁷ Cana' guca bë yaca ben' partido fariseo len yaca xan' pxuzi mandado gudyyiaquë' benë' con nu yaca ben' ilë'ë Jesús laquixogue'teyaquë' leyaquë' tacuenda guxuyaquë' lëbë' hueyaquë' lëbë' preso.

12

*Tu nigula blëpinë' aceite rla' zixi zeo ni'a Jesús
(Mt. 26.6-13; Mr. 14.3-9)*

¹ Zaidyinla lao xopa dza ga'ala' lani cati reza'la'adyi'yaquë' quie xuzixta'oyaquë'. Caora na' uza' Jesús uyoguë' yedyi Betania gan' zu Lázaro, ben' baguti, pero beseban Jesús lëbë'. ² Lëgan' na' psiña'ayaquë' yela' huao ta gapayaquë' Jesús bala'ana. Caora na' bë Marta laze ta udaoyaquë', na' udaorë Lázaro tuže len leyaquë'. ³ Na'ra uzi' María gatzo litro aceite rla' zixi zeo ta rbioyaquë' yo lao nardo. Lëaceite na' bibi nequixin, zaca'n za'ala' gula. Biži na' blëpinë'n ni'a Jesús, na' uzi'në' guitchonë' bla'onë'n aceite la'o ni'a Jesús. Cana' bedu lu'u yu'u ure' be zeo gula. ⁴ Na'ra una tu ben' quie Jesús laonë' Judas Iscariote. Lëbë' naquë' ži'i tu ben' lao Simón. Na' ba'ala'cazi naquë' ben' quie Jesús, lëlëbë' usedyinnë' Jesús lao na'a yaca ben' guti lëbë'. Na' una Judas rëbinë' leyaquë':

⁵ —¿Bixquien' bibëti'guë' aceite rla' zixi zeo, dan' zaca'n tzona gayuhua dumi denario tacuenda si'në' dumi quien hue'në'n yaca ben' yëchi'?

⁶ Cana' una Judas, pero bireyëchi'la'adyi'në' quie yaca ben' yëchi'. Rdëbinë' quie dumi, dan' naquë' ben' uban. Rapanë' bolsa yu'u dumi tacuenda saque' cuannë' dumi yu'u lu'u bolsa na'. ⁷ Na'ra una Jesús rëbinë' Judas:

—Psan quienë'. Pues baodyialaonë' bënë' quie dza gatia' igacha'. ⁸ Nita'cazi ben' yëchi' lao yedyi layu yugu dza, pero në'ëdi', itu chopa dzazi zulia' le'e.

Gar saqueyaquë' ta gutirëyaquë' Lázaro

⁹ Yaca ben' zë, yaca ben' Israel, caora uneziyaquë' bazu Jesús yedyi Betania, uza'yaquë' uyoyaquë' gan' zunë'. Uyoyaquë' yena'yaquë' lëbë' len Lázaro, ben' baguti, pero beseban Jesús lëbë'. ¹⁰ Na'ra yaca ben' xan' pxuzi bapsaqueyaquë' bi hueyaquë' ta gutirëyaquë' Lázaro. ¹¹ Cana' psaqueyaquë', dan' barale zë yaca ben' Israel quie Jesús por nun quie dan' psebannë' Lázaro. Cana' bira bë yaca ben' yedyi na' tzaže len yaca ben' rnabë' quieyaquë', pero guleyaquë' quie Jesús.

*Beyo Jesús tatula la'o ciudad Jerusalén
(Mt. 21.1-11; Mr. 11.1-11; Lc. 19.28-40)*

¹² Yaca ben' zë gula uyoyaquë' ciudad Jerusalén ga raca lani ta reza'la'adyi'yaquë' quie xuzixta'oyaquë'. Biži bezu dza tula uneziyaquë' huadyin Jesús lani ciudad Jerusalén. ¹³ Caora na' uchugoyaquë' la'aga' palma ta bi'ayaquë' yelezayaquë' Jesús tu neza. Caora bedilayaquë' lëbë' unëyaquë' zidzo:

—Ben' že gula naca Diuzi. Naca la'iya ben' uza' lao xa'nro Diuzi. Naca la'iya rey quiero, ben' Israel.

¹⁴ Na'ra zë tu burra gan' zioquë'. Na' udyia Jesús lëba' con ca rguixogue'n lë'ë guichi la'iya quie Diuzi cani:

¹⁵ Le'e ben' yedyi Sión, biidzebile.

Ulena' baza' Rey quiele, bdyianë' tu burro.

¹⁶ Dza na'la biuyoñe'e yaca ben' quie Jesús con ca rnën lë'ë guichi la'iya quie Diuzi. Pero ude beyudyi gutinë' bebannë' zeyonë' guibá, cana'ra beza'la'adyi'yaquë' con ca rna lë'ë guichi. Bezaqueyaquë' guca quie Jesús tali con ca rnën lë'ë guichi na'.

¹⁷ Yaca benë' nita' gan' zë Jesús caora gužinë' Lázaro yeronë' lu'u beló yo besebannë' lëbë', lëyaca ben' na', udixogue'yaquë' ca naca blë'ëyaquë' bi bë Jesús. ¹⁸ Tana' lena' uza' yaca benë'

yedzagayaquë' Jesús tu neza, dan' babeyaquë' ca naca yela' huaca babënë'. ¹⁹ Biži yaca ben' partido fariseo unayaquë' rëbiyaquë' lagueydiyaquë':

—Bablë'ëro bira bide huero. Ulena'cara lao yugulute benë' zioyaquë' banaoyaquë' lëbë'.

Bala ben' griego beguiloyaquë' Jesús

²⁰ Lado yaca ben' nita' lao lani ciudad Jerusalén, nita'rë bala ben' griego. ²¹ Layaquë' ubiga'yaquë' bago ga zë Felipe, ben' yedyi Betsaida quie estado Galilea, na' unayaquë' rëbiyaquë' lëbë':

—Señor, re'enndo' tzeyubindo' Jesús.

²² Na'ra uyo Felipe gan' zë Andrés gudyinë' lëbë' cabë' una yaca ben' griego. Biži na' zio rupayaquë' yetixogue'yaquë' Jesús. ²³ Na'ra una Jesús rëbinë' leyaquë':

—Bagazi idyin hora quia' në'ëdi', bichi yugulu benë', huatia' yebana', yeya'a guibá tatula ga uza'a. ²⁴ Tali ca rnia' le'e na'a quie bini trigo. Nacacazi tuzin chi bitzu'un lu'u yu gu'udzon. Pero chi bini razaro yeyu'udzon lu'u yu, hualë laxta'ona ta yeyunan bini zë gula. ²⁵ Cana' nacarë quie yaca benë'. Chi nu ben' bire'en inao në'ëdi' dan' ruen žudyi initi yela' neban quienë', bibi yela' neban gata' quienë' tuzioli. Pero chi nu ben' inao në'ëdi' ba'ala'cazi ruen žudyi initi yela' neban quienë', lëben' na' decazi yela' neban quienë' tuzioli. ²⁶ Chi nu ben' re'en guida gaca ben' quia', reya'ala' guidayaquë' inaoyaquë' në'ëdi'. Con gatezi tzezua', lëzi gan' na' huazurëlyayaquë' në'ëdi'. Nu yaca ben' gaca ben' quia', huapala'n Xuza' leyaquë'.

Rna Jesús baruen bago gatinë'

²⁷ Baraca yëchi' lu'lu laxta'ohua'. ¿Cabizi inia' yëpa' Xuza'? ¿Inia' yëpa'në': "Ute uselao' në'ëdi' can' gaca quia' gatia'?" Bigacacazi yëpa' Xuza' can', porque nun quie lena' use'ela'në' në'ëdi' lao yedyi layu. ²⁸ Xuza', ulu'elo' yaca benë' ca naca yela' huaca quio'. —Cana' una Jesús rëbinë' Xuzinë'.

Biži beyaquë' de guibáte za' xchi' Diuzi unë':

—Bablu'ecaza' yaca benë' yela' huaca quia'. Tatula hua' yela' huaca quia' ta llë'ëyaquë'.

²⁹ Biži yaca ben' ržënaga nita'yaquë' gan' zë Jesús, caora beyaquë' xchi' Diuzi unayaquë':

—Unë tu huiziu'.

Ibalayaquë' unayaquë':

—Tu ángel bë'lënë lëbë' di'idza'.

³⁰ Na'ra una Jesús rëbinë' leyaquë':

—Tahuen na' bë Diuzi quiele unë' bele xchi'në'. ³¹ Babbyincazi hora na'a ulu'e Diuzi ca tamala rue yaca benë'. Biži lëcana' udyiagui' Diuzi dyin quie xan' taxi'ibi'. Lëlena r nabë'na yaca benë' nita' lao yedyi layu niga. ³² Te yeyudyi uda' yaca benë' në'ëdi' lë'e yaga cruzo gatia', caora na' hueyëža' lao yugulute yaca benë' ta gacayaquë' ben' yena' në'ëdi'.

³³ Una Jesús can' tacuenda inezi yaca benë' cabë' gaca gatinë'. ³⁴ Na' biži una yaca benë' rëbinë' lëbë':

—Babendo' ca rna yaca ben' rulaba guichi yu'lu ley de que ben' Cristo nebancazinë' tuzioli. Na'ra ¿cómo luë' rnao' ben' naca bichi yugulu benë' gatinë' lë'e yaga cruzo? ¿Ca nužila ben' naca bichi yugulu benë'?

³⁵ Na'ra una Jesús rëbinë' leyaquë':

—Në'ëdi' naca' ca quie tu gui' rsenin' ga naca chula. Nezulia' le'e itu chopá dzazi. Reya'ala' huele bala ca rnia' le'e na'a nezua' ni len le'e cuenda biquixile. Nu ben' rda lao lato lao chula, binezinë' ga tzioguë' huaquixinë' xnezë'. ³⁶ Reya'ala' galele quia' naca' ca quie tu gui' rsenin' ga naca chula na'a nezua' ni len le'e tacuenda gacale ben' quia', ben' rda lao lato lao xni'.

Ude beyudyi una Jesús can', zioquë' pcachi'laonë', bira blë'ëjë' gala zionë'.

Bigule yaca ben' Israel quie Jesús

³⁷ Ba'ala'cazi bë Jesús zë yela' huaca zaquë'lao yaca benë' Israel, bigulecaziyaquë' quienë'. ³⁸ Guca can' dan' decazide uzun di'idza' ca bzu Isaías lë'ë guichi dza na'la. Lë'ë guichi na' rnën cani:

Señor, ¿nuži gale ca naca di'idza' la'iya quio' rguixogui'a benë'.

¿Nuži blu'elo' ca naca yela' huaca quio'?

Cana' una Isaías dza na'.

³⁹ Cana' bigu'unayaquë' galeyaquë' quie Jesús. Lëscan' bzu Isaías di'idza' lë'ë guichi rnën cani:

⁴⁰ Yela' yeladyi' quieyaquë' bë Diuzi leyaquë' ca quie ben' laochula, bënë' zidi lu'lu laxta'oyaquë',

cuenda ba'ala'cazi rië'ëyaquë', gaca quieyaquë' ca ben' birlë'ë, lëscan' cuenda ba'ala'cazi tzu'u di'idza' lu'lu guichoyaquë', gaca quieyaquë' ca ben' birioñe'e.

Cana' biinaoayaquë' xneza Diuzi ta yeyëri laxta'oyaquë'.

⁴¹ Cana' una Isaiás dza na' dan' unezinë' naca Jesús ben' rue yela' huaca quie Diuzi. Quie lena' unënë' quienë'.

⁴² Pero gulecazi zë yaca ben' Israel, lente yaca ben' r nabë' quiejë' guleyaquë' quie Jesús. Pero biblu'eyaquë'n zaquë'lao chi raleyauquë', dan' rdzebiyaquë' yaca ben' partido fariseo chi yebioyaquë' leyaquë' lu'u yaca idao' sinagoga. ⁴³ Lena' rlu'en raxerayaquë' ca bala'ana hue yaca benë' len leyaquë', quele ca bala'ana hue Diuzi len leyaquë'.

Una Jesús cabë' gaca quie yaca benë' dza gaca juicio

⁴⁴ Biži unë Jesús zidzo rëbinë' leyaquë':

—Con nu yaca ben' rue quie di'idza' quia', lëscan' ruerë quieyaquë' di'idza' quie Xuza', ben' use'ela' në'ëdi'. ⁴⁵ Con nu yaca ben' nuebë' në'ëdi', lëscan' nuebë'rëyaquë' ben' use'ela' në'ëdi'. ⁴⁶ Në'ëdi' naca' ca quie tu gui' rsenin' ga naca chula. Nu yaca ben' gale quia', bitayaquë' lao lato lao chula. Tana' lena' bida' lao yedyi layu. ⁴⁷ Pero chi nu yaca benë' babe di'idza' can' baonia', na' birue quieyaquen, cala në'ëdi' ichugobi'a quieyaquë'. Bida' lao yedyi layu ta ute usela' yaca benë', cala ta ichugobi'a quieyaquë'. ⁴⁸ Nu ben' yesebi' në'ëdi', ben' birue quie ca naca di'idza' baonia', decazide zu ben' ichugobë' gaca juicio quieyaquë'. Ta bibëyaquë' bala ca naca di'idza' baonia', lëlena' ichugobë'n quieyaquë' dza yeyudyi lao yedyi layu. ⁴⁹ Cabë' në'ëdi', quele ta racazi la'adya' rnia'. Rnia' ca una Xuza', ben' use'ela' në'ëdi'. Lëlebë' unanë' në'ëdi' ca bi di'idza' inia' usëdia' yaca benë'. ⁵⁰ Banezda' bë Xuza' mandado ta gata' yela' neban tuzioli quie yaca ben' gale quia'. Pues con can' rnia', rnia' ca una Xuza' në'ëdi'.

13

Udibi Jesús ni'a yaca ben' quienë'

¹ Raca falta dza ga'ala' lani pascua ta reza'la'adyi'yaquë' ca guca quie xuzixta'oyaquë'. Caora na' gucabë' Jesús abdyin hora gatinë' yeyoguë' guibá ga zu Xuzë'. Pues nedyë'ëcazi Jesús yaca ben' rale quienë', ben' nita' lao yedyi layu. Biyeyudyi yedu nedyë'ënë' leyaquë'.

²⁻⁴ Biži Judas Iscariote, ži'i Simón, uyu'unë' pensari quie xan' taxi'ibi' ta regulola'adyi'në' ca huenë' usedyinnë' Jesús lao na'a yaca ben' guti lëbë'. Biži Jesús dyë'ëdi' nezinë' uza'në' guibá ga zu Diuzi hueyoguë' ga zu Xuzinë' tatula. Nezirënë' pca'n Xuzinë' duze yela' r nabë' quienë' lao na'anë'.

Na' biži caora uyu'yaquë' huao rtze', uzulinë' ru'a mesa ga re'në', udubë' žabë' de laohue, uzi'në' tu toalla pquionë'n lë'ë si'në'. ⁵ Na'ra uzi'në' tu palangan udza'në'n nisa. Na' uzulaonë' rguibinë' ni'a yaca ben' quienë', besebidyinë'n conlë toalla pquionë' lë'ë si'në'.

⁶ Cati zionë' quibinë' ni'a Simón Pedro, na' una Pedro rëbinë' Jesús:

—Señor, žhuaguibo' ni'a?

⁷ Biži una Jesús rëbinë' lëbë':

—Cabë' na'a binetziõne'elo' cabë' hua' quio', pero terala, huayoñe'elo'.

⁸ Na'ra una Pedro rëbinë' lëbë':

—Bigacacazi quibo' ni'a në'ëdi'.

Biži Jesús unë' rëbinë' lëbë':

—Chi bigaca quiba' ni'alo', bira naco' tuze len në'ëdi'.

⁹ Biži Simón Pedro unë' rëbinë' Jesús:

—Señor, cala tuzi ni'a quibo', lëscan' quibo' na'a lente guichoga'.

¹⁰ Na'ra una Jesús rëbinë' Pedro:

—Nu ben' zagozo yao, birnaban tzequëzumë' yao luegozi. Ni'azinë' rquin tzërina, dan' banaquë' ben' yëri. Le'e banacale ben' yëri pero cala lao yugulule.

¹¹ Na' una Jesús: “Cala lao yugulule”, dan' nezinë' nu ben' usedyinnë' lëbë' lao na'a yaca ben' guti lëbë'.

¹² Ude beyudyi udibinë' ni'a yaca ben' quienë', beyaconë' žabë' de laohue, bebe'në' tatula ru'a mesa unë' rëbinë' leyaquë':

—¿Banezile cabë' babia' quiele? ¹³ Le'e nale në'ëdi': “Maestro”, lëscan' nale në'ëdi': “Señor.” Nacan tali quiele ca nale në'ëdi', dan' tali naca maestro, nacatia' Señor quiele. ¹⁴ Como në'ëdi', ben' naca maestro, ben' naca Señor quiele, baodiba' ni'ale le'e, na'ra le'e, reya'ala' quibirële ni'a tu itu lagueyile. ¹⁵ Bablu'ena' le'e cabë' reya'ala' huele quie lagueyile con can' babia' quiele. ¹⁶ Tali rnia' le'e, ni tu ben' naca mozo birnabë'në' como ca xa'nnë'. Lëzi ni tu ben' rio mandado quie ben' tula, birnabë'në' como ca ben' use'ela' lëbë'. ¹⁷ Chi baoyoñe'ele cabë' baonia' le'e, chi hue quielen, yedaohuele, na' sule gusto.

¹⁸ “Cala rnia' quie lao yugulutele. Në'ëdi' anezda' nu le'e aolioga' nacale ben' quia'. Pero decazide uzun di'idza' ca rnan lë'ë guichi la'iya quie Diuzi: “Con tu ben' gaolë në'ëdi', lëben' na' huenë' condre në'ëdi'.” ¹⁹ Desde na'a rnia' le'e ca ta za' gaca quia' cuenda galele quia'

nia' le'e nu naca' cati idyin dza gaca quia' can' baonia' le'e. ²⁰ Tali rnia' le'e, con nu yaca ben' chezila'adyi' quie ben' ise'ela', lëscan' rezila'adyi'rëyaquë' në'ëdi'. Na' con nu yaca ben' chezila'adyi' në'ëdi', rezila'adyi'rëyaquë' ben' use'ela' në'ëdi'.

Udixogue' Jesús usedyin Judas lëbë' lao na'a yaca ben' guti lëbë'
(Mt. 26.20-25; Mr. 14.17-21; Lc. 22.21-23)

²¹ Ude beyudyi una Jesús can', guca yëchi'në', lega ptëbin lu'u laxta'onë'. Na' claro gula unë' rëbinë' yaca ben' quienë':

—Tali rnia' le'e, zu tu ben' zu ladole ni, ben' usedyin në'ëdi' lao na'a yaca ben' guti në'ëdi'.

²² Na'ra uzulaoyaquë' rna'yaquë' lao laguedyiaquë'. Bineziaquë' nulayaquë' rnë Jesús quie can'. ²³ Uzu tu ben' quienë' ure'në' cuëta lë'ë Jesús ga udaoyaquë' rtze'. Lega nedye'ë Jesús lëbë'. ²⁴ Biži Simón Pedro bënë' seña lao ben' ure' cuëta lë'ë Jesús ta inabë' nužila quieyaquë' rnë Jesús. ²⁵ Cana' una ben' ure' cuëta lë'ë Jesús rëbinë' lëbë':

—¿Señor, nužila nëto' rnao' can'?

²⁶ Na'ra una Jesús rëbinë' leyaquë':

—Con nu ben' hua'a yëta xtila bdyia' lu'u plato niga, lëlëben' na' usedyinnë' në'ëdi' lao na'a yaca ben' guti në'ëdi'.

Caora na' uži'në' tu bicho yëta xtila ta bdyianë' lu'u plato bënë'n Judas Iscariote, ži'i Simón. ²⁷ Ca uži' Judas yëta xtila, cana' layu'ute bichi be quie xan' taxi'ibi' lu'u laxta'onë'. Caora na' una Jesús rëbinë' Judas:

—Ca ta raco' pensari huelo', bëtegan.

²⁸ Pero nitu yaca ben' raolënë' lao mesa biuyoñe'eyaquë' bixquien' gudyinë' Judas can'. ²⁹ Como Judas naca ladyina'anë' bolsa ga yu'u dumí, quie lena' guqueyaquë' re'en Jesús tzio Judas ta ga'onë' ta gaoyaquë' quie lani o chi ta ga'onë' ta hue'në' yaca ben' yëchi'. ³⁰ Ca beyudyi udao Judas yëta xtila ta bënë Jesús lënë', caora na' beza'në' baruen lao rtze'.

Ga rguixogue'n quie mandamiento cubi

³¹ Ude uza' Judas žiogüë', na' una Jesús rëbinë' yaca ben' quienë':

—Abdyin hora ulu'ena' le'e yela' huaca quia', në'ëdi' bichi yugulu benë'. Lëzi ulu'ena' le'e yela' huaca quie Xuza'. ³² Cabë' në'ëdi' bichi yugulu benë', ulu'ena' le'e yela' huaca quie Xuza', lëscan' ulu'erë Xuza' le'e yela' huaca quia' në'ëdi' ži'inë'. Baruen baba dzazi gaca cana'. ³³ Bicha', calara zidza zulía' le'e niga. Le'e huadale yeguilole në'ëdi'. Na'ra inia' le'e con can' bagudya' yaca los demás ben' Israel dza na': Con gan' yeya'a, bisaque' yeza'rële len në'ëdi'. ³⁴ Rnia' le'e tu mandamiento cubi: Idyë'ële tu itu laguedyile. Na'ra cabë' rua' në'ëdi', nedye'ëda' le'e, lëcana' huerele, idyë'ële tu itu laguedyile. ³⁵ Chi idyë'ële tu itu laguedyile, lëcana' huanezi yugulu benë' nacale ben' quia'.

Ga rguixogue' Jesús cabë' hue Pedro si'në' yë'
(Mt. 26.31-35; Mr. 14.27-31; Lc. 22.31-34)

³⁶ Biži Simón Pedro unanë' rëbinë' Jesús:

—Señor, ¿gaži yeyolo'?

Na'ra una Jesús rëbinë' lëbë':

—Gan' yeya'a bisaque' yeza'lo' na'a. Pero terala yeguidale gan' yeya'a.

³⁷ Na'ra una Pedro rëbinë' lëbë':

—Señor, ¿bixquien' bisaque' yeza'lia' luë' na'a? Zua' puesto gatia' lao lazo'.

³⁸ Biži Jesús unë' rëbinë' lëbë':

—¿Nacan tali zulo' puesto nao' gatio' lao laza'? Tali ca rnia' luë', zahuen bala binecuedyi biu, huanao' tzona lasa binubë'lo' në'ëdi'.

14

Una Jesús quie neza ta yeyoro guibá

¹ Nernë Jesús rëbinë' leyaquë':

—Bigapale cuidado. Rzudyi'ilële Diuzi, lëzirë reya'ala' sudyi'ilële në'ëdi'. ² Lu'u guibá ga zu Xuza', detzegue lato ga tzezule. Chi bide lato, inia' le'e bide lato. Lena' yeya'a guibá tzequia' dya'a ga tzezule. ³ Ude yeyudyi yeya'a guibá tzequia' dya'a ga tzezule, caora na' yeguida' tatula dežia' le'e cuenda sulële në'ëdi' lu'u guibá tuže. ⁴ Le'e banezile ga zio neza gan' yedyina'.

⁵ Na'ra una Tomás rëbinë' Jesús:

—Señor, binezindo' gan' yedyinlo', ¿cómo luë' nao' banezindo' gan' zio neza?

⁶ Na'ra una Jesús rëbinë' lëbë':

—Në'ëdi' naca' neza guibá, ben' rnë tali, ben' run yela' neban tuzioli. Tuza' në'ëdi' naca' ben' ulu'e yaca benë' yedyinyaquë' ga zu Diuzi. ⁷ Chi tali banubë'le në'ëdi', lëzi nubë'rële Xuza'. Desde na'a banubë'le Xuza', barlé'ëlenë'.

⁸ Na'ra una Felipe rëbinë' Jesús:

—Señor, ben lato ilë'endo' Xuziro Diuzi. Tana'zi inabando' luë'.

⁹ Quie lena' una Jesús rëbinë' lëbë':

—Felipe, zidza baoca zulia' le'e, ¿quele binubë'lo' në'ëdi'? Nu ben' bablë'ë në'ëdi', lëben' na' bablë'ërenë' Xuzi'. ¿Na' bixquien' nao' në'ëdi': "Ben lato ilë'endo' Xuziro Diuzi"? ¹⁰ ¿Binezile në'ëdi' zulëcaza' Xuzi', lëzi zulëcazinë' në'ëdi'? Ca naca di'idza' baonia' le'e nacan di'idza' ta una Xuzi' në'ëdi', cala di'idza' quia' cuinza'. Cala ta racazi la'adya' unia'. Naca Xuzi' ben' zulëcazi në'ëdi' tzaže. Rucacazinë' ca re'ennë' gaca. ¹¹ Galele zulëcaza' Xuzi', lëzi Xuzi' zulëcazinë' në'ëdi'. Chi biralele con can' baonia' le'e, galele quia' por nun quie ta bia' blë'ële. ¹² Tali ca rnia' le'e, con nu ben' rale quia', huerëyaquë' ca ta babia'. Lëzi huerayaquë' mazara ca ta babia', dan' yedyina' gan' zu Xuzi'. ¹³ Yugulu ta inabale lao Xuzi', uzëtole laohua' inabalen, na' në'ëdi' ži'inë', guna'n tacuenda ulu'ena' yela' huaca quie Xuzi'. ¹⁴ Con bitezi inabale uzëtole laohua', naguna'n.

Una Jesús ise'ela'në' Bichi Be quie Diuzi

¹⁵ Chi le'e nedyë'ële në'ëdi', ulehue quiele ca naca mandamiento baonia' le'e. ¹⁶ Në'ëdi' yëpa' Xuzi' ta ise'ela'në' itu ben' gacalë le'e. Lëbë' yeyuežela'adyi'në' le'e, huazulëcazinë' le'e tuzioli. Naquë' Bichi Be quie Diuzi, ben' uziño'e le'e ta naca tali. ¹⁷ Pero nu yaca ben' nita' lao yedyi layu, bichežila'adyi'yaquë' lëbë', nica nelë'ëyaquë' lëbë', nica huebë'yaquë' lëbë'. Pero le'e nubë'le lëbë', dan' zulëcazinë' le'e yu'unë' lu'u laxta'ole tuzioli. ¹⁸ Biuca'na' le'e cuinze. Hueguidacaza' tatula sulia' le'e. ¹⁹ İbaba dza ilë'ë yaca benë' nita' lao yedyi layu në'ëdi'. Pero le'e, hualë'ëcazile në'ëdi'. Huata' yela' neban quiele tuzioli, dan' nacale ben' quia' në'ëdi', ben' neban tuzioli. ²⁰ Dza gaca can' hualë'ële zulëcaza' Xuzi' tuže, lëscan' le'e lëlënë'ëdi', lëscan' në'ëdi' len le'e. ²¹ Nu ben' hue quie ca naca mandamiento baonia' le'e, lena' rlu'en quienë' tali nedyë'ënenë' në'ëdi'. Na'ra idyë'ërë Xuzi' nu ben' nedyë'ë në'ëdi'. Lëzi në'ëdi' nedyë'ëda' con nu ben' nedyë'ë në'ëdi', ulu'ena'yaquë' yela' huaca quia'.

²² Na'ra unë Judas, pero Judas tula, cala Judas Iscariote, rëbinë' Jesús:

—Señor, ¿bixquien' ulu'elo' në'to' yela' huaca quio', na' biulu'elo'n yaca ben' nita' lao yedyi layu?

²³ Biži una Jesús rëbinë' lëbë':

—Nu yaca ben' nedyë'ë në'ëdi', rue quieyaquë' xti'idza', nadyë'ë Xuzi' leyaquë'. Në'ëdilia' Xuzi' huazulëcazindo' leyaquë' tuže. ²⁴ Pero nu yaca ben' binedyë'ë në'ëdi', birue quieyaquë' xti'idza'. Ca naca di'idza' baonia' le'e, cala ta racazi la'adya' unia' le'e, di'idza' quia' nacan di'idza' una Xuzi', ben' use'ela' në'ëdi'.

²⁵ Tu neraca nezulia' le'e itu chi', rguixogue'na' le'e ca di'idza' baonia'. ²⁶ Cati bira zua' ni len le'e, huase'ela' Xuzi' Bichi Be quienë' lao laza' ta gacalënë' le'e huazela'adyi'në' le'e. Lëzi uziño'e'enë' le'e usa'la'adyi'në' le'e yugulute ca ta baonia' le'e.

²⁷ Baruen bago dza yeya'a pero huabëcha' chizi lu'u laxta'ole con ca re' chizi lu'u laxta'ohua'. Cana' dugalo cue'n chizi lu'u laxta'ole, quele ca rue yaca ben' nita' lao yedyi layu, quele dugalo cuëchjë' chizi lu'u laxta'ole. Lëlena' bidëbile, bidzebile. ²⁸ Babelë unia' le'e de que hueya'a guibá hueguida' tatula sulia' le'e. Chi tali nedyë'ële në'ëdi', huedaohuele yele di'idza' yedyina' ga zu Xuzi'. Nacara Xuzi' ben' že ca në'ëdi'. ²⁹ Desde na'ra rnia' le'e ta za' gaca quia' cuenda yeza'la'adyi'le cabë' unia' le'e galele quia' cati idyin dza gaca quia' can' baonia'.

³⁰ Birabi zë di'idza' hue'lia' le'e, dan' baza' xan' taxi'ibi'. Lëna r nabë'na yaca benë' nita' lao yedyi layu. Pero birnabë'na në'ëdi'. ³¹ Ruzucaza' di'idza' ca ta una Xuzi' në'ëdi' tacuenda inezi yaca benë' nita' lao yedyi layu de que nedyë'ëda' Xuzi'. Ulechasa gan' ni. Uletza' ga tula.

15

Una Jesús tu di'idza' quie luba bedzuli'

¹ Biži neru'elë Jesús leyaquë' di'idza' unë':

—Në'ëdi' naca' ca quie luba bedzuli'. Naca Xuzi' ca quie ben' rapa luba bedzuli'. ² Huachuguë' yaca taca' luba ta bidyia tazixi tzechu'unnë'n. Na' luba dyia bedzuli', uluba ucha'anë'n tacuenda cuiaran tazixi. ³ Le'e nacale ben' yëri lao Diuzi dan' rue quiele ca ta bapsëdia' le'e. ⁴ Ta reya'ala' huele busanle në'ëdi' nacalëcazile në'ëdi' tuže cabë' nacalëcaza' le'e tuže. Tu taca' luba bedzuli' bizun lë'ë luba quien, bisaque' cuian tazixi. Lëzi le'e, chi binacalëcazile në'ëdi' tuže, naca quiele ca quie luba bidyia tazixi.

⁵ Në'ëdi' naca' ca quie luba. Na' biži le'e nacale ca quie taca' luba. Chi nacalëcazile në'ëdi' tuže cabë' nacalëcaza' le'e tuže, naca quiele ca quie luba bedzuli' dyia tazixi. Chi binacalëcazile në'ëdi' tuže, bibi de huele. ⁶ Nu yaca ben' binacalë në'ëdi' tuže, gaca quienë'

ca quie taca' luba bidyia tazixi. Nacan ta chu'un yaca benë' tzala'la ta utupayaquë'n ibidyin uzeiyaquë'n.

⁷Chi nacalëcazile në'ëdi' tzaže, chi bigala'adyi'le ca ta bapsëdia' le'e, na' con bitezi inabale në'ëdi', guncaza'n le'e. ⁸Cati rue quiele di'idza' quie Xuza', cana' bala'ana nacale ca quie luba bedzuli' dyian tazixi. Lëcana' ulu'en talicazi nacale ben' quia'. ⁹Në'ëdi' nedyë'ëda' le'e ca nedyë'ë Xuza' në'ëdi'. Ulenao në'ëdi' con can' nedyë'ëda' le'e. ¹⁰Chi hue quiele cabë' baonia' le'e, cana' idyë'ëda' le'e cabë' nedyë'ë Xuza' në'ëdi', rua' cabë' unanë' në'ëdi'.

¹¹'Cabë' di'idza' baonia' le'e, nacan ta yedaohuele lële në'ëdi' su gusto lu'u laxta'ole. ¹²Ni rnia' le'e tu di'idza' belao: Re'enda' idyë'ële tu itu laguedyile con can' rua' nedyë'ëda' le'e. ¹³Chi baguti tu benë' lao laza amigo quienë' ta uselanë' lëbë', lëlena' ulu'en lega nedyë'ë ben' na' amigo quienë'. Ganura tu nedyë'ëra ben' amigo quienë' ca ben' na', ben' guti. ¹⁴Le'e nacacazile amigo quia' chi hue quiele di'idza' con can' baonia' le'e. ¹⁵Bira inia' le'e nacale ca quie mozo quia', porque binezi yaca mozo bi rue xa'nyaquë'. Inia' le'e nacale amigo quia', porque aonia' le'e ca ta una Xuza' në'ëdi', banezcazyile bi ruenë'. ¹⁶Cala le'e uliole në'ëdi', den' në'ëdi' ulioga' le'e ta tzirole huele dyin quie Diuzi si'le usocho ta de tuzioli. Cana', guncazi Xuza' yugulu ta inabale uzëtole laohua'. ¹⁷Na'ra tatula inia' le'e: Re'enda' idyë'ële tu itu laguedyile.

Yaca ben' nita' lao yedyi layu rudieyaquë' Jesús len yaca ben' quienë'

¹⁸'Chi rudie yaca ben' nita' lao yedyi layu le'e, bigala'adyi'le tanëro bdiyaquë' në'ëdi'. ¹⁹Chi le'e nacale tuzi len ben' nita' lao yedyi layu, gue'enaquë' le'e con ca gue'enaquë' yaca ben' quieyaquë'. Pero në'ëdi' ulioga' le'e ladoyaquë', quie lena' rudieyaquë' le'e, dan' bira nacale tuzi len leyaquë'. ²⁰Bigala'adyi'le con can' baonia' le'e: Ben' rue dyin lao xa'ne, binaquë' ben' ze ca xa'nnë'. Chi rudie yaca benë' në'ëdi', lëzi udieyaquë' le'e. Chi bë quieyaquë' con can' baonia' bagudya'yaquë', lëzirë hue quieyaquë' con can' inale yëbilyaquë'. ²¹Na' usacayaquë' le'e bizinaquezi, porque dan' nacale ben' quia', binubë'yaquë' ben' use'ela' në'ëdi'.

²²'Bibi dula' napayaquë' chi në'ëdi' bibida' bibë'lia'yaquë' di'idza'. Pero dan' bida', bë'lia'yaquë' di'idza', lëlena' birson gata' quieyaquë', naocazi dula' xquia quieyaquë' leyaquë'. ²³Nu yaca ben' rudie në'ëdi', lëscan' rudierëyaquë' Xuza'. ²⁴Bibi dula' napayaquë' chi në'ëdi' bibia' yela' huaca quia' ladoyaquë'. Pero bablë'ëcaziyaquë' ca ta bia'. Na' biži ba'ala'cazi bablë'ëyaquë' can' babia', rudiecaziyaquë' në'ëdi', lëscan' rudierëyaquë' Xuza'. ²⁵Pero racan can' ta uzun di'idza' con can' zu lë'ë guichi ley ga rnën: "Rudiecaziyaquë' në'ëdi', ba'ala'cazi bibi dula' quia' de."

²⁶'Caora guida ben' ise'ela' tanun quie Xuza', na' lëben' na' gacalënë' le'e huezela'adyi'në' le'e. Naca lëben' na' Bichi Be quie Xuza', ben' rnë puro di'idza' li. Huanënë' cule quia' në'ëdi'. ²⁷Lëzi le'e huanërële cule në'ëdi' dan' zulële në'ëdi' tzaže desde dza uzulaoro rdaro tuzi.

16

¹'Cabë' di'idza' rnia' le'e, biyeyatile dan' lëdi'idza' na' gacalën le'e ta inaole në'ëdi'. Yaca benë' rudie në'ëdi' ²huebioyaquë' le'e lu'u yaca idao' sinagoga. Huadyin dza gaqueyaquë' chi mandado quie Diuzi gutiyyaquë' le'e. ³Cana' hueyaquë' como dan' binubë'yaquë' Xuza', lëzi binubë'yaquë' në'ëdi'. ⁴Ca di'idza' ni rnia' le'e, nacan ta yeza'la'adyi'le con can' baonia' le'e caora baza' gaca quiele can' baonia'.

Ni rguixogue'n quie Bichi Be quie Diuzi

'Biunia' le'e dza' na' ca ta rnia' le'e na'a, como dan' nezulia' le'e dza na'. ⁵Pero baidyin hora yeya'a tzezulia' ben' use'ela' në'ëdi'. Na' ni tule biunabale në'ëdi' gan' yeya'a. ⁶Pero dan' rnia' le'e ni, lena' baraqueyëchi' lu'u laxta'ole. ⁷Pero rnia' le'e ta naca tali. Huaca huen quiele chi yeya'a, porque chi biyeya'a, biguida Bichi Be quie Diuzi ta sulënë' le'e gacalënë' le'e huezela'adyi'në' le'e. Chi yeya'a ga zu Xuza', huase'ela' Bichi Be quienë' ga zule. ⁸Cati guida lëbë' uzioñe'enë' yaca benë' nita' lao yedyi layu ta ineziyaquë' decazi dula' xquia quieyaquë', lëzi ta ineziyaquë' re'en Diuzi tzeri laxta'oyaquë', lëzirë ta ineziyaquë' huachugobë' Diuzi quieyaquë' con can' bëyaquë'. ⁹Dan' biraleyaquë' quia', lena' decazi dula' xquia quieyaquë'. ¹⁰Nun quie dan' yeya'a ga zu Xuza', lena' huanezi yaca ben' nita' lao yedyi layu re'en Diuzi tzeri laxta'oyaquë'. Na' biži le'e, itu chi'zi zulia' le'e. ¹¹Na'ra huanezi yaca benë' nita' lao yedyi layu hue Diuzi juicio quieyaquë' con cabë' baochugobë' Diuzi quie xan' taxi'ibi', ben' rna'bë' lao ben' nita' lao yedyi layu.

¹²'Tazë nede ta inia' le'e, pero le'e bitzioñe'elen na'a. ¹³Cati guida Bichi Be quie Diuzi, ben' rnë tali, lëbë' uzioñe'enë' le'e ta naca tabala quie Diuzi. Quele huananë' ta racazi la'adyi'në', den' tanun quie Diuzi inanë. Uzioñe'enë' le'e ca ta za' gaca dza zaza'ra. ¹⁴Huenë' në'ëdi' ben' zë'. Nezinë' cabë' di'idza' rnia', uzioñe'enë' le'e cabë' nacan. ¹⁵Yugute

ca rna Xuza' nacan ta inèria' le'e. Lena' rnia' nezi Bichi Be quie Diuzi cabè' di'idza' rnia', uzioñe'enè' le'e cabè' nacan.

Ni rmèn ca gaquyèchi' yaca ben' quie Jesús tu chi'zi, te na' huedaohueyaquè'

¹⁶ Bizi gaca tu chi'zi birlè'èle nē'èdi', te na' itu chi'zi yelè'èle nē'èdi' tatula.

¹⁷ Na'ra unè yaca ben' quie Jesús rēbiyaquè' lagueyiyaquè':

—¿Ca bizi naca di'idza' unè' ra'o? Unè' gaca tu chi'zi birlè'èroguè', te na' nē' itu chi'zi hualè'èroguè' tatula. Lèzi narè' gaca quienè' cana' dan' yeyonè' gan' zu Xuzinè'. ¹⁸ ¿Ca bizi naca di'idza' unè' caora unè': "Gaca tu chi'zi"? Birioñe'ero cabè' di'idza' unè' ra'o.

¹⁹ Bizi gucabè' Jesús biuyoñe'eyaquè' ca di'idza' gudyinè' leyaquè'. Tana' unè' rēbinè' leyaquè':

—Baonècaza' le'e gaca tu chi'zi birlè'èle nē'èdi', te na' itu chi'zi yelè'èle nē'èdi' tatula. ¿Lèdi'idza' na' biuyoñe'ele rnabale lagueyile? ²⁰ Tali ca rnia' le'e, huaqueyèchi'le huabedyile baidyin hora guti yaca benè' nē'èdi'. Na' bizi yaca benè' nita' lao yedyi layu, huedaohueyaquè' dan' gatia'. Pero ba'ala'cazi huaqueyèchi'le tu chi'zi, te na' huedaohuele bē' yelè'èle nē'èdi' tatula. ²¹ Tu nigula nu'a zi'ine, bē' idyin hora su bdao' quienè', redzagalaonè' ta su bdao' quienè'. Bi'zi caora baozu bdao' quienè', huala'adyi'nē' ca ta babeledzagalaonè', dan' lega redaohuetzeguenè' baozu zi'inè' byu. ²² Lēscana' nacarè quie le'e. Redzagalaole na'a, pero cati yeguida' dena'a le'e, lēcana' lega yedaohuele. Nitu nitu nunura uzu le'e bayèchi' tatula.

²³ Lēdza na' birabi inabale nē'èdi'. Tali ca rnia' le'e, guncazi Xuza' yugulu ca ta inabale lēnè' uzètole laohua'. ²⁴ Desde dza na' binuzètole laohua' bi ta rnabale Xuza'. Ulenaba con can' baonia' le'e. Cana' guncazi Xuza' le'e ca ta inabalenè' tacuenda gaca huen quiele sule dya'a.

Cristo, babènè' gan lao xan' taxi'ibi', ben' rnabè'na lao yedyi layu

²⁵ Di'idza' baonia' le'e nacan di'idza' canezi tzioñe'elen. Pero huadyin dza bira inia' le'e di'idza' canezi tzioñe'elen, huania' le'e di'idza' ta tzioñe'ele labezi inezile quie Xuza'. ²⁶⁻²⁷ Lēdza na' uzètole laohua' inabale Xuza' bi ta re'enle inabalenè'. Caora na' bira inaban inaba' Xuza' gunnè' bi ta re'enle. Nedyè'ècazi Xuza' le'e. Nedyè'ènè' le'e porque dan' nedyè'èle nē'èdi', ralele dan' nia' uza' ga zu Xuza'. ²⁸ Tali na' uza' ga zu Xuza' bida' lao yedyi layu. Pero na' abdyin hora hueza' lao yedyi layu, yeya'a ga zu Xuza' tatula.

²⁹ Caora na' una yaca ben' quienè' rēbiyaquè' lēbè':

—Na'ra rnèlo' di'idza' ta tzioñe'endo' labezi, quele di'idza' canezi tzioñe'endo'. ³⁰ Na'ra banezindo' luè' nezo' quie lao yugulute. Nica inabando' luè' banezo' bi ta inabando' luè'. Quie lena' banezindo' de que luè' naco' ben' uza' ga zu Diuzi.

³¹ Bi'zi una Jesús rēbinè' leyaquè':

—¿Na'ra banezile? ³² Bagazi idyin hora yedzatzale tziole quie uca'nle nē'èdi' tuza'. Pero bizucaza' tuza' dan' zucazi Xuza' len nē'èdi'. ³³ Ca di'idza' baonia' le'e nacan ta cuèchin chizi lu'u guicho laxta'ole, lēscan' ta sudyi'ilècazile nē'èdi'. Yedzagalaole lao yedyi layu niga, pero bidzebile como dan' babia' gan lao xan' taxi'ibi', ben' rnabè'na lao yedyi layu.

17

Jesús bē'lēnè' Xuzinè' di'idza' por yaca ben' quienè'

¹ Ude beyuydi una Jesús cana', pchisa laohuè' una'nè' zan guibá unè':

—Xuza', abdyin hora quia'. Huelo' nē'èdi' zi'ilo' ben' ze con ca rua' luè' ben' ze. ² Nē'èdi', zi'ilo', bapca'nlo' lao na'a yela' rnabè' quio' ta inabi'a lao yugulu benè'. Cana' hua'a yaca ben' pca'nlo' lao na'a yela' neban tuzioli. ³ Decazi yela' neban quieyaquè' tuzioli tanun quie dan' nubè'yaquè' luè' tuzo' naco' Diuzi. Lēzirè nubè'rèyaquè' nē'èdi', Jesucristo, ben' use'elo'.

⁴ Babia' luè' ben' ze lao yedyi layu niga. Babzua' di'idza' quio', babia' ca ta use'elo' nē'èdi' hua'. ⁵ Xuza', huelo' nē'èdi' ben' ze caora yeguida' tatula gan' zulo' cabè' bao' dza na', bao' nē'èdi' ben' ze tu binecuel' yedyi layu.

⁶ Ca yaca ben' uliolo' lado yaca ben' nita' lao yedyi layu, babzioñe'ena'yaquè' ca naco'. Nacayaquè' ben' quio'. Lēleyaquè' pca'nlo' lao na'a, baraleyaquè' di'idza' quio'. ⁷ Baneziyaquè' lao na'alo' za' yugulute ta pca'nlo' lao na'a. ⁸ Ca naca di'idza' pca'nlo' lao na'a, barue quieyaquè'n. Baneziyaquè' tali uza' ga zulo', baraleyaquè' de que luè' use'elo' nē'èdi'.

⁹ Rnaba' cule laolo' por yaca ben' pca'nlo' lao na'a, dan' nacayaquè' ben' quio'. Cala rnaba' por yaca ben' nita' lao yedyi layu. ¹⁰ Yugulu yaca ben' quia', nacarèyaquè' ben' quio'. Lēzirè yugulu yaca ben' quio', nacarèyaquè' ben' quia'. Lēleyaquè' rueyaquè' nē'èdi' ben' ze.

¹¹ Ca naca nē'èdi', bira sua' lao yedyi layu niga. Pero leyaquè' nezuyaquè' lao yedyi layu ni. Bi'zi nē'èdi' hueguida' gan' zulo'. Xuza', ben' la'iya naco', conlè yela' huaca quio'

gacalao' yaca ben' pca'nlo' lao na'a tacuenda gacayaquë' tuzi pensari cabë' nacalia' luë' tuzi pensari. ¹² Udapacha'a yaca ben' pca'nlo' lao na'a dza uzulia' leyaquë' lao yedyi layu niga. Conlë yela' huaca quio' pcuasa pcui'oga'yaquë', nituyaquë' biuniti. Tuzi ben' uniti unitinë' tacuenda uzun di'idza' ca rnan lë'ë guichi la'iya quio'.

¹³ Na'ra hueguida' gan' zulo'. Pero tu raca nezua' lao yedyi layu niga, rnia' luë' di'idza' tacuenda yedaohueyaquë' ca redaohueda'. ¹⁴ Bapca'na' di'idza' quio' lao na'ayaquë'. Rudie yaca ben' nita' lao yedyi layu leyaquë', dan' bizulëyaquë' leyaquë' tuzi. Nacayaquë' ca në'ëdi', bizulia' yaca ben' nita' lao yedyi layu tuzi. ¹⁵ Cala rnaba' ta cuiolo'yaquë' lao yedyi layu, rnaba' ta ucuasa ucu'olo'yaquë' ca ta re'en xan' taxi'ibi' huenan quieyaquë'. ¹⁶ Ca naca në'ëdi', bizulia' yaca ben' nita' lao yedyi layu tuzi, lëzi cana' nacarë quieyaquë', bizulëryaquë' yaca ben' nita' lao yedyi layu tuzi. ¹⁷ Udze'lo'yaquë' lao na'alo'. Uziõne'elo'yaquë' ca naca tabala quio'. Naca di'idza' quio' di'idza' li. ¹⁸ Como luë' baose'elo' në'ëdi' bida' lado yaca ben' nita' lao yedyi layu, lëzirë cana' në'ëdi' ise'ela'yaquë' lado yaca ben' nita' lao yedyi layu. ¹⁹ Por nun quieyaquë' babbdia' cuina' lao na'alo' cuenda udze'lo'yaquë' lao na'alo' ineziyaquë' ca naca tabala quio'.

²⁰ Cala por tuzi leyaquë' rnaba' cule, lëscan' rnaba' cule por yaca ben' zagalera quia' ga tzioyaquë' tzetixogue'yaquë' di'idza' quio'. ²¹ Rnaba' cule laolo' gacalao'yaquë' ta inita'yaquë' tuzi tzu'ulëyaquë' ra'o tzaže ca nacalao' në'ëdi', ca nacalia' luë'. Cana' re'enda' Xuza', re'enda' inita'yaquë' tuzi tacuenda inezi yaca ben' nita' lao yedyi layu de que luë' use'elo' në'ëdi'. ²² Baoyu'ulia' leyaquë' tuzi ca naca luë' zulao' në'ëdi' tuzi tacuenda tzu'uyaquë' tuzi pensari cabë' rue ra'o, yu'uro tuzi pensari. ²³ Tuzi nacalia' leyaquë', lëscan' tuzi naco' len në'ëdi'. Lëcana' gacarëyaquë' tuzi, inezi yaca ben' nita' lao yedyi layu de que luë' use'elo' në'ëdi', nedyë'ëlo'yaquë' cabë' nedyë'ëlo' në'ëdi'.

²⁴ Xuza', ca yaca ben' pca'nlo' lao na'a, re'enda' sulëyaquë' në'ëdi' gan' tzesua' tacuenda ilë'ëyaquë' yela' huaca quia' benlo' në'ëdi' nun quie nedyë'ëlo' në'ëdi' desde binecue'te lao yedyi layu. ²⁵ Xuza', ben' la'iya naco'. Ca naca yaca ben' nita' lao yedyi layu, binubë'yaquë' luë', pero në'ëdi' sí, nubë'da' luë'. Ca naca yaca ben' quia', ben' nita'lë në'ëdi' niga, baneziyaquë' luë' use'elo' në'ëdi'. ²⁶ Babzioñe'ena' leyaquë' ca naco'. Neruzioñe'era'yaquë' mazara ca naco' tacuenda idyë'ëyaquë' tu ituyaquë' ca nedyë'ëlo' në'ëdi', gacalëyaquë' në'ëdi' tuže.

18

Bdyin yaca benë' ta guxuyaquë' Jesús

(Mt. 26.47-56; Mr. 14.43-50; Lc. 22.47-53)

¹ Ude beyudyi unë Jesús cana', uza'në' ziolënë' yaca ben' quienë' tzala' yao Cedrón. Lëgan' na' dyiatzegue yaga gan' bega'nlënë' yaca ben' quienë'. ² Lëzi Judas, ben' usedyin lëbë' lao na'a yaca ben' guti lëbë', nubë'rënë' gan', dan' riozi rio Jesús lënë' yaca ben' quienë' gan'. ³ Cana' guca uyo Judas yexi'në' yaca soldado len yaca ben' naca xaga idao', yaca ben' use'ela' yaca xan' pxuzi, len yaca ben' partido fariseo. Nu'ayaquë' espada, nu'ayaquë' lámpara, nu'ayaquë' yëri yaga, bdyinyaquë' gan' zë Jesús. ⁴ Como Jesús nezinë' bin' gaca quienë', na'ra bronë' gan' nita'lënë' yaca ben' quienë', unë' rëbinë' yaca ben' bdyin guxu lëbë':

—¿Nuži ben' regulole?

⁵ Na'ra unayaquë' rëbiyaquë' lëbë':

—Reguilondo' Jesús, ben' yedyi Nazaret.

Bizi Jesús unë' rëbinë' leyaquë':

—Në'ëdi' ben' regulole.

Lëzi zërë Judas lënë' yaca ben' bdyin guxu Jesús. ⁶ Na' una Jesús rëbinë' leyaquë': "Në'ëdi' ben' regulole", na'tera guca bebiga'yaquë' guzu xcu'udzula, bgu'unayaquë' layu. ⁷ Bizi unë Jesús tatula rëbinë' leyaquë':

—¿Nuži ben' regulole?

Na'ra unayaquë' rëbiyaquë' lëbë':

—Reguilondo' Jesús, ben' yedyi Nazaret.

⁸ Bizi una Jesús rëbinë' leyaquë':

—Baonëcaza' le'e në'ëdi' ben' regulole. Chi regulole tuza' në'ëdi', ulesan yaca ben' niga yeyoyaquë'.

⁹ Una Jesús can' ta uzun di'idza' ca unë' rëbinë' Xuzinë' dza na': "Yaca ben' pca'nlo' lao na'a, nituyaquë' biuniti." ¹⁰ Cana' guca ulio Simón Pedro espada nu'anë' udinë'n uchuguë' naga yebë ben' lao Malco, ben' zulao xan' pxuzi. ¹¹ Bizi una Jesús rëbinë' Pedro:

—Bedze' espada quio' lu'u lidyin. ¿Cala binenezo' decazide yedzagalaohua' ca ta banu-gun Xuza' quia'?

Besedyinyaquë' Jesús lao pxuzi rnabë'ra
(Mt. 26.57-58; Mr. 14.53-54; Lc. 22.54)

¹² Na' bizi yaca soldado, len comandante quieyaquë', len yaca xaga idao', bëxuyaquë' Jesús pquioyaquë' lëbë' bëyaquë' lëbë' preso. ¹³ Na'ra uquië'yaquë' lëbë' zan yu'u quie Anás, ben' naca ben' gula quie Caifás. Lëiza na' naca Caifás pxuzi rnabë'ra. ¹⁴ LëCaifás naquë' ben' una dza na'la: "Nacalan huenla gati tuzi benë' lao laza yaca ben' yedyi, cala ca ta gati yuguluro." Cana' unë' dza na'la.

Una Pedro binaquë' ben' quie Jesús
(Mt. 26.69-70; Mr. 14.66-68; Lc. 22.55-57)

¹⁵ Na' Simón Pedro len itu ben' quie Jesús, unaoyaquë' yaca ben' nequië' Jesús. Biži lëben' quie Jesús nubë'në' ben' naca xan' pxuzi rnabë'ra, lena' uyu'ulënë' Jesús lali'a quie yu'u quie xan' pxuzi. ¹⁶ Biži Pedro bega'nnë' ru'a yu'u quie lali'a. Na'ra lëben' quie Jesús, ben' nubë' pxuzi rnabë'ra, broguë' ru'a yu'u, bë'lënë' nigula di'idza', nigula rapa ru'a yu'u, ta bdze'në' Pedro lu'u lali'a. ¹⁷ Na'ra una nigula na' rëbinë' Pedro:

—¿Cala nacarao' ben' quienë'?

Na'ra una Pedro rëbinë' nigula:

—Binaca' ben' quienë'.

¹⁸ Biži yaca ben' zulao xan' pxuzi len yaca xaga idao', ulëchiyaquë' gui' lali'a como dan' ruen zaga. Unita'yaquë' ru'a gui' ta yedze'eyaquë'. Lëzirë Pedro uzërënë' len leyaquë' tzaze ru'a gui'.

Ben' naca pxuzi rnabë'ra pquëpinë' Jesús
(Mt. 26.59-66; Mr. 14.55-64; Lc. 22.66-71)

¹⁹ Biži ben' naca pxuzi rnabë'ra, unabë' Jesús nu ben' naca yaca ben' quienë', lëzi unabë' bidan' rsëdinë' yaca benë'. ²⁰ Na'ra una Jesús rëbinë' lëbë':

—Biži në'ëdi' zaquë'lao yaca benë' unia' rusëdia'yaquë'. Lu'u idao' sinagoga, lëzi lu'u idao' rnabë'ra gan' regu'udi' yugulu ben' Israel, lëgan' na' rsëdia'yaquë'. Bipsëdia'yaquë' balarazi. ²¹ ¿Bixquien' rnabo' në'ëdi' bidan' rsëdia'? Unabacara yaca ben' babe cabë' baonia'. Leyaquë' huanayaquë' ca di'idza' unia'. Baneziyaquë' ca di'idza' gudya'yaquë'.

²² Ude beyudyi una Jesús can', biži udapa tu ben' xaga idao' ru'a Jesús, unë' rëbinë' lëbë':

—¿Bixquien' rëbo' pxuzi rnabë'ra cana'?

²³ Biži una Jesús rëbinë' lëbë':

—Chi birnia' di'idza' li, unacara bi di'idza' binacan di'idza' li. Pero chi rnia' di'idza' li, ¿bixquien' udapo' ru'a?

²⁴ Na'ra bë Anás mandado uquië'yaquë' Jesús anerioguë' lao Caifás, ben' nacarë pxuzi rnabë'ra.

Tatula una Pedro binaquë' ben' quie Jesús
(Mt. 26.71-75; Mr. 14.66-72; Lc. 22.58-62)

²⁵ Tu neraca quie Jesús can', biži Pedro nezënë' ru'a gui' ta yedze'enë'. Na'ra unaba yaca ben' nita' gan' zënë':

—¿Cala nacarao' luë' ben' quie Jesús?

Na' biži Pedro unë' rëbinë' leyaquë':

—Binaca' ben' quienë'.

²⁶ Na'ra unë' tu ben' zulao xan' pxuzi, ben' naca familia quie ben' uchugu Pedro nague, rëbinë' Pedro:

—¿Cala blë'ëda' luë' zë'lao Jesús gan' dyia yaga?

²⁷ Na'ra una Pedro rëbinë' leyaquë':

—Cala në'ëdi'.

Ca beyudyi unë' cana', laoredyite biu tu.

Psediyinyaquë' Jesús lao na'a Pilato
(Mt. 27.1-2, 11-14; Mr. 15.1-5; Lc. 23.1-5)

²⁸ Na'ra uquië'yaquë' Jesús lidyi Caifás zioyaquë' ga zu palacio ga re' gobierno quieyaquë', na' baza' reni'. Biži yaca ben' Israel, biuyu'uyaquë' lu'u palacio, dan' binaca ben' naca gobernador ben' Israel. Según naca costumbre quieyaquë', raqueyaquë' bineyëriyaquë' lao Diuzi chi tzu'uyaquë' lu'u lidyi ben' binaca ben' Israel. Nica gacazi gaoyaquë' quie lani pascua len ben' binaca ben' Israel. ²⁹ Tana' lena' bro Pilato lu'u palacio, zionë' ga nita' yaca benë', unë' rëbinë' leyaquë':

—¿Cabiži bë ben' niga, na' raolenë' xquia?

³⁰ Na'ra unayaquë' rëbiyaquë' lëbë':

—Chan' binaquë' ben' rue xquia, bidehua'ando'në' niga.

³¹ Na'ra una Pilato rëbinë' leyaquë':

—Ulequiè' ben' niga, ichugobè'le ca rna ley quiele le'e.

Na' bizi una yaca ben' Israel rèbiyaquè' Pilato:

—Binapando' derecho gutindo' yaca benè'.

³² Cana' bzun di'idza' ca unè Jesús gaca quienè' gatinè'. ³³ Na'ra Pilato beyu'unè' lu'u palacio guzinè' Jesús unè' rèbinè' lèbè':

—¿Naco' rey quie ben' Israel?

³⁴ Bizi una Jesús rèbinè' lèbè':

—¿Ta racazi quio' rnabo' nè'èdi', o chi ta relo' ca rna yaca benè'?

³⁵ Na'ra una Pilato rèbinè' lèbè':

—¿Bixquien' raquelo' nacaria' ben' Israel? Yaca ben' yedyi quio', len yaca xan' pxuzi, leyaquè' psedyinyaquè' luè' gan' ni. ¿Cabiži bao'?

³⁶ Bizi una Jesús rèbinè' lèbè':

—Naca' ben' rnabè', pero cala quie lao yedyi layu niga. Chan' naca' ben' rnabè' quie lao yedyi layu niga, huadila yaca ben' nao nè'èdi' len yaca ben' rudie nè'èdi' ta biusedyinyaquè' nè'èdi' lao na'a yaca ben' re'en guti nè'èdi'. Quie lena' rnia' binaca' ben' rnabè' quie lao yedyi layu niga.

³⁷ Na'ra una Pilato rèbinè' Jesús:

—¿Bi ca nao'? ¿Nacacazo' rey?

Biži Jesús unè' rèbinè' lèbè':

—Nacacaza' rey con can' baonao'. Para lena' bida' gologa' lao yedyi layu ta quixogui'a yaca benè' ta naca tabala. Nu yaca ben' nao tabala rzènagacaziyaquè' ca rnia'.

³⁸ Na'ra una Pilato rèbinè' lèbè':

—¿Ca bidan' naca tabala?

Apsaqueyaquè' ca gutiyaquè' Jesús

(Mt. 27.15-31; Mr. 15.6-20; Lc. 23.13-25)

Ude beyudyi pquèpi Pilato Jesús, bero Pilato tatula lu'u palacio zionè' ga nita' yaca ben' Israel unè' rèbinè' leyaquè':

—Nè'èdi' rnia' le'e, nitu xquia binehue ben' niga. ³⁹ Cabè' le'e, de tu costumbre quiele yebioga' tu ben' de lu'u dyiguiba ca ra'ala' lani pascua. ¿Biži ca nale? ¿Re'enle yebioga' ben' naca rey quiele?

⁴⁰ Na'ra uredyiyayaquè' unèyaquè' zidzo rèbiyaquè' Pilato:

—Biyebiolo' ben' na'. Bebio Barrabás.

Cana' unayaquè' rèbiyaquè' Pilato.

Na' bizi Barrabás naquè' tu ben' uban.

19

¹ Caora na' bè Pilato mandado udi yaca soldado Jesús guidi. ² Lèscan' bzu yaca soldado tu coron dyia yèchi' guicho Jesús, bgacoyaquè' lèbè' tu la'ari' zna chula, ³ uzèyaquè' zaquè'lao Jesús unayaquè' rèbiyaquè' lèbè':

—¡Viva rey quie yaca ben' Israel!

Caora na' udiyaquè' begoro xtalaonè'.

⁴ Na'ra bro Pilato tatula lu'u palacio unè' rèbinè' yaca ben' Israel:

—Ulena'cara, bequi'a ben' ni sènè' laole ta inezile bibi nitu xquia binehuenè'.

⁵ Biži ulioyaquè' Jesús lu'u palacio, nezu coron yèchi' guichonè', nenacorènè' la'ari' zna chula. Na'ra una Pilato rèbinè' leyaquè':

—Ulena'cara bazè ben' ni.

⁶ Ca blè'è yaca xan' pxuzi len yaca ben' xaga idao' Jesús, na'tera uredyiyayaquè' unèyaquè' zidzo:

—¡Uleda' ben' na' lè'è yaga cruzo! ¡Uleda' ben' na' lè'è yaga cruzo!

Biži unè Pilato rèbinè' leyaquè':

—Ulequiè'nè' le'e, uleda'nè' le'e lè'è yaga cruzo. Nè'èdi' nia' nitu xquia bibi nehuenè'.

⁷ Na'ra una yaca ben' Israel rèbiyaquè' Pilato:

—Nèto' de tu ley quiendo'. Según ca rna ley quiendo', reya'ala' gati ben' niga, dan' nè' naquè' ži'i Diuzi.

⁸ Ca be Pilato can' unayaquè', caora na' bdzebinè' mazara. ⁹ Beyu'u Pilato lu'u palacio tatula pquèpinè' Jesús:

—¿Gaži zao' luè'?

Pero Jesús uzènè' chizi, bibequèbinè'.

¹⁰ Na'ra una Pilato rèbinè' lèbè':

—¿Bixquien' birudyi'ilo' di'idza'? ¿Binezo' nè'èdi' de yela' rnabè' quia' hua' mandado uda'yaquè' luè' lè'è yaga cruzo, o chi usana' luè', hua' luè' libre?

¹¹ Biži una Jesús rëbinë' lëbë':

—Bibi yela' rñabë' quio' luë' de ta ichugubao' quia' chan' Diuzi chi bibënnë'n luë'. Tana' lena' nacara xquia quie ben' psedyin në'ëdi' laolo', cala ca luë'.

¹² Lëhora na' beguilola'adyi' Pilato ta usannë' Jesús, huenë' lëbë' libre. Pero biži yaca ben' Israel urediyi'yaquë' unayaquë' zidzo:

—Chi usanlo'në' huu'në' libre, binaco' amigo quie rey César, ben' rñabë'ra ra'o. Nu ben' ina naquë' rey, lëben' na' naquë' enemigo quie rey César.

¹³ Biži cati be Pilato bi una yaca benë', na' bënë' mandado bro Jesús lu'u palacio. Ude na' bebe' Pilato xlatonë' ga rchugobë'në' quie yaca benë'. Lëlugar na' nezi'laona di'idza' hebreo Gabata, ta inaro xti'idza'ro: Layu ga yu'u yo laga'. ¹⁴ Mero la'odza, dza iteyu ga'ala' lani pascua, una Pilato rëbinë' yaca ben' Israel:

—jNi bazë rey quiele!

¹⁵ Biži na' urediyi'yaquë' unëyaquë' zidzo:

—jGatigaranë', gatigaranë'! jUleda' ben' na' lë'ë yaga cruzo!

Na'ra una Pilato rëbinë' leyaquë':

—¿Bixquien' re'enle uda'ndo' rey quiele lë'ë yaga cruzo?

Pero biži yaca xan' pxuzi, unayaquë' rëbiyaquë' Pilato:

—Tuzi César naquë' rey quiero. Nunura ben' tula zu naca rey quiero.

¹⁶ Ude na' psedyin Pilato Jesús lao na'ayaquë' ta uda'yaquë' lëbë' lë'ë yaga cruzo, na' uquië'yaquë' lëbë'.

Ni ru'en di'idza' ca guca bda'yaquë' Jesús lë'ë yaga cruzo

(Mt. 27.32-44; Mr. 15.21-32; Lc. 23.26-43)

¹⁷ Lëcana' guca ziolëyaquë' Jesús banu'anë' tuzë' yaga cruzo, bdyinyaquë' gan' nezi'laona di'idza' hebreo Gólgota, ta inaro xti'idza'ro: Chita guicho ben' huati. ¹⁸ Lëgan' na' bda'yaquë' Jesús lë'ë yaga cruzo. Bda'yaquë' ichopa benë' tzala' huiio cuëta lë'ë Jesús. ¹⁹ Bë Pilato mandado bdyi'yaquë' letra guicho cruzo rnën cani: "Jesús, ben' yedyi Nazaret, ben' naca rey quie yaca ben' Israel." ²⁰ Na'ra yaca ben' zë, yaca ben' Israel blabayaquë' letra, dan' nacan ga'ala' ga re' ciudad Jerusalén. Lao tzona cue' di'idza' bdyi'yaquë' letra. Bdyi'yaquë' letra hebreo, len letra griego, len letra latín. ²¹ Tana' lena' una yaca ben' xan' pxuzi rëbiyaquë' Pilato:

—Biudyiale letra rnën "Ben' naca rey quie yaca ben' Israel." Mejorla udyiale letra inën "Ben' una naca' rey quie yaca ben' Israel."

²² Na'ra una Pilato rëbinë' leyaquë':

—Ca letra babdyia', yega'nnan cana'.

²³ Ude beyudyi uda' yaca soldado Jesús lë'ë yaga cruzo, uzi'yaquë' žabanë' bë'yaquë' laze lao tapayaquë'. Uzi'rëyaquë' capa quienë'. Nacan de tu dibazi, binacan de chopo yo'o. ²⁴ Dan' nacan de tu dibazi, lena' una yaca soldado:

—Bichezaron. Mejorla huero tu suerte ta ineziro nularo gaca quie len.

Cana' guca bzun di'idza' ca rnën lë'ë guichi quie Diuzi ga rnan: "Bë'yaquë' laze žaba', uzi'yaquë'n. Bëyaquë' suerte quien." Cana' bë yaca soldado.

²⁵ Bago ga zu cruzo ga da' Jesús, lëgan' na' zë žnë'ë, len žila žnë'ë, len María žgula Cleofas, lërë María Magdalena. ²⁶ Na'ra blë'ë Jesús zë žnë'ë bago len tu ben' quienë', ben' nedyë'ënë'. Na' nacan' unë' rëbinë' žnë'ë:

—Zna'a, na' zë ži'ilo'.

²⁷ Lëzirë unërënë' ben' quienë':

—Na' zë žna'lo'.

Cana' guca bequië' ben' quienë' žnë'ë žan yu'u quië'.

Ca guca cati guti Jesús

(Mt. 27.45-56; Mr. 15.33-41; Lc. 23.44-49)

²⁸ Biži banezi Jesús babzunë' yugulute di'idza' ca gu'un Xuzinë' Diuzi. Na'ra tacuenda zuran di'idza' ca rnën lë'ë guichi quie Diuzi, lena' unë':

—Barbilida'.

²⁹ Lëgan' na' zu tu yeso' yudzo vino banacan zi. Uzi'yaquë' tu ta naca yun' rzupi' vino, bzuyaquë'n lao yaga, bla'oyaquë'n vino banacan zi. Ude na' bzuyaquë'n ru'a Jesús. ³⁰ Biži caora bzuyaquë'n ru'a Jesús uzupinë'n, caora na' unë':

—Babeyudyite bzun di'idza'.

Ca beyudyi unë' cana', bzëta' guichonë' gutinë'.

Tu soldado udyibë' lanza ru'achu'u Jesús

³¹ Biži dza na' nacan dza iteyu ga'ala' lani pascua. Lena' bigu'un yaca ben' Israel yega'n benë' lë'ë yaga cruzo, dan' dza iteyu ga'ala' lani, nacan dza že quie lani. Tana' lena'

unabayaquë' tu curo lao Pilato chi bihuenë' mandado ta quitzu yaca soldado chita ni'a yaca ben' da' lë'ë yaga cruzo, na' yegubayaquë' leyaquë' gan' da'yaquë'. ³² Cana' uyo yaca soldado uditzuyaquë' chita ni'a yaca ben' uda' lë'ë yaga cruzo cuëta lë'ë Jesús. ³³ Ca bdyinyaquë' cuëta lë'ë Jesús, blë'ëyaquë' bagutinë'. Tana' lena' bira uditzuyaquë' chita ni'anë'.

³⁴ Pero tu soldado udyibinë' lanza ru'achu'u Jesús. Caora na' blato ren len nisa gan' udyibi soldado lanza. ³⁵ Në'ëdi', Juan, blë'ëda' can' bëyaquë' quienë'. Naca' testigo cabë' blë'ëda'. Nacan tabala cabë' rnia' quienë' tacuenda galele quienë' inaole xnezë'. ³⁶ Tana' lena' guca quienë' ta bzun di'idza' con ca rnan lë'ë guichi quie Diuzi gan' rnan: "Biquitzuyaquë' ni tu chita quienë'." ³⁷ Lë'zi zurë itu di'idza' lë'ë guichi la'iya quie Diuzi ga rnan: "Hualë'ë yaca ben' bdyibi lanza ru'achu'uhue lëbë'."

Ca guca cati pcachi'yaquë' Jesús

(Mt. 27.57-61; Mr. 15.42-47; Lc. 23.50-56)

³⁸ Ude beyudyi guca can', unaba tu ben' lao José, ben' yedyi Arimatea, chi bihue' Pilato lato ta yeyu'anë' cuerpo quie Jesús. Naca José ben' unao Jesús, pero negachi'zi, dan' rdzebinë' quie yaca ben' rnabë'. Na' bizi Pilato bë'në' lato uyo José ta beyu'anë' cuerpo quie Jesús. ³⁹ Lëzirë bdyin Nicodemo, ben' uyo rtze' yegue'lë Jesús di'idza' dza na'la. Bdyinnë' nu'ë galobechi kilo aceite mirra nequixin itu ta lao áloes ta rla'n zixi zeo. ⁴⁰ Caora na' bezi'yaquë' cuerpo quie Jesús, ptubiyaquë' lëbë' la'ari' ta la'o aceite rla' zixi zeo, según ca naca costumbre quie yaca ben' Israel rcachi'yaquë' ben' huati. ⁴¹ Bizi ga'ala' gan' bda'yaquë' Jesús lë'ë yaga cruzo, lëgan' na' de tu lao lato ga dyia yaca yaga. Bizi lao lato na', zu tu yo beló cubi ga nitu yaca ben' huati binecachi'yaquë' gan'. ⁴² Bizi lu'u beló cubi na', pcachi'yaquë' Jesús dan' zun ga'ala' baruen bago dza huezila'adyi'.

20

Ca guca cati beban Jesús

(Mt. 28.1-10; Mr. 16.1-8; Lc. 24.1-12)

¹ Bizi bala dza domingo nerna' chula, uzi' María Magdalena zionë' gan' zu beló yo gan' pcachi'yaquë' Jesús. Na'ra blë'ënë' bira da' yo laga' ta bda'yaquë' ru'a beló yo gan' pcachi'yaquë' Jesús. ² Caora na' taria za' María ga zua' në'ëdi', ben' Jesús nedyë'ë, zëlia' Simón Pedro, ta unë' në'to' unë':

—Babi'ayaquë' cuerpo quie Señor quiero. Bineziro ga yehua'ayaquë' lëbë'.

³ Na'ra uza'lia' Pedro ziondo' yena'ndo' gan' pcachi'yaquë' lëbë'. ⁴ Brondo' rupando' ziondo' tzaze. Bizi në'ëdi' udyialaora' bdyinneza' gan' ca Pedro. ⁵ Bizi byëchoga' blë'ëda' gan' re' la'ari' ptubiyaquë' lëbë', pero biuyu'a lu'u beló. ⁶ Bizi ca bla' Simón Pedro, uyu'unë' lu'u beló yo, blë'ërënë' re' la'ari' ptubiyaquë' lëbë' gan'. ⁷ Lëzirë blë'ërënë' re' squiela la'ari' bdze'yaquë' guichonë'. Blë'ënë' nedubin, bire'n tuzi len la'ari' ptubiyaquë' lëbë'. ⁸ Na'ra uyu'uria' në'ëdi' lu'u beló, blë'ëda' can' naca re' yaca la'ari', guleda' tabala beban Jesús. ⁹ Bizi binegalendo' ca rnan lë'ë guichi la'iya quie Diuzi gan' rnan de que ba'ala'cazi gati Jesús, huebancazinë'. ¹⁰ Na'ra bezi'ndo' zeyondo' zan yu'u quiendo'.

Ca guca ptilalao Jesús María Magdalena

(Mr. 16.9-11)

¹¹ Bizi bega'n María rbedyinë' zënë' ru'a beló yo. Du rbedyinë' bzëta' guichonë' rnë'ë lu'u beló. ¹² Na'ra blë'ënë' chopa ángel nacoyaquë' la'ari' bezëri. Re'yaquë' gan' uduxuyaquë' cuerpo quie Jesús, tunë' zaquë' xquichonë', ituë' zaquë' zni'anë'. ¹³ Na'ra una yaca ángel rëbiyaquë' María:

—Nigula, ¿bixquien' rbedyo'?

Na'ra bequëbinë' rëbinë' leyaquë':

—Dan' babi'ayaquë' Señor quiendo'. Binezindo' gan' yehua'ayaquë' lëbë'.

¹⁴ Tu beyudyizi unë' can', cati beyëchogüë' rnë'ë Jesús na' zë gan'. Pero bibezaquenë' chi Jesús na'. ¹⁵ Caora na' una Jesús rëbinë' lëbë':

—Nigula, ¿bixquien' rbedyo'? ¿Nuzi regulololo'?

Bizi María raquenë' chi ben' rapa gan' dyia yaca yaga. Na'ra unë' rëbinë' lëbë':

—Señor, chi luë' bi'alo' cuerpo, una në'ëdi' gan' yehua'alo'në' ta cuenda tza' tzezi'anë' yeyu'anë'.

¹⁶ Na'ra una Jesús rëbinë' lëbë':

—¡María!

Na' bizi lëbë', beyalë' unë' rëbinë' Jesús di'idza' hebreo:

—¡Raboni! —ta inaro xti'idza'ro: Maestro.

¹⁷ Na' una Jesús rëbinë' lëbë':

—Biuda'lo' nao' në'èdi', dan' bineya'a guibá gan' zu Xuza'. Ta re'enda' inia' luè', beyo gan' nita' yaca ben' bicha', ben' rnao në'èdi', yèbo'yaquè' në'èdi' hueya'a guibá ga zu Xuziro, ben' naca Diuzi quiero.

¹⁸ Biži María Magdalena uyonè' yetixogue'nè' yaca ben' quie Jesús de que bablè'ènè' Señor quiero. Unè' udixogue'nè' leyaquè' ca di'idza' gudyi Jesús lèbè'.

Ca guca cati ptilalao Jesús yaca ben' quienè'

(Mt. 28.16-20; Mr. 16.14-18; Lc. 24.36-49)

¹⁹ Lèdza na', dza domingo rtze', begu'udi' yaca ben' quie Jesús tu lu'u yu'u neyeyo, dan' rdzebiyaquè' quie yaca ben' rnabè'. Biži uyu'u Jesús yatilalaohuè' leyaquè' unè' rëbinè' leyaquè':

—Cue' chizi lu'u laxta'ole.

²⁰ Ude beyudyi unè' can', blu'enè' yaca ben' na' na'anè' len ru'achu'unnè'. Lega redaohueyaquè' blè'èyaquè' lèbè'. ²¹ Na'ra una Jesús tatula rëbinè' leyaquè':

—Cue' chizi lu'u laxta'ole. Cabè' baose'ela' Xuza' në'èdi' babzua' di'idza' quienè', lëcana' në'èdi' ise'ela' le'e ta uzule di'idza' quia'.

²² Na'ra blubè' laoyaquè', unè' rëbinè' leyaquè':

—Tzu'u lu'u laxta'ole Bichi Be quie Diuzi. ²³ Nu yaca ben' bē xquia yezi'zele quie, bira nao xquia quieyaquè' leyaquè' babežinan. Lëzirè nu yaca ben' biyezi'zele quie, naocazi xquia quieyaquè' leyaquè' bibežinan.

Ca guca cati blè'è Tomás beban Jesús

²⁴ Na' Tomás, nacarènè' ben' quie Jesús lao chipchopayaquè', naquè' ben' uxubayaquè' laohue ben' guidi', na' biuzunè' caora uyo Jesús tanëro yena'nè' yaca ben' quienè'. ²⁵ Lëlena' yaca ben' laguedyinè', yaca ben' quie Jesús, unayaquè' rëbiyaquè' lèbè':

—Bablè'èndo' Señor quiero.

Na'ra una Tomás rëbinè' leyaquè':

—Bigaleda' babebannè' chi biilè'èda' na'anè' gan' guca hue', na' uquia' žbia' gan' udiyaquè' hdido, lëscan' uquia' taca' ru'achu'unnè' gan' udyibiyaquè' lanza.

²⁶ Guca lao xuna dza, cati begu'udi' yaca ben' quie Jesús tu lu'u yu'u tatula. Na' zurè Tomás len leyaquè'. Ba'ala'cazi neyeyo ru'a yu'u, uyu'u Jesús lu'u yu'u yasènè' gatzo la'o gan' nita'yaquè'. Unè' rëbinè' leyaquè' tatula:

—Cue' chizi lu'u laxta'ole.

²⁷ Na'ra unè' rëbinè' Tomás:

—Una' lu'u taca', na' pqui žbelo' ni. Lëscan' bli na'alo', pqui taco' lu'u ru'achu'a. Bira gaco' ben' birale, pero gule babebana'.

²⁸ Na'ra una Tomás rëbinè' lèbè':

—Naco' Señor quia', naco' Diuzi quia'.

²⁹ Biži una Jesús rëbinè' lèbè':

—Tomás, dan' bablè'èlo' në'èdi', quie lena' bagulelo'. Yedaohuecazi yaca ben' rale quia', ba'ala'cazi binelè'èyaquè' në'èdi'.

Unè Juan bixquien' bzunè' di'idza' ni lè'è guichi

³⁰ Bëra Jesús yela' huaca tula lao yaca ben' quienè', pero birguixogue'n lè'è guichi ni yugulu yela' huaca bënë'. ³¹ Babzua' di'idza' ni lè'è guichi ta rguixogue'n ca bē Jesús tacuenda galele quienè' naquè' Cristo, ži'i Diuzi, na' gata' yela' neban tuzioli quiele.

21

Ca guca cati ptilalao Jesús lao gadyi yaca ben' quienè' tatula

¹ Ude beyudyi bē Jesús can', ptilalaohuè' tatula yaca ben' quienè' ru'a lagun Tiberias. Ni ru'en di'idza' ca bē Jesús ptilalaonè' yaca ben' quienè'. ² Lèdza na' uzè Simón Pedro tzaže len Tomás, ben' nexubayaquè' laohue ben' guidi', len Natanael, ben' yedyi Caná quie estado Galilea, len yaca ži'i Zebedeo, len ichopa yaca ben' quie Jesús. ³ Biži una Simón Pedro rëbinè' leyaquè':

—Huaya'a tzexia' bela.

Biži unayaquè' rëbiyaquè' lèbè':

—Lëzi nëto' huaza'rëndo' len luè'.

Na'ra uyu'u yaquè' lu'u barco zioyaquè' lao nisa. Bedu yela rdayaquè' lao nisa, pero nitu bela nunu uzëyaquè'. ⁴ Baza' tzeni' bdyin Jesús zënè' ru'a lagun. Pero biži yaca ben' quienè', re'yaquè' lu'u barco, bibezaqueyaquè' chi lèbè'. ⁵ Na'ra una Jesús rëbinè' leyaquè':

—Bicha', žbabële gan bela gaoro?

Biži unayaquè' rëbiyaquè' lèbè':

—Ni tuba' binehuendo' gan.

⁶ Na'ra una Jesús rëbinë' leyaquë':

—Uledze' du yëxo quiele zaquë' yebë gan' nita'le lu'u barco ta tzu'u bela.

Na'ra bëyaquë' cabë' una Jesús bdze'yaquë' du yëxo lu'u nisa. Caora na' bedza'ten uyu'un bela zë gula, bira uzueyaquë' yebioyaquë' du yëxo. ⁷ Biži una tu ben' quie Jesús, ben' Jesús nedyë'ë, rëbinë' Pedro:

—Señor quiero ben' na'.

Na'ra como dan' nelëcho žaba Pedro re'në' lu'u barco, ca benë' ca unia', labeyacatenë' žabë' laohue, uda'në' lu'u nisa ta yedyinnë' gan' zë Jesús. ⁸ Na'ra yaca los demás ben' bega'n lu'u barco, psa'yaquë' barco ta yedyinyaquë' layu bidyi. Tzegubayaquë' du yëxo nedza'ten bela como dan' nerdziogue itu gayuhua metrozi ta yedyinyaquë' layu bidyi. ⁹ Caora bedyinyaquë' layu bidyi, broyaquë' barco blë'ëyaquë' re' bao' gui' žuban tu bela. Lëzi derë yëta xtila gan'. ¹⁰ Na'ra una Jesús rëbinë' leyaquë':

—Uletzexi' tu chopa bela baozele bachi.

¹¹ Biži beyu'u Simón Pedro lu'u barco, tzegubanë' du yëxo gan' yu'u yaca bela. Nedza'ten tu gayuhua yugatzo tzona bela yela. Ba'ala'cazi bedza'ten bela, biurugon. ¹² Biži una Jesús rëbinë' leyaquë':

—Uleda gaole rzila.

Na'ra leyaquë' nituyaquë' bibeyažoyaquë' inabayaquë' nu naquë' dan' babezaque-yaquë' lëbë' naquë' Señor quiero. ¹³ Na'ra ubiga' Jesús gan' nita'yaquë', uži'në' yëta xtila len bela bë'në'n leyaquë'.

¹⁴ Cana' guca lao tzona lasa ptilalao Jesús yaca ben' quienë' ude beyudyi gutinë' bebannë'.

Jesús bë'lënë' Simón Pedro di'idza'

¹⁵ Ude beyudyi udaoyaquë' rzila, una Jesús rëbinë' Simón Pedro:

—Simón, ži'i Jonás, žnedyë'ëro' në'ëdi' ca nedyë'ëlo' nutezi ben' tula?

Na'ra una Pedro rëbinë' lëbë':

—Señor, luë' nezo' nedyë'ëda' luë'.

Biži una Jesús rëbinë' Pedro:

—Re'enda' uzioñe'elo' yaca ben' barale quia'. Nacayaquë' ca quie beco' ži'ila' quia'.

¹⁶ Na' taorupe una Jesús rëbinë' Pedro:

—Simón, ži'i Jonás, žnedyë'ëlo' në'ëdi'?

Na'ra una Pedro rëbinë' lëbë':

—Señor, luë' nezo' nedyë'ëcaza' luë'.

Biži una Jesús tatula rëbinë' Pedro:

—Re'enda' uzioñe'elo' yaca ben' barale quia'. Nacayaquë' ca quie beco' ži'ila' quia'.

¹⁷ Na' taoyune unaba Jesús Pedro rëbinë' lëbë':

—Simón, ži'i Jonás, žnedyë'ëcazo' në'ëdi'?

Biži Pedro bega'nnë' gucayëchi'në', dan' unaba Jesús lëbë' lao yuna lasa chi nedyë'ënë' lëbë'. Na'ra unë' rëbinë' Jesús:

—Señor, luë' banezo' yugulute, banezo' nedyë'ëcazida' luë'.

Na'ra una Jesús tatula rëbinë' Pedro:

—Re'enda' uzioñe'elo' yaca ben' barale quia'. Nacayaquë' ca quie beco' ži'ila' quia'. ¹⁸ Tali ca rnia' luë', cati guco' bi' ru'abe, cuinzo' gucolo' žabo' uyolo' con ga re'enlo', pero cati gaco' ben' gula, hualio' na'alo' tacuenda ugaco ben' tula luë' žabo' ta tzehua'ayaquë' luë' con ga bire'enlo' tziolo'.

¹⁹ Una Jesús can' tacuenda ineziro ca hue Pedro huenë' Diuzi ben' že hora gatinë'. Ude beyudyi unë' Jesús can', na' unë' rëbinë' Pedro:

—Unao në'ëdi'.

Ni rnan quie Juan, nedyë'ëtzegue Jesús lëbë'

²⁰ Ca beyëcho Pedro, blë'ënë' në'ëdi' za' naohua' leyaquë'. Nedyë'ëtzegue Jesús në'ëdi'. Na' uri'a cuëta lë'ë Jesús caora udaondo' rtze' dza na'. Caora na' unaba' rëpa'në': “Señor, žca nuzi usedyin luë' lao yaca ben' re'en guti luë'?” ²¹ Caora blë'ë Pedro në'ëdi', unë' rëbinë' Jesús:

—Señor, žcabiži gaca quie ben' niga?

²² Na'ra una Jesús rëbinë' Pedro:

—Chi re'enda' sura ben' niga židza hasta que bë' yeguida' tatula, žbižcuenda quio' luë' rnabo' në'ëdi'? Pero luë', unao në'ëdi'.

²³ Cana' guca bro di'idza' lado yaca ben' barale quie Jesús cabë' gaca quia' bigatia'. Pero cala cana' una Jesús, sino que unë': “Chi re'enda' sura ben' niga židza, hasta que bë' yeguida' tatula, žbižcuenda quio' luë' rnabo' në'ëdi'?” Cana' una Jesús rëbinë' Pedro.

²⁴ Në'ëdi', ben' quie Jesús, bzua' di'idza' ni lë'ë guichi. Blë'ëda' naca' testigo cabë' guca quie Jesús. Banezile nacan tali can' baonia'.

²⁵ Lëzi dera ta bë Jesús. Chan' uzuro lë'ë guichi yugulute ta bë Jesús, bigaque lao yedyi layu gata' libro ga ru'en di'idza' ta bë Jesús. Amén.

CA YELA' HUACA BĒ YACA APÓSTOL

Una Jesús huayu'u Bichi Be quie Diuzi lu'u laxta'o ja apóstol quiené'

¹ Estimado Teófilo, lè'è guichi bia' tanèro, rguixoguen' quie Jesús yugulu cabè' bènè' len yugulu cabè' psèdinè' yaca benè' desde dza uzulaonè' rusèdinè' benè' ² hasta dza beyèpinè' ladza. Pero zayeyèpinè' ladza, ulionè' lao chipchopa ben' quiené'. Caora na' lao na'a Bichi Be quie Diuzi unè' gudyinè' leyaquè' bi hueyaquè'. ³ Ude beyudyi agutinè' bebannè', caora na' zionè' ptilè' ja ben' quiené', uzulènè' leyaquè' lao chopa galo dza ta ineziyaquè' tabala bebannè'. Lèscan' unè' rëbinè' leyaquè' ca rna Diuzi rnabè'nè'.

⁴ Tu bineza'nè' guibá unè' gudyinè' leyaquè' ta biyeza'yaquè' ciudad Jerusalén. Na'ra unè' rëbinè' leyaquè':

—Nizi cuezale gaca quiele ca una Xuza' huenè' quiele ⁵ según cabè' agudya' le'e. Na' tali na' bè' Juan laole conlè nisa, pero netza'la ca hue Diuzi quiele, ise'elè' Bichi Be quiené' ta tzu'unè' laxta'ole ichopa tzona dza.

Cabè' guca beyèpi Jesús ladza zeyonè' guibá

⁶ Na'ra cati bdyin dza, bedupa ben' quie Jesús tatula bè'lèjè' lèbè' di'idza':
—¿Señor, rnabando' luè' chi babdyin hora huu' mandado yenabè'ro lao yedyi quiero tatula como unabè' xuzixta'oro dza na'te?

⁷ Na'ra bequèbi Jesús nè' rëbinè' leyaquè':

—Binacan quiele inezile bi hora, bi tiempo, hue Xuziro Diuzi bi re'ennè' huenè', porque tuzi Diuzi de yela' rnabè' quiené' bi re'ennè' huenè'. ⁸ Pero le'e, caora baoyu'u Bichi Be quie Diuzi lu'u guicho laxta'ole, cana' gata' quiele yela' huaca quie Diuzi. Te na' tzirole tzetixoguele yaca benè' len cabè' bia' cabè' unia'. Tanèro tzirole ciudad Jerusalén. Na' tziorele estado Judea len estado Samaria. Na'tera hasta duze yedyi layu tzirole.

⁹ Ude beyudyi unè' cana', tu nerna'yaquè' lèbè', beyèpi Jesús ladza, bdubi beo lèbè', bira blè'èyaquè' lèbè'. ¹⁰ Nerna'yaquè' ladza ga zio Jesús, caora labdyinte chopa ángel nacoyaquè' la'ari' bezèri. ¹¹ Na'ra unayaquè' rëbiyaquè' ben' quie Jesús:

—Ben' Galilea! ¿Bixquien' rebanle rna'le ladza gan' zeyo Jesús guibá? Rnando' le'e cabè' blè'èle beyèpinè' ladza zeyonè' guibá, cana' yeguidanè' lao yedyi layu tatula.

Uliojè' Matías bènè' apóstol lao laza Judas

¹² Na'ra uza'yaquè' ya'a Olivos bdyinyaquè' ciudad Jerusalén. Biži ya'a ga uza'yaquè' nacan ga'ala' para idyinjè' ciudad Jerusalén. Bigucan gatzo legua. ¹³ Na' cati bdyinyaquè' ciudad Jerusalén, bdyinyaquè' ga re' tu yu'u chopa xcuia, urèyaquè' ga nacan lao chopa xcuia na'. Entre leyaquè' laojè' Pedro, len Juan, len Santiago, len Andrés, len Felipe, len Tomás, len Bartolomé, len Mateo, len Santiago ži'i Alfeo, len Simón ben' partido cananista, len Judas ži'i Santiago. ¹⁴ Yugu dza bedupalèjè' María, žna' Jesús, len yaca ben' bichi Jesús, len yaca itu chopa nígula tacuenda hue'lèjè' Diuzi di'idza'.

¹⁵ Biži bdyin dza begu'adi' du tu gayuhua galo ben' rale quie Jesús. Na' gatzo lao' re' Pedro uzulinè' rëbinè' leyaquè':

¹⁶ —Bicha', zana', bisaque' te cana'zi di'idza' quie Diuzi. Re'en ca re'ena gaca quie Judas laga con ca una rey David lao na'a Bichi Be quie Diuzi, porque bè Judas tuze len yaca ben' bèxo Jesús, ben' bè lèbè' preso. ¹⁷ Lèscan' bè Judas ra'o tuze udixoguelèronè' yaca benè' xti'idza' Diuzi. ¹⁸ Beya'onè' tu cue' layu conlè dumi ta udizuyaquè' lèbè' quie tamala bènè'. Pero bdyin dza bgudyinè' yu utin guidi lè'ènè', na' brote xlonè' yaque'n layula. ¹⁹ Por lena' uxuba ben' Jerusalén lao layu quiené' Acéldama, ta inaro xti'idza'ro: Layu ga ulato ren. ²⁰ Porque rnèn lu'u libro Salmos cani:

Huadachi yu'u quiené', yega'nnan cana'zi.

Ganura dyila' su lu'u lidyinè'.

Lèzi cani rnèn:

Huazi' ben' tula dyin quiené'.

²¹ Na'ra nerna Pedro rëbinè' leyaquè':

—Ladoro niga zu yaca ben' uza'lè ra'o tuze caora uzulaoro udalèro Jesús ²² desde cati bè' Juan lao benè' hasta dza beyèpi Jesús ladza. Re'ennan cuioro ben' tula tacuenda gacarènè' testigo conlè ra'o de que nacan tabala babeban Jesús.

²³ Na'ra ulioyaquè' chopa be'mbyu. Tunè' laonè' José, ben' laorè Barsabás, lèscan' laorènè' Justo. ²⁴ Na' biži bè'lè yaca apóstol Diuzi di'idza' rëbiyaquè' lèbè':

—Xuzindo' Diuzi, luè' nezo' cabè' naca pensari quie quiendo'. Una nètò' nu ben' re'enlo' cuiondo' lao rupa yaca ben' nita'ja ni ²⁵ tacuenda sa'lènè' nètò' yega'nnè' lao laza Judas. Cabè' bè Judas, gucanè' ben' mala, zeyonè' ga reya'ala' zagacanè' castigo.

²⁶ Na'ra bëyaquë' sorteo lao rupayaquë'. Na' bizi Matías bënë' gan sorteo bënë' tuže lao ichiptu ja apóstol.

2

Cabë' bë Bichi Be quie Diuzi uyu'unë' lu'u laxta'o yaca ben' quie Jesús

¹ Na'ra guca dza lani quie usecho quie trigo laona lani quie pentecostés. Por lani na', bdupa yaca ben' quie Jesús tu lu'u yu'u. ² Bizi desde guibá ga zu Diuzi za' chi' ca tu be bedun' fuerte. Cati bdyinnan, uyu'un lu'u yu'u gan re'yaquë'. ³ Lëzi, tu ta ra'ala' ca gui' ptilalaonan leyaquë'. Nacan forma ca ludyi benë'. Na'ra bdyinnan bdzatzana ziona tu huiyoaqué' ga re'yaquë'. ⁴ Caora na' uyu'u Bichi Be quie Diuzi lu'u laxta'oyaquë' yugulujë'. Lena' uzulaoyaquë' rnëyaquë' di'idza' quie ben' tula. Yela' huaca quie Bichi Be quie Diuzi lagucateyaquë' di'idza' quie ben' yedyi tula.

⁵ Na'ra ciudad Jerusalén unita' zë ben' Israel, ben' reza'la'adyi' Diuzi. Zë yedyi bdzatzajë' bdyinyaquë' ciudad Jerusalén. ⁶ Bizi caora beyaquë' rnë ben' quie Jesús xti'idza' tu tujë', bega'nyaquë' rebanyaquë'. ⁷ Bizi yela' uban guca quieyaquë' unayaquë':

—Ben' rnë di'idza' niga, ¿quele ben' estado Galilea? ¿Cómo arnëyaquë' di'idza' quie tu turo? ⁸ ¿Cómo rero xti'idza'ro ga goloro? ⁹ Niga nita' ben' Partia, len ben' Media, len ben' Elam, len ben' Mesopotamia, len ben' Judea, len ben' Capadocia, len ben' Ponto, len ben' Asia, ¹⁰ len ben' Frigia, len ben' Panfilia, len ben' Egipto, len ben' Africa ga nebaba yedyi Cirene, ¹¹ len ben' Creta len ben' Arabia. Ben' Israel nacayaquë'. Uza'yaquë' yedyi quiejë' bdyinyaquë' ciudad Jerusalén. Lëzi niga rda yaca ben' Roma, ben' bida tu hueltazi. Balayaquë' nacayaquë' ben' Israel, ibalayaquë' ba'ala'cazi binacayaquë' ben' Israel, rnaoyaquë' costumbre quie ja ben' Israel. ¿Cómo, pues, rnë ben' estado Galilea di'idza' quie tu turo, rguixogue'yaquë' ra'o cabë' naca yela' huaca quie Diuzi?

¹² Bizi lega reban ja ben' za'ja yedyi tula, porque binezijë' bi raza quiejë'. Lena' nayaquë' rëbijë' laguedyiaquë':

—¿Bizi raza niga?

¹³ Na'ra ibalayaquë' ptitojë' yaca ben' quie Jesús rëbियाquë' laguedyijë':

—Azudyiaquë'.

Con cabë' una Pedro gudyinë' ja ben' nita'ja na'

¹⁴ Na'ra uzuli Pedro len ichiptu ja apóstol. Uzulaonë' rnë' zidzo rëbinë' yaca benë' nita' na':

—Uzëcara nagale, le'e ben' estado Judea len le'e ben' ciudad Jerusalén. Re'enda' inia' le'e tu chopa di'idza' nacan belao yele. ¹⁵ Bigacale pensari aozudyindo', porque nenacara baguin. ¹⁶ Cala aozudyindo', dechan' ruen quiendo' ca una profeta Joel dza na'te cati unë': ¹⁷ Dza baruen bago yedu yedyi layu, udze' Diuzi Bichi Be quienë' lu'u laxta'o benë'.

Por lena' quixogue' zi'iro cabë' naca di'idza' la'ya quie Diuzi.

Por lena' ulu'e Diuzi bi' ru'abe quiero tu ta binelu'enë' ra'o.

Por lena' hue Diuzi mandado ixusa ben' gula quiero, pero tu ta binexusayaquë'.

¹⁸ Lëzi zaidyinra dza, udze' Diuzi Bichi Be quienë' lu'u laxta'o nu ben' naca ben' quienë', chi be'mbyu, chi nigula.

Por lena' quixogue'jë' benë' xti'idza'në'.

¹⁹ Lëzi zan guibá ulu'e Diuzi tu ta yebanro ilë'ëron.

Pues huenë' seña quienë' lao yedyi layu como hualato ren, huayala gui' duže, huabe' dzen ca beola.

²⁰ Lëzi huechula obidza, ina' biu' znazi como ca ren.

Cana' gaca tu dza antes zaidyin dza hue Diuzi juicio.

Naca lëdza na' dza belao, gaca tu ta binelë'ëro.

²¹ Bizi yugulu ben' ulidza Diuzi, ben' rzëto laohuë', ute usela Diuzi leyaquë'.

²² Na'ra nernë Pedro rëbinë' leyaquë':

—Uzëcara nagale cabë' inia' le'e ben' Israel. Jesús, ben' yedyi Nazaret, bablu'e Diuzi lao le'e lega yaxenë' ca bënë' como dan' lao na'anë' bë Diuzi yela' huaca quienë' zaca'lao le'e. Dyë'di nezile cabë' guca quie Jesús. ²³ Pues segün ca pensari bë Diuzi huenë' dza na'te, napsedyinnë' Jesús lao na'ale. Na'ra le'e bële lëbë' preso, bda'lenë' lë'ë yaga cruzo bëtilenë', bële tuže conlë yaca ben' mala. ²⁴ Pero pseban Diuzi lëbë'. Tuzioli bira gatinë', porque bira saque' yela' guti huanan gan Jesús.

²⁵ Na'ra nernë Pedro rëbinë' leyaquë' con cabë' una rey David quie Jesús dza na'la:

Bablë'ëda' zu Diuzi rna' ruhuanë' në'ëdi' yugu dza.

Zuë' cuëta' zaquë' yebë rapanë' në'ëdi'.

Quie lena' birdzeba' bi tamala gaca quia'.

²⁶ Quie lena' zu gusto lu'u guichi laxta'ohua', redaohueda' ru'elia' Diuzi di'idza'.

²⁷ Quie lena' birdzeba' rbeza' dza useban Diuzi cuerpo quia', porque biusan Diuzi alma quia' yeyon gabila ga de yaca ben' huati.

Lëscan' bihue'në' lato itabo cuerpo quia' në'ëdi', ben' la'iya quienë'.

²⁸ Abzioñe'e Diuzi në'ëdi' cabë' naca xnezë'.

Nu ben' inao xnezë', huata' yela' neban quieyaquë' tuzioli.

Legazi redaohueda' dan' zulia' Diuzi tuže.

Na'ra nernë Pedro rëbinë' leyaquë':

²⁹ —Bicha', nacan tali aguti xuzixta'oro rey David dza na'la. Pues apcachi'yaquë' lëbë', nereza'la'adyi'ro ga de ba quienë'. ³⁰ Na'ra como guca rey David ben' profeta, ben' rguixogue' di'idza' quie Diuzi, quie lena' unezinë' bega'n'lë Diuzi lëbë' di'idza' de que gaca tu ži'i subanë' ben' naca Cristo, huatzeque'në' xlatonë' inabë'në'. Babgunte Diuzi cuinnë' gacan ca unë' gacan. ³¹ Lëscan' ca ben' bablë'ë una rey David useban Diuzi Cristo. Quie Cristo unë' caora unë' biusan Diuzi yeyo alma quienë' gui' gabila ga de ben' huati. Bihue'në' lato itabo cuerpo quienë'. ³² Nëto' yugulundo' nacando' testigo pseban Diuzi Jesús. ³³ Cana' ure'në' zaquë' yebë' cuëta Diuzi ga naca xlato ben' bala'ana. Lëscan' use'ela' Diuzi Bichi Be quienë' según di'idza' bega'n'lë Diuzi Jesús dza na'. Por lëbë' bablë'ële babele yela' huaca quie Diuzi. ³⁴ Na'ra quele rey David beyëpinë' ladza, sino que lëbë' unë' quie Jesús cati unë' cani:

Una Diuzi rëbinë' ben' naca Señor quia': "Ure' cuëta' zaquë' yebë niga,

³⁵ hasta idyin dza cuëcha' xni'alo' ja ben' rudie luë'."

Na'ra nernë Pedro rëbinë' leyaquë':

³⁶ —Reya'ala' inezi yugulu ben' Israel du la'adyi'yaquë' de que lëben' bda'yaquë' lë'ë yaga cruzo naquë' ben' bë Diuzi nombrar Señor quiero lëscan' Cristo quiero.

³⁷ Ude beyudyi bžënegayaquë' ca una Pedro, caora na' ben bayëchi' pensari quiejë' unabayaquë' rëbiyaquë' Pedro len los demás apóstoles:

—Bicha', žbiži ca huendo'?

³⁸ Na'ra una Pedro rëbinë' leyaquë':

—Uletza' pensari quiele, ulehue lato hue'ndo' laole quie quiele rzëtondo' lao Jesucristo tacuenda yezi'ze Diuzi dula' xquia quiele. Cana' udze'në' Bichi Be quienë' lu'u guicho laxta'ole con cabë' una Diuzi huenë' quiele dza na'te. ³⁹ Pero quele para le'ezi una Diuzi cana' dza na'te, lëscan' quie ja ži'ile zaza', lëscan' quie ja ben' binaca ben' Israel, para nutezi ben' cuio Diuzi gaca ben' gale quienë'.

⁴⁰ Cana' una Pedro bë'në' leyaquë' consejo rëbinë' leyaquë':

—Ulebiga' tzala'la bihuele tuže yaca ben' biržënaga quie Diuzi, ben' nebiagui'.

⁴¹ Pues na'ra žëyaquë' uyezila'adyi'jë' gulejë' ca una Pedro. Dza na', tu dzazi, gule ja tzona mila benë', bëjë' tuže len yaca apóstol. Na'ra bë' ja apóstol laoyaquë'. ⁴² Bipsanjë' inaojë' ca gudyi yaca apóstol leyaquë'. Bega'n'lëyaquë' laguedyiyaquë' tuzi, bë'lëyaquë' Diuzi di'idza', bedupajë' bžuzuyaquë' yëta xtila.

Cabë' bë yaca ben' unao xneza Jesús taprimero

⁴³ Na'ra tu rebanzi ben' birale cabë' bë ja apóstol yela' milagro quie Diuzi. ⁴⁴ Biži bega'n ben' quie Jesús de acuerdo entre leyaquë', bë'yaquë' laze entre lëjë' yugulu ta de quieyaquë'. Lëzi chi nita' ben' bide dumi quie, ⁴⁵ na'ra bëti'yaquë' ta de quieyaquë' bë'yaquë' ben' bide dumi quie. ⁴⁶ Tu dza, tu dza, begu'udi'yaquë' lu'u idao' rnabë'ra, lëscan' lu'u yu'u quie tu tuyaquë' uyoyaquë' yetaoyaquë'. Legazi redaohueyaquë' udaoyaquë' tuže, bžuzuyaquë' yëta xtila beza'la'adyi'jë' Jesús, ⁴⁷ udapala'nyaquë' Diuzi. Blë'ë yaca ben' yedyi quieyaquë' leyaquë' ben huen. Na'ra tu dza, tu dza, psere Diuzi nura ben' gale quië', gaquë' tuže len yaca los demás ben' barue quie Diuzi.

3

Beyue Pedro tu ben' ži

¹ Na'ra bdyin dza zio Pedro len Juan lu'u idao' rnabë'ra tacuenda hue'lëyaquë' Diuzi di'idza'. Según ca costumbre quie ja ben' Israel na', rioyaquë' zadžë' du reda tzona. Biži na' ru'a idao' na' re' tu ben' ži, pero cati golotë' nažinë'. ² Yugu dza ralëchiyaquë' lëbë' ru'a idao' rnabë'ra laonan ru'a badan tacuenda inabë' caridad con nu ben' zioja lu'u idao' rnabë'ra na'. Unabayëchi'në' ben' bede zio lu'u idao' rnabë'ra tu caridad. ³ Caora blë'ë ben' ži Pedro len Juan, unëyëchi'në' hue'yaquë' tu caridad quienë'. ⁴ Na'ra blidzayaquë' lëbë' rëbijë' lëbë':

—jUna'cara nëto'!

⁵ Biži una' ben' ži leyaquë' guquë' pensari hue'yaquë' tu caridad quienë'. ⁶ Pero na'ra una Pedro rëbinë' ben' ži:

—Bibi oro, bibi plata, zia' guna' luë', pero tu ta nezda' gacalia' luë', rniala': jUzuli! jUza! porque yela' huaca quie Jesús, ben' yedyi Nazaret, hueyuenë' luë'.

⁷⁻⁸ Na'ra b̄exu Pedro n̄'è yebè. Caora cati uchisanè' n̄'è, labezute ni'anè' yu, laoxititenè' uzulaonè' rza'nè'. Na'ra ziolè ben' zi leyaquè' lu'u idao' r nabè'ra, zionè' rxitìnè' ruenè' Diuzi ben' ze. ⁹ Caora blè'è ja benè' ca rue ben' zi, barza'nè' ruenè' Diuzi ben' ze, ¹⁰ b̄izi tu bega'nziyaquè' rebanyaquè' ca guca quienè'. Bezaqueyaquè' lèbè' ure'nè' yugu dza ru'a idao' r nabè'ra unabayèchi'nè' benè' tu caridad quienè'.

Pedro bdze'nè' di'idza' ga zu tu lachila laonan lachila quie Salomón

¹¹ Na'ra bdyin Pedro, len Juan, len ben' beyuejè' ga zu tu lachila quie idao' laona lachila quie Salomón. B̄izi bire'en ben' beyuejè' usannè' leyaquè'. Pues ben' zè beguitejè' gan zè Pedro len Juan, tu bebanzijè' cabè' guca quie ben' beyuejè'. ¹² Caora blè'è Pedro banita' ja ben' zè, na'ra unè' rēbinè' lejè':

—Bicha', nacale ben' Israel ca n̄'èdi'. Biyebanle ina'le n̄to' como si fuera yela' huaca quiendo' beyuendo' ben' ni. Bigacale pensari yela' rionla'adyi' quiendo' bareza' ben' zi. ¹³ Cala lena' beyacanè', dechan' yela' huaca quie Diuzi quie xuzixta'oro Abraham, len Isaac, len Jacob bezi' ni'anè' fuerza. Pues tuzi Diuzi na' p̄ca'nnè' lao na'a z̄i'inè' Jesús naquè' ben' r nabè' lao yugulute. Pero le'e b̄ele yela' mala quiele psedyinle Jesús lao na'a ja ben' r nabè'. Caora cati gu'un Pilato yebionè' Jesús dyiguiba, le'e bigu'unle. ¹⁴ Calèla unabale gu'unle yebio Pilato tu ben' ruti benè'. Bigu'unle yebio Pilato tu ben' naca la'ya, ben' dya'ua. ¹⁵ Le'e gu'unle gati ben' run yela' neban quiero, pero Diuzi psebannè' lèbè'. Nacando' testigo pseban Diuzi lèbè'. ¹⁶ Re'enda' inia' le'e de que cuin Jesús beyuenè' ben' zi, ben' beyaca bezaquele. Beyue Jesús lèbè' caora bz̄etondo' laonè' ralendo' quienè'. Cana' labeyacatè' zè' laole r̄lè'ètlenè'.

¹⁷ Na'ra nernè Pedro rēbinè' leyaquè':

—Bicha', banezda' de que caora b̄tile Jesús, binezile bi b̄ele, lēzi ben' r nabè' quiele, binezirèjè' bi lèjè'. ¹⁸ Pero guca quie Jesús de acuerdo con ca una Diuzi dza na'te caora bzu ben' profeta xti'idza' Diuzi lè'è guichi. Na'ra rn̄en de que huadyin dza yedzagalao ben' naca Cristo. ¹⁹ Por lena' reya'ala' utza'le pensari quiele, inaole xneza Diuzi tacuenda yezi'zenè' dula' xquia quiele, na' cuèchinè' chizi lu'u guicho laxta'ole, ²⁰ huenè' mandado yeguida Jesús tatula como naca Jesús ben' ulio Diuzi desde cana'te ta gacalènè' le'e. ²¹ Pero huadzènè' guibá hasta que idyin dza hue Diuzi mandado uzunè' xti'idza'nè' con cabè' rn̄en lè'è guichi la'ya b̄è ben' profeta, ben' unita' dza na'la, ben' naca la'ya quienè'. ²² Quie lena' una Moisés dza na'te gudyinè' xuzixta'oro cani: “De entre laguedyiziuro ise'ela' Diuzi itu ben' quixogue' xti'idzè' laga con ca use'ela'nè' n̄'èdi'. Re'ennan huele bala yugulu con ca inè' le'e. ²³ Porque nu ben' bihue bala con ca inè', udyiagu' Diuzi lèjè'. Bihue' Diuzi lato inita'lèjè' yaca ben' quienè'.” Cana' una Moisés.

²⁴ Lēscan' yugulu yaca los demás ben' udixogue' xti'idza' Diuzi dza na', desde Samuel lente yaca ben' zezara, unèjè' quie dza rda Jesús lao yedyi layu. ²⁵ Ca di'idza' bega'nlè Diuzi leyaquè', lēscan' nega'nnan para le'e caora una Diuzi rēbinè' xuzixta'oro Abraham cani: “Por tu z̄i'isubo' huaca huen gula quie yugulu ben' nita' lao yedyi layu.” ²⁶ Na'ra quie lena' ulio Diuzi z̄i'inè' Jesús, use'ela'nè' lèbè' laole tanèro tacuenda gaca tahuen gula quiele, usanle bira huele tamala.

4

Psedyinyaquè' Pedro len Juan lao na'a ben' r nabè'

¹ Na'ra neru'elè Pedro lènè' Juan yaca benè' di'idza' caora bdyin yaca pxuzi, len yaca xan' policia quie idao' r nabè'ra, len tu cue' ben' Israel nacajè' quie partido saduceo. ² Rdza'yaquè' Pedro len Juan porque rdayaquè' ru'elèyaquè' yaca benè' di'idza' rnyaquè' de que cabè' guca quie Jesús bebannè' nacan prueba huadyin dza yebanrè yaca ben' huati. ³ Na'ra b̄eyaquè' leyaquè' preso, bdze'yaquè' leyaquè' lu'u dyiguiba ga bega'nyaquè' tu yela porque aodze'. Lena' b̄ibè'n̄an lato tzesèyaquè' lao ben' r nabè'. ⁴ Na'ra ben' zè, ben' bz̄ènaga quiejè', guleyaquè' di'idza' quie Diuzi, ptza'yaquè' pensari quieyaquè'. Por lena' uye ben' barale quie Jesús cadu ga'yo' mila be'mbyu, apartela n̄gula.

⁵ Na' b̄izi beteyu dza tula, bedupa ben' r nabè' quie ciudad Jerusalén tacuenda hueyaquè' junta. B̄dyinrè yaca ben' gula, len ben' r nabè' quie idao' r nabè'ra, len ben' escribas, ben' rusèdi di'idza' bzu Moisés lè'è guichi. ⁶ B̄dyinrè xan' pxuzi laonè' Anás, len Caifás, len Juan, len Alejandro, lente yugulu diadza quie xan' pxuzi. ⁷ Na'ra b̄eyaquè' mandado tzexi'jè' Pedro len Juan ta tzesèjè' laojè'. Caora bazèyaquè' na', na'ra una ben' r nabè' rēbinè' leyaquè':

—¿Bi yela' r nabè' de quiele rdale niga ruele cabè' re'enle? ¿Nu'zi use'ela' le'e?

⁸ Na'ra du yu'u Pedro Bichi Be quie Diuzi, unè' rēbinè' leyaquè':

⁹ —Le'e ben' r nabè' quie ciudad Jerusalén, len le'e ben' gula, chi re'enle inezile bi yela' r nabè' de quiendo' b̄endo' tu huen beyuendo' ben' neseco ni'e, ¹⁰ chi re'enle inando' le'e len

lo demás ben' Israel, nainando' de que por yela' huaca quie Jesucristo, ben' yedyi Nazaret, babeyaca ben' niga. Lëcazi ben' bda'le lë'ë yaga cruzo, ben' pseban Diuzi, lëbë' beyuenë' ben' niga. ¹¹ Le'e bële ca ben' rue huecua', ben' uru'un tzala'la yo laga'. Na' Jesús naquë' ca quie yo laga' uru'unle tzala'la, pero uzi' Diuzi yo laga' uru'unle, bzunë'n ga rzulao besu. ¹² Pues ni tu ben' tula biuse'ela' Diuzi ta ute uselanë' ra'o. Tuzi Jesús na' use'ela' Diuzi lao yedyi layu ta ute uselanë' ra'o yeyoro guibá. —Cana' una Pedro, rëbinë' ben' r nabë'.

¹³ Na'ra caora be yaca ben' r nabë' ca una Pedro len Juan, blë'ëyaquë' birdzebijë', na'ra tu rebanzijë' porque unezijë' naca Pedro len Juan ben' birlë'ëtica guichi. Pero bezaquejë' naca Pedro len Juan ben' quie Jesús. ¹⁴ Pero como na' zëlëjë' ben' beyueyaquë', bira ubin ben' r nabë' bi inayaquë' contra leyaquë'. ¹⁵ Na'ra bebiojë' Pedro len Juan lu'u yu'u gan nitajë' tacuenda hue'yaquë' di'idza' entre lëzjijë' bi hueyaquë' quieyaquë'. ¹⁶ Na'ra ru'eyaquë' di'idza' rëbiyaquë' laguedyiyaquë':

—¿Bi huero? Nacan tali bëyaquë' tu yela' milagro. Nun quie banezi yugulu ben' yedyi cabë' bëyaquë', bisaque' yëbiro ben' yedyi bibi yela' milagro nehueyaquë'. ¹⁷ Na'ra ta iyudyi quie asunto ta bira huen zëdi lao ben' yedyi, mejorla uzëgadyiro quiejë' de que bireya'ala' inëyaquë' quie Jesús.

¹⁸ Na'ra beyëzi yaca ben' r nabë' Pedro len Juan tatula, bzëgadyiyaquë' quiejë' de que bireya'ala' inëyaquë' quie Jesús. ¹⁹ Caora na' una Pedro len Juan, rëbiyaquë' leyaquë':

—Reya'ala' huele pensari chi nacaran huen huendo' cabë' re'enle, na' bihuendo' cabë' re'en Diuzi. ²⁰ Nëto' bisaque' usanndo' yëbindo' benë' ca ta blë'ëndo' ca ta bendo'.

²¹ Na' bzëgadyi yaca ben' r nabë' quieyaquë' tatula. Pero psanyaquë' leyaquë' cana'zi, beroyaquë' zeyoyaquë'. Biubinjë' bi huejë' quiejë', porque dan' yugu ben' yedyi rueyaquë' Diuzi ben' ze, dan' blë'ëyaquë' beyaca ben' zi. ²² Lëben' na', ben' beyaca ni'e por yela' milagro quie Diuzi, mazla chopo galo iza napanë'.

Yaca ben' quie Jesús blidzajë' Diuzi unabajë' hue'në' leyaquë' fuerza valor

²³ Na'ra psan yaca ben' r nabë' lejë', uzi'yaquë' zioyaquë' bdyinyaquë' ga nita' los demazara ben' quie Jesús, bë'leyaquë' leyaquë' di'idza' bicara dan' gudyi yaca xan' pxuzi len yaca ben' gula. ²⁴ Ude beyudyi beyaquë' ca una Pedro len Juan, caora na' yuguluyaquë' blidzayaquë' Diuzi rëbiyaquë' lëbë':

—Xuzindo' Diuzi, luë' bëlo' guibá, bao' dyila yu, bao' nisadao' lente yugulu ta de lu'una. ²⁵ Luë' conlë Bichi Be quio', bao' mandado bzu rey David di'idza' quio' lë'ë guichi la'ia ga rnën caniga:

¿Bixquien' raca dila lao yedyi layu?

¿Bixquien' racajë' pensari bizinaquezi?

²⁶ Abedupa ja ben' r nabë' quieyaquë' tacuenda huejë' contra Diuzi len zi'inë', ben' naca Cristo.

²⁷ Cana' una rey David dza na':

—Na'ra bablë'ëndo' nacan tabala yedyi ni bë rey Herodes, len Poncio Pilato, len ben' Israel, len ben' yedyi tula tuze contra zi'ilo' Jesús, ben' la'ia quio'. ²⁸ Pero bëyaquë' cabë' mandado bao' dza na'te gaca quieyaquë'. ²⁹ Na'ra, Xuzindo' Diuzi, una' como re'enaquë' utzebiyaquë' nëto'. Gucalë nëto' como nacando' ben' quio' cuenda bidzebindo' yeyondo' tzetixogue'ndo' benë' di'idza' quio'. ³⁰ Uquicho' na'alo' yeyuelo' yaca ben' raca zhue'. Uquicho' na'alo' ta gaca yela' huaca quio' lao na'a zi'ilo' Jesús, ben' la'ia quio'. —Cana' unayaquë' rëbiyaquë' Diuzi.

³¹ Caora beyudyi bë'leyaquë' Diuzi di'idza', na'ra bzisn gan' begu'udi'yaquë'. Du yu'uayaquë' Bichi Be quie Diuzi, birdzebijë' quixogue'jë' benë' xti'idza' Diuzi.

Con bitezi ta de quie ben' quie Jesús, guquen quie entre yugujë'

³² Na'ra yaca ben' zë, ben' nao xneza Jesús, guca pensari quiejë' yugutejë' tuzi. Entre leyaquë', yugulu ta de quieyaquë', gucan para quie yugutejë'. ³³ Na'ra yaca apóstol pipsanyaquë' quixogue'yaquë' benë' cabë' guca quie xa'nro Jesús caora gutinë' bebannë'. Pero xti'idza'jë' bi'an fuerza valor, porque Diuzi gucalënë' leyaquë'. ³⁴ Lëscan' entre leyaquë', ni tu gabi bdziogueyaquë', como dan' yugo ben' de quie, chi yu'u, chi layu, bëti'yaquë'n la hora rdzioguejë' dumi, ³⁵ na' uzi'jën bël'jën apóstol. Na'ra bë apóstol mandado ta udisiyaquë' dumi quie tu tuyaquë' con nu ben' bide quie. ³⁶ Na' ladoyaquë' uzu tu ben' naca familia quie xuzixta'oro Leví laonë' José. Lao isla Chipre gologuë'. Uxuba ja apóstol laonë' Bernabë, ta inaro xti'idza'ro: Ben' huen, ben' žela'adyi'. ³⁷ Lëben' na' bëti'në' layu quienë' bë'në' apóstol dumi quien.

5

Cabë' guca bë Ananías len Safira xquia quiejë'

1 Pero uzu tu ben' laonë' Ananías lënë' žgulanë' Safira. Pues na' bëti'yaquë' tu layu quieyaquë'. 2 Pero binahue dumi quien bë'në' apóstol, nechan' baoži'në' lë'ëti' quienë' tu partenë' bë'në'n apóstol como si fuera nahue dumi quien.

—Pues dyë'ëdi banezi žgulë' cabë' bënë'.

3 Na'ra una Pedro rëbinë' Ananías:

—Ananías, žbiquien' uyu'ulo' pensari xi'ibi', užio' Bichi Be quie Diuzi yë', binao' uži'lo' lë'ëti' dumi tu parte quio'? 4 Nunu bë mandado guti'o'n, cuinzo' bëti'o'n. Nunu una luë' yeyunlo' dumi quien, cuinzo' beyunlo'n. ¿Biquien' uyu'ulo' pensari median, bao' cana'? Diuzi uži'lo' yë', quele benë'.

5 Na'ra ude beyudyi be Ananías xti'idza' Pedro, tu bgu'unzë' layu gutinë'. 6 Caora na' bdyin chopa tzona bi'byu ptubiyacabi' lëbë' con la'ari' laoži'tejabi' lëbë' nu'ajabi' yecachi'yacabi' lëbë'. Por lena' yugo ja benë' unezi cabë' užaca Ananías, legazi bdzebijë' can' guca.

7 Na'ra adela cadu tzona hora, caora bdyin žgula Ananías ga zë Pedro. Pero binenezinë' bi baguca quie xquiuhuë'. 8 Caora na' unaba Pedro rëbinë' lëbë':

—¡Una chi nahue dumi ca tu ta bëti'le layu quiele!

Pues bequëbi nigula rëbinë' Pedro:

—Aja', nahuena.

9 Na'ra una Pedro rëbinë' nigula:

—¿Bixquien' bega'nlēlo' xquiulo' de acuerdo bële prueba Bichi Be quie Diuzi? Na' baza' ja ben' yecachi' xquiulo', lëzi huetzecachi'rëjabi' luë'.

10 Caora na' tu bgu'unzë' lao Pedro gutinë'. Cati uyu'u ja bi'byu ga denë', blë'ëyacabi' bagutirënë'. Lëzi uliojabi' lëbë' uži'yacabi' yecachi'yacabi' lëbë' cuëta lë'ë ga pachi'yacabi' xquiunë'. 11 Quie lena' ptzebitzegue ben' quie Jesús len los demás ben' unezi cabë' guca quieyaquë'.

Lega bë ja apóstol yela' huaca quie Diuzi

12 Na'ra zë lasa bë yaca apóstol yela' milagro lao ben' yedyi. Caora na' bedupa yaca ben' quie Jesús ga laonan Lachila quie Salomón. 13 Blë'ë ja ben' yedyi leyaquë' ben' huen, pero bdzebiyaquë' yedupalëyaquë' leyaquë'. 14 Pero unaocazi ben' zë xneza Jesús, be'mbyu len ja nigula. 15 Hasta que ulioyaquë' ben' raca žhue' udixojë' leyaquë' du tu neza lao belaga o chi lao da'a. Rbezayaquë' te pxin quie Pedro ga deyaquë' ta yeyacayaquë'. 16 Lëzi bdyin zë benë' quie yedyi re' ga'ala', nu'arëyaquë' ben' raca žhue' len ben' yu'u taxi'ibi'. Na' yugulutejë' beyacayaquë'.

Bdze'yaquë' Pedro len Juan lu'u dyiguiba

17 Na'ra yela' zë' quie xan' pxuzi len ben' partido saduceo, 18 bëxoyaquë' apóstol bdze'yaquë' leyaquë' lu'u dyiguiba. 19 Pero ca du bala bdyin tu ángel quie Diuzi ga de ja apóstol lu'u dyiguiba, psalonë' ru'a yu'u dyiguiba, ulionë' yaca apóstol unë' rëbinë' leyaquë':

20 —Tziote lu'u idao' r nabë'ra quixogue'le benë' xti'idza' Diuzi yëbilejë' quie yela' neban tuzioli ru'e Diuzi ben' nao xnezë'.

21 Ude beyudyi beyaquë' ca una ángel, caora uyen' na', uza'yaquë' zioyaquë' lu'u idao' r nabë'ra bezulaoyaquë' rguixogue'yaquë' benë' xti'idza' Diuzi.

Hora na' balara uyasa xan' pxuzi lënë' yaca ben' quië', uza'yaquë' zioyaquë' ga hueyaquë' junta bënë' mandado guida yugulu ben' r nabë' quie ben' Israel. Caora abgu'udi'yaquë' yuguluyaquë', hora na' bë xan' pxuzi mandado tzio policia' tzexil'jë' apóstol lu'u yu'u dyiguiba. 22 Na'ra uyo policia' tzexi'yaquë' apóstol, pero ganu ja apóstol bedzeleyaquë' lu'u dyiguiba. Por lena' beza'yaquë' zeyoyaquë' gan' rueyaquë' junta, 23 unayaquë' rëbiyaquë' yaca ben' r nabë':

—Bë' bdyindo' neyeyo dyiguiba con candado, blë'ëndo' zu policia' rapajë' ru'a dyiguiba. Pero caora usalondo' ru'a yu'u dyiguiba, nunu dyila' lu'u dyiguiba.

24 Na'ra yaca xan' pxuzi len xan' policia' quie idao', caora beyaquë' ca una policia, rdzebitzegueyaquë' ga yeyudyi yedu asunto na'. 25 Biži cati bla' tu ben' bla', udixogue'në' leyaquë' unë':

—Lu'u idao' r nabë'ra bazë ja ben' bdze'le lu'u dyiguiba, baru'elëyaquë' yaca ben' yedyi di'idza' tatula.

26 Na'ra laziote xan' policia' len ben' quië' yexi'yaquë' leyaquë'. Pero bibë'yaquë' quieyaquë', porque rdzebiyaquë' uda' yaca ben' yedyi leyaquë' yo. 27 Na'ra zequië'yaquë' apóstol ga rueyaquë' junta yesanyaquë' leyaquë' lao ben' r nabë' tatula. Na'ra una xan' pxuzi rëbinë' leyaquë':

28 —Baržegadyindo' quiele bira inale quie Jesús. ¿Na' biži bële? Nerguixogue'le yugulu ben' ciudad Jerusalén rëbilyaquë' ca naca pensari quiele, re'enle gale ben' yedyi de que dula' quiendo' guti Jesús.

²⁹ Na'ra una Pedro lënë' yaca los demás apóstol:

—Decazide huendo' cabë' re'en Diuzi, bihuendo' cabë' re'enle le'e. ³⁰ Le'e bëtile Jesús bda'le lëbë' lë'ë yaga cruzo, pero Diuzi na' psebannë' lëbë'. ³¹ Bë Diuzi nombrar lëbë' gaquë' ben' re' zaquë' yebë cuëtanë' ga naca xlato ben' bala'ana. Ulionë' lëbë' gaquë' xa'nro, ben' ute usela ra'o tacuenda utza'ro pensari median quiero yezi'ze Diuzi dula' xquia quiero. ³² Nacando' testigo tali na'. Lëscan' Bichi Be quie Diuzi, ben' yu'u guicho laxta'o ben' nao xneza Diuzi, naquë' testigo tali na'.

³³ Caora beyudyi beyaquë' di'idza' una Pedro, na'ra lega bdza'tzegue ben' r nabë', gu'unyaquë' gutiyaquë' leyaquë'. ³⁴ Pero entre leyaquë' uzu tu ben' quie partido fariseo laonë' Gamaliel. Naquë' ben' huen, ben' psëdi ley quie Moisés. Na'ra bënë' mandado yero ja apóstol lao junta ga re' ben' r nabë' cuezayaquë' tu chi'. ³⁵ Caora bero yaca apóstol, na'ra una Gamaliel rëbinë' laguedyinë':

—Ben' Israel, gapale cuidado bi re'enle huele quieyaquë'. ³⁶ Bigala'adyi'le cabë' guca quie tu ben' lao Teudas. Azio iza uzunë' unë' naquë' ben' belao. Unao ca du tapa gayuhua benë' lëbë'. Pero bdyin dza bëti soldado lëbë', bdzatta bezuño yaca ben' unao lëbë'. ³⁷ Beyudyi bedu quie Teudas, uzu itu ben' Galilea lao Judas dza bë gobierno censo blabanë' benë'. Gu'unrënë' tilalënë' soldado quie gobierno. Unaozë ja ben' zë lëbë', pero bëtirë soldado lëbë'. Lëzi bdzatzarë bzunorë ben' unao lëbë'. ³⁸ Lena' rnia' le'e, mejorla usanro quieyaquë', bira huerojë' zëdi. Porque chi ta racazi la'adyi'jë' ruejë', huabezan. ³⁹ Pero chi tu ta rueyaquë' nacan quie Diuzi, ba'ala'cazi re'enle cuezan, bicuezan. Na'ra gapale cuidado ta bihuele contra Diuzi. —Cana' una Gamaliel gudyinë' leyaquë'.

⁴⁰ Pues na'ra aoz'iyaquë' xti'idza' Gamaliel. Caora na' beyëziyaquë' apóstol tatula. Caora bazëyaquë' na', bë ben' r nabë' mandado udi policia leyaquë' con guidi. Lëscan' bzëgadyiyaquë' quiejë' tatula ta bira inëyaquë' quie Jesús. Ude beyudyi na', bë' ben' r nabë' permiso yero ja apóstol na'. ⁴¹ Caora na' beroyaquë' ga re' ben' r nabë' lao junta zeyoyaquë' redaohueyaquë' dan' bedzagalaoyaquë' por nun quie Jesús. Yugu dza uza'yaquë' ziojë' lu'u idao' r nabë'ra o chi lu'u yu'u quie tu tu benë'. ⁴² Bipsanyaquë' inëyaquë' quie Jesucristo.

6

Ulioyaquë' gadyi yaca ben' quisi yela' huao quiejë'

¹ Na'ra dza na'te, tu dza huio, uyera mazera ben' quie Jesús. Pero bala ben' quie Jesús, ben' rnë di'idza' griego, uyu'uyaquë' huenë conlë ben' quie Jesús, ben' rnëja di'idza' hebreo. Na'ra una ben' rnë di'idza' griego rëbiyaquë' yaca apóstol:

—Ben' rnë di'idza' hebreo, biru'eyaquë' laze parejo. Caora udisiyaquë' ta gao nigula bizu xquiuhue, ledao'zi ru'eyaquë' nigula bizu xquiuhue quiendo'.

² Na'ra bedupa lao chipchopa apóstol len yaca los demás ben' quie Jesús, unayaquë' rëbiyaquë' leyaquë':

—Bireya'ala' usanndo' rguixogue'ndo' benë' xti'idza' Diuzi ta hue'ndo' laze yela' huao na'. ³ Mejorla cuiole gadyi ben' huen, ben' de pensari, ben' rale quie Bichi Be quie Diuzi du guicho du la'adyi'yaquë', na' huele mandado quisiyaquë' yela' huao parejo. ⁴ Na'ra nëto', biusanndo' rulidzando' Diuzi rguixogue'ndo' benë' xti'idzë'.

⁵ Na'ra yaxe yugulu ben' quie Jesús cabë' una yaca apóstol. Caora na' ulioyaquë' Esteban, ben' rale quie Bichi Be quie Diuzi du guicho du la'adyi'në'. Lëzi ulioyaquë' Felipe, len Prócoro, len Nicanor, len Timón, len Parmenas, len Nicolás ben' yedyi tula. Naca Nicolás ben' yedyi Antioquia, ben' unao religión quie ben' Israel dza na'. ⁶ Na'ra bzuyaquë' leyaquë' lao yaca apóstol, pquichi yaca apóstol na'ayaquë' guichoje', bë'lëyaquë' Diuzi di'idza' por leyaquë'.

⁷ Na'ra yugu dza uduxogue' ja apóstol mazera benë' xti'idza' Diuzi. Por lena' taže uye ben' rnao xneza Jesús ciudad Jerusalén. Lente zë yaca pxuzi, unaorëyaquë' xneza Jesús.

Cabë' guca bëyaquë' Esteban preso

⁸ Na'ra taže gualë Diuzi Esteban benë' yela' huaca quie Diuzi lao ja ben' yedyi nita' na'.

⁹ Pero bala ja ben' uza' yedyi Cirene, len ben' uza' yedyi Alejandria, len ben' uza' yedyi Cilicia, len ben' uza' yaca yedyi nebaba Asia, len ben' rio lu'u idao' sinagoga quie ben' bira naca ben' nada'o, uyu'uyaquë' huenë conlë Esteban. ¹⁰ Pero biubinyaquë' bi nayaquë' porque gualë Bichi Be quie Diuzi lëbë' bdze'në' lu'u guichonë' bi di'idza' unëlënë' leyaquë'.

¹¹ Quie lena' udiyozaquë' benë' ta inayaquë' di'idza' contra Esteban. Cani' una ben' uzi' dumi rëbiyaquë' laguedyiyaquë':

—Nëto' bendo' unë Esteban di'idza' xi'ibi' contra Moisés len Diuzi.

¹² Cana' bëjë' gan bdza' ja ben' yedyi, len ja ben' gula, len ja ben' rusëdi ley quie Moisés lëbë'. Na'ra uquië'yaquë' lëbë', psedyinyaquë' lëbë' ga re' ben' r nabë' lao junta.

¹³ Udiloyaquë' ben' unë di'idza' falso contra lëbë'. Na' lëyaca ben' na', unayaquë' rëbियाquë' ben' rnabë':

—Birsan ben' niga rnë' di'idza' contra idao' rnabë'ra quiero. Lëzi ruenë' contra ley pca'n xuzixta'oro Moisés. ¹⁴ Nëto' bendo' unë' udyiaguì' Jesús idao' rnabë'ra quiero. Lëscan' unë' utza' Jesús costumbre quiero ta pca'n xuzixta'oro Moisés.

¹⁵ Ude beyudyi unajë' cana', na'ra una' ben' rue junta lao Esteban, pero blë'ëyaquë' beyaca laonë' ca quie lao ángel.

7

Cabë' unë Esteban gucalënë' cuinnë' lao ben' rnabë'

¹ Na'ra unaba xan' pxuzi rëbinë' Esteban:

—¿Nacan tali cabë' unayaquë'?

² Na'ra bequëbi Esteban rëbinë' leyaquë':

—Bicha', xuzá', ulezëcara nagale cabë' inia' le'e. Azio zë iza, blu'e Diuzi xuzixta'oro Abraham yela' huaca quienë' caora cati binetzesu Abraham yedyi Harán, nezunë' yu nebaba Mesopotamia. ³ Lëdza na' una Diuzi rëbinë' Abraham: "Psan diadza quio', psan yedyi quio', beyo yedyi tula ga ulu'ena' luë'." Cana' una Diuzi gudyinë' Abraham. ⁴ Por lena' uza' Abraham yu nebaba ben' Caldea, zionë' yesunë' yedyi Harán. Bizi cati aguti xuzi Abraham, bë Diuzi mandado beza' Abraham yedyi Harán, bela'në' yedyi niga ga nita'ro na'a. ⁵ Pero bibë' Diuzi lëbë' ga gaque quienë' sunë', ni siquiera tu pedazozì. Pero bega'nlë Diuzi lëbë' di'idza' de que idyin dza gaque quienë' ga sunë', na' bë' bagutinë' gaque quie zì'inë'. Na'ra la'acazi ga nu zì'inë' nenita' caora, bega'nlë Diuzi lëbë' di'idza' cana'. ⁶ Lëzi una Diuzi de que inita' zì'isuba Abraham yedyi quie ben' tula ga hueyaquë' dyin sin lažu, na' hue yaca benë' zì' quieyaquë' lao tapa gayuhua ya. ⁷ Lëscan' una Diuzi rëbinë' Abraham dza na': "Huachugobi'a quie ben' bë' zì' quieyaquë'. Te iyudyi na' yeza' zì'isuba' yedyi na' yela'jë' niga ga tzionla'adyi'yaquë' në'ëdi'." Cana' una Diuzi.

Na'ra nernë Esteban rëbinë' yaca ben' rnabë':

⁸ —Lëzi bë Diuzi mandado uzu Abraham tu xëdyidao' zì'inë' byu ta gaca seña ulu'en ca di'idza' bega'nlë Diuzi lëbë'. Por lena', caora aoca tu xun' golo zì'inë' Isaac, na'ra bzunë' tu xëdyidao' lëbi'. Con ca bë Abraham lënë' zì'inë' Isaac, cana' bërë Isaac lënë' zì'inë' Jacob. Lëzi con ca bë Isaac lënë' zì'inë' Jacob, cana' bërë Jacob lënë' chipchopa zì'inë' byu. ⁹ Yela' zë' quie yaca zì'i Jacob, bëti'yaquë' tu bichiyaquë' laonë' José, uzi' ben' zio Egipto lëbë'. ¹⁰ Pero gucalë Diuzi lëbë' pcuasa pcui'onë' tamala za' gaca quienë'. Cana' guca José ben' yu'u pensari, yexe rey Faraón lëbë'. Tantozi yexe Faraón José, ulionë' lëbë' ta tzionë' gaquë' xan' ben' rnabë' lao nación Egipto. Lëscan' ulionë' lëbë' gaquë' xan' ben' rue dyin lu'u lidyinë'.

¹¹ Na'ra dza na'te guca tu obin huala gula nación Egipto len nación Canaán. Fuerte bedzagalao xuzixta'oro, bibdzeleyaquë' bi gaoyaquë'. ¹² Caora unezi Jacob de que rdzela trigo nación Egipto, na'ra use'ela'në' zì'inë' gan', pero bibezaqueyaquë' chi bi' bichiyaquë' José. ¹³ Na'ra taorupe zioyaquë' bdyinyaquë' nación Egipto, caora na' una José rëbinë' leyaquë': "Në'ëdi' naca' bichile, José." Cana'ra bezaqueyaquë' lëbë'. Cana' bdyin hora unezi rey Faraón de que naca José ren quie ben' Israel. ¹⁴ Na'ra guzi José xuzinë' Jacob lente yugulu familia quienë', uza'yaquë' zioyaquë' bdyinyaquë' nación Egipto. Na'ra entre yaca ben' bdyin nacajë' tzona galo chí'inu'. ¹⁵ Cana' guca unita' Jacob nación Egipto. Na'ra caora bdyin dza quienë', gutinë'. Lëzi caora bdyinrë dza quie zì'inë', gutirëyaquë'. ¹⁶ Caora azio iza, bebio zì'i subayaquë' chita quieyaquë' yecachi'yaquë'n yedyi Siquem. Na' bdze'yaquë' chita quieyaquë' lu'u beló ta hue' Abraham desde cana'te. Con dumi plata quienë' hue'në'n lao ja zì'i Hamor, ben' yedyi Siquem.

¹⁷ Caora cati ilë'ëti'zi idyin hora uzu Diuzi di'idza' cabë' di'idza' bega'nlënë' Abraham dza na'te, caora na' baoye ben' Israel gucajë' ben' zë. ¹⁸ Pero uzulao rnabë' tu rey cubi quie ben' Egipto. ¹⁹ Pues rey na', binubë'në' José. Udilalënë' xuzixta'oro, bë'në' leyaquë' zì', uzi'në' leyaquë' yë', bënë' mandado uca'n xuzixta'oro bdao' zagolo quieyaquë' lu'u guixi' ta gatiyacabi'. ²⁰ Na'ra bdyin hora golo Moisés, pero badanla zubi'. Pero como rnabë' rey gati bdao' quie ja ben' Israel, quie lena' pcachi' zna'bi' lëbi' lu'u yu'u. Pero cati aode tzona biu', bira užaque'në' ucachi'në'bi' lu'u yu'u. ²¹ Quie lena' psanyaquë' lëbi' lu'u guixi', pero bezi' zì'i rey nigula lëbi', uzi'në'bi' psegulanë'bi' ca quie xcuidi' quienë'. ²² Cana' guca psëdi Moisés yugulu ta nezi ben' nación Egipto. Guquë' ben' yu'u pensari, udapala'n benë' lëbë', porque dyin dya'a bënë', di'idza' li unënë'.

²³ Chopa galo iza zunë' caora cati gu'unnë' gacalënë' laguedyinë' ben' Israel. ²⁴ Cana' zionë' yeyubinë' leyaquë' ga rueyaquë' dyin. Pero blë'ënë' tu ben' Egipto rdilalënë' tu ben' Israel. Bizi na' gucalë Moisés laguedyinë', bëtinë' ben' Egipto. ²⁵ Pero guque Moisés de que nezi ben' Israel re'en Diuzi gacalë Moisés leyaquë' yeza'yaquë' nación Egipto. Pero

biuneziyaquë' cana'. ²⁶ Biži bete yu na', zezio Moisés tatula ga zu laguedyiné' bedilanë' chopa ben' Israel rdilayaquë'. Na'ra como re'en Moisés bitilayaquë', unë' rëbinë' leyaquë': "¡Bicha! ¿Bixquien' re'enle hue'le laguedyile zi?" ²⁷ Pero biži ben' rdilayaca bdyiganë' Moisés tzala'la, unë' rëbinë' lëbë': "¿Nu ulio luë' rñabë'lo' nëto' ca juez quiendo?" ²⁸ ¿Quele re'enlo' gutio' në'ëdi' ca bëtio' ben' Egipto niogue?" ²⁹ Cati be Moisés ca unë', na'ra zeyonë' huezuno yesunë' yu nebaba Madián. Cana' uzunë' yedyi tula, yedyi binacan quienë', ptzagana'në' uzu chopa ži'inë' byu.

³⁰ Caora baguca ichopa galo iza tu lu'u guixi', na' zu tu lato dachi ruen ga'ala' ga zu tu ya'a laona Sinaí ga bdyin tu ángel ptilalaonë' Moisés. Na' uzë ángel na' lu'u tu yaga yëchi' ra'ala'n yu'un gui'. ³¹ Caora blë'ë Moisés ángel na', tu bega'nzinë' rebannë'. Cati ubiga'në' ga'ala' tacuenda ilë'enë' dyë'ëdi, caora na' una Diuzi rëbinë' lëbë': ³² "Në'ëdi' naca' Diuzi quie xuzixta'olo' Abraham, len xuzixta'olo' Isaac, len xuzixta'olo' Jacob." Caora be Moisés ca una Diuzi, ržizinë' rdzebinë' ina'në' mazera. ³³ Na'ra unëra Diuzi rëbinë' Moisés: "Ulëcho huarache quio' porque naca la'ya ga zëlo'. ³⁴ Pues abeda' rulidza ja ben' quia' nita' Egipto në'ëdi'. Ablë'ëda' ca redzagalaojë'. Baoyëza' ta ute usela' leyaquë'. Udacara, ise'ela' luë' nación Egipto." Cana' una Diuzi rëbinë' Moisés.

³⁵ Na'ra nernë Esteban rëbinë' leyaquë':

—Ba'ala'cazi biueyila'adyi' yaga ben' Israel Moisés, ba'ala'cazi unayaquë' rëbiyaquë' Moisés: "¿Nu ulio luë' ta inabë'lo' nëto' ca juez quiendo?", na' use'ela' Diuzi Moisés ta inabë'në' ute uselanë' leyaquë'. Conlë ángel, ben' ptilalao lëbë' lu'u yaga yëchi', use'ela' Diuzi Moisés. ³⁶ Na'ra lëMoisés ulionë' xuzixta'oro hora beza'yaquë' beroyaquë' nación Egipto, bënë' yela' huaca quie Diuzi ga re' tu nisadao' laona Nisadao' Zna. Lëscan' bënë' yela' huaca quie Diuzi hora uda yaca ben' Israel gabi yu'u dyia chopa galo iza. ³⁷ Lëzi lëMoisés unë' rëbinë' ben' Israel: "De entre le'e huabio Diuzi itu ben' ina le'e xti'idza' Diuzi laga con ca ulionë' në'ëdi'. Ulehue bala ca inë' le'e." ³⁸ Lëscan' lëMoisés na' ziolë'në' Moisés Israel cati uza'yaquë' udayaquë' tu paraje gabi yu'u dyia lao chopa galo iza. Conlë ben's na' bëlë' ángel di'idza' lë'ë ya'a Sinaí. Lëbë' udixogue'në' xuzixta'oro di'idza' bëlë' ángel lëbë'. Lëdi'idza' na', di'idza' neban, pca'n Moisés para ra'.

³⁹ Pero bigule xuzixta'oro di'idza' pca'n Moisés. Gu'unyaquë' uza'la'adyi'jën yeza'jë' yeyoyaquë' nación Egipto tatula. ⁴⁰ Cati nezio Moisés lë'ë ya'a, caora na' unayaquë' rëbiyaquë' Aarón, ben' xan' pxuzi: "Re'enndo' huelo' chopa tzona diuzi ta hua'aro tu neza ta ucuasa ucu'i'on ra'o bi tamála za' gaca quiero, porque binezindo' bi guca quie Moisés, ben' ulio ra'o nación Egipto." ⁴¹ Na'ra bzaloyaquë' tu bëdyihuaga dao' de oro. Bëtirëyaquë' tu beco' ži'ila' bdyiayaquë' ba' lao bëdyihuaga de oro ca gun quieba'. Lega yexeyaquë' diuzi bëyaquë' na'aziyaquë'. ⁴² Cana' psanla'adyi' Diuzi leyaquë' ta tzionla'adyi'yaquë' yaca tadyia guibá. Quie lena' guca quieyaquë' con ca rna lë'ë guichi bë yaca profeta ga rguixogue'n ca una Diuzi:

Le'e ben' Israel, ¿para në'ëdi' bëtile bia bdyialeba' ru'aba dza rdale lao lato dachi chopa galo iza?

⁴³ Quele para në'ëdi', pero bële con na'azile diuzi uyonla'adyi'le.

Nu'ale tu rumita dao' de la'ari' quie Moloc.

Nu'arële tu ta naca forma quie bélo, laona Renfán.

Lena' unale naca Diuzi quiele.

Quie lena' hua' castigo quiele, huabioga' hualaohua' le'e yedyi quiele tzirole zitu', tzesule yedyi quie ben' tula yedyi laona Babilonia.

Cana' una Diuzi gudyinë' xuzixta'oro dza na'te.

⁴⁴ Na'ra nernë Esteban rëbinë' leyaquë':

—Dza rda xuzixta'oro lao lato gabi yu'u dyia, nu'ayaquë' tu yu'u de la'ari', lena' gucan idao' quieyaquë'. Lu'en na' bzuyaquë' yaca yo ta'a ga bzu Diuzi ley quienë'. Lëyu'u de la'ari' na', bëyaquë'n con ca una Diuzi hueyaquë'n, porque Diuzi blu'enë' Moisés ca re'ennë' hue ben' Israel yu'u de la'ari'. ⁴⁵ Na'ra bdyin dza aguti Moisés. Caora na' ulio Diuzi tu ben' lao Josué gaquë' ben' rñabë' quie xuzixta'oro lao laza Moisés. Biži lao na'a Josué bdyin xuzixta'oro layu ga bega'nlë Diuzi leyaquë' di'idza' gaca layu quieyaquë'. Caora na' gucalë Diuzi leyaquë' blaonë' ben' nita' layu na' zioyaquë' huezuno. Lao na'a Diuzi bëyaquë' gan, bzuyaquë' yu'u de la'ari' layu quieyaquë' bë' bdyinjë' na'. Cana'zi bega'nnan hasta bdyin dza rda rey David. ⁴⁶ Pero rey David, lega nedyë'ë Diuzi lëbë'. Caora na' gu'un rey David huenë' tu idao' žegula ga inita' Diuzi. ⁴⁷ Pero quele rey David bënë'n nechan' ži'inë' Salomónla bënë'n. ⁴⁸ Pero sibila zu Diuzi, binita'në' lu'u idao' ta bë benë'zi. Lena' nacan de acuerdo con ca una Diuzi caora unë':

⁴⁹ Naca ladza ca quie xlatoga' ga ri'a.

Naca yedyi layu ca quie lato ga rezila'adyi' ni'a.

¿Ca bi cue' yu'u huele para në'ëdi'?

¿Gazí naca lato ga yezila'adya'?

⁵⁰ ¿Bizi binezile conlè na'a bia' yugulu ta de?

Cana' una Diuzi gudyinè' xuzixta'oro dza na'te.

⁵¹ Na'ra nernè Esteban rëbinè' leyaquè':

—Yela' zidi quiele birioñe'ele ruele ca ben' binubè' Diuzi. Siempre biralele quie Bichi Be quienè'. Ruele tamala laga con ca bè xuzixta'oro. ⁵² ¿Nu ben' profeta biudilalè xuzixta'oro? Leyaquè' bëtiyaquè' ben' uidxogue' de que guida Cristo. Bizi cati bidè' detè'è lao yedyi layu, le'e udaole lèbè' xquia, unèle di'idza' contra lèbè', bëtilenè'. ⁵³ Pca'n Diuzi ley quienè' lao na'a Moisés para le'e, pero le'e, biralele quien.

Cabè' guca bëtiyaquè' Esteban

⁵⁴ Na'ra ude beyudyi be yaca ben' rnabè' ca una Esteban, mazera bdza'tzegueyaquè' lèbè'. ⁵⁵ Pero Esteban, du yu'unè' Bichi Be quie Diuzi, una'nè' guibá blè'ènè' xni' gui' ga zu Diuzi. Blè'èrènè' zè Jesús zaquè' yebè quie Diuzi. ⁵⁶ Na'ra una Esteban rëbinè' yaca ben' rnabè':

—¡Ulena'cara! Rlè'èda' uyalo guibá ga zu Diuzi. Rlè'èda' ben' naca bichi yugulu benè'. Zènè' zaquè' yebè quie Diuzi.

⁵⁷ Pero lapsiote yaca ben' rnabè' nagayaquè', uredyiya'yaquè' zidzo, ⁵⁸ labèxoteyaquè' uquiè'yaquè' lèbè' ru'a yedyila. Caora na' ulèchayaquè' gaban quieyaquè' pca'nyaquè'n lao na'a tu ben' cuidi' laonè' Saulo. Na'ra uzulaoyaquè' rguiyaquè' lèbè' yo ta gatiè'. ⁵⁹ Pero du rguiyaquè' Esteban yo, blidzè' Jesús rëbinè' lèbè':

—Señor Jesús, bezi' nè'èdi' yeguida' ga zulo'.

⁶⁰ Na'ra uditzu Esteban žibinè', unè' zidzo rëbinè' Jesús:

—Señor, uzi'ze quieyaquè' rueyaquè' xquia rutiyaquè' nè'èdi'.

Ude beyudyi unè' cana', gutinè'.

8

Saulo bènè' contra ben' quie Jesús

¹ Na'ra redaohue Saulo dan' bëtiyaquè' Esteban. ² Bizi caora bagutinè', uyo chopa tzona ben' rue quie xti'idza' Diuzi bi'ayaquè' cuerpo quienè' ta yecachi'yaquè'. Legazi rbediyaquè' raqueyaquè' bayèchi'. Caora na' uzulao yaca benè' usacayaquè' bizinaquezi ben' quie Jesús, ben' nita' ciudad Jerusalén. ³ Cana' guca zèdi quie ben' quie Jesús, porque bipsan Saulo bènè' contra leyaquè'. Uyu'unè' lu'u yu'u quie quieyaquè', ulionè' leyaquè' lu'u yu'u quiejè' udze'nè' leyaquè' lu'u dyiguiba, la'achi nigula, la'achi be'mbyu.

Caora yetixogue' ja ben' quie Jesús xti'idza' Diuzi estado Samaria

⁴ Quie lena' bdzata yaca ben' quie Jesús zioyaquè' yedyi tula, zioyaquè' yedyi re' estado Judea len yedyi re' estado Samaria. Pero biuza' yaca apóstol, bega'nyaquè' ciudad Jerusalén. Na' yaca ben' bedzatzaja uza' ciudad Jerusalén, zioyaquè' rguixogue'yaquè' benè' xti'idza' Diuzi tu tu yedyi ga bdyinyaquè'. ⁵ Uza'rè tu ben' quie Jesús laonè' Felipe. Uzè'è zionè' tu yedyi quie estado Samaria. Caora bdyinnè' gudyinè' yaca ben' yedyi na' de que naca Jesús ben' Cristo, ben' use'ela' Diuzi. ⁶ Na'ra labedupate ben' yedyi na', labzènegateyaquè' xti'idza' Felipe, porque blè'èyaquè' ruenè' yela' huaca quie Diuzi. ⁷ Caora na' beyue Felipe yaca ben' yu'u taxi'ibi'. Bero yaca taxi'ibi' ga yu'uyacan uredyiya'yacan. Lèscan' beyuenè' ben' zi, beyacayaquè'. ⁸ Quie lena' lega bedaohue yaca ben' yedyi na'.

⁹ Pero yedyi na' ga uyo Felipe, uzu tu ben' rue brujo laonè' Simón. Yela' brujo quienè', uzi'nè' ben' quie Samaria yè' unè' naquè' ben' belao, ben' bala'ana. ¹⁰ Por lena' bzènegayaquè' ca gudyinè' leyaquè' la'achi xcuidi', la'achi ben' huaca. Yuguluje' bëyaquè' lèbè' caso, unayaquè' rëbiyaquè' laguedyiyaquè':

—Ben' ni ruenè' yela' huaca quie Diuzi.

¹¹ Na'ra azio zè iza uzi'nè' leyaquè' yè'. ¹² Pero caora bdyin Felipe, gudyinè' leyaquè' quie yela' rnabè' quie Diuzi, gudyirènè' leyaquè' con cabè' una Jesús, caora na' guleyaquè' quienè'. Por lena' bè' Felipe laoyaquè', tanto nigula como ca be'mbyu. ¹³ Hasta cuin Simón gulerènè' di'idza' quie Jesús, bè'rè Felipe laonè'. Caora na' udalènè' Felipe tuze, pero tu bebanzinè' ca yela' huaca quie Diuzi bè Felipe.

¹⁴ Caora unezi ja apóstol nita' ciudad Jerusalén de que uyezila'adyi' ben' Samaria xti'idza' Diuzi, na'ra use'ela'yaquè' Pedro len Juan zioyaquè' na'. ¹⁵ Caora bdyinyaquè' na', blidzayaquè' Diuzi unabayaquè' Diuzi uchizè' Bichi Be quienè' tzu'unè' lu'u guicho laxta'o ben' Samaria barale quie Jesús, ¹⁶ porque binetzu'u Bichi Be quie Diuzi lu'u guicho laxta'oyaquè'. Caora cati bè' Felipe laoyaquè' dza na'te, tu bzètozinè' lao Jesús, quele uyu'uyaquè' Bichi Be quie Diuzi. ¹⁷ Quie lena' bda' Pedro len Juan na'ayaquè' guichoyaquè', laoyu'uteyaquè' Bichi Be quie Diuzi.

¹⁸ Caora bl'è Simón cabè' bëyaquë' uyu'u Bichi Be quie Diuzi lu'u guicho laxta'o benë' cati bda'yaquë' na'ayaquë' guicho benë', ¹⁹ na' unë' rëbinë' ben' apóstol:

—Gacatezi dumi inabo' naguna'n, chi ulu'ele në'ëdi' bi hua' tacuenda tzu'u Bichi Be quie Diuzi lu'u guicho laxta'o benë' cati uda'a na'a guichoyaquë'.

²⁰ Na'ra bequëbi Pedro rëbinë' Simón:

—Udyiagu' Diuzi luë' lente dumi plata quio', porque raco' pensari huazi' Diuzi dumi plata tacuenda uchizanë' Bichi Be quienë' tzu'unë' lu'u guicho laxta'o benë'. ²¹ Bide lato ni derecho quio' huelao' nêto' tuze, porque bineyëri laxta'olo' lao Diuzi, ²² psan tamala quio'. Unaba lao Diuzi chi yezi'zenë' pensari median quio'. ²³ Ca quie nisa sla' ratza ja benë' naco'. Yela' mala quio' naco' ca quie ben' de lu'u dyiguiba.

²⁴ Na'ra una Simón rëbinë' apóstol:

—Huele cule inabale lao Diuzi yezi'zenë' quia', bigaca quia' con ca baonale në'ëdi'.

²⁵ Caora ude beyudyi udixogue' apóstol yaca ben' nita' na' xti'idza' Diuzi, na'ra beza'yaquë' zeyoyaquë' ciudad Jerusalén, rguixogue'rëyaquë' ben' Samaria nita' tu tu yedyi ga bedeyaquë' xti'idza' Diuzi.

Bedila Felipe tu ben' Etiopía tu neza ga zionë'

²⁶ Ude beyudyi na', bdyin tu ángel quie Diuzi ga zë Felipe rëbinë' lëbë':

—Uzi', uyo tu lao lato ga bidyia yu'u, ga rde neza za' ciudad Jerusalén para yedyi Gaza.

²⁷ Na'ra uzi'në' zionë'. Du tu neza na', zeza' ben' bedilanë', ben' nación Etiopía. Ben' na' naquë' eunuco, ben' rapa dumi quie tu nigula lao Candace. Naca Candace reina quie nación Etiopía. Pues ben' na' uyonë' ciudad Jerusalén ga uyonla'adyi'ne' Diuzi. ²⁸ Caora na' re'në' lu'u tu carro dao' ra'alala' chopa bia zeyonë' yedyinnë' yedyi quienë'. Na'ra du re'në' lu'u carro dao', rna'në' guichi quie ben' profeta Isaías. ²⁹ Caora na' una Bichi Be quie Diuzi rëbinë' Felipe:

—Uyo tzenao' ben' re' lu'u carro dao'.

³⁰ Cana' zio Felipe ga re'në', pero benë' rnënë' di'idza' quie ben' profeta Isaías. Caora na' una Felipe rëbinë' lëbë':

—¿Rioñe'elo' bi na di'idza' rnëlo'?

³¹ Na'ra unë' rëbinë' Felipe:

—¿Bizi hua' tzioñe'eda' con ca rna lë'ë guichi, chi ganu dyila' uzioñe'e në'ëdi'?

Ude beyudyi unë' cana', gudyinë' Felipe cuënë' lu'u carro ta cue'në' cuëtë'.

³² Na'ra parte gan blabanë' xti'idza' Diuzi rnën cani:

Naca quienë' ca quie beco' zi'ila' guti benë'.

Lëzi naca quienë' ca quie tu beco' zi'ila' rchugu benë' guitza' quieba', pero bibi unë'.

³³ Ptitoyaquë' lëbë'.

Bibëyaquë' justicia quienë'.

¿Bizi huero inaro quie ben' yedyi quienë'?

Porque mero leyaquë' bëtiyaquë' lëbë'.

³⁴ Ude beyudyi unë' lë'ë guichi, na'ra unë' gudyinë' Felipe:

—Una në'ëdi' chi una ben' profeta quie' cuinnë' o chi unë' quie ben' tula.

³⁵ Caora na' uzulao Felipe rzioñe'enë' lëbë' con ca rna lë'ë guichi gudyinë' lëbë' con ca guca quie Jesús. ³⁶ Bizi cati bdyinyaquë' ga zu nisa, una ben' Etiopía rëbinë' Felipe:

—Abdyinro ga zu nisa. ¿A ver bi ca nao' luë', chi bisaque' hue'lo' laohua' në'ëdi' niga?

³⁷ Na'ra una Felipe rëbinë' lëbë':

—Chi ralelo' quie Jesús du guicho du la'adyo', huazaque' hua' laolo' luë' niga.

Na'ra bequëbi ben' na' unë':

—Du guicho du la'adya' raleda' naca Jesucristo zi'i Diuzi.

³⁸ Cana' bë ben' na' mandado cueza carro dao' quienë' ziolënë' Felipe ru'a nisate, uyu'uyaquë' lu'u nisa bë' Felipe laonë' lëbë'. ³⁹ Cati beroyaquë' lu'u nisa, laoquë'te Bichi Be quie Diuzi Felipe. Bira bl'ë ben' na' lëbë'. Pero ben' na', lega redaoñenë' beza'në' zeyonë' xquiedyinnë'. ⁴⁰ Na'ra labedyinte Felipe tu yedyi laona Azoto. Hora na' bedenë' yedyi tu yedyi rëbinë' benë' xti'idza' Jesús con ca guca quienë' hasta bdyinnë' ciudad Cesarea.

9

Cabë' uzaca Saulo tu neza Damasco

(Hch. 22.6-16; 26.12-18)

¹ Na'ra bipsancazi Saulo yela' rdza' quienë' re'ennë' gutinë' ben' quie Jesús. ² Por lena' uyonë' yanabë' guichi lao xan' pxuzi tacuenda tzionë' tzedilanë' huenë' preso nu ben' rnao xneza Jesús ciudad Damasco. Gu'unnë' tzu'unë' idao' sinagoga quieyaquë' guxonë' ise'ela'në' leyaquë' ciudad Jerusalén, chi be'mbyu, chi nigula. ³ Pero ilë'ëti'zi binedyinnë'

yedyi, cati uyëzi tu xni' gui' za'n sibi guibá yatilan lëbë' ga zionë'. ⁴ Caora na' bdinë' yu, benë' unë Jesús rëbinë' lëbë':

—Saulo, ¿bixquien' ru' contra në'ëdi'?

⁵ Na'ra unaba Saulo:

—¿Nuzi luë', Señor?

Hora na' unë Jesús tatula, rëbinë' lëbë':

—Në'ëdi' laohua' Jesús. Naca' ben' ruelo' contra. Pero cala në'ëdi' ru' contra, nechan' contra cuinzo' ruelo' ca quie tu bëdyi huaga rulibiba' nu lë'ë yaga duchi' nu'a xa'mba' ta rulaohué'ba'.

⁶ Pero du rdzebi, du rżizi Saulo, unë rëbinë' Jesús:

—¿Bizi ca re'enlo' hua', Señor?

Na'ra una Jesús, rëbinë' lëbë':

—Beyasa, uyo ciudad Damasco. Bë' bazulo' ciudad na', naise'ela' ben' ina luë' bi huelo'.

⁷ Na'ra uyasa Saulo gan denë' layu. Caora bexa' laonë', biblë'ënë'. Pero yaca ben' ziolënë', lega bdzebiyaquë', porque biblë'ëyaquë' nu ben' blidza Saulo. ⁸ Caora na' bëxoyaquë' në'ë uquië'yaquë' lëbë' ciudad Damasco, ⁹ pero lao tzona dza bibi blë'ënë', bibi udaonë', bibi hue'enë'.

¹⁰ Na' ciudad Damasco zu tu ben' quie Jesús laonë' Ananías. Caora na' ptilalao Jesús lëbë' ga zë' rulidzë' lëbë':

—Ananías.

Pero ca quie ben' uxusa guca quienë' benë' unë Jesús. Na'ra una Ananías:

—Ni zua', Señor.

¹¹ Na'ra una Jesús rëbinë' lëbë':

—Uzi', uyo ga rde tu lecan laona lecan li. Tziolo' lidyi Judas, na' yedzelelo' tu ben' yedyi Tarso laonë' Saulo. Huelao'në' di'idza', porque rulidzanë' në'ëdi'. ¹² Gaca quië' ca tu ben' rxusazi ilë'ënë' luë'. Na' uda'lo' nao' guichonë' tacuenda yelë'ënë'.

¹³ Caora be Ananías ca una Jesús, na'ra unë rëbinë' lëbë':

—Señor, zë lasa babeda' cabë' rue Saulo. Legazi bënë' median contra yaca ben' quio' nita' ciudad Jerusalén. ¹⁴ Na' baza'në' ni, nu'anë' guichi quie yaca xan' pxuzi. Conlë guichi na' de yela' rnabë' quië' ta guxonë' huenë' preso nu ben' rulidza luë'.

¹⁵ Pero una Jesús, rëbinë' lëbë':

—Uzi', uyo ga bdyinnë', porque ulioga' lëbë' tzeguedyinnë' ben' quie nación tula, len yaca rey quieyaquë', len ben' Israel di'idza' la'iya quia'. ¹⁶ Na' hue'lia'në' di'idza' cabë' yedzagalaonë' yëbinë' benë' di'idza' la'iya quia'. —Cana' una Jesús gudyinnë' Ananías.

¹⁷ Na'ra uza' Ananías zionë' bdyinnë' yu'ga bdyin Saulo, bda'në' në'ë guicho Saulo, unë rëbinë' lëbë':

—Bicha' Saulo, Señor Jesús, ben' ptilalao luë' tu neza ga za'lo', lëbë' use'ela'në' në'ëdi' baza' niga tacuenda yelë'ëlo' tzu'ulo' Bichi Be quie Diuzi. —Cana' una Ananías gudyinnë' Saulo.

¹⁸ Hora na' bro tu ta naca ca žeza' bela lu'u lao Saulo belë'ënë' tatula. Na'ra uyasë' bë' Ananías lëbë' laohué'. ¹⁹ Ude beyudyi na' beyaonë' bezi'në' fuerza, bega'nnë' ciudad Damasco chopa tzona dza yeyubinë' ben' quie Jesús zuyaca na'.

Saulo na' udixogue'në' benë' xti'idza' Diuzi ciudad Damasco

²⁰ Na'ra uzulao Saulo rguixogue'në' ben' Israel, ben' nita' Damasco de que naca Jesús zi'i Diuzi. Rionë' lu'u sinagoga quieyaquë' rëbinë' leyaquë' xti'idza' Diuzi. ²¹ Cana' tu rebanzi yaca ben' be ca una Saulo, unayaquë' rëbiyaquë' laguedyijjë':

—¿Cala lëbë' bënë' contra ben' quie Jesús, ben' nita' ciudad Jerusalén? ¿Cala lëbë' bla'në' ni ta huenë' ben' quie Jesús preso, usedyinnë' leyaquë' lao na'a yaca xan' pxuzi? —Cana' unayaquë' quie Saulo.

²² Pero birdzebi Saulo rguixogue'në' leyaquë' de que naca Jesús ben' use'ela' Diuzi. Blu'enë' leyaquë' lë'ë guichi la'iya quie Diuzi ga rnën naca Jesús ben' Cristo. Bënë' gan biubin yaca ben' Israel, ben' nita' ciudad Damasco, bi inayaquë' quienë'.

Ula Saulo bibëti yaca ben' Israel lëbë'

²³ Pero bazio zë dza zunë' na', na'ra guca yaca ben' Israel de acuerdo ta gutiyaquë' Saulo. ²⁴ Lena' yugu dza, yugu yela, ure'yaquë' neza ru'a yedyi tacuenda guxoyaquë' gutiyaquë' lëbë'. Pero unezi Saulo cabë' gu'unayaquë' hueyaquë' quienë'. ²⁵ Hora na' du rtze', uquië' ben' quie Jesús lëbë', urëyaquë' ga zu tu ventan že lë'ë besu zio ru'a yedyi, uyu'unë' lu'u tu chicuüti že ta uchizayaquë' lëbë' layu tacuenda ulanë' zionë' ciudad Jerusalén.

Ca guca quie Saulo bedyinnë' ciudad Jerusalén

²⁶ Caora bedyinnè' ciudad Jerusalén gu'unnè' huelènè' ben' quie Jesús tuže. Pero rdzebiyaquè' lèbè', porque bineneziaquè' chi tali banaquè' ben' quie Jesús. ²⁷ Por lena' uquiè' Bernabé lèbè' ga nita' ja apóstol yaguèdyinè' leyaquè' cabè' guca quie Saulo blè'ènè' Jesús tu neza Damasco, bè'lè' Jesús lèbè' di'idza', birdzebinè' udixogue'nè' ben' Damasco xti'idza' Diuzi. ²⁸ Hora na' uyezila'adyi'yaquè' lèbè' bega'nlnènè' leyaquè' ciudad Jerusalén. ²⁹ Na'ra birdzebinè' uzulaonè' rguixogue'nè' benè' xti'idza' Diuzi. Uyu'unè' huenè lènè' tu cue' ben' Israel, ben' raza di'idza' griego, pero ure' unaoyaquè' bi hueyaquè' ta guti'yaquè' Saulo. ³⁰ Caora unezi los demás ben' quie Jesús de que re'enyacuè' guti'yaquè' lèbè', uquiè'yaquè' lèbè' ciudad Cesarea, na'tera use'ela'yaquè' lèbè' yedyi Tarso.

³¹ Na'ra ja ben' quie Jesús nita' yedyi quie estado Judea, len ben' nita' estado Galilea, len ben' nita' estado Samaria, uzujè' contento. Du guicho du la'adyi'ljè' naojè' xneza Jesús. Yugu dza rapala'nyacuè' Diuzi gualè Bichi Be quie Diuzi leyaquè'. Cana' mazera uye ben' bèlè leyaquè' tuže.

Beyaca tu ben' zi, ben' lao Eneas

³² Caora na' rio Pedro rayubinè' ben' quie Jesús con bi yedyi nita'yaquè'. Cana' uyonè' yeyubinè' yaca ben' quie Jesús, ben' nita' yedyi Lida. ³³ Lèyedyi na' yatilanè' tu ben' zi laonè' Eneas. Azio xuna iza denè' lao belaga nažinè'. ³⁴ Na' una Pedro rëbinè' lèbè':

—¡Eneas, hueyue Jesucristo luè'! ¡Uyasa, beyue laze belaga quio'!

Na'ra caora uyasè', labeyacatenè'. ³⁵ Biži na' caora blè'è yugo ben' yedyi Lida len yugo ben' yedyi Sarón cabè' guca quienè' beyacanè', cana'ra psanyaquè' costumbre gula quieyaquè' unaoyaquè' xneza Jesús.

Cabè' guca beban tu nigula baguti lao Dorcas

³⁶ Na'ra dza na'te uzu tu nigula yedyi Jope laonè' Tabita. Na' di'idza' griego laorènè' Dorcas. Naquè' ben' nao xneza Jesús. Yugu dza gualènè' ben' yèchi', bè'nè' leyaquè' ta de quienè'. ³⁷ Biži na' bdyin dza guca žhue'nè' gutinè'. Caora na' bgazujè' lèbè' yao uxubayaquè' lèbè' sibi tu lu'u cuarto chopa xcuia. ³⁸ Na'ra como uneziyaquè' yedyi Lida zu Pedro, lëscan' como re'n ga'ala'zi, use'ela'jè' chopa be'mbyu tzenabayaquè' Pedro, chi bisaque' sè'è luegozi.

³⁹ Na'ra uza' Pedro ziolènè' leyaquè'. Caora bedyinyaquè' uquiè'yaquè' lèbè' lu'u cuarto chopa xcuia ga de nigula. Lu'u cuarto na' nita' ja nigula guti xquiuhue rbedyiyacuè', blu'eyaquè' Pedro vestido quieyaquè' ta bè Dorcas cati nezunè'. ⁴⁰ Na'ra bè Pedro mandado yero ja nigula lu'u cuarto. Caora beroyaquè', uditzu žibinè' blidzè' Diuzi. Ude beyudyi na', byèchunè' una'nè' ben' huati, unè' rëbinè' lènè':

—Tabita, uyasa.

Cati una Pedro cana', labeza'te lao nigula, una'nè' Pedro uyananè'. ⁴¹ Bëxu Pedro na'anè' gualènè' lèbè' uzulinè'. Na'ra beyèži Pedro yaca nigula guti xquiuhue lente los demás ben' quie Jesús. Blu'enè' leyaquè' de que neban Dorcas. ⁴² Na'ra yugulu ben' yedyi Jope uneziyaquè' cabè' guca quie nigula na'. Caora na' uzulao zëyaquè' naoyaquè' xneza Jesús. ⁴³ Na'ra zè dza bega'n Pedro yedyi Jope. Uzunè' lidy tu ben' lao Simón, ben' ruti' žaba bëdyihuaga.

10

Pedro na' ptilanè' tu ben' lao Cornelio

¹ Na'ra ciudad Cesarea uzu tu ben' laonè' Cornelio. Naquè' xan' tu gayuhua soldado. Na' naca soldado quienè' tu cue' ben' italiano. ² Lèbè' lente yugulu familia quienè' udapala'nyacuè' Diuzi. Gualènè' ben' Israel, bè'nè' caridad quejè', rulidzè' Diuzi yugu dza. ³ Biži bdyin dza blè'è Cornelio tu ángel quie Diuzi. Uzè ángel na' bdyinnè' ga zè Cornelio. Zadze' cadu las tres guca quienè' cana'. Pero ca quie ben' uxusa guca quie' blè'ènè' lèbè'. Na'ra una ángel na' rëbinè' lèbè':

—Cornelio.

⁴ Du rdzebi Cornelio una'nè' ángel rëbinè' lèbè':

—¿Bi nao', Señor?

Na'ra una ángel rëbinè' Cornelio:

—Raxe Diuzi ca di'idza' ru'elo'nè', lëscan' raxenè' ca ruelo' ru'elo' ben' yèchi' caridad.

⁵ Hora na' ise'elo' chopa tzona ben' tzio yedyi Jope tzexi'yaquè' tu ben' lao Simón Pedro. ⁶ Zunè' žan yu'u quie tu ben' laorè Simón, ben' ruti' guidi. Zu yu'u quienè' ga'ala' ru'a nisadao'.

⁷ Ude beyudyi una ángel cana', zeyonè'. Caora na' beyèži Cornelio chopa bi' criado quienè' len tu soldado quienè', ben' rapala'n Diuzi, ben' de confianza, ⁸ gudyinè' leyaquè' con cabè' guca quienè', na' use'ela'nè' leyaquè' yedyi Jope.

⁹ Na' beteyu, tu nezioyaquë' tu neza ga'ala' ga zu yedyi Jope, caora na' cadu la'odza urë Pedro lun yu'u, como naca lun yu'u quiejë' ba'a. Na'ra zënë' guicho yu'u na' uzulaonë' ru'elënë' Diuzi di'idza'. ¹⁰ Hora na' rduenë' unabë' hue ben' ga zunë' ta gaonë'. Pero tu neru'eyaquë' laze ta gaonë', cati guca quienë' ca quie ben' rxusa. ¹¹ Caora na' blë'ënë' uyalo guibá, uyëzi tu ta naca ca quie tu la'ari' yua' nerio idapa isquinan. ¹² Laona na' dyila' zë cue' bia guixi', bia dyia tapa ni'e, len zë cue' bëla len bguini. ¹³ Caora na' be Pedro una tu ben' rëbinë' lëbë':

—Pedro, uyasa. Bëtiba', udaoba'.

¹⁴ Na'ra una Pedro:

—Bigaohua'ba', Señor, porque ni tu lasa binegaohua' tu ta biru'en lato gaohua'.

¹⁵ Na' be Pedro una ben' na' tatula rëbinë' lëbë':

—Tu ta aona Diuzi gaolo', binao' biru'en lato gaolo'n.

¹⁶ Beyunate lasa guca quie Pedro cana', na'ra beyëpi la'ari' yua' zeyon guibá tatula. ¹⁷ Neraque Pedro bi re'en inë di'idza' unë ben' na' cati bdyin ben' use'ela' Cornelio ru'a yu'u. Rdayaquë' reguloyaquë' lidyí Simón. ¹⁸ Caora na' bdyinyaquë' unayaquë' zidzo chi zu Simón, ben' laorë Pedro, zan yu'u. ¹⁹ Neraca Pedro pensari cabë' naca ta blë'ënë', caora cati unë Bichi Be quie Diuzi rëbinë' lëbë':

—Abdyin tzona ben' reguló luë'. ²⁰ Beyëzi, beyolëyaquë'. Bidëbo' bibi gaca quio', porque në'ëdi' bia' mandado dexi'yaquë' luë'.

²¹ Na'ra beyëzi Pedro yetilanë' leyaquë' unë' rëbinë' leyaquë':

—Në'ëdi' regulóle. ¿Nuzi use'ela' le'e za'le niga?

²² Na'ra unayaquë' rëbiyaquë' Pedro:

—Nëto' za'ndo' mandado quie capitán Cornelio. Naca Cornelio tu ben' bala'ana, ben' rionla'adyi' Diuzi. Rapala'n yugulu ben' Israel lëbë'. Na'ra bla'ndo' ni, porque niogue bdyin tu ángel quie Diuzi lidyí Cornelio gudyinë' lëbë' ta guidando' dexi'ndo' luë' tacuenda uzënega Cornelio bi di'idza' yëbo'në'.

²³ Na'ra uzi' Pedro leyaquë' lu'u yu'u bega'nyaquë' tu yela. Caora cati beteyu, uyasayaquë' ziolë Pedro leyaquë'. Lëzi uquië'rë Pedro chopa tzona ben' nao xneza Jesús, ben' nita' yedyi Jope.

²⁴ Na'ra cadu zila dza urupe bedyinyaquë' ru'a ciudad Cesarea. Caora na' guzi Cornelio diadza quië' len nu amigo zudyi'ilënë' tacuenda cuzayaquë' idyín Pedro. ²⁵ Cati bdyin Pedro ru'a yu'u, hora na' zio Cornelio yetilë' lëbë', uditzu žibinë' lao Pedro, uyonla'adyi'në' lëbë'. ²⁶ Pero belisa Pedro lëbë' unë':

—Uzuli, lëzi benë'zi ca luë' naca'.

²⁷ Du ru'eyaquë' di'idza', yuy'uyaquë' lu'u yu'u quie Cornelio, blë'ë Pedro babedupa ben' zë lu'u lidyinë'. ²⁸ Na'ra una Pedro rëbinë' leyaquë':

—Dyë'ëdi banezile con ca naca costumbre quiendo' ben' Israel. Nacan žudyi huelëndo' ben' binaca ben' Israel tuže. Ni siquiera ta tzu'undo' lu'u yu'u quieyaquë' biru'en lato. Pero na'a sí, abzión'e Diuzi në'ëdi' de que bireya'ala' inia' biru'en lato huelia' ben' binaca ben' Israel tuže. ²⁹ Por lena' bibi zëdi bia' za'lia' yaca ben' use'elo' dexi' në'ëdi'. Na' biži, ¿ca re'enlo' hua'?

³⁰ Na'ra una Cornelio rëbinë' Pedro:

—Azio tapa dza na', cadu hora na'a, zua' zan yu'u niga rua' ubasi rulidza' Diuzi. Caora na' detilalao tu ben' naco la'ari' bezëri di në'ëdi'. ³¹ Na' una ben' na' rëbinë' në'ëdi': "Cornelio, re Diuzi hora rulidzo' lëbë'. Lëzi rlë'ënë' hora ru'elo' ben' yëchi' caridad. ³² Na' pse'ela' ben' quio' yedyi Jope txexi'yaquë' tu ben' lao Simón Pedro. Zue' zan lidyí itu ben' lao Simón, ben' huëti' guidi. Huedzelejë' lidyinë' zunë' ga'ala' ru'a nisadao'. Caora babra'në' quio' na', hue'lënë' luë' di'idza'." ³³ Pues beyudyi unë' cana', laose'ela'tia' mozo quia' dexi'yaquë' luë'. Babao' tu huen blao' niga. Hora na' rlë'ë Diuzi nita'ro niga tacuenda uzënegando' di'idza' re'en Diuzi inao' nëto'.

Caora bdze' Pedro di'idza' lidyí Cornelio

³⁴⁻³⁵ Na'ra una Pedro rëbinë' leyaquë':

—Hora sí, aoyoñe'eda' de que tuzi ca rue Diuzi yeyëchi'la'adyi'në' nu ben' huen, ben' rapala'n lëbë', chi ben' Israel, chi ben' quie nación tula. ³⁶ Una Diuzi dza na' gudyinë' nëto' ben' Israel de que lao na'a Jesucristo, ben' naca Señor quie yugulu benë', huata' tadya'a yega'nnan huen quie yaca benë' lao Diuzi. ³⁷ Dyë'ëdi nezile cabë' guca lao yaca yedyi quie ben' Israel. Uzulao Jesús udxogue'në' xti'idza' Diuzi estado Galilea dza na' cati beyudyi udxogue' Juan bautista xti'idza' Diuzi bë' lao yaca benë'. ³⁸ Lëzi dyë'ëdi nezile use'ela' Diuzi Bichi Be quienë' bëlënë' Jesús yela' huaca quienë', udanë' benë' puro tadya'a, beyuenë' yaca ben' yu'u taxi'ibi' nun quie nuelë' Diuzi lëbë' tuže. ³⁹ Nëto' blë'ëndo' yugulu ta bë Jesús caora zue' udë' estado Judea len ciudad Jerusalén. Ude beyudyi na' bda'yaquë' lëbë' lë'ë yaga

cruzo bëtiyaquë' lëbë'. ⁴⁰ Pero bë' baode tzona dza pseban Diuzi lëbë' bidë' detilalaonë' nëto'. ⁴¹ Pero nëto'zi ptilalaonë', quele yugulu benë'. Ulio Diuzi nëto' dza na'te ta gacando' testigo cabë' guca quienë' gutinë' bebannë'. Nëto' udaondo' hue'endo' len lëbë' cati bebannë'. ⁴² Na'ra use'ela' Diuzi nëto' tzetixogue'ndo' benë' di'idza' quienë' rëbindo'yaquë' de que ulio Diuzi Jesús ben' hue juicio quele yugulu benë', la'achi ben' neban, la'achi ben' baguti. ⁴³ Lëscan' desde dza na'te una yaca ben' udixogue' xti'idza' Diuzi rëbiyaquë' quie Jesús, unayaquë' gata' yela' huezi'ze quie yugulu ben' nao xnezë'.

Caora uyu'u Bichi Be quie Diuzi lu'u guicho laxta'o ben' binacaja ben' Israel

⁴⁴ Bineyudiyi hue'lë Pedro lejë' di'idza' caora uyu'u Bichi Be quie Diuzi lu'u guicho laxta'o ben' bzënaga di'idza' quië'. ⁴⁵⁻⁴⁶ Na'ra uzulaoyaquë' rnëyaquë' di'idza' tula, di'idza' binaca quieyaquë', rulidzayaquë' Diuzi. Na'ra yaca ben' Israel, ben' uza'lë Pedro, tu bega'nzijië' rebanziyaquë' porque hasta ben' tulala, ben' binaca ben' Israel, uyu'urëyaquë' Bichi Be quie Diuzi.

⁴⁷ Na'ra una Pedro rëbinë' laguëdyinë':

—¿Quele baoyu'uyaquë' Bichi Be quie Diuzi laga ca uyu'unë' ra'o? Quie lena' nunu udzon hue'ro laoyaquë'.

⁴⁸ Caora na' bë Pedro mandado hue'yaquë' laoyaquë' uzëtöyaquë' lao Jesucristo. Ude beyudiyi na' unabayaquë' yega'nlë Pedro leyaquë' chopa tzona dza.

11

Bedyin Pedro ciudad Jerusalén udixogue'në' cabë' guca quienë'

¹ Na'ra unezi yaca apóstol len los demás ben' quie Jesús nita' estado Judea de que banaorë ben' tulala, ben' binaca ben' Israel, xti'idza' Diuzi. ² Cati bedyin Pedro ciudad Jerusalén, na'ra yaca ben' Israel, ben' nao xneza Jesús, udilayaquë' Pedro unayaquë' ³ rëbiyaquë' lëbë': —¿Biquien' uyu'ulo' lu'u yu'u quie ben' tulala, yaca ben' binaca ben' Israel, udaolao' tuze len leyaquë'?

⁴ Na'ra una Pedro rëbinë' leyaquë' yugulu con cabë' guca quienë' unë':

⁵ —Uya'a yedyi Jope. Na' caora blidza' Diuzi, guca quia' ca quie tu ben' rxusa, blë'ëda' uyëzi tu ta naca ca quie tu la'ari' yua' nerio idapa isquinan guibá. ⁶ Caora una' dyë'ëdi, blë'ëda' dyila' zë cue' bia guixi', bia dyia tapa ni'e, len zë cue' bëla, len bguini. ⁷ Hora na' beda' unë tu ben' una në'ëdi': "Pedro, uyasa. Bëtiba', udaoba'." ⁸ Pero agudya' ben' na': "Bigaohua'ba', Señor, porque ni tu lasa binegaohua' tu biru'en lato gaohua'." ⁹ Na'ra una ben' na' rëbinë' në'ëdi' tatula: "Tu ta aona Diuzi gaolo', binao' biru'en lato gaolo'n." ¹⁰ Beyunate lasa unë' në'ëdi' cana', na'ra beyëpin zeyonan ladza. ¹¹ Caora na' bdyin tzona yaca ben' reguilo në'ëdi', ben' uza'yaca yedyi Cesarea dexi'yaquë' në'ëdi'. ¹² Hora na' una Bichi Be quie Diuzi rëbinë' në'ëdi': "Uzi', uyolëyaquë'. Bibi cuidado gapo'." Por lena' uza'a uquië'a xopa ben' nao xneza Jesús ziondo' ga zu ben' use'ela' yaca ben' dexi' në'ëdi'. ¹³ Caora bdyindo' lidyi ben' na', udixogue'në' nëto' con cabë' blë'ënë' në' bdyin tu ángel lidyinë' rëbinë' lëbë': "Use'ela' ben' quio' tzioyaquë' yedyi Jope tzexi'yaquë' tu ben' lao Simón Pedro. ¹⁴ Lëbë' inë' luë' cabë' huelo' ta ute usela Diuzi luë' lente yugo diadza quio'." Cana' una ángel rëbinë' lëbë'. ¹⁵ Na'ra uzulaohua' ru'elia'yaquë' di'idza', caora na' uyu'u Bichi Be quie Diuzi lu'u guicho laxta'oyaquë' laga ca uyu'unë' lu'u guicho laxta'oro dza na'te. ¹⁶ Hora na' beza'la'adya' di'idza' una Jesús caora unë': "Tali bë' Juan laole conlë nisa, pero netza'la ca hue Diuzi quiele, ise'elë' Bichi Be quienë' ta tzu'unë' lu'u laxta'ole." ¹⁷ Pues como bë' Diuzi lato tzu'u Bichi Be quienë' lu'u laxta'oyaquë' laga con cabë' bënë' quiero, ben' nao xneza Señor quiero Jesucristo, ¿nuzi naca në'ëdi' bihua' ca re'en Diuzi hua'?

¹⁸ Na'ra yaca ben' quie Jesús, ben' nita' ciudad Jerusalén, caora beyaquë' cabë' di'idza' ru'e Pedro, bira pquëpiyaquë' lëbë', unayaquë' rëbiyaquë' laguëdyiyaquë':

—Diuzi naquë' ben' ze. Como hasta ben' tulala, ben' binaca ben' Israel, re'en Diuzi utza'yaquë' pensari quieyaquë' tacuenda gata' yela' neban quieyaquë' tuzioli.

Cabë' guca unita' ja ben' nao xneza Jesús ciudad Antioquia

¹⁹ Na'ra cati bëtiyaquë' Esteban dza na'te, lëscan' uzulaoyaquë' rueyaquë' contra yaca los demás ben' nao xneza Jesús, ben' nita'ja na'. Por lena' bdzatzajë' uza'yaquë' ziojë' yedyi tula. Ziojë' ciudad Antioquia, ziojë' yedyi nebaba Fenicia, ziojë' yedyi nebaba Chipre. Na'ra yaca ben' uza'ja ciudad Jerusalén, biudixogue'yaquë' yugulu benë' xti'idza' Diuzi, dechan' entre yaca ben' Israelzi udixogue'jë' xti'idza' Diuzi. ²⁰ Pero ibala ben' nao xneza Jesús, ben' uza'ja yedyi nebaba Chipre, len ben' uza'ja yedyi nebaba Cirene, zioyaquë' bdyinyaquë' ciudad Antioquia uzulaoyaquë' rguixogue'yaquë' ben' tulala, ben' binacaja ben' Israel, xti'idza' Jesús. ²¹ Na'ra bë Diuzi yela' huaca quië' lao na'ayaquë'. Por lena' zëyaquë' psanyaquë' costumbre gula quieyaquë', unaoyaquë' xneza Jesús.

²² Na'ra ben' nao xneza Jesús, ben' nita' ciudad Jerusalén, caora uneziyaquë' cabë' guca ciudad Antioquia, use'ela'yaquë' Bernabé ciudad na'. ²³ Caora bdyinnë' na', blë'ënë' bë Diuzi yela' huaca quienë', bëla'iyane' leyaquë'. Na'ra redaohuetzegue Bernabé unëyuenë' leyaquë' ta inorayaquë' xneza Jesús du guicho du la'adyi'yaquë'. ²⁴ Cana' bë Bernabé como dan' naquë' ben' dya'a, ben' yu'u Bichi Be quie Diuzi, ben' nao xneza Jesús du guicho du la'adyi'. Cana' bënë' gan gule ben' zë, ben' nao xneza Jesús.

²⁵ Ude beyudyi na', uza' Bernabé zionë' yedyi Tarso tzedilanë' Saulo. Caora bedzelenë' lëbë', uquië'në' lëbë' ciudad Antioquia. ²⁶ Na'ra lao tu iza naya' bega'nyaquë' len ben' nao xneza Jesús psëdiyaquë' ben' zë xti'idza' Diuzi. Na' yaca ben' nita' ciudad Antioquia, leyaquë' uxubayaquë' tanëro lao ben' nao xneza Jesús ben' cristiano.

²⁷ Caora na' ciudad Antioquia bdyin chopa tzona ben' rguixogue' xti'idza' Diuzi, ben' uza'yaca ciudad Jerusalén. ²⁸ Na'ra uzuli tu ben' za' leyaquë' laonë' Agabo ga bedupa yaca ben' nao xneza Jesús. Du yu'unë' Bichi Be quie Diuzi, unë' rëbinë' leyaquë':

—Una Diuzi në'ëdi' gaca tu obin huala duze yedyi layu. —Cana' unë' gudyinë' leyaquë'.

²⁹ Pues gucan con ca unë'. Guca tu obin huala tiempo uzu tu ben' lao Claudio, ben' naca rey quie ben' romano. Na'ra yaca ben' nao xneza Jesús nita' ciudad Antioquia, udilojë' modo gacalëyaquë' laguedyiyaguë' ben' nao xneza Jesús, ben' nita' estado Judea. ³⁰ Cana' ptupayaquë' lë'ëti' huio dumi ise'ela'yaquë'n lao na'a Bernabé len Saulo ta tzehua'ayaquë'n tzesanyaquë'n lao na'a yaca ben' nao xneza Jesús, ben' nita' ciudad Jerusalén.

12

Cabë' guca bëtijë' Santiago bdze'yaquë' Pedro lu'u dyiguiba

¹ Na'ra dza na' uzulao rey Herodes ruenë' contra yaca ben' quie Jesús. ² Bënë' mandado guti soldado quienë' Santiago, ben' bichi Juan. Bëtiyaquë' lëbë' conlë espada quieyaquë'. ³ Caora blë'ë rey Herodes de que raxe ben' Israel ruenë' contra ben' quie Jesús, na'ra bëxorënë' Pedro bënë' lëbë' preso. Bdze'në' lëbë' lu'u dyiguiba dza rueyaquë' lani cati reza'la'adyi' ben' Israel dza beza' yaca xuzixta'oyaquë' nación Egipto. ⁴ Na'ra ude beyudyi bdze'në' lëbë' lu'u dyiguiba, bë rey Herodes mandado zio chi'inu'betu soldado ta gapayaquë' lëbë'. Tapazi soldado udapayaquë' lëbë' tu chi' huio. Na'ra psaque' rey Herodes cuionë' Pedro lu'u dyiguiba cati ude dza lani tacuenda guti ja soldado lëbë' zaquë'lao lao ben' yedyi. ⁵ Tu nede Pedro lu'u dyiguiba, caora na' rulidza yaca ben' quie Jesús Diuzi du guicho du la'adyi'yaquë' por nun quie Pedro.

Bebio Diuzi Pedro lu'u dyiguiba

⁶ Pues binedyin hora tzeni' ta cuio rey Herodes Pedro lu'u dyiguiba. Nede Pedro narionë' chopa caden rasinë' entre chopa soldado. Lëzi zë ja mazera soldado rapayaquë' ru'a yu'u dyiguiba. ⁷ Caora na' ure' xni' gui' lu'u dyiguiba labdyinte tu ángel quie Diuzi. Na'ra ptanë' Pedro ta psebënë' lëbë' rëbinë' lëbë':

—Labe uyasa.

Bë' uyasa Pedro, cuinzi cadena bguinojan dan' narionë'. ⁸ Na' una ángel tatula rëbinë' lëbë':

—Pquio cincho quio' bde huarache quio'.

Ude beyudyi bë Pedro con ca una ángel gudyinë' lëbë', na'ra una ángel rëbinë' lëbë' tatula:

—Bdubi gabán quio' unao në'ëdi'.

⁹ Caora na' zio Pedro zenaonë' ángel, pero biraquenë' chi tali cabë' raza quienë' len ángel, dechan' raquenë' rxusanë'. ¹⁰ Na'ra chopa cue' udeyaquë' ga zë soldado rapa dyiguiba, bdyinyaquë' ga zu puerta de guiba ga beyudyite yeroyaquë' la'o yedyi. Na' tu cuinzina uyalo puerta na' bedeyaquë' beroyaquë' lu'u dyiguiba. Ledao'zi beza'yaquë' na' lazeyote ángel, bega'n Pedro tuzinë'. ¹¹ Caora na' gucabë' Pedro nacan li cabë' guca quienë', unë':

—Pues nacan li de que use'ela' Diuzi tu ángel quienë' ta pselanë' në'ëdi' con ca re'en rey Herodes len ja ben' Israel huejë' quia'.

¹² Na'ra zionë' racanë' pensari cabë' guca quienë' bdyinnë' lidyi María, zna' Juan, ben' laorë Marcos. Pero lu'u yu'u na' babedupa ben' zë, ben' nao xneza Jesús, rulidzayaquë' Diuzi por nun quie Pedro. ¹³ Na'ra bdyinnë' lali'a zënë' ru'a yu'u ruxidyiguë' lë'ë puerta. Caora na' zio tu nígula dao' laobi' Rode tzena'bi' nu ruxidyi puerta, ¹⁴ caora na' bezaquebi' chi' Pedro, pero bialalobi' puerta nun quie redaohuebi' bebi'bi' zeyobi' lu'u yu'u gan nita' ja ben' rulidza Diuzi yeguëdyibi' leyaquë' babbdyin Pedro zënë' ru'a yu'u. ¹⁵ Na'ra na ja ben' nita' lu'u yu'u rëbiyaquë' lëbi':

—¿Que raza tondulo?

Pero lëbi' nabi' talicazi bdyin Pedro ru'a puerta. Na'ra unayaquë' rëbiyaquë' lëbi':

—Cala lëbë', dechan' ángel quienë'.

¹⁶ Pero zécazi Pedro ruxidyigué' lè'è puerta. Na' cati usaloyaqué' puerta blè'ëyaqué' lèbè', lega bdzebiyaqué'. ¹⁷ Na'ra bènè' seña conlè nè'è ta yega'nyaqué' chizi. Caora na' gudyinè' leyaqué' cabè' guca ulio Diuzi lèbè' lu'u dyiguiba. Quie lena' unè' rëbinè' leyaqué':

—Ületzegüdyi Santiago lente yaca los demás bichiro cabè' ta uzaca' beroga' lu'u dyiguiba.

Ude beyudyi na', uzi'nè' zeyoguè' ga tula.

¹⁸ Biçi cati uyenina' ziladao', legazi uyu'u soldado ru'be, porque bineziyaqué' bi guca quie Pedro. ¹⁹ Cana' bè rey Herodes mandado tzio soldado tula tzediloyaqué' Pedro, pero ganu Pedro bedzeleyaqué'. Hora na' beyëzinè' pquëpinè' ja soldado rapa dyiguiba, pero biubinyaqué' bi inayaqué'. Na'ra bè rey Herodes mandado gati yaca soldado. Ude beyudyi na', uza'nè' estado Judea zionè' yesunè' ciudad Cesarea.

Cabè' guca guti rey Herodes

²⁰ Na'ra puro yedyi ga rnabè' rey Herodes na' ra'o yaca ben' yedyi Tiro len ben' yedyi Sidón ta raoyaqué'. Pero rey Herodes na' rdza'nè' leyaqué'. Quie lena' gucayaqué' de acuerdo ta tzena'yaqué' lèbè' ta hue'lëyaqué' lèbè' di'ida'. Por lena' yeyubiyaqué' tu ben' lao Blasto, ben' naca empleado quie rey Herodes, cuenda na' chi huenè' tu cule hue'lënè' rey Herodes di'ida' ta yega'ntza'olè rey Herodes leyaqué'. ²¹ Cati bdyin dza ru'elè rey Herodes leyaqué' di'ida', guconè' zabanè' ta racocazi rey, yeque'nè' xlatonè' ga rbezè' benè', uzulaonè' ru'elè'nè' yaca benè' di'ida'. ²² Na'ra yaca ben' bzënaga quienè', unëyaqué' zidzo nayaqué':

—¡Quele benè' rnè, nechan' tu diuzi rnè!

²³ Bineyudyi di'ida' caora labdyinte tu ángel quie Diuzi bènè' ta gaca zhue' rey Herodes, porque bigudyinè' yaca ben' bzënaga quienè' de que bireya'ala' tzionla'adyi'jè' lèbè', tuzi Diuzi reya'ala' tzionla'adyi'jè'. Na'ra udao bèla dao' biçu yu'u lu'u lè'ënè' lèbè' gutinè'.

²⁴ Tu dza, tu dza, ziorarè xti'ida' Diuzi cabè' udixogue'jè' duze yedyi re' na'.

²⁵ Na'ra Bernabé len Saulo, caora beyudyi dyin quieyaqué', beza'yaqué' ciudad Jerusalén zeyoyaqué' ciudad Antioquía uquiè'yaqué' Juan, ben' laorè Marcos.

13

Bernabé len Saulo uzulaojè' rdajè' rguixogue'jè' benè' xti'ida' Diuzi tu tu yedyi

¹ Na'ra entre ja ben' nao xneza Jesús nita' ciudad Antioquía, uzu yaca ben' psèdi udixogue' xti'ida' Diuzi. Uzu tu ben' lao Simón Gaso. Lëscan' uzurè tu ben' yedyi Cirene laonè' Lucio. Lëscan' uzurè itunè' laonè' Manaën, ben' abgualè Herodes. Naca Herodes gobernador quie estado Galilea. Lèzi ciudad Antioquía nita'lè Saulo len Bernabé len los demásyaqué'. ² Biçi cati guca tu dza rionla'adyi'yaqué' Diuzi rueyaqué' ubasi, hora na' unè Bichi Be quie Diuzi gudyinè' lejè':

—Uleuda' Bernabé len Saulo ta tzioyaqué' hueyaqué' ca tu dyin re'enda' hueyaqué'.

³ Quie lena' bipsanjè' bëyaqué' ubasi. Caora na' du rulidzayaqué' Diuzi, na' bda'yaqué' na'ajè' guicho Bernabé len Saulo unabayaqué' gacalè Diuzi leyaqué'.

Yaca apóstol na' udixogue'jè' benè' xti'ida' Diuzi isla Chipre

⁴ Na'ra use'ela' Bichi Be quie Diuzi leyaqué' uza'yaqué' zioyaqué' ciudad Seleucia. Caora na' udejè' yedyi na' uyu'uyaqué' lu'u barco ta idyinyaqué' isla Chipre. Naquiè'jè' Juan Marcos ta gacalènè' leyaqué'. ⁵ Na'ra cati bdyinyaqué' yedyi Salamina. Caora na' rioyaqué' lu'u sinagoga quie ja ben' nacaja ben' Israel, uzulaoyaqué' rguixogue'jè' leyaqué' xti'ida' Diuzi. ⁶ Pues udayaqué' duzete isla Chipre bdyinyaqué' yedyi Pafos. Na' yatilayaqué' tu ben' Israel laonè' Barjesús. Naquè' ben' brujo, nanè' rnè' puro xti'ida' Diuzi, dechan' ben' huezi' yè'. ⁷ Pues ben' brujo na' zuè' lao ben' naca gobernador laonè' Sergio Paulo. Pues gobernador na' naquè' ben' de pensari. Bènè' mandado tzexi'yaqué' Bernabé len Saulo, porque re'ennè' yenè' con cabè' naca xti'ida' Diuzi. ⁸ Pero ben' brujo na' laorènè' Elimas, bènè' contra Bernabé len Saulo. Bigu'unnè' gale gobernador xti'ida' Diuzi. ⁹ Na'ra Saulo na' laorènè' Pablo, du yu'unè' Bichi Be quie Diuzi, una'nè' ben' brujo dyè'èdi, unè' gudyinè' lèbè':

¹⁰ —Ben' huezi' yè', ben' mala naco'. Naco' Zi'i taxi'ibi'. Puro tamedian rguilolo' ruelo'. ¿Bixquien' birsanlo' rzui' benè' yè' bire'enlo' galeyaqué' xti'ida' Diuzi? ¹¹ Pues na'ra abdyin hora hue Diuzi luè' castigo. Gaco' ben' laochula. Zèdza ni siquiera xni' obidza bira ilè'èlo'.

Caora na' laochulate lao ben' brujo, bira blè'ënè'. Na' unabayèchi'nè' gudyinè' nu ben' bëxo nè'è, ben' bequiè' lèbè'. ¹² Caora blè'è gobernador cabè' guca quie ben' brujo, na'ra gulenè' xti'ida' Diuzi. Tu bega'nzinè' bebanzinè' con cabè' naca yela' huaca quie xti'ida' Señor quiero Jesucristo.

Bdyin Pablo len Bernabé ciudad Antioquía ga nebaba Pisidia

¹³ Na'ra Pablo lènè' yaca ben' za'lènè', uza'yaquè' yedyi Pafos con lu'u barco zioyaquè' bdyinyaquè' yedyi Perge ga nebaba Panfilia. Pero Juan Marcos na' psanla'adyi'nè' leyaquè' beza'nè' na', bedyinnè' ciudad Jerusalén. ¹⁴ Caora na' udeyaquè' yedyi Perge bdyinyaquè' ciudad Antioquia ga nebaba Pisidia. Caora guca dza huezila'adyi', uza'yaquè' zioyaquè' lu'u sinagoga ure'yaquè'. ¹⁵ Ude beyudyi unè' yaca ben' re' na' di'idza' bzu Moisés len yaca los demás ben' profeta lè'è' guichi, na'ra use'ela' yaca xan' sinagoga tu ben' unè' gudyinè' leyaquè':

—Bicha', chi re'enle yèbile ja benè' bi di'idza', huazaque' yèbilejèn na'a.

¹⁶ Pues na'ra uzulí Pablo ga re'nè', bènè' seña conlè na'anè' tacuenda na' inita'jè' chizi uzè'nagayaquè' quienè'. Na'ra unè' rëbinè' leyaquè':

—Ulezècara nagale le'e ben' Israel len yugulu le'e ben' rionla'adyi'rè Diuzi. ¹⁷ Pserè Diuzi xuzixta'oro bènè' uyeyaquè' gucayaquè' ben' zè dza nenita'jè' yu binaca quieyaquè', yu nebaba nación Egipto. Conlè yela' huaca quienè' gucalènè' xuzixta'oro beza'yaquè' na'. ¹⁸ Pero con paciencia uzi'ze Diuzi quieyaquè' dza udayaquè' chopa galo iza tu paraje ga bidyia yu'u. ¹⁹ Caora na' bdyiaguí Diuzi gadyi yedyi ta nebaba Canaan, bènè' xuzixta'oro layu quie ben' na' gucan quieyaquè'. ²⁰ Na'ra cadu tapa gayuhua iza yu gatzo ulio Diuzi yaca ben' gaca juez quieyaquè' ta inabè'nè' leyaquè'. Cana'zi bega'nnan hasta dza rda tu ben' profeta laonè' Samuel. ²¹ Hora na' unaba xuzixta'oro usere Diuzi tu rey, ben' inabè' leyaquè'. Na'ra ulio Diuzi tu ben' laonè' Saúl, zi'i Cis. Naquè' diadza quie xuzixta'oro Benjamín, ben' unita' dza na'te. Na'ra guquè' rey quieyaquè' cadu chopa galo iza. ²² Pero uderala cati bezi' Diuzi yela' rnabè' quie Saúl, bènè' mandado gaca David rey quieyaquè' lao laza Saúl. Na'ra quie rey David unè' Diuzi caora unè' rëbinè' xuzixta'oro: “Na'a sí, baolioga' David zi'i Isai ta gaquè' rey quiele, porque rexeda'nè' ruenè' du guicho du la'adyi'nè' con ta re'enda' huenè'.”

²³ Na'ra nernè Pablo rëbinè' leyaquè':

—Según ca compromiso bè Diuzi dza na'te, ulionè' de entre yaca zi'isuba rey David nu ben' ute usela ra'o yeyoro ga zu Diuzi. Naca Jesús lèben' ulionè' ta ute uselanè' ra'o. ²⁴ Pues tu zaquixogue' Jesús xti'idza' Diuzi, udxogue' Juan bautista ra'o de que yuguloro reya'ala' utza'ro pensari quiero cuenda hue' Juan laoro. ²⁵ Na'ra cati baruen bago dza gati Juan unè': “Raquale naca' Cristo, pero binaca' Cristo. Zaza'rala ben' naca Cristo. Tantozi nacaré' ben' belao ca nè'èdi', ni lè'èti' bibizaca' ni siquiera biyeyazoga' cuioga' guidi yu'u ni'anè'.”

²⁶ Na'ra nernè Pablo rëbinè' lejè':

—Le'e ben' zi'isuba xuzixta'ohua' Abraham, len le'e ben' tula, ben' rionla'adyi'rè Diuzi, nacan para le'e di'idza' rnia' niga. Rguixogue'n quie ben' ute usela ra'o yeyoro ga zu Diuzi. ²⁷ Pues ja ben' nita' ciudad Jerusalén lente ben' rnabè' quieyaquè', binezijè' chi zi'i Diuzi naca Jesús. Lèzi raquayaquè' rioñe'eyaquè' bi re'en ina di'idza' bzu ben' profeta lè'è' guichi caora cati rulabajè' lu'u sinagoga dza sábadu. Pero birioñe'eyaquè'n, dechan' bëyaquè' yela' mala con ca una ben' profeta hueyaquè' udaoyaquè' Jesús xquia gu'unyaquè' guti'yaquè' lèbè'. ²⁸ Bizi biubinyaquè' bi hueyaquè' ta guti ben' rnabè' Jesús, porque bibi dula' xquia de quienè'. Cana' gu'unjè' guti Pilato Jesús ta gatinè' ca quie ben' de dula' xquia quie. ²⁹ Na'ra caora baguca quie Jesús con ca rna lè'è' guichi la'iya quie Diuzi ca gaca quie Jesús, bechizayaquè' lèbè' ga gutiè' lè'è' yaga cruzo yecachi'yaquè' lèbè'. ³⁰ Pero pseban Diuzi lèbè' zionè' ptilè' con yaca ben' quienè', ben' uza'lè lèbè' estado Galilea bdyinyaquè' ciudad Jerusalén. ³¹ Pues zidza uzulènè' yaca ben' quiè' na'. Leyaquè' rguixogue'jè' benè' con ca guca quie Jesús.

³² Lèzi nètò' zèndo' niga rguixogue'ndo' le'e xti'idza' Diuzi, rguixogue'ndo' le'e de que según compromiso bèlè Diuzi xuzixta'oro dza na'te, bzuè' di'idza' quiè' caora cati psebannè' Jesús. ³³ Lèzi para ra'o pseban Diuzi lèbè', como nacaro zi'isuba leyaquè'. Pseban Diuzi lèbè' con cabè' rguixogue'n lè'è' guichi salmo chopa cabè' rnèn caniga: “Luè' naco' zi'ina'. Abdyin dza ulu'ena' yaca ben' nita' lao yedyi layu zi'ina' luè'.” ³⁴ Lèzi una Diuzi dza na'te de que usebannè' Jesús tacuenda yebannè' tuzioli bira gaticazinè'. Quie lena' unè' caora nè': “Huecaza' huen quiele según ca compromiso bèlia' xuzixta'ole rey David.” ³⁵ Lèzi rnèn lè'è' guichi tula cabè' hue Diuzi quie zi'inè'. Lena' rnèn cani: “Bihue'nè' lato itabo cuiaguí' cuerpo quie zi'inè', ben' naca la'iya quienè'.”

³⁶ Na'ra nernè Pablo rëbinè' leyaquè':

—Pues xuzixta'oro rey David, bènè' cumplir con ca gudyi Diuzi lèbè' dza nezunè' yedyi layu. Pero bdyin dza quienè' gutinè' yecachi'yaquè' lèbè' ga racachi'yaquè' xuzixta'oro. Na'ra utabo cuerpo quienè', ³⁷ pero biutabo cuerpo quie Jesús, porque pseban Diuzi lèbè'. ³⁸ Bicha', reya'ala' inezile de que lao na'a Jesús yezi'ze Diuzi dula' xquia quiele. ³⁹ Lèscan' lao na'a Jesús hualè'è' Diuzi yugu ben' nao xneza Jesús ben' laxta'o yèri. Pero quie ley pca'n Diuzi lao na'a Moisés, bide fuerza valor quie ley na' ta ilè'è' Diuzi ben' nao ley na' ben' laxta'o

yëri. ⁴⁰ Pues quie lena' gapale cuidado ta bigaca quiele con ca bzu ja ben' profeta lë'ë guichi cati una Diuzi cani:

⁴¹ Hua' tu yela' milagro quia' dza rdale yedyi layu, pero yela' yaladyi' quiele, bigalele quie yela' milagro quia' hua'.

Ba'ala'cazi nu ben' yexi'idze'në' le'e, bigalecazile.

Tu yebanzile ilë'ële con ca hua' entre le'e, pero como dan' biralele, lena' udyiagu' a le'e.

Cana' una Pablo udixogue'në' leyaquë' con cabë' una Diuzi dza na'.

⁴² Na'ra cati bero Pablo len yaca laguedyinë' lu'u sinagoga, ben' zë, ben' bzënaga quië', unabajë' lëbë' chi biyeguidë' ixun' ta yexi'idze'në' leyaquë' mazera. ⁴³ Na'ra bedzatza-yaquë' lu'u sinagoga, pero zë ben' Israel len ben' tula, ben' naotzegue religiön quie ben' Israel, unaoyaquë' ziolëyaquë' Pablo len Bernabë tu neza. Caora na' bë' Pablo len Bernabë leyaquë' consejo gudyya-quë' leyaquë' biyuhuëdiyaquë' inaoyaquë' xneza Diuzi nun quie ulio Diuzi nedyë'ë Diuzi leyaquë'.

⁴⁴ Na'ra beya' xun' bedupa casi yugu ben' yedyi lu'u sinagoga ta uzënegayaquë' con cabë' rna xti'idza' Diuzi. ⁴⁵ Na'ra cati blë'ë yaca los demás ben' Israel cabë' abedupa ben' zë uzënegayaquë' ca una Pablo, caora na' gucazë'yaquë' uzulaoyaquë' rnë'ëyaquë' Pablo hasta ptasi bnioyaquë' lëbë'. ⁴⁶ Pues hora na' bibdzebi Pablo len Bernabë unayaquë' rëbiyaquë' leyaquë' cani:

—Pues tanëro reya'ala' za'ndo' quixogue'ndo' le'e xti'idza' Diuzi porque nacale ben' Israel. Pero na' le'e bire'enle uzënegale. Bire'enle gun Diuzi le'e yela' neban tuzioli. Quie lena' yeza'ndo' niga tzetixogue'ndo' yaca ben' binaca ben' Israel con cabë' rna xti'idza' Diuzi. ⁴⁷ Porque cana' use'ela' Diuzi nëto' unë' gudyyinë' cani:

Bzua' le'e ca quie tu gui' zë tacuenda ilë'ë yaca ben' tula, ben' binaca ben' Israel.

Ise'ela' le'e ta tzetixogue'le xti'idza' yaca ben' nita' yedyi zitu' gula.

⁴⁸ Na'ra bë' be yaca ben' binaca ben' Israel ca unë Pablo, legazi redaohueyaquë' nayaquë' naca dya'a xti'idza' Diuzi. Pues gule yaca ben' ulio Diuzi, yaca ben' re'en Diuzi gata' yela' neban quie tuzioli. ⁴⁹ Na'ra bipsan ben' quie Jesús quixogue'yaquë' ben' nita' yugulu yedyi re' na' xti'idza' Diuzi. ⁵⁰ Pero bala ben' Israel bë'lëyaquë' ben' belao quie yedyi, lente bala nigula bala'ana di'idza'. Unabayaquë' chi bigacalëyaquë' leyaquë' ta yebioyaquë' Pablo len Bernabë ciudad na'. ⁵¹ Caora na' pchibi Pablo len Bernabë yu bëxte dyia huarache quieyaquë', porque según costumbre quieyaquë', lena' nacan seña de que psaca ben' ciudad na' leyaquë' bizinaquezi. Caora na' beza'jë' ziojë' ciudad Iconio. ⁵² Pero con ca tu yaca ben' bagule xti'idza' Jesús, uyu'uyaquë' Bichi Be quie Diuzi redaohuetzegueyaquë'.

14

Pablo len Bernabë bdyinyaquë' ciudad Iconio

¹ Na'ra bë' bdyin Pablo len Bernabë ciudad Iconio, zioyaquë' uyu'uyaquë' lu'u sinagoga quie ben' Israel. Na' bë'lëyaquë' ben' bedupa lu'u sinagoga na' di'idza'. Caora na' ben' zë guleyaquë' ca gudyyi Pablo len Bernabë leyaquë', tanto ben' Israel como ca ben' binaca ben' Israel. ² Pero yaca ben' Israel, ben' birale cabë' di'idza' ru'e Pablo len Bernabë, unëyaquë' contra leyaquë'. Na'ra ja ben' binaca ben' Israel, guleyaquë' ca di'idza' unë ben' Israel contra lejë', blë'ëyaquë' ben' mala ben' nao xneza Jesús. ³ Quie lena' bega'n Pablo len Bernabë zidza na'. Birdzebijë' udixogue'yaquë' con cabë' rna xti'idza' Jesús. Pues bë' Diuzi leyaquë' lato hueyaquë' yela' milagro quienë' tacuenda inezi yaca ben' yedyi na' de que huacalë Diuzi nutezi ben' gale xti'idzë'. ⁴ Quie lena' guca yaca ben' ciudad Iconio chopa cue'. Tu cue'yaquë' bë'lëyaquë' ben' Israel, ben' binao xneza Jesús tuze. Pero itu cue'jë' bda'yaquë' yaca apóstol. ⁵ Quie lena' guca yaca ben' binao xneza Jesús de acuerdo len ben' rnabë' quieyaquë' ta hueyaquë' leyaquë' bizinaquezi quieyaquë' leyaquë' yo. ⁶ Biži caora unezi Pablo len Bernabë ca re'enyaquë' hueyaquë' quieyaquë', uza'yaquë' zioyaquë' yu nebaba Licaonia, udeyaquë' ciudad Listra len ciudad Derbe, uderëyaquë' yaca ciudad tula, ciudad re' ga'ala'. ⁷ Con ga udeyaquë', udixogue'jë' benë' con cabë' rna xti'idza' Diuzi.

Ciudad Listra udijë' Pablo yo

⁸ Na'ra ciudad Listra uzu tu be'mbyu, ben' biraca sa'. Ni tu lasagazi binesa'në'. Puro re'tezinë' como nazinë' desde cati galotenë'. ⁹ Na'ra re'në' rzënaquë' con cabë' di'idza' ru'e Pablo. Na'ra una' Pablo lëbë' dyë'ëdi, gucabë'në' rzudyi'ilë ben' ži Diuzi rbezë' yeyue Diuzi lëbë'. ¹⁰ Na'ra unë Pablo zidzo gudyyinë' lëbë':

—Uzuli, bezu ni'alo' derecho.

Caora na' uxitinë' labezutenë' ni'anë' yu, laozulaotenë' rza'në'. ¹¹ Biži cati blë'ë ja benë' cabë' bë Pablo quie ben' ži, unëyaquë' zidzo rëbiyaquë' laguedyya-quë':

—İbaoyëzi chopa diuzi quierol! İNacajë' forma quie benë' detilaloayaquë' ra'o niga!

¹² Na' unéyaquë' xti'idza'yaquë', di'idza' quie ben' Licaonia. Unayaquë' naca Bernabé tu diuzi laoné' Júpiter. Lëzi unayaquë' naca Pablo itu diuzi laoné' Mercurio. Na'ra unayaquë' naca Pablo diuzi Mercurio, porque nayaquë' naca Mercurio ben' ru'etzegue di'idza' cabë' ru'e Pablo. ¹³ Na'ra ru'a ciudad na' zu tu idao' quie diuzi Júpiter. Pues na' bro tu pxuzi quie idao' na', bdyinnë' ga zë Pablo len Bernabé. Naquië'në' bëdyihuaga, bia nuetza'onë' con yo. Na'ra pxuzi lënë' yaca ben' nita' na', re'enyacuë' tzionla'adyi'yaquë' Pablo len Bernabé nayaquë' yaca diuzi leyaquë'. Re'enyacuë' gutiyaquë' bëdyihuaga ca quie gun quieyaquë'. ¹⁴ Na'ra cati gucabë' Pablo len Bernabé cabë' re'enyacuë' huejè', caora na' uzulaoyaquë' rchezayaquë' zabayaquë', yu'uyaquë' lado yaca benë' na' unéyaquë' zidzo rëbiyaquë' leyaquë':

¹⁵ —¡Benë'! ¿Bixquien' ruele tamedian quiele ruele cana'? Lëzi benë'zi ca le'e nacarëndo' za'ndo' quixogue'ndo' le'e ta usanle ta bibi sirve rionla'adyi'le benë'. Reya'ala' tzionla'adyi'le tuzi Diuzi zu guibá, Diuzi neban tuzioli. Como lëbë' bënë' guibá, lëbë' bzalogue' dyila yu, lëbë' udixuguë' nisadao'. Hasta con lao yugulë bënë'. ¹⁶ Na'ra dza na'te ba'ala'cazi bë yaca ben' binaca ben' Israel ta rnazin quieyaquë', bibë Diuzi castigo quieyaquë'. ¹⁷ Birsannë' rulu'enë' yela' huaca quienë'. Rulu'enë' ben' huen naquë' dan' tadya'a babënnë' quiero. Por lëbë' ruen nisayo, rero usecho dya'a, runnë' yugulu ta raoro yugu dza tzu'uro gusto lao yedyi layu.

¹⁸ Pero ba'ala'cazi na' Pablo len Bernabé cana', canezi bëyaquë' gan bibëti yaca ben' yedyi bëdyihuaga ca quie gun quiejë' ta tzionla'adyi'jë' leyaquë'.

¹⁹ Na'ra cati bdyin yaca ben' Israel, ben' uza'ja ciudad Antioquia len ben' uza'rëja ciudad Iconio, bë'lëyaquë' ben' ciudad di'idza' ta huejè' contra Pablo len Bernabé. Quie lena' uzulao ja ben' ciudad na' rguijè' Pablo yo ta gutiyaquë' lëbë'. Caora guqueyaquë' baguti Pablo, hora na' udubayaquë' lëbë' yatixojë' ru'a ciudadtela. ²⁰ Na'ra bedupa yaca ben' quie Jesús nayëchoyaquë' gan' de Pablo. Caora na' beyasa Pablo zeyonë' lao ciudad tatula. Pues beteyu dza tula, uza'lë Pablo Bernabé zioyaquë' ciudad Derbe.

²¹ Na'ra udixogue'rëjè' ben' ciudad Derbe con cabë' rna xti'idza' Diuzi. Na' bëyaquë' gan gule ben' zë, gucayaquë' ben' nao xneza Jesús. Ude beyudyi na', bedeyaquë' ciudad Listra, bedeyaquë' ciudad Iconio, bedeyaquë' ciudad Antioquia. ²² Na'ra ja ciudad ga bedeyaquë', bë'yaquë' di'idza' zela'adyi' yaca ben' nao xneza Jesús, nënyueyaquë' leyaquë' con cabë' reya'ala' hueyaquë' inaoyaquë' du guicho du la'adyi'jë' xneza Jesús. Lëzi unayaquë' rëbiyaquë' leyaquë':

—Huetzague benë' bizinaquezi quiele, porque cana' ruejè' quie nu ben' nao xneza Diuzi.

²³ Lëzi ulioyaquë' ben' napa dyin, ben' racalë ben' nao xneza Jesús quie quie ciudad ga nita' ben' nao xneza Jesús. Pues beyudyi na', bëyaquë' ubasi bë'lëyaquë' Diuzi di'idza' blidzayaquë' lëbë' chi biucuasa ucui'onë' bi tamala gaca quie ben' ulioyaquë' como dan' barue quieyaquë' xti'idza'në'.

Bedyin Pablo len Bernabé ciudad Antioquia ga nebaba Siria tatula

²⁴ Ude beyudyi na', uza'yaquë' zioyaquë' udeyaquë' yu nebaba Pisidia, na' bdyinyaquë' yu nebaba Panfilia. ²⁵ Lëzi udejè' ciudad Perge ga udixogue'rëjè' ben' ciudad na' con cabë' rna xti'idza' Diuzi. Beyudyi na' uza'yaquë' zioyaquë' ciudad Atalia. ²⁶ Na'ra ciudad na' beza'yaquë' con lu'u barco zeza'yaquë' bedyinyaquë' ciudad Antioquia tatula ga nita' yaca ben' nao xneza Jesús, ben' use'ela' leyaquë' yetixogue'yaquë' benë' xti'idza' Diuzi. Lëyaca ben' na' bë'lëyaquë' Diuzi di'idza' por nun quieyaquë' dza zioyaquë' na'. Na' beyudyi tu ca dyin quie Diuzi bëyaquë'.

²⁷ Na'ra caora bedyinyaquë', bdupa yaca ben' nao xneza Jesús nita' ciudad Antioquia. Uzulao Pablo ru'enë' di'idza' con cabë' gualë Diuzi leyaquë'. Lëzi gudyinë' leyaquë' con cabë' ulio Diuzi ben' binaca ben' Israel rnaorëyaquë' xneza Jesús. ²⁸ Na'ra Pablo len Bernabé bega'nyaquë' zidza ciudad na' len yaca los demás ben' nao xneza Jesús.

15

Caora bedupa ja ben' quie Jesús bëjè' junta ciudad Jerusalén

¹ Pero tiempo na' bdyin chopa tzona benë' ciudad Antioquia, ben' uza'ja estado Judea. Na'ra unayaquë' rëbiyaquë' ben' nao xneza Jesús:

—Yugu ben' binaca ben' Israel, ben' banao xneza Jesús, rnaban hueyaquë' lato su tu xëdyidao' cuinyaquë' cabë' rna lë'ë guichi ley pca'n Moisés dza na'te. Porque chi binaoyaquë' con cabë' rna lë'ë guichi ley na', biyezi' Diuzi leyaquë' yeyoyaquë' guibá dza gatiyaquë'. —Cana' unayaquë' gudyijë' lejë'.

² Quie lena' legazi uyu'u Pablo len Bernabé huenë len leyaquë'. Pues como bibega'njè' de acuerdo, na'ra entre yaca ben' nao xneza Jesús nita' na', bëyaquë' nombrar Pablo len

Bernabé len ichopa tzona ben' tzio ciudad Jerusalén tacuenda huej'è' di'idza' conlè ja apóstol len yaca ben' belao quie yaca ben' nao xneza Jesús nita' na'.

³ Na'ra yaca ben' nao xneza Jesús nita' ciudad Antioquía use'ela'yaquè' lejè' uza'yaquè' udeyaquè' ja ciudad nebaba Fenicia len ja ciudad nebaba Samaria. Na'ra tu tu ciudad ga udeyaquè' udixogue'yaquè' leyaquè' cabè' rue yaca ben' binaca ben' Israel barsanla'adyi'yaquè' costumbre quie xuzixta'oyaquè', barnaoyaquè' xneza Jesús. Na'ra quie lena', legazi redaohue yaca ben' nao xneza Jesús nita' ja ciudad ga udeyaquè'.

⁴ Caora bedyinyaquè' ciudad Jerusalén, pues yaca apóstol, len yaca los demás ben' nao xneza Jesús, len yaca ben' napa dyin quieyaquè', bgapajè' leyaquè' diuzi. Na'ra bdze' Pablo len Bernabé di'idza' yugulu con cabè' bè' Diuzi gualènè' leyaquè' ga udixogue'jè' benè' con cabè' rna xti'idzè'. ⁵ Pero na' uzuli bala ben' nao xneza Jesús, ben' nacarè quie partido fariseo. Na'ra nu ben' naca partido fariseo, legazi rnaoyaquè' guichi ley pca'n Diuzi lao na'a Moisés. Quie lena' unayaquè' rëbiyaquè' yaca los demás ben' nao xneza Jesús cani:

—Yugu ben' binaca ben' Israel, yaca ben' nao xneza Jesús, reya'ala' uzu tu xèdyidao' cuinyaquè'. Lèzi reya'ala' huero mandado huejè' cumplir con ca rna lè'è guichi ley pca'n Diuzi lao na'a Moisés.

⁶ Na'ra bedupa yaca apóstol len yaca ben' napa dyin quie ben' nao xneza Jesús tacuenda hueyaquè' pensari raca cabè' una yaca ben' na'. ⁷ Caora na' legazi uyu'uyaquè' huenè. Cati beyudyi na', na'ra uzuli Pedro rëbinè' leyaquè':

—Bicha', dyè'èdi nezile de que dza na'te ulio Diuzi nè'èdi' de entre ra'o ta quixogui'a ben' binaca ben' Israel xti'idza' Diuzi, porque lëscan' re'en Diuzi inaoyaquè' xnezè'. ⁸ Nezi Diuzi bitezi pensari raca yugo benè'. Quie lena' bzioñe'enè' leyaquè' de que zuè' dispuesto yezi'nè' leyaquè'. Na' bizi ba'ala'cazi binacajè' ben' Israel, bdze'nè' Bichi Be quienè' lu'u guicho laxta'oyaquè' laga ca bdze'nè' Bichi Be quienè' lu'u guicho laxta'oro. ⁹ Como tuzi rue Diuzi len leyaquè' len ra'o, aodibi Diuzi laxta'oyaquè' nun quie barue quieyaquè' xti'idzè'. ¹⁰ Na'a ¿bixquien' racale pensari binezi Diuzi bi bènè'? Pues ni ra'o ni xuzixta'oro bibèro gan inaoro duze guichi ley pca'n Diuzi lao na'a Moisés. Na'ra ¿bixquien', pues, re'enle inao yaca ben' binaca ben' Israel ley quiero? Lena' nacan ca quie chi ugua'aroyaquè' yua' zi'i, tu ta bisuejè' hua'ayaquè'. ¹¹ Bizi dyè'èdi neziro de que laga cabè' ute usela Señor Jesús quiero por yela' ben' huen quienè', lëscan' ute usela Jesús yaca ben' binaca ben' Israel, yaca ben' rue quie xti'idzè'. —Cana' una Pedro gudyinè' leyaquè'.

¹² Na'ra uzulao Bernabé len Pablo ru'eyaquè' di'idza' con cabè' gualè Diuzi leyaquè' bëyaquè' nu yela' milagro lao ben' binacaja ben' Israel. Quie lena' unita' yaca ben' na' chizi yugutejè' rzënegayaquè' con cabè' una ja Bernabé len Pablo. ¹³ Pues beyudyi bè'yaquè' di'idza' na', na'ra una Santiago rëbinè' leyaquè':

—Bicha', uzëcara nagale quia'. Pues agudyi ¹⁴ Simón Pedro ra'o de que babdyin hora cuio Diuzi entre ja ben' binaca ben' Israel nu ben' re'en gaca ben' quienè' galeyaquè' xti'idzè'. ¹⁵ Lena' nacan de acuerdo con cabè' una ja ben' gula, ben' udixogue' xti'idza' Diuzi dza na'. Lena' rnèn lè'è guichi quie Diuzi cani:

¹⁶ Cabè' rue yaca benè', reyueyaquè' recubiyaquè' yedyi quieyaquè', cana' hueria' conlè yaca ben' Israel.

Huadyin dza gacalia' yaca ben' Israel ta yenaoyaquè' xneza' tatula cabè' unao xuzixta'oyaquè' xneza' dza uda rey David lao yedyi layu.

¹⁷ Cana' hua' tacuenda inaorè yaca los demás ben' binaca ben' Israel xneza', lente yugu ben' naca ben' la'ia quia', ben' rzëto laohua'.

¹⁸ Cana' una Diuzi bzioñe'enè' ra'o.

Desde dza na'te unè' udixogue'nè' xti'idzè'.

¹⁹ Na'ra nernè Santiago rëbinè' leyaquè':

—Quie lena' nia' bireya'ala' huero zèdi ben' binacaja ben' Israel, ben' psanja pensari gula quiejè' barnaøjè' xneza Diuzi. ²⁰ Tuzi ca reya'ala' huero ise'ela'ro tu guichi ta quixogue'royaquè' bireya'ala' gaoyaquè' bè'èla' bdyia benè' lao ru'aba ta bè'yaquè' ídolo quieyaquè'. Lèzi bireya'ala' gaoyaquè' bè'èla' quie nu bia bibro ren hora gutiba'. Lëscan', con nutezi bia guixi', bireya'ala' gaoyaquè' ren quieba'. Lèzi bireya'ala' gatalëyaquè' nigula binaca zgulayaquè'. ²¹ Cana' re'ennan hueja ben' binacaja ben' Israel, ben' barnaolja xneza Diuzi tacuenda biudze'la'adyi' ja ben' Israel, porque desde tiempote uzucazi ja ben' nao ley pca'n Moisés. Quie quie yedyi quiero nita' yaca ben' Israel rulabajè' guichi ley na' lu'u sinagoga yugu dza saodo. —Cana' una Jacobo gudyinè' leyaquè'.

²² Na'ra ja apóstol, len yaca ben' napa dyin quie ben' nao xneza Jesús, len los demásyaquè', psaque'yaquè' cabè' huejè' ta cuioyaquè' entre leyaquè' ben' tziole Pablo len Bernabé ciudad Antioquia. Quie lena' ulioyaquè' tu ben' lao Judas Barsabás, len itunè' laonè' Silas. Nacayaquè' ben' bala'ana entre ja ben' nao xneza Jesús. ²³ Na'ra lëscan' bëyaquè' tu guichi ta nu'ayaquè'. Lè'è guichi na' rnèn cani:

“Nëto', yaca apóstol len yaca los demás ben' napa dyin entre yaca ben' nao xneza Jesús, rgapando' diuzi le'e como ben' bichindo', ben' barnao xneza Jesús. Baose'ela'ndo' guichi ni lao le'e ben' binaca ben' Israel, ben' nita' ciudad Antioquía, len le'e ben' nita' yedyi nebaba Siria, len le'e ben' nita' yedyi nebaba Cilicia. ²⁴ Banezindo' babida chopo tzona ben' uza' yedyi ni badeyubiyaquè' le'e ta hue'lëyaquè' le'e di'idza', pero ca bëyaquè' pquixiyaquè' pensari quiele bëyaquè' le'e zèdi. Pero cala nëto' use'ela'ndo'yaquè', dechan' ta racazi la'adyi'jè' bëjè' cana'. ²⁵ Quie lena' gucando' de acuerdo, uliondo' de entre nëto' chopo ben' guidalè bichiro Pablo len bichiro Bernabé ideyubiyaquè' le'e inayaquè' le'e ca naca pensari quiendo'. ²⁶ Naca Pablo len Bernabé ben' uyocazi ja ciudad tula tanun quie Señor quiero Jesucristo ga ruenan zudyi guti ja benè' lejè'. ²⁷ Lëscana' use'ela'ndo' Judas len Silas ta uxi'idze'yaquè' le'e yugulu cabè' naca pensari quiendo' niga. ²⁸ Na'ra según pensari quie Bichi Be quie Diuzi len pensari quiendo', nacan huen bihuendo' mandado inaole duze ley quie Moisés. Ca rñando' le'e niga, cana'zi nacan zi quiele huele. ²⁹ Pues bireya'ala' gaole bë'èla' bdyia benè' ru'aba ta bë'yaquè' idolo quieyaquè'. Lëzi bigaole bë'èla' quie nu bia bibro ren hora gutiba'. Lëscan' con nutezi bia guixi', bireya'ala' gaole ren quieba'. Lëzi bireya'ala' gatalèle nigula binaca zgulale. Chi hue quiele uzule di'idza' ca nando' le'e niga, cana' huele ta yu'u ni'a xnezi. Na' yugu dza rulidzando' Diuzi gacalènè' le'e.” Cana' unèn lè'è guichi na' ta use'ela'yaquè'.

³⁰ Pues cana' guca uza'yaquè' zioyaquè' ciudad Antioquía ptupayaquè' yaca ben' nao xneza Jesús, bë'yaquè' leyaquè' guichi nu'ayaquè'. ³¹ Na'ra cati bablabayaquè' guichi na', legazi bedaohueyaquè' con cabè' di'idza' zela'adyi' rñèn lè'è guichi na'. ³² Na'ra como Judas len Silas nacarëyaquè' ben' rguixogue' xti'idza' Diuzi, hora na' bë'lëyaquè' leyaquè' di'idza' zela'adyi' mazera. Na'ra nun quie di'idza' unayaquè' gucalëyaquè' leyaquè' ta inaorayaquè' dula'adyi'jè' xneza Jesús. ³³ Bi'zi na' caora baguca zidza zuyaquè' ciudad na', bë yaca ben' quie Jesús tu despedida ta yeza'yaquè' yedyinyaquè' ciudad ga nita' ja ben' use'ela' leyaquè'.

³⁴ Pero Silas psaque'nè' yega'nñè' ciudad Antioquía. ³⁵ Lëzi bega'nrè Pablo len Bernabé ciudad na'. Na'ra leyaquè' len yaca los demás ben' quie Jesús, udixogue'yaquè' benè' con cabè' rna xti'idza' Diuzi.

Bezulao Pablo ta chopo rñanè' rguixogue'nè' benè' con cabè' rna xti'idza' Diuzi

³⁶ Pues caora baode tu tiempo, una Pablo rëbinè' Bernabé:
—Ya' tziroo tatula tzeyubiro ja bichiro nita' yugu ciudad con ga udero udixogue'ro yaca benè' con cabè' rna xti'idza' Diuzi dza na'. Tziroo tzena'ro bi raca quiejè'.

³⁷ Pues na'ra gu'un Bernabé iquiè'yaquè' Juan Marcos, ³⁸ pero Pablo na' bigu'unnè', porque dan' psanla'adyi' Juan leyaquè' dza uyoyaquè' yaca yedyi nebaba Panfilia. Bi-uyolènè' leyaquè' ta tzetixogue'yaquè' benè' con cabè' rna xti'idza' Diuzi. ³⁹ Tantozi uyu'tyaquè' huenè na', uza'yaquè' quie quieyaquè'. Na'ra uquiè' Bernabé Marcos uza'yaquè' zioyaquè' isla Chipre. ⁴⁰ Pero Pablo, por tu partela, ulionè' Silas ben' tziolè lèbè'. Na'ra bë' beyudyi blidza ben' nao xneza Jesús Diuzi ta gacalènè' Pablo len Silas con ga tzioyaquè', ⁴¹ caora na' uza'yaquè' zioyaquè' yedyi ga nebaba Siria len yedyi ga nebaba Cilicia. Con ga udeyaquè' mazera bë'yaquè' ben' nao xneza Jesús di'idza' zela'adyi'.

16

Uquiè' Pablo len Silas Timoteo

¹ Na'ra bedyin Pablo len Silas ga re' ciudad Derbe len ciudad Listra. Na' yexacayaquè' tu ben' lao Timoteo naquè' ben' quie Jesús. Naca Zna'nè' ben' Israel, lëzi nacarènè' ben' nao xneza Jesús. Naca xuzinè' ben' griego. ² Rna ja ben' nao xneza Jesús nita' ciudad Listra, len ben' nao xneza Jesús nita' ciudad Iconio, de que naca Timoteo ben' dya'a gula. ³ Caora na' gu'un Pablo uquiè'nè' Timoteo, pero como nita' zè ben' Israel gan' tzioyaquè', lëscan' como nezi yaca ben' Israel binaca xuzi Timoteo ben' Israel, quie lena' bzu Pablo tu xëdyidao' Timoteo tacuenda biudze'la'adyi' ja ben' Israel nita' ja ciudad ga tzioyaquè'. ⁴ Na'ra uza'yaquè' zioyaquè'. Pero tu tu ciudad ga udeyaquè' udixogue'yaquè' ben' nao xneza Jesús nita'ja na' con cabè' una yaca apóstol len ben' napa dyin caora bëjè' junta ciudad Jerusalén. Lëscan' gudyijè' lejè' ta uzujè' di'idza' ca di'idza' una yaca ben' bë junta. ⁵ Pues cana' guca quie ben' quie Jesús nita' ga udejè', uzela'adyi'yaquè' naoyaquè' xneza Jesús du guicho du la'adyi'jè'. Quie lena' uyera mazera ben' nao xneza Jesús tu dza tu dza.

Cabè' guca uxusa Pablo blè'ènè' tu be'mbyu, ben' uza' yaca ciudad nebaba Macedonia

⁶ Pues como bibè' Bichi Be quie Diuzi lato quixogue'yaquè' ben' nita' yaca ciudad nebaba Asia con cabè' rna xti'idza' Diuzi, uza'yaquè' udeyaquè' yaca ciudad nebaba Frigia len yaca ciudad nebaba Galacia ⁷ hasta bdyinyaquè' ga beyudyi yu nebaba Misia. Hora na' gu'unyaquè' tziorayaquè' mazera ta idyinyaquè' yaca ciudad nebaba Bitinia,

pero lêzi bibè' Bichi Be quie Diuzi lato. ⁸ Quie lena' beza'yaquè' bedeyaquè' yu nebaba Misia bedyinyaquè' ciudad Troas. ⁹ Caora na' ca du rèla, uxusa Pablo blè'ènè' tu ben' Macedonia zènè' rnbayèchi'nè' rëbinè' lèbè': "Naguido' Macedonia ga zundo' tacuenda gacalao' nètò'." ¹⁰ Hora na' ude beyudyi blè'è Pablo con cabè' uxusanè', na'ra labèteyaquè' puesto quieyaquè' ta tziyoaqué' Macedonia. Lêzi nètè'di', Lucas, uyalia' leyaquè'. Naca' ben' bzu di'idza' lè'è guichi ni. Na'ra con cabè' uxusa Pablo, lena' unezindo' de que re'en Diuzi tziondo' tzetixogue'ndo' ben' Macedonia con cabè' rna xti'idzè'.

Pablo len Silas bdyinyaquè' ciudad Filipos

¹¹ Na'ra uza'ndo' ciudad Troas con lu'u barco ziondo' tu li ta idyinnndo' isla Samotracia. Caora beteyu dza tula bdyinnndo' ciudad Neápolis. ¹² Na'ra uza'ndo' ziondo' ciudad Filipos. Pues ciudad Filipos nacan yedyi belaora quie ja ciudad nebaba Macedonia. Pues nita' casi puro ben' romano ciudad na'. Na'ra bega'nndo' na' chopa tzona dza. ¹³ Biži guca tu dza saodo na' uza'ndo' ziondo' tu ru'a yao že de ru'a yedyi na'. Lèlugar na' nacan ga rio ja ben' Israel ru'elèyaquè' Diuzi di'idza'. Na'ra ure'ndo' na' uzulaondo' rguixogue'ndo' con cabè' rna xti'idza' Diuzi lao ja nigula bdupayaca na'. ¹⁴ Na'ra entre ja nigula na' ure' tunè' laonè' Lidia. Naquè' ben' ciudad Tiatora. Naquè' ben' ruti' la'ari' tza'o, la'ari' culuri morado. Lêzi naquè' ben' rionla'adyi' Diuzi. Na'ra bdze' Diuzi lèbè' pensari ta hue quienè' con cabè' rna di'idza' ru'e Pablo rëbinè' leyaquè'. Cana' uzulaonè' inaonè' xneza Jesús. ¹⁵ Caora na' bè'yaquè' laonè' lente yaca familia quienè'. Pues beyudyi na', unè' nètò' du la'adyi'nè':

—Chi psaque'le de que tali banaca' ben' rnao xneza Jesús, guidale sule žan yu'u quia' chopa tzona dza.

Na'ra cana' guca quiendo', bega'nndo' lidyinè'.

¹⁶ Pues bdyin hora tatula ziondo' ga naca lugar ruendo' orar. Pero du tu neza yetilando' tu niguladao' yu'ubi' taxi'ibi'. Na'ra conlè taxi'ibi' ruebi' divinar. Lêzi nacabi' bi' nada'o, bi' rue dyin sin lažu. Pues como ruebi' divinar quie benè', legazi ruebi' gan dumi že para quie ja xam'bi'. ¹⁷ Na'ra uzulao nigula naobi' nètò' ga ziondo' rnèbi' zidzo rëbibi' ben' nita' ciudad na':

—Yaca ben' ni rueyaquè' mandado quie tuzi Diuzi zu sibi. Rguixogue'yaquè' benè' con cabè' rna xti'idza' Diuzi ta hue quieyaquè'n ta yeyoyaquè' guibá dza gatiyaquè'.

¹⁸ Na'ra cana' guca bazio zèdza nao niguladao' nètò' ga riondo' hasta que bdyin dza bdza' Pablo lèbi'. Caora na' beyèchonè' unè' rëbinè' taxi'ibi' yu'ubi':

—Ržètoga' lao Jesucristo, yerolo' gan' yu'ulo'.

Pues caora na'tezi laberote taxi'ibi' yu'u niguladao' na'.

¹⁹ Pero cati blè'è yaca xan' nigula de que bira saque' hueyaquè' gan dumi por lèbi', caora na' pèxyoyaquè' Pablo len Silas, uquiè'yaquè' lejè' yulao' ga re' yaca ben' rnbè'. ²⁰ Na'ra psedyinyaquè' lejè' lao yaca juez unayaquè' rëbियाquè' ja juez:

—Yaca ben' ni nacayaquè' ben' Israel. Rdayaquè' rguiloayaquè' huedila lao yedyi quiero niga. ²¹ Re'enyacuè' si'ro inaoro cabè' naca pensari quiejè', pero biru'en lato inaoro xneza quieyaquè', porque dan' nacaro ben' romano.

²² Na'ra yaca ben' yedyi na', bdza'tzegueyaquè' Pablo len Silas. Hora na' bè ja juez mandado ilècho policia zabajè' tacuenda quieyaquè' lejè' con bara. ²³ Beyudyi uditzagueyaquè' lejè' con bara, bdze'yaquè' lejè' lu'u dyiguiba, gudyyiyaquè' ben' rapa dyiguiba ta gapè' lejè' dyè'èdi. ²⁴ Quie lena' uquiè' ben' rapa dyiguiba lejè' guichote ga beyudyite dyiguiba, bdze'nè' ni'ajè' lu'u yèro dyia chopa yaga ta'a ta resiojè' con candado.

²⁵ Na' cadu gatzo yèla re' Pablo len Silas rueyaquè' orar rulayaquè' alabanza quie Diuzi, pero yaca los demás preso deyaquè' rzènagayaquè' cabè' rula Pablo len Silas. ²⁶ Pues caora na' tu sasazi, ben tu užu' huala gula bzin dyiguiba. Dyin quie užu' na', uyalo yugu puerta quie dyiguiba. Lêzi yugu caden na' nario ja preso beyedyijan bguinojan layu. ²⁷ Cati udèlebè ben' rapa dyiguiba, blè'ènè' nayalo ja puerta quie dyiguiba. Caora na' ulèchonè' espada quienè' ta yeyutinè' cuinnè', porque guquenè' baola yaca preso de ja na'. ²⁸ Hora na' unè Pablo zidzo gudyinè' lèbè':

—Bibi tamala huelo' quio', porque nicazi nita'ndo' yugundo'.

²⁹ Na'ra unaba ben' rapa dyiguiba gui' zionè' tariara yu'unè' lu'u dyiguiba. Tantozi rdzebinè' zionè' uditzu žibinè' laojè', ³⁰ ulionè' Pablo len Silas ga dejè' unè' rëbinè' lejè':

—Señores, žbiži ca reya'ala' hua' ta yeyèri laxta'ohua' lao Diuzi?

³¹ Na'ra bequèbijè' rëbijè' lèbè':

—Reya'ala' hue quio' xti'idza' Señor Jesús. Cana' yeyèri laxta'olo' lao Diuzi, cana' yeyèri laxta'o familia quio' lao Diuzi.

³² Pues udxogue'jè' lèbè' lente yugu yaca familia quienè' nita'ja na' con cabè' rna xti'idza' Señor Jesús. ³³ Lêzi yèla na'tezi hora na', udibi ben' rapa dyiguiba ga naca Pablo len Silas hue'. Na'ra bè'yaquè' lao ben' rapa dyiguiba lente yugo familia quienè'. ³⁴ Beyudyi na'

uquiè'nè' Pablo len Silas lidyinè' ga bgaonè' leyaquè'. Hora na' lèbè' lente yugo familia quienè', legazi redaohueyaquè', porque dan' barnaojè' xneza Diuzi.

³⁵ Pero caora uyenì' zila na', use'ela' yaca juez policía gan zè ben' rapa dyiguiba gudyyiyaquè' lèbè' ta yebionè' Pablo len Silas lu'u dyiguiba. ³⁶ Caora na' unè ben' rapa dyiguiba rëbinè' Pablo:

—Abla' di'idza' quie ja juez na' re'enaquè' yebioga' le'e. Pues na' yerole dyè'èdi, yeyole huen.

³⁷ Pero una Pablo gudyinè' lejè':

—Nèto' banacando' cuenda quie ciudad Roma. Según ley quie ben' romano, biru'en lato quiyaquè' nèto' udze'yaquè' nèto' dyiguiba sin nica negacazi justicia quiendo'. ¿Cómo pues bare'enaquè' yebioyaquè' nèto' nagachi'zi? ¡Pues bisaque' usacayaquè' nèto' cana! Ni cuezando' hasta que guidayaquè' cuinyaquè' yebioyaquè' nèto'.

³⁸ Na'ra hora na' uyo ja policía yeguèdyiyaquè' yaca juez con ca una Pablo. Pues cati unezi yaca juez de que naca Pablo len Silas cuenda quie ciudad Roma, lena' legazi bdzebigazyaquè'. ³⁹ Caora na' uyo yaca juez gan' de Pablo len Silas yeguèdyijè' lejè' ta yezi'ze Pablo len Silas quieyaquè'. Cana' guca bebioyaquè' lejè' lu'u dyiguiba. Na' unabayèchi'jè' lejè' ta yeza'jè' yerojè' ciudad na'. ⁴⁰ Pues bè' beroyaquè' dyiguiba na', zioyaquè' yeyubiyaquè' Lidia, ben' ruti' la'ari'. Lèscan' yeyubiyaquè' yaca los demás ben' quie Jesús nita' na'. Ude beyudyi bè'yaquè' lejè' di'idza' zela'adyi', beza'yaquè' zioyaquè' ciudad tula.

17

Guca tu zèdi gula conlè Pablo len Silas ciudad Tesalónica

¹ Pues udeyaquè' ciudad Anfípolis len ciudad Apolonia labdyinteje' ciudad Tesalónica ga zu tu idao' sinagoga quie ja ben' Israel. ² Na'ra con ca naca costumbre quie Pablo, rionè' lu'u sinagoga. Pues lao tzona xman, tu dza huio tu xman dza saodo na', bè'lènè' ben' rioja lu'u sinagoga na' di'idza' con cabè' rna xti'idza' Diuzi bzu ja ben' unita' dza na' lè'è guichi. ³ Pxi'idze'nè' leyaquè' de que con cabè' rna lè'è guichi guti yaca benè' ben' use'ela' Diuzi, pero useban Diuzi lèbè'. Quie lena' unè' rëbinè' lejè' cani:

—Naca Jesús ben' use'ela' Diuzi. Quie lèbè' rguixogui'a le'e. —Cana' una Pablo gudyinè' lejè'.

⁴ Na'ra uzulao inao bala yaca ben' Israel xneza Jesús. Hora na' gucajè' tuze len Pablo len Silas. Lèzi zè yaca ben' griego, ben' rionla'adyi' yaca diuzi, unaorèyaquè' xneza Jesús. Lèzi unaorè ja zè nigula bala'ana quie yedyi na'. ⁵ Pero bala ja ben' Israel, ben' biunao xneza Jesús, gucazè'èyaquè' como dan' bagule ben' zè ca una Pablo. Caora na' ptupajè' bala ben' rdazija du tu neza, yaca ben' malaja, gudyyiyaquè' leyaquè' ta inèyaquè' di'idza' contra Pablo len Silas tacuenda na' idza' yaca ben' yedyi leyaquè'. Hora na' de por mala yetzu'uayaquè' lu'u yu'u quie tu ben' lao Jasón como rdayaquè' reguiloyaquè' Pablo len Silas ta yequiè'yaquè' lejè' ga bedupa ja ben' yedyi. ⁶ Pero como bibedzeleyaquè' lejè' zan yu'u na', uquiè'yaquè' Jasón udubayaquè' lèbè' layu lente itu chopa ben' quie Jesús. Hora na' zioyaquè' ga re' ben' rnabè' quiejè' unayaquè' zidzo rëbiyaquè' leyaquè':

—Ben' ni laonè' Jasón. Bè'nè' lato bdyin ben' rue zèdi duze yedyi layu zan yu'u quienè'. ⁷ Rueyaquè' contra ley quie rey César, porque nayaquè' quele César naquè' rey, nechan' tu ben' lao Jesús na' naca rey.

⁸ Na'ra bè' be ja ben' rnabè' len yaca los demás ben' yedyi ca una yaca ben' na', legazi bdza'yaquè'. ⁹ Pero bebiocazyaquè' Jasón de fianza lente ben' compañero quienè'.

Bzènaga yaca ben' ciudad Berea di'idza' una Pablo len Silas

¹⁰ Quie lena' ja ben' quie Jesús nita' na' luegozi use'ela'yaquè' Pablo len Silas du rëla ciudad tula, ciudad laona Berea. Cati bdyinyaquè' ciudad na', rioyaquè' lu'u idao' sinagoga quie ja ben' Israel. ¹¹ Pero yaca ben' nita' na', nacarajè' ben' huen, quele ca yaca ben' nita' ciudad Tesalónica, porque dan' yexetzegueyaquè' bzènagayaquè' di'idza' ru'e Pablo. Pues tu dza, tu dza, reguiloyaquè' rna'yaquè' lè'è guichi la'ya quie Diuzi chi ru'e Pablo di'idza' li con cabè' rnèn lè'è guichi na'. ¹² Na'ra zèyaquè' uzulaoyaquè' inoayaquè' xneza Jesús. Lèzi unaorè zè ja ben' griego, tanto yaca nigula bala'ana lente yaca be'mbyu, xneza Jesús. ¹³ Pero yaca ben' Israel nita' ciudad Tesalónica, caora uneziyaquè' arda Pablo ciudad Berea rguixogue'nè' yaca benè' con cabè' rna xti'idza' Diuzi, caora na' uza'yaquè' zioyaquè' ciudad Berea unèyaquè' di'idza' contra Pablo len Silas tacuenda idza' ben' ciudad Berea lejè'. ¹⁴ Quie lena' ja ben' nao xneza Jesús nita' ciudad Berea, luegozi laose'ela'teyaquè' Pablo ga uzulao ru'a nisadao'. Pero bega'n Silas len Timoteo ciudad Berea. ¹⁵ Na'ra yaca ben' ziolè' Pablo, uquiè'yaquè' lèbè' hasta ciudad Atenas. Caora na' beza'yaquè'

zeyoyaquë' ciudad Berea. Lëscan' caora na' bese'ela' Pablo di'idza' lao Silas lenë' Timoteo ta idezeyaquë' lëbë' luegozi.

Cabë' guca bdze' Pablo di'idza' lao ben' ciudad Atenas

¹⁶ Tu nerbeza Pablo idyin Silas len Timoteo ciudad Atenas na', cati blë'ënë' de ídolo zë gula quie ja ben' ciudad na'. Nun quie blë'ënë' napayaquë' ídolo zëgula, cana' lena' guqueyëchi' Pablo. ¹⁷ Quie lena' rionë' lu'u sinagoga ru'elënë' yaca ben' Israel di'idza' len yaca los demás ben' rionla'adyi' Diuzi. Lëzi rdarënë' lao ye'eya yugo dza ru'elënë' di'idza' con nu ben' redilanë' na'. ¹⁸ Na'ra bdyin dza bedila Pablo yaca ben' rusëdi di'idza' quie tu ben' lao Epicuro, len yaca ben' rusëdi di'idza' quie itu ben' lao Zenón. Caora na' uzulaoyaquë' ru'elëyaquë' lëbë' di'idza'. Unayaquë' rëbiyaquë' laguedyiaquë':

—¿A ver bizi ca ina ben' huezi' yë' niga?

Pero na' ibalayaquë' unayaquë':

—Raqueda' naquë' ben' rda rguixogue' di'idza' quie yaca diuzi tula.

Cana' unayaquë' como dan' rda Pablo rguixogue'në' yaca benë' con cabë' guca quie Jesús bebannë'. ¹⁹ Caora na' uquië'yaquë' lëbë' tu paraje laona Areópago ga redupayaquë' segun costumbre quiejë' ru'eyaquë' laguedyijë' consejo. Na'ra unayaquë' rëbiyaquë' lëbë':

—Re'enndo' inezindo' con cabë' rnao', ²⁰ porque bineyendo' cabë' naca pensari quio'. Re'enndo' uxi'idze'lo' nëto'.

²¹ Cana' nayaquë' como dan' lega rexeyaquë' yeyaquë' tu ta bineyeyaquë'. Casi yugu dza puro re'yaquë' ru'eyaquë' di'idza' tacuenda idzeleyaquë' nu pensari natza'la, pensari cubitecala. Cana' bë ja ben' Atenas len ja ben' uza' yedyi tula nita' na'.

²² Na'ra uzuli Pablo gatzo la'o gan re'jé' paraje quiejë' laona Areópago unë' rëbinë' leyaquë':

—Benë' quie ciudad Atenas, rlë'ëda' rionla'adyi'le diuzi zë gula. ²³ Cati uya'a yena'a ga rionla'adyi'le diuzi quiele, blë'ëda' tu ru'aba lë'ëna na' dyia letra rnan cani: “Ru'aba quie diuzi nitu nunu nubë'.” Cana' rnën. Pues como baonale binubë'le Diuzi, quie lena' re'enda' inia' le'e quie tuzi Diuzi zu guibá.

²⁴ “Pues lëbë' bzalonë' yedyi layu len yugulu ta de laona. Naquë' xan' lao yugulute, chi lu'u guibá, chi lao yedyi layu. Pero bizunë' lu'u idao' ta bë ja benë'. ²⁵ Bibi rdziogue Diuzi bi cosa. Pues lao na'anë' za' yela' neban quiero, za' be rzi'ro, za' yugulu ta de quiero.

²⁶ “De tuzi be'mbyu bë Diuzi beya cue' benëchi' ta inita'yaquë' duze yedyi layu. Lëzi udixunë' bi tiempo reya'ala' zuyaquë' lao yedyi layu, udixurënë' lato quieyaquë' ga reya'ala' nita'yaquë'. ²⁷ Bënë' cana' tacuenda huero pensari inaoro xnezë', porque binacan zëdi yedzeleró xnezë' chi re'enro inaoron. ²⁸ Pues rnaban yele ca una tu ben' laguedyile, ben' uzu dza na'te, ben' rsëdi guichi. Pues lëbë' unë' cani: “Lao na'a Diuzi nebanro, rdaro, rzi'ro be.” Lëzi una ita ben' laguedyile rëbinë' le'e cani: “Nacaro familia quie Diuzi, porque lëbë' runnë' yela' neban quiero.”

²⁹ Neru'e Pablo di'idza' rëbinë' leyaquë':

—Chi nezile Diuzi runnë' yela' neban quiero, bireya'ala' gacale pensari de que naca Diuzi ca quie tu imagen de oro o de plata, o de yo. De pensarizi quie yaca benë' rueyaquë' imagen quieyaquë'. ³⁰ Ba'ala'cazi bë ja ben' unita' dza na'te contra Diuzi, bibënë' castigo quieyaquë', porque biuneziyaquë' bi bëyaquë'. Pero hora na' re'en Diuzi utza' yugo ben' nita' duze yedyi layu pensari quieyaquë' inaoyaquë' xnezë'. ³¹ Cana' re'en Diuzi porque tali na' idyin dza cati huenë' juicio duze yedyi layu. Por lena' bë Diuzi nombrar Jesús gaquë' ben' hue juicio ta yu'u ni'a xnezi. Pseban Diuzi Jesús ta inezi yugu ja benë' naca Jesús ben' hue juicio lao yugulute ben' nita' lao yedyi layu. —Cana' una Pablo gudyinë' lejë'.

³² Na'ra cati be yaca ben' nita' na' ca una Pablo unë' pseban Diuzi Jesús, caora na' balayaquë' ptitojé' lëbë'. Pero ibalayaquë' unayaquë' rëbiyaquë' lëbë':

—Tu dza zeza'ra uzë'nagando' quio' mazera cabë' rnao'.

³³ Caora na' bero Pablo beza'në' ga re'yaquë', ³⁴ pero bala yaca benë' na' guleyaquë' con cabë' di'idza' unë' Pablo. Entre leyaquë' zu tu ben' lao Dionisio, naquë' juez conlë yaca los demás ben' re' lu'u Areópago. Lëzi gulerë tu nigula laonë' Dámaris lente ibala ja ben' tula.

18

Cabë' guca quie Pablo dza udanë' ciudad Corinto

¹ Ude beyudyi na', beza' Pablo ciudad Atenas zionë' ciudad Corinto. ² Lëciudad na' yatilanë' tu ben' Israel. Ben' na' laonë' Aquilo, naquë' ben' uza' yu nebaba Ponto. Na' ciudad Roma zu tu ben' lao Claudio, naquë' rey quie ben' romano. Na' bënë' mandado yeza' yugu ja ben' Israel ciudad Roma. Quie lena' beza' Aquilo lenë' zgulë' Priscila ciudad na', bedyinyaquë' ciudad Corintola. ³ Cana' uyo Pablo yeyubinë' leyaquë' como lëzi ca dyin na' rue Aquilo lenë' zgulë', cana' ruerë Pablo. Pues bega'nlënë' leyaquë' bëlënë' leyaquë'

dyin tuze reguibiyaquè' la'ari' reo ta hueyaquè' nu yu'u de la'ari' ta ta'ona. ⁴ Na'ra yugo dza saodo rio Pablo lu'u sinagoga quie ja ben' Israel udixogue'nè' leyaquè' len ben' binaca ben' Israel con cabè' rna xti'idza' Diuzi, porque gu'unnè' inaojè' xneza Diuzi.

⁵ Caora na' uza' Silas len Timoteo yu nebaba Macedonia bdyinyaquè' ciudad Corinto ga rguixogue' Pablo ja ben' Israel con cabè' rna xti'idza' Diuzi du guicho du la'adyi'nè' rëbinè' leyaquè' naca Jesús ben' use'ela' Diuzi. ⁶ Pero yaca ben' Israel, uzulaoyaquè' rnëyaquè' di'idza' contra Pablo ptasi bnioyaquè' lëbè'. Quie lena' psisi Pablo gabán quienè' tacuenda yedyibi bête dyian. Cana' bènè', porque según ca naca costumbre quieyaquè', lena' nacan seña bibè yaca ben' yedyi na' cuenda ca di'idza' bël'lenè' leyaquè'. Quie lena' unè' rëbinè' lejè':

—Cuinzile napale dula' xquia quiele. Bibi dula' quia' nacan chi hue Diuzi castigo quiele, porque udixogui'a le'e con cabè' rna xti'idza' Diuzi, pero le'e bigulele quia'. Na'ra usanla'adya' le'e tza' tzetixogui'a yaca ben' binaca ben' Israel con cabè' rna xti'idza' Diuzi. —Cana' una Pablo gudyinè' lejè'.

⁷ Caora na' beronè' lu'u sinagoga na', zionè' lidyí tu ben' lao Ticio Justo. Naca Ticio Justo ben' rionla'adyi' Diuzi, zuè' cuèta sinagoga. ⁸ Pero na'ra uzulao tu ben' lao Crispo, ben' xan' sinagoga na', inaonè' xneza Jesús lente familia quienè'. Lëscan' zè yaca ben' ciudad Corinto, uzulaoyaquè' inaoyaquè' quio', porque yedyi niga nita' zè yaca ben' inao xneza'. ⁹ Na'ra guca tu yèla uxusa Pablo benè' unè' Jesús gudyinè' lëbè':

—Bigapo' cuidado. Biusano' rguixogue'lo' yaca benè' con cabè' rna xti'idza' Diuzi. Bicue'lo' chizi. ¹⁰ Como nè'èdi' rapa' luè', ni tu nunu saque huelè luè' chan' bi tamala re'enyacuè' hueyaquè' quio', porque yedyi niga nita' zè yaca ben' inao xneza'. —Cana' uxusa Pablo benè' una Jesús gudyinè' lëbè'.

¹¹ Cana' guca bega'n Pablo ciudad Corinto tu iza yu gatzó na' psëdinè' yaca ben' ciudad na' con cabè' rna xti'idza' Diuzi.

¹² Na'ra tiempo na' uzu tu ben' lao Galión. Naquè' gobernador quie yu nebaba Acaya. Pues yaca ben' Israel ptupayaquè' laguedyijè' bëyaquè' contra Pablo uquiè'yaquè' lëbè' ga re' gobernador, ¹³ unayaquè' rëbियाquè' gobernador na':

—Ben' ni rdanè' rusëdinè' benè' netza'la ca reya'ala' tzionla'adyi'yaquè' Diuzi. Ca rusëdinè' benè' binacan tuzi con cabè' rna ley quiero.

¹⁴ Caora na' binesulao Pablo inènè' caora unè' Galión rëbinè' yaca ben' Israel:

—Chi naquè' ben' de dula' xquia huala quie, o chi bènè' tu tamala gula, pues bibi zëdi de hua' reglo quiele. ¹⁵ Pero como racale huedila quie di'idza' quie lao benè', quie lao ley quiele, pues ulehue reglo de entre le'ezí, porque bire'enda' gaca' juez quie ley quiele.

¹⁶ Caora na' bebionè' leyaquè' gan' re'nè' na'. ¹⁷ Na'ra bëxoyaquè' tu ben' lao Sóstenes, porque naquè' xan' sinagoga na', bë'yaquè' lëbè' zì' lao ga re' gobernador na'. Pero gobernador na', gabi cuenda bènè' dan' bëyaquè' cana'.

Bedyin Pablo ciudad Antioquia tatula

¹⁸ Pero Pablo na' bega'nnè' na' zè dza. Uderala bènè' tu despedida yaca ben' quie Jesús nita' ciudad Corinto, beza'nè' zeyonè' uquiè'nè' Aquilo len Priscila bdyinyaquè' Cencrea na' ga pchibi Pablo guichonè' garè'te ta gaca seña de que abzunè' di'idza' ca bega'n'lenè' Diuzi dza na'te. Caora na' uyu'ulènè' Aquilo len Priscila lu'u barco zioyaquè' tu ciudad nebaba Siria laona Efeso. ¹⁹ Cati bdyinyaquè' ciudad na', psan Pablo leyaquè' na' uyonè' lu'u sinagoga ga bël'lenè' yaca ben' Israel di'idza', yaca ben' bedupa na'. ²⁰ Caora na' unabayaquè' yega'n Pablo len leyaquè' zidza, pero bigu'unnè' yega'nnè' na'. ²¹ Cana' bènè' leyaquè' tu despedida ta yeza'nè', na' unè' gudyinè' leyaquè':

—Reya'ala' tza'a ciudad Jerusalén, porque baza' tu lani. Pero chi Diuzi gunnè' lato decazide huída' ideyuba' le'e. —Cana' una Pablo caora beza'nè'.

Na' uyu'u Pablo lu'u barco beza'nè' ciudad Efeso zionè' ciudad Cesarea. ²² Tu bedezinè' ciudad Cesarea uyonè' ciudad Jerusalén yeyubinè' yaca ben' nao xneza Jesús nita' na' yegapanè' lejè' diuzi. Caora na' beza'nè' zeyonè' ciudad Antioquia. ²³ Pues na' uzunè' chopat ztona dza. Ude na', uza'nè' udanè' tu tu yedyi nebaba Galacia len tu tu yedyi nebaba Frigia, bènè' di'idza' zela'adyi' yaca ben' nao xneza Jesús nita' tu tu yedyi con ga udenè'.

Bdyin Apolos ciudad Efeso udixogue'nè' benè' con cabè' rna xti'idza' Diuzi

²⁴ Na'ra tiempo na' uzu tu ben' Israel, ben' lao Apolos. Naquè' ben' ciudad Alejandría. Na' bdyinnè' ciudad Efeso rguixogue'nè' benè' con cabè' rna xti'idza' Diuzi, porque dyè'èdi' neziné' cabè' rnènè' lè'è guichi la'iyá quie Diuzi. ²⁵ Lézi neziné' xneza Jesús. Dyè'èdi' gula udixogue'nè' psëdinè' benè' ca naca quie Jesús, ba'ala'cazi tuzi ca bë' Juan lao benè' nubè'nè' psëdinè' benè'. ²⁶ Na'ra birdzebinè' rguixogue'nè' con cabè' rna xti'idza' Diuzi lu'u sinagoga na' zu yedyi na'. Pero cati be Aquilo len Priscila di'idza' ru'enè', caora na' uquiè'yaquè' lëbè' lidyiyaquè' ga pxidze'yaquè' lëbè' mazerá bala ta binenezinè' quie xneza

Diuzi. ²⁷ Caora cati bdyin dza gu'un Apolos tzionè' yu nebaba Acaya, gualè yaca ben' nao xneza Jesús lèbè', bè'yaquè' lèbè' tu guichi ta hua'nè' lao yaca ben' nao xneza Jesús nita' yedyi nebaba Acaya tacuenda na' yezi'yaquè' lèbè' dyè'èdi zan yu'u quieyaquè'. Cana' uza'nè' zionè' bdyinnè' ja yedyi nebaba Acaya. Dyè'èdi gula gualènè' ja ben' nita' na', ben' nao xneza Jesús, porque bè Diuzi tu tahuen quiejè' bdze'nè' leyaquè' pensari inaojè' xnezè'. ²⁸ Pues lao catu yaca ben' nita' na' bdze'nè' di'idza' claro gula de que uquixi ja ben' Israel bire'enjè' inaojè' xneza Jesús. Tantozi udixogue'nè' leyaquè' dyè'èdi gula con cabè' rna xti'idza' Diuzi, biubinyaquè' bi nayaquè' ta yequèbiyaquè' inayaquè' lèbè'. Con cabè' rnèn lè'è guichi la'ya quie Diuzi, pxi'idze'nè' leyaquè' de que naca Jesús ben' ute usela yaca ben' Israel.

19

Con cabè' bè Pablo cati udanè' ciudad Efeso

¹ Na'ra tu nerda Apolos ciudad Corinto zio Pablo tu bedezinè' ga nacan puro ya'a bdyinnè' ciudad Efeso. Lèciudad na' yatlanè' chopa tzona ben' nao xneza Juan bautista. Pero bineneziaquè' chi zu Bichi Be quie Diuzi. ² Quie lena' una Pablo rëbinè' leyaquè':

—¿Uyu'ule Bichi Be quie Diuzi caora ptza'le pensari quiele uzulaole rnaole xneza Diuzi?

Pues na' bequèbiyaquè' nayaquè':

—Ni siquiera binezindo' chi zu Bichi Be quie Diuzi.

³ Na' unaba Pablo leyaquè' tatula:

—¿Nuži bè' laole dza na', chi'?

Na' bequèbiyaquè' rëbijè' lèbè':

—Bè' Juan bautista laondo' con cabè' unanè' nètò'.

⁴ Na'ra una Pablo rëbinè' leyaquè':

—Bè' Juan bautista lao nu ben' ptza' pensari quie, ben' re'en inao xneza Diuzi. Pero lèzi gudyinè' yaca ben' bè'nè' laohue de que reya'ala' inaojè' neza quie tu ben' zaza'ra, tu ben' lao Jesús. —Cana' una Pablo gudyinè' lejè'.

⁵ Pues cati beyaquè' cabè' di'idza' ru'e Pablo, na' bè' Pablo laoyaquè' bzètonè' lao Señor quiero Jesús. ⁶ Biži cati pquichi Pablo na'anè' guichoyaquè', caora na' uyu'u Bichi Be quie Diuzi leyaquè'. Quie lena' uzulaoyaquè' ru'eyaquè' di'idza' quie ben' tula, bè'yaquè' di'idza' binaca di'idza' quieyaquè', unayaquè' con cabè' pensari bdze' Diuzi lu'u guicho laxta'oyaquè'. ⁷ Pues ca tu yaca ben' bè' Pablo laohue, naca chipchopayaquè'.

⁸ Na'ra lao tzona biu' uzu Pablo ciudad na' rionè' lu'u sinagoga quie ja ben' na'. Birdzebinè' rudze'nè' di'idza' laoyaquè' gudyinè' leyaquè' reya'ala' inaoyaquè' xneza Diuzi. ⁹ Pero bala ben' zu na' gucajè' yaladyi'. Bigu'unjè' galejè' con cabè' rna xti'idza' Diuzi, dechan' uzulaoyaquè' rnèyaquè' di'idza' contra xneza Jesús lao yaca ben' ciudad na'. Quie lena' psanla'adyi' Pablo leyaquè' ga nita'jè' na'. Uquiè'nè' yaca ben' nao xneza Jesús zioyaquè' ga zu tu yu'u escuela quie tu ben' lao Tiranno. Pues yugu dza bè'lènè' benè' di'idza' lu'u yu'u escuela na'. ¹⁰ Cana' guca bega'n Pablo yedyi na' psèdinè' leyaquè' lao chopa iza cuenda na' be yaca ben' nita' ja ciudad nebaba Asia xti'idza' Señor quiero, chi ben' Israel, chi ben' tula. ¹¹ Na'ra gualè Diuzi Pablo, bè'nè' yela' milagro quienè' ¹² hasta que yehua'a benè' nu bayo o chi nu zaba Pablo ga de ben' raza Zhue'. Pues con lèzin beyacajè', bero ja taxi'ibi' yu'uyaquè'.

¹³ Na'ra guca dza na' rda chopa tzona yaca ben' Israel tu tu yedyi, ben' rebio yaca taxi'ibi' yu'u yaca benè'. Pues gu'unyaquè' hueyaquè' uzètoyaquè' lao Señor quiero Jesús ta yero taxi'ibi' yu'u ja benè'. Quie lena' unayaquè' rëbiyaquè' taxi'ibi' yu'u yaca ben' na':

—Rzètondo' lao Jesús, ben' rguixogue' Pablo di'idza' quie, ta yerolo' gan' yu'ulo'.

¹⁴ Cana' bè yaca lao gadyi zi'i tu ben' lao Esceva. Naca Esceva ben' Israel. Lèscan' naquè' xan' pxuzi. ¹⁵ Caora cati gudyiyaquè' taxi'ibi' cana', bequèbi taxi'ibi' na' gudyin leyaquè':

—Nubè'caza' Jesús, lèzi nubè'caza' Pablo, pero le'e, ¿nuži nacale? —Cana' una taxi'ibi' gudyin leyaquè'.

¹⁶ Na'ra ben' yu'u taxi'ibi' na', labèxotenè' leyaquè' bè'nè' quieyaquè'. Tantozi bè'nè' leyaquè' zi', bežunoyaquè' du ga'ala' guidiyaquè'. Du nacayaquè' hue' bedyinjè' zan yu'ute quieyaquè' zi'. ¹⁷ Na' cati be yaca ben' nita' ciudad Efeso cabè' guca quie zi'i Esceva, legazi bdzebiyaquè'. Cana' gucayaquè' pensari naca Señor quiero Jesús ben' ze, ben' de yela' huaca quie.

¹⁸ Lèzi zè yaca ben' nao xneza Jesús na', bicala ta median babèyaquè' dza na'la, uxu-balèpiyaquè'. ¹⁹ Cana' bèrè zè yaca ben' nao rusèdi yela' brujo. Nu'ayaquè' libro yela' ben' brujo quieyaquè' bzeiyaquè'n lao yaca ben' yedyi nita' na'. Pues birà unaojè' quie yela' brujo quiejè'. Caora cati bebiojè' cuenda ca tu zaca' ja libro na', zaca'n cadu gatzo gayuhua mila dumi plata. ²⁰ Cana' guca bžera ben' nao xneza Jesús. Du guicho du la'adyi'yaquè' unaoyaquè' xnezè'.

²¹ Pues bē' beyudyi guca cana', na' r' psaque' Pablo tzionē' tzeyubinē' yaca ben' quie Jesús nita' ja ciudad nebaba Macedonia len ja ben' nao xneza Jesús nita' ciudad nebaba Acaya. Lēzi gu'unnē' tziorēnē' ciudad Jerusalén. Na' unē' gudyinē' lejē':

—Huayoro ciudad Jerusalén, te na' tziorēro ciudad Roma. ²² Caora na' use'ela' Pablo chopa ben' racalē lēbē', use'elē' Timoteo len itu ben' lao Erasto. Bēnē' mandado tzioyaquē' yu nebaba Macedonia. Pero Pablo na' bega'nnē' ichopa tzona dza yu nebaba Asia na'.

Cabē' guca, guca zēdi quie ben' quie Jesús, ben' nita' ciudad Efeso

²³ Na'ra tiempo na' uzulao ja ben' ciudad Efeso rueyaquē' contra ben' nao xneza Jesús. ²⁴ Pues dyin quie tu ben' lao Demetrio uzulaojē' ruejē' contra lejē'. Nacan negocio quie Demetrio ruenē' idao' bižu quie diuzi quieyaquē' lao Diana. De puro plata ruzaloyaquē'n ta ta'onan. Quie lena' dumi zē ruenē' gan lente ja ben' ruelē lēbē' negocio na'. ²⁵ Caora na' bedupalēnē' yaca ben' ruelēnē' negocio, unē' rēbinē' leyaquē':

—Señores, dyē'ēdi nezile con ca dyin na' naoro dan' ruero gan dumi zē quiero. ²⁶ Lēzi dyē'ēdi nezile con cabē' rue ben' lao Pablo. Pues rdanē' nē' de que yaca diuzi rue ja benē', binacayaquē' diuzi. Pues como rdanē' rēbinē' ja benē' cana', abēnē' gan apsan ben' zē costumbre quiero, barnaoyaquē' con cabē' rna Pablo. Na' cala tuzi ciudad quiero rdanē' ruenē' cana', lēscan' casi duze yedyi nebaba Asia rdanē'. ²⁷ Quie lena' zudyi gula nacan huabiagui' negocio quiero. Lēscan' nacarēn zudyi idyin dza bira gapala'n benē' idao' quie Diana quiero, bira tzionla'adyi'yaquē' lēbē'. Bireya'ala' usanro gacan cana', porque duze yedyi nebaba Asia lente yaca los demás yedyi layu rionla'adyi'yaquē' Diana quiero.

²⁸ Na'ra bē' beyudyi beyaquē' con cabē' una Demetrio, legazi bdza'yaquē'. Hora na' unēyaquē' zidzo unayaquē':

—¡Viva Diana. Naquē' diuzi quie ra'o ben' Efeso!

²⁹ Pues dan' gucan cana', legazi uyu'u yaca ben' yedyi ru'be. Caora na' bēxoyaquē' chopa ben' uza' yu nebaba Macedonia, yaca ben' dzaga Pablo, tu ben' lao Gayo, len itu ben' lao Aristarco. Pues udubajē' leyaquē' layu psedyinjē' leyaquē' ga rdupa ben' yedyi na' ta rueyaquē' junta. ³⁰ Na'ra gu'un Pablo tzionē' ga babedupa ja ben' yedyi ta hue'lēnē' leyaquē' di'idza', pero bipsan yaca ben' nao xneza Jesús lēbē' tzionē' na'. ³¹ Lēzi bala yaca ben' rna'bē' quie yu nebaba Asia, nacayaquē' amigo quienē', unēyueyaquē' lēbē' de que bireya'ala' tzu'unē' ga babedupa yaca ben' yedyi. ³² Pues entre yaca ben' nita' na', balajē' unēyaquē' zidzo di'idza' udeudela. Ibalajē' unējē' natza'la, porque yaca benē' na' legazi uyu'ujē' ru'be, nica binezyaquē' bixquien' dan' bedupajē' na'. ³³ Caora na' balayaquē' entre yaca benē' nita' na' pxi'idze'yaquē' tu ben' lao Alejandro bixquien' bdza' ja ben' ciudad Efeso. Na' gudyiyaquē' lēbē' de que tal como bdza' ben' ciudad Efeso conlē ben' nao xneza Jesús, lēscan' bdza'rēyaquē' conlē ben' Israel nita' ciudad Efeso. Quie lena' bdyiga yaca ben' Israel Alejandro tacuenda zēnē' zaquē'lao lao yaca ben' bedupa na' tacuenda huenē' cule huenē' defender ben' Israel. Na'ra bē Alejandro seña con na'anē' tacuenda inita'yaquē' chizi yeyaquē' di'idza' re'ennē' inē'. ³⁴ Pero cati gucabē'yaquē' nacarē Alejandro ben' Israel, hora na' cadu lao chopa hora unēyaquē' zidzo unayaquē':

—¡Viva Diana! ¡Naquē' diuzi quie ra'o, ben' Efeso!

³⁵ Na'ra ben' naca secretario quie ciudad na', caora bēnē' gan ulezarē yaca ben' nita' na', hora na' unē' rēbinē' leyaquē':

—Benē' ciudad Efeso, rnia' le'e de que yugu ben' nita' ja yedyi layu, dyē'ēdi nezियाquē' de que ra'o, ben' ciudad Efeso, nacan quiero ta gaparo idao' quie diuzi Diana len imagen quienē' ta bguino guibá dza na'te. ³⁶ Na'ra como nitu, nitu, nunu inē' binacan cana', pues ulehue pensari dyē'ēdi cabē' re'enle huele. Mejorla bira huele zēdi. ³⁷ Pues yaca ben' dehua'ale niga, cala ulanyaquē' quie idao' quiero, cala unayaquē' di'idza' xi'ibi' contra diuzi quiero. ³⁸ Na'ra chi Demetrio lēnē' nu ben' ruelēnē' dyin, chi de nu causa quieyaquē' contra nutezi benē', reya'ala' tzioyaquē' ga re' ja ben' rna'bē' tacuenda gaonē' leyaquē' xquia lao juez. Pues lao ben' rna'bē' reya'ala' gaoro benē' xquia, quele niga. ³⁹ Pues chi re'en Demetrio gaonē' leyaquē' xquia niga ga reduparo, reya'ala' cuezē' hasta idyin dza gaca junta con cabē' rna ley quiero. ⁴⁰ Pues rue zudyi gao ben' quie gobierno ra'o xquia con cabē' guca na'adza. Rue zudyi inayaquē' re'entro tilalēro gobierno. Pues, chan' inaba ben' quie gobierno le'e bixquien' bedupale bēle zēdi na'adza, ŷbiži yēbilyaquē'?

⁴¹ Pues cana' una ben' secretario gudyinē' ben' Efeso. Na'ra ude beyudyi na', bēnē' mandado bedzatzayaquē' yeyoyaquē' zan yu'u quie quieyaquē'.

20

Cabē' guca caora uza' Pablo zionē' yaca ciudad nebaba Macedonia len yaca ciudad nebaba Grecia

¹ Na'ra bē' beyudyi tazēdi guca quiejē' na', beyēzi Pablo yaca ben' nao xneza Jesús tacuenda inēyuenē' leyaquē'. Ude beyudyi na', udēdyinē' leyaquē' bē'nē' tu despedida. Hora na' uza'nē' zionē' yaca ciudad ga nebaba Macedonia. ² Pues uyonē' yeyubinē' yaca ben' nao xneza Jesús, ben' nita' ja ciudad na', bē'nē' leyaquē' di'idza' žela'adyi' ta inaoyaquē' mazera xneza Jesús. Beyudyi na' beza'nē' zioquē' bedyinnē' yaca ciudad ga nebaba Grecia. ³ Na' ga bega'nnē' tzona biu'. Gu'unnē' tzu'unē' lu'u barco ta zionē' yaca yedyi nebaba Siria, pero como nezinē' bare'en yaca ben' Israel gutiyaquē' lēbē', bebi'zinē' zeyoguē' bedenē' yaca yedyi ga nebaba Macedonia tatula. ⁴ Uquiē'nē' tu ben' lao Sópater, ben' ciudad Berea, len Aristarco, len Segundo, ben' ciudad Tesalónica, len Gayo, ben' ciudad Derbe, len Timoteo, len chopo ben' nebaba Asia, tunē' laonē' Tíquico, itunē' laonē' Trófimo. ⁵ Na'ra yaca ben' na', caora bedyinyaquē' ciudad Filipos, tu bedeziyaquē' udyialaoyaquē' zioyaquē' ciudad Troas. Na' ulezayaquē' tu raza bdyin Pablo, porque ciudad Filipos bega'nnē' bedilanē' nē'ēdi', Lucas, ben' bdyia di'idza' lē'ē guichi ni. ⁶ Cana' bega'nnō' ciudad Filipos hasta dza ude lani cati reza'la'adyi' ben' Israel cabē' guca desde cana'te beza' yaca xuzixta'ojē' nación Egipto. Ude beyudyi na', uza'ndo' con lu'u barco ziondo' ciudad Troas. Pues lao ga'yo' dza bdyinndo' ciudad Troas na', bedilando' yaca ben' udyialao nēto'. Na' bega'nnō' cadu gadyi dza.

Cabē' guca yeyubi Pablo yaca ben' nao xneza Jesús, ben' nita' ciudad Troas

⁷ Caora na' dza domingo na', bedupalēndo' yaca los demás ben' nao xneza Jesús tacuenda uzuzundo' yēta xtila gaondo'n yeza'la'adyi'ndo' Jesús. Lēzi uzulao Pablo na' rusēdinē' nēto' mazera, pero como hueza'nē' yeteyu na', hasta bdyin gatzo yēla ru'elēzinē' nēto' di'idza'. ⁸ Caora na' nita'ndo' tu lu'u cuarto de tzona xcua ga ra'ala' zē yēri yaga. ⁹ Lēscan' na' re' tu bi'byu, bi' ru'abe laobi' Eutico. Re'bi' tu ru'a bentan zu ga nita'ndo' na'. Na'ra como Pablo na' neru'enē' di'idza' mazera, na' unan gasi bi' ru'abe na'. Pues du rasibi', cati bguinobi' ru'a bentan lao tzona xcua ga re'bi' na'te. Caora na' bechisayaquē'bi', pero natibi'. ¹⁰ Quie lena' uyēzi Pablo zionē' ga udixojē'bi' na' byēchonē' udēdyinē'bi' unē' gudyinē' yaca ben' nao xneza Jesús nita'ja na'!

—Bidzebile, nenebambi'.

¹¹ Caora na', bebē Pablo tatula lu'u cuarto de tzona xcua. Lēgan' na' udaondo' yugutendo' tuže, bzuzundo' yēta xtila beza'la'adyi'ndo' Jesús, bē'zi Pablo di'idza' tatula hasta que uyenī' na'. Ude beyudyinē' beza'nē' zeyonē'. ¹² Pero yaca ben' nita' na', blē'ēyaquē' nabamcazi bi' bguino na' bequiē'yaquē'. Quie lena' yugutejē' legazi redaohueyaquē' cabē' guca na'.

Ca guca uza' Pablo len compañero quienē' ciudad Troas bdyinyaquē' ciudad Mileto

¹³ Na'ra nēto' udyialaondo' uyondo' con lu'u barco ta idyinnō' ciudad Asón ta cuezando' guida Pablo, porque gu'unnē' tzionē' puro tu neza. Bigu'unnē' tzionē' lu'u barco. Quie lena' bega'nlēndo' lēbē' di'idza' yedilando' lēbē' ciudad Asón. ¹⁴ Bi'zi na' caora bedilando' Pablo ciudad na', uyu'ulēndo' Pablo lu'u barco uyondo' yugulundo' ciudad Mitilene. ¹⁵ Na'ra tu bedezindo' ciudad na', beteyu tula, udendo' yu nebaba Quío. Na' beteyu tatula, bdyinndo' ga nacan ga'ala' para tu ciudad laona Samos. Na'ra como biuzaque' idyinnō' mero ciudad Samos, bega'nnō' tu yēla ciudad Trogilio. Na' beteyu tatula, bdyinndo' ciudad Mileto. ¹⁶ Biuyondo' ciudad Efeso, porque bigu'un Pablo sunē' zidza yu nebaba Asia. Pero chi saque'nē', re'ennē' yedyinbachinē' ciudad Jerusalén tacuenda sunē' na' cati idyin dza ga'ala' lani quie usecho quie trigo laonan lani Pentecostés.

Ca di'idza' bdze' Pablo gudyinē' yaca ben' napa dyin, yaca ben' nao xneza Jesús nita' ciudad Efeso

¹⁷ Na'ra cati bdyinndo' ciudad Mileto, guzi Pablo yaca ben' napa dyin, yaca ben' nao xneza Jesús nita' ciudad Efeso. ¹⁸ Caora banita'jē' lao Pablo na' unē' rēbinē' leyaquē' cani:

—Dyē'ēdi nezile con cabē' bia' laole desde primero cati bdyina' yaca ciudad nebaba Asia. ¹⁹ Pues con catu dza uzulia' le'e, bia' dyin quie Diuzi. Guca' gaxo conlē' le'e hasta uredya' bedzagalao' nun quie dan' gu'un ja ben' Israel gutiyaquē' nē'ēdi'. ²⁰ Udixogui'a le'e yugute ta huen huen quiele. Uya' lu'u yu'u quie quiele apsdēia' le'e con cabē' rna xti'idza' Jesús. ²¹ Udixogui'a ben' Israel len ben' binaca ben' Israel de que reya'ala' hue quiejē' xti'idza' Diuzi, reya'ala' inaojē' xneza Jesús, ben' naca Señor quiero. ²² Na'ra abdyin hora yeya'a ciudad Jerusalén. Ni squiera nezda' chan' bi' tamala gaca quia' ga tza'a. Pero mandado quie Bichi Be quie Diuzi uzua' di'idza' tza'a. ²³ Nacan seguro udze' benē' nē'ēdi' dyiguiba. Nacan seguro yedzagalao' porque cana' baona Bichi Be quie Diuzi nē'ēdi' tu tu yedyi ga rda'a. ²⁴ Pero birdēbida' bi' gaca quia'. Zua' dispuesto gatia'. Decazide re'enda' useyudya' con gusto ca comisión pca'n Señor quiero lao na'a ta quixogui'a benē' con cabē' rna xti'idza' Diuzi ta ineziyaquē' nedyē'ē Diuzi leyaquē'.

²⁵ 'Nezda' dyë'ëdi nitu, nitule, bira yedilale në'ëdi'. ²⁶ Udixogui'a le'e con cabë' rna xti'idza' Diuzi. Quie lena' re'enda' inia' le'e de que cala dula' quia' chan' bihue quiele xti'idza' Diuzi, ²⁷ porque udixogue'caza' le'e duzete con cabë' rna xti'idza' Diuzi, nitu di'idza' bipcacha' ca tu ta rnën lë'ë guichi la'iya quienë'. ²⁸ Gapale cuidado ta inaole dyë'ëdi xneza Jesús. Rapale yaca los demás ben' nao xneza Jesús, porque ulio Bichi Be quie Diuzi le'e ta gapaleyacuë' ca rapa xan' beco' zi'ila' yaca beco' zi'ila' quienë', como por leyaquë' aguti Jesús lë'ë yaga cruzo. ²⁹ Dyë'ëdi banezda' de que caora azeya'a, huida yaca ben' hue ca rue lobo, utzatzayaquë' hueyaquë' zëdi yaca ben' nao xneza Jesús. ³⁰ Lëscan' rnia' le'e de que entre le'ezi huaro ben' huazi' ben' nao xneza Jesús yë' tacuenda inaojë' neza tula. ³¹ Gapale cuidado. Bigala'adyi'le como lao tzona iza bipsanla'adya' le'e unëyuecaza' le'e du dza, du yëla, hasta uredya' por le'e.

³² 'Hora na', bicha', rnia' le'e huele cuenda quie Diuzi, lëscan' hue quiele xti'idza'në', porque nedye'ë Diuzi le'e. Napa xti'idza' Diuzi poder ta gacalën le'e inaorale xnezë'. Lëscan' napan poder ta gacalën le'e gata' quie yugulu ta re'en Diuzi gunnë' le'e, len yugulu los demás ben' naca ben' la'iya quienë'. ³³ Na'ra biunaba' gunle ni zäbale, ni dumi. ³⁴ Dyë'ëdi nezile bia' dyin ta gata' dumi hua' gasto quia' lente gasto quie yaca ben' dzaga në'ëdi'. ³⁵ Bia' cana' ta gaca tu ejemplo cabë' reya'ala' huele dyin tacuenda gacalële ben' bibi de quie. Bigala'adyi'le ca una Señor quiero caora unë': "Nacara dya'a quiero gacalëro benë', quele ca ta si'ro quie benë'."

³⁶ Pues ude beyudyi una Pablo cana', uditzonë' zibinë' b'ë'lënë' Diuzi di'idza' conlë yaca ben' napa dyin, yaca ben' nao xneza Jesús nita' ciudad Efeso. ³⁷ Caora na' uredyiaquë' udedyiaquë' Pablo udaoyaquë' xaguë' situ. ³⁸ Legazi raqueyaquë' bayëchi', dan' gudyinë' lejë': "Nitu, nitule, bira yedilale në'ëdi'." Na'ra uyolëyaquë' Pablo yesanjë' lëbë' hasta ga iyu'unë' lu'u barcote.

21

Ca gaca zio Pablo ciudad Jerusalén

¹ Na'ra b'ëndo' ja ben' nao xneza Jesús, ben' nita' ciudad Efeso, tu despedida. Ude beyudyi na', ziondo' tu lu'u barco bdyinndo' ciudad Cos. Caora beteyuna', uza'ndo' bdyinndo' ciudad Rodas. Tu bedezindo' ciudad Rodas, bdyinndo' ciudad Pátara. ² Na' ciudad Pátara bedilando' tu barco ta zio yu nebaba Fenicia. Caora na' uyu'undo' barco na' ziondo'. ³ Neziondo' lu'u barco cati blë'ëndo' isla Chipre re'n zaquë' yega', pero tu bedezindo' isla Chipre bdyinndo' yu nebaba Siria. Pero como barco na' nu'an yua' ta uca'nnan ciudad Tiro, berondo' lu'u barco na'. ⁴ Caora na' uyondo' yena'ndo' yaca ben' nao xneza Jesús, yaca ben' nita' ciudad na'. Bizi bega'nndo' len leyaquë' lao gadyi dza. Na' unayaquë' gudyiaquë' Pablo de que bireya'ala' tzionë' ciudad Jerusalén como baona Bichi Be quie Diuzi leyaquë' bi gaca quie Pablo dza zaza'ra. ⁵ Na'ra baoca gadyi dza zundo' na', beza'ndo', pero yugu ben' nao xneza Jesús, ben' nita' na', len yaca žgulayaquë', len yaca xcuidi' quiejë', za'lëyaquë' nëto' hasta ru'a yedyite. Caora na' lao yožo ru'a nisadao' na', uditzondo' zibindo' blidzando' Diuzi. ⁶ Na'ra b'ëndo' lejë' tu yëla. ⁷ Pero nëto' uza'ndo' ciudad Tiro ziondo' bdyinndo' ciudad Tolemaida ga berondo' lu'u barco. Pues ciudad Tolemaida na' bgapando' diuzi yaca bichiro ben' nao xneza Jesús, ben' nita' na'. Na' bega'nlëndo' lejë' tu yëla. ⁸ Na'ra beteyu na', uza'lëndo' Pablo ni'ando' len yaca los demás ben' dzaga nëto' bdyinndo' ciudad Cesarea. Caora na' uyondo' zan yu'u quie tu ben' lao Felipe. Naquë' ben' rio yedyi tula ratixogue'në' benë' con cabë' rna xti'idza' Diuzi. Lëzi naquë' ben' ru'e laze ta gao ja nigula bizu xquiuhue de entre ja ben' nao xneza Jesús. Entre ja ben' ru'e laze naca gadyijë'. Na' bega'nlëndo' lëbë'. ⁹ Pues liden' Felipe na' nita'rë tapa ži'inë' nigula, puro bi' ru'abe yaca. Lëzi rguixogue'rëjabi' benë' di'idza' con ca rna Diuzi. Ruejabi' cabë' bë ja ben' profeta, ben' ulio Diuzi unita' tiempote. ¹⁰ Na'ra aoca chopä tzona dza zundo' yedyi na', cati bla' tu ben' profeta laonë' Agabo. Uza'në' estado Judea ¹¹ bla'në' deyubinë' nëto'. Hora na' uzi'në' cincho quie Pablo pquionë'n cuinnë' unë' rëbinë' nëto':

—Yaca ben' Israel, ben' nita' ciudad Jerusalén, uquiojë' xan' cincho ni cabë' pquioga' cuina', usedyinyaquë' lëbë' lao na'a ja ben' romano. Cana' baona Bichi Be quie Diuzi në'ëdi'. ¹² Caora bendo' di'idza' una Agabo, caora na' nëto' len yaca los demás ben' nao xneza Jesús, ben' nita' ciudad Cesarea na', unëyëchi'ndo' rëbindo' Pablo:

—Mejorla bira tzio' ciudad Jerusalén.

¹³ Pero bequëbi Pablo rëbinë' nëto':

—Bicuedyile uzuyëchi'le në'ëdi'. Zucaza' dispuesto bitezi ta gaca quia' ciudad Jerusalén por nun quie Señor Jesús, chi uquiojë' në'ëdi', chi gutiyaquë' në'ëdi'.

¹⁴ Pues como bibëndo' gan udzundo'nè', quie lena' gudyindo'nè':

—Gaca quio' ca re'en Diuzi.

¹⁵ Beyudyi bëndo' puesto quiendo', ziondo' ciudad Jerusalén. ¹⁶ Lëzi za'lë bala ben' nao xneza Jesús, ben' nita' ciudad Cesarea, nêto'. Na'ra ciudad Jerusalén bdyinndo' lidyi tu ben' lao Mnasón, ben' uza' Isla Chipre. Bazio zë iza naquë' ben' nao xneza Jesús.

Cabë' guca uyo Pablo yeyubinë' Santiago

¹⁷ Na'ra yaca bichiro, ben' nao xneza Jesús, ben' nita' ciudad Jerusalén na', bë' bdyinndo' na', dyë'édi gula bgapayaquë' nêto' diuzi. ¹⁸ Caora beteyu na' dza tula, uyolëndo' Pablo yeyubindo' tu ben' lao Santiago zu na'. Lëzi na' beduparë yaca ben' napa dyin quie ja ben' nao xneza Jesús, ben' nita' ciudad Jerusalén. ¹⁹ Caora na' bgapa Pablo leyaquë' diuzi bël'lënë' leyaquë' di'idza' rëbinë' lejë' yugu con cabë' bë Diuzi gucalënë' lëbë' udixogue'në' ben' binaca ben' Israel con cabë' rna xti'idza' Diuzi. ²⁰ Bizi cati beyaquë' di'idza' na' cabë' una Pablo, bëjë' Diuzi ben' ze. Beyudyi na', unayaquë' rëbiyaquë' Pablo:

—Bicha', tahuen gula babëlo'. Banezo' de que entre yaca ben' Israel nita'cazi zë mila yaca ben' barnao xneza Jesús, pero re'entzegueyaquë' inao yugulu benë' ca rna lao ley pca'n Diuzi lao na'a Moisés dza na'te. ²¹ Baneziyaquë' de que luë' rsëdio' yaca ben' Israel nita' yedyi quie ben' tula de que bira nacan zi inaojë' ca rna lao ley pca'n Diuzi lao na'a Moisés. Lëscan' baneziyaquë' rnao' de que bira nacan zi uzuyaquë' tu xëdyidao' zii'yaquë', ni siquiera ta inaoyaquë' ca naca costumbre gula quiero. ²² Na'ra ¿bizi huero? Pues huaneziyaquë' bazao'. ²³ Mejorla huelo' ca inando' luë'. Entre nêto' ni nita' tapa ja be'mbyu, ben' binehue cumplir tu di'idza' bël'lëyaquë' Diuzi dza na'te. ²⁴ Pues na' uquië'jë' uyolëjë' lu'u idao' rna'bë'ra, huu' gasto quiejë' tacuenda ichugojë' guitza' guichojë' tzhua'ajë' lu'u idao' rna'bë'ra gun quie Diuzi. Lëscan' luë' tzhua'alo' gun quie Diuzi lu'u idao' rna'bë'ra. Cana' huelo' tacuenda na' ilë'ë yaca benë' de que rnaocazo' costumbre quiero. ²⁵ Babëcazindo' tu guichi use'ela'ndo' lao yaca ben' binaca ben' Israel, ben' barnao xneza Jesús, gudyindo'jë' ca naca pensari quiero de que bireya'ala' gaojë' bë'ëla' bdyia benë' ru'aba ta bë'yaquë' ídolo quiejë'. Lëzi bireya'ala' gaorëyaquë' bë'ëla' quie nu bia bibro ren quie hora gutiba', ni siquiera ren quieba'. Lëscana' bireya'ala' gataljë' nigula binaca žgulajë'. —Pues cana' unayaquë' gudyijë' Pablo.

Bëxo yaca benë' Pablo lu'u idao' rna'bë'ra bëjë' lëbë' preso

²⁶ Caora beteyu dza tula, bë Pablo gasto quie tapa ben' zu na' tacuenda tzhua'ayaquë' gun quie Diuzi lu'u idao' rna'bë'ra. Ude beyudyi na', uquië' Pablo leyaquë' zioyaquë' lu'u idao' rna'bë'ra tacuenda tzetixogue'në' yaca pxuzi bi dza tzhua'ajë' gun quie Diuzi lu'u idao' rna'bë'ra.

²⁷ Pues cana' bzujë' di'idza' huejë' lao gadyi dza, pero binedila lao gadyi dza caora blë'ë yaca ben' uza' ja ciudad nebaba Asia rda Pablo lu'u idao' rna'bë'ra. Caora na' bdza'jë' betupajë' laguedyijë' bëxoyaquë' Pablo. ²⁸ Caora na' unëyaquë' zidzo unayaquë':

—¡Ulegacalë nêto', le'e ben' Israel! Abëxondo' ben' ni, porque lëbë' rdanë' duze yedyi layu rnënë' contra ra'o, rnënë' contra ley pca'n Diuzi lao na'a xuzixta'oro Moisés, rnënë' contra idao' rna'bë'ra quiero. Pues ptitonen' idao' rna'bë'ra quiero como uquië'në' ben' griego, ben' binaca ben' Israel, lu'e ni.

²⁹ Cana' unayaquë', porque blë'ëyaquë' ciudad na' rdalë Pablo tu ben' griego lao Trófimo. Naquë' ben' ciudad Efeso. Quie lena' racajë' pensari de que uquië' Pablo lëbë' lu'u idao' rna'bë'ra na'.

³⁰ Na'ra como bdza' zë ben' ciudad na', labedupatejë' uyu'ujë' bebiojë' Pablo lu'u idao' rna'bë'ra lapsiojë' puerta idao' rna'bë'ra na'. ³¹ Na' barutiyaquë' Pablo caora bdyin di'idza' ga nita' comandante quie soldado de que legazi raca huedila entre yaca ben' ciudad Jerusalén. ³² Cana' labedupate comandante, len yaca capitán, len yaca soldado quienë', zioyaquë' tariara bdyinyaquë' ga yu'u ja benë' rdila. Caora blë'ëyaquë' abdyin comandante lënë' soldado quienë', na' psanjë' ru'ëyaquë' quie Pablo. ³³ Caora na' zio comandante ubiga'në' ga zë Pablo, bënë' mandado bëxo yaca soldado lëbë' pquioyaquë' lëbë' chopacaden. Beyudyi na', pquëpinë' yaca ben' nita' na' rëbinë' leyaquë':

—¿Nu ben' niga? ¿Bizi bënë'?

³⁴ Pero yaca ben' na' uzulaoyaquë' rnëyaquë' zidzo udeudela. Tantozi ruëyaquë' ru'be, biuyoñe'e comandante bi nayaquë'. Que lena' bënë' mandado tzhua'a yaca soldado Pablo lu'u cuarto ga nita'jë'. ³⁵ Bizi na' cati abdyinyaquë' ga cuëyaquë' nëpi' quie cuarto na', bi'ayaquë' Pablo ta urëyaquë' nëpi' na', porque lega rudzun yaca benë' ga zio soldado. ³⁶ Na'ra yaca ben' ciudad na' ziojë' zenaoyaquë' lejë' rnëyaquë' zidzo najë':

—¡Gutilenë'!

Con cabë' una Pablo gucalënë' cuinnë' lao ja ben' ciudad Jerusalén

³⁷ Bizi tu binedze' ja soldado Pablo lu'u cuarto ga nita'jè', na' una Pablo di'idza' griego unè' gudyinè' comandante:

—¿Bigunlo' lato hue'lia' luè' tu chopa di'idza'?

Na'ra una comandante na' gudyinè' Pablo:

—¿Cómo raco' di'idza' griego? ³⁸ ¿Quele luè' naco' ben' Egipto, ben' bebio lao tapa mila benè' ta udilaléyaquè' gobierno dza na'? ¿Quele luè' ptupo' leyaquè' lao paraje ga bidyia yu'u? ¿Quele nacaro' xan' ja ben' ruti benè'?

³⁹ Na'ra bequèbi Pablo rëbinè' lèbè':

—Quele nè'èdi', porque naca' ben' Israel. Uza' ciudad Tarso. Pues ciudad quia' nacan tu ciudad belao entre yaca ciudad nebaba Cilicia. Pero na'a chi huu' tu cule, gunlo' permiso inia' tu chopa di'idza' lao yaca ben' nita' ni.

⁴⁰ Pues como bè' comandante lèbè' permiso ta inènè' lao yaca ben' nita' na', caora na' yesu Pablo lao nèpi' na', bènè' seña conlè na'anè' ta inita'yaquè' chizi. Caora unita'yaquè' chizi yugutejè', hora na' uzulaonè' rnènè' di'idza' hebreo gudyinè' ja ben' nita' na':

22

1—Bicha' ben' Israel, ni hua' defender cuina'. Ulezëcara nagale quia'.

² Caora beyaquè' rnè Pablo di'idza' hebreo, mazera bega'njè' chizi. Na'ra unè' rëbinè' leyaquè':

³—Nacaria' ben' Israel ca le'e. Gologa' tu ciudad nebaba Cilicia laona Tarso. Pero ciudad Jerusalén niga bgula'. Lèzi zè iza uya'a escuela ni ga psèdi maestro Gamaliel nè'èdi' yugulu con cabè' rna ley pca'n Diuzi lao na'a xuzixta'oro Moisés dza na'te. Du guicho du la'adya' bia' mandado cabè' pensari guca' una Diuzi nè'èdi', laga ca ruele le'e na'a. ⁴ Lëscan' bëria' contra yaca ben' nao xneza Jesús. Begunni'a leyaquè' hasta bia' balajè' preso bdzi'ayaquè' lu'u dyiguiba ta gati'jè', len be'mbyu, len nigula. ⁵ Pues naca xan' pxuzi len yaca los demás ben' rnabè' testigo de que benyaquè' nè'èdi' guichi nu'a za'a lao ja bichiro ben' Israel, ben' nita' ciudad Damasco. Dyè'èdi' nezियाquè' uya'a yediloga' yaca ben' nao xneza Jesús ta hua'ayaquè' preso yequi'ayaquè' ciudad Jerusalén ni ta gacajè' castigo.

Pablo na' bènè' di'idza' yugulu con ca uzacanè' dan' bènè' contra yaca ben' quie Jesús

(Hch. 9.1-19; 26.12-18)

⁶ Na' za' tu neza dza na', bagazi idyina' ciudad Damasco, caora na' cadu la'odza tu sasazi uyèzi tu xni' gui' za'n guibá uyèchon nè'èdi' ga za' tu neza na'. ⁷ Caora na' bdia' yu beda' unè' tu ben' una nè'èdi': "Saulo, ¿bixquien' ru' contra nè'èdi'?" ⁸ Na'ra unaba' rëba'nè': "¿Nuzi luè', Señor?" Hora na' unè' rëbinè' nè'èdi': "Nè'èdi' Jesús, ben' yedyi Nazaret. Naca' ben' ruelo' contra." Cana' unè' nè'èdi'. ⁹ Pues yaca ben' za'lia', legazi bdzëbiyaquè', porque blè'èyaquè' xni' gui', pero biuyoñe'eyaquè' xti'idza' ben' unè' nè'èdi'. ¹⁰ Na' agudya'nè': "¿Bizi ca re'enlo' hua', Señor?" Na'ra unè' rëbinè' nè'èdi': "Beyasa, uyo ciudad Damasco. Bè' hazulo' ciudad na', naise'ela' nu ben' ina luè' bi huelo'." Cana' unè' nè'èdi'. ¹¹ Pero como dyin quie xni' gui' na', pchulan laohua', gira blè'èda'. Quie lena' bëxo yaca ben' za'lia' na'a bdyinndo' ciudad Damasco na'.

¹² Pues ciudad na' zu tu ben' lao Ananías. Naquè' ben' nao ley pca'n Diuzi lao na'a xuzixta'oro Moisés. Yugu yaca ben' Israel nita' ciudad Damasco nayaquè' quienè' de que naquè' ben' huen gula. ¹³ Caora na' bida Ananías denè'è nè'èdi'. Cati bla'nè' na', unè' nè'èdi': "Bicha' Saulo, abdyin hora yelè'èlo' tatula." Caora unè' cana' labeyacate laohua'. Belè'èda' dyè'èdi. ¹⁴ Na'ra unè' rëbinè' nè'èdi': "Ulio Diuzi luè' desde dza na'te ta inezulo' ca re'en Diuzi guca, lèzi ta ilè'èlo' zi'inè', ben' naca la'ya quienè', lëscan' ta yelo' xchi'nè'. ¹⁵ Na'ra re'en Diuzi gaco' testigo lao yaca ben' nita' duze yedyi layu, ta yëbo'yaquè' cabè' babelo', cabè' bablè'èlo'. ¹⁶ Na'ra, bitzèlo'. Uzuli, bè' lato hue' benè' laolo'. Ulidzo' Jesús na' uzètolo' laohuè' tacuenda yeyula dula' xquia quio'." Cana' una Ananías cati bidè' denè'è nè'èdi'.

Pablo na' bènè' di'idza' cabè' guca use'ela' Diuzi lèbè' yetixogue'nè' ben' binaca ben' Israel con cabè' rna xti'idza' Diuzi

¹⁷ Na'ra cati bedyina' ciudad Jerusalén, uya'a lu'u idao' rnabè'ra na', bia' orar. ¹⁸ Pues guca quia' ca tu ben' uxusa, blè'èda' Jesús. Hora na' unè' nè'èdi': "Labegazi yeza'lo' ciudad Jerusalén niga, porque bihuejè' cuenda ca di'idza' quia' yëbo'jè'." ¹⁹ Na'ra gudya'nè': "Pero señor, dyè'èdi nezijè' con cabè' bia' dza na', uyu'a lu'u yaca sinagoga radiloga' yaca ben' nao xneza Jesús ta yequi'ayaquè' udzi'ajè' dyiguiba ru'ayaquè' zi'. ²⁰ Lèzi cati bëtiyaquè' Esteban, ben' udixogue' xti'idzo', guca' de acuerdo dan' bëtiyaquè' lèbè'. Udapa' gaban quie yaca ben' bëti lèbè'." Cana' gudya' Jesús. ²¹ Na'ra una Jesús nè'èdi' tatula: "Labe uyo, porque rse'ela' luè' zitu' ga nita' ja ben' binaca ben' Israel ta tzetixogue'lo' leyaquè' con cabè' rna xti'idza'." Pues cana' guca quia' cati uzulaohua' rnaohua' xneza Jesús.

Gu'un comandante quinè' Pablo

²² Hora na' bira bzēnagajē' ca di'idza' una Pablo, na' unēyaquē' zidzo nayaquē':

—¡Bira reya'ala' suē' dyilayul' ¡Gutilenē'!

²³ Na'ra bipsan ja ben' nita' na' rnēyaquē' zidzo. Yela' rdza' quiejē' bzeyaquē' gaban quiejē' ladza. Lēzi bzerēyaquē' bēxte ladza. ²⁴ Quie lena' bē comandante mandado ta udze'yaquē' Pablo lu'cu cuarto quiejē' na'. Pero lēzi bēnē' mandado qui yaca soldado lēbē' con guidi tacuenda na' a la fuerza yēbinē' leyaquē' ca bi falta quienē' de, dan' rnē yaca ben' na' zidzo contra lēbē'. ²⁵ Pues banuquioyaquē' Pablo ta quiyaquē' lēbē' caora unēnē' gudyinē' capitán na':

—Binacan de acuerdo con lao ley quile nē'ēdi', porque naca' cuenda quie ciudad Roma. Pues sin nica nehuelo' justicia quia' lao juez, bide derecho quio' huu' nē'ēdi' castigo chi binezo' de falta quia'. —Cana' una Pablo gudyinē' capitán.

²⁶ Na'ra caora be capitán na' ca una Pablo, uyonē' yetixogue'nē' comandante gudyinē' lēbē':

—Gapo' cuidado bi huelo' quie ben' ni, porque aonē' nē'ēdi' de que naquē' cuenda quie ciudad Roma. —Cana' unē' gudyinē' comandante.

²⁷ Cana' zio comandante ga zē Pablo unabē' gudyinē' lēbē':

—¿Balo' naco' cuenda quie ciudad Roma?

Na' bequēbi Pablo gudyinē' comandante:

—Aja', naca' cuenda quie ciudad Roma.

²⁸ Na' gudyi comandante lēbē':

—Pues cati guca' nē'ēdi' cuenda quie ciudad Roma, lega dumi ze gula udižuga'.

Na'ra una Pablo:

—Pero nē'ēdi' banaca' cuenda quie ciudad Roma desde cati golotia'.

²⁹ Pues cati be yaca ben' banita'ja quija lēbē' de que naca Pablo cuenda quie ciudad Roma, bebiga'jē' ga zēnē'. Hasta cuin comandante na' bdzebinē' dan' ilē'ēti'zi ca bēnē' Pablo castigo sin binegaca justicia quienē' lao juez.

Cabē' guca psedyinjē' Pablo lao ja ben' rnabē' quie ben' Israel

³⁰ Na'ra beteyu dza tula na', gu'un comandante inezinē' dyē'ēdi bixquien' rao yaca ben' Israel Pablo xquia. Quie lena' bexēdyijē' caden na' nerionē', bē comandante na' mandado ta yedupa yaca pxuzi lente yugu yaca los demás ben' rnabē' quie ben' Israel, ben' nita' ciudad Jerusalén. Caora babedupayaquē' na', na'ra ulio comandante na' Pablo lu'cu cuarto ga denē' psedyinnē' lēbē' lao yaca ben' babedupa na'.

23

¹ Caora bazē Pablo lao ja ben' rnabē' quie idao' rnabē'ra na', na'ra una'nē' dyē'ēdi leyaquē' gudyinē' lejē':

—Bicha', hasta na' zucaza' rda'a re' chizi laxta'ohua' lao Diuzi.

² Na' xan' pxuzi laonē' Ananías, bēnē' mandado yaca ben' zē ga'ala' ga zē Pablo ta capayaquē' xaguē' dan' unē' cana'. ³ Caora na' una Pablo gudyinē' lēbē':

—¡Diuzi huenē' luē' castigo dan' biruelo' tuzi con cabē' rna lē'ē ley. Re'lo' na' ta huelo' justicia quia' con cabē' rna lē'ē ley, ¿bixquien', pues, ruelo' contra ley na', ru' mandado capa benē' xaga'?

⁴ Na' yaca ben' nita' bago na' unajē' gudyijē' lēbē':

—¿Cana' biruelo' bala'ana xan' pxuzi, ben' quie Diuzi?

⁵ Na' bequēbi Pablo gudyinē' lejē':

—Bicha', binezda' chi naquē' xan' pxuzi. Pues chan' nezda' naquē' xan' pxuzi, biunia' cana', porque rnēn' lē'ē ley quiero de que: "Reya'ala' huero bala'ana nu ben' rnabē' quiero."

⁶⁻⁸ Caora na' gucabē' Pablo de que bala ja ben' rnabē' nita' na' nacajē' ben' partido saduceo, na' ibalajē' nacajē' ben' partido fariseo. Pero yaca ben' partido saduceo nayaquē' de que yaca ben' gati biyebanjē'. Lēzi nayaquē' ganu ángel zu, ni bichi be. Pero bizi yaca ben' partido fariseo na', binacayaquē' tuzi con cabē' rna ja ben' partido saduceo na'. Quie lena' unē Pablo zidzo rēbinē' leyaquē':

—Bicha', naca' ben' quie partido fariseo. Lēzi xuzā' naquē' ben' partido fariseo. Pero dan' rnia' huadyin dza yeban ben' huati, quie lena' rao yaca benē' nē'ēdi' xquia.

Cana' una Pablo rēbinē' lejē'. Na'ra dan' unē' cana', uzulao ja ben' partido fariseo ruelēyaquē' ben' partido saduceo huenē. Bibega'nyaquē' de acuerdo entre lao chopā cue'yaquē'. ⁹ Pues yugutejē' uzulaojē' rnējē' zidzo hasta uzuli chopā tzona ben' naca quie partido fariseo, unayaquē' rēbiyaquē' yaca los demás ben' rnabē':

—Ben' ni, bibi tamedian bēnē'. Mejorla bihueronē' castigo, porque chica abida nu ángel o chi nu bichi be bē'lē lēbē' di'idza'. Pues gaparo cuidado bihuero contra Diuzi. —Pues cana' unayaquē'.

¹⁰ Na' como legazi racagazi huenë na', bdzebi comandante hueyaquë' zi' quie Pablo. Cana' bënë' mandado tzio yaca soldado ta yebioyaquë' Pablo lado ja ben' nita' na' ta yequië'yaquë' lëbë' tatula lu'u cuarto quiejë'.

¹¹ Na'ra bezu rdze' tula, ptılalao Jesús Pablo rëbinë' lëbë':

—Bidzebo', Pablo, porque con cabë' babëlo' baodixogue'lo' ben' ciudad Jerusalén con cabë' unia', lëscan' ise'ela' luë' ciudad Roma ta tzetixogue'lo' ben' ciudad na' con cabë' unia'. —Cana' una Jesús gudyinë' Pablo.

Bapsaque' ja ben' Israel cabë' huejë' gutijë' Pablo

¹² Bizi beteyu na', bala ja ben' Israel gucayaquë' de acuerdo ta gutiyaquë' Pablo. Pues hasta bguntejë' lao Diuzi unajë' hue Diuzi leyaquë' castigo chi bigutiyaquë' Pablo. Lëscan' nayaquë' de que bibi gaoyaquë', bibi yo'oyaquë' tu binegutijë' Pablo na'. ¹³ Mazla chopa galo be'mbyu naca bëjë' compromiso huejë' cana'. ¹⁴ Hora na' uyoyaquë' yena'yaquë' yaca xan' pxuzi len yaca los demás ben' rnabë' quie ben' Israel gudyijë' lejë':

—Pues nëto' baguntendo' lao Diuzi gutindo' Pablo. Baonabando' Diuzi huenë' nëto' castigo chi bigutindo' Pablo. Baguntendo' laonë' bibi gaondo', bibi yo'ondo' tu binegutindo' lëbë'. ¹⁵ Na'ra huele tuhen galalële nëto'. Yëbile comandante ta yeguidë' ni uxe tatula, idehua'anë' Pablo na' laole. Pues yëbilenë' de que re'enle uquëpilenë' mazera como si fuera ta inezile dyë'ëdi quie asunto quienë'. Na'ra nëto' ucachi'laondo' tu neza gutindo'në' bë' yedenë'. —Cana' unajë' gudyijë' lejë'.

¹⁶ Pero bizi na', be zi'i zan Pablo cabë' unajë' quie Pablo. Quie lena' uyobi' yena'bi' Pablo ga zunë' lu'u cuarto quie ja soldado yetixogue'bi' lëbë' con cabë' unayaquë' quienë'.

¹⁷ Caora na' guzi Pablo capitán gudyinë' lëbë':

—Uquië'cara bi' niga yehua'abi' lao comandante, porque naca tu di'idza' belao hue'lëbi' lëbë'.

¹⁸ Cana' uquië' capitán lëbi' ga re' comandante gudyinë' lëbë':

—Za' dehua'a bi' niga laolo' ni, porque cana' una preso, ben' lao Pablo. Lëbë' unë' naca tu di'idza' belao hue'lëbi' luë'.

¹⁹ Bizi bë' beyudyi una capitán cana', bëxo comandante na'a zi'i zan Pablo uquië'në'bi' tzala'la rëbinë'bi':

—¿Bizi ca re'enlo' inao' në'ëdi'?

²⁰ Na' nabi' rëbibi' lëbë':

—Rnia' luë' de que yaca ben' Israel, agucayaquë' de acuerdo ta idenabajë' laolo' iquië'lo' tío quia' Pablo, tzehua'alo'në' lao xan' pxuzi len lao yaca los demás ben' rnabë' uxe. Pues inayaquë' de que re'enyaquë' uquëpiyaquë' lëbë' mazera ta inezirajë' dyë'ëdi asunto quienë'. ²¹ Pero bigalelo' quieyaquë', porque mazla chopa galo yaca be'mbyu apcachi'laojë' rbë'nidyiyaquë' ta gutiyaquë' tío quia'. Pues tantozi re'enyaquë' gutiyaquë' tío quia' Pablo, aonabayaquë' hue Diuzi leyaquë' castigo chi bigutiyaquë' tío quia'. Lëzi unayaquë' bibi gaojë', bibi yo'ojë' tu binegutiyaquë' tío quia'. Pues banita'jë' listo guida tío quia'. Rbezazijë' luë' chi ise'elo' tío quia'. —Cana' una zi'i zan Pablo gudyibi' comandante.

²² Na'ra gudyi comandante lëbi' de que nitu nunu yëbibi' con cabë' unabi' bagudyibi' lëbë'. Na' ude beyudyi na', bebionë' lëbi'.

Cabë' guca use'ela'yaquë' Pablo lao Félix, ben' naca gobernador

²³ Caora na' beyëzi comandante chopa ben' naca capitán gudyinë' lejë':

—Re'enda' ise'ela' Pablo ciudad Cesarea. Pues utupale yaca soldado tzehua'ayaquë' lëbë' ciudad na'. Na'ra utupale chopa gayuhua soldado tzio ni'azi, len itzona galo chi ben' cuia bia, len ichopa gayuhua yaca ben' hua' lanza. Re'enda' za'le na'a yëla du las nueve. —Cana' una comandante gudyinë' yaca capitán.

²⁴ Pero lëzi gudyinë' lejë' ucwezayaquë' tu bia ta cuia Pablo tzıolëyaquë' lëbë' ciudad Cesarea como re'ennë' usedyinyaquë' lëbë' dyë'ëdi lao ben' naca gobernador, ben' lao Félix.

²⁵ Caora na' bë comandante tu guichi ta hua'ajë' ta hue'jë' gobernador. Na' lë'ë guichi rnën cana': ²⁶ “Estimado gobernador Félix, rgapa' luë' diuzi. ²⁷ Uzi'ze quia' rguixogui'a luë' cabë' naca tu asunto entre ja ben' Israel nita' ni, len tu ben' bëxojë' lao Pablo. Azio chopa tzona dza bagu'unyaquë' gutijë' lëbë'. Pero como unezda' naquë' cuenda quie ciudad Roma, betupa' ja soldado quia' uya'lia' leyaquë' ga nita'jë' gutijë' lëbë'. Pues psela' lëbë' bibëtijë' lëbë'. ²⁸ Na'ra como gu'unda' inezida' bixquien' dan' raoyaquë' lëbë' xquia, uqui'anë' lao xan' pxuzi len lao yaca los demás ben' rnabë' quiejë'. ²⁹ Pues ga beyudyi unayaquë' de que por ley quiezियाquë' raojë' lëbë' xquia. Pero según ley quiero, ley quie ben' romano, bibi razón de chi gutiyaquë' lëbë', ni siquiera tzu'ugalanë' lu'u dyiguiba. ³⁰ Pero bizi na' aoderala cati beda' di'idza' banacayaquë' de acuerdo ta gutijë' lëbë'. Quie lena' beguilogal' modo use'ela'në' laolo' na'. Lëzi bia' mandado tziorë yaca ben' rao lëbë' xquia tacuenda

yetilajè' di'idza' laolo'. Lèzin na' rguixogui'a luè'." Pues cana' unèn lè'è guichi use'ela' Claudio Lisias lao gobernador Félix.

³¹ Na' segùn ca mandado bè comandante, uquiè'yaquè' Pablo du rèla hasta bdyinyaquè' yedyi Antipatris. ³² Caora beteyu na', bebi' yaca soldado zio ni'azi bedyinyaquè' ga zu cuarto uza'yaquè'. Pero yaca soldado dyia bia na', ziolèziyaquè' Pablo hasta idyinjè' ciudad Cesarea. ³³ Cati bdyinyaquè' ciudad na', psedyinyaquè' Pablo len guichi nu'ajè' lao ben' gobernador. ³⁴ Na' unè ben' naca gobernador lè'è guichi na'. Beyudyi unè'n na', unabè' Pablo gazi uza'nè'. Caora bequèbi Pablo de que naquè' ben' quie ciudad nebaba Cilicia, ³⁵ caora na' una gobernador rèbinè' Pablo:

—Hua' justicia quio' cati guida ja ben' rao luè' xquia.

Na' bènè' mandado ta gapa yaca soldado quienè' lèbè' lu'u lidy rey Herodes. Cana' guca psedyinyaquè' Pablo lao gobernador Félix.

24

Cabè' guca bè' Pablo defender cuinnè' lao Félix

¹ Na'ra cati aode ga'yo' dza na', bdyinrè Ananias ciudad Cesarea na', len ibala yaca ben' r nabè' quie ja ben' Israel, len itu ben' laonè' Tértulo, ben' sèlè leyaquè' lao gobernador na'. Bdyinyaquè' lao gobernador na' ta gaoyaquè' Pablo xquia. ² Cati yexi' soldado Pablo psedyinjè' lèbè' lao gobernador, caora na' uzulao Tértulo raonè' Pablo xquia nè' rèbinè' Félix na':

—Zucazindo' contento r nabè'lo' nètò', Señor Gobernador, porque por pensari dya'a quio', banaca ja ben' quie quie yedyi de acuerdo con cabè' bao', porque taže bagucalao' nètò'. ³ Pues yugulundo' r nando' luè' xcalelo', Señor Gobernador, porque raxecazindo' yugu con cabè' ruelèlo' nètò'. ⁴ Na'ra ta biutzèndo' luè', rnaba' tu cule laolo', chi huu' tu huen, uzènago' con cabè' inando' luè' tzadica'. ⁵ Pues cani nacan quie ben' ni naquè' ben' zèdi gula. Rdanè' duže yedyi layu rbionè' yaca benè' chopa cue' de entre yaca ben' Israel. Lèzi naquè' xan' ja ben' nao xneza Jesús, ben' yedyi Nazaret. ⁶ Pues re'ennè' titunè' idao' r nabè'ra quiendo'. Re'ennè' iquie'nè' ben' binaca ben' Israel lu'e na'. Pero lena' nacan zudyi gula segùn ca naca ley quiendo'. Quie lena' bèxondo'nè' ta re'ennè' huendo' justicia de acuerdo con cabè' rna lè'è guichi ley quiendo'. ⁷ Pero bizi na' cati bla' comandante Lisias, a la fuerza begubanè' bequie'nè' lèbè'. ⁸ Na' unè' de que yaca ben' rao lèbè' xquia reya'ala' guidajè' laolo' ni. Quie lena' babla'ndo' laole. Pues mejorla cuincazo' uquèpilo'nè' ta yetila di'idza' bixquien' raondo'nè' xquia. —Cana' una Tértulo gudyinè' gobernador.

⁹ Na'ra yaca ben' Israel nita'rè na', lèzi unayaquè' de que tabala na' ca una Tértulo. ¹⁰ Caora na' bè ben' naca gobernador seña conlè nè'è lao Pablo ta inezi Pablo ta sulaonè' inènè' huenè' defender cuinnè'.

Na' una Pablo rèbinè' ben' naca gobernador:

—Legazi redaohueda' hua' defender cuina' inia' laolo' ni, porque nezda' azio zè iza naco' juez lao ja ben' Israel. ¹¹ Na' binegaca chipchopa dza bedyina' ciudad Jerusalén ta tzionla'adya' Diuzi. ¹² Nitu ganu rnèlia', ni tazèdi biudiloga' lu'u idao' r nabè'ra na', ni lu'u yaca sinagoga, ni lao ciudad na', nitugazi. Pues nita' ja testigo quia'. Huanèyaquè' chi nacan tali, chi binacan tali, con cabè' rnìa' luè'. ¹³ Yaca ben' ni, bibi prueba decazi quiejè' dan' raoyaquè' nè'èdi' xquia. ¹⁴ Pero claro gula re'enda' inia' luè' de que rionla'adya' Diuzi quie xuzixta'ondo', pero de modo tula, modo cubila. Ben' ni biraxeyaquè' modo quia' nayaquè' binacan dya'a. Pero rnaohua' yugulu con cabè' rnèn lè'è guichi ley pca'n Diuzi lao na' xuzixta'ondo' Moisés len con cabè' rnèn lè'è guichi bè yaca los demás ben' udixogue' con cabè' rna xti'idza' Diuzi dza na'te. ¹⁵ Rbeza' idyin dza useban Diuzi yugu ben' huati, chi ben' bè tadya'a, chi ben' bə tamedian. Quie lena' yugu dza, yugu yèla, rapa' cuidado tacuenda ta'a tu neza dya'a, gaca yèri laxta'ohua' lao Diuzi, len lao yaca benè'. ¹⁶ Cala tuza' nè'èdi' rbeza' idyin dza useban Diuzi yaca ben' huati, dechan' len zè ja ben' yedyi quia', ben' Israel, rbezareyaquè' dza useban Diuzi yaca ben' huati.

¹⁷ Na'ra como baguca zè iza rda'a du yedyi quie ja ben' binaca ben' Israel, na' bedyina' yedyi quia' ta hua'a yaca ben' yèchi' nita' yedyi na' caridad, lèzi ta udzi'a gun quie idao' r nabè'ra na'. ¹⁸ Na'ra ude beyudyi bzua' di'idza' segùn ley quiendo' tacuenda gaca' ben' laxta'o yèri lao Diuzi, bibi zèdi udiloga', biyetupa' nu yaca benè'. Zua' rudzi'a gun quie idao' r nabè'ra na' cati dexaca tu chopa ja ben' Israel nè'èdi', ben' uza' yu nebaba Asia. ¹⁹ Na' yaca ben' dexaca nè'èdi' lu'u idao' r nabè'ra na', reya'ala' guidajè' niga tacuenda na' chi gaoyaquè' nè'èdi' xquia. Pues a ver bi inayaquè' chi de bi de quiejè' conlè nè'èdi'. ²⁰ Na' chi bisaque' guidajè', reya'ala' ina ben' nita' niga chi bedzelejè' nu causa quia' cati zua' lao xan' pxuzi len lao yaca los demás ben' r nabè' quie ben' Israel. ²¹ Pues chica raqueyaquè' bia' tamedian hora zua' laoyaquè' na' unia' zidzo rèba'yaquè': "Dan' rnìa' huadyin dza yeban

ben' huati tatula, que lena' rao yaca benë' në'ëdi' xquia ni." —Cana' una Pablo rëbinë' gobernador na'.

²² Na'ra ba'ala'cazi dyë'ëdi banezi Félix naca ja ben' nao xneza Jesús ben' huen, bipsannë' Pablo libre. Na' pca'nnë' asunto quienë' cana'zi, porque gu'unnë' uquëpinë' comandante Lisias mazara. Quie lena' unë' gudyinë' lejë':

—Ruen za cuezaro guida comandante Lisias tacuenda iyudyi asunto quiele ni.

²³ Caora na' bë Félix mandado gudyinë' capitán ta gapanë' Pablo, pero bibënë' quienë' bizinaquezi, porque naca Pablo ben' bala'ana. Lëzi bë' Félix lato guida ja ben' amigo quie Pablo tzeyubijë' lëbë'.

²⁴ Na'ra zio Félix yedyi tula, pero guca chopa tzona dza bedyinnë' ciudad Cesarea tatula lënë' žgulë'. Na' žgulë' laonë' Drusila, naquë' ben' Israel. Caora na' be' Félix mandado ta tzexi' soldado Pablo ta hue'lënë' lëbë' di'idza' yenë' hue' Pablo di'idza' quie xneza Jesús.

²⁵ Conforme na', bë'lë Pablo Félix len žgulë' di'idza'. Na' una Pablo rëbinë' leyaquë' de que bireya'ala' hueyaquë' ca tu ta rnazin quieyaquë', dechan' reya'ala' hueyaquë' ca re'en Diuzi ta gaca huen quieyaquë' cati idyin dza hue Diuzi juicio lao duže yedyi layu. Pues caora be Félix di'idza' una Pablo, legazi bdzebinë', porque dyë'ëdi nezinë' binaonë' neza dya'a. Quie lena' unë' rëbinë' Pablo:

—Tu cana'gazi, mejorla beyo. Pues cati gunan lato hueyëža' luë' tatula.

²⁶ Cana' gudyi Félix Pablo. Pero como rbezë' ta hue' Pablo lëbë' dumi tacuenda na' yebionë' lëbë' lu'u dyiguiba, quie lena' rëzi Félix na' lëbë' tzadi tzadi ta ru'elënë' lëbë' di'idza'. ²⁷ Cana' guca quie Pablo lao chopa izara. Na'ra bdyin hora bero Félix na' de gobernador. Caora na' uyëzi itu ben' tula lao lazë', ben' lao Porcio Festo. Na'ra como re'en Félix gaquë' yaca ben' Israel amigo, pca'nzinë' Pablo lu'u dyiguiba.

25

Cabë' guca bë' Pablo defender cuinnë' lao gobernador Festo

¹ Na' babdyin Festo ciudad Cesarea tacuenda huenë' de gobernador. Biži na' aoca tzona dza bdyinnë' na', uza'në' zionë' ciudad Jerusalén. ² Na'ra cati bdyinnë' ciudad Jerusalén, zio yaca xan' pxuzi len ibalara ben' rnabë' quie ben' Israel tzeyubiyaquë' lëbë' ta gaoyaquë' Pablo xquia. ³ Unabayaquë' chi huenë' tu cule huenë' mandado tzexi' yaca soldado Pablo ta yedyinnë' ciudad Jerusalén tatula. Pero bapsaque'yaquë' bi hueyaquë' gutiyaquë' Pablo du tu neza. ⁴⁻⁵ Caora na' bequëbi Festo gudyinë' lejë':

—Pues lazeya'atia' luegozi ciudad Cesarea. Como na' zu Pablo naquë' preso, quie lena' rnia' le'e de que reya'ala' sa'lë nu ben' rnabë' quiele len në'ëdi'. Chi nezile bënë' tamedian, huazaque' gaolenë' xquia laohua' ciudad na'.

⁶ Na' Festo uzunë' ciudad Jerusalén cadu xu'una chi dza. Caora na' beza'në' zeyonë' bedyinnë' ciudad Cesarea. Beteyu dza tula, yaque'në' xlatonë' ga rueyaquë' junta. Bënë' mandado ta tzio nu soldado tzexi'yaquë' Pablo. ⁷ Na'ra cati uyu'u Pablo ga re' Festo na', hora na' laobiga'te yaca ben' za' ciudad Jerusalén gan' bazënë', uzulaojë' raoyaquë' lëbë' xquia huala gula lao Festo. Pero ni tu prueba quieyaquë' bide.

⁸ Biži caora na' be' Pablo defender cuinnë' unë' cani:

—Rnia' le'e nitu tamedian nehua'. Nica bëza' contra ley quie ja ben' Israel, ni contra idao' rnabë'ra zu Jerusalén, ni contra rey César quie ben' romano. —Cana' una Pablo gudyinë' Festo.

⁹ Na'ra como Festo gu'unnë' gaquë' amigo len ja ben' Israel, unë' gudyinë' Pablo:

—A ver bi ca nao'. ¿Zulo' dispuesto tzio' ciudad Jerusalén tacuenda na' hua' justicia quio' na'la?

¹⁰ Pero bequëbi Pablo gudyinë' lëbë':

—Ni zucaza' laolo' ga reya'ala' gaca justicia quia', porque ni re' juzgado ga re' juez quie rey César. Bireya'ala' tza'a lao ben' Israel. Pues luë' nezo' dyë'ëdi nitu lasa bibia' contra ley quie ben' Israel. ¹¹ Pues rnia' luë' de que chi tali na' bia' tu tamala ta nu'an castigo para gatia', zua' dispuesto huelo' mandado guti ja soldado në'ëdi'. Pero chi binacan li ca naca dan' raojë' në'ëdi' xquia na', na'ra nitu nunu de derecho quie usedyinyaquë' në'ëdi' lao na'a yaca ben' Israel. Re'enda' tza'a lao rey César ta huenë' justicia quia'. —Cana' una Pablo gudyinë' lëbë'.

¹² Na'ra Festo na', bë' beyudyi bë'lënë' di'idza' yaca ben' ru'e lëbë' consejo quie asunto quie Pablo, unë' gudyinë' lëbë':

—Pues como baonao' de que re'enlo' tzio' lao rey César ta gaca justicia quio', pues na'la tziotzazo' gaca justicia quio'. —Cana' una Festo gudyinë' Pablo.

Cabë' guca psedyinjë' Pablo lao rey Agripa

¹³ Na'ra aoca chopa tzona dza na', cati bdyin tu rey tula laonè' Agripa lenè' bi' zannè' Berenice. Bdyinyaquè' ciudad Cesarea ta bgapayaquè' Festo diuzi. ¹⁴ Bizi na' como bega'njè' na' zè dza, lena' uzulao Festo ru'elènè' rey na' di'idza' quie asunto quie Pablo. Quie lena' unè' rëbinè' rey na':

—Niga zu tu ben' tu niga, ben' pca'n Félix preso cati uyonè' de gobernador. ¹⁵ Bizi cati uya'la ciudad Jerusalén na', bla' yaca xan' pxuzi len yaca los demás ben' rnabè' quie ben' Israel udaoyaquè' lèbè' xquia. Na' unabajè' nè'èdi' ta hua' mandado guti soldado lèbè'. ¹⁶ Pero bequèba' rëba'yaquè' de que binacan de acuerdo con lao ley quie ben' romano hue nu ben' rnabè' mandado guti soldado nu benè' chan' binegaca justicia quienè' bide prueba chi tamala bènè'. Pues ruen zi hue'nè' declaración ta huenè' defender cuinnè' lao nu ben' rao lèbè' xquia. ¹⁷ Quie lena' cati bla'yaquè' niga, biudzèda'. Beteyu na'tezi laore'tia' xlatoga' hëtia' mandado ta tzexi'yaquè' lèbè'. ¹⁸ Na'ra guqueda' de que huaoyaquè' lèbè' xquia huala gula, pero biubinyaquè' birla inayaquè' contra lèbè'. ¹⁹ Quie ley quiezijè' uyu'uyaquè' huedilla len lèbè'. Lèzi unayaquè' quie tu ben' aguti dza na'la laonè' Jesús. Pues quie ben' na' lao Jesús, rna Pablo agutinè' bebannè' zuè'. Quie lèzin udaoyaquè' lèbè' xquia. ²⁰ Na' como birbinda' nacala hua' gaca reglo quiejè', unaba' Pablo chi zunè' dispuesto tzionè' ciudad Jerusalén ta gaca reglo asunto quienè' dan' raojè' lèbè' xquia. ²¹ Pero como unè' re'ennè' tzionè' lao rey César ta gaca reglo quienè', bia' mandado ta gapazi ja soldado lèbè', porque reya'ala' ise'ela'nè' lao rey César na'.

²² Caora na' una rey Agripa gudyinè' Festo:

—Lèzi re'enda' hue'lia' lèbè' di'idza'.

Na' bequèbi Festo rëbinè' lèbè':

—Uxetezi hue'laonè' di'idza'.

²³ Beteyu na' uzutza'o rey Agripa len Berenice uyu'uyaquè' lu'u tu cuarto ga re' Festo. Lëscan' uyu'urè ja xan' soldado len yaca ben' rnabè' lao ciudad na'. Bè' bdyinjè' na', hora na' bè Festo mandado yaxi'jè' Pablo. ²⁴ Na'ra una Festo rëbinè' yaca ben' nita' na':

—Pues ni rnìa' luè' na', rey Agripa, len yugulu yaca ben' nita'lèro niga cabè' naca quie ben' bazè laoro niga. Pues zè yaca ben' Israel legazi rnèyaquè' contra lèbè'. Tanto ca ciudad Jerusalén, como ciudad Cesarea niga, birsanjè' rnabayaquè' nè'èdi' ta hua' mandado guti soldado lèbè'. ²⁵ Pues bide razón guti soldado lèbè', porque bide prueba chi bi tamala bènè'. Pero como cuinnè' unè' de que re'ennè' tzionè' ciudad Roma ta gaca reglo quienè' lao rey César, pues quie lena' psaque'da' ise'ela'nè' ciudad Roma. ²⁶ Pero bisaque' ise'ela' tu guichi lao rey César, porque binenezda' chi nacan tabala bènè' tamala. Quie lena' rapa' gusto zèlo' niga, oh rey Agripa, tacuenda uguèpilo'nè' mazera chi bènè' tamedian cuenda na' inezida' bi di'idza' udyia' lè'è guichi ise'ela' lao rey César. Por lena' yaxi'jè' ben' ni laole tacuenda na' uguèpilo'nè' dyè'èdi. ²⁷ Porque binacan huen ise'ela' nu preso lao rey César, chan' binezda' bixquien' dan' raojè' lèbè' xquia.

26

Ca guca bè' Pablo defender cuinnè' lao rey Agripa

¹ Na'ra una rey Agripa rëbinè' Pablo:

—Inèlo' huu' defender cuinlo' na'a.

Hora na' ulisa Pablo nè'è bènè' seña inènè' unè' rëbinè' rey Agripa con cabè' guca quienè':

² —Pues rey Agripa, re'enda' inia' de que rapa' gusto zua' laolo' hua' defender cuina', porque binacan li con cabè' na yaca ben' Israel contra nè'èdi'. ³ Nezda' nubè'lo' dyè'èdi ca costumbre de quie ben' Israel. Lëscan' nezda' nubè'lo' dyè'èdi cabè' natza'la pensari quie tu cue' huio entre ra'o ben' Israel. Lena' rnaba' tu cule uzè'nago' cabè' inia' luè' con paciencia.

Una Pablo cabè' bènè' cati binenaonè' xneza Jesús

⁴ 'Pues yugu ja ben' Israel nezijè' cabè' bia' desde cati nacatia' xcuidi' zua' yedyi quia', lente ciudad Jerusalén. ⁵ Lèzi nezijè' dyè'èdi de que desde cati nacatia' bi' ru'abe, naca' ben' partido fariseo. Reya'ala' gacajè' testigo quia' de que nacan tali ca nia'. Dyè'èdi nezo' cabè' rue ben' partido fariseo nacarayaquè' du guicho du la'adyi'jè' ley pca'n Moisés para ra'o. ⁶ Na'ra nia' huadyin dza useban Diuzi yugulu ben' huati con cabè' una Diuzi gudyinè' xuzixta'oro. Pues quie lèzin na' rao ben' Israel nè'èdi' xquia. ⁷ Hasta yugulu lao chipchopa cue' laguedyiro ben' Israel rbezayaquè' su di'idza' gaca con cabè' una Diuzi. Quie lena' rionla'adyi'yaquè' lèbè' rueyaquè' bala quienè' du dza, du yèla. Pues Señor Rey, como lëscan' na yaca ben' Israel rbezayaquè' dza useban Diuzi yaca ben' huati, ¿cómo, pues, arayaquè' nè'èdi' xquia dan' rbezaria' dza useban Diuzi yaca ben' huati laga ca leyaquè'? ⁸ Chi nayaquè' useban Diuzi ben' huati, ¿bixquien' nayaquè' pensari tondo quia' nia' pseban Diuzi Jesús?

Bdze' Pablo di'idza' cabè' bènè' contra ben' nao xneza Jesús dza na'la

⁹ 'Pues dza na'te bëcaza' pensari hua' contra yaca ben' nao xneza Jesús, ben' yedyi Nazaret. ¹⁰ Cana' bëcaza' contra lejé' ciudad Jerusalén. Na' bdzi'a yaca ben' zé lu'u dyiguiba con nu ja ben' nao xneza Jesús. Pues quie tu guichi ben ja xan' pxuzi në'èdi', lena' bi'an fuerza bia' cana'. Lèzi gucalia' ja xan' pxuzi de acuerdo hora bëyaquë' mandado gati yaca ben' quie Jesús. ¹¹ Lèzi cana' guca zé lasa bia'yaquë' castigo tacuenda na' usanjé' bira inaoyaquë' xneza Jesús. Cana' bia' yugu ciudad con ga zu idao' sinagoga. Hasta du ciudad re' zitu' uya'a yadiloga'yaquë' como legazi bdzë'èda' leyaquë'.

Bë' Pablo di'idza' tatula con cabë' uzacanë' tu neza Damasco
(Hch. 9.1-19; 22.6-16)

¹² 'Quie lena', uya'a ciudad Damasco dza na', como ulio ja xan' pxuzi në'èdi' ta tza'a ciudad na'. Na' benjé' tu guichi bia' tacuenda udzi'a ben' nao xneza Jesús lu'u dyiguiba. ¹³ Pero, señor rey, re'enda' inia' tu ta guca quia' tu neza. Pues caora za'a tu neza Damasco cadu la'odza, blë'èda' tu xni' gui' za'n guibá. Na' ure' xni' ga ziondo' tu neza na'. Lëxni' gui' na' nacaran fuerte cabë' xni' obidza. ¹⁴ Quie lena' bđindo' yu yugutendo'. Hora na' beda' unë tu ben' rëbinë' në'èdi': "Saulo, ¿bixquien' ruelo' contra në'èdi'? Pues cuinzo' ruelo' contra ca quie tu bëdyihuaga rulibiba' nu lë'ë yaga duchi' nu'a xa'mba' ta rulaohuë'ba', cana' cuinziba' racaba' zi'." ¹⁵ Na'ra caora na' unia' gudya'në': "¿Nuzi luë', Señor?" Na'ra una Señor Jesús rëbinë' në'èdi': "Në'èdi' Jesús. Naca' ben' ruelo' contra. ¹⁶ Pero na' beyasa, porque bedetila' luë' tacuenda inaolo' xneza' yëbo' benë' con cabë' guca quio' blë'èlo' në'èdi' ni. Lëscan' yëbo'yaquë' con cabë' ulu'ena' luë' du dza zeza'ra. ¹⁷ Re'enda' tzio' tzetixogue'lo' benë' con cabë' unia', chi ben' Israel, chi ben' tula, con nutezi. Na'ra në'èdi' gacalia' luë' chan' bi tamala hueyaquë' quio'. ¹⁸ Na' ise'ela' luë' tacuenda na' uzioñe'elo' benë' con cabë' naca xneza', porque rdayaquë' lao lato lao chula rnaojë' neza xi'ibi' quie Satanás. Abdyin hora ta tayaquë' lao lato lao xni' inaojë' xneza Diuzi zu guibá. Cana' re'ennan tacuenda si'ze Diuzi dula' xquia quiejë' gacajë' tuze len yaca los demás ben' nao xneza', ben' aodibi Diuzi laxta'o." Cana' una Jesús gudyinë' në'èdi' tu neza dza na'.

Una Pablo cabë' guca bzunë' di'idza' con cabë' gudyi Jesús lëbë'

¹⁹ 'Quie lena', señor rey Agripa, bzua' di'idza' con cabë' una Jesús gudyinë' në'èdi' desde guibá ga zunë'. ²⁰ Tanëro uya'a yetixogui'a ben' ciudad Damasco con cabë' rna xti'idza' Diuzi. Ude beyudyi na', uya'ria' ciudad Jerusalén yetixogui'a ben' nita' na'. Hasta yagu yedyi nebaba estado Judea uya'. Lëscan' uya'a yetixogui'a nutezi ben' binaca ben' Israel. Cana' bia' uya'a gatezi yedyi, porque re'en Diuzi utza'jé' pensari quiejë' inaojë' xnezë'. Lëscan' gudya'yaquë' reya'ala' tajë' neza dya'a tacuenda inezi ja benë' tabala na' aptza'jé' pensari quiejë'. ²¹ Quie lëzin bëxo ja ben' Israel në'èdi' cati uyu'a lu'u idao' rnahë'ra zu ciudad Jerusalén. Pues hora na' gu'unyaquë' gutiyaquë' në'èdi'. ²² Pero como bagualë Diuzi në'èdi', hasta hora na' rda'a ni rguixogui'a benë' con cabë' rna xti'idza' Diuzi, la'achi ben' uña'a, la'achi ben' yëchi', con nutezi benë'. Rguixogui'a benë' con cabë' una Moisés len yaca los demás ben' profeta bi ta zaza'ra. Quele ta racazi la'adya' rguixogui'a yaca benë', dechan' ca una Diuzi. ²³ Nia' con cabë' unao xuzixta'oro de que según ca mandado bë Diuzi, yedzagalao ben' Cristo gatinë' huebannë' tatula gaquë' ben' nëro entre yaca ben' useban Diuzi. Caora na' quixogue'në' ja benë', chi ben' Israel, chi ben' tula, de que tabala na' naquë' ben' ute usela con nutezi ben' nao xnezë'.

Bë' Pablo di'idza' cuenda gale rey Agripa inaohuë' xneza Jesús

²⁴ Cana' una Pablo ru'enë' di'idza' ta gacalenë' cuinnë'. Caora na' unë Festo na' zidzo rëbinë' Pablo:

—¡Pablo, aracatondolo! Tantozi rsëdio' guichi, baodyiagui' pensari quio'.

²⁵ Na'ra bequëbi Pablo rëbinë' lëbë':

—Quele racatondoga', señor Festo, dechan' puro di'idza' li nia'. ²⁶ Dyë'èdi' nezi rey Agripa con cabë' nia'. Quie lena' birdzeba' inia' laonë' como nacan seguro babenë' cabë' bë Jesús, porque cala nagachi'zi uda Jesús psëdinë' benë'.

²⁷ Na'ra una Pablo rëbinë' rey Agripa:

—A ver bi ca nao'. ¿Ralelo' con cabë' una yaca ben' uduxogue' xti'idza' Diuzi dza na'la? Seguro na' ralelo' quiejë'.

²⁸ Na'ra una rey Agripa rëbinë' Pablo:

—Iledao'zi bihuelo' gan gaca' ben' nao xneza Jesús.

²⁹ Na'ra una Pablo rëbinë' rey na':

—Chi ledao'zi o chi tažera hua' gan, re'en Diuzi utza'lo' pensari quio' inaolo' xneza Jesús como ca në'èdi', luë' len yugulu ben' nita' niga rzënaga ca nia', però sin narioyaquë' caden con ca naca quia'.

³⁰ Na'ra bē' beyudyi una Pablo, bezuli rey Agripa lēnē' Berenice lēnē' gobernador Festo lēnē' yaca los demás ben' re' na'. ³¹ Yugulujē' ziojē' tzala'la ta hue'jē' di'idza' nacala ca huejē' quie Pablo. Na'ra unajē' de entre lejē':

—Pues ben' niga, bisaque' huero mandado gatinē', ni siquiera udze'ronē' lu'u dyiguiba, porque bibi tamala bēnē'. —Cana' unajē' entre lejē'.

³² Na'ra una rey Agripa rēbinē' Festo:

—Huzaque' usanronē' chan' cuinnē' biunabē' tzionē' gaca justicia quienē' lao rey César. Quie lena' bisaque' usanronē'. —Cana' una rey Agripa rēbinē' Festo na'.

27

Cabē' guca use'ela'jē' Pablo ciudad Roma naquē' preso

¹ Na'ra psaque'yaquē' ise'ela'yaquē' Pablo ciudad Roma. Lēzi nē'ēdi', Lucas, uza'lia'nē' ciudad na'. Na'ra psedyinjē' Pablo len yaca los demás ben' preso lao na'a tu capitán, ben' lao Julio. Naquē' xan' tu cue' soldado, ben' rue mandado quie rey César. ² Uyu'undo' tu barco quie ciudad Adrimitio. Cati banacate barco na' puesto yeza'n tziona yaca yedyi ga nebaba Asia, caora na' yu'urē' itu ben' lao Aristarco len nēto' lu'u barco na'. Naquē' ben' ciudad Tesalónica ga nebaba Macedonia. ³ Na'ra beteyu dza tula bdyinndo' ciudad Sidón. Bizí Julio na' bēnē' huen quie Pablo, bē'nē' lēbē' lato tzionē' tzeyubinē' ga zu yaca amigo quienē'.

⁴ Na' guca chopa tzona dza uza'ndo' ciudad Sidón yu'undo' lu'u barco na' ziondo' tzala' isla Chipre. Caora na' rda tu be bedun' fuerte bza'agan barco de modo que bisaque' sa'n lao nisa na'. Quie lena' udendo' zaquē' yega'la cuēta isla na' ga biruen be bedun'. ⁵ Cana' bedendo' ga nebaba Cilicia len ga nebaba Panfilia bdyinndo' ciudad Mira ga nebaba Licia.

⁶ Pues ciudad Mira na' yexaca capitán na' tu barco uza'n ciudad Alejandría. Lēbarco na' banacaten puesto ta tziona ga nebaba Italia. Caora na' bē' capitán na' mandado tzu'undo' lu'u barco tacuenda na' tziozindo' mazera. ⁷ Na'ra du chopa tzona dza biuzaque' sa' barco taria dan' bza'aga be bedun' barco. Quie lena' canezi bdyinndo' ciudad Gnido. Lēscan' como nerda be bedun' gan' ziondo' ruza'agan barco, canezi uza' barco bdyinndo' itzala' isla Creta ga re' ciudad Salmón. Pero tu udezindo' na', uyēchondo' ga re' isla na', ga birda be uza'agan barco. ⁸ Pero lēscan' canezi uzaque' bdyinndo' ga laona Buenos Puertos. Na' nacan ga'ala' para ciudad Lasea.

⁹ Pues como taže udzēndo', baruen žudyi dan' rdando' lao nisa, porque babezi' tiempo quie be bedun' fuerte gula. ¹⁰ Quie lena' una Pablo rēbinē' yaca ben' nita' na':

—Señores, žudyi gula nacan chi tziołēziro barco lao nisa ni, porque huaca cuiagui' barco lente yua' quien lao nisa ni. Lēzi ruen žudyi udyiagui'ro cuinro. —Cana' una Pablo gudyinē' lejē'.

¹¹ Pero capitán na', bibēnē' casa quie Pablo den' gulenē' di'idza' unē xan' barco len di'idza' unē yaca ben' rusa' len. ¹² Pero como Buenos Puertos binacan dya'a para cuezando' te tiempo quie be bedun', yugulujē' gu'unjē' yeza'ndo' gan' na', porque gu'unjē' idyinndo' ciudad Fenice. Naca Fenice ciudad ga nebaba isla Chipre birdacazi be bedun' fuerte.

Cabē' guca ziojē' lao nisa, ben nisayo be bedun'

¹³ Na'ra uzulao rda be, pero cala be bedun', be ba'azi na' za' be zaca' surla. Pues quie lena' guqueyaquē' huazaque' tzioyaquē' mazera. Caora na' uza'ndo' ziondo', pero bedendo' ga'ala' ru'a isla Creta. ¹⁴ Pero zabeza'ndo' caora uzulao rda tu be bedun' fuerte gula ta za' zaca' noreste ga re' isla Creta. Bza'agan barco de modo que biuzaque' sa' barco lao nisa. ¹⁵ Quie lena' re'en ca re'ennan, beb'lēndo' barco gan' ziondo' na', porque be bedun' na' psebi'ina len. ¹⁶ Na'ra bedendo' xcu'udzu tu isla dao' laona Clauda ga birda be bedun'. Pero zēdi gula gucan bapcuēndo' tu barco dao' ta za' lao nisa rala' barco ze len. ¹⁷ Lēscan' bapquiondo' riata duže barco ze na' tacuenda gacalen len biyeton lu'u nisa. Pero como rdzēbiyaquē' idyin barco ga naca puro yožo, ga laona yožo sirte, na' rdzēbiyaquē' hueto barco lu'u yožo na', quie lena' pquinyaquē' la'ari' ze ta rusa' barco. Bējē' cana' tacuenda na' biidyin barco ga re' yožo na', den' bdyiga be len zion ga tula. ¹⁸ Na'ra beteyu dza tula nerda be bedun' fuerte gula. Quie lena' uzulaoyaquē' ru'unyaquē' yua' nu'a barco lu'u nisa. ¹⁹ Pues bizí na', dza uyune nerdacazi be bedun' na', birbezán. Quie lena' uru'undo' bicala ta nu'a barco lu'u nisa tacuenda gaca barco dza' biyeton lu'u nisa. ²⁰ Zidza guca biblē'ēndo' ni tu bēlo dyian guibá. Pues ni obidza biblē'ēndo' tantozi ure' beo ben yusiu'. Quie lena' guquendo' de que huaticazindo' lu'u nisa.

²¹ Como azio zidza binegaondo', caora na' uzuli Pablo unē' gudyinē' nēto':

—Señores, como bigulele cabē' unia' dza na', bigu'unle yega'nro isla Creta, quie lena' raca tamala quiero niga aoniti yua' nu'a barco. ²² Pero na'a bidēbile, porque ba'ala'cazi huabiagui' barco, ra'o na' bigatiro. ²³ Pues naca' ben' quie Diuzi. Yugu dza rionla'adya' lēbē'. Na'ra nidze' use'ela' Diuzi tu ángel quienē' detilalaonē' nē'ēdi'. ²⁴ Na' unē' gudyinē'

nè'èdi': "Bidzebo', Pablo, porque tanun quie Diuzi na' tzesèlo' lao rey César. Quie lena' bigati ni tu ben' za'lè luè' lu'u barco." Pues cana' una àngel rèbinè' nè'èdi'. ²⁵ Na' nia' le'e bidzebile, porque nacan seguro uzu Diuzi di'idza' quienè' con cabè' unanè' nè'èdi'. ²⁶ Pero decazide idyinro tu isla ga ilaro. —Pues cana' una Pablo rèbinè' lejè'.

²⁷ Pero cana'zi guca quie barco. Bdyiga be len hasta guca chida' dza bdyinndo' ga re' tu nisadao' laona Adria. Pues du gatzo yèla gucabè' ben' rapa barco de que baredyinndo' ru'a yu bidyi. ²⁸ Na'ra caora brixiaquè' yela' zitu' quie nisa, gucan treinta y seis metro. Pues itu chi' brixiaquè' tatula, gucan veintisiete metro. ²⁹ Na'ra como bdzebiyaquè' idyinjè' ga re' yaca yo yela cuiagui' barco, quie lena' ziojè' zham barco pchizayaquè' tapa guiba zi'i pquiojè' riata zion lu'u nisa tacuenda cue' barco tuzi lugar. Na'ra du rdèbitzeguejè' ulezajè' tzeni'. ³⁰ Pero yaca ben' rapa barco gu'unyaquè' tzioyaquè' huezuno. Quie lena' uzulaoyaquè' rchizayaquè' barco dao' lao nisa, dechan' uzi'jè' yè' unajè':

—Nèto' ichizando' yaca guiba zi'i tacuenda cue' barco dyè'èdi' birudyiga be len.

³¹ Biži uidxogue' Pablo capitán' na' lente yaca los demás soldados con cabè' rue ben' rapa barco unè' rèbinè' lejè':

—Chi abzuno yaca ben' niga lu'u barco, bira saque' ilale. Huatile lu'u nisa ni.

³² Quie lena' uchuguo yaca soldado riata ta nerio barco dao' bguinun lu'u nisa.

³³ Na'ra du bala unèyue Pablo lejè' gaojè' ledao' unè' rèbinè' leyaquè':

—Azio tu chida' binegaoro, canezi gusiro. ³⁴ Pues na' rnbana gaoro ledao' tacuenda yezi'ro fuerza tatula. Bidzebile, porque ganu le'e gati, ni tule bigacale zi'.

³⁵ Ude beyudyi una Pablo cana', bèxonè' tu yèta xtila bè'lènè' Diuzi di'idza' gudyinè' Diuzi diuxcalelo'. Na'ra bžužunè'n uzulaohuè' raonè'n. ³⁶ Caora na' uzulao yugojè' raorèyaquè' uzela'adyi'jè' aodaoyaquè' abelojè' dyè'èdi'. ³⁷ Entre tu nèto' yu'u lu'u barco, nacando' doscientos setenta y seis ben' udao yèta xtila. ³⁸ Ude beyudyi udaojè' abelojè', na' uru'unjè' mazera trigo lu'u nisa ta yedza' barco.

Barco ga yu'ulèjè' Pablo udyiagui'n lu'u nisa

³⁹ Caora uyeni' na', blè'è ben' rapa barco de que ru'a yu bidyi bedyindò', den' gabi bezaquejè' ga parte. Pero caora blè'èyaquè' re' tu ca lagun ga naca puro yožo, gu'unjè' udyigajè' barco na'. ⁴⁰ Caora na' uchugoyaquè' riata nario guiba zi'i tacuenda na' sa' barco tatula. Na'ra bega'n guiba zi'i lu'u nisa. Lèscan' uxèdyijè' du nario yaca yaga ta'a ta rusa'yaquè' barco. Lèscan' pquioyaquè' tu la'ari' ze sibi guicho barco na' tacuenda udyiga be len idyindò' ru'a yu bidyi ga naca puro yožo. ⁴¹ Pero biži na' ude barco ga regu'udi' chopa benono na'. Lègan' na' bèto barco lu'u yožo re' lu'u nisa. Na' bega'n barco lagazi bèton lu'u yožo na'. Bira uzaque' yerona. Como legazi bdyiga benono len, uzulao byožo zham barco. ⁴² Caora na' gu'un yaca soldado gutijè' ben' preso tacuenda na' bisaque' uzunoyaquè' xubayaquè' lao nisa. ⁴³ Pero hibè' capitán na' lato gutijè' ben' preso, porque bire'ennè' gutijè' Pablo. Pues quie lena' bènè' mandado con yaca ben' raca ržuba yao ta yerojè' lu'u barco idyinjè' ru'a yu bidyi. ⁴⁴ Lèscan' gu'unne' yero nu ben' biraca zuba yao, pero re'ennè' xubajè' nu lao pedazo yaga quie barco tacuenda idyinjèjè' ru'a yu bidyi. Cana' uzacando' bèndo' gan berondo' lu'u barco ulando' bedyindò' ru'a yu bidyi.

28

Cabè' guca bdyin Pablo ga re' tu isla lao Malta

¹ Na'ra bè' ulando' bedyindò' ru'a isla, bedzelendo' yaca ben' nita' isla. Biži na' unayaquè' nèto' de que isla na' laona Malta. ² Caora na' beyèchi'la'adyi'jè' nèto', ulèchijè' tu gui' ze bèjè' invitar cue'ndo' ru'a gui' tacuenda yedze'endo', porque binecuezza nisa yo na' beyagando'. ³ Na'ra yexi' Pablo ledao' huaga bidyi ta udyianè'n lao gui'. Caora zènè' rudyianè' huaga na', bero tu bèla snia lu'u huaga. Bžunoba' dan' rdzebiba' gatiba' lu'u gui'. Caora na' udi'idyi'ba' na' Pablo udi'inraba'n bigu'umba' usamba' nè'è. ⁴ Caora blè'è ja ben' nita' na' cabè' guca quie Pablo, na'ra unayaquè' rèbiyaquè' laguediyi'yaquè':

—Seguro na', ben' ni bètiè' benè', porque ba'ala'cazi bigutinè' lu'u nisa ulanè', re'encazi Diuzi gatinè'.

⁵ Pero psisi Pablo lèba' bguinoba' lu'u gui'. Gabi guca quienè'. ⁶ Pues yaca ben' nita' na' bega'nyaquè' rbezajè' tzu'u nè'è gui igu'unne' layu gatinè'. Pero cati ude tiempo blè'èyaquè' gabi guca quienè', na'ra ptza'jè' pensari quejè' najè' naca Pablo tu diuzi.

⁷ Na'ra ga bdyinndo' nacan ga'ala' ga de layu quie tu ben' lao Publio. Naquè' ben' rnbè' quie ben' nita' isla Malta. Bènè' invitar nèto' sulèndo' lèbè' lidyinè'. Lao tzona dza uzundo' lidyinè' con ta bdzioguendo' bè'nè'n. ⁸ Na' guca dza na' de xuzi Publio lao belaga dan' raca zhue'nè'. Uyu'unè' tala, guquè' pquieco'. Biži uyo Pablo yeyubinè' lèbè' bda'nè' nè'è lè'ènè' beyacanè'. ⁹ Biži yaca ben' nita' isla na', ben' raca zhue', caora unezijè' cabè' guca quie xuzi Publio, na'ra bla'jè' gan' nita'ndo' beyue Pablo leyaquè'. ¹⁰ Quie lena' legazi

bedaohuejé' uzuléndo' lejé'. Lēzi caora bdyin hora ta yeza'ndo', bidayaqué' dehua'ayaqué' con ta rdzioguendo'.

Ca guca bdyin Pablo ciudad Roma

¹¹ Bē' baode tzona biu', bedzelendo' tu barco ta uza' ciudad Alejandría. Bazio tzona biu' bega'nnan isla Malta tu ude biu' zaga. Guicho barco na' da' chopa ídolo. Tuna laona Cástor, na' ituna laona Pólux. Caora na' uyu'undo' lu'u barco na' beza'ndo' isla Malta ¹² bdyinndo' ciudad Siracusa ga bega'nndo' tzona dza. ¹³ Na' uyu'undo' lu'u barco tatula uza'ndo' na' bedendo' ru'a yu bidyi hasta bdyinndo' ciudad Regio. Beteyu dza tula, uzulao rda tu be bedun' ta za' zaca' sur. Quie lena' uza'ndo' ziondo', pero chopa dzazi guca bdyinndo' ciudad Puteoli. Na'ra ciudad Puteoli berondo' lu'u barco. ¹⁴ Lēyedyi na' bedilando' chopa tzona ben' nao xneza Jesús. Bējé' invitar nēto' ta yega'nlēndo' leyaqué' tu xman. Ude beyudyi na', uza'ndo' ni'ando' ziondo' ciudad Roma. ¹⁵ Na'ra ciudad Roma nita' ja bichiro ben' nao xneza Jesús. Caora beyaqué' baziondo' quiejé', bidayaqué' delezayaqué' nēto' tu neza. Balajé' bidajé' hasta ga laona Foro de Apio, ibalajé' bidajé' hasta ga laona Tres Tabernas. Cati blé' Pablo bazéjé' rbezajé' idyinné', lega bedaohuené' gudyiné' Diuzi diuxcalelo'. ¹⁶ Na'ra caora bdyinndo' ciudad Roma, psedyin capitán yaca ben' preso lao xan' ben' rapa preso, pero bē'né' Pablo lato ga suné' aparte conlē tu soldado, ben' gapa lēbē'.

Pablo na' bdze'né' di'idza' lao ben' Israel, ben' nita' ciudad Roma

¹⁷ Baguca tzona dza, guzi Pablo yaca ben' r nabé' quie ben' Israel nita' ciudad Roma. Na'ra cati babedupajé' uné' gudyiné' lejé':

—Bicha', re'enda' inia' le'e bibi tamala bia' contra laguedyiro ben' Israel. Lēscan' cala psanla'adya' costumbre quie xuzixta'oro. Ba'ala'cazi bibi tamala bia', bëyaqué' nē'edi' preso ciudad Jerusalén psedyinyaqué' nē'edi' lao ben' r nabé' quie ben' romano. ¹⁸ Na'ra ude beyudyi pquépi yaca ben' r nabé' nē'edi', gu'unyaqué' yeroga' libre, porque gabi dula' xquia quia' de hueyaqué' mandado gatia'. ¹⁹ Pero como yaca ben' Israel bigu'unjé' yeroga' libre, unaba' gaca justicia quia' lao rey César. Pues cala re'enda' gaohua' yaca ben' yedyi quia' xquia, pero tuz ca re'enda', re'enda' gaca justicia. ²⁰ Caora na' baguza' le'e, porque re'enda' deyubile nē'edi' ta hue'lia' le'e di'idza'. Pues nun quie rbeza' idyin dza useban Diuzi yugu ben' huati, laga ca rbezale le'e len yaca los demás ben' Israel, lena' pquioyaqué' nē'edi' con caden. —Cana' una Pablo gudyiné' lejé'.

²¹ Na'ra unayaqué' rēbiyaqué' Pablo:

—Binela' guichi quie ben' nita' ciudad Jerusalén. Binenayaqué' nēto' quie asunto quio'. Lēscan' nu bichiro ben' Israel, ben' uza' na' bla' niga, cala nayaqué' naco' ben' mala. ²² Na'ra re'enndo' cuinzo' yēbo' nēto' con cabé' naca pensari quio', porque duze parte rnayaqué' contra pensari netza' quio'. —Cana' unayaqué' gudyijé' Pablo.

²³ Cana' guca bzujé' tu dza na' bdyin ja ben' zē Zan yu'u gan' zu Pablo na'. Caora bdyin ja bené' na', uzulaoné' rguixogue'né' leyaqué' con cabé' naca Diuzi ben' r nabé'ra lao yugulute. Cana' zila hasta zadzè' udixogue'né' lejé' con cabé' rna di'idza' bzu Moisés len yaca los demás ben' profeta lē'é guichi tacuenda inaojé' xneza Jesús. ²⁴ Bizi na' ca di'idza' gudyi Pablo leyaqué', balajé' bzēnagajé' gulejé', pero ibalajé' bigulecazijé' con cabé' uné' gudyiné' lejé'. ²⁵ Na'ra como binaga'nyaqué' de acuerdo entre lejé', uzulaojé' redzatzayaqué'. Na'ra una Pablo gudyiné' leyaqué':

—Bizi bigala'adyi' le di'idza' li uné' Bichi Be quie Diuzi dza na'te caora use'elé' xuzixta'oro Isaias rēbiné' lēbē' cani:

²⁶ Uyo yeguēdyi ben' Israel con cabé' una Diuzi porque uné' de que:

Ba'ala'cazi ise'ela' nu ben' quixogue' leyaqué' con cabé' rna xti'idza', bihue quieyaqué'n. Ba'ala'cazi ilé'ëyaqué' dyé'edi cabé' naca xneza', bitzu'uyaqué' pensari inaoyaqué'n.

²⁷ Ben' zidi gula nacajé'.

Bire'enjé' yeyaqué' con cabé' rna xti'idza'.

Bire'enjé' inezijé' cabé' naca xneza'.

Bire'enjé' utza'jé' pensari quiejé' tzu'ujé' pensari quia' ta bira inao dula' xquia quieyaqué' leyaqué'.

Cana' una Bichi Be quie Diuzi dza na'te.

²⁸ Na'ra nerné' Pablo rēbiné' lējé':

—Ulezé'cara nagale dyé'edi, porque ni rnia' le'e de que abdyin dza ise'ela' Diuzi ben' quixogue' con cabé' rna xti'idzè' de entre ben' binaca ben' Israel tacuenda ute uselané' leyaqué' idyinyaqué' guibá ga zu Diuzi. Lejé' sí, re'encazijé' yeyaqué' con cabé' rna xti'idza' Diuzi. —Cana' una Pablo gudyiné' lejé'.

²⁹ Na'ra dan' unané' cana', legazi uzulaoyaqué' ruejé' huené' de entre leyaqué' bedzatzajé' zeyojé'.

³⁰ Bi'zi Pablo na' uzunë' ichopa iza ciudad Roma rguizonë' quie yu'u ga zunë' lao xa'nnan. Redaohuenë' nutezi ben' rio rayubi lëbë'. ³¹ Bë'yaquë' lato rguixogue'në' benë' naca Diuzi ben' rnabë' lao yugolute. Lëscan' bë'yaquë' lato rguixogue'në' benë' con cabë' rna xti'idza' Señor quiero Jesucristo. Nunu bë lëbë' zëdi.

Pues cana' užaca Pablo dza na'te. Amén.

DI'IDZA' BZU SAN PABLO APÓSTOL LÈ'È GUICHI, USE'ELA'NÈ'N LAO CIUDAD ROMA

Baose'ela' Pablo guichi ni lao ben' nao xneza Jesús, ben' nita' ciudad Roma

¹ Nè'èdi', Pablo, naca' ben' zulao xa'nro Jesucristo. Ulio Diuzi bde'nè' nè'èdi' apóstol quienè' ta tzetixogui'a yaca benè' di'idza' la'iya quienè'.

² Azio zè iza bè Diuzi ca unanè' huenè' con cabè' rna di'idza' la'iya quienè'. Quie lena' bènè' mandado bzu yaca ben' naca profeta quienè' xti'idzè' lè'è guichi. ³ Lèdi'idza' na' rguixogue'n quie xa'nro Jesucristo, zì'i Diuzi. Na'ra con cabè' gologuè' guquè' be'mbyu, cana' naquè' zì'i suba rey David. ⁴ Pero con cabè' gutiè' bebannè' tatula, lena' bzioñe'e Bichi Be quie Diuzi ra'o de que naca Jesucristo zì'i Diuzi, ben' de yela' r nabè' quie. ⁵ Nun quie Jesucristo bè Diuzi tu cule ze quiendo', use'elè' nètò' tzetixogue'ndo' xti'idzè' cuenda gata' ben' nao xneza Jesús duze yedyi layu huejè' Jesucristo ben' ze. ⁶ Lèscan' le'e, ulio Diuzi le'e gacale ben' nao xneza Jesús.

⁷ Lena' use'ela' guichi ni lao le'e ben' nita' ciudad Roma nun quie nedyè'è Diuzi le'e, ulionè' le'e gacale ben' la'iya quienè'. Rulidza' Xuziro Diuzi len xa'nro Jesucristo ta huela'iyajè' le'e, cuèchijè' chizi lu'u guichi laxta'ole.

Gu'un Pablo tzioguè' ciudad Roma

⁸ Tanèro re'enda' inia' le'e de que lao Jesucristo rulidza' Diuzi yèpa'nè' diuxcaleo' por lao le'e, como dan' yugulu ben' nita' lao yedyi layu arnèyaquè' ca tadya'a ruele, rue quiele quie Diuzi. ⁹ Du guicho du la'adya' rua' ca mandado rue Diuzi nè'èdi', rguixogui'a yaca benè' cabè' naca quie zì'inè'. Naca Diuzi testigo de que yugu dza reza'la'adya' le'e rulidza' Diuzi ta gacalènè' le'e. ¹⁰ Yugu dzacazi rulidza' Diuzi chi rapè' gusto ta guida' ideyuba' le'e. ¹¹ Cana' re'enda' idena' le'e ta idesèdira' le'e ta tziòne'ele mazara ca naca pensari quie Diuzi cuenda huera quiele xti'idza' Diuzi. ¹² Cana' re'enda' cuenda uxela'adya' le'e, hue quiele xti'idza' Diuzi, lèscan' cuenda uxela'adyi'le nè'èdi', hue quia' xti'idza' Diuzi ca naca quiero rzudyi'ilèro Diuzi.

¹³ Bicha', re'enda' inezile lega raca' pensari guida' ideyuba' le'e pero birzaque'da'. Re'enda' guida' ta gacalia' le'e inaorale mazara xneza Diuzi cabè' bia' gucalia' yaca ben' tula, ben' nita' yedyi tula. ¹⁴ Lega de compromiso quia' quixogui'a yugulu benè' xti'idza' Diuzi, la'acazi ben' nita' lao ciudad ze, la'acazi ben' nita' lao yedyi dao', la'acazi ben' rioñe'e, la'acazi ben' birioñe'e. ¹⁵ Por tu parte quia', zucaza' dispuestò guida' laole ciudad Roma idetixogui'a le'e di'idza' la'iya quie Diuzi.

Napan fuerza valor xti'idza' Diuzi

¹⁶ Biredue'da' quixogui'a ja benè' di'idza' la'iya quie Diuzi, como dan' napan fuerza valor quienè' ta ute uselanè' nutezi ben' hue quie xti'idzè' gata' yela' neban quienè' tuzioli. Tabelaora na' te ila yaca ben' Israel, pero lèscan' nacan belao te ila yaca ben' tula, ben' binaca ben' Israel. ¹⁷ Rguixogue' di'idza' la'iya quie Diuzi ra'o cabè' re'ennè' sudyi'ilèro lèbè' ta ilè'ènnè' ra'o ben' laxta'o yèri. Tuzi ta huero sudyi'ilèro lèbè', cana' ilè'ènnè' ra'o ben' laxta'o yèri. Lena' rguixogue'n lè'è guichi la'iya quie Diuzi cani: "Nu ben' ilè'è Diuzi ben' laxta'o yèri, hue' Diuzi lèbè' yela' neban tuzioli nun quie dan' rzudyi'ilènnè' lèbè'."

Napa yugulu benè' dula' xquia

¹⁸ Na' zu Diuzi guibá huenè' castigo quie yugulu ben' mala, ben' rue ta biraxenè'. Yela' ben' mala quiejè' biruejè' lato tzu'ujè' pensari quie Diuzi ta inezijè' ta naca tali quie Diuzi. ¹⁹ Dyè'èdi nezijè' zu Diuzi guibá, como dan' cuin Diuzi blu'enè' leyaquè' zunè' guibá rlè'èyaquè' ta bzalonè' ulèchinè' lao yedyi layu. ²⁰ Rulu'ecazin zu Diuzi guibá la'acazi bisaque' ilè'èroguè', porque huazaque' ilè'èro ta ulèchinè' lao yedyi layu. Desde dza bzalo Diuzi yedyi layu, bablu'en zucazi Diuzi guibá, de yela' r nabè' quienè' tuzioli. Quie lena' bisaque' ina yaca benè' binezijè' chi zu Diuzi guibá. ²¹ Ba'ala'cazi nezijè' zu Diuzi guibá, birapala'njè' lèbè', nica rèbjè' lèbè' diuxcaleo', pero yu'uyaguè' pensari mala, pensari bibizaca'n. Naca laxta'ojè' laxta'o yaladyi', rdayaquè' lao lato lao chula. ²² Ba'ala'cazi najè' nacajè' ben' rioñe'e, dechan' birioñe'ejè'. ²³ Lao laza rionla'adyi'jè' Diuzi, ben' zu tuzioli, rionla'adyi'jè' yaga ta pcha'a yaca benè', bèjè' forma quie benè' ta bizu tuzioli. Hasta rionla'adyi'jè' yaga pcha'a yaca benè', bèjè' forma quie nu bguini, nu bèla, nu bia zu tapa ni'e.

²⁴ Quie lena' apsanla'adyi' Diuzi lejè' ta ruejè' tamala ca raxejè'. Quie lena' ruelèjè' laguediyjè' ta naca stu' sla'na. ²⁵ Cana' raca quiejè', como dan' birue quieyaquè' xti'idza' Diuzi. Quie lena' apsanla'adyi' Diuzi lejè' ta hue quieyaquè' ta binaca tali. Cala Diuzi

rionla'adyi'jè'. Lao laza Diuzi, rionla'adyi'jè' ta bzalo Diuzi ulèchinè' lao yedyi layu. Birionla'adyi'jè' tuzi Diuzi, ben' reya'ala' tzionla'adyi'jè' tuzioli. Amèn.

²⁶ Quie lena' apsanla'adyi' Diuzi leyaquè' ta rueyaquè' ta naca stu' sla'na quiejè'. Hasta nigula quiejè' bira re'enjè' gasilèjè' be'mbyu quiejè'. Bare'enjè' gasilèjè' laguedyi nigulajè' ta huelèjè' laguedyi nigulajè' ta naca stu' sla'na. ²⁷ Lèscan' ca raca quie yaca nigula quiejè', cana' racarè quie yaca be'mbyu. Bira re'enjè' gasilèjè' nigula quiejè'. Barza'la'adyi'jè' gasilèjè' laguedyi byujè' ta huelèjè' laguedyi byujè' ta naca stu' sla'na. Tanun quie ruejè' cana', racajè' castigo rbiagui'neza cuerpo quiejè'.

²⁸ Como bire'enaquè' huebè'yaquè' Diuzi, lena' apsanla'adyi' Diuzi leyaquè' ta yu'uyaquè' pensari bayatza rueyaquè' ta naca stu' sla'na. ²⁹ Lega raxejè' huejè' tabayatza. Rutila rudzagajè' con nutezi nigula, rguilojè' ga huejè' tamala, rzala'adyi'jè' dumi, re'enjè' gaca tamala quie laguedyijè', racazè'jè', rutijè' benè', rguilojè' dila, rzi'jè' yè', rlè'èjè' laguedyijè' ben' mala, ru'eyaquè' di'idza' bizu. ³⁰ Rnèjè' contra nutezi benè', barnaya'jè' Diuzi, birapajè' respeto yaca benè', ruejè' cuinjè' ben' ze, rguilojè' ruejè' tamala, biralejè' quie xuzi zna'jè'. ³¹ Birioñe'ejè' biruzujè' di'idza', binedyè'èjè' familia quiejè', birzi'zejè' quie benè', bireyèchi'la'adyi'jè' benè'. ³² Ba'ala'cazi nezijè' cabè' nachuguli Diuzi quiejè' huejè' castigo quiejè' tziojè' lao gui' gabila, nenaojè' neruejè' pensari mala quiejè', redao-huejè' re'enjè' hue yaca ben' tula cabè' ruejè'.

2

Puro ta naca tali ina Diuzi

¹ Quie lena' bide bihuele ta huele defender cuinle lao Diuzi, nuti'tezi nacale, chi rnale rue laguedyile tamala, na' le'e tu lèbizi ziole ruele cabè' tamala rnale rue laguedyile. Conlè di'idza' rero lu'u ru'ale rulu'en lèscan' le'e nacale ben' mala. ² Neziro ta naca tali rchuguli Diuzi huenè' castigo nu ben' rue tamala. ³ Le'e rnale rue laguedyile tamala, na' lèbizi ziole ruele tamala, zraquele bihue Diuzi le'e castigo? ⁴ ¿Quele aoquixile binezile ga huen dyin yela' ben' huen quie Diuzi? ¿Quele binezile rue Diuzi tahuen quiele rbezè' yetza'le pensari quiele inaole xnezè'? ⁵ Pero ben' yaladyi' nacale, bire'enle yetza'le pensari quiele. Quie lena' huata' castigo huala quiele dza hue Diuzi juicio. Huachugulinè' ta tzu'u ni'a xnezi quiele. ⁶ Huaguizunè' quie quiero según ca bèro. ⁷ Hue'nè' yela' neban tuzioli yaca ben' biyeyati hue tahuen yugu dza, yaca ben' re'en gata' yela' bala'ana quiejè' lao Diuzi, yaca ben' rbeza gata' quieyaquè' ta biyeyadyi' yedu. ⁸ Pero huadza' Diuzi huenè' castigo yaca ben' bire'en uzu di'idza' quienè', yaca ben' bire'en inao neza li quienè', yaca ben' re'en inao neza mala. ⁹ Yugulu ben' rue tamala yedzagalaoyaquè', huata' tazèdi gula quieyaquè'. Chi ben' Israel yedzagalaorayaquè', pero chi ben' tula, lèscan' yedzagalaoyaquè'. ¹⁰ Pero yugulu ben' rue tahuen, hue Diuzi leyaquè' ben' ze, cuèchinè' chizi laxta'oyaquè'. Chi ben' Israel hueranè' leyaquè' ben' zera, pero chi ben' tula, lèscan' huenè' leyaquè' ben' ze.

¹¹ Cana' hue Diuzi, porque birue Diuzi natza'la quie yaca benè', tuzcazi ca ruenè'. ¹² Pues yugulu ben' rue xquia, pero binezijè' con cabè' rna lè'è guichi ley na' pca'n Diuzi lao na'a Moisés, huachuguli Diuzi lèjè', pero bihue Diuzi cuenda con cabè' rna lè'è guichi ley na'. Lèscan' yaca ben' rue xquia nezijè' con cabè' rna lè'è guichi ley na', huachuguli Diuzi lèjè' huenè' cuenda con cabè' rna lè'è guichi ley na'. ¹³ Birlè'è Diuzi ben' laxta'o yèri ben' ruznègazi con cabè' rna lè'è guichi ley na', na' biruzunè' di'idza' con cabè' rnan. Rlè'è Diuzi ben' laxta'o yèri ben' ruznègazi con cabè' rna lè'è guichi ley na', na' ruzunè' di'idza' con cabè' nan. ¹⁴ Na'ra quie ja ben' binaca ben' Israel, cati ruzujè' di'idza' con cabè' rnan lao guichi ley na', la'acazi binezijè' chi de guichi ley pca'n Diuzi lao na'a Moisés, lena' rulu'en naca pensari quiejè' conforme con cabè' rnan lè'è guichi ley na'. ¹⁵ Pues nun quie naojè' neza dya'a, lena' rulu'en yu'ujè' pensari con cabè' rnan lè'è guichi ley quie Diuzi. Ca naca pensari yu'ujè', lena' rulu'en quiejè' nezcazijè' ca re'en Diuzi huejè'. Cuincazi pensari quiejè' yu'ujè' rchugulina quiejè' chi ruejè' tahuen, chi ruejè' tamala. ¹⁶ Dza hue Diuzi juicio huachugulinè' con cabè' bè yaca ben' raque nagachi'zi bèjè' bin' bèjè'. Lao na'a Diuzi huachuguli Jesucristo yaca benè' conforme con cabè' rna di'idza' la'ia quienè'. Lèdi'idza' na' rguixogui'a yaca benè'.

Ni rnan quie ben' Israel len guichi ley pca'n Diuzi lao na'a Moisés

¹⁷ Pero le'e rnale nacale ben' Israel. Raquele huezi' Diuzi le'e nun quie naole guichi ley pca'n Diuzi lao na'a Moisés. Ruele dzalo inale nacale ben' quie Diuzi. ¹⁸ Nezile ca re'en Diuzi hue yaca benè'. Lèscan' rsèdile con cabè' rna lè'è guichi ley quie Diuzi ta inezile bi huele huele tadya'a. ¹⁹ Raquele rioñe'ele, bidzebile uzioñe'ele ben' birioñe'e. Raquele dyin quiele uzioñe'ele ben' rda lao lato lao chula. ²⁰ Raquele inezile usèdile yaca ben' birioñe'e. Raquele inezile ulu'ele yaca ben' binenezi con cabè' rna lè'è guichi ley pca'n Diuzi lao na'a Moisés ga rguixogue'n quie yela' rioñe'e len yela' li quie Diuzi. ²¹ Chi le'e rusèdile ben' tula,

¿bixquien' birusèdile cuinle? Chi le'e yèbile benè' bireya'ala' cuanle quie benè', ¿bixquien' rbanle quie benè'? ²² Chi le'e yèbile benè' bireya'ala' utilale nigula tula, ¿bixquien' rutilale nigula tula? Chi le'e ratzale ilè'èle yaca ídolo, ¿bixquien' ru'ule lu'u idao' ga rdyia yaca ídolo rbanle ta zaca' ta yu'u dumi quieyacan? ²³ Ruele dzalo inale tadya'a naca guichi ley pca'n Diuzi lao na'a Moisés, pero rutitule Diuzi biruzule di'idza' cabè' di'idza' rnèn lè'è guichi ley na'. ²⁴ Quie lena' rna lè'è guichi ley na' cani: "Yaca ben' binaca ben' Israel, rnèbizoyaquè' quie Diuzi, pero dula' quiele rnajè' cana'."

²⁵ Talicazi de ga huen dyin uzule tu xèdyidao' cuinle ca mandado bè Diuzi dza na', pero solamente chi hue quiele quie guichi ley pca'n Diuzi lao na'a Moisés. Porque chi bihue quiele quie guichi ley na', na' naca quiele ca quie ben' bizu xèdyidao' cuine. ²⁶ Na' chi ruzu ben' bizu xèdyidao' cuine di'idza' quie guichi ley pca'n Diuzi lao na'a Moisés, na' hualè'è Diuzi lèjè' ca quie ben' zu xèdyidao' cuine. ²⁷ Pues yaca ben' bizu xèdyidao' cuine, pero ruzuyaquè' di'idza' con cabè' rna lè'è guichi ley pca'n Diuzi lao na'a Moisés, lèjè' huachugulijè' quiele le'e, ben' biruzu di'idza' con cabè' rnan, la'acazi napale le'e guichi quie ley, la'acazi zu xèdyidao' cuinle. ²⁸ Binaca dugalo ben' Israel yaca ben' bè'ruezi con cabè' rna Diuzi. Lèscan' binaca dugalo ben' Israel yaca ben' zu xèdyidao' cuine, pero birue quienè' xti'idza' Diuzi. ²⁹ Na' naca dugalo ben' Israel ben' rue quie du guicho du la'adyi' ca na Diuzi. Lèscan' cati hue quiero du guicho du la'adyi'ro con cabè' rna Diuzi, lena' rulu'en dugalo nacaro ben' zu xèdyidao' cuinro. Nu ben' rue quie con cabè' rna Diuzi, rlè'è Diuzi lèbè' ben' laxta'o yèri.

3

¹ ¿Ca biži nacara tahuen quie ben' Israel ca ben' binaca ben' Israel? ¿Gaži huen dyin chi zu ben' Israel tu xèdyidao' cuinjè'? ² Taže nacara huen quiejè', tazè rson de nacara tahuen quiejè'. Pues pca'n Diuzi di'idza' quienè' lao na'ayaquè'. ³ Tali na' bigule bala ja ben' Israel con cabè' gu'un Diuzi huejè' dza na', pero quie lena', ¿bi pensari huero? ¿Huero pensari lèscan' bihue Diuzi cabè' unanè' huenè'? ⁴ ¿Bireya'ala' huero pensari cana'? Seguro na' hue Diuzi cabè' unanè' huenè' conforme cabè' naca tali, la'acazi chi ben' huizi' yè' yugulu ben' nita' lao yedyi layu. Lena' rguixogue'n lè'è guichi la'iya quie Diuzi cani:

Tanun quie di'idza' rero lu'u ru'a Diuzi, banezi ja benè' naca Diuzi ben' rue tali.

Cati ilè'èyaquè' ca rue Diuzi, na' inajè': "Diuzi naquè' ben' laxta'o yèri."

⁵ Pero chi nacan tali de que por nun quie yela' ben' mala quiero, lena' rulu'en naca Diuzi ben' huen, ¿ca bi pensari reya'ala' huero? ¿Huero pensari naca Diuzi ben' mala chi huenè' castigo nu ben' mala? (Pensari quie benè' rnia', cala pensari quie Diuzi.) ⁶ Bireya'ala' huero pensari naca Diuzi ben' mala. Chi naca Diuzi ben' mala, bide derecho quienè' ichugulinè' ben' nita' lao yedyi layu, inanè' nu ben' bè' tahuen, nu ben' bè' tamala.

⁷ Lèscan' chi nacan tali de que por nun quie yela' huizi' yè' quiero, lena' rulu'en naca xti'idza' Diuzi di'idza' li, ¿bixquien' hue Diuzi castigo nu ben' huizi' yè'? ⁸ Chi tali nacan cana', ¿cala tahuen na' huero tamala tacuenda gata' tadya'a? Cana' na' bala ja benè', rnajè' cana' inando' rguixogue'ndo' benè'. Pero pensari mala yu'ujè', como dan' cala cana' inando' rguixogue'ndo' benè'. Dula' quiezijè' hue Diuzi lèjè' castigo.

Napa yugulu benè' dula' xquia

⁹ ¿Ca bi pensari reya'ala' huero? ¿Huero pensari naca ben' Israel ben' dya'ara ca ben' tula, ben' binaca ben' Israel? ¿Bisaquè'! Bireya'ala' huero pensari cana', como dan' napa yugulu benè' dula' xquia, la'acazi ben' Israel, la'acazi ben' binaca ben' Israel. Yugulujè' rnao dula' xquia quiejè' lèjè'. ¹⁰ Cana' rguixogue'n lè'è guichi la'iya quie Diuzi cani:

Ganu ben' laxta'o yèri zu, ni tuyaquè'.

¹¹ Bizu ben' rioñe'e.

Bizu ben' nuebè' Diuzi.

¹² Yuguluyaquè' rdayaquè' lao lato lao chula.

Rnaoayaquè' neza mala ga cuiagui'yaquè'.

Bizu ben' rue tahuen, ni tuyaquè'.

¹³ Ca tu yerobá neyalon ga rla' zigo, cana' naca di'idza' rero lu'u ru'ayaquè'.

Ta rzi'jè' yè' ru'elèjè' benè' di'idza'.

Ca veneno quie bèla naca di'idza' rero lu'u ru'ayaquè'.

¹⁴ Rudze'de'yaquè' laguediyayaquè', rnèjè' di'idza' zi'.

¹⁵ Tariara rdayaquè' rbe'nidyayaquè' benè' ta gutiyaquè' leyaquè'.

¹⁶ Con ga zioyaquè' rudiyagui'yaquè' benè', ruca'nyèchi'yaquè' laguediyayaquè'.

¹⁷ Binezayaquè' tzu'ulèyaquè' laguediyayaquè' dyè'èdi.

¹⁸ Ni siquiera ruejè' pensari chi hue Diuzi lèjè' castigo.

¹⁹ Cana' rnën lë'è guichi la'ya quie Diuzi. Na'ra ra'o neziro con cabè' rna lë'è guichi ley pca'n Diuzi lao na'a Moisés dza na'te. Neziro rna'bè'n lao ja ben' nao len cuenda biibin yaca benè' bi yequè'biyaquè' lao Diuzi dza gaca juicio, dza rue yugulu benè' cuenda lao Diuzi. ²⁰ Pero quele por nun quie dan' rue quiero con cabè' rna lë'è guichi ley pca'n Diuzi lao Moisés ilë'è Diuzi ra'o ben' laxta'o yëri. Conforme con cabè' rna lë'è guichi ley na' neziro de dula' xquia quiero.

Ilë'è Diuzi ra'o ben' laxta'o yëri tanun quie dan' rzudyi'ilëro Cristo

²¹ Pero na'a barioñe'ero cabè' nacan ilë'è Diuzi ra'o ben' laxta'o yëri. Cala por nun quie chi hue quiero con cabè' rna lë'è guichi ley pca'nnè' lao na'a Moisés ilë'è'nè' ra'o ben' laxta'o yëri. Lena' rguixogue'n lë'è guichi ley na' lente ja guichi bè ja ben' udirogue' di'idza' quie Diuzi dza na'te. ²² Tanun quie dan' rzudyi'ilëro Jesucristo, cana' ilë'è Diuzi ra'o ben' laxta'o yëri. Ilë'è Diuzi ben' laxta'o yëri yugulu ben' rzudyi'ilë'è lë'bè'. Tuz ca ilë'è'nè' ben' rzudyi'ilë'è Jesucristo, ilë'è'nè' ra'o ben' laxta'o yëri, la'acazi ben' Israel, la'acazi ben' binaca ben' Israel. ²³ Yuguluro de dula' xquia quiero. Yuguluro biuzero huero yugulu ca re'en Diuzi huero. ²⁴ Pero naca Diuzi ben' huen ilë'è'nè' ra'o ben' laxta'o yëri. Bibiquizuroguè' ilë'è'nè' ra'o ben' laxta'o yëri como dan' Cristo Jesús gutinè' udiruguè' quie dula' xquia quiero, cana' ru'en lato ilë'è Diuzi ra'o ben' laxta'o yëri. ²⁵ Use'ela' Diuzi Cristo lao yedyi layu ta gutiè' lë'è yaga cruzo ta gata' yela' huenitilao quiero lao Diuzi. Tanun quie lena' huezi'ze Diuzi quie dula' xquia quie nu ben' sudyi'ilë'è Cristo. Cana' bè Diuzi lao na'a Cristo ta tziõe'ero naca Diuzi ben' rue ta yu'u ni'a xnezi. Pues talicazi cabè' bè Diuzi, ulezè' bibènè' castigo quie yaca ben' bè xquia tu bineguida Cristo. ²⁶ Lëscan' bè Diuzi cana' ta tziõe'ero biusan Diuzi huenè' ta yu'u ni'a xnezi dza quiero, dza rdaro lao yedyi layu. Pues ta yu'u ni'a xnezi neruenè', rlë'è'nè' yaca ben' rzudyi'ilë'è Jesús ben' laxta'o yëri.

²⁷ Bireya'ala' huero cuinro ben' ze tanun quie dan' rlë'è Diuzi ra'o ben' laxta'o yëri. ¿Bixquien' bireya'ala' huero cuinro ben' ze? Bireya'ala' como dan' cule quie Diuzi na' rlë'è'nè' ra'o ben' laxta'o yëri, quele yela' ben' huen quiero. Rlë'è Diuzi ra'o ben' laxta'o yëri por nun quie rzudyi'ilëro Cristo, cala por nun quie chi ruero ca mandado rue lao ley quienè' pca'nnè' lao na'a Moisés. ²⁸ Quie lena' rioñe'ero rlë'è Diuzi ra'o ben' laxta'o yëri chi rzudyi'ilëro Cristo, cala por nun quie chi bëro, chi bibëro ca mandado rue lao ley quienè'.

²⁹ ¿Bizi ca inale? ¿Nale tu cue'zi yaca ben' Israel rna'bè' Diuzi? ¿Binezile rna'bè'rè Diuzi lao yaca ben' binaca ben' Israel? Claro na' rna'bè'cazi Diuzi lao yugulu benè'. ³⁰ Cala zè diuzi zu, tuzi Diuzi zu. Tanun quie chi rzudyi'ilëro Cristo ilë'è Diuzi ra'o ben' laxta'o yëri, lena' nacaro ben' Israel, la'acazi binacaro ben' Israel. ³¹ Na'ra ¿ca bi pensari huero? ¿Huero pensari bibi zaca' ley na', como dan' rzudyi'ilëro Cristo na'a? Bireya'ala' huero pensari cana', dechan' reya'ala' huero pensari decazi ga huen dyin ley na' ta pca'n Diuzi lao na'a Moisés.

4

Ni nan cabè' di'idza' bega'nlë Diuzi Abraham

¹ ¿Ca bi pensari reya'ala' huero quie xixizta'oro Abraham? ² Chi tanun quie yela' ben' huen quienè', blë'è Diuzi lë'bè' ben' laxta'o yëri, na'ra napa Abraham derecho huenè' cuinnè' ben' ze lao Diuzi. ³ ¿Ca bizi rnan lë'è guichi la'ya quie Diuzi? Pues rnan cani: "Bzudyi'ilë Abraham Diuzi. Con lëzin blë'è Diuzi lë'bè' ben' laxta'o yëri." ⁴ Chi huero tu dyin, binacan cule quie xa'ngo quizuguè' ra'o. Pues ta reya'ala' quizuguè' ra'o. ⁵ Pero chi rzudyi'ilëro Cristo, chi por lëzin hualë'è Diuzi ra'o ben' laxta'o yëri, lena' nacan cule bè Diuzi quiero, cala ta reya'ala' huenè' quiero. ⁶ Cana' una rey David dza na'te. Unè' cabè' redaohue benè' rlë'è Diuzi lë'bè' ben' laxta'o yëri tanun quie rzudyi'ilë'nè' Diuzi. Redaohue ben' babeguba Diuzi dula' xquia quie, ben' bihue Diuzi cuenda cabè' tamala bënë'. ⁷ Lena' rguixogue'n lë'è guichi la'ya quie Diuzi cani: Redaohue yaca benè' bezi'ze Diuzi dula' xquia quie.

Redaohuejè' chi bihue Diuzi lëjè' castigo quie tamala quiejè'. ⁸ Redaohue nu ben' bihue Diuzi cuenda quie dula' xquia quie, ben' rzudyi'ilë'è Diuzi.

Cana' rnën lë'è guichi la'ya quie Diuzi. ⁹ Na'ra rna'ba' le'e? ¿Ca bi pensari ruele? ¿Ruele pensari huezi'ze Diuzi dula' xquia quie tu cue'zi yaca ben' Israel, ben' zu xëdyidao' cuine? ¿Binezile huezi'zerè Diuzi dula' xquia quie yaca ben' tula, yaca ben' bizu xëdyidao' cuine: Neziro dyè'èdi blë'è Diuzi Abraham ben' laxta'o yëri tanun quie dan' bzudyi'ilë'nè' Diuzi. ¹⁰ ¿Bata blë'è Diuzi Abraham ben' laxta'o yëri? ¿Blë'è'nè' lë'bè' ben' laxta'o yëri tu binusu xëdyidao' cuine, o cati babzu xëdyidao' cuine? Pues tu binusu xëdyidao' cuine blë'è Diuzi lë'bè' ben' laxta'o yëri. ¹¹ Pero tanëro bzudyi'ilë'è Abraham Diuzi, na'tera blë'è Diuzi lë'bè' ben' laxta'o yëri. Beyudyi blë'è Diuzi lë'bè' ben' laxta'o yëri, na'ra bzujè' tu xëdyidao' cuinnè' como seña de que rlë'è Diuzi lë'bè' ben' laxta'o yëri tanun quie dan' rzudyi'ilë'nè' Diuzi. Quie lena'

naca Abraham xuzixta'o yugulu ben' laxta'o yëri, ben' rzudyi'ilë Diuzi, ben' bizu xëdyidao' cuine. ¹² Lëscan' quie lena' nacarë Abraham xuzixta'o yaca ben' zu xëdyidao' cuine, ben' rzudyi'ilë Diuzi cabë' bzudyi'ilë Abraham Diuzi dza na'te caora binesu xëdyidao' cuinnë'.

Tanun quie rzudyi'ilëro Diuzi, cana' uzunë' di'idza' ca unë' huenë' quiero gacalënë' ra'o

¹³ Bega'n'lë Diuzi Abraham len' z'i'subanë' di'idza' ta yega'n' quejë' duze yedyi layu dza zaza'ra. Pero bega'n'lë Diuzi Abraham di'idza' tanun quie bzudyi'ilënë' Diuzi. Lena' blë'ë Diuzi Abraham ben' laxta'o yëri, cala tanun quie guichi ley pca'n Diuzi lao na'a Moisés. ¹⁴ Chi nacan tali yega'n' duze yedyi layu para tu cue'zi ben' rue quie ca mandado rue lao guichi ley pca'n Diuzi lao na'a Moisés, na'ra bisaque' inaro zaca' sudyi'ilëro Diuzi, bisaque' inaro zaca' di'idza' cabë' di'idza' began'n'lë Diuzi Abraham. ¹⁵ Pero binacan tali cana', como dan' nusa' ley na' castigo quie yaca ben' birue quieyaquë' con cabë' rnan. Pero bigata' falta quie nu ben' binezi con cabë' rnan, na'ra birue quieyaquë'n.

¹⁶ Tanun quie bzudyi'ilë Abraham Diuzi, cana' udapa Diuzi compromiso uca'nnë' duze yedyi layu lao na'a Abraham. Calata quizu Abraham Diuzi uca'n Diuzi duze yedyi layu lao na'anë'. Pero bë Diuzi cana' tacuenda xela'adyi' yugulu z'i'suba Abraham de que gacacazi con cabë' una Diuzi huenë'. Cani nacan. Calata tuzi ben' nao ca mandado rue lao guichi ley udapa Diuzi compromiso, pero lëscan' udapa Diuzi compromiso con nu ben' rzudyi'ilë Diuzi cabë' bzudyi'ilë Abraham Diuzi. Cana' pca'n Diuzi naca Abraham xuzi yugulu ben' rzudyi'ilë Diuzi. ¹⁷ Bagulecazi Abraham con cabë' rguixoguen' lë'ë guichi la'ya quie Diuzi ga una Diuzi cani: "Bapca'na' luë' xuzi yugulu ben' za' yedyi zitu', yugulu ben' rzudyi'ilë në'ëdi'." Cana' rnan lë'ë guichi. Naca Diuzi ben' useban ben' huati. Naca Diuzi ben' bzalo yugulu ta bide dza na'te.

¹⁸ La'acazi guque Abraham bigaca quienë' cabë' una Diuzi huenë' quienë', bipsannë' uzudyi'ilënë' Diuzi, ulezë' hue Diuzi quienë' cabë' unë' huenë' quienë'. Cana' guca quie Abraham naquë' "xuzi yugulu ben' za' yedyi zitu', yugulu ben' rzudyi'ilë Diuzi", conforme con ca gudyi Diuzi lëbë' dza na'te: "Gaca tazë z'i'subo'." ¹⁹ La'acazi napa Abraham cadu tu gayuhua iza, bipsannë' rbezë' gaca quië' cabë' compromiso udapalë Diuzi lëbë'. Bipsannë' rbezë' la'acazi banaquë' ben' gula, la'acazi banacarë zgulë' ben' gula. Baode tiempo quie nigula quienë' bibi'anë' xcuidi'. Baidyin hora gatiyaquë'. ²⁰ Bibënë' pensari mala, bipsannë' rbezë' gaca quienë' cabë' compromiso udapalë Diuzi lëbë'. Cana' bënë' uzudyi'ilënë' Diuzi udapë' lëbë' bala'ana. ²¹ Dyë'ëdi unezi Abraham napa Diuzi fuerza valor ta uzupë' di'idza' cabë' compromiso rapalënë' benë'. ²² Quie lena' blë'ë Diuzi Abraham ben' laxta'o yëri.

²³ Na'ra dza na'te bë Diuzi mandado bzu yaca benë' di'idza' quienë' lë'ë guichi ta rguixoguen' cabë' guca quie Abraham, bzudyi'ilënë' Diuzi blë'ë Diuzi lëbë' ben' laxta'o yëri. Pero cala para tuzi lëbë' bë Diuzi mandado bzujë' di'idza' quienë' lë'ë guichi. ²⁴ Lëscan' bë Diuzi mandado bzujë' di'idza' quienë' lë'ë guichi ta ineziro ra'o hualë'ë Diuzi ra'o ben' laxta'o yëri, chi rzudyi'ilëro lëbë', ben' pseban Jesús, ben' naca za'nro. ²⁵ Tanun quie guti Jesús lë'ë yaga cruzo bebannë', ru'en lato yezi'ze Diuzi dula' xquia quiero. Lëscan' tanun quie bebannë' ru'en lato ilë'ë Diuzi ra'o ben' laxta'o yëri.

5

Tahuen naca quiero ilë'ë Diuzi ra'o ben' laxta'o yëri

¹ Na'ra como dan' rlë'ë Diuzi ra'o ben' laxta'o yëri por nun quie rzudyi'ilëro xa'nro Jesucristo, quie lena' rbe' chizi laxta'oro lao Diuzi. ² Naca Cristo ben' sëlë ra'o lao Diuzi por nun quie dan' rzudyi'ilëro lëbë'. Quie lena' huela'ya Diuzi ra'o inaro xnezë' du guicho du la'adyi'ro. Quie lena' redaohuero rbezaro yeyoro ga zu Diuzi guibá. ³ Lëscana' redaohuero cati raca zëdi quiero yedzagalaoro, porque neziro chi yedzagalaoro, cana' huacalë Diuzi ra'o ta suero inaro xnezë' dyë'ëdi. ⁴ Lëscan' chi suero inaro xnezë' dyë'ëdi, cana' yedaohue Diuzi ca ruero. Lëscan' chi yedaohue Diuzi ca ruero, cana' rbezaro dyë'ëdi yeyoro guibá ga zuë'. ⁵ Zuro contento biyehuédiro rbezaro yeyoro guibá ga zu Diuzi como dan' use'ela' Diuzi Bichi Be quienë', bagucalënë' ra'o ta idyë'ëro Diuzi, bayu'uro yela' nedyë'ë quie Diuzi lu'u guicho laxta'oro.

⁶ Caora cati bibi de huero ta ute uselaro cuinro lao Diuzi, na'ra bida Cristo gutinë' lë'ë yaga cruzo. Ca bdyin hora gu'un Diuzi gaca, caora na' guti Cristo ta gažo dula' xquia quie ja ben' binuebë' Diuzi. ⁷ Nunu re'en gati lao laza ben' tula. Derepente ga zu benë' quie'ennë' gatië' lao laza ben' tula, ben' huen gula. ⁸ Pero bablë'ëro cabë' bë Diuzi nedyë'ënë' ra'o use'elë' z'i'inë' gutië' lë'ë yaga cruzo cuenda gažo dula' xquia quiero caora cati nenacaro ben' de dula' xquia quie. ⁹ Na'ra barlë'ë Diuzi ra'o ben' laxta'o yëri tanun quie dan' guti Cristo lë'ë yaga cruzo. Lëscan' por nun quie lëbë' binue Diuzi ra'o castigo dza gaca juicio lao yedyi layu. ¹⁰ Caora cati nenacaro enemigo quie Diuzi, na'ra ulëchitza'o cuin Diuzi ra'o len

lëbë' cuenda tzu'ulëronë' tuže. Cana' bë Diuzi tanun quie dan' guti ži'inë' lë'ë yaga cruzo. Quie lena' seguro nacan yezi' Diuzi ra'o por nun quie dan' guti beban ži'inë', banacalëronë' tuže. ¹¹ Cala tuzi ulëchitza'o Diuzi ra'o, pero lëscan' rna' ruhuianë' ra'o por nun quie ži'inë' Jesucristo. Pues lao na'a Jesucristo nacalëro Diuzi tuže rbe' chizi laxta'oro.

Ni rguixogue'n cabë'bë Adán len cabë' bë Cristo

¹² Tanun quie tuzi be'mbyu guta' dula' xquia lao yedyi layu. Na'ra como dan' guta' dula' xquia lao yedyi layu, cana' guta'rë yela' guti quie yugulu benë', como dan' yugulu benë' napajë' dula' xquia. ¹³ Desde dza na'te, dza bineca'n Diuzi ley quienë' lao na'a Moisés, baquezi napa yaca ben' nita' lao yedyi layu dula' xquia. Pero uleza Diuzi bibë Diuzi leyaquë' castigo dza na'te como dan' binuca'nnë' ley quienë'. ¹⁴ Guticazi yaca ben' unita' dza uda Adán lao yedyi layu hasta ben' unita' dza uda Moisés lao yedyi layu. Caora bdyin dza quieyaquë' gutiyaquë' como dan' napajë' dula' xquia. Guticazyiaquë' la' acazi netza' tamala bëyaquë' cala ca tamala bë Adán. Bibzu Adán di'idza' ca mandado bë Diuzi lëbë'.

¹⁵ Netza' ca naca ta udilo' Adán. Netza' ca naca tadya'a rue Diuzi quiero ra'o. Tanun quie ta udilo' tuzi be'mbyu Adán guta' yela' guti quie ja ben' nita' lao yedyi layu. Pero netza' cabë' bë Diuzi, bënë' quiero tu cule že. Bënë' tahnun gula quie yaca ben' nita' lao yedyi layu. Gun Diuzi ra'o yela' neban tuzioli por nun quie yela' bzu di'idza' quie tuzi be'mbyu Jesucristo. Biuquizunë' ra'o quie yela' naban gunnë' ra'o tuzioli. ¹⁶ Netza' ta udilo' Adán, binacan cabë' tadya'a rue Diuzi quiero gunnë' ra'o yela' neban tuzioli. Tanun quie ta udilo' Adán, biuzaquë' ilë'ë Diuzi ra'o ben' laxta'o yëri. Pero por nun quie tadya'a bë Diuzi quiero ra'o, rlë'ënë' ra'o ben' laxta'o yëri, bezi'ženë' taže quiero ca naca dula' xquia quiero. ¹⁷ Guta' yela' guti quie yaca benë' tanun quie ta udilo' tuzi be'mbyu. Pero yaca ben' rue quie xti'idza' Diuzi, hualë'ë Diuzi leyaquë' ben' laxta'o yëri, huela'iya Diuzi leyaquë', huata' yela' neban cubi quieyaquë' por nun quie yela' bzu di'idza' quie tuzi be'mbyu Jesucristo.

¹⁸ Tanun quie ta udilo' Adán guta' tu castigo lao yuguluro. Pero tanun quie yela' bzu di'idza' quie Jesucristo, hualë'ë Diuzi yugulu ben' rue quie xti'idzë' ben' laxta'o yëri, bigata' castigo quieyaquë'. ¹⁹ Cani nacan. Tanun quie ta udilo' tuzi be'mbyu, blë'ë Diuzi yuguluro ben' napa dula' xquia. Pero tanun quie yela' bzu di'idza' quie tuzi be'mbyu, rlë'ë Diuzi ra'o ben' binapa dula' xquia.

²⁰ Udixu Diuzi ley quienë' lao yedyi layu ta ulu'en lega napajë' xquia. Pero tu yu'uyaquë' rueyaquë' xquia že, lëscan' beyëchi'la'adyi' Diuzi leyaquë' taže. ²¹ Cani nacan. Tanun quie dula' xquia napa yaca benë', quie lena' guta' yela' guti quiejë'. Pero lëscan' tanun quie yela' ben' huen quie Diuzi, quie lena' guta' ilë'ënë' ra'o ben' laxta'o yëri, hue'në' ra'o yela' neban tuzioli por nun quie Señor quiero Jesucristo.

6

Bira gacaro pensari huero tamala, reya'ala' gacaro pensari gaparo Cristo bala'ana

¹ ¿Ca bi pensari reya'ala' huero? ² ¿Huero pensari huero tamala cuenda ulu'e Diuzi ra'o ca naca yela' ben' huen quienë' ina'në' ra'o nacala gaca quiero? ¿Bireya'ala' huero pensari cana'! Naca quiero ca quie ben' baguti, bira rnabë' dula' xquia quiero ra'o. ¿Cómo pues huero seguir huero xquia? ³ ¿Binezile ca guca quiero dza gucaro bautismo? ¿Binezile gucaro bautismo ta ulu'en banacalëro Cristo Jesús tuže, lëscan' ta ulu'en banaca quiero ca quie ben' guti lë'ë yaga cruzo? ⁴ Tanun quie gucaro bautismo naca quiero ca quie ben' baguti, ben' bade lu'u yerobá conlë Cristo. Pero lëscan' naca quiero ca quie ben' babeban, ben' bade yela' neban cubi quie. Naca quiero ca quie ben' beban cabë' beban Cristo, bebannë' lao na'a Diuzi, ben' de yela' huaca quie.

⁵ Porque chi tanun quie yela' guti quie Cristo naca quiero ca quie ben' huati, na' nacalëro lëbë' tuže, lëscan' tanun quie yela' beban quie Cristo naca quiero ca quie ben' beban, na' lëscan' quie lena' nacalëronë' tuže. ⁶ Caora guti Cristo lë'ë yaga cruzo, caora na' guca quiero ca quie gutirë pensari mala quiero cuenda bira huero ta rnazin quiero, bira inabë' pensari mala ra'o, bira ru'en lato huero mandado ca mandado rue pensari mala quiero ra'o. ⁷ Porque bira saque' inao benë' pensari mala quieyaquë' cati bagutiyaquë'. ⁸ Chi tali apsanro tamala quiero, lena' rulu'en anaca quiero ca quie ben' bagutilë Cristo. Cana' xela'adyi'ro huazulëro lëbë' tuzioli. ⁹ Porque neziro caora beyudyi guti beban Cristo, na'ra tuzioli bira gatinë'. Bira saque' hue yela' guti lëbë' gan tatula. ¹⁰ Caora guti Cristo lë'ë yaga cruzo, para tuzioli udižuguë' quie dula' xquia quiero. Na'ra nabannë' zuë' guibá naquë' ben' bala'ana že lao Diuzi. ¹¹ Na'ra quie le'e, bira gacale pensari huele tamala, reya'ala' gacale pensari gapale Diuzi bala'ana como dan' nacalële Cristo Jesús, ben' naca Señor quiero, tuže.

¹² Quie lena' bihue'le lato inabë' pensari mala quiele le'e huele ca tamala rnan guicho laxta'ole huele. ¹³ Bihue'le lato huelële cuerpo quiele tamala. Ta reya'ala' huele, huelële

Diuzi tuže como dan' banaca quiele ca quie ben' baguti, ben' beban lao na'anè'. Ta reya'ala' huele, hue'le lato huelèle cuerpo quiele tadya'a. ¹⁴ Porque bira saque' inabè' pensari mala quiele le'e. Bira nadele cuenda lao na'a ley pca'n Diuzi lao na'a Moisés, banadele cuenda lao na'a yela' reyèchi'la'adyi' quie Diuzi.

Ni rguixogue'n tu di'idza' cabè' naca quie ben' zu lao xa'ne

¹⁵ ¿Na'ra bizi huero? ¿Huero xquia como dan' bira nadero cuenda lao na'a ley pca'n Diuzi lao na'a Moisés, dechan' nadero cuenda lao na'a yela' reyèchi'la'adyi' quie Diuzi? ¿Bisaque' huero can'! ¹⁶ Pero dyè'di nezile cabè' naca quie nu ben' zu lao xa'ne. Re'en ca re'enna uzujè' di'idza' ca mandado rue xa'ne. Cana' naca quiero. Chi uzuro di'idza' cabè' mandado rue pensari mala quiero, lena' udyiaguin' ra'o, biyezi' Diuzi ra'o gunnè' yela' naban quiero tuzioli. Chi uzuro di'idza' ca mandado rue Diuzi, lena' gacalèn ra'o yezi' Diuzi ra'o gunnè' yela' naban quiero tuzioli. ¹⁷ Pero xcalle Diuzi, bira rzule di'idza' ca mandado rue pensari mala quiele, cabè' bèle dza na'te. Pero na'a baruzule di'idza' du guicho du la'adyi'le ca mandado rue xti'idza' Diuzi ta pca'nnè' laohuele. ¹⁸ Banacale ben' libre ta huele tadya'a inaoe xneza Diuzi. ¹⁹ (Tanun quie dan' binetziõe'e'le dyè'di cabè' rnìa' le'e, lena' rnìa' le'e itu chopla la'ana ta gacalèn le'e.) Cani nacan. Cabè' bèle dza ni' ulisa ni'a na'ale bèle tamala, bèle ta bireya'ala' huele, cana' hualisa ni'a na'ale huele tadya'a, huele ta reya'ala' huele, tacuenda talicazi nacale ben' quie Diuzi.

²⁰ Caora neyu'ule pensari mala dza na', unabè'n le'e ca xa'nle, quie lena' bibzule pensari huele tahuen ca tahuen re'en Diuzi huele. ²¹ ¿Pero bizi bèle gan unaole neza mala? Na'ra lena' ruen yela' stu' quiele. Zè'lao ituzi yela' guti ulezale yeyole lao gui' gabila. ²² Pero na'a bira yu'ule pensari mala inabè'n le'e ca xa'nle. Baoyu'ule pensari quie Diuzi ta huele tahuen ca re'en Diuzi huele. Cana' sí huele gan. Cana' talicazi nacale ben' quie Diuzi. Ze'lao cana' gun Diuzi yela' neban ta biyeyuyi yedu quie. ²³ Ga yeyudyi gazo dula' xquia quiero yeyoro lao gui' gabila. Pero netza' quie Diuzi gunnè' yela' neban quiero tuzioli tanun quie nacalèro Cristo Jesús, ben' naca Señor quiero, tuže.

7

Ni rguixogue'n tu di'idza' cabè' naca quie tu nigula bazulè be'mbyu

¹ Bicha', le'e nuebè'le nezile bi nan lè'è guichi ley pca'n Diuzi lao na'a Moisés. Nezile rnabè' guichi ley na' ra'o solamente dza nebanro rdaro lao yedyi layu. ² Rnìa' le'e tu di'idza'. Cani nacan quie tu nigula bazulè be'mbyu. Biru'e guichi ley na' lato usan nigula be'mbyu quiè' tu nenebannè' nerda be'mbyu quiè' lao yedyi layu. Pero chi baguti be'mbyu quiè', anaquè' libre yezi'nè' ben' tula. Bira naca quiè' be'mbyu na' lao guichi ley. ³ Quie lena' chi baptilè' be'mbyu tula tu neneban be'mbyu quiè', na'ra xquia ruenè' quienè'. Pero chi baguti be'mbyu quiè', anaquè' libre yezi'nè' ben' tula, bira naca quiè' be'mbyu na' lao guichi ley. Bibi dula' xquia de quienè'.

⁴ Lèscan' cana' nacan quiele, bicha'. Le'e banacalèle Cristo tuže. Banaca quiele ca quie nigula baguti xquihue. Bira nacale cuenda lao guichi ley pca'n Diuzi lao na'a Moisés. Banacale cuenda quie Cristo, ben' baguti beban. Cana' naca quiero nacaro ladyina'a Diuzi. ⁵ Na'ra cabè' guca quiero dza na'te, bèro ta rnazin quiero. Unan quiero huero ta biru'en lato huero lè'è guichi ley pca'n Diuzi lao na'a Moisés. Tanun quie biru'en lato huero bi cosa lè'è guichi ley na', lena' unan quiero uchisa ni'a na'aro huero tamala. ⁶ Pero bira inabè' guichi ley pca'n Diuzi lao na'a Moisés ra'o. Nacaro libre huero ca re'en Diuzi huero, bayu'uro pensari quienè' ta yecubinè' pensari quiero. Bira naca quie guichi ley na' para inabè'n ra'o.

Ni rguixogue'n quie pensari mala yu'u lu'u guicho laxta'oro

⁷ Na'ra, ¿ca bizi inaro? ¿Inaro naca quichi ley na' tamala? ¿Bireya'ala' inaro cana' como dan' binaca guichi ley na' tamala! Pero rguixogue'cazin ra'o cabè' naca tamala. Ni siquiera binezida' tamala na' rza'la'adyi'ro ta de quie laguedyiro, chi birguixogue'n lè'è guichi ley na' de que: "Bireya'ala' sa'la'adyi'ro ta de quie laguedyiro." ⁸ Pero tanun quie rguixogue' guichi ley na' cabè' bireya'ala' huero, quie lena' uzulao pensari mala quia' huen nè'è'di' mandado hua' ta rnazin quia'. Porque según cabè' rguixogue' lè'è guichi ley na', cana' ineziro bi huero huero tamala, bi huero huero tahuen. ⁹ Guca tu ta guca tiempo biunezda' cabè' rguixogue'n lè'è guichi ley na'. Quie lena' biunezda' de dula' xquia quia'. Pero caora bdyin hora unezda' cabè' rguixogue'n lè'è guichi ley na', caora na' za' pensari mala quia', bèlèn nè'è'di' ta hua' ta biru'en lato hua'. Caora na' unezda' de dula' xquia quia', huaca hue Diuzi nè'è'di' castigo. ¹⁰ Ulèchi Diuzi guichi ley quienè' ta gacalènè' yaca ben' nita' lao yedyi layu cuenda suyaquè' contento. Pero por tu parte quia' nè'è'di', lao na'a Diuzi unezda' de dula' xquia quia', huen zuyi huenè' nè'è'di' castigo. Cana' guca quia'. ¹¹ Tanun quie guichi

ley na', aozí' pensari mala quia' në'èdi' yè'. Cana' guta' dula' xquia quia', bèn žudyi hue Diuzi në'èdi' castigo.

¹² Pero naca la'ya guichi ley pca'n Diuzi lao na'a Moisés. Naca la'yan, nacan li, nacan huen ca mandado rue lao guichi ley na'. ¹³ Na' inaba' le'e tu pregunta, ¿naca dula' quie guichi ley na' guta' dula' xquia quia', huen žudyi hue Diuzi në'èdi' castigo? ¡Binacan cana'! Binaca dula' quie guichi ley na', nechan' dula' quie dula' xquia quia'. Conlè ta naca tadya'a uži' dula' xquia quia' në'èdi' yè'. Cana' naca dyin quie guichi ley quie Diuzi. Nacan ta ulu'en ra'o ca tamala gula naca dula' xquia quiero.

¹⁴ Neziro nusa'a guichi ley na' pensari quie Diuzi, pero në'èdi' biyu'a pensari quie Diuzi, yu'a pensari mala ca pensari yu'u yaca ben' nita' lao yedyi layu. ¹⁵ Binezda' bi ruen quia'. Tu ta bireya'ala' hua', lèlena' rua', la'acazi nezda' tamala na'. ¹⁶ Pero chi rua' tu ta bireya'ala' hua', lena' rulu'en nezda' naca dya'a guichi ley quie Diuzi. ¹⁷ Pensari mala quia' yu'u lu'u guicho laxta'ohua', lena' rnabè'n në'èdi' hua' tamala. Raca quia' ca quie ben' tula, ben' mala, rnabè'nè' në'èdi'. ¹⁸ Nezda' ca naca pensari yu'a në'èdi'. Biyu'a pensari dya'a ca pensari quie Diuzi. Yu'a pensari mala ca pensari yu'u yaca ben' nita' lao yedyi layu. Rnèn lu'u guicho laxta'ohua' hua' tahuen, però bigaca' hua'n. ¹⁹ Birua' tadya'a cabè' re'enda' hua', nechan' tamalala rua', ta bire'enda' hua'. ²⁰ Na'ra chi birua' tadya'a cabè' re'enda' hua', lena' ulu'en rnabè'n pensari mala quia' në'èdi'. Raca quia' ca quie ben' tula, ben' mala rnabè'nè' në'èdi'. ²¹ Cana'naca ta raca quia'. Cati ruzua' pensari hua' tahuen, cana' reyudyi quia' tamalala rua'. ²² Nezicazida' naca huen guichi ley quie Diuzi. ²³ Pero lèscan' nezda' ca naca pensari yu'u lu'u guicho laxta'ohua', yu'un pensari mala ca pensari yu'u yaca ben' nita' lao yedyi layu. Na'ra bire'en pensari mala quia' hua' tahuen cabè' re'enda' hua'. Cana' rnabè'n pensari mala quia' në'èdi'. Raca quia' ca quie ben' yu'u lu'u dyiguiba, ben' binaca libre.

²⁴ ¡Bayèchi' gula raca quia'! ¿Nuzi gacalè në'èdi' usana' pensari mala yu'u lu'u guicho laxta'ohua', pensari re'en udyiaguin' në'èdi'? ²⁵ Tuzi Diuzi gacalènè' në'èdi' lao na'a ži'inè' Jesucristo, ben' naca Señor quiero. ¡Xcale Diuzi taže bagualènè' në'èdi' como cabè' guca quia', gu'unda' hua' mandado ca mandado rue lao guichi ley quie Diuzi, pero biguca' como dan' unabè'n pensari mala quia' në'èdi'. Unabè'n në'èdi' cabè' rnabè' ben' naca xa'n tamala.

8

Racalè pensari quie Diuzi yu'u lu'u guicho laxta'oro ra'o

¹ Na'ra bigata' castigo quie ben' nacalè Cristo Jesús tuže. Bira inabè' pensari mala ra'o ca pensari mala yu'u lu'u guicho laxta'o yaca ben' nita' lao yedyi layu, nechan' inabè'cazi pensari quie Diuzi yu'u lu'u guicho laxta'oro ra'o. ² Dyin quie pensari quie Bichi Be quie Diuzi yu'u lu'u guicho laxta'oro, lena' uselan ra'o gacaro libre. Birabi dula' xquia quiero gata' lao Diuzi huenè' ra'o castigo. Lèscan' dyin quie pensari quie Diuzi gata' yela' neban quiero tuzioli tanun quie dan' nacalèro Cristo Jesús tuže. ³ Porque bè Diuzi gan bènè' ta biužaque' hue guichi ley pca'nnè' lao na'a Moisés. Tanun quie pensari mala yu'u lu'u guicho laxta'oro, biužaque' yeguba guichi ley na' dula' xquia quiero. Quie lena', use'ela' Diuzi ži'inè' ta yegubè' dula' xquia quiero. Guquè' be'mbyu ca ra'o, ben' de dula' xquia quie, però lèbè' bibi dula' xquia quiè' de. Cana' bè Diuzi use'ela'nè' ži'inè' gutinè' lao lazaro guquè' ca gun hue'ro Diuzi ta yeži dula' xquia quiero. Na' biži lao na'a ži'inè' guquè' be'mbyu bidè' lao yedyi layu, bènè' gan begubè' dula' xquia quiero ta bira inabè'n ra'o. ⁴ Cana' bè Diuzi gucalènè' ra'o tacuenda huero tadya'a con cabè' rnan lè'è guichi ley quienè'. Bira inaoro huero ca naca pensari mala yu'u lu'u guicho laxta'oro ra'o, ben' de dula' xquia quie. Pero inaoro huero ca naca pensari quie Bichi Be quie Diuzi yu'u lu'u guicho laxta'oro.

⁵ Yaca ben' nao ca naca pensari mala yu'u lu'u guicho laxta'ojè', lega raxeyaquè' huejè' ta rnazin quiejè'. Pero yaca ben' nao ca naca pensari quie Bichi Be quie Diuzi yu'u lu'u guicho laxta'ojè', lega raxejè' uzujè' di'idza' ca mandado rue Diuzi. ⁶ Chi inaoro huero ca naca pensari mala yu'u lu'u guicho laxta'oro, lena' udyiaguin' ra'o lao Diuzi. Pero chi inaoro huero ca naca pensari quie Bichi Be quie Diuzi yu'u lu'u guicho laxta'oro, lena' gata' yela' neban quiero biyeyudyi yedu quie, huabe' chizi laxta'oro. ⁷ Naca enemigo quie Diuzi yaca ben' nao rue pensari mala ca pensari mala yu'u lu'u guicho laxta'ojè'. Nica re'enjè', nica nezijè' bi huejè' ta huejè' mandado ca mandado rue lao guichi ley quie Diuzi. ⁸ Yaca ben' raxe hue pensari mala ca pensari mala yu'u lu'u guicho laxta'ojè', biilè'è Diuzi lèjè' gusto cabè' rueyaquè'.

⁹ Pero le'e binacale ben' nao rue pensari mala ca pensari mala yu'u lu'u guicho laxta'o yaca ben' nita' lao yedyi layu. Nacale ben' nao rue pensari quie Bichi Be quie Diuzi, como dan' yu'u pensari quiè' lu'u guicho laxta'ole. Nu ben' biyu'u pensari quie Cristo lu'u guicho

laxta'ohue, binaquë' ben' quie Cristo. ¹⁰ Chi nacalëro Cristo tuže, la'acazi gati cuerpo quiero tanun quie dula' xquia quiero, pero ca naca quie bichi be quiero, bigatin nabannan como dan' nacalëro Cristo tuže rl'ë Diuzi ra'o ben' bira de dula' xquia quie. ¹¹ Quie lena' chi tali yu'uro pensari quie Bichi Be quie Diuzi lu'u guicho laxta'oro, la'acazi gatiro, useban Diuzi ra'o gunnë' yela' neban cubi ta biyeyudyi yedu quie. Na' Diuzi, ben' pseban Cristo Jesús, lëbë' usebannë' ra'o lao na'a Bichi Be quienë', ben' yu'u lu'u guicho laxta'oro.

¹² Cani nacan bicha', nacaro obligado, pero binacaro obligado huero inaoro con cabë' rna pensari mala yu'u lu'u guicho laxta'oro. ¹³ Porque chi huero inaoro ca rue pensari mala yu'u lu'u guicho laxta'oro, na'ra bë' gatiro, bigata' yela' neban tuzioli quiero. Pero chi hue quiero con cabë' rna Bichi Be quie Diuzi, chi bihuero cuenda con cabë' rna pensari mala yu'u lu'u guicho laxta'oro, na'ra bë' gatiro, huata' yela' neban quiero tuzioli.

¹⁴ Naca ži'i Diuzi yugulu ben' nao ruzu di'idza' con cabë' rna Bichi Be quienë'. ¹⁵ Ca naca pensari bdze' Diuzi lu'u guicho laxta'oro, binacan pensari ta idzebiro ca idzebi ben' zu lao xa'n tamala. Pero tanun quie pensari quië' yu'un lu'u guicho laxta'oro, nacaro ži'inë', na' yëbironë': "Xuzu' Diuzi." ¹⁶ Racialë pensari quie Bichi Be quie Diuzi pensari quiero ta xela'adyi'ro nacaro ži'i Diuzi. ¹⁷ Dan' nacaro ži'i Diuzi, cana' gunnë' ra'o ca ta unë' gunnë' ra'o dza na'te. Conlë Cristo gata' yela' neban quiero tzesulëronë' tuzioli. Na' chi raca žëdi quiero dza rdaro lao yedyi layu tanun quie naoro xneza Cristo, lëscan' huadyin dza yedyinro guibá tzahuero tuže len Cristo.

¹⁸ Taže tazëdi de quiero dza rdaro lao yedyi layu tanun quie dan' naoro xneza Cristo, pero cati abedyinro guibá inaro tadao' bicu' tazëdi guca quiero. Inaro nacara tahuen gula gaca quiero cati bedyinro guibá. ¹⁹ Yugulu ta udixu Diuzi lao yedyi layu rbezan dza yedupa yedzaga yugulu ben' naca ži'i Diuzi guibá. ²⁰ Yugulu ta udixu Diuzi lao yedyi layu naca bayëchi' quien, pero cala dula' quien naca bayëchi' quien. Dyin bë Diuzi naca bayëchi' quien, pero bzucazi Diuzi dza, dza yecubinë' yeyuenë' yugulu ta de lao yedyi layu. ²¹ Huadyin dza yeži yeyëri yugulu ta udixu Diuzi lao yedyi layu. Bira gaca bayëchi' quien, bira yedzagaona. Huega'n tzaon'na dza zuro guibá nacaro libre ra'o, ben' naca ži'i Diuzi. Lëdza na' yega'n dya'a gula quiero. ²² Neziro redzagalao yugulu ta udixu Diuzi lao yedyi layu ca quie redzagalao nu nigula re'en galo xcuidi' quie. ²³ Cala tuzi ta udixu Diuzi lao yedyi layu redzagalaona, pero lëscan' ra'o, ben' nao xnezë', redzagalaoro la'acazi yu'u pensari quie Bichi Be quie Diuzi lu'u guicho laxta'oro. Bablë'ëro tadya'a na' yu'uro pensari quie Bichi Be quie Diuzi. Neziro huadyin dza inabë' puro pensari quie Bichi Be quie Diuzi ra'o, bira inabë' pensari quiero ra'o. Lega rbezaro dza yeži' Diuzi ra'o nacaro ži'inë' sulëronë' naquë' Xuziro. Na' dza na' yecubi Diuzi cuerpo quiero ta iyacan cuerpo dya'atzegeo, cuerpo bicuagiun'. ²⁴ Lëdza na' rbezaro gaca quiero con cabë' una Diuzi gaca quiero tanun quie bapte pselanë' ra'o. Chan' baguca quiero tu ta ulezaro gaca quiero, na'ra bira zu cuezaro gaca quiero. ²⁵ Pero chi binegaca quiero tu ta cuezaro gaca quiero, na'ra ruen zi cuezaro dy'ëdi idyin dza gaca quiero cabë' rbezaro gaca.

²⁶ Lëscan' racialë pensari quie Bichi Be quie Diuzi ra'o ga racaro falta. Nica neziro hue'lëro Diuzi di'idza' ca reya'ala' huero. Pero ca pensari quie Bichi Be quie Diuzi yu'u lu'u guicho laxta'oro, con len racialën ra'o ulidzaro Diuzi cabë' reya'ala' ulidzaronë' nun quie dan' biredzeleru bi di'idza' yëbironë'. ²⁷ Rezi' Diuzi cuenda ca naca pensari yu'u lu'u guicho laxta'oro. Nezi Diuzi bi na Bichi Be quienë', porque rulidza Bichi Be quienë' lëbë' conforme ca re'en Diuzi gaca quie yaca ben' quienë', yaca ben' nao xnezë'.

Con bitezi tazëdi gaca quiero huero gan

²⁸ Neziro con bitezi gaca quiero, huacalë Diuzi ra'o yega'nro huen, ra'o, ben' dy'ë Diuzi, ra'o, ben' ulionë' según ca unanë' huenë' quiero dza na'te. ²⁹ Desde dza na'te nezi Diuzi huadyin dza sudyi'ilëronë'. Cana' psere Diuzi ra'o dza na'te ta yedyinro iyacaro ta gacaro cabë' naca ži'inë' Cristo. Cana' yedyin Cristo naquë' ben' belaora lao yaca ben'rzudyi'ilë Diuzi. ³⁰ Na'ra como psere Diuzi ra'o dza na'te ta gacaro ben' quienë', lëscan' uliorëne' ra'o ta huero mandado quienë'. Na'ra como ulionë' ra'o huero mandado quienë', lëscan' pca'nrenë' ra'o ben' laxta'o yëri. Na'ra como pca'nnë' ra'o ben' laxta'o yëri, lëscan' bërënë' ra'o ben' bala'ana, ben' inita'lë lëbë' guibá.

³¹ Quie lena', ¿ca bi pensari reya'ala' huero? Pues como zu Diuzi racialënë' ra'o, nunu gaca udyiagui' ra'o. ³² Na'ra como bibeguë' Diuzi guida ži'inë', pero use'ela'cazine' lëbë' lao yedyi layu ta gutië' lë'ë yaga cruzo lao lazaro, lëscan' biyeguë' Diuzi gunnë' ra'o yugulu tahuen ta rdzioguero nuzuë' ži'inë' Jesucristo ta gacalënë' ra'o. ³³ ¿Nuži napa derecho gao ra'o xquia, ra'o, ben' ulio Diuzi? Naca cuin Diuzi ben' pca'n ra'o ben' laxta'o yëri. ³⁴ ¿Nuži napa derecho ichuguli quiero gacaro castigo? Naca cuin Cristo ben' guti lë'ë yaga cruzo pseban Diuzi lëbë', zuë' cuëta lë'ënë' zaquë' yebë', rulidzë' lëbë' por ra'o. ³⁵ Con bitezi gaca quiero biyeyudyi yedu nadyë'ë Cristo ra'o. La'acazi redzagalaoro, la'acazi raca žëdi quiero,

la'acazi ruelèjè' ra'o bizinaquezi, la'acazi bide ta gaoro, la'acazi bide žaba quiero, la'acazi naca žudyi quiero, la'acazi ruzegadyjè' gutijè' ra'o, biyeyudyi yedu nadyè'è Cristo ra'o. ³⁶ Rguixogue'n lè'è guichi la'ya que Diuzi ca tazèdi gaca quiero cani:

Tanun que rdza' yaca benè' dan' naoro xneza Diuzi, cana' re'enjè' gutijè' ra'o.

Ca ruti ja benè' beco' zi'ila' yugu dza, cana' re'enjè' gutijè' ra'o.

Cana' rnèn lè'è guichi la'ya. ³⁷ Na'rnia' le'e, con bitezi tazèdi za' gaca quiero, huero gan como dan' zu Cristo napè' ra'o cuidado nadyè'ènè' ra'o. ³⁸ Nzèda' dyè'èdi con bitezi za' gaca quiero, biyeyudyi yedu nadyè'è Diuzi ra'o. La'acazi guti benè' ra'o, la'acazi gaca zèdi quiero dza rdaro lao yedyi layu, la'acazi rue yaca àngel condre ra'o, la'acazi ruelè yaca taxi'ibi' ra'o bizinaquezi, la'acazi bi raca quiero na'a, la'acazi bi raca quiero uxe huidzo, ³⁹ la'acazi bi raca quiero guibá, la'acazi bi raca quiero lao yedyi layu, la'acazi nuti'tezi za' huelè ra'o bizinaquezi, biusanla'adyi' Diuzi ra'o, biyeyudyi yedu nadyè'ènè' ra'o como dan' nacalèro Cristo Jesús, ben' naca Señor quiero, tuže.

9

Ulio Diuzi ben' Israel dza na'te

¹ Tali rnìa' le'e, como naca' ben' queie Cristo, quele yè' rzi'a. Cabè' rnìa' le'e nacan tali, como dan' yu'u pensari queie Bichi Be queie Diuzi lu'u guicho laxta'ohua'. ² Lega rdèbida' queie ben' yedyi quia'. Lega raca bayèchi' lu'u guicho laxta'ohua' por lèjè'. ³ Zua' dispuesto udze'de' Diuzi nè'èdi', zua' dispuesto usanla'adyi' Cristo nè'èdi', zua' dispuesto bi ta gaca quia', chan' gaca tahuen queie yaca ben' yedyi quia'. ⁴ Nacajè' ben' Israel, ben' naca ži'isuba xuzixta'ohua' Jacob. Rlè'è Diuzi leyaquè' ca queie ži'inè'. Uzulè Diuzi leyaquè' dza na'te, blu'enè' leyaquè' yela' huaca quie'. Udixogue'nè' leyaquè' ca unanè' huenè' queijè'. Pca'nnè' guichi ley quienè' lao na'a laguedyijè' Moisés. Gudyinè' lèjè' ca reya'ala' huejè' ta tziõnla'adyi'jè' lèbè'. Yega'nlnè' leyaquè' di'idza' ca huenè' gacalènè' leyaquè'. ⁵ Nacajè' ži'isuba yaca xuzixta'ohua', ben' unita' dza na'. Caora bida Cristo, ben' use'ela' Diuzi, guquè' be'mbyu naquè' ži'isuba yaca ben' Israel. Lèbè' naquè' Diuzi, ben' rnabè' lao yugulu. Naquè' ben' la'ya tuzioli. Amén.

⁶ Pero quele inia' biuzi Diuzi di'idza' ca di'idza' bega'nlnè' ben' Israel. Cala yugulu ben' Israel nacajè' dugalo ben' queie Diuzi. ⁷ Lèscan' cala yugulu ben' Israel nacayaquè' dugalo ži'isuba xuzixta'ohua' Abraham según ca naca di'idza' bega'nle Diuzi Abraham, porque una Diuzi rëbinè' Abraham: "Lao na'a ži'ilo' Isaac huanita' dugalo ži'isubo'." ⁸ Queie lena' reya'ala' tziõne'ero cala yugulu ben' Israel nacayaquè' dugalo ben' queie Diuzi. Balazi ben' Israel, ben' rue queie xti'idza' Diuzi, leyaquè' nacayaquè' dugalo ben' queie Diuzi, dugalo ben' ži'isuba Abraham. ⁹ Porque cani naca di'idza' bega'nle Diuzi Abraham: "Caora babedyin hora, huedena'a luè' huela'ya' žgulo' Sara cuenda hua'anè' xcuidi' quio'." Cana' tziõne'ero naca ben' rue queie xti'idza' Diuzi dugalo ben' queie Diuzi como dan' naca queiyaquè' ca queie Isaac, ben' golo de acuerdo con cabè' di'idza' bega'nle Diuzi Abraham. ¹⁰⁻¹³ Dera mazara di'idza' re'enda' inia' le'e. Caora babgula Isaac, na' bi'a nigula quie' Rebeca xcuidi' guidi'. Na'ra una Diuzi rëbinè' nigula quie' Isaac: "Huanabè' bidao' galo taorupe lao bidao' golo tanèro." Lena' naca de acuerdo con ca una Diuzi cani: "Huella'ya' Jacob, pero bihuella'ya' Esaú." Cana' una Diuzi la'acazi binegalo yaca xcuidi' guidi', binehuejabi' tahuen, binehuejabi' tamala. Lena' ineziro napa Diuzi derecho huella'yanè' nu ben' re'ennè' huella'yanè', biruenè' cuenda la'acazi bèjè' tahuen, la'acazi bèjè' tamala.

¹⁴ ¿Bizi inaro chi'? ¿Inaro birue Diuzi tadya'a? ¿Bireya'ala' inaro birue Diuzi tadya'a! ¹⁵ Porque cani una Diuzi rëbinè' Moisés dza na'te: "Hueyèchi'la'adya' nu ben're'enda' yeyèchi'la'adya'. Idyè'èda' nu ben' re'enda' idyè'èda'." ¹⁶ Queie lena' inia' le'e, cala ra'o huero mandado yeyèchi'la'adyi' Diuzi ra'o, nechan' según ca mandado hue cuinnè' yeyèchi'la'adyi'nè' ra'o. ¹⁷ Lè'è guichi la'ya queie Diuzi rguixogue'n ra'o cabè' una Diuzi gudyinè' ben' naca rey queie nación Egipto dza na'. Cani una Diuzi rëbinè' lèbè': "Baolioga' luè' gaco' rey ta llè'è yugulu benè' ca naca yela' huaca quia', lèscan' ta huebè'jè' nè'èdi' duže yedyi layu." ¹⁸ Queie lena' inia' le'e, cani naca queie Diuzi: Reyèchi'la'adyi'nè' nu ben're'ennè' yeyèchi'la'adyi'nè'. Lèscan' usanla'adyi'nè' nu ben' re'ennè' usanla'adyi'nè'.

¹⁹ Pero le'e inale: "Chi yugulu ta ruero nacan mandado queie Diuzi, na'ra ¿bixquien' rugapa Diuzi ra'o dula' xquia' por nun queie ta ruero rdaro lao yedyi layu? ¿Tu ta re'en Diuzi gaca, bizi huero ta bigacan?" ²⁰ Pero rnaba' le'e, ¿nuži nacaro tzu'uro huedila huenè' lèro Diuzi? Rnìa' le'e, binapa tu yeso' derecho inèn yèbin ben' rue len: "¿Biquien' bzalolo' nè'èdi' cani?" ²¹ Pues napa ben' rue yeso' derecho si'nè' gun', huenè' bitezi yeso' rapanè' gusto huenè'. Con tuzi gun' senè' napè' derecho huenè' yeso' tza'o', o huenè' yeso' corriente.

²² Napa Diuzi derecho idza'nè' huenè' castigo nu ben' reya'ala' gata' castigo queie como dyè'èdi rbeza Diuzi yetza'jè' pensari queijè'. ²³ Cana' bè Diuzi, dyè'èdi ulezanè' queie yaca

ben' unita' dza na'. Cana' blu'enè' ra'o naquè' ben' zela'adyi', ben' reyèchi'la'adyi' ra'o. Desde dza na'te zuè' rbezè' ta udze'nè' xnezi quiero tacuenda idyin dza tzasulèronè' guibá. ²⁴Ulio Diuzi ra'o lao rupa cue'ro len ben' Israel len ben' za'yedyi tula. ²⁵Lècana' rguixogue'n lè'è guichi la'ya quie Diuzi ta bè ben' lao Oseas:

Huabio Diuzi yaca ben' za'yedyi tula ta gacajè' ben' quienè'.

Huadyè'è Diuzi yaca ben' binaca ben' Israel, ben' nunu nadyè'è.

²⁶Lèscan' lèyaca yedyi ga nita' ben' binuebè' Diuzi, ga una Diuzi: "Binacale ben' quia'."

Lèben' na' iyacajè' zì'i Diuzi, ben' neban tuzioli.

²⁷Pero quie ben' Israel una Isaiás caora unè' cani: "La'acazi naca ben' Israel tazègula ca naca yoze de ru'a nisadao', quele yugojè' inaojè' xneza Diuzi, tu chopazijè' inaojè' xneza Diuzi uito usela Diuzi lèjè'". ²⁸Tu sasazi uzu Diuzi di'idza' quienè' huenè' castigo lao duze yedyi layu." ²⁹Lèscan' dza na'te unè' Isaiás cani:

Chi bipca'n Diuzi zì'isubaro lao yedyi layu dza na', babega'nnan bayèchi' gula quiero cabè' bayèchi' gula bega'nnan quie ben' yedyi Sodoma len ben' yedyi Gomorra.

Cabè' naca quie yaca ben' Israel

³⁰¿Ca bi pensari reya'ala' huero? Pues reya'ala' huero pensari de que yaca ben' binaca ben' Israel, ben' birnao guichi ley pca'n Diuzi lao na'a Moisés, pues baguca quiejè' rlè'è Diuzi lèjè' ben' laxta'o yèri nun quie na' rzudyi'ilèjè' Jesús. ³¹Pero netza'n quie ben' Israel. Nernaajè' guichi ley pca'n Diuzi lao na'a Moisés tacuenda ilè'è Diuzi leyaquè' ben' laxta'o yèri. Chan' dula'adyi'yaquè' ruzujè' di'idza' huejè' yugulu ca mandado rue lao guichi ley na', na'ra ilè'è Diuzi leyaquè' ben' laxta'o yèri. Pero bibèyaquè' gan, bibzujè' di'idza' huejè' yugulu con cabè' rna lè'è quichi ley na'. Quie lena' bibèjè' gan ilè'è Diuzi lèjè' ben' laxta'o yèri. ³²¿Bixquien' bibèjè' gan? Pues bibèjè' gan como dan' re'enjè' huejè' cuinzijè' ben' laxta'o yèri. Binezijè' ilè'è Diuzi ra'o ben' laxta'o yèri por nun quie chi rzudyi'ilèro Cristo. Quie lena' naca quiejè' ca quie ben' ucha'o yo, bgudyinè' yu tu neza, bibènè' gan idyinnè' ga zionè'. ³³Lena' rguixogue'n quieyaquè' lè'è guichi la'ya quie Diuzi cani:

Baose'ela' Diuzi zì'inè' lao yedyi quie ben' Israel, pero psebi'jè' lèbè'. Quie lena' raca quieyaquè' ca quie ben' ru'u yo ni'e, bgudyinè' yu tu neza.

Pero nu ben' rzudyi'ilè zì'inè', bigaca bayèchi' quienè', huega'nnè' huen.

10

¹Bicha', du guicho du la'adya' rulidza' Diuzi re'enda' yetza' yaca ben' Israel pensari quieyaquè' gata'yela' neban quiejè' tuzioli. ²Nia' le'e tali na' re'enjè' tzionla'adyi'jè' Diuzi, pero binezijè' bi huejè'. ³Binezijè' bi huejè' ta ilè'è Diuzi lèjè' ben' laxta'o yèri. Na' re'enjè' huejè' cuinzijè' ben' laxta'o yèri. Racajè' pensari chi uzujè' di'idza' ca mandado rue lao guichi ley pca'n Diuzi lao na'a Moisés, cana' ilè'è Diuzi lèjè' ben' laxta'o yèri. ⁴Pero biruejè' ca re'en Diuzi huejè', porque tanun quie dan' inaoero xneza Cristo, cana' ilè'è Diuzi ra'o ben' laxta'o yèri, cala porque dan' uzuro di'idza' ca mandado rue lao guichi ley quienè'.

⁵Na'ra bzu Moisés di'idza' lè'è guichi ta rguixogue'nè' ra'o de quie chi tali uzuro di'idza'ca mandado rue lao guichi ley pca'n Diuzi lao na'anè', chi ni tu lasa bigaparo falta lao dza rdaro lao yedyi layu, na'ra por lena' gun Diuzi ra'o yela' neban tuzioli. Pero nunu yezue hue gan huejè' cana'. ⁶Pero ta gun Diuzi ra'o, gunnè' yela' neban quiero tuzioli tanun quie dan' rzudyi'ilèro Cristo. Biruen zì tzioro guibá txexi'ro Cristo yeyèzinè' gacalènè' ra'o. ⁷Lèscan' biruen zì yeyèziro ga nita' ben' huati txexi'ro Cristo yeguidè' gacalènè' ra'o. ⁸Pero ¿ca bi zì rnan lè'è guichi la'ya? Cani rnan: "Con di'idza' yero lu'u ru'aro, con pensari yu'u lu'u guicho laxta'oro, con lèzin gun Diuzi ra'o yela' neban quiero tuzioli." Lena' rguixogue'ro benè'. ⁹Porque chi inaro naca Cristo xuzi xa'nro zaquè'lao lao benè', chi yu'uro pensari tali na' pseban Diuzi lèbè', na'ra gun Diuzi ra'o yela' neban tuzioli. ¹⁰Cani nacan: Tanun quie dan' yu'u pensari lu'u guicho laxta'oro pseban Diuzi Cristo, quie lena' ilè'è Diuzi ra'o ben' laxta'o yèri. Lèscan' tanun quie di'idza' rero lu'u ru'aro inaro naca Jesucristo xuzi xa'nro zaquè'lao lao benè', quie lena' gun Diuzi ra'o yela' neban tuzioli.

¹¹Lè'è guichi la'ya rguixogue'n rnan caniga: "Nu ben' rzudyi'ilè lèbè', bigaca bayèchi' quienè' huega'nnè' huen." ¹²Pues tuzi ca zaca'ro lao Cristo, la' acazi ben' Israel, la'acazi ben' za'yedyi tula, como dan' naca Cristo xuzi xa'n yuguluro, taže huela'ianè' nu ben' rulidza lèbè'. ¹³Porque tali nacan ca nan lè'è guichi la'ya cani: "Yugulu ben' uzèto laohuè', ben' ina naca Cristo xuzi xa'nnè', hue'nè' leyaquè' yela' neban tuzioli." ¹⁴Pero bisaque' uzètoyaquè' laohuè' inayaquè' naca Cristo xuzi xa'nnè' chi birzudyi'ilèjè' lèbè'. Lèscan' bisaque' sudyi'ilèjè' lèbè' chi binezijè' cabè' bènè'. Lèscan' bisaque' inezijè' cabè' bènè' chi nunu yèbi leyaquè'. ¹⁵Lèscan' bisaque' yèbi benè' leyaquè' chi bizu ben' use'ela' lèjè'. Lècana' nan lè'è guichi la'ya quie Diuzi cani: "Tadya'a gula rue yaca ben' rguixogue' xti'idza' Diuzi."

¹⁶ Pero cala yugulu benè' rue quieyaquè' con cabè' rna Diuzi cuenda hue' Diuzi lèjè' yela' neban tuzioli. Nacan ca una Isaías dza na'te rëbinè' Diuzi: "Tu chopazi benè' rue quieyaquè' di'idza' la'ia' quio' ta yëbindo'ljè'." Cana' unè' rëbinè' Diuzi. ¹⁷ Na'ra nia' le'e, chi yero uzënarago di'idza' la'ia' quie Diuzi, lena' ruen mandado quiero sudyi'ilëro Cristo.

¹⁸ Pero rnaba' le'e tu di'idza': ¿Bizi raca quie ben' Israel? ¿Raca quiejè' binezijè' con cabè' rna di'idza' la'ia' quie Diuzi? Cala raca quiejè' cana'. Claro nezijè' con cabè' rna di'idza' la'ia' quie Diuzi, porque rnan lè'è guichi la'ia' quie Diuzi cani:

Duže yedyi ga rda ben' Israel nu'ayaquè' guichi ga yu'u di'idza' la'ia' quie Diuzi.

¹⁹ Tatula rnaba' le'e: ¿Bi ca nale? ¿Nale binezi ben' Israel de que ulio Diuzi ben' za' yedyi tula ta gacayaquè' ben' quienè'? Pues nezijè', porque dza na'te, dza uda Moisés lao yedyi layu, bzunè' di'idza' lè'è guichi con cabè' una Diuzi rëbinè' ben' Israel cani:

Tanun quie cuioga' ben' za' yedyi tula, ben' binaca ben' Israel ta huela'ia' leyaquè', cana' gacazè'le leyaquè'.

Tanun quie gacalia' ben' tula, ben' nale ben' tondo, cana' idza'le leyaquè'.

²⁰ Lëscan' dza uda Isaías lao yedyi layu, bibdzebinè' bzunè' lè'è guichi con cabè' una Diuzi cani:

Yaca ben' binaca ben' Israel, barnaoyaquè' xneza'.

Yaca ben' binaca ben' Israel, baruela'ia' leyaquè'.

²¹ Lëscan' dza na' una Isaías cabè' bè ja ben' Israel unè' rëbinè' leyaquè': "Yugu dza rëbi Diuzi lèjè', pero yela' yeladyi' quiejè' biruzënaragajè'."

11

Baolio Diuzi bala ben' Israel

¹ Na'ra inaba' le'e: ¿Apsanla'adyi' Diuzi yaca ben' Israel? Pues bipsanla'adyi' Diuzi leyaquè'. Hasta në'èdi' ulio Diuzi naca' ben' Israel. Naca' zico' zi' isuba Abraham. Naca' familia quie Benjamín, ben' uzu tiempote. ² Desde dza na'te beyuebè' Diuzi ben' Israel ulionè' lèjè' gacajè' ben' quienè'. Biusanla'adyi' Diuzi leyaquè'. ¿Binezile con cabè' rnan lè'è guichi la'ia' quie Diuzi ga rguixogué'n quie profeta Elías? Bigala'adyi'le cabè' bè profeta Elías, zuè' ruldzè' Diuzi udaohuè' yaca ben' Israel xquia. ³ Unè' rëbinè' Diuzi: "Xuza' Diuzi, abèti ben' Israel yugulu ben' rguixogué' di'idza' quio'. Apquinuyaquè' labecugo ta nueyaquè' guixi'dao' ga rionla'adyi'yaquè' luè'. Tuza' në'èdi' babega'na'. Lëzi bare'enjè' gutijè' në'èdi'." ⁴ Pero na' una Diuzi gudyinè' lèbè': "Cala tuzo' luè' bega'nlo'. Nenita' igadyi mila ben' naca ben' quia', ben' birionla'adyi' ta pcha'a benè' najè' Diuzi quiejè'." ⁵ Cabè' guca dza na'te, cana' racan na'a. Nenita' tu chopa ben' Israel, ben' du guichi du dula'adyi' rue quie xti'idza' Diuzi. Gusto quie Diuzi baolionè' leyaquè' gacajè'ben' quienè'. ⁶ Porque cala ulio Diuzi lèjè' tanun quie dan' bi cosa bëyaquè'. Chi tali ruzo' luè' bega'nlo' tanun quie bi cosa ruero, lena' huero obligado Diuzi cuionè' ra'o gacaro ben' quiè'. Pero bisaque' huero obligado Diuzi, gusto quienè' rbionè' nu ben' re'en cuionè' gaca ben' quienè'.

⁷ ¿Ca bizi inaro quie ben' Israel? Bibèjè' gan yugulujè' gata' yela' neban quiejè' tuzioli. Yaca ben' ulio Diuzi, lèjè' sí, bèjè' gan. Psanla'adyi' Diuzi yaca los demás ben' Israel, ben' yaladyi'. ⁸ Cana' rguixogué'n lè'è guichi la'ia' quie Diuzi cani: "Yela' yeladyi' quiejè' apchula Diuzi pensari quiejè' ta bitzioñe'ejè' con cabè' rna di'idza' la'ia' quienè'. La'acazi rlè'èjè' dyè'èdi, ruejè' ca ben' birlè'è. La'acazi reyaquè' dyè'èdi, ruejè' ca ben' bire. Cana' raca quiejè' hasta na'adza." ⁹ Lëscan' quie ben' Israel una rey David dza na' con cabè' rnèn cani:

Ruen zudyi quie ta de quiejè'.

Con ta raxejè' gaojè' yo'ojè', con ta raxejè' huejè', lèlena' udyiagui'n leyaquè'.

Lèlena' uca'nnan leyaquè' mala lao Diuzi, huenè' lèjè' castigo.

¹⁰ Huechula laoyaquè' ta biilè'èyaquè' tuzioli.

Lëscan' gacajè' bego tuzioli.

Cana' una rey David dza na'te.

¹¹ Na'ra inaba' le'e: ¿Yela' yeladyi' quie ben' Israel apsanla'adyi' Diuzi leyaquè' tuzioli? Cala tuzioli apsanla'adyi' Diuzi leyaquè'. Pero racalè Diuzi ben' binaca ben' Israel ta hue quieyaquè' xti'idzè', na' gata' yela' neban quiejè' tuzioli cuenda ilè'è ben' Israel cabè' tahuen na' raca quie ben' binaca ben' Israel. Cana' huenan quie ben' Israel inaojè' xneza Cristo gata'rè yela' neban quiejè' tuzioli. ¹² Tahuen guca quie ben' binaca ben' Israel caora uquixi ben' Israel bibè quiejè' xti'idza' Diuzi. Pero huacara huen gula quie ben' binaca ben' Israel caora idyin dza inao yaca ben' Israel xneza Cristo, na' gata' yela' neban quiejè' tuzioli.

¹³ Pero re'enda' inia' le'e itu di'idza', le'e ben' binaca ben' Israel. Pues tanun quie dan' use'ela' Diuzi në'èdi' ta quixogui'a le'e xti'idza' Diuzi, lena' nacan belao ca dyin quie Diuzi

rua'. ¹⁴ Cana' rëpa' ben' Israel, ben' yedyi quia', cuenda huenan quieyaquë' inoayaquë' xneza Cristo cabë' rnaole le'e, na' gata'rë yela' neban quiejë' tuzioli. ¹⁵ Caora blë'ë Diuzi bire'en ben' Israel inoayaquë' xneza Cristo, na'ra udiloguë' yaca ben' za' yedyi tula, yaca ben' re'en inao xneza Cristo. Pero cala bire'en Diuzi inao ben' Israel xneza Cristo. Lega re'en Diuzi inaojë' xneza quienë'. Lega yedaohue Diuzi caora idyin dza inao yaca ben' Israel xneza Cristo. Lëdza na' gaca quiejë' ca quie ben' baguti beban tatula. ¹⁶ Chi banuela'iya Diuzi yëzo yëta xtla ta gaca pan, lëscan' naca la'iya pan ta bro lu'u horno. Lëscan' cana' nacan quie nu yaga. Chi banuela'iya Diuzi lue yaga, lëscan' naca la'iya taca' yaga. Lëscan' nacarë quie nu Israel. Chi bë xuzixta'ojë' quie Diuzi, lëscan' idyin dza hue zico' zi'isubajë' quie Cristo.

¹⁷ Naca yaca ben' Israel ca quie tu yaga olivo. Naca bala ben' Israel ca quie taca' yaga olivo. Yela' yeladyi' quiejë' baochugu apanla'adyi' Diuzi lëjë', pero baozi' Diuzi le'e, ben'za' yedyi tula. Banaca quiele ca quie taca' yaga guixi' nadilaten yaga olivo. Cana' gaca huen quiele, na' huaca yezi'le fuerza quie Diuzi cabë' rezi' taca' yaga fuerza quie luen. ¹⁸ Pero bihuele cuinle ben' ze dan' baochugu Diuzi taca' yaga olivo, bë Diuzi quiele ca quie yaga nadilaten yaga olivo. Bigala'adyi'le cala por nun quie le'e nezi' lue yaga fuerza, dechan' por nun quie lue yaga nezi'le le'e fuerza.

¹⁹ Durpene yëbile në'ëdi': "Hue'encazi, pero baochugu Diuzi taca' yaga olivo tacuenda gaca nëto' ben' quienë' lao laza ben' Israel." ²⁰ Pero rëpa'le'e: "Baochugu Diuzi taca' yaga olivo, inaro ben' Israel, como dan' psebi'jë' Cristo. Pero le'e, ben' binaca ben' Israel, por nun quie dan' barnaole xneza Cristo nacalële Diuzi tuze. Quie lena' gapale cuidado bihuele cuinle ben' ze. ²¹ Cana' nacan porque bibezi'ze Diuzi nu ben' Israel, dan' psebi'jë' Cristo. Na'ra lëcana'zi huaca bisizë Diuzi nu ben' za' yedyi tula chi biinaojë' xneza Cristo. ²² Na' ulehuecara pensari ca naca yela' ben' huen quie Diuzi. Pero lëscan' naca Diuzi ben' de pensari. Dyë'ëdi rna'në' huenë' castigo nu ben' bire'en hue quie di'idza' quië'. Pero le'e, taZe bagualë Diuzi le'e. Pero ruen zi inaole xneza Diuzi gapalenë' bala'ana, porque chi bihuele quiele di'idza' quië', lëscan' le'e, hue Diuzi le'e castigo. ²³ Porque chi ye utza' ben' Israel pensari quiejë' inaojë' xneza Cristo, na'ra yezi' Diuzi lëjë' utlanë' lëjë' yaga olivo tatula. Decazi yela' huaca quie Diuzi huenë' cabë' re'ennë' huenë'. ²⁴ Pues ulio Diuzi le'e gacale ben' quienë', la'acazi nacale ca quie tu yaga guixi', la'acazi binacale ben' Israel, pero mazara gue'en Diuzi ben' Israel gacajë' ben' quienë' utlanë' lëjë' yaga olivo tatula.

Huadyin dza inao yaca ben' Israel xneza Cristo

²⁵ Re'enda' inia' le'e tu di'idza' con cabë' baodixogue' Diuzi në'ëdi' cuenda inezile cabë' gaca, na' bihuele cuinle ben' ze. Tali na' apanla'adyi' Diuzi bala ben' Israel tanun quie yela' yeladyi' quiejë'. Pero caora abeya ben' re'en inao xneza Cristo, ben' za' yedyi tula, na'tera yezulao Diuzi yeyuenë' ben' Israel tuze tatula. ²⁶ Lëdza na' sulao inao yugulu ben' Israel xneza Cristo. Cana' rguixogue'n lë'ë guichi la'iya quie Diuzi cani: Lado ben' Israel huario tu ben' yedyi quiejë', ben' uziõne'e lëjë'. Lëben' na' yegubë' tamala quie ben' Israel.

²⁷ Cana' uzu Diuzi di'idza' con cabë' di'idza' bega'nlënë' xuzixta'o ben' Israel unë' yezi'zenë' dula' quieyaquë'.

Cana' rnën lë'ë guichi la'iya quie Diuzi.

²⁸ Pero na'a barue ben' Israel condre Diuzi. Biralejë' guti Cristo lë'ë yaga cruzo cuenda gata' yela' neban quiejë' tuzioli. Pero como biralejë', lena' rguilo Diuzi le'e, ben' za' yedyi tula, nu le'e re'en inao xneza Cristo. Pero nadyë'ëcazi Diuzi ben' Israel. Lena' ulionë' xuzixta'ojë' gacajë' ben' quienë'. ²⁹ Uzu Diuzi di'idza' quienë' cabë' unanë' huenë'. Como ulio Diuzi ben' Israel gacajë' ben' quienë', lena' biusanla'adyi'në' leyaquë' tuzioli. ³⁰ Lële'e, ben' binaca ben' Israel, bibë quiele quie Diuzi dza na'te, pero caora uru'un ben' Israel Cristo tzala'la, na'ra bezulao Diuzi yeyuenë' le'e tuze beyëchi'la'adyi'në' le'e. ³¹ Na'ra cala le'e, nechan' yaca ben' Israel, lëleyaquë' birue quiejë' quie Diuzi. Pero huadyin dza yeyëchi'la'adyi' Diuzi ben' Israel tatula cabë' beyëchi'la'adyi'në' le'e. ³² Porque tuzi ca bë Diuzi, baochugulinë' de dula' xquia quie yuguluro. Na'ra quie lena' tuzi ca huenë', yeyëchi'la'adyi'në' yuguluro.

³³ Biyeyudyi yedu yela' rioñe'e, yela' nezi quie Diuzi. Bisaque' huebë'ro duzete ca naca pensari quienë', ca naca xnezë'. ³⁴ ¿Nuzi saque' tziõne'e duzete pensari quie Diuzi? ¿Nuzi saque' usëdi lëbë'? ³⁵ Nunu saque' yëbi Diuzi: "Tu cani reya'alo' quia'." ³⁶ Porque bzalo Diuzi yugulu ta de, yela' na' yugulu ta de nacan quienë'. Ben' ze, ben' bala'ana naca Diuzi tuzioli. Amén.

¹ Na'ra, bicha', babeyëchi'la'adyi' Diuzi le'e. Quie lena' du guicho du la'adya' inia' le'e reya'ala' tzesanle cuinle lao Diuzi, huele cuinle ca gun quie Diuzi ta biyeyula yelen. Gacale ben' naca la'iya, cana' yeyula'adyi' Diuzi le'e. Cana' reya'ala' huele tzionla'adyi'le Diuzi. ² Bireya'ala' yenaole pensari mala quie ja ben' nita' lao yedyi layu. Reya'ala' yetza'le pensari quiele, yenaole xneza Diuzi cuenda yetza'n'an quiele yugulu ca ruele. Cana' inezile ca re'en Diuzi huele, porque ca re'en Diuzi huero nacan ta gacalën ra'o, nacan ta yeyula'adyi'në' ra'o, nacan tadya'a gula.

³ Yela' ben' huen quie Diuzi ulionë' në'ëdi' ta uzioñe'eda' le'e. Lena' inia' le'e bireya'ala' huele cuinle ben' ze. Du guicho du la'adyi'le reya'ala' huele pensari dya'a según cabë' nue Diuzi quie quiele barue quiele xti'idza'në'. ⁴ Porque cani nacan: Tuzi cuerpo quiero naca, pero taže netza' tu tu parte quien, taže netza' dyin quie quien. ⁵ Lëscan' cana' naca quie ra'o ben' nao xneza Jesús. La'acazi nacaro ben' zë, nacaro tu cue' ben' nacalë Cristo tuže. La'acazi netza' dyin quie Diuzi huero quie quiero, naca yuguluro tuže.

⁶ Netza' ta banegun Diuzi quiero tu turo. Reya'ala' huero dyin dya'a según ta banegun Diuzi quiero tu turo. Chi banegun Diuzi quiero uzioñe'ero benë' con cabë' rna di'idza' la'iya quienë', na'ra lena' reya'ala' huero según cabë' nue Diuzi quie quiero barue quiero xti'idza'në'. ⁷ Chi banegun Diuzi quiero gacalëro benë', na'ra reya'ala' gacalërojë' dyë'ëdi. Chi neziro uzioñe'ero benë' con cabë' rna xti'idza'Diuzi, cana' reya'ala' huero. ⁸ Chi neziro hue'ro benë' di'idza' zela'adyi', cana' reya'ala' huero. Chi de dumi quiero, reya'ala' gacalëro benë', bihuero cuenda chi yeyuejë' laohue. Chi neziro udze'ro xnezi bi dyin hue ja benë', cana' reya'ala' huero du guicho du la'adyi'ro. Chi neziro yeyëchi'la'adyi'ro ben' yëchi', cana' reya'ala' huero du guicho du la'adyi'ro, bihuerojë' stu'.

Ni rguixogue'n cabë' reya'ala' hue ben' nao xneza Cristo

⁹⁻¹⁰ Bireya'ala' idyë'ëro laguedyiro de ladzazi, pero du guicho du la' adyi'ro reya'ala' idyë'ëro ben' bichiro, ben' nacalëro Cristo tuže. Puro tadya'a reya'ala' huero, bihuero tamala. Reya'ala' gaparo laguedyiro bala'ana yuguluro.

¹¹ Bireya'ala' huero yela' huëdi, den' dula'adyi'ro reya'ala' huero dyin. Lëscan' dula'adyi'ro reya'ala' huero cabë' mandado re'en Diuzi huero.

¹² Reya'ala' suro contento cuezaro dyë'ëdi dza yezi' Diuzi ra'o. Reya'ala' si'zero biidza'ro cati raca zëdi quiero. Bireya'ala' usanro ulidzaro Diuzi.

¹³ Reya'ala' gacalëro laguedyiro ben' nao xneza Cristo, ben' bide quie. Reya'ala' gapachi'ro nu ben' za' zan yu'u quiero.

¹⁴ Reya'ala' yëbiro Diuzi huela'iyane' nu ben' za' rdila rnë len ra'o. Bireya'ala' udze'de'ro benë'.

¹⁵ Reya'ala' yedaohuelëro laguedyiro cati raca tadya'a quieyaquë'. Reya'ala' yeyëchi'la'adyi'lëro laguedyiro cati raca tazëdi quieyaquë'.

¹⁶ Reya'ala' huero tuže yuguluro. Bireya'ala' yezë'ro laguedyiro. Bireya'ala' huero yaladyi' ben' yëchi'. Bireya'ala' huero cuinro ben' ze.

¹⁷ Bireya'ala' gacalëro lëbi ben' mala. Reya'ala' huero bala tzu'ulëro laguedyiro dyë'ëdi.

¹⁸ Por tu parte quiero, huero bi huero tacuenda nita'lëro yugulu benë' dyë'ëdi, ta bibi zëdi gata'. ¹⁹ Na'ra bicha', nedyë'ëda' le'e, inia' le'e bireya'ala' yeyuero laohue quie ben' mala. Naoyubi Diuzi bi huenë' quie ben' mala. Cana' rguixogue'n lë'ë guichi la'iya quie Diuzi de que nacan cuenda quie Diuzi huenë' benë' castigo, cala ra'o. Cana' una Diuzi. ²⁰ Lëscan' una Diuzi de que chi rdue ben' rudie ra'o, reya'ala' hue'rojë' ta gaojë'. Chi rbilijë', reya'ala' hue'rojë' ta yo'ojë', porque chi huero cana', huacabë'jë' nacaro ben' huen yeduejë'. Cana' una Diuzi. ²¹ Bihue'ro lato hue tamala ra'o gan, reya'ala' huero gan lao tamala, huero puro tahuen.

13

¹ Yuguluro reya'ala' uzuro di'idza' cabë' mandado rue nu ben' quie gobierno, porque Diuzi ulëchinë' ben' quie gobierno. Bizu ben' quie gobierno chan' biulëchi Diuzi lëbë'. ² Nu ben' biruzu di'idza' cabë' mandado rue ben' quie gobierno, na' rutenë' contra Diuzi, de dula' xquia quienë', hue Diuzi lëbë' castigo. ³ Birdzebi ben' rue tadya'a ben' quie gobierno. Pero sí, rdzebi ben' rue tamala ben' quie gobierno dan' gata' castigo quiejë'. Chi re'enro suro contento, chi re'enro birdzebiro ben' quie gobierno, na'ra reya'ala' taro dula'adyi'ro huero tahuen. Cana' gacabë' ben' quie gobierno nacaro ben' huen. ⁴ Cana' reya'ala' huero como dan' ulëchi Diuzi gobierno ta gaca huen quiero. Chi birdaro dula'adyi'ro bihuero tahuen, reya'ala' yeyuero pensari quiero como dan' naca cuenda quie gobierno huejë' ra'o castigo. Mandado quie Diuzi na' rue gobierno mandado gaca castigo ben' rue tamala. ⁵ Quie lena' reya'ala' uzuro di'idza' cabë' mandado rue nu ben' quie gobierno, no solamente ta bigata' castigo quiero, pero lëscan' como dan' nacan tahuen, nacan ta reya'ala' huero.

⁶ Quie lena' reya'ala' quizuro impuesto como dan' rue ben' quie gobierno mandado quie Diuzi cabè' dyin ruejè'.

⁷ Reya'ala' quizuro chi zu ta reya'ala' quizuro. Reya'ala' quizuro dumi ta rtupa ben' yedyi. Reya'ala' quizuro impuesto quie gobierno. Reya'ala' gapala'nro yugulu ben' rnabè'. ⁸ Chi zu ta reya'ala' quizuro quie benè', reya'ala' useyudyiro quizuron. Pero bireya'ala' usanro idyè'ëro laguedyiro. Chi nedyè'ëro laguedyiro, con lèzin babzuro di'idza' cabè' mandado rue lao guichi ley quie Diuzi yuguluten. ⁹ Lè'è guichi ley quie Diuzi rguixogue'n ra'o de que bireya'ala' gasilèro nigula quie ben' tula. Lèscan' quie nigula, bireya'ala' gasilènè' be'mbyu tula. Bireya'ala' gutiro benè', bireya'ala'cuanro quie benè', bireya'ala' si'ro benè' yè', bireya'ala' sa'la'adyi'ro ta de quie benè'. Cana' rnan lè'è guichi ley quie Diuzi. Pero lèscan' rguixogue'n ra'o de que reya'ala' idyè'ëro benè' cabè' nadyè'ëro cuinro. Chi huero cana', banaca quiero babzuro yugulu di' idza' cabè' mandado rue Diuzi lè'è guichi ley quienè'. ¹⁰ Chi nadyè'ëro benè', bihuerojè' mala. Cana' huero uzuro di'idza' dyè'ëdi ca mandado rue Diuzi lè'è guichi ley quienè'.

¹¹ Como cana' nacan, reya'ala' huero pensari ca tu dza rdaro lao yedyi layu. Reya'ala' huebè'ro abdyn hora yeyu'uro pensari dyè'ëdi, como dan' barueran bago dza yezi' Diuzi ra'o, cala ca dza na'te, dza uzulaoro inaoro xneza Cristo. ¹² Ilè'è'ti'zi rdziogue iyudyi dza rdaro lao yedyi layu idyin dza yezi' Diuzi ra'o. Quie lena' bireya'ala' huero tamala ca ben' rda lao lato lao chula. Reya'ala' biidzebiro suro listo sèraro ca zè soldado, ben' napa fuerza, ben' rda te dza. ¹³ Reya'ala' taro dyè'ëdi ca ben' rda te dza. Bireya'ala' taro huero hue'e. Bireya'ala' taro ga ruejè' lani, ga ruejè' ru'be, ga ruejè' huedila. Bireya'ala' talèro nigula con ganzi. Bireya'ala' taro quiloro zèdi quiloro dila. ¹⁴ Reya'ala' taro yenaoro tuze Jesucristo dyè'ëdi. Bitaro huero ta rnazin quiero.

14

Bireya'ala' inèbizoro laguedyiro ben' nao xneza Jesús

¹ Reya'ala' hue'lèle ben' zaozulao inao xneza Jesús di'idza' zela'adyi'. Bitzu'ule huedila huenè tu ta binaca. ² Por ejemplo, bala ben' nao xneza Jesús rnajè' ru'en lato gaoro biti'tezi ta de. Na' ibala ben' nao xneza Jesús, ben' zaozulao inao xnezanè', rnajè' bireya'ala' gaoro bè'èla'. Quie lena' puro yèza cuan gaojè'. ³ Na' yaca ben' rao biti'tezi ta de, bireya'ala' ilè'èyaquè' mala ben' rao puro yèza cuan. Bireya'ala' inèbizoyaquè' laguedyijè' como dan' rupa cue'jè' nacajè' ben' nao xneza Jesús. ⁴ ¿Nuži bè le'e mandado inèbizole laguedyile, ben' naorè xneza Diuzi? Nacan cuenda quie xa'njè' chi ruejè' tahuen, chi ruejè' tamala, cala cuenda quiele. Pero huacacazi huen quiejè', como dan' de yela' huaca quie Diuzi ta uca'nnè' lèjè' huen.

⁵ Re'enda' inia' le'e itu ejemplo: Yu'u bala ben' nao xneza Jesús rnayaquè' tuzi dza naca la'iya tzion'la'adyi'ro Diuzi, cala biti'tezi dza nacan dza huen tzion'la'adyi'ro Diuzi. Quie quiele reya'ala' huele pensari inezile dyè'ëdi ta huele cabè' reya'ala' huele. ⁶ Na'ra quie ben' rna tuzi dza naca la'iya tzion'la'adyi'ro Diuzi, cala yugu dza nacan huen, ruejè' cana' ta gapala'njè' Cristo. Lèscan' yaca ben' rna biti'tezi dza nacan dza huen tzion'la'adyi'ro Diuzi, ruejè' cana' ta gapala'nrejè' Cristo. Na'ra quie ben' rna ru'en lato gaoro biti'tezi ta de, na' ruejè' cana' ta gapala'njè' Cristo. Lèscan' ben' rao puro yèza cuen, na' ruejè' cana' ta gapala'nrejè' Cristo, na' yèbijè' Diuzi diuxcalelo'.

⁷ Ni tu ra'o binita'ro tuzi cabè' nita'ro lao yedyi layu. Ni tu ra'o bigatiro tuzi cabè' gatiro lao yedyi layu. Zu Cristo rna' ruhuanè' ra'o. ⁸ Chi zuro nabanro lao yedyi layu, na' zuro nabanro ta gapala'nro Cristo. Lèscan' chi gatiro yeyoro guibá, na' gatiro yeyoro guibá ta gapala'nro Cristo. La'acazi nabanro, la'acazi gatiro, pero nacaro ben' quie Cristo. ⁹ Cana' nacan como aguti Cristo bebannè' naquè' xuzi xa'n yugulu benè', la'acazi ben' neban, la'acazi ben' huati.

¹⁰ Pero le'e, ¿bixquien' rnèbizole ben' bichile ben' nao xneza Jesús? ¿Bixquien' rezè'le laguedyile? Pues yuguluro naca quiero yedyinro lao Cristo huero cuenda cabè' bèro, chi bèro tahuen, chi bèro tamala. ¹¹ Lena' rguixogue'n lè'è guichi la'iya quie Diuzi cabè' unanè' cani:

Como nacan tali nabana', lèscan' nacan tali idyin dza quitzu žibi yugulu benè' laohua', hueyaquè' nè'èdi' ben' ze.

Cana' una Diuzi dza na'te. ¹² Cana' nacan huadyin dza quie quiero huero cuenda lao Diuzi cabè' bèro dza udaro lao yedyi layu.

Reya'ala' inaoro neza dya'a

¹³ Quie lena' bireya'ala' inèbizoro laguedyiro. Mejorla huero pensari inaoro neza dya'a cuenda biiquixi laguedyiro huejè' tamala por dula' quiero. ¹⁴ Na'ra quie bè'èla', cala

cuinnan nacan zudyi nu gao len. Lena' banezda' dyè'èdi como naca' ben' nao xneza xa'nro Jesús. Pero chi rue bala benè'pensari naca zudyi gaojè' bè'èla', na'ra para lèjè' sí, binacan huen gaojè'n, como dan' raquejè' zudyi nacan gaojè'n. ¹⁵ Chi por nun quie dan' re'enro gaoro bi cosa utèbiro pensari quie yaca bi' bichiro, ben' nao xneza Jesús, na'ra lena' rulu'en rdziogue idyè'èro yaca ben' bichiro. Bihuero ta yega'n yaca ben' bichiro mala lao Diuzi por nun quie dan' re'enro gaoro bi cosa. ¹⁶ Biutèbiro pensari quie bichi laguedyiro, ben' nao xneza Jesús. Bihuero bi cosa re'enro huero, la'acazi naparo derecho hueron, la'acazi neziro cala tamala chi hueron. ¹⁷ Binacan belao bi ta gaoro, bi ta yo'oro. Pero tabelao na' inaro tuzi pensari dya'a. Tabelao na' cue' chizi laxta'oro, suro contento tanun quie dan' yu'u lu'u guicho laxta'oro pensari quie Bichi Be quie Diuzi. ¹⁸ Redaohue Diuzi nu ben' rue cana', ben' nao xneza Cristo dyè'èdi. Lèscan' hualè'è yaca benè' lèbè' ben' huen.

¹⁹ Cana' huero seguir inaoro huero tadya'a cuenda na' cue' chizi laxta'oro, gacalèro laguedyiro ta tzioñe'ejè' mazara con cabè' rna xti'idza' Diuzi. ²⁰ Binaca huen te cana'zi dyin quie Diuzi por nun quie bi ta re'enro gaoro. Banezcaziro baben Diuzi lato gaoro yugulu ta de ta gaoro. Pero tamala na' gaoro bi cosa chi por lena' utèbiro pensari quie laguedyiro yela' na' huejè' ta bireya'ala' huejè'. ²¹ Mejorla biyo'oro bigaoro bi cosa, bihuero bi cosa chi por lena' utèbiro pensari quie ben' bichiro, ben' naorè xneza Jesús, yela' na' huenè' tu ta bireya'ala' huenè'. ²² Reya'ala' gaparo cuidado cabè' ruero cuinro lao Diuzi. Bihuero cuinro ben' ze nun que nacaro ben' quie Diuzi. Tahuen na' naca quiero chi bigao pensari quiero ra'o xquia cabè' ta ruero. ²³ Chi neziro nacan xquia tu ta inan quiero huero, na' bireya'ala' hueron. Nacan xquia quiero chi hueron. Lèscan' reya'ala' ineziro dyè'èdi chi nacan huen, na' hueron. Chi neziro dyè'èdi binacan huen, mejorla bihueron como dan' nacan xquia quiero chi hueron.

15

Huero tahuen quie laguedyiro cala para ra'ozi

¹ Ra'o, ben' bazio tiempo nao xneza Cristo, reya'ala' gacalèro laguedyiro, ben' zaozulao inao xneza Cristo. Naca cuenda quiero gacalèrojè' huero tahuen quiejè', cala para ra'ozi. ² Yuguluro reya'ala' huero tahuen quie laguedyiro, reya'ala' gacalèrojè' tzioñe'eyaquè' mazara, na' huebè'jè' Diuzi hue quiejè' xti'idza'nè'. ³ Cana' reya'ala' huero como dan' Cristo bibè'nè' huen para cuinzinè', pero lèscan' bènè' huen para yugulu benè'. Guca quienè' cabè' rguixogue'n lè'è guichi la'ya quie Diuzi de que nu ben' rutasi runio Diuzi, lèscan' rutasi runiorènè' Cristo. Cana' rnèn lè'è guichi. ⁴ Na' rnia' le'e, yugulu ca di'idza' bzuyaquè' lè'è guichi la'ya quie Diuzi dza na'te, nacan ta gacalèn ra'o ta tzioñe'ero mazara Diuzi. Lèscan' nacan ta uxela'adyi'n ra'o ta cuezaro dyè'èdi dza yezi' Diuzi ra'o biyeyatiro. ⁵ Rulidza' Diuzi gacalènè' le'e tzu'ulèle laguedyile dyè'èdi ca reya'ala'huele le'e, ben' nao xneza Cristo. Naca Diuzi ben' racalè ra'o cuezaro dyè'èdi. Naca Diuzi ben' ru'elè ra'o di'idza' zela'adyi'. ⁶ Cana' naca quiero cuenda yuguluro huero tuze gaparo Diuzi bala'ana. Naca Diuzi xuzi xan' Señor quiero Jesucristo.

Lèscan' bida Cristo lao yedyi layu cuenda inao yaca ben' binaca ben' Israel xnezanè', na' gapajè' Diuzi bala'ana

⁷ Reya'ala' huelèro laguedyiro tuze cabè' bèlè Cristo ra'o tuze. Cana' gapala'nro Diuzi bala'ana. ⁸ Pero rnia' le'e, bida Cristo lao yedyi layu ta gacalènè' ben' Israel, na' uzunè' di'idza' cabè' di'idza' bega'nè' Diuzi xuzixta'ohua' dza na'te. Bidè' ta ilè'è ben' Israel naca Diuzi ben' ruzu di'idza'. ⁹ Lèscan' bida Cristo lao yedyi layu cuenda inao yaca ben' binaca ben' Israel xnezè', na' gapajè' Diuzi bala'ana tanun quie dan' beyèchi'la'adyi' Diuzi leyaquè'. Lena' rguixogue'n lè'è guichi la'ya quie Diuzi cani:

Quie lena' gapa yaca ben' za' yedyi tula Diuzi bala'ana.

Quie lena' gulayaquè' himno ta gapala'njè' lèbè'.

¹⁰ Lèzi zu itu cue' lè'è guichi la'ya ga rguixogue'n cani:

Reya'ala' yedaohuele le'e, ben' za' yedyi tula, len le'e, ben' Israel, ben' quie Diuzi.

¹¹ Lèzi zu itu cue' lè'è guichi la'ya ga rguixogue'n cani:

Ulegapa Diuzi bala'ana yugulu le'e, ben' za' yedyi tula.

Ulequixogue' yaca benè' ca ben' ze naca Diuzi yugulu le'e, ben' binaca ben' Israel.

¹² Lèscan' Isaías, ben' uzu dza na'te, bzunè' di'idza' lè'è guichi de que:

Hualo tu Zi'i suba Isái.

Lèbè' gaquè' rey inabè'nè' lao yaca ben' binaca ben' Israel.

Sudyi'iléyaquè' lèbè' ta uca'nne'yaquè' huen lao Diuzi.

Cana' rnan lè'è guichi na'.

¹³ Na'ra në'èdi' rulidza' Diuzi, ben' nuxela'adyi' ra'o, ta tzu'ule gusto cue' chizi laxta'ole como dan' barue quiele xti'idza'nè'. Lèscan' rulidza'nè' ta gaca zela'adyi' dyè'èdi guicho laxta'ole tanun quie dan' baoyu'ule pensari quie Diuzi.

¹⁴ Na'ra bicha', banezda' dyè'èdi nacale ben' huen, ben' rioñe'e. Nezile uzioñe'ele usèdile laguedyile, ben' nao xneza Cristo. ¹⁵ Cabè' di'idza' bzua' lè'è guichi ni, biberugueda' inia' le'e cabè' reya'ala' tziõe'ele cuenda bigalala'adyi'le cabè' unia' le'e. Cana' bia' por nun quie mandado pca'n Diuzi lao na'a, use'elè' në'èdi' ¹⁶ tzaya' dyin quie Cristo entre yaca ben' binaca ben' Israel. Nacan mandado hua' tzetixogui'ajè' xti'idza' Diuzi cuenda hue quieyaquè' xti'idzè', yela' na' gata' yela' neban quiejè' tuzioli, na' yedyinyaquè' dyè'èdi lao Diuzi. Cana' yezi' Diuzi lèjè', na' nacajè' ben' la'ya, ben' yu'u pensari quienè' lu'u guicho laxta'ohue.

¹⁷ Como naca' ben' quie Cristo Jesús, redaohueda' bia' ca mandado bè' Diuzi në'èdi'. ¹⁸ Re'enda' inia' le'e cabè' bè'la'ya Cristo në'èdi' bia' cabè' mandado bènè' në'èdi'. Lèzin inia' le'e cala bila di'idza' inia' le'e. Gucalè' Cristo në'èdi' udxogui'a ben' binaca ben' Israel xti'idza' Diuzi, na'tera barue quieyaquè' xti'idza'nè'. ¹⁹ Cana' bia' udxogui'ajè' xti'idza' Diuzi, bia' yela' huaca quienè', gucalè' Bichi Be quienè' në'èdi'. Cana' bia' apseyudya' bia' mandado udxogui'a benè' xti'idza' Diuzi. Cana' bia' udxogui'a yaca ben' ciudad Jerusalén xti'idza' Diuzi. Lagazi cana' babia', baoya' hasta ga rzulao yu nebaba Ilírico. ²⁰ Cana' bia', bia' bala, uya'a yedyi ga binenezijè' chi zu Cristo udxogui'ajè' xti'idza' Diuzi. Cana' bia' cuenda tza'a yedyi tula ga nunu netzio tzetixogue' xti'idza' Diuzi. ²¹ Pero mejorla hua' seguir con cabè' rnan lè'è guichi la'ya quie Diuzi cani:

Huanezi yaca ben' binenezi quienè'.

Huayõe'e yaca ben' binetziõe'e quienè'.

Bè Pablo pensari tziogué' ciudad Roma

²² Quie lena' biuzaque'da' guida' idena'a le'e como dan' bibènan lato la'acazi gu'unda' guida'. ²³ Pero como abeyudyi compromiso napa' conlè yaca yedyi ga baodia', lèscan' como bazio zè iza raca' pensari guida' ideyuba' le'e, ²⁴ quie lena', caora tza'a nación España, cana' re'enda' tia' ciudad quiele. Na' rapa' gusto yega'na' sulia' le'e ga'aca tu ta gunnan lato. Yeyudyi na', chi huele cule, gacalè'le në'èdi' tzu'a neza tatula tza'a España. ²⁵ Pero na'a raoyen yeya'a ciudad Jerusalén tzehua'a lè'èti' dumi ta gacalén yaca ben' bichiro, ben' nao xneza Jesús nita' na'. ²⁶ Cana' re'ennan hua', como dan' yaca ben' nao xneza Jesús nita' yu nebaba Macedonia, len yaca ben' nao xneza Jesús nita' yedyi Acaya, bauptajè' dumi ta ise'ela'yaquè'n quie ben' yèchi', ben' nao xneza Jesús nita' ciudad Jerusalén. ²⁷ Redaohue ben' ptpua dumi como nezuyaquè' nacan tahuen gacalèjè' laguedyijè', ben' nao xneza Jesús. Na'ra yu'un xnezi ta ruejè', porque rueyaquè' ta reya'ala' hueyaquè' quie ben' nita' ciudad Jerusalén. Cana' nacan, como dan' lao na'a ben' nita' ciudad Jerusalén barue quieyaquè' xti'idza' Diuzi barnaoyaquè' xneza Cristo. Na'ra lèjè' sí, reya'ala' gacalèjè' ben' nita' ciudad Jerusalén con ta de quieyaquè'. ²⁸ Caora abeyudyi yehua'a dumi lao yaca ben' nao xneza Cristo nita' ciudad Jerusalén, na'ra tza'a España tia' ideyuba' le'e. ²⁹ Nacan tali tuze huela'ya Cristo ra'o caora idyina' yedyi quiele.

³⁰ Bicha', re'enda' gacalè'le në'èdi'. Re' enda' huero tuze huero ca re'en Diuzi huero du guicho du la'adyi'ro. Chi huele cule, ulidzale Diuzi por në'èdi'. Laohue xa'nro Jesucristo rnaba' le'e ulidzale Diuzi por në'èdi'. Lèscan' como dan' nadyè'èle në'èdi' cabè' bzioñe'e Bichi Be quie Diuzi le'e, rnaba' le'e ulidzale Diuzi por në'èdi'. ³¹ Ulidzale Diuzi ta ucuaa ucui'onè' në'èdi' quie tamala re'en hue yaca ben' nita' estado Judea quia', ben' binao xneza Cristo. Lèscan' ulidzale Diuzi para yaca ben' nita' ciudad Jerusalén, ben' nao xneza Cristo, ta si'yaquè' në'èdi' dyè'èdi' gacalia'yaquè'. ³² Cana' rnaba' le'e ulidzale Diuzi por në'èdi' cuenda idyina' dyè'èdi' idena'a le'e sua' contento yezila'adya' tu chi'. ³³ Rulidza' Diuzi, ben' cuèchi chizi laxta'oro, ta ina' ihuanè' yugulule. Amén.

16

Rugapa Pablo diuzi yaca ben' nao xneza Jesús

¹ Redaohueda' idyin ben' zanro Febe yedyi quiele. Taze racalènè' ben' nao xneza Cristo nita' yedyi Cencrea. ² Si'le lèbè' dyè'èdi' ca rue ben' nao xneza Cristo. Gacalènè' tu ta rdzioguenè', porque ben' zè bagucalènè'. Lèscan' bagucalènè' në'èdi'.

³ Ugapale diuzi Priscila len Aquilo. Nacayaquè' ben' compañero quia'. Aracalèyaquè' në'èdi' ruendo' dyin quie Cristo Jesús. ⁴ Bibdzebiyaquè' gatiyaquè' gucalèjè' në'èdi' caora aruen žudyi guti yaca benè' në'èdi'. Quie lena' inia' diuxcaleyaquè' gucalèjè' në'èdi'. Pero cala tuza' në'èdi' inia' diuxcaleyaquè', lèscan' yugulu ben' nao xneza Cristo, ben' binaca ben' Israel, inajè' diuxcaleyaquè'. ⁵ Ugapale diuzi yaca ben' bichiro, ben' regu'udi' zan yu'u quie Priscila len Aquilo. Lèscan' ugapale diuzi Epeneto, ben' naca amigo quia'. Lèbè' naquè' ben'

nëro, ben' unao xneza Cristo entre yaca ben' nita' yu nebaba Acaya. ⁶ Ugapale diuzi María, ben' ruelèle dyin quie Diuzi tuze. ⁷ Ugapale diuze ben' yedyi quia' Andronico, len Junias, ben' uya'lia' dyiguiba tuze. Anezi yaca apóstol nacayaquë' ben' huen gula. Tu binenaohua' xneza Cristo, barnaoyaquë' xneza Cristo.

⁸ Ugapale diuzi Amplias, ben' naca amigo quia', ben' naorë xneza Cristo. ⁹ Ugapale diuzi Urbano, ben' naca compañero quiendo'. Aracalënë' nëto' ruendo' dyin quie Cristo Jesús. Lëscan' ugapale diuzi Estaquis, ben' naca amigo quia'. ¹⁰ Ugapale diuzi Apeles, ben' nao du guicho du la'adyi' xneza Cristo. Lëscan' ugapale diuzi yaca ben' naca familia quie Aristóbulo. ¹¹ Ugapale diuzi Herodión, ben' naca ben' yedyi quia'. Lëscan' ugapale diuzi yaca ben' naca familia quie Narciso, con nuyaquë' naoyaquë' xneza Cristo. ¹² Ugapale diuzi Trifena len Trifosa. Nacajë' ben' rue dyin quie Cristo. Lëscan' ugapale diuzi Pérsida, ben' naca ben' zanro tanun quie barnaorënë' xneza Cristo. Taže bazioguë' naohuë' ruenë' dyin quie Cristo. ¹³ Ugapale diuzi Rufo, ben' rue quie xti'idza' Cristo dyë'ëdi. Lëscan' ugapale diuzi zna'në' como rlë'ënë' në'ëdi' ca zi'inë'. ¹⁴ Ugapale diuzi Asincrito, len Flegonte, len Hermes, len Patrobas, len Hermas, len yaca los demás ben' bichiro, ben' nao xneza Jesús, ben' regu'udi' len leyaquë' na'. ¹⁵ Lëscan' ugapale diuzi Filólogo len Julia. Ugapale diuzi Nereo len bi' zannë'. Lëscan' ugapale diuzi Olimpas len yaca los demás ben' bichiro, ben' nao xneza Cristo, ben' regu'udi' len leyaquë' na'.

¹⁶ Quëdyile lagueyile dyë'ëdi. Gaole xagajë' tu psitu, na' yëbilyaquë' padiux. Yaca los demás ben' nao xneza Jesús, ben' nita' yedyi tula, rugapajë' le'e diuzi.

¹⁷ Na'ra inia' le'e itu di'idza', bicha'. Gapale cuidado ina'le dyë'ëdi nu ben' hue le'e chopa tzona cue', ben' udze' le'e neza tula ta binaca quie Diuzi. Bihuelële leyaquë' tuze, ¹⁸ como dan' cala mandado quie xa'nro Jesucristo ruejë', dechan' ta racazi la'adyi'jë' ruejë' cana'. Rdalëyaquë' di'idza' huizi' yë' quieyaquë' huejë' gan ben' binenezi cabë' nacayaquë'. ¹⁹ Anezi yaca benë' cabë' naca le'e, barnaole xneza Cristo. Quie lena' zua' gusto, re'enda' huele seguir huele puro tadya'a, bihuele ni tu tamala. ²⁰ Ilë'ëti'zi idyin dza quižo Diuzi tu castigo huala gula quie xan' taxi'ibi' Satanás. Bira huelënan le'e. Naca Diuzi ben' cuëchi chizi guicho laxta'oro. Rulidza' xa'nro Jesucristo huela'iyane' le'e. ²¹ Na' Timoteo, ben' ruelë në'ëdi' dyin quie Diuzi tuze, rugapanë' le'e diuzi. Lëscan' rugapa ben' yedyi quia' Lucio, lënë' Jasón, lënë' Sosipater le'e diuzi.

²² Lëscan' në'ëdi', Tercio, ben' bzu di'idza' lë'e guichi niga, rugapa' le'e diuzi laohue Cristo.

²³ Lëscan' Gayo, ben' zua' zan yu'u quie, ben' run posada yuguluro ben' nao xneza Cristo, len Erasto, ben' naca tesorero quie yedyi ni, rugapanë' le'e diuzi. Lëscan' rugapa ben' bichiro Cuarto le'e diuzi.

²⁴ Rulidza' xa'nro Jesucristo huela'iyane' yugulule. Amén.

Ga iyudyi carta ni rapa Pablo bala'ana Diuzi

²⁵ Lëscan' rulidza' Diuzi ta gacalënë' le'e ta biidzebile inaole xneza Cristo gata' quiele yela' neban tuzioli con cabë' rna xti'idza' Diuzi. Cana' baodixogui'a le'e de acuerdo con cabë' una cuin Cristo. Cana' bë Diuzi pensari huenë' dza na'te, dza binesi' laze cue' yedyi layu. Pero baquezi biuna Diuzi ca huenë' quiele. ²⁶ Ulezë' hasta hora, na'tera barnezan quie pensari bë Diuzi dza na'te. Barnezan por nun quie di'idza' la'iya bzu ben' unita' dza na' lë'ë guichi, ben' udixogue' xti'idza' Diuzi. Na'ra babë Diuzi mandado inezi yugulu ben' nita' lao yedyi layu con cabë' rna di'idza' la'iya quienë' cuenda na' hue quieyaquë' di'idza' quienë'. Tuzioli zu Diuzi.

²⁷ Tuzi Diuzi zu. Tuzi lëbë' naquë' ben' rioñe'e. Tuzioli reya'ala' gaparo Diuzi bala'ana laohue zi'inë' Jesucristo. Amén.

GUICHI NĒRO BĒ SAN PABLO APÓSTOL USE'ELA'NĒ'N LAO CIUDAD CORINTO

Guichi ni use'ela' Pablo lao yaca ben' quie Jesús, yaca ben' nita' ciudad Corinto

¹ NĒ'ēdi', Pablo, naca' ben' bĎē' Diuzi. Según ca re'ennĒ' bĎē'nĒ' nĒ'ēdi' ta tza'tzetzogui'a benĒ' xti'idza' Jesucristo. NĒ'ēdi'lia' ben' bichiro Sóstenes ² bĒndo' guichi ni pse'ela'ndo'n lao le'e, ben' quie Diuzi, ben' nita' ciudad Corinto. Le'e nacale ben' banue Cristo Jesús tuže. Ulio Diuzi le'e ta gacale ben' la'ia quiēē'. BĒ Diuzi nombrar le'e ben' quiēē' lente nuti'tezi ben' rulidza Señor quiero Jesucristo. Naca Jesucristo Señor quiero lente Señor quieyaquĒ'. ³ Rulidza' Xuziro Diuzi lĒnĒ' Señor quiero Jesucristo ta huela'iaquĒ' le'e, cuĕchiyaquĒ' chizi lu'u guicho laxta'ole.

Ni rguixogue'n cabĕ' hue Cristo huela'ianĕ' ra'o

⁴ Rĕbicaza' Diuzi diuxcalelo' ca naca quiele babĕla'ianĕ' le'e tanun quie Cristo Jesús. ⁵ Dan' banacale tzaže lĕle Cristo, lĕlena' bĒ Diuzi tahuen gula quiele, racalĕnĒ' le'e ta quixogue'le benĒ' xti'idza'nĒ' dyĕ'ēdi, lĕscan' racalĕnĒ' le'e ta tziōñe'erale mazara quiēē'. ⁶ Cana' baguca quiele bega'n xti'idza' Cristo lu'u guicho laxta'ole, banezile naca xti'idzĕ' di'idza' li. ⁷ Lĕlena' bibi idzioguele huela'ia Diuzi le'e tu raca rbezale dza yeguida Señor quiero Jesucristo. ⁸ HuacalĕnĒ' le'e inaole tuzi xnezĕ' hasta yeyudyi yedu quie lao yedyi layu tacuenda ni tu nunu bisaque' gaojĕ' le'e xquia dza cati yeguida Señor quiero Jesucristo. ⁹ Huazucazi Diuzi di'idza' quiēē' cabĕ' unanĒ' huenĒ'. Lĕbĕ' ulioguĕ' le'e ta sĕlēle tuže len zi'inĒ' Jesucristo, ben' naca Señor quiero.

Ni nan cabĕ' guca bro chopa tzona cue' entre yaca ben' quie Jesús

¹⁰ Bicha', rzĕtoga' lao Señor quiero Jesucristo, rnĕyĕcha' laole ta tzu'ule de acuerdo, bigacale chopa tzona cue'. Bitilalĕle laguedyile. Huele tuzi pensari cabĕ' inĕle yugulule. ¹¹ Cana' rnia' le'e, bicha', como dan' por nun quie yaca ben' familia quie Cloĕ nezda' de tazĕdi quiele lĕle laguedyile. ¹² Quie lena' nezda' balale rnale: "Naca' ben' quie Pablo." Na' ibalale rnale: "Naca' ben' quie Apolos." Na' ibalale rnale: "Naca' ben' quie Pedro." Na' ibalale rnale: "Naca' ben' quie Cristo." ¹³ Pero rnaba' le'e ¿guca Cristo zĕ cue'? ¿Raquēle nĒ'ēdi' gutia' lĕĕ yaga cruzo por le'e? Lĕzi rnabaria': ¿Laohua' nĒ'ēdi' bzĕtoyaquĒ' caora bĕ'yaquĒ' laole? ¹⁴ Diuxcale Diuzi nitule bibi'a laole. Tuzi Crispo len Gayo, lĕziyaquĒ' bi'a laoyaquĒ'. ¹⁵ Pues nitu nitule bireya'ala' inale bzĕtojĕ' laohua' caora bĕ'yaquĒ' laole. ¹⁶ Ta rezala'adya' bi'a lao yaca ben' familia quie Estĕfanas. Bira rezala'adya' nurla bi'a laohue. ¹⁷ Cala ta hua' lao yaca benĒ' use'ela' Cristo nĒ'ēdi', den' ta quixogui'ayaquĒ' xti'idza'nĒ' tacuenda gata' yela' neban quieyaquĒ' tuzioli. Rguixogui'a benĒ' di'idza' yalo, di'idza' ta tziōñe'eyaquĒ' tacuenda biten cana'zi quie Cristo dan' gutinĒ' lĕĕ yaga cruzo.

Naca Cristo ben' yu'u yela' rioñe'e quie Diuzi

¹⁸ Yaca ben' nao neza yeyo lao gui' gabila, raquēyaquĒ' di'idza' tondo, di'idza' rguixogue'ro cabĕ' guca quie Cristo gutinĒ' lĕĕ yaga cruzo. Pero yaca ben' nao neza yeyo ga zu Diuzi guibá, nezijĕ' di'idza' na' rguixogue'n quie yela' huaca quie Diuzi. ¹⁹ Cana' rnĕn lĕĕ guichi la'ia quie Diuzi cani:

Udyiaguĕ' Diuzi yela' rioñe'e quie yaca ben' na rioñe'eyaquĒ', den' quie Diuzi na' birioñe'eyaquĒ'.

Uca'n Diuzi tzala'la yela' nezi quie yaca ben' na neziyaquĒ', den' bineziyaquĒ' chi zu Diuzi.

²⁰ Tana' rnia' le'e, ¿ga yeyudyi yedu quie yela' rioñe'e quie yaca ben' na rioñe'eyaquĒ', quie yaca ben' naca maestro, quie yaca ben' yu'u rnĕ? Lao na'a Diuzi abetza' yela' rioñe'e quie yaca ben' nita' lao yedyi layu, abeyacan di'idza' tondo. ²¹ Diuzi, ben' nezi yugulute, bĕnĒ' de que bisaque' huebĕ' yaca ben' nita' lao yedyi layu lĕbĕ' conlĕ pensari quieziyaquĒ'. Quie lena' redaohue Diuzi hue'nĒ' yela' naban tuzioli yaca ben' rzudyi'lĕ lĕbĕ', yaca ben' rue quie xti'idza'nĒ'. Pero yaca ben' birue quie xti'idza'nĒ', rnayaquĒ' di'idza' tondo di'idza' quiēē'.

²² Yaca ben' Israel, re'enjĕ' ilĕ'ĕjĕ' hue Diuzi yela' milagro quiēē'. Yaca ben' griego, re'enjĕ' yejĕ' puro di'idza' quie yaca ben' na rioñe'e, yaca ben' nezi biraca lao yedyi layu. ²³ Pero ra'o rguixogue'ro quie Cristo, ben' guti lĕĕ yaga cruzo. Tana' lena' rdza' yaca ben' Israel ra'o, lĕscan' rna yaca ben' binaca ben' Israel di'idza' tondo rguixogue'ro. ²⁴ Pero para yaca ben' ulio Diuzi, la'achi ben' Israel, la'achi ben' binaca ben' Israel, naca Cristo ben' rue yela' huaca, ben' yu'u yela' rioñe'e quie Diuzi. ²⁵ Derla yela' rioñe'e quie Diuzi, cala ca ta rioñe'e quie yaca benĒ'. Lĕscan' derla yela' huaca quiēē', cala ca ta rue yaca benĒ'. ²⁶ Lĕzi le'e bicha', reya'ala' tzu'ule pensari con cabĕ' bĒ Diuzi ulionĒ' le'e ba'ala'cazi tu chopazile

nacale ben' rioñe'e con cabè' rioñe'e yaca ben' nita' lao yedyi layu, ba'ala'cazi tu chopazile nacale ben' rnabè', ben' familia belao. ²⁷ Cani bè Diuzi, lao laza ben' na rioñe'e bi raca lao yedyi layu, ulio Diuzi le'e ta gata' yela' stu' quieyaquè' como rnayaquè' binacale ben' rioñe'e. Lèscan' lao laza ben' belao lao yedyi layu, ulio Diuzi le'e ta gata' yela' stu' quieyaquè' como rnayaquè' binacale ben' belao. ²⁸ Cana' bè Diuzi ulioguè' yaca ben' binaca ben' belao, yaca ben' ca guicho ca lao, tacuenda inezi ben' rue belao lao yedyi layu de que birlè'è Diuzi leyaquè' ben' belao. ²⁹ Quie lena' nitu nitu nunu saque' hue ze cuine lao Diuzi. ³⁰ Lao na'a cuin Diuzi nacalèle Cristo tuze. Lèscan' lao na'a Diuzi naca Cristo yela' rioñe'e quiele. Lèscan' por nun quie Cristo babezi Diuzi dula' xquia quiele, banacale ben' la'ya quienè', bapte psela Diuzi le'e. ³¹ Lè'è guichi la'ya quie Diuzi rnèn cani: Bihuero cuinro ben' ze, huero Cristo ben' ze.

2

Udixogue' Pablo xti'idza' Cristo, ben' guti lè'è yaga cruzo

¹ Le'e, bicha', cati bida' bedenia' le'e di'idza' quie Diuzi, unia' le'e tu ta binetziõe'e'le quie pensari quienè', pero biunia' le'e di'idza' zèdi. ² Caora cati uzulia' le'e dza na', unia' le'e quie Cristo, ben' guti lè'è yaga cruzo. Lèzin unia' le'e, biunia' le'e birla tatula. ³ Caora uzulia' le'e dza na', du rzi'a' du rdzèba', unia' le'e xti'idza' Diuzi. ⁴ Cati unia' le'e dza na', di'idza' quie Diuzi unia'. Biunia' le'e di'idza' con cabè' rnè ben' uyo escuela zè iza tacuenda cana'zi hua' gan galele quia', pero bia' gan gulele por nun quie gualè Bichi Be quie Diuzi nè'èdi', bè Diuzi yela' huaca quienè'. ⁵ Cana' bia' quiele tacuenda galele por nun quie yela' huaca quie Diuzi, cala por nun quie pensari yu'u yaca ben' nita' lao yedyi layu.

Diuzi ruzioñe'enè' ra'o lao na'a Bichi Be quienè'

⁶ Pero yaca ben' banao xti'idza' Diuzi dyè'èdi, ra'o sí, conlè pensari quie Diuzi rguixogue'ro benè' xti'idza' Diuzi. Birguixogue'rojè' conlè pensari yu'u yaca ben' nita' lao yedyi layu, ni quele conlè pensari yu'u yaca ben' rnabè' quieyaquè'. Hueyudyi huedu pensari quiejè', bira bide hueyaquè'. ⁷ Pero di'idza' rguixogue'rojè' nacan pensari quie Diuzi, nacan pensari cubi ta binuero ta zabziõe'enè' ra'o cabè' psaque'nè' huenè' tadya'a gula quiero caora na' tu binecuel' lao yedyi layu. ⁸ Pero yaca ben' rnabè', yaca ben' nita' lao yedyi layu, birioñe'eyaquè' ca naca pensari quie Diuzi. Chan' uyoñe'eyaquè' pensari quie Diuzi, bibda'yaquè' ben' naca Señor quiero lè'è yaga cruzo. ⁹ Pero, como rnan lè'è guichi la'ya quie Diuzi cani: Bapcuezà Diuzi tadya'a gula quie ra'o, ben' nedyè'è lèbè'. Ca ta pcuezanè' quie ra'o, quiero, nacan ta binelè'èro, nacan ta bineyero, nacan ta binuero pensari.

Cana' rnèn lè'è guichi la'ya quie Diuzi. ¹⁰ Lena' abzioñe'è Diuzi ra'o lao na'a Bichi Be quienè'. Rioñe'e Bichi Be quie Diuzi yugulute, rioñe'enè' yugulu pensari quie Diuzi.

¹¹ ¿Nuzi nezi ca naca pensari yu'u lu'u laxta'o benè'? Bizi bichi be yu'uyaquè', tuzi lena' nezin ca naca pensari racayaquè'. Lèscana' ca naca pensari raca Diuzi, tuzi Bichi Be quienè' anezirènè' can' gaca. ¹² Bira yu'uro pensari ca pensari yu'u yaca ben' nita' lao yedyi layu. Yu'ucazi Bichi Be quie Diuzi lu'u laxta'oro ta tziõe'ero ca naca tadya'a gula pcuezè'è quiero. ¹³ Ra'o rnèro según ca naca pensari bdze' Bichi Be quie Diuzi lu'u guichoro laxta'oro, cala según ca naca pensarizi quiero. Cana' ruxi'idze'ro yaca ben' yu'u pensari quie Diuzi ca naca pensari quie Diuzi yu'ujè'.

¹⁴ Yaca ben' biyu'u Bichi Be quie Diuzi, rsebi'yaquè' con cabè' rna Bichi Be quie Diuzi. Nayaquè' di'idza' tondo na'. Birioñe'eyaquè'n dan' ruen zi tzu'uyaquè' Bichi Be quie Diuzi ta tziõe'eyaquè'n. ¹⁵ Nu ben' yu'u Bichi Be quie Diuzi, huayoñe'eyaquè' ca naca pensari quie Diuzi. Pero nu ben' biyu'u Bichi Be quie Diuzi, bitziõe'eyaquè' ca naca pensari quie yaca ben' yu'u Bichi Be quie Diuzi. ¹⁶ Con ca rna lè'è guichi la'ya quie Diuzi cani: "¿Nuzira te tziõe'e yugu ca naca pensari quie Diuzi? Tanto naquè' ben' rioñe'e, nitu nitu nunu gaca uxi'idze' lèbè'." Cana' rnèn lè'è guichi la'ya quie Diuzi. Pero ra'o baoyu'uro pensari quie Cristo.

3

Pablo len Apolos, tzaže rueyaquè' dyin quie Diuzi

¹ Na'ra, bicha', bisaque' inia' le'e di'idza' ca ben' rue quie cabè' re'en Bichi Be quie Diuzi gaca, pero rnaban inia' le'e ca ben' nenaon nerue ca pensari yu'u yaca ben' nita' lao yedyi layu. Nacale ca quie xcuidi' como dan' binerioñe'e'le dyè'èdi quie Cristo. ² Psèdia' le'e di'idza' yalozì dza na'la. Bipsèdia' le'e di'idza' zèdi como dan' biyulaole tziõe'e'le di'idza' zèdi. Quie lena' naca quiele ca quie tu xcuidi' nera'adyi'. Puro nidyi' ra'adyi'bi' como dan' binegacabi' gaobi' yèta. Ca naca quie xcuidi' binegaca gao yèta, lèscan' nacaré'è quiele,

binetzulaole tziñoñe'ele pensari zèdi ca ta rnia' le'e. Bigucale tziñoñe'ele dyè'èdi dza na'la, lèscan' hasta na'a birioñe'ele dyè'èdi. ³ Nenaole neruele ca pensari yu'u yaca ben' nita' lao yedyi layu, cana' racazè'le laguedyile. Neruele chopa ru'a di'idza', cana' rbirole cuinle zè cue'. Lena' rnia' le'e como dan' neruele ca pensari yu'u yaca los demás ben' nita' lao yedyi layu. ⁴ Rnia' le'e can', como dan' balale rnale: "Naca' ben' quie Pablo." Na' ibalale rnale: "Naca' ben' quie Apolos." Dan' ruele cana', lena' rnia' le'e nenaole neruele ca pensari yu'u yaca los demás ben' nita' lao yedyi layu.

⁵ Rnaba' le'e: ¿Nuži Pablo? ¿Nuži Apolos? Nacando' ben' quie Diuzi ruendo' cabè' mandado ruenè'. Ta una Diuzi nètò' bëndò' uduxogue'ndo' le'e di'idza' quienè' ta gulele. Quie quiendo' bzundo' di'idza' según cabè' bè' Diuzi laze huendo'. ⁶ Nè'èdi' guza' bini. Na' Apolos bdze'bi'n nisa, pero Diuzi gucalènè'n ta uyežin. ⁷ Tana' lena' rnia' le'e, binaca ben' guza' bini len ben' bdze' nisa ben' ze. Tuzi Diuzi naquè' ben' ze ta gucalènè'n ta uyežin. ⁸ Ca quie ben' guza' bini, ca quie ben' bdze' nisa, tuzi naca dyin bëyaquè'. Huaguizucazi Diuzi quie quieyaquè' ca naca dyin na' bëyaquè'. ⁹ Nè'èdi'lia' Apolos nacando' tuže ruendo' cabè' mandado rue Diuzi.

Na'ra biži le'e nacale ca quie layela ga raza Diuzi. Lèscan' nacale ca quie tu yu'u ta ruenè'. ¹⁰ Nè'èdi' naca' ca quie ben' rucua'. Bdè' Diuzi nè'èdi' ta ucua'a ga sulao besu. Biži ben' tula ucua'nè' besu. Reya'ala' gapajè' cuidado cabè' huejè' ucua'jè'n. ¹¹ Tuzi Jesucristo naquè' ca quie ga rzulao rcua'ro. Ganura nunu zu naca quie ca quie ga rzulao rcua'ro. ¹² Huazaque' huero tu dyin dya'a ucua'ro con oro, o conlè plata, o conlè yo zaca'n za'ala'. Lèzi huazaque' huero tu dyin bibi zaca'n ucua'ro con yaga, o conlè la'aga' bidyi, o conlè guži cabè' re'entro gacan. ¹³ Pero dza gaca juicio, caora na' de yezacalao ca naca dyin bëro tu turo. Lèdza na' udze' Diuzi lagui' ta ulu'en bi naque dyin bëro tu turo, chi uyeinan, chi biuyeinan. ¹⁴ Nu ben' bè dyin biuyei, hue'cazi Diuzi quie dyin na' bëyaquè'. ¹⁵ Pero nu ben' bè dyin uyei, bibi de hue' Diuzi quie dyin na' bëyaquè', huabiagui' dyin quieyaquè'. Cuinyaquè' bicuiagui'yaquè', pero canezie telayaquè' bitzeiyaquè'.

¹⁶ ¿Biži binezile nacaro ra'o idao' quie Diuzi? ¿Binezile baoyu'u Bichi Be quie Diuzi lu'u guicho laxta'oro? ¹⁷ Udyiagui' Diuzi nu yaca ben' udyiagui' idao' quienè', como dan' naca la'ya idao' quienè'. Na'ra ra'o nacaro idao' quie Diuzi.

¹⁸ Bitzioguele yè'. Chi raquele nacale ben' rioñe'era, pero pensari quiezile raquele, cala pensari quie Diuzi, na' ulesan pensari quiele tacuenda uzioñe'e Diuzi le'e, tzu'ule pensari quienè'. ¹⁹ Rlè'è Diuzi pensari tondo ca pensari yu'u yaca ben' nita' lao yedyi layu. Lena' rnèn lè'è guichi la'ya quie Diuzi cani: "Conlè di'idza' rero lu'u ru'a ben' rioñe'e, hualu'e Diuzi di'idza' tondo nayaquè'." ²⁰ Lèzirè rnèn lè'è guichi la'ya quie Diuzi cani: "Anezí Diuzi naca pensari quie ben' rioñe'e pensari tondo." Cana' rnèn lè'è guichi la'ya quie Diuzi. ²¹ Quie lena', bireya'ala' huele cuinle ben' ze por nun quie ruele taže tu cue' ben' quiele inaole leyaquè'. Rnia' le'e, yugulute banaca quiele, ²² la'achi nè'èdi', la'achi Apolos, la'achi Pedro, la'achi yedyi layu, la'achi yela' naban, la'achi yela' guti, la'achi na'a, la'achi uxe, yuguten banaca quiele. ²³ Nacale cuenda quie Cristo, na' naca Cristo cuenda quie Diuzi.

4

Ni rguixogue'n con cabè' bë yaca apóstol

¹ Reya'ala' ilè'èle nètò' ca ben' rue mandado quie Cristo. Nudè'nè' nètò' naca ladyina'ando' ta usèdindo' benè' di'idza' quie Diuzi, di'idza' ta bineyèjè'. ² Na'ra nu ben' naca ladyinè'è, reya'ala' ulu'eguè' naquè' ben' zudyi'ilè' laguedyi. ³ Pero nè'èdi' birdèbida' la'achi ichugubè'le quia' cabè' rua', rua' mandado quie Diuzi. Lèscan' birdèbida' la'achi ichugubè' yaca ben' rnabè' nè'èdi'. Ni siquiera birchugubi'a cuina'. ⁴ Ca naca pensari quia', biraona nè'èdi' xquia. Pero chi napa' dula', huachugubè' Diuzi nè'èdi'. ⁵ Pero le'e, biichugubè'le quie benè' chi binedyin hora. Cuezale yeguida Diuzi yebioguè' yugulu ta negachi'. Caora na' ulu'e Diuzi bi naca pensari yu'u lu'u guicho laxta'o benè', na' huenè' leyaquè' ben' ze según chi bèjè' tahren, o chi bèjè' tamala.

⁶ Bicha', ca ta rnia' le'e, nacan ta gacalèn le'e. Lena' rnia' le'e tu di'idza' cabè' rue Apolos len nè'èdi'. Reya'ala' huele ca ruendo' nètò'. Reya'ala' inaole usèdile dyè'èdi con cabè' rna lè'è guichi la'ya quie Diuzi. Bihuele zè cue'. Biuxa'ale laguedyile rnale tuzi tu cue' ben' quiele nacale ben' huen. ⁷ ¿Nuži bè le'e ben' huenra ca los demás? ¿Cala Diuzi bènè' yugulu ta de quiele? Chi Diuzi babènnè' yugulu ta de quiele, ¿bixquien' racale pensari ta bëzile cuinzile de quiele?

⁸ Baruele le'e ca rue ben' uña'a. Raquele bade yugulute quiele, bira rdzioguele. Ruele cuinle ca yaca rey. Na' biži nètò' apsanla'adyi'le nètò'. Biži chan' tali nacale rey, huendo' le'e tuže, inabè'lèndo' le'e. ⁹ Parece bè Diuzi nètò' yenaondo' ca quie ben' de dula' xquia quie, ben' reya'ala' gati. Pues hasta reban yaca laguedyindo' nètò', reban yaca àngel nètò',

reban yaca lo demás benè' nêto'. Cana' raca quiendo'. ¹⁰ Rlè'è yaca benè' nêto' ben' tondo, dan' redzagalaondo' rguixogue'ndo' di'idza' quie Cristo. Na' biži le'e rlè'èle cuinle ben' rioñe'era, ben' naora xneza Cristo. Pero rlè'èle nêto' ben' bibi zaca'. Na' biži le'e rlè'èle cuinle ben' zaca'. Rapala'n yaca benè' le'e, na' biži nêto' birapala'nyaquè' nêto'. ¹¹ Lente na'a rsacazi'ndo' ta gaondo' len ta yo'ondo' lente žabando' ta gaondo'. Na' biži yaca benè' rueyaquè' nêto' bizinaquezi. Bisu lidyindo'. ¹² Rexaquendo' ruendo' dyin lèndo' na'ando'. Na' biži yaca benè' rutasi runioyaquè' nêto'. Pero bigacando'jè' lèbi, rulidzando'jè' di'idza' gaxo gula. Rzuendo' cati rueyaquè' nêto' bizinaquezi. ¹³ Biži rudyiala'adyi'yaquè' nêto', pero rnèlècazindo'jè' di'idza' zela'adyi'. Ca rlè'èjè' tu bēbi ta de lao yedyi layu, cana' rlè'èjè' nêto'. Hasta na'a rlè'èjè' nêto' cana'.

¹⁴ Bihua' guichi ni ta yedue'lèlen. Tu ta hua' gunna' le'e tu consejo como dan' nacale ca quie ži'ina', ben' nedyè'èda'. ¹⁵ Ba'ala'cazi na'a nita' zè ben' usèdi le'e, ben' rnè quie Cristo, biguca zè ben' apšèdi le'e tanëro. Naca' tuza' nē'èdi' ca quie xuzile nun quie naca ben' nêro uđixogui'a le'e xti'idza' Diuzi, uyu'ule naca Cristo gulele quienè', pte pselanè' le'e. ¹⁶ Lena' rnia' le'e, huele con cabè' ruecaza' nē'èdi'.

¹⁷ Tana' lena' ise'ela' Timoteo laole. Naquè' ben' nedyè'ètzegueda'. Raqueda'nè' ca ži'ina', ben' rue quie xti'idza' Diuzi. Usala'adyi'nè' le'e huele con cabè' rua' como ca naca' ben' quie Cristo. Lèlena' rusèdia' yaca benè' nao xneza Cristo con ga baoya'a. ¹⁸ Pero ca naca bala le'e, aozualaole huele cuinle ben' ze dan' racale pensari biguida' idena'a le'e. ¹⁹ Pero chi Diuzi gunnè' lato idena'a le'e, laguidategaza'. Lècana' guida' idena'a yaca ben' na' ta ilè'èda' chi tali uzuyaquè' di'idza' o chi bē' rnaziyaquè'. ²⁰ Porque chi galero quie yela' rnabè' quie Diuzi, bireya'ala' galero de di'idza'zi, den' reya'ala' galero du guicho du la'adyi'ro hue quiero xti'idza'nè'. ²¹ ¿Cabiži re'enle ta hua' quiele bē' guida'? ¿Re'enle hua' le'e castigo, o re'enle huelia' le'e di'idza' yun', di'idza' zela'adyi'?

5

Ca yezacalao Pablo quie ben' rue tamedian

¹ Banezile zu tu ben' ladole anuenè' lažna'zinè' žgulanè'. Lena' nacan median gula quienè', bēnè' ca ta bireya'ala' huenè'. Ni yaca ben' binezi chi zu Diuzi, birueyaquè' cabè' bē ben' na'. ² ¿Bixquien' raca quiele uxa'ale quie ben' bē cana'? ¿Reya'ala' gaquèle bayèchi' quie ben' bē can'! Reya'ala' yebiolenè' ladole, dan' baoquixinè' bēnè' can'. ³ Ba'ala'cazi bisaque' sulia' le'e, gaca quiele como ca zulia' le'e conlè pensari quia'. Quie lena' rzètoga' lao Señor quiero Jesucristo baochugubi'a quie ben' bē cana'. ⁴ Cati yegu'udi'le huazulècaza' le'e la'acazi pensari quieža'. Lèscan' huazulè yela' huaca quie Señor quiero Jesús le'e. ⁵ Reya'ala' yebirole ladole ben' bē cana'. Reya'ala' usanla'adyi'lenè' gaque quie xan' taxi'ibi' lènè' tacuenda yedzagalaonè' can' bēnè'. Cana' huele quienè' tacuenda gaca yezi' Señor quiero Jesucristo bichi be quienè' dza cati yeguidè' tatula lao yedyi layu.

⁶ Bireya'ala' uxa'ale quie ben' bē tamala. ¿Biži binezile con ca naca di'idza' rnèn lè'è guichi: "Con lè'èti'dao' levadura rēzin dužete yezo yèta xtila ta rēžin racan taže"? ⁷ Ca rue levadura, cana' ruerè' tamedian. Tana' reya'ala' yebirole ladole ben' bē tamedian ta biuxinunè' yaca ben' naca laguedyiro. Tana' lena' huaca quiele ca quie yezo yèta xtila bitzu'u levadura. Nacale ben' laxta'o yèri como dan' aoidžu Cristo dula' xquia quiele. Ca bē ben' Israel dza na'la, bētiyaquè' beco' ži'ila' ta rueyaquè' lani pascua, cana' nacarè' quie Cristo, gutiguè' lè'è yaga cruzo por ra'o. ⁸ Tana' lèlena' reya'ala' inaoro xnezè' du guicho du la'adyi'ro. Chi naoro xnezè' du guicho du la'adyi'ro, naca quiero ca quie yèta xtila biyu'u levadura. Chi biinaoro xnezè' du guicho du la'adyi'ro, naca quiero ca quie yèta xtila yu'u levadura.

⁹ Lè'è guichi tula ta bia' dza na'la, unia' le'e quie ben' rdalè nigula binaca žgulè'. Unia' le'e bireya'ala' huele lato sunè' ladole dan' ruenè' tamedian. ¹⁰ Pero biunia' le'e ta bira huelèle tuže yugulu ben' rda lao yedyi layu, la'achi ben' rdalè nigula binaca žgulè', la'achi ben' rza'la'adyi'tzeuge dumi, la'achi ben' uban, la'achi ben' rionla'adyi' nu yo o nu yaga. Pues ta bira huelèle tuže yugulu ben' rda lao yedyi layu, re'ennan zizeza'le lao yedyi layu, pero bisaque'. ¹¹ Tuz cani rnia' le'e, bihuelèle tuže ben' na naquè' bichiro ben' nao xneza Jesús chi ruenè' ta rnazin quienè'. Gapale cuidado quie nu ben' na naquè' ben' quie Cristo, pero rdalè'nè' nigula binaca žgulè', o chi rza'la'adyi'nè' dumi, o chi rionla'adyi'nè' nu yo o nu yaga, o chi rnè'nè' di'idza' lè'è, o chi ri'oguè' rbannè' quie benè'. Lèben' rue cana', nica gaolèlenè' tzaže. ¹²⁻¹³ Ca naca nē'èdi', binacan ladyina'a ta ichugubi'a quie yaca ben' binao xneza Cristo. Nacan ladyina'a Diuzi ta ichugubè'nè' quiejè'. Pero le'e, reya'ala' ichugubè'le quie yaca ben' na naonè' xneza Jesús, ben' rda ladole, pero biruenè' tadya'a. Reya'ala' cuiole yaca ben' rue tamedian ladole, bisulèle lèjè'.

6

Bireya'ala' gaoro laguedyiro ben' quie Jesús xquia lao juez, ben' binaca ben' quie Jesús laguedyile

¹ Chi le'e re'enle gaole xquia laguedyile ben' quie Jesús, ¿bixquien' reyažole ziole tzataole xquia lao juez, ben' binaca ben' quie Jesús? ¿Binezile reya'ala' tzirole lao yaca ben' naca ben' quie Jesús ta gaole xquia laguedyile ben' quie Jesús? ² ¿Binezile yugulu ra'o, ben' quie Jesús, huachuguliro yaca ben' binaca ben' quie Jesús dza gaca juicio? Chan' le'e huachugulile yaca ben' binaca ben' quie Jesús, ¿bixquien' raquele bigacale ichugulile laguedyile ben' quie Jesús ta cuëchitza'ole tazëdidao' raca quiele? ³ ¿Lëzi binezile ra'o ichuguliro quie yaca ángel zu guibá? Na'ra chi gacale cuëchitza'ole tazëdi ta raca guibá, lëzi gacarële cuëchitza'ole tazëdidao' ta raca lao yedyi layu. ⁴ Chi de tazëdidao' quiele dza rdale lao yedyi layu, ¿bixquien' ruele ladyina'a ben' binaca ben' quie Jesús ta cuëchitza'ohuë' tazëdidao' raca quiele? ⁵ Ta nacan' inia' le'e can' ta yedue'le. ¿Bixquien' raquele bizu tu ben' rioñe'e ladole ta cuëchitza'onë' tazëdidao' quiele rata' lado yaca laguedyiro, ben' quie Jesús? ⁶ Ni lë'ëti' birexeda' ca ruele raole xquia laguedyiro, ben' quie Jesús, lao yaca juez, ben' binaca ben' quie Jesús.

⁷ Tali rnia' le'e, nacan mala gula tilalële laguedyile, ben' quie Jesús. Nacalan dya'a usanle sule chizi chi nu bi rue quiele, chi baolanyaquë' quiele. ⁸ Pero le'e, rsacale laguedyiro, ben' quie Jesús, bizinaquezi, na' rbanle quieyaquë'.

⁹⁻¹⁰ ¿Binezile yaca ben' rue con ganzi tamedian binacayaquë' cuenda lao na'a Diuzi? Lena' bitziguële yë'. Nu ben' ru'abe rasilë nigula, len nu ben' rionla'adyi' nu yo o nu yaga, len nu ben' bazulë nigula quienë', pero rasilë'në' nigula tula, len nu ben' reyasilë laguedy byu, len nu ben' uban, len nu ben' rza'la'adyi' dumi, len nu ben' hue'e, len nu ben' rguitulë di'idza' bižu, len nu ben' rue trampa len laguedy, leyaca ben' na', binacayaquë' cuenda lao na'a Diuzi. ¹¹ Lëscan' rnëria' quiele, cana' bërële le'e dza na'. Pero na'a banacale ben' laxta'o yëri lao Diuzi, banacale ben' la'iya quienë'. Por nun quie Señor quiero Jesucristo len Bichi Be quie Diuzi uzi'že Diuzi dula' xquia quiele.

Naca la'iya cuerpo quiero

¹² Cani rna bala benë': "Ru'en lato ta huero con bitezi re'enro huero." Tabalacazi, pero cala yugulu ta re'enro huero nacan huen quiero huero. Tabala ru'en lato huero con bitezi re'enro huero, pero bihue'ro lato gacan xa'nro inabë'n ra'o. ¹³ Lëscan' tali ca rna benë': "Udixu Diuzi yela' huao ta gaoro. Lëscan' bzalo Diuzi budungo quiero ta tzu'un ta raoro." Pero huadyin dza hue Diuzi bira inaban gaoro. Cana' hue Diuzi yeyudyi quie yela' huao len quie budungo quiero. Cala bë Diuzi cuerpo quiero ta huero bizinaquezi talëro nigula. Nacacazi quie Cristo cuerpo quiero. Naca Cristo xa'n cuerpo quiero. ¹⁴ Con cabë' bë Diuzi besebannë' Señor quiero, lëscana' huerënë' yesebannë' ra'o lao na'a yela' r nabë' quie'.

¹⁵ ¿Biži binezile nacacazi quie Cristo cuerpo quiele? ¿Binezile bireya'ala' usedyinle cuerpo quiele lao na'a nigula ruti' gusto quie? Nitu nitu bireya'ala' huele can'. ¹⁶ ¿Lëzi, binezile ca naca quie be'mbyu ptila nigula ruti' gusto quie? Cani rnën lë'ë guichi la'iya quie Diuzi: "Quie lao rupateyaquë' naca quieyaquë' ca quie tuzi benë'." Cana' rnën lë'ë guichi la'iya quie Diuzi. ¹⁷ Na'ra yaca benë' nao xneza Cristo, banaca bichi be quiejë' tuzi len Cristo.

¹⁸ Biutilale nigula binaca žgulale. Chi utilale nigula binaca žgulale, lena' udyiaguile cuerpo quiele, cala ca tamedian tula huele. ¹⁹ ¿Biži binezile naca cuerpo quiele ca quie tu idao' quie Diuzi? ¿Binezile bayu'tule Bichi Be quie Diuzi? Binacaro xa'n cuerpo quiero. Diuzi sí, naquë' xa'n cuerpo quiero. ²⁰ Diuzi baodizuguë' quie dula' xquia quiero. Lena' reya'ala' tzionla'adyi'ronë', bireya'ala' huero tamedian conlë cuerpo quiero.

7

Ga rguixogue'n quie ben' rzi' laguedy

¹ Niga yequëba' quie guichi use'ela'le laohua' dza na'. Tali rnia' le'e quie yaca bi' ru'abe, nacalan dya'a quiebi' zubi' cuinzibi' bisi'bi' nigula. ² Pero chi huen žudyi quiebi' talëbi' nigula, na'ra nacalan dya'a quiebi' si'bi' nigula gaca žgulabi', cala ca ta talëbi' nigula. Lëzi cana' quie yaca nigula, chi huen žudyi quiebi', nacalan dya'a quiebi' si'bi' be'mbyu bi' gaca xquiubi'. ³ Chi le'e baoži'le nigula para žgulale, reya'ala' idyë'ële nigula quiele dyë'ëdi. Lëzi cana' nigula, reya'ala' idyë'ënë' ben' quienë' dyë'ëdi. ⁴ Na' nigula bazulë laguedy, bira nacanë' xa'n cuerpo quienë', banaca xquiunë' xa'n cuerpo quienë'. Lëzi be'mbyu bazulë laguedy, bira nacanë' xa'n cuerpo quienë', banaca žgulanë' xa'n cuerpo quienë'. ⁵ Tana' lena' rnia' le'e be'mbyu, biusanle gasilële žgulale. Lëzi rnia' le'e nigula, biusanle gasilële xquiule. Lëlena' chi rega'nlële laguedyile di'idza' ta usanle bigasilële laguedyile tu chopa dza ta hue'lële Diuzi di'idza', caora na' ru'en lato bigasilële laguedyile. Te beyudyi be'lële

Diuzi di'idza', na'tera reya'ala' sulêle laguedyile tatula tacuenda bihue xa'n taxi'ibi' le'e gan huele tamedian, porque dan' bibêle gan inabê'le cuinle.

⁶ Ca rnia' le'e niga binacan ta huela'ni le'e zêdi. Cala rnia' le'e biru'en lato si'le nigula gaca žgulale. Rnia' le'e si'le nigula gaca žgulale chi re'enle, cala tamedian na' huele. ⁷ Nê'êdi' re'enda' chan' yugulule suele huerêle ca rua', nunu sulêle. Pero Diuzi banegunnê' quie tu turo, chi suero bisuero nunu sulêro, dan' netza' tu turo. Binaca tuzi ca nacaro.

⁸ Rnia' le'e quie yaca bi' ru'abe len yaca nigula banati xquiuhue, nacalan dya'a quieyaquê' nunu sulêyaquê' su cuinziaquê' con ca zua' nê'êdi', nunu zulia'. ⁹ Pero chi bisueyaquê' suyaquê' cuinziaquê', nacalan dya'a si'yaquê' laguedyiaquê', cala ca ta sa'la'adyi'yaquê' sulêjê' laguedyijê' inan quiejê' huejê' tamedian.

¹⁰ Ca rnia' quie yaca nigula bazulê laguedyi, dula'adya' rnia' biru'en lato usannê' xquiunnê'. Ta rnia' niga nacan mandado quie Cristo, cala ta racazi la'adya'. ¹¹ Chi nu nigula apsannê' xquiunnê', reya'ala' sunê' cuinzinê'. Chi bire'ennê' sunê' cuinzinê', reya'ala' yega'ntza'olênê' xquiunnê' tatula. Biru'en lato yezi'nê' be'mbyu tula. Lêscan' biru'en lato usan be'mbyu žgulanê' na' yezi'nê' nigula tula.

¹² Na'ra quie yaca los demás, rnia' ca naca pensari quia', cala mandado quie Cristo. Chi zu ben' zu nigula quienê', na'ra binaca nigula quiê' ben' nao xneza Jesús, pero racacazi nigula conforme sulênê' lênê', biru'en lato usannê' nigula quienê'. ¹³ Lêscan' chi zu nigula zu be'mbyu quie, na'ra binaca be'mbyu quiê' ben' nao xneza Jesús, pero racacazi be'mbyu conforme sulênê' lênê', biru'en lato usannê' be'mbyu quienê'. ¹⁴ Huaca huen quie ben' binao xneza Jesús chi sulênê' nigula, ben' nao xneza Jesús. Lêzirê quie nigula binao xneza Jesús, huaca huen quienê' sulênê' be'mbyu, ben' nao xneza Jesús. Lêzirê quie nu ži'iyaquê', huaca huen quieyacabi' chi nao xuziyacabi' žna'yacabi' xneza Jesús. Chi usan ben' nao xneza Jesús nigula quienê' o chi usan nigula nao xneza Jesús be'mbyu quienê', bihuen dya'a quie ži'iyaquê'. Huen quieyacabi' ca quie ži'i ben' binao xneza Jesús. ¹⁵ Pero chi ben' binao xneza Jesús bira re'ennê' sulênê' laguedyinê', ben' nao xneza Jesús, na'ra hue'le lato usan ben' binao xneza Jesús laguedyinê'. Caora na' naca ben' nao xneza Jesús libre. Pues ulio Diuzi le'e ta cue' chizi laxta'ole bitilalêle laguedyile. ¹⁶ Na'ra luê' nigula, ¿cómo nezo' biidyin dza inao ben' quio' xneza Jesús? Lêscan' luê' be'mbyu, ¿cómo nezo' biidyin dza inao nigula quio' xneza Jesús?

¹⁷ Reya'ala' inaoro huero cabê' banegun Diuzi quie tu turo cati ulionê' ra'o gacaro ben' quienê'. Cana' rnia' con gatezi ga tza', gan' nita' yaca ben' nao xneza Jesús. ¹⁸ Chi ra'o zuro tu xêdyidao' ca xêdyi ruzu yaca ben' Israel ži'iyaquê' byu, cala bizêdi huena. Lêzi cati dza ulio Diuzi ra'o, chi bizuro xêdyidao', cala bizêdi huena. ¹⁹ Birueten baiguin chi su xêdyidao' cuinro, o chi bisu xêdyidao' cuinro. Chi naoro hue quiero xti'idza' Diuzi, lêlena' rueten baiguin hueron. ²⁰ Ca banegun Diuzi quie tu turo dza ulio Diuzi ra'o gacaro ben' quienê', cana' reya'ala' inaoron. ²¹ Chi le'e gucale ben' zu lao xa'ne cati ulio Diuzi le'e, bidêbile biquilole rchinle ga tula. Pero chi idyin dza gata' zu tahuen quiele ta yeza'le ga zule lao xa'ne, reya'ala' yeza'le. ²² Chi zule lao xa'ne cati ulio Diuzi le'e, banacan quiele na'a ca quie ben' bizu lao xa'ne. Banacale ben' rue mandado quie Diuzi. Lêzi chi bizule lao xa'ne cati ulio Diuzi le'e, banacan quiele na'a ca quie ben' zu lao xa'ne, dan' banaca Cristo xa'nle. ²³ Taze bagucalê Diuzi le'e baodizunê' dula' xquia quiele. Quie lena' bihue'le lato chi re'en yaca benê' huele tamedian. ²⁴ Lêlena' rnia' le'e bicha', ca dyin bêro banegun Diuzi quie tu turo dza ulio Diuzi ra'o, cana' reya'ala' huero biusanron inaoron.

²⁵ Ni inia' le'e quie ben' binesi' laguedyi. Ca naca pensari quia' inia' le'e quieyacabi', binacan mandado quie Cristo. Rnia' le'e pensari quia' como beyêchi'la'adyi' Diuzi nê'êdi', bdê'nê' nê'êdi' ben' quiê', ben' rnê tabala. ²⁶ Ca naca pensari quia' inia' de que, nacalan dya'a bisi' be'mbyu nigula, dan' bablyin tiempo gaca zêdi gula lao yedyi layu. ²⁷ Chi bazulêle nigula, biusanlenê'. Lêzi chi binesulêle nigula, biquilolenê'. ²⁸ Pero chi re'enle si'le nigula sulêle, binacan xquia. Lêzi bi' nigula, chi re'embi' si'bi' be'mbyu, binacan xquia. Pero quie yaca ben' si' laguedyi, huata' tazêdi quieyaquê' lao dza rdayaquê' lao yedyi layu. Na' re'enda' cuêchitza'ohua' cabê' tazêdi gata' quiele.

²⁹ Bicha', ta re'enda' inia' le'e, baruen bago yeyudyi yedu yedyi layu. Quie lena' chi bazulêle nigula, hue quiele xti'idza' Diuzi como ca quie bizulêle nigula. ³⁰ Lêzi le'e ben' raca yela' yêchi' quie, hue quiele xti'idza' Diuzi como ca ben' biraca yela' yêchi' quie. Lêzi le'e ben' ružidyî redaohue, hue quiele xti'idza' Diuzi como ca quie ben' biružidyî biredaohue. Lêzi le'e ben' ra'o ta de lao yedyi layu, hue quiele xti'idza' Diuzi como ca quie ben' biga'o ta de lao yedyi layu. ³¹ Lêzi le'e ben' babê gan ta de lao yedyi layu, hue quiele xti'idza' Diuzi como ca quie ben' bibê gan ta de lao yedyi layu. Rguixogui'a cana' dan' baza' dza yeyudyi yedu yedyi layu.

³² Re'enda' sule huen bidêbile. Yaca ben' binesi' laguedyi, rueyacabi' pensari ta hue quieyacabi' xti'idza' Diuzi ta zuyacabi' huen lao Cristo. ³³ Pero yaca ben' bazulê nigula,

rueyaquë' pensari ga tzexi'yaquë' ta rdziogue nigula quienë'. ³⁴ Netza' quie nigula bazulë be'mbyu, netza' quie nigula cuidi'. Na' nigula cuidi' ruebi' pensari ta hue quiebi' xti'idza' Diuzi ta gacabi' ben' laxta'o yëri lao Cristo. Pero nigula bazulë be'mbyu, ruenë' pensari rdëbinë' bi huenë' ta zunë' huen len xquiunë'.

³⁵ Cana' rnìa' le'e dan' re'enda' gata' tadya'a quiele, bire'enda' gata' tazëdi quiele. Re'enda' sule contento huele mandado quie Cristo du guicho du la'adyi'le.

³⁶ Chi le'e rdëbile quie zi'ile nigula si'bi' be'mbyu, dan' bate yela' cuidi' quiebi', chi racale pensari huele quie zi'ile nigula can', abihuena hue'le lato ta si' be'mbyu lëbi'. Binacan xquia si' be'mbyu lëbi'. ³⁷ Pero lëzi chi le'e bire'enle si' be'mbyu zi'ile nigula, chi du guicho du la'adyi'le racale pensari bisi' be'mbyu lëbi', abihuena bihue'le lato si'bi' lëbi'. Cala tamedian na', nacan dya'a. ³⁸ Lëlena' rnìa' nacan dya'a hue'le lato si' be'mbyu zi'ile nigula, pero nacateran dya'a chi bihue'le lato si'bi' lëbi'.

³⁹ Chi nu nigula bazulënë' xquiunë', biru'en lato usannë' lëbë' tu raca nebannë'. Chi xquiunë' bagutinë', cana'ra ru'en lato yezi'në' be'mbyu tula, pero con chi ben' nao xneza Jesús. ⁴⁰ Ca naca pensari quia' nia' de que nacalan dya'a quie nigula guti xquiuhue, chi nunu be'mbyu yezi'në'. Ca naca pensari quia' rnìa', pero lëscan' nacan pensari quie Bichi Be quie Diuzi.

8

Ni rnan quie yela' huao bdyia yaca benë' lao ídolo

¹ Ga ni rnìa' quie yela' huao rudyia yaca benë' lao ídolo. Pues tali na' ca rna yaca benë': Yuguluro neziro bibi zaca' yaca ídolo. Pues nun quie baneziro cana', bireya'ala' huero cuinro ben' ze, den' reya'ala' edyë'ëro laguedyiro tacuenda huebë'raro xneza Diuzi mazerà. ² Chi raquero nacarò ben' rioñe'etzegue, lena' rulu'ru'en ni lë'ti' birioñe'ero cabë' reya'ala' tziõe'ero. ³ Chi nedyë'ëro Diuzi, nubë'cazi Diuzi ra'o.

⁴ Na'ra quie yela' huao rudyia yaca benë' lao ídolo quieyaquë', tali rnìa' bibi zaca' yaca ídolo rionla'adyi' yaca ben' nita' lao yedyi layu. Tuzi Diuzi zu guibá zaca', ganura diuzi tula zu. ⁵ Ba'ala'cazi chi rna yaca benë' naca zë diuzi zu guibá, ba'ala'cazi rnayaquë' naca zë diuzi nita' lao yedyi layu, ba'ala'cazi rnayaquë' nita' ben' zë, ben' naca Señor quiero, ⁶ pero ra'o neziro tuzi Diuzi zu. Lëlëbë' naquë' Xuziro. Lëlëbë' bzalogue' yugulu ta de guibá len lao yedyi layu. Bzalarënë' ra'o, ben' nita' lao yedyi layu. Lëscan' tuzi Jesucristo naquë' ben' Señor quiero. Yugulute ta de guibá len lao yedyi layu nacan quienë'. Lente ra'o nacarëro quienë'.

⁷ Pero cala nezi yugulu ben' nao xneza Jesús de que bibi zaca' ídolo. Dza na'la uy-onla'adyi'yaquë' nu ídolo. Na' caora raoyaquë' na'a, reza'la'adyi'yaquë' quie yela' huao bdyia yaca benë' lao ídolo. Na'ra como binetzioñe'eyaquë' dyë'ëdi quie xti'idza' Diuzi, raqueyaquë' rueyaquë' tamedian chi raoyaquë' yela' huao ta bdyia benë' lao ídolo. ⁸ Pero cala por nun quie yela' huao ta raoro ilë'ë Diuzi ra'o ben' huen. Biinaro nacaro ben' mala chi gaoro bi ta dyia nu lao ídolo. Lëzi binaro nacaro ben' huen chi bigaoro bi ta dyia lao ídolo. ⁹ Dyë'ëdi baneziro para ra'o ru'en lato chi gaoro, chi bigaoro, ta rudyia yaca benë' lao ídolo. Pero yaca ben' binetzioñe'e dyë'ëdi quie xti'idza' Diuzi, bineziyaquë' ru'en lato chi gaoro, chi bigaoro. Quie lena' reya'ala' gaparo cuidado ta bihuero ta quixi yaca ben' binetzioñe'e dyë'ëdi quie xti'idza' Diuzi. ¹⁰ Tu di'idza' rnìa' le'e. Chi le'e cue'le gaole ga bdyiayaquë' yela' huao lao ídolo, chi guida tu ben' nao xneza Jesús, ben' binetzioñe'e dyë'ëdi quie xti'idza' Diuzi, chi ilë'ënë' le'e gan' re'le raole, na' ruen zudyi gue'ennë' gaurënë' yela' huao bdyia yaca benë' lao ídolo. ¹¹ Na'ra chi gacan can', bibële huen. Por nun quie yela' rioñe'e quiele, bële ta uquixi tu ben' nao xneza Jesús, ben' binetzioñe'e dyë'ëdi quie xti'idza' Diuzi. Lëscan' por lëbë' guti Cristo lë'ë yaga cruzo. ¹² Lao Cristo gata' dula' xquia quiele chi por le'e aouquixi ben' nao xneza Jesús, ben' binetzioñe'e dyë'ëdi quie xti'idza' Diuzi. ¹³ Quie lena' chi por nun quie udaohua' yela' huao bdyia yaca benë' lao ídolo, chi cana' dula' quia' na' uquixi itu ben' nao xneza Jesús, nacalan dya'a bira gaohua' bë'ëla' bdyia yaca benë' lao ídolo tacuenda bihuen zudyi dula' quia' na' uquixi ben' bicha', ben' nao xneza Jesús.

9

Ni rnan quie yela' rnanbë' quie yaca apóstol

¹ ¿Binezile napa' derecho? ¿Binezile naca' apóstol? ¿Binezile blë'ëda' Jesús Señor quiero? Dyin quie Diuzi bia' dza na' uduxogui'a le'e xti'idza' Diuzi banacale ben' nao xneza Jesús. ² Nita' ben' birezaque në'ëdi' chi naca' apóstol. Pero le'e, decazide reya'ala' yezaqule në'ëdi' chi naca' apóstol, dan' dyin quia' na' nacale ben' nao xneza Jesús. Lena' nacan prueba tali na' naca' apóstol.

³ Ni yequëba' quie yaca ben' rnë condre në'ëdi': ⁴ Napa' derecho inaba' ta gunle ta gaohua' len ta yo'oga'. ⁵ Lëzirë napa' derecho si'a nigula nao xneza Jesús gaca žgula' con ca rue yaca los demás apóstoles, lenlë yaca ben' bichi Jesús, len Pedro. ⁶ ¿Bixquien' racale pensari rupazi Bernabé len në'ëdi', bibi derecho napando' inabando' le'e gunle ta huendo' gasto quiendo' caora cati rdando' rguixogue'ndo' yaca benë' xti'idza' Diuzi? ⁷ ¿Binezile ganu nunu soldado rguizuguë' cuinzë' ta gaonë' len ta gaonë'? ¿Lëzi binezile quie ben' raza bedzuli'? Napë' derecho gaohuë' ta razë'. ¿Lëzirë binezile quie ben' rapa beco' zi'ila'? Napë' derecho si'në' nidyi' quieba' yo'oguë'. ⁸ Bireya'ala' huele pensari ta racazi la'adya' rnia', porque lëscan' cana' rnën lë'ë guichi ley quie Moisés. ⁹ Lë'ë guichi na' rnën cani: "Bireya'ala' udze'ro du ru'a bëdyihuaga caora rdaba' rutzutzu rulioba' bdyigo' quie trigo ta ero bini quien."

Con ca rna lë'ë guichi, cala quie bëdyihuagazi rnën. ¹⁰ Lëzi rnërën quie ra'o benë', porque udiru Diuzi ley quienë' ta gacalën ra'o. Pues lao tu ben' ruzolo yu, len itu ben' rchugo trigo, rupayaquë' rbezayaquë' yezi'yaquë' usecho quieyaquë'. ¹¹ Para le'e nacando' ca quie ben' guza bini trigo, dan' bëndo' dyin quie Diuzi udixogue'ndo' le'e xti'idzë'. Lëlena' ¿bixquien' raquele pensari bireya'ala' si'ndo' usecho? ¿Bixquien' raquele pensari binapando' derecho inabando' gacalële në'to' ta rdzioguendo' ta gaondo' len ta yo'ondo' tu nerdando' lao yedyi layu? ¹² Naparando' derecho inabando' le'e gacalële në'to' cala ca yaca ben' tula.

Pero ni tu lasa binabando' le'e gacalële në'to'. Yugulute baozuendo' tacuenda bicuezan quixogue'ro yaca benë' cabë' una Cristo, cabë' bënë' quiero. ¹³ Banezile ca naca quie ben' napa dyin quie idao'. Por nun quie dyin hueyaquë' lu'u idao', cana' hueyaquë' gan ta gaoyaquë'. Lëscan' nezile nun quie rapayaquë' ru'aba ta zu lu'u idao', cana' napayaquë' derecho gaoyaquë' bë'ëla' dyia ru'aba nacan gun quie Diuzi. ¹⁴ Lëzirë cana' re'en Cristo gaca quie në'to', ben' rguixogue' di'idza' la'iya quië'. Tanun quie rdando' rguixogue'ndo' yaca benë' di'idza' la'iya quië', cana' napando' derecho inabando' le'e gunle ta gaondo', len ta yo'ondo', len ta gaondo'. ¹⁵ Pero ni tu lasa binehuena' le'e zëdi inaba' ca ta reya'ala' gunle në'ëdi'. Lëzi cala rua' guichi ni ta inaba' gunle në'ëdi' bi cosa. Zua' dispuestu gatia' lao laza inaba' le'e bi cosa, chi por lena' biyega'nro huen, na' bisua' contento.

¹⁶ Birua' ze cuina' nun quie nacan dyin quia' rguixogui'a benë' xti'idza' Diuzi. Nacan ladyina'a rguixogui'a'. Re'en ca re'enna ruzua' di'idza' rguixogui'an, porque huaca bayëchi' quia' chi usana' biquixogui'a benë' xti'idza' Diuzi. ¹⁷ Chi quixogui'a benë' xti'idza' Diuzi de gustoz, huega'nnan huen quia'. Chi quixogui'ayaquë' xti'idza' Diuzi con ganzi, decazide nacan ladyina'a ta pca'n Diuzi lao na'a. ¹⁸ ¿Cabizi' yega'nnan huen quia'? Cani yega'nnan huen quia': Huabe' chizi gula lu'u guicho laxta'ohua' nun quie bibi unaba' le'e caora udirugui'a le'e xti'idza' Diuzi. Ba'ala'cazi napa' derecho inaba' le'e, bibi unaba' le'e.

¹⁹ Ba'ala'cazi binaca' ben' zulao xa'ne, rua' ca quie ben' zulao xa'ne tacuenda hua' gan inao benë' zë xneza Cristo. ²⁰ Cati zua' lado yaca ben' Israel, rua' ca rueyaquë'. Ca naoyaquë' ley pca'n Diuzi lao na'a Moisés dza na'la, cana' rnaoria' ley na'. Cana' rua' ba'ala'cazi binaca' cuenda len leyaquë' ta inaohua' ley na', pero naohua' ley na' tacuenda hua' gan inaoyaquë' xneza Cristo. ²¹ Lëzi cati zua' lado yaca ben' binao ley pca'n Diuzi lao na'a Moisés, binaohua' ley na' tacuenda hua'yaquë' gan inaoyaquë' xneza Cristo. Pero cala binaohua' ley, porque rnaocaza' ley quie Diuzi nun quie rnaohua' ley quie Cristo. ²² Lëzi cati zua' lado yaca ben' binetziõe'e dyë'ëdi quie xti'idza' Diuzi, birua' cuinza' ben' rionë'e tacuenda hua' gan' inoara'yaquë' mazera xneza Jesús. Cana' rua' cati zua' lado yugulute benë' ga ra'a, rueria' lëbizi len leyaquë' tacuenda inaoyaquë' xneza Jesús gata' yela' neban quiejë' tuzioli. ²³ Cana' rua' tacuenda ye yaca benë' xti'idza' Diuzi gata' yela' neban quieyaquë' tuzioli. Cana' rua' tacuenda hua' tu parte quia' nacan cuenda quia' quixogui'a xti'idza' Diuzi. ²⁴ Banezile ca naca quie ben' ru'u carrera. Ba'ala'cazi tapa ga'yo'yaquë' tzu'uyaquë' be, pero tuzë' hue gan premio. Lëzi le'e, ulenao xneza Jesús du guicho du la'adyi'le tacuenda huele gan premio quien. ²⁵ Yaca ben' rue deporte gapayaquë' cuinyaquë' dyë'ëdi tacuenda gacayaquë' ben' tzutzu huala. Cana' rueyaquë' cuenda hueyaquë' gan tu coron de la'aga'. Na'ra coron la'aga' hueyaquë' gan, huabidyin huabiagiui'n, biden tuzioli. Pero ca naca premio gun Diuzi ra'o, biibidyin bicuiagiui'n, den tuzioli. ²⁶ Quie lena', por tu parte quia' në'ëdi', bita' ca rda ben' laochula, bihua' ca rue ben' rdilalë be ladzazi. ²⁷ Biru'a lato hua' ca ta rna cuerpo quia'. Bire'enda' huen žudyi quia' idza' Diuzi në'ëdi', dan' biunaohua' xti'idza' Diuzi dza caora psëdia' yaca benë' ta inaoyaquë' xti'idza' Diuzi.

10

Ga rnën condre yaca ídolo

¹ Bicha', rnia' le'e ta yeza'la'adyi'le cabë' guca quie yaca xuzixta'oro. Yuguluyaquë' unaoyaquë' tu plari nacan beo ta bzë Diuzi ladza dza broyaquë' nación Egipto. Lëzi

yuguluyaquë' uderëyaquë' lu'u nisadao' laona Nisadao' Zna. ² Gucayaquë' tuze len Moisés dza na'te caora unaoyaquë' plari nacan beo udeyaquë' lu'u Nisadao' Zna. ³ Bë Diuzi yela' huaca quienë' pchizë' yela' huao ta udao yugulute yaca xuzixta'oro, ben' ziolë Moisés tzaže. ⁴ Lëzirë bë Diuzi yela' huaca quienë' ulioguë' nisa lu'u yo ta hue'e yugulute yaca xuzixta'oro. Lëyo ga bro nisa rnën quie Cristo, ben' ziolë leyaquë'. ⁵ Pero ude gatzoyaquë' gutiayaquë' lao lato ga bidyia yu'u nun quie biyaxe Diuzi ca bëyaquë'.

⁶ Ca beyëchi' gula guca quieyaquë', reya'ala' huero pensari ta bihuero tamedian ca tamedian bë xuzixta'oro. ⁷ Lëscan' bireya'ala' tzionla'adyi'ro nu ídolo cabë' bë bala yaca xuzixta'oro. Lena' rnën lë'ë guichi la'iya quie Diuzi cani: "Bizi yaca benë' ure'yaquë' udaoyaquë' hue'eyaquë'. Bëyaquë' lani ta uyonla'adyi'yaquë' ídolo quieyaquë'." Cana' nan lë'ë guichi la'iya quie Diuzi. ⁸ Quie lena' bihuele bizinaquezi utilale nigula binaca žgulale con cabë' bë yaca xuzixta'oro. Por len guti galobetzona milayaquë' lao tu dzazi. ⁹ Lëzi bireya'ala' huero bizinaquezi cabë' bë yaca xuzixta'oro bdza' Diuzi leyaquë'. Caora beyudyi yela' žela'adyi' quie Diuzi, use'elë' bëla ta udi'imba' leyaquë' gutiteyaquë'. ¹⁰ Bireya'ala' inaro di'idza' bižu condre Diuzi cabë' una yaca xuzixta'oro dan' unajë' bigucalë Diuzi leyaquë'. Caora na' use'ela' Diuzi tu ángel quië' ta bëtinë' leyaquë'.

¹¹ Ca ta užaca yaca xuzixta'oro timpote nacan ta huero pensari bihuero ca bëyaquë'. Por lena' bzu Moisés di'idza' lë'ë guichi la'iya quie Diuzi ta gacalën ra'o dza rdaro nebanro baruen bago yeyudyi yedyi layu. ¹² Cani rnia', ra'o raquero zioro dyë'ëdi inaro xneza Diuzi, pero reya'ala' gaparo cuidado ta biiquixiro huero con ganzi. ¹³ Con bitezi prueba gaca quiero, huacalë Diuzi ra'o ta sueron. Sudyi'ilëro Diuzi bihuenë' lato gata' prueba quiero bisuero. Cati gata' prueba quiero, biusanla'adyi'në' ra'o, gacalënë' ra'o ta bihuero tamedian.

¹⁴ Lëlena' rnia' le'e ben' bicha', ben' nedyë'ëda'. Ibiga'le tzala'la, bitzionla'adyi'le yaca ídolo. ¹⁵ Rnia' le'e como ca ben' banezi con cabë' rna xti'idza' Diuzi. Huanezile cabë' naca di'idza' baonia' le'e, chi nacan huen, chi binacan huen. ¹⁶ Caora yo'oro vino nisa bedzuli' rëbriro Diuzi diuxcalelo', caora na' reza'la'adyi'ro nacalëronë' tuze nun quie ulato ren quienë' ta gaca huen quiero. Lëscan' caora gaoro yëta xtila rulidzaronë', caora na' reza'la'adyi'ro nacalëronë' tuze nun quie gutinë' lë'ë yaga cruzo ta gaca huen quiero. ¹⁷ Ba'ala'cazi nacaro ben' zë, tuzi yëta xtila gaoro yuguluro. Quie lena' nacalëro tuzi len Cristo.

¹⁸ Ina'le dyë'ëdi cabë' rue yaca ben' Israel. Caora raoyaquë' ta rudyiayaquë' ru'aba quie Diuzi, lena' rlu'en quieyaquë' rionla'adyi'yaquë' Diuzi. ¹⁹ Pero žbizi inaro quie ben' rudyia bë'ëla' lao ídolo? Inaro bibi zaca' ídolo rionla'adyi'yaquë'. Inaro quie bë'ëla' rudyiayaquë' lao ídolo binaca la'iya bë'ëla', bë'ëla'zi nacan. ²⁰ Caora rudyiayaquë' bë'ëla' ru'aba quieyaquë', cala rionla'adyi'yaquë' Diuzi, taxi'ibi'la rionla'adyi'yaquë'. Bire'enda' huele tuze len yaca taxi'ibi'. ²¹ Bisaque' gacalëro Cristo tuze chi nacalëro yaca taxi'ibi' tuze. Bisaque' tzionla'adyi'ro Cristo chi rionla'adyi'ro yaca taxi'ibi'. ²² ¿Bixquien' re'enle idza' Diuzi le'e? ¿Bixquien' ruera le'e ze ca Diuzi?

Ni nan ca reya'ala' gacalëro ben' bichiro, ben' binetzioñe'e dyë'ëdi quie xti'idza' Diuzi

²³ Tali na' huaca huero yugulute ta re'enro huero, pero cala yugulu ta re'enro huero nacan dya'a quiero, cala yugulu ta re'enro huero huacalën ra'o ta tzioro inaoro xneza Jesús. ²⁴ Bireya'ala' huero yaladyi' lëro laguedyiro. Reya'ala' huero tahuen gacalëro laguedyiro.

²⁵ Ta ruti'yaquë' lao ye'eya, huaca gaoro yuguluten. Nica inabaziro ga yexi'yaquë'n. Lena' binacan ta idëbiri bë' gaoron. ²⁶ Binacan ta idëbiri, dan' yugulute ta de lao yedyi layu nacan ladyina'a Diuzi.

²⁷ Chi re'en tu ben' binao xneza Jesús tzioro ta gaolëronë' tzaže, chi re'enro tzioro, huaca gaoro yugulute ta gunnë'. Nica inabazironë' ga yexi'në'n. Lena' binacan ta idëbiri bë' gaoron. ²⁸ Pero bigaoron chi inanë' ra'o: "Yela' huao niga nacan ta bdyiando' lao yaca ídolo." Chi cana' unë', bigaocaziron ta inezi ben' na' bireya'ala' gaoron chi neziro bë'ëla' ta bdyiayaquë' lao ídolo. ²⁹ Anezda' de que nezile bireya'ala' gaoron, pero ben' na' binezinë' bireya'ala' gaoron.

Pero huanaba ben' re'en gao bë'ëla': "¿Bixquien' nao' bireya'ala' gaohua' bë'ëla' ta dyia lao ídolo, chan' anezda' binaca la'iya bë'ëla', bë'ëla'zi nacan? Lena' biuzagan në'ëdi' ta bigaohua'n. ³⁰ Chi yëpa' Diuzi diuxcalelo' bë' gaohua'n, žbixquien' inë benë' condre në'ëdi' bë' gaohua'n?" ³¹ Pues cani yequëba' ben' una në'ëdi' cana': Chi gaoro bi cosa, chi bigaoro bi cosa, chi yo'oro bi cosa, chi biyo'oro bi cosa, con bitezi huero, hueron ta huero Diuzi ben' ze. ³² Reya'ala' gaparo cuidado ta bihuero con ganzi ta biiquixi yaca benë', la'achi ben' Israel, la'achi ben' binaca ben' Israel, la'achi ben' nao xneza Cristo. ³³ Por tu parte quia' në'ëdi', quele beyudyi raca' ta gaca tahuen quia' cuinza', den' lëscan' para yugulute yaca benë', raca' ta gaca tahuen quieyaquë' gata' yela' neban quieyaquë' tuzioli.

11

¹ Cabè' rua' rnaohua' xneza Cristo, lèscan' le'e reya'ala' inaoële huerële ca rua'. ² Bicha', redaohueda' rlè'èda' cabè' ruele reza'la'adyi'le nè'èdi', banaole dyè'èdi con cabè' baonia' le'e. ³ Re'enda' tziõe'ele de que naca Cristo ben' r nabè' ra'o. Lèzi cabè' ra'o r nabè'ro nigula quiero, cana' Xuziro Diuzi ar nabè'nè' Cristo. ⁴ Chi utacoro guichoro caora cati hue'lèro Diuzi di'idza', o chi caora cati quixogue'ro yaca benè' xti'idza' Diuzi gan' yegu'udi'ro huero culto, cana' biraparo bala'ana Cristo, ben' r nabè' ra'o. ⁵ Pero netza' quie yaca nigula, chi biutaconè' guichonè' caora cati hue'lènè' Diuzi di'idza', o chi caora cati quixogue'nè' yaca benè' xti'idza' Diuzi gan' yegu'udi'ro huero culto, cana' birapanè' bala'ana xquiunè', ben' r nabè' lèbè'. Lena' nacan ca quie tu nigula baochibi guichogue. ⁶ Yaca nigula reya'ala' uchibinè' guichonè' chi bire'ennè' utaconè' guichonè'' caora cati hue'lènè' Diuzi di'idza'. Pero chi reduè'nè' uchibinè' guichonè', reya'ala' utaconè' guichonè'. ⁷ Pero bireya'ala' utaco be'mbyu guichonè', dan' neya'anè' ca Diuzi, huenè' ze Diuzi. Pero nu nigula huenè' ze be'mbyu. ⁸ Diuzi, cati bzaloguè' bèguè' be'mbyu, cala nigula uzi'guè' bèguè' be'mbyu. Pero cati bzaloguè' bèguè' nigula, na'ra uzi'guè' be'mbyu bèguè' nigula. ⁹ Por nun quie be'mbyu bè Diuzi nigula. Cala por nun quie nigula bè Diuzi be'mbyu. ¹⁰ Tana' lena' reya'ala' utaco nigula guichonè' ta ulu'en rapanè' bala'ana yaca be'mbyu, dan' naca be'mbyu ben' r nabè' quienè'. Lèscana' ruerè yaca àngel rapayaquè' bala'ana Diuzi. ¹¹ Pero re'en Diuzi huero dyin quienè'. Rnaban yuguluro hueron, chi be'mbyu, chi nigula. ¹² Nacan tabala uzi' Diuzi be'mbyu bzaloguè' bèguè' nigula. Lèzirè nacan tabala nigula baraloguè' quie be'mbyu. Pero dyin bè Diuzi bazu rupateyaquè'.

¹³ Le'e ulehuecara pensari chi nacan huen, chi binacan huen, chi biutaco nigula guichonè' caora hue'lènè' Diuzi di'idza'. ¹⁴ ¿Binezile nacacazin yela' stu' quie be'mbyu cuia guitza' guichonè' tona? ¹⁵ Pero nacacazin bala'ana quie yaca nigula cuia guitza' guichonè' tona. Bè Diuzi guitza' guichonè' tona ta utacon guichonè'. ¹⁶ Lèzirè rnia' le'e chi nita' ben' biraxe ca baonia', reya'ala' ineziyaquè' nacan tabala ca baonia'. Nèto' len yaca los demás ben' nao xneza Jesús, naca tuzi ca di'idza' rnèndo'.

Ni nan cabè' bibèjè' huen caora udaoyaquè' rtze' quie Cristo

¹⁷ Ta rnia' le'e niga binacan ta yedaohueda' ca bèle, dan' na yaca benè' de que lao laza huele tadya'a, ruele tamedianla gan' regu'udi'le ruele culto. ¹⁸ Cana' rna yaca benè' de que gan' regu'udi'le ruele culto rela' laguèdyile binacale tuzi. Lèlena' raqueda' nacan tabala con cabè' na yaca benè'. ¹⁹ Cala ta reya'ala' huele ruele barbirole laguèdyile chopatza cue'. Raquele chi huele cana', cana' inezile nu ben' nao xneza Jesús du guicho du la'adyi', pero pensarizi huele huele cana'. ²⁰ Le'e dan' ruele cana', bibi zaca'n regu'udi'le raole reza'la'adyi'le Cristo. ²¹ Gan' regu'udi'le ta gaole binacan huen biraole tzaze. Balale larbialaotele raole. Na' ibalale rega'nle sin gaole. Na' ibalale ri'ole zudyile. ²² ¿Bixquien' raquele bizu yu'u quiele ga gaole, ga yo'ole? Dula' quiele ružidyiyaca benè' di'idza' la'iyay quie Diuzi. Lèzirè dula' quiele reduè' ben' bi de ta gao. ¿Cabizi re'enle inia' le'e? ¿Re'enle inia' le'e ruele tahuen? Bisaque' inia' le'e ruele tahuen.

Ni rguixogue'n ga ze'lao beyudyi udao Jesús rtze' quie lani Pascua
(Mt. 26.26-29; Mr. 14.22-25; Lc. 22.14-20)

²³ Na'ra ta inia' le'e niga nacan ta una Cristo nè'èdi': Zadze' dza caora ilè'èti'zi guxuyaquè' lèbè', caora na' uzi'nè' tu yèta xtila ²⁴ gudyinè' Diuzi: "Diuxcalelo." Te na' bžuzunè'n na' unè': "Ulegao yèta xtila ni. Lena' nacan ca quie cuerpo quia'. Huatia' cuenda gata' yela' huezizè quiele lao Diuzi. Cabè' bèlia' le'e niga, cana' huerèle ta yeza'la'adyi'le nè'èdi' cabè' bia' quiele." ²⁵ Lèzirè beyudyi udaohuè', uzi'nè' tu copa bazènè'n. Na'ra unè': "Vino nisa bedzuli' yudzu copa ni nacan ca quie ren quia'. Lena' ilatoga' gatia' cuenda yega'ntza'olè Diuzi le'e tacubila. Con bè' yo'ole vino nisa bedzuli' gan' yegu'udi'le, cana' huele ta yeza'la'adyi'le cabè' bia' quiele." Cana' una Cristo. ²⁶ Na' nia' le'e de que con cabè' gaoro yèta xtila yo'oro nisa bedzuli' gan' yegu'udi'ro, lena' yeza'la'adyi'ro cabè' guca quie Cristo gutiè' lè'è yaga cruzo. Cana' yeza'la'adyi'roguè' hasta dza cati yeguidè' lao yedyi layu tatula.

Ni rnan gaparo cuidado bè' gaoro rtze' quie Cristo

²⁷ Chi gaoro yo'oro con ganzi bè' yeza'la'adyi'ro cabè' bè Cristo quiero, lena' saquero quienè' ca quie ben' bibi zaca'n cuerpo quie, ben' bibi zaca'n ren quie. ²⁸ Reya'ala' yeyuero pensari chi ruero tamala, na'tera ixubalèpiro lao Diuzi ta yezi'zenè' quiero bè' gaoro yeza'la'adyi'ro Cristo. ²⁹ Porque nacacazin dula' xquia quiero lao Diuzi chi raoro ri'oro yeza'la'adyi'ro Cristo con ganzi, bihuero pensari chi quie Cristo hueron bè' gaoro yo'oro. ³⁰ Quie lena' bala le'e baraca zhue'le, ibala le'e binapale fuerza, ibala le'e ratile. ³¹ Chi yeyuero pensari chi ruero tamala, na'tera ixubalèpiro tacuenda yezi'ze Diuzi quiero, chi

huero cana', bigata' dula' xquia quiero lao Diuzi. ³² Pero cati rdilané' ra'o, nacan ta bihuero tamedian ta bigata' castigo quiero ca castigo gata' quie yaca ben' binao xneza Jesús dza hue Diuzi juicio lao yedyi layu.

³³ Lèlena' ben' bicha', bè' yegu'udi'le gan' gaole bè' yeza'la'adyi'le quie Cristo, reya'ala' cuezale guida lagueyile ta gaole tzaže. ³⁴ Chi barduele gaole, reya'ala' gaole žan yu'u quiele, na'tera tzirole gan' yegu'udi'le gaole rtze' quie Cristo, pero cala con ganzi tacuenda bigata' castigo quiele lao Diuzi. Lèzi hueria' arreglo ca yaca ta began' bè' guida' tatula ideyuba' le'e.

12

Netza' ta banegun Diuzi quie tu turo

¹ Bicha', re'enda' inia' le'e ta inezile ca naca ta banegun Diuzi quie tu turo ra'o ben' nao xneza Jesús.

² Le'e dyè'èdi nezile ca guca quiele dza biunaole xneza Jesús, bipsanle unaole nu ídolo bero quiele. ³ Tana' lena' re'enda' inezile nitu nunu ina utasi unia Cristo chi nacan tabala yu'uyaquè' Bichi Be quie Diuzi. Lèzirè re'enda' inezile nitu nunu ina du guicho du la'adyi': "Naca Cristo Señor quia'", chi biyu'uyaquè' Bichi Be quie Diuzi.

⁴ Ca naca ra'o ben' nao xneza Jesús, netza' ta banegun Diuzi tu turo ta uzuro di'idza' quienè' inaooro xnezè'. Pero tuzi Diuzi zu guibá banegunnè' quiero. ⁵ Tazè modo de ta huero inaooro xneza Diuzi, pero cala zè diuzi zu, tuzi Diuzi zu guibá inaooro xnezè'. ⁶ Tazè modo de ta hue Diuzi ca re'ennè' huenè', pero tuzi Diuzi zu guibá huenè' yugulu ca re'ennè' huenè'. ⁷ Diuzi rulu'ecazinè' ra'o yu'ucaziro Bichi Be quienè' ta gata' tadya'a quiero yuguluro. ⁸ Diuzi, conlè Bichi Be quienè', banegunnè' bala ra'o ta tziõe'ero dyè'èdi con cabè' rna di'idza' la'iya quienè'. Lèzirè Diuzi, conlè Bichi Be quienè', banegunnè' ibala ra'o ta neziro dyè'èdi ca naca pensari quienè'. ⁹ Lèzirè Diuzi, conlè Bichi Be quienè', banegunnè' ibala ra'o ta sudyi'ilèronè' dyè'èdi. Ibala ra'o banegunnè' ta yeyuero ben' raca žhue'. ¹⁰ Ibala ra'o banegunnè' ta huero yela' huaca quienè'. Ibala ra'o banegunnè' ta tzetixogue' ra' yaca benè' di'idza' la'iya quienè'. Ibala ra'o banegunnè' ta yezaquero nu ben' yu'u bichi be xi'ibi', nu ben' yu'u Bichi Be quie Diuzi. Lèzi ibala ra'o banegunnè' ta inèro di'idza' binaca xti'idza'ro. Ibala ra'o banegunnè' ta yexi'idze'ro benè' bi re'en ina di'idza' binaca xti'idza'ro. ¹¹ Tuzi Bichi Be quie Diuzi ru'enè' laze banegunnè' quie quiero según ca re'en Diuzi gaca quiero.

Ba'ala'cazi netza' quie tu turo, yuguluro nacalèro Cristo tuze

¹² Ba'ala'cazi tuzi naca cuerpo quiero, pero naya'n zè cue'. Cana' nacarè quie ra'o ben' nao xneza Jesús. ¹³ La'achi ben' Israel, la'achi ben' tula, la'achi ben' zu lao xa'ne, la'achi ben' bizu zu lao xa'ne, con nutezi, nacalèro Cristo tuzi. Naca quiero ca quie tuzi benè' nun quie yugulutero yu'uro Bichi Be quie Diuzi. Tuzi Bichi Be quie Diuzi zu. Lao na'a Bichi Be quie Diuzi nacaro tuze len lèbè'.

¹⁴ Naya' cuerpo quiero zè cue', cala tu cue'zin. ¹⁵ Inaro chi ni'aro inèn inan: "Dan' binaca na'alo', bineya'a naca' cuerpo quio'." Ba'ala'cazi ina ni'aro cana', neya'cazin de cuerpo quiero. ¹⁶ Lèzirè inaro chi nagaro inèn inan: "Dan' binaca' laolo', bineya'a naca' cuerpo quio'." Ba'ala'cazi ina nagaro cana', neya'cazin de cuerpo quiero. ¹⁷ ¿Bizi huero yero chi naca cuerpo quiero tulizi laoro? ¿Bizi huero ilè'èro chi naca cuerpo quiero tulizi nagaro? ¹⁸ Pero Diuzi bzalonè'n bè'nè'n quie quien según ca re'ennè'. ¹⁹ Chi tu cue'zin naca cuerpo quiero, gabi de huenan. ²⁰ Lèscan' ba'ala'cazi naya' cuerpo quiero zè cue', pero nacacazin tuzi.

²¹ Laoro bisaque' yèbin na'aro: "Birquinda' luè'." Lèzi guichoro bisaque' yèbin ni'aro: "Birquinda' luè'." ²² Na' bizi tu ta neya' cuerpo quiero nacan yun'la'adyi', nacanar belao para cuerpo quiero. ²³ Dan' nacan yun'la'adyi' naya' cuerpo quiero, gapachi'ron dyè'èdi. Dan' nacan ta biillè'è benè' naya' cuerpo quiero, utacaron la'ari'. ²⁴ Pero biutacaro la'ari' nu guichoro nu laoro, como dan' nacan ta ilè'è benè'. Cana' ta naya' cuerpo quiero nacan yun'la'adyi', lèparte na' nacan tabelao para cuerpo quiero. Cana' bè' Diuzi bzalonè' ra'o ²⁵ tacuenda gaca tahuen quie cuerpo quiero, ta bigata' zèdi quie yaca ta naya' cuerpo quiero. Yuguluro ben' nao xneza Jesús, nacaro ca quie cuerpo quie Cristo dza rdaro lao yedyi layu. ²⁶ Tana' lena' chi tu parte ta naya' cuerpo quie Cristo redzagalaona, lèzirè yedzagalaorè yugulu ta naya' cuerpo quie Cristo. Lèscan' chi tu parte ta naya' cuerpo quie Cristo nacan dya'a, lèlena' nacan dya'a quie yugulute ta naya' cuerpo quie Cristo.

²⁷ Tahuen para ra'o nacan con baonia' le'e. Biži na'a ta re'enda' inia' le'e nacaro ca quie cuerpo quie Cristo. Quie tu tu ra'o nacaro ca quie ta naya' cuerpo quie Cristo. ²⁸ Tana' lena' ulio Diuzi ra'o, ben' nao xneza Jesús, ta huero zè cue' dyin quienè' ca re'ennè' huero. Tanèro ulioquè' ben' naca yaca apóstol. Taorupe ulioquè' yaca ben' rguixogue' benè' di'idza' la'iya quienè'. Taoyune ulioquè' ben' ruzioñe'e lagueydi di'idza' la'iya quienè'. Taodape

ulioquë' ben' rue yela' huaca quienë'. Na' ulioquë' ben' reyue ben' raca žhuae'. Na' ulioquë' ben' racalë laguedyi. Na' ulioquë' ben' rudze' ni'a xnezi. Na' ulioquë' ben' raca inë di'idza' binaca xti'idza'yaquë'. ²⁹ Cala yuguluro nacaro apóstol. Cala yuguluro nacaro ben' rguixogue' benë' di'idza' la'iya quie Diuzi. Cala yuguluro nacaro ben' ruzioñe'e laguedyi di'idza' la'iya quie Diuzi. Cala yuguluro ruero yela' huaca quienë'. ³⁰ Cala yuguluro reyue ben' raca žhuae'. Cala yuguluro racaro inëro di'idza' binaca xti'idza'ro. Cala yuguluro racaro yexi'idze'ro yaca benë' bi re'en ina di'idza' binaca xti'idza'ro. ³¹ Reya'ala' gue'enro gun Diuzi tadya'ara quiero. Pues ca rua' në'ëdi', re'enda' uzioñe'era' le'e tu ta nacara dya'a para le'e.

13

Reya'ala' idyë'ëro laguedyiro

¹ Na'ra nia' le'e, ba'ala'cazi raca' yugulu di'idza' de lao yedyi layu, ba'ala'cazi raca' inia' di'idza' ca di'idza' raca yaca ángel, pero chi binedyë'ëda' yaca benë', bibi zaca' ca ta raca' lao Diuzi. Naca' ca quie tu instrumento birgüedyin lëbi. ² Ba'ala'cazi rguixogui'a benë' di'idza' la'iya quie Diuzi, ba'ala'cazi rioñe'eda' yugulu ta nacan zëdi tzioñe'ero, ba'ala'cazi nezda' yugulu bi ta raca lao yedyi layu, ba'ala'cazi tanto raleda' quie Diuzi, huaca inia' ga zu tu ya'a ta tzion igu'unnan tzala'la, pero chi binedyë'ëda' yaca benë', bibi zaca' lao Diuzi. ³ Ba'ala'cazi rguisiria' bi ta de quia' ru'a yaca ben' yëchi', ba'ala'cazi usedyina' cuerpo quia' ta uzei yaca ben' rudie në'ëdi', pero chi binedyë'ëda' yaca benë', bibi gan de bia' lao Diuzi.

⁴ Chi nedyë'ëro yaca benë', nacaro ben' žela'adyi', nacaro ben' huen. Binacaro ben' žë', binacaro ben' huexa'a, ben' rue že cuine. ⁵ Chi nedyë'ëro yaca benë', biulidzaroyaquë' di'idza' lë'ë, biulidzaroyaquë' di'idza' xa'a. Chi nedyë'ëro yaca benë', quiloro modo para bi huero para gacalëroyaquë', biidza'ziroyaquë', biudze'la'adyi'royaquë'. ⁶ Chi nedyë'ëro yaca benë', biyedaohuero chi bi tu xquia bëyaquë'. Chi bëyaquë' tahuen, caora na' yedaohuero. ⁷ Chi nedyë'ëro yaca benë', yezi'zero quieyaquë', yezudyi'lëroyaquë' hue'lëroyaquë' di'idza' žela'adyi'.

⁸ Chi tali nedyë'ëro yaca benë', biusanro idyë'ëroyaquë'. Hueyudyi huedu bira quixogue'ro benë' di'idza' la'iya quie Diuzi. Hueyudyi huedu bira inëro di'idza' binaca xti'idza'ro. Hueyudyi huedu quie yela' rioñe'e quie yaca benë'. Pero cala hueyudyi huedu idyë'ëro yaca benë'. ⁹ Baoyoñe'ero ga'acaga ca tu ta baoyoñe'ero. Lëzi cana'rë baoyoñe'erëro ga'acaga ca naca di'idza' quie Diuzi ta rguixogue'ro benë'. ¹⁰ Pero cati idyïn dza yeguida Cristo, ben' rioñe'e yugulute, caora na' yeyudyi yedu tzioñe'ero ga'acaga, na'tera tzioñe'ero yugulu ca re'en Diuzi tzioñe'ero.

¹¹ Biži në'ëdi', caora guca' xcuidi' unia' ca rnë xcuidi', bia' pensari ca pensari quie xcuidi'. Pero caora uya'a guca' bi' huaca, hora na' bira bia' pensari quie xquidi', bia' pensari quie ben' huaca. ¹² Naca quiero ca quie ben' rna' yaohuan naca besu, birulu'en dyë'ëdi, pero huadyin dza ulu'en dyë'ëdi, na' ilë'ëro tal cabë' nacan. Nubë'da' ga'acaga ca naca bi cosa, pero huadyin dza cati huebë'da' yuguten tal cabë' nuebë' Diuzi në'ëdi'. ¹³ Quie lena' naca tzona ta biyeyudyi yedu quie. Biyeyudyi yedu zudyi'ilëro Diuzi, biyeyudyi yedu rbezaro dza tzioro tzasulëro lëbë', biyeyudyi yedu nedyë'ë Diuzi ra'o. Lao yuna cue' nacaran belao ta nedyë'ë Diuzi ra'o.

14

Biruguinte inëro di'idza' binaca xti'idza'ro

¹ Huele baiguin idyë'ële benë'. Lëzirë huele baiguin inaole huele con ca banegun Diuzi tu tule. Rueten baiguin quixogue'le benë' di'idza' la'iya quie Diuzi. ² Chi inële di'idza' binaca xti'idza'le, tuzi Diuzi nezinë' bi nale, dan' bisaque' tzioñe' yaca benë' tula, yaca ben' biraca di'idza' ca di'idza' rnële. Chi inële di'idza' binaca xti'idza'le, conlë Diuzizi hue'lële di'idza', cala conlë benë', dan' birioñe'eyaquë' ca rnële. ³ Pero chi le'e quixogue'le benë' xti'idza' Diuzi, lena' nacan ta tzioñe'eyaquë' yedaohueyaquë' inaoyaquë' xneza Jesús. Cana' yeyezeleyaquë'. ⁴ Lëzi chi inële di'idza' binaca xti'idza'le, lena' gacalën le'ezi ta inaorale xneza Jesús. Pero chi quixogue'le benë' di'idza' la'iya quie Diuzi, cana' gacalële yaca los demás ben' bichiro ta inaorayaquë' mazara xneza Jesús.

⁵ Ca ta re'enda', re'enda' yugulutele inële di'idza' binaca xti'idza'le. Pero ta re'enda' mazara, re'enda' quixogue'le yaca benë' xti'idza' Diuzi. Nacaran tabelaora quixogue'le benë' xti'idza' Diuzi, cala ca ta inële di'idza' binaca xti'idza'le. Rnia' le'e can' dan' chi bizu ben' yexi'idze' le'e bi re'en ina di'idza' rnële, quie lena' bigacalen yaca ben' bichiro ta inaorayaquë' mazara xneza Jesús. ⁶ Tana' lena' bicha', chi cati guida' idena'a le'e, chi inia' le'e conlë di'idza' binaca xti'idza'ro, lëlena' bigacalën le'e. Pero chi inia' le'e conlë di'idza' naca xti'idza'ro, chi usëdia' le'e xti'idza' Diuzi, lëlena' gacalën le'e.

⁷ Cabè' quie yaca instrumento rcuedyi ben' huecuedyi, como nu flauta, como nu harpa, chi biucuedyiaquè'n tu lèbi, biyu'u ni'a xnezi ta rucuedyiaquè', bineziro bi pieza pcuedyiaquè'. ⁸ Lèzirè quie yaca soldado, bè' sulaoyaquè' huedila, chi biucuedyiaquè' corneta xlaton, bibi puesto suyaquè' para tilayaquè'. ⁹ Cana' nacaré quiero. Chi inèro di'idza' biraca ben' ruzènaga quiero, bisaque' tzioñe'eyaquè'. Naca quiero ca quie ben' rnè cuinze. ¹⁰ Tali na' naca zè cue' di'idza' de lao yedyi layu. Lèscan' tali na' yugulun de ga yu'un ni'a xnezi tacuenda tzioñe'eron. ¹¹ Chi nu ben' inè n'è'èdi' di'idza' quienè' ta binaca di'idza' quia', bitzioñe'eda'n. Naca quia' len lèbè' cabè' ben' za' yedyi tula. ¹² Quie lena' huele baiguin ta huele ca ta banegun Diuzi le'e. Huele baiguin ta gata' entre le'e zè ben' gacalè laguedyi ben' bichiro ta inaorayaquè' mazara xneza Jesús.

¹³ Tana' lena' chi inèro di'idza' binaca xti'idza'ro, reya'ala' inabaro Diuzi gunnè' quiero ta uzioñe'ero benè' bi re'en ina di'idza' rnèro. ¹⁴ Caora ru'elia' Diuzi di'idza' binaca xti'idza', bisaque' tzioñe'e yaca ben' uzènaga quia'. Lena' nacan ca quie ben' ru'elè Diuzi di'idza' lu'u guicho laxta'ozì. ¹⁵ ¿Cabizi reya'ala' huero? Nacan huen hue'lèro Diuzi di'idza' binaca xti'idza'ro, pero nacalan huen hue'lèro Diuzi di'idza' naca xti'idza'ro tacuenda tzioñe'e yaca benè' bi re'en ina di'idza' rnèro. Nacan huen gularo himnos conlè di'idza' binaca xti'idza'ro, pero lèzi nacalan huen gularo himnos conlè di'idza' naca xti'idza'ro. ¹⁶ Cana' reya'ala' huero, porque chi hue'lèro Diuzi puro di'idza' binaca xti'idza'ro, bitzioñe'e ben' ruzènaga quiero bi narò. Bisaque' nu hue ra'o tuze para ulidzaro Diuzi yèbiroguè' xcalelo'. ¹⁷ Ba'ala'cazi nacan tahuen ta yèbiro Diuzi xcalelo', pero para yaca ben' bichiro, chi yèbiro Diuzi di'idza' binaca xti'idza'ro, bitzioñe'eyaquè'. Tana' lena' biracalèroyaquè' ca reya'ala' gacalèroyaquè' ta inaorayaquè' mazara xneza Jesús. ¹⁸ Rèpa' Diuzi diuxcalelo' dan' racaria' inia' di'idza' binaca di'idza' quia' mazara ca le'e. ¹⁹ Pero ga regu'udi'ro rsèdiro di'idza' la'ya quie Diuzi, rexerada' inia' ga'yo' di'idza' ta tzioñe'e yaca benè', cala ca ta inia' chi mila di'idza' binaca di'idza' quieyaquè'.

²⁰ Bicha', bitzu'ule pensari quie xcuidi'. Pero uletzu'u pensari quie ben' huaca ta bihuele con ganzi. Rnia' ta reya'ala' huele, huele ca quie xcuidi' binenezi neza mala. ²¹ Lu'u libro yu'u ley una Diuzi cani: "Huase'ela' tu ben' yedyi tula, ben' rnè di'idza' tula, ta quixogue'nè' yaca benè' ta ineziaquè' cabè' reya'ala' huejè' inaojè' xneza', pero bihueyaquè' lèbè' casa." Cana' una Diuzi. ²² Caora inaro di'idza' binaca xti'idza'ro, lena' nacan ca quie seña ta ulu'en quie yaca ben' binao xneza Jesús ca naca yela' huaca quie Diuzi. Binacan ta ulu'en quie yaca ben' nao xneza Jesús. Pero caora quixogue'ro di'idza' la'ya quie Diuzi, lena' nacan seña ta ulu'en quie yaca ben' nao xneza Jesús, binacan ta ulu'en quie yaca ben' binao xneza Jesús. ²³ Bi'zi con ga regu'udi'ro, chi yuguluro inèro di'idza' binaca xti'idza'ro, chi guidarè yaca ben' binao xneza Jesús ta uzènagayaquè', ¿cala huanayaquè' ra'o nacaro ben' raca loco? ²⁴ Pero chi ga regu'udi'ro rguixogue'ro di'idza' la'ya quie Diuzi, chi guidarè yaca ben' binao xneza Jesús ta uzènagayaquè', huacabè'yaquè' napajè' dula' xquia. Cana' hueyu'uyaquè' pensari bè' yeyaquè' xti'idza' Diuzi rguixogue'ro. ²⁵ Cana' ulu'en quieyaquè' yu'uyaquè' pensari median lu'u laxta'oyaquè'. Cana' quitzo zibiyaquè' ta ulidzayaquè' Diuzi inabayaquè' yela' huenitilao. Cana' ineziaquè' nacan tali zulè Diuzi ra'o.

Gan' regu'udi'ro reya'ala' huero puro ta yu'u ni'a xnezi

²⁶ Ta re'enda' inia' le'e, bicha', nacan cani: Gan' yegu'udi'le, reya'ala' gacalèle yaca ben' bichiro, ben' nao xneza Jesús ta inaorayaquè' mazarayaquè' xneza Jesús. Reya'ala' gulale alabanza. Reya'ala' usèdileyaquè' xti'idza' Diuzi. Reya'ala' uzioñe'eleyaquè' quie Diuzi. Hue'ennan inèle di'idza' binaca xti'idza'le, pero reya'ala' yexi'idze'leyaquè' bi re'en ina di'idza' inèle. ²⁷ Caora inèle di'idza' binaca xti'idza'le, reya'ala' inè chopale o tzonazile. Reya'ala' inè tu huio tu huiole. Lèzi reya'ala' itule yexi'idze'le bi re'en ina di'idza' rnèle. ²⁸ Chi bizu ben' yexi'idze' le'e bi re'en ina di'idza' rnèle, nacalan huen biinèle di'idza' binaca xti'idza'le gan' yegu'udi'le hue'lèle Diuzi di'idza'. Nacalan huen hue'lèle Diuzi di'idza' lu'u guicho laxta'ozile. ²⁹ Lèzirè caora quixogue'le yaca benè' di'idza' la'ya quie Diuzi gan' yegu'udi'le, reya'ala' inè chopale o tzonazile. Reya'ala' uzènaga ben' rzènaga dyè'èdi, na' hueyaquè' pensari chi rnèyaquè' tuzi ca naca xti'idza' Diuzi. ³⁰ Pero chi udze' Diuzi tu di'idza' lu'u laxta'o tu ben' re' ga regu'udi'le, chi re'en Diuzi inè ben' na' ca di'idza' bdze'nè', na'ra chi zè itu ben' rnènè', reya'ala' cue' ben' rnè tanèro tacuenda inè ben' taorupe, ben' udze' Diuzi di'idza' lu'u laxta'ohue. ³¹ Cana' reya'ala' huele, reya'ala' inèle tu huio tu huiole tacuenda tzioñe'e yaca los demás ben' bichiro. Cana' yedaohueyaquè' hue quieyaquè' xti'idza' Diuzi. ³² Caora rguixogue'le yaca benè' di'idza' la'ya quie Diuzi, reya'ala' quixogue'leyaquè' de gaxo gula. ³³ Cana' reya'ala' huele dan' naca Diuzi ben' rue ta yu'u ni'a xnezi. Biraxe Diuzi huero con ganzi.

Reya'ala' huele cabè' rue yaca los demás ben' bichiro, ben' nao xneza Jesús con gatezi regu'udi'yaquè'. ³⁴ Bireya'ala' cuialao nigula inènè' con ca be'mbyu gan' yegu'udi'le ulidzale Diuzi. Nacan cuenda quie be'mbyu cuialaohuè' inènè' gan' yegu'udi'le, bicuialao nigula inènè'. Cana' na ley yu'u lu'u libro quie Diuzi. ³⁵ Chi nu nigula re'ennè' inezinè' bi re'en ina di'idza' ina ja benè' gan' yegu'udi'le, reya'ala' inabanè' xquiunè' zan yu'u quienè', dan' binacan cuenda quie nigula ta cuialaonè' inènè' con ca be'mbyu gan' yegu'udi'le ulidzale Diuzi.

³⁶ Bihuele pensari conlè le'ezi uzulao Diuzi udixogue' benè' xti'idzè'. Bihuele pensari tuzi le'ezi nezile quie xti'idza' Diuzi. ³⁷ Chi nu bala le'e raquele banegun Diuzi quiele ta quixogue'le benè' di'idza' la'iya quienè', o chi raquele conlè Bichi Be quie Diuzi rnèle, reya'ala' hue quiele con cabè' rna di'idza' bzua' lè'è guichi ni, porque nacan mandado quie Cristo. ³⁸ Chi nu ben' bire'en hue quie con cabè' rna di'idza' bzua' lè'è guichi niga, bihuele casa quienè'.

³⁹ Cani nia' le'e ben' bicha': Reya'ala' quixogue'le benè' di'idza' la'iya quie Diuzi. Lèzi nia' le'e biuzegadyile quie ben' inè di'idza' binaca xti'idza'yaquè'. ⁴⁰ Yugulute con ca ruele, huele ta yu'u ni'a xnezi, bihuele con ganzi.

15

Cabè' guca guti beban Cristo

¹ Na'ra ben' bicha', re'enda' yeza'la'adyi'le con cabè' rna xti'idza' Diuzi udixogui'a le'e dza na'. Lèdi'idza' na' gulele quien dza na' nenaolen du guicho du la'adyi'le. ² Tanun quie baguele quie di'idza' baonia' le'e dza na', banacale ben' de yela' neban quie tuzioli chi rue quiele xti'idza' Diuzi inaolen du guicho du la'adyi'le, binaolen con ganzi.

³ Tanèro udixogui'a le'e ta naca belao, ta binenezile. Udxogui'a le'e con cabè' una Cristo nè'èdi', con cabè' guca quienè' gutinè' lè'è yaga cruzo ta yezi dula' xquia quiero. Cana' rnèn lè'è guichi la'iya quie Diuzi. ⁴ Beyudyi gutinè', na'ra pcachi'yaquè' lèbè'. Pero guca'lao tzona dza bebannè' tatula con cabè' rnèn lè'è guichi la'iya quie Diuzi. ⁵ Tanèro ptilalaonè' Pedro. Ude na' ptilalaonè' yaca los demás apóstoles. ⁶ Lèzirè ptilalaorènè' lao ga'yo' gayuhua yaca ben' bichiro. Neneban ibalajè', na' ibalajè' baguti. ⁷ Ude beyudyi na' ptilalaorènè' Santiago len lao yugulu yaca ben' pse'elè' ta tzetixogue'yaquè' benè' di'idza' la'iya quienè'.

⁸ Ga zelao ptilalaohuè' leyaquè', na'ra ptilalaorènè' nè'èdi'. Pero tu binetilalaonè' nè'èdi', bia' zèdi gula, bigu'unda' inaohua' xnezè'. Cana' guca quia' ca quie bdao' zaralo, pero zèdi gula. ⁹ Entre yaca apóstol tuza' nè'èdi' psaca' ben' nao xneza Jesús bizinaquezi dza na'tela. Lèlena' ni lè'èti' bibi yaca' ulio Diuzi nè'èdi' naca' apóstol quienè'. ¹⁰ Pero nacacaza' ca naca' conlè Diuzi, dan' naca Diuzi ben' huen, beyèchi'la'adyi'nè' nè'èdi'. Ca ta belè Diuzi nè'èdi', biuden cana'zi. Babèria' dyin quie Diuzi cala ca yaca los demás ben' rguixogue' di'idza' la'iya quienè'. Cala nia' cuinza' bia' dyin quie Diuzi. Gucalècazi Diuzi nè'èdi' dan' naquè' ben' ze beyèchi'la'adyi'nè' nè'èdi'. ¹¹ Cala bihuen chi nè'èdi', chi ben' tula, baodixogue'ndo' le'e di'idza' la'iya quie Diuzi. Ta naca belao ra udixogue'ndo' le'e xti'idzè', na' agulele.

Naca tali yeban yaca ben' baguti

¹² Chi nèto' rdando' rguixogue'ndo' yaca benè' de que guti beban Cristo ¿na'a bixquien' balale rnale bira yeban yaca ben' baguti? ¹³ Porque chi nacan tali bira yeban yaca ben' baguti, bisaque' inando' beban Cristo. ¹⁴ Chi nacan tali guti Cristo bibebannè', bisaque' inando' zaca' di'idza' quie Diuzi rguixogue'ndo' yaca benè', lèzi bisaque' inando' zaca' inaole xnezè'. ¹⁵ Chi nacan tali guti Cristo bibebannè', chi nacan tali biyeseban Diuzi yaca ben' aguti yaca, chi nacan cana', ye' rzi'ndo' benè' rguixogue'ndo'yaquè' beseban Diuzi Cristo. ¹⁶ Chi nacan tali biyeseban Diuzi yaca benè' baguti, bisaque' inando' besebannè' Cristo. ¹⁷ Chi nacan tali bibeban Cristo, bisaque' inando' zaca' inaole xnezè', lèzi bisaque' inando' bira nao dula' xquia quiele le'e. ¹⁸ Chi nacan tali cana', lèscan' bisaque' inando' huazi' Diuzi yaca ben' nao xnezè' caora gatiyaquè'. ¹⁹ Ca bayèchi' gula nacan quiero, chi nacan tali dza rdaro na'azi lao yedyi layu zaca' inaoro xneza Cristo, pero bibi zaca'n unaoro xneza Cristo caora gatiro.

²⁰ Pero nacan tali beban Cristo. Cana' ineziro yebanro ra'o len yaca los demás ben' nao xnezanè'. Ba'ala'cazi chi bagutiro, neziro huadyin dza useban Diuzi ra'o. Na'ra para tuzioli bira gatiro tatula. ²¹ Dyin quie tu ben' uzu tiempote rati yaca benè'. Pero dyin quie ben' use'ela' Diuzi lao yedyi layu yeban yaca ben' guti. ²² Gatiro yugulutero tanun quie dan' nacaro Zi'isuba Adán. Pero yeseban Diuzi ra'o, ben' nao xneza Cristo, tanun quie dan' nacalèro Cristo tuze. ²³ Pero según ca re'en Diuzi gaca, cana' huenè' quie quiero. Tanèro psebannè' Cristo ta ulu'enè' ra'o cabè' gaca quiero. Lèzi cana'rè useban Diuzi ra'o, ben' nao xneza Cristo, cati yeguida Cristo tatula lao yedyi layu. ²⁴ Te yedyi gaca can', na'ra yedyi quie lao yedyi layu. Lècaora na' udyiagu' Cristo yugulu ben' r nabè', ben' bè condre lèbè'.

Lëzirè te yeyudyi gaca can', tzesan Cristo yela' r nabè' quienè' uca'nnè'n lao na'a Xuzinè' Diuzi. ²⁵ Pero r nabè'cazi Cristo hasta bènè' gan pcaxonè' yugulute ben' rudie lèbè'. ²⁶ Ze'lao na' hue Cristo mandado yeyudyi yedu quie yela' guti tuzioli. ²⁷ Mandado bē Diuzi inabè' Cristo lao yugulute. Cana' rnèn lè'è guichi la'iya quie Diuzi. Pero ba'ala'cazi rnèn de que inabè' Cristo lao yugulute, bireya'ala' tzioñe'ero de que inabè' Cristo lao cuin Diuzi, dan' cuin Diuzi bènè' mandado inabè' Cristo. ²⁸ Te yeyudyi bega'n yugulute lao na'a Cristo, na'tera usedyinnè' cuinnè' lao na'a Xuzinè' Diuzi, ben' bē mandado inabè'nè' lao yugulute. Cana' hue Cristo uca'nnè' yugulute ta de lao na'a Xuzinè' Diuzi. Cana' gaca Diuzi ben' zera, ben' inabè'ra.

²⁹ Lëzi nita' bala ben' ru'e lao yaca ben' neban rnayaquè' cana' re'ennan ta yeban yaca ben' baguti. ¿Bixquien' rueyaquè' cana'? Chi birbezayaquè' yeban yaca ben' baguti, ¿ga huen dyin ru'eyaquè' lao ben' neban por nun quie ben' baguti?

³⁰ ¿Bixquien' yugu dza ruen zudyi guti benè' nètò'? ³¹ Rnia' le'e, ben' bicha', yugu dza barbeza' guti yaca benè' nè'èdi'. Nacan tali raca quia' cana' tal como nacan tali napa' gusto dan' banacale ben' nao xneza Jesucristo. ³² Pues nè'èdi' cabè' nia' le'e ga uya'a ciudad Efeso dza na', bedzagalaotzeguia' dula' quie yaca ben' rue ca rue lobo. Pero ¿bizi gan de bia' lao Diuzi chi nacan tali biyeban yaca ben' baguti? Chi nacan tali biyeban yaca ben' baguti, mejorla huero con cabè' una yaca ben' unè: "Gaocalaro yo'ocalaro, porque la'achi uxe, la'achi huidzo, ratiro."

³³ Bitzioguele yè!. Nacan tali con cabè' rna yaca benè: "Unitiro neza dya'a quiero chi inaoro yaca ben' rue tamedian." ³⁴ Ulehue pensari inaole neza dya'a. Biiquixile huele tamedian. Balale le'e binenezile ca naca Diuzi. Rnia' le'e can' ta yedue'le.

Ca gaca yeban yaca ben' baguti

³⁵ Nita'cazi yaca ben' inaba nètò' inayaquè': "¿Cabiži gaca yeban yaca ben' huati?" Lëzirè inayaquè': "¿Cabiži gaca quie cuerpo quie yaca ben' huati?" ³⁶ Di'idza' tondo rnayaquè' inayaquè' cana'. Bineziaquè' ca raca quie nu ben' raza bini. Decazide yeyu'udzo' bini ta ilè yaga quien yezun lao laza bini. ³⁷ Ta razayaquè', razayaquè' bini ta itinin gacan nicuan. Cala binacan nu nicuan razayaquè', la'acazi bini trigo, la'acazi birla bini tula. ³⁸ Bizi Diuzi hue'nè' laze quie quie yaca bini ta ilèyacan segùn ca naca yaca bini. ³⁹ Cala tu lèbizi naca cuerpo quie benè' len cuerpo quie yaca bia guixi'. Netza'la cuerpo quiero. Netza'la cuerpo quie yaca bia dyia tapa ni'e. Netza'la cuerpo quie yaca bia xile. Netza'la cuerpo quie yaca bela. ⁴⁰ Taze netza' ta dyia guibá len ta de lao yedyi layu. Netza' yela' baquitu quienan quie quienan. ⁴¹ Taze netza' xni' obidza. Taze netza' xni' biu'. Taze netza' xni' bélo. Lëzi entre yaca bélo dyia guibá, netza' yaca xni' quie quien. ⁴² Cana' nacaré quie yaca ben' huati yeban yaca. Caora bagutiro, na'ra bayu'u cuerpo quiero lu'u yu ta gu'udzona. Pero caora useban Diuzi ra'o, tuzioli bira gatiro. ⁴³ Ra'o rudze'ro lu'u yu tu ta naca gula. Pero Diuzi usebannè' tu ta naca cubi. Ra'o rudze'ro lu'u yu tu ta bira de yela' neban quie. Pero Diuzi usebannè' tu ta gata' yela' neban quie tuzioli. ⁴⁴ Ra'o udze'ro lu'u yu tu ta baguti. Pero Diuzi usebannè' tu ta bira gati tuzioli. Ca bzalo Diuzi cuerpo quie ben' gati, lëzi bzalogue' cuerpo quie ben' bira gati tuzioli.

⁴⁵ Rnèn lè'è guichi la'iya quie Diuzi cani: "Adán, ben' bzalo Diuzi tanèro, bē' Diuzi lèbè' yela' naban quienè'." Cana' rna lè'è guichi. Pero Cristo, ben' use'ela' Diuzi, bēranè' tadya'ara cala ca Adán. Lao na'a Cristo decazi yela' naban gatiro biyeyudyi yedu quie. ⁴⁶ Tanèro de yela' neban quiero, pero hueyudyi huedu quien dza gatiro. Na'tera gata' yela' neban quiero, pero bira yeyudyi yedu quien. ⁴⁷ Ben' bzalo Diuzi tanèro bēguè' lèbè' de yu. Guquè' ben' de lao yedyi layu. Pero Cristo, ben' use'ela' Diuzi, naquè' ben' za' de lao guibáte. ⁴⁸ Cabè' guca Adán guquè' de yu, gucazè' de lao yedyi layu, cana' nacaré quie yaca ben' rda lao yedyi layu. Pero ra'o, ben' nao xneza Cristo, huacaré quiero ca naca Cristo, ben' za' de lao guibáte. ⁴⁹ Como nacaré quiero ben' bzalo Diuzi bēguè' de yu, lëzirè gacaré quiero ca quie Cristo, ben' za' de lao guibáte.

⁵⁰ Re'enda' inia' le'e, ben' bicha', de que conlè cuerpo quiero nacan de yu, bisaque' yeyoro ga zu Diuzi guibá. Bisaque' uquixiro ta biru'udzo len ta ru'udzo. ⁵¹ Re'enda' inezile tu ta binézile. Cala uculuro gati, pero yugulutero huetza'ro. ⁵² Tu sasazi yetza' cuerpo quiero cati ze'lao yero ucuedyi ángel trompeta. Lëcaora na' yeseban Diuzi yaca ben' baguti ta bira gaticaziyaquè' tuzioli. Lëzi caora na' yetza'rè Diuzi cuerpo quiero. ⁵³ Yetza' Diuzi pensari median quiero ta yeyudyi yedu quie, ta yeyu'uro pensari dya'a ca pensari quie Diuzi ta bira yeyudyi yedu quie. Lëzi yetza' Diuzi cuerpo quiero hueyacan cuerpo bira cuiagu'i'n tuzioli. ⁵⁴ Cati abeyu'uro pensari dya'a ca pensari quie Diuzi ta bira yeyudyi yedu quie, lëzi cati abetza' Diuzi cuerpo quiero beyacan cuerpo bira cuiagu'i'n tuzioli, lëcaora na' uzun di'idza' con cabè' rnèn le'e guichi la'iya quie Diuzi cani: "Birabi yela' guti gata'. ⁵⁵ Bira hue yela' guti gan gatiro. Bira sue yela' guti quiero udyiagu'i'n ra'o." Cana' rnèn lè'è guichi la'iya quie

Diuzi. ⁵⁶ Rudyiagui' yela' guti yaca benë' por nun dan' rueyaquë' tamedian. Lëzi con cabë' rna ley udixu Diuzi tiempote, lena' raona yaca benë' xquia. ⁵⁷ Pues diuxcale Diuzi, porque dan' lao na'a zi'inë' Jesucristo, bapte pselanë' ra'o quie dula' xquia quiero, bira inaona ra'o.

⁵⁸ Lena' nia' le'e, ben' bicha', ulenao xneza Cristo du guicho du la'adyi'le, biyehuëdile. Ulehue dyin quie Diuzi yugo dza. Biusanle dyin na', porque dyë'ëdi nezile biten cana'zi ca dyin huelële Cristo.

16

Ni nan ga ptupayaquë' dumi ta gacalëyaquë' yaca ben' bichiyaquë', ben' nao xneza Jesús

¹ Biži na'a rnia' le'e, reya'ala' utupale dumi ta gacalële yaca ben' bichile, ben' nao xneza Jesús. Reya'ala' huele con cabë' baonia' yaca ben' nita' yaca ciudad nebaba Galacia, yaca ben' naorë xneza Jesús. ² Yugu dza domingo reya'ala' utupale lë'ëti' ca tu ta babële gan quie lao tu xman. Cana' huele ta baden puesto cati guida'. ³ Pues caora bazulia' le'e, ero tu chopale tzehua'ayaquë' dumi lao yaca ben' bichiro, ben' nita' ciudad Jerusalén. Hua' tu guichi ta ise'ela'lëron dumi lao na'ayaquë'. ⁴ Lëzi chi ruecazin baiguin, huaya'lia'yaquë' ciudad Jerusalén.

Rue Pablo pensari ta tzioguë' yaca ciudad tula

⁵ Tanëro re'enda' tia' yaca ciudad nebaba Macedonia, na'tera idyina' ciudad Corinto. ⁶ Durpende huega'na' sulia' le'e chopa tzona dza, o chi huega'na' biu' ruen zaga. Na'ra chi huele cule, gacalële në'ëdi' ta guxa' quie tu neza bë' tza'a yaca ciudad tula. ⁷ Bire'enda' tu teza' ciudad quiele, re'enda' sulia' le'e zi dza, chi Diuzi gunnë' lato. ⁸ Lëzi cati tza'a ciudad Efeso, huega'na' na' ta cueza' te lani quie usecho quie bini trigo, ⁹ porque de lato na' hua' dyin quie Diuzi. Raqueda' huaron dya'a chan' hua' can', ba'ala'cazi nita' yaca ben' zë, ben' rue condre në'ëdi'.

¹⁰ Caora bazu Timoteo lënë' le'e, huele bayudyi tacuenda suë' gusto bidëbinë'. Pues ruerënë' dyin quie Diuzi con cabë' dyin na' rua' në'ëdi'. ¹¹ Yezi'lënë' dyë'ëdi gacalëlenë' ta guxunë' quie tu neza cati guidanë' idena'në' në'ëdi', porque rbezcaza' guidanë' lënë' yaca los demás ben' bichiro, ben' nao xneza Jesús.

¹² Biži ben' bichiro Apolos, lega re'enda' guidalënë' yaca ben' bichiro ta idena'yaquë' le'e, pero biuzaque' guidanë'. Huidanë' bë' tzu'unë' lato.

Ga beyudyi rapa Pablo leyaquë' diuzi

¹³ Bigasiyëläle, hue quiele xti'idza' Diuzi du guicho du la'adyi'le. Bidzebile, biyehuëdile.

¹⁴ Con bitezi ruele, biusanle idyë'ële benë'.

¹⁵ Bicha', dyë'ëdi nezile naca familia quie Estéfanos ben' nëro, ben' betza' pensari quie, barue quieyaquë' di'idza' quie Jesús entre yaca ben' nita' yaca yedyi nebaba Acaya. Bayu'uyaquë' dyin quieyaquë' gacalëyaquë' yaca los demás ben' nao xneza Jesús. ¹⁶ Re'enda' uzënagale gapala'nle leyaquë' dyë'ëdi lente nutezi yaca ben' rue dyin quie Diuzi. ¹⁷ Como biuzaque' guidale, redaohueda' abla' Estéfanos, len Fortunato, len Acaico lao lazale. ¹⁸ Pxela'adyi'yaquë' në'ëdi' ca uxela'adyi'le në'ëdi' chan' le'e zule niga. Zaca'yaquë' gapala'nle leyaquë'.

¹⁹ Yaca ben' nao xneza Jesús, yaca ben' nita' yaca ciudad nebaba Asia, rugapayaquë' le'e diuzi. Lëzirë Aquilo len Priscila, len yaca los demás ben' regu'udi' zan yu'u quieyaquë', rugapayaquë' le'e diuzi laohue Señor quiero. ²⁰ Lëzi yugulu ben' bichiro niga, rugaparëyaquë' le'e diuzi. Ulegapa tu tule laguedyile diuzi, gaole xagayaquë' tu situ.

²¹ Në'ëdi', Pablo, babies' letra ni lë'ë guichi conlë na'a. Lena' use'ela'n laole rgapa' le'e diuzi.

²² Chi nu bala le'e binedyë'ële Señor quiero Jesucristo, ta bayëchi' gula nacan quiele. Na'ra nia' Señor quiero, naguido'.

²³ Rulidza' Señor quiero Jesucristo ta huela'iyänë' le'e taze. ²⁴ Rnia' le'e nedyë'ëda' le'e yugulutele laohue Cristo Jesús. Amén.

GUICHI URUPE BĒ SAN PABLO APÓSTOL USE'ELA'NĒ'N LAO CIUDAD CORINTO

Bĕ Pablo guichi ni use'ela'nĕ'n lao yaca ben' nao xneza Diuzi, ben' nita' ciudad Corinto

¹ Nĕ'ĕdi', Pablo, naca' ben' bdĕ' Diuzi. Segun ca re'ennĕ' bdĕ'nĕ' nĕ'ĕdi' ta tza' tzetixogui'a xti'idza' Jesucristo. Nĕ'ĕdi'lia' ben' bichiro Timoteo, bĕndo' guichi ni ta ise'ela'ndo'n lao le'e, ben' nao xneza Jesu's, ben' nita' ciudad Corinto. Lĕscan' huase'ela'ndo' guichi ni lao yugu ben' nao xneza Jesu's, ben' nita' yaca yedyi nebaba Acaya. ² Rulidza' Xuziro Diuzi lĕnĕ' Señor quiero Jesucristo ta huela'iyaguĕ' le'e, cuĕchiyaguĕ' chizi lu'u guicho laxta'ole.

Ni rmĕn ca guca quie Pablo bedzagalaonĕ'

³ Rionla'adyi'ro Diuzi, ben' naca Xuzi Señor quiero Jesucristo. Lĕbĕ' naquĕ' Xuziro, ben' yeyĕchi'la'adyi' ra'o. Lĕbĕ'naquĕ' ben' ru'elĕ' ra'o di'idza' žela'adyi' tuzioli. ⁴ Con bitezi tazĕdi raca quiero, hue'lĕ' Diuzi ra'o di'idza' žela'adyi' tacuenda gacaro hue' lĕrĕro ben' tula di' idza' žela'adyi' bĕ' raca tazĕdi quiejĕ'. ⁵ Como dan' redzagalaoro tazĕla cabĕ' ptzagalao Cristo, lĕscana' tazĕla ru'elĕnĕ' ra'o di'idza' žela'adyi'. ⁶ Cana' raca quiendo' tacuenda hue'lĕndo' le'e di'idza' žela'adyi' ye'le xti'idza' Diuzi gata' yela' naban quiele tuzioli. Lĕscan' cati ru'elĕ' Diuzi nĕto' di'idza' žela'adyi', lena' raca quiendo' cuenda gacalĕndo' le'e ta su'le cati yedzagalaole con cabĕ' redzagalaondo'. ⁷ Nezindo' dyĕ'ĕdi huaca tahuen quiele, como dan' cabĕ' redzagalaole por nun quie dan' naole xneza Cristo, cana'rĕ ru'elĕ' Diuzi le'e di'idza' žela'adyi'.

⁸ Bichindo', re'ennĕdo' inezile ca tu naca tazĕdi guca quiendo' yaca yedyi nebaba Asia. Tantozi guca žĕdi gula quiendo', abedu fuerza quiendo'. Bĕndo' pensari bi'yudyi tazĕdi quiendo' gatindo'. ⁹ Bĕndo' pensari hora gatindo'. Cana' guca quiendo' cuenda blu'e Diuzi nĕto' cabĕ' reya'ala' sudyi'ilĕro tuzi lĕbĕ', ben' useban ben' baguti. Bireya'ala' gaquero huazuero cuinziro. ¹⁰ Bapcuasa pcui'o Diuzi nĕto' ca tamala raca quiendo' cati beyen guti ja benĕ' nĕto'. Chi le'e rulidzale Diuzi por nĕto', nezindo' biusan Diuzi ucuasa ucu'onĕ' nĕto' mazara. ¹¹ Lĕscan' chi ja ben' zĕ rulidzajĕ' Diuzi por nĕto', lĕscana' ja ben' zĕ yĕbijĕ' Diuzi diuxcalelo' nun quie dan' ru'ela'ia Diuzi nĕto'.

Udixogue' Pablo bi guca quienĕ' dan' biuyoguĕ' ciudad Corinto

¹² Sundo' gusto como dan' nezindo' dyĕ'ĕdi rnaondo' tu neza la'ia rdando' du guicho du la'adyi'ndo' lao yedyi layu niga. Lĕscana' rdando' dya'a conlĕ le'e. Pues yela' ben' huen quie Diuzi gualĕnĕ' nĕto' rdando' cana', cala ta racazi la'adyi'ndo' rdando'. ¹³ Cabĕ' naca di'idza' ta bzundo' lĕ'ĕ guichi ni, nacan puro di'idza' ta gacale ulabale, ta gacale tzi'one'ele. Rbeza' dza tzi'one'elen dyĕ'ĕdi. ¹⁴ Pero banezile cabĕ' inia' le'e. Banezile cati yeguida Señor quiero Jesu's, cana' le'e huazule gusto cabĕ' bĕndo' nĕto'. Lĕscan' nĕto' huazundo' gusto cabĕ' bĕle le'e.

¹⁵ Tantozi ruxela'adya' baoy'one'ele cabĕ' baodixogui'a le'e, lena' bia' pensari dza na'te guida' ideyuba' le'e luegozi tacuenda gaca chopa lasa bedeyuba' le'e. ¹⁶ Cana' guqueda' tu teza' tza' Macedonia tia' ideyuba' le'e. Na'ra cati yeza' Macedonia guqueda' yedia' yeyuba' le'e tatula. Cana' gunan le'e lato gacalĕle nĕ'ĕdi' ta tzu'a neza tza' estado Judea. ¹⁷ Pero como biuzaque' tia', ¿c'omo raquele bibia' pensari dya'a bibida' ideyuba' le'e? ¿C'omo raquele hua' pensari cabĕ' pensari rue ben' nao ta rnazin quie, ben' ru'e chopa di'idza'? ¹⁸ Pero naca Diuzi testigo quiendo' de que bibĕ'lĕndo' le'e chopa di'idza'. ¹⁹ Pues ži'i Diuzi, ben' naca Cristo, biru'enĕ' benĕ' chopa di'idza'. Lĕdi'idza' quienĕ' rguixogue'lia' Silvano len Timoteo le'e. Nacan tali yugulu ca unĕ' Cristo. ²⁰ Lao na'a Cristo uzucazi Diuzi dužete di'idza' quienĕ' cabĕ' unĕ' huenĕ'. Quie lena' caora yeyuežero Diuzi, reya'ala' yĕbironĕ' "can' gaca" tanun quie Cristo Jesu's. ²¹ Naca Diuzi ben' ru'e fuerza quiero ta inaoro xneza Cristo biidzebiro biusanron. Naca Diuzi ben' bdĕ' ra'o gacaro ben' quienĕ'. ²² Lĕbĕ' gunnĕ' ra'o fuerza valor nacan ca quie tu sello quiero cuenda ulu'en tali nacaro ben' quienĕ'. Lĕbĕ' bdze'nĕ' Bichi Be quienĕ' lu'u guicho laxta'oro ta xela'adyi'ro gun Diuzi ra'o dužete ca unĕ' gunnĕ' ra'o.

²³ Pero chi binetza'a ciudad Corinto cabĕ' bia' pensari dza na', rguntia' Diuzi naquĕ' testigo quia', cala bire'enda' tza'a. Por nun quie dan' reyĕchi'la'adya' le'e biuya'a. ²⁴ Calala re'ennĕdo' huendo' le'e mandado zi'laza ca ta huele inaole xneza Cristo. Pues banaole xneza Cristo fuerte gula. Ca re'ennĕdo' huendo' quiele, re'ennĕdo' gacalĕndo' le'e sule mazara gusto.

2

¹ Quie lena' bia' pensari biguida' tatula ideyuba' le'e, porque chi guida' ideyuba' le'e, bisule gusto conlĕ nĕ'ĕdi' dan'ruen zi tila' le'e. ² Chi tanun quie dan' bida' bedeyuba' le'e

bisule gusto, ¿nuzi yezu nu nē'ēdi' gusto? Pues le'ezi huaca yezule nē'ēdi' gusto, le'e ben' udila'.³ Por nun quie lena' aose'ela' tu guichi laole dza na'te ta inezile ca naca pensari quia', porque bigu'unda' guida' ideyuba' le'e ta uzule nē'ēdi' bayēchi' nun quie ca ruele. Ta nacalá mejor reya'ala' uzule nē'ēdi' gusto. Chi zua' gusto, žela'adyi'ria' lente le'e huazule gusto yugulule. ⁴ Cati bia' guichi dza na', tantozi guqueda' bayēchi', uredya' nun quie ca ruele. Pero cala aose'ela' guichi laole ta sule bayēchi', dechan' aose'ela' guichi laole ta inezile cabē' nedyē'ētzegueda' le'e.

Ni rnēn cabē' reya'ala' yezi'zero quie ben' bē tamala

⁵ Pero chi nun quie tu ben' zu ladole guca tu bayēchi', pues cala tuzi nē'ēdi' bzunē' bayēchi', pero lēscan' bzunē' lente le'e bayēchi'. Lena' inia' le'e como dan' bire'enda' hue'lia' le'e di'idza' zē. ⁶ Cabē' castigo babēle ben' na' cati begu'udi'le, con lēzin aodizunē' quie xquia quienē' cabē' bēnē'. ⁷ Na'ra mejorla yezi'žele quienē' yeyuele di'idza' žela'adyi' cuenda bira gaquenē' zi'laza biyezunē' gusto nun quie raquenē' bayēchi' gula. ⁸ Quie lena' inia' le'e tatula, reya'ala' ulu'elenē' cabē' nedyē'ēlenē'. ⁹ Aose'ela' guichi laole dza na' ta aodixogui'a le'e cabē' reya'ala' huele quie ben' na'. Cana' bia' le'e prueba ta inezda' chi zule dispuesto inaoe huele cabē' nia'. ¹⁰ Na'ra con nu ben' si'žele con biti'tezi cabē' bēnē', lēscan' nē'ēdi' huezi'žeria' quienē', porque con nutezi ben' aoz'i'žia' quie, aoz'i'žia' quienē' lao Cristo por nun quie le'e. ¹¹ Cana' hua' cuenda bisi' xan' taxi'ibi' Satanás lato huelēnan ra'o. Aneziro dyē'ēdi cabē' nacan yela' mala quienan.

Biuzu Pablo gusto zunē' yedyi Troas

¹² Cati bdyina' yedyi Troas ta quixogui'a di'idza' quie Cristo, cana' guca blē'ēda' detzegue lato hua' dyin quie Cristo na'. ¹³ Pero biuzu guicho laxta'ohua' gusto nun quie ta bibedila' bichiro Tito. Lena' gudya' ja ben' quie Cristo nita' yedyi na' aziya'a. Na'ra beya'a yedyi nebaba Macedonia.

Conlē Cristo huero gan lao xan' taxi'ibi'

¹⁴ Reya'ala' yēbiro Diuzi diuxcalelo' nun quie conlē lēbē' nuelēro Cristo Jesús tuže huero gan lao xan' taxi'ibi'. Cana' use'ela' Diuzi ra'o ta quixogue'ro benē' di'idza' quie Cristo ta huebē'jē' lēbē'. Lena' nacan ca quie tu ta rla' žixi žeo duže yedyi layu. ¹⁵ Lēscan' ra'o, nun quie nacaro ben' quie Cristo, nacaro ca quie tu ta rla' žixi žeo rdyinnan ga zu Diuzi, rdyinnan ga zu ja ben' nao xnezē', ben' yeyo guibá. Lēscan' rdyinnan ga zu ja ben' birue quie xti'idzē', ben' yeyo lao gui' gabila. ¹⁶ Quie ja ben' birue quie xti'idzē', ben' yeyo lao gui' gabila, naca di'idza' rguixogue'ro ca quie tu ta rla' bayatza gutin benē'. Pero quie ja ben' nao xnezē', ben' yeyo guibá, naca di'idza' rguixogue'ro ca quie tu ta rla' žixi žeo gunnan yela' neban tuzioli. ¿Nu guca tziōñe'e cabē' nia' niga? ¹⁷ Calá rdando' ruendo' negocio conlē di'idza' la'iya quie Diuzi cabē' rue zē ben' tula, pero nēto', como re Diuzi cabē' inaro, rdando' rguixogue'ndo' di'idza' la'iya quie Diuzi du galo cabē' reya'ala' hue ben' use'ela' Diuzi. Ruendo' cabē' reya'ala' hue ben' rue dyin quie Cristo.

3

Ni rnēn cabē' naca quiero nun quie bega'ntza'olē Diuzi ra'o tacubi

¹ Cati rando'cana' ¿ca bi pensari ruele? ¿Ruele pensari ruendo' cuinndo' ben' že? ¿O chi re'enle ulu'endo' le'e tu guichi ga rnēn nacando' ben' huen? ¿O chi re'enle inabando' le'e tu guichi cana' cabē' rue bala ja benē'? ² Bihuendo' cana', como dan' le'e cuinle nacale ca quie tu guichi ga rnēn nacando' ben' huen. Con tuzi le'e, na'ra gabira guichi rzioguo. Nacale ca quie tu guichi ta bē Diuzi bzunē'n lē'ē guicho laxta'ondo' cuenda ulaba yugulu benē' len inezijē' bi re'en inan. ³ Lēscan' nacale ca quie tu guichi ta bē cuin Cristo bēnnē' nēto' ta usedyinndo'n. Binacale ca quie di'idza' ta bzu benē' conlē tinta. Nacale ca quie di'idza' ta bzu Diuzi neban lao na'a Bichi Be quienē'. Binacale ca quie di'idza' ta bzu Diuzi lē'ē tu yo naca tabla dza na'. Nacale ca quie di'idza' ta bzu Diuzi lē'ē guicho laxta'ondo'.

⁴ Nacan dula'adyi'ndo' cabē' rando' como dan' lao na'a Cristo sudyi'ilēndo' Diuzi. ⁵ Quele fuerza valor quiendo' cuinzindo' ruendo' ca mandado hue Diuzi nēto', dechan' lēbē' gunnē' fuerza valor quienē' ta huendo' yugulu ca ta inanē' huendo'. ⁶ Ulio Diuzi nēto' ta huendo' dyin quienē' nun quie dan' bega'ntza'olēnē' ra'o tacubi. Calá lao na'a ley bzu Diuzi lē'ē yo dza na' bega'ntza'olēnē' ra'o tacubi, dechan' lao na'a Bichi Be quienē', ben' yu'u lu'u guicho laxta'oro. Ca naca ley bzu Diuzi lē'ē yo, lēley rchugulina quiero gatiro. Pero ca naca Bichi Be quie Diuzi, lēbē' gunnē' yela' neban quiero tuzioli.

⁷ Bzu Diuzi ley quienē' lē'ē yo pca'nnē'n lao na'a Moisés. Cati pca'nnē'n lao na'a Moisés, caora na' guca titi'tzegue laohuē'. Tanto guca titi'tzegue laohuē', biuzaque' ina' yaca ben' Israel laohuē'. Pero la'acazi guca titi'tzeguena, beyulacazin. Tanto nacan belao lēley na', conlē xni' quie Diuzi bdyinnan, la'acazi rchugulina quiero gatiro, ⁸ pero mazara

belaoztzegue naca di'idza' pca'n Bichi Be quie Diuzi para ra'o. ⁹ Quie lena' inaro: Chi guca ley na' belao dza na', lëley na' rchugulina quiero gatiro, na'ra nacara belaoztzeguera lëdi'idza' rguixogue'n ra'o ca rue Diuzi zunë' dispuesto ta ilë'ënë' ra'o ben' laxta'o yëri. ¹⁰ Lëley na' gucan belao dza na'te, pero biutila ley na' conlë lëdi'idza' rguixogue'n ra'o zuë' dispuesto ta ilë'ënë' ra'o ben' laxta'o yëri. Lena' nacaran belaoztzegue quele ca ley na'. ¹¹ Pues chi lëley na' gucan belao dza na'te, la'acazi tu chi'zi unabë'na, na'ra belaoztzeguera naca ta inabë' tuzioli.

¹² Nun quie dan' nezindo' nacan tali cabë' nando', quie lena' birdzebindo' rguixogue'ndo' xti'idza' Diuzi zaca'lao lao ja benë'. ¹³ Biruendo' nëto' cabë' bë Moisés. Ptaconë' tu la'ari' laonë' ta biilë'ë ja ben' Israel laohué' cati beyulan bira guca titi'n, porque decazide yeyulacazin. ¹⁴ Pero biuyoñe'e ben' Israel, ben' unita' dza na'. Lëscan' na'a birioñe'e ja ben' Israel cati rulabajë' lë'ë guichi ga rguixogue'n quie dza bega'ntza'olë Diuzi xuzixta'ojë' tiempote. Birioñe'ejë' nun quie nechula guichojë'. Bineduba guichojë' tachula, como dan' ruen zi inaoro xneza Cristo, na' yeduban. ¹⁵ Hasta lente na'a, cati rulaba ben' Israel di'idza' bzu Moisés lë'ë guichi, nenechula guichojë' netza'la rioñe'ejë'n. ¹⁶ Pero cati inaoro xneza Cristo, na' yeduba tachula guichoro. ¹⁷ Cristo naquë' Bichi Be quie Diuzi. Nu ben' yu'u Bichi Be quie Diuzi naquë' libre. ¹⁸ Quie lena' ra'o yuguluro, como abeduba tachula guichoro, nacaro ca quie tu yaohuan rseni'n gui', pero gui' quie yela' bala'ana quie Cristo senei'ro. Cana' naca quiero yedyinro gacaro mazara ca naca Cristo, porque yugu dza raca quiero runnë' ra'o yela' bala'ana quienë'. Cana' rue Cristo, ben' naca Bichi Be quie Diuzi.

4

¹ Quie lena' biyeyatendo' como dan' bë Diuzi tu cule quiendo' bdë'në' nëto' ta huendo' tu dyin quienë'. ² Bire'enndo' huendo' ta negachi' ta naca yela' stu'. Birzi'ndo' yë'. Birguixogue'ndo' ta binaca tali. Birguixogue'ndo' ta birna di'idza' la'iya quie Diuzi. Pues tuz ta naca tali rguixogue'ndo'. Quie lena' bisaque' ina ja benë' nacando' ben' mala. Ca ta ruendo', ruendo' lao Diuzi. ³ Pero rna ja benë' nacan zëdi ta tzioñe'ejë' con cabë' rna di'idza' quie Diuzi rguixogue'ndo'. Rnajë' binacan quiejë' ta hue quieyaquë'n. Pero ben' gaca quie lao gui' gabila, lëjë' raquejë'n zëdi rnejë' binacan quiejë' ta hue quieyaquë'n. ⁴ Nun quie birue quieyaquë'n, bë xan' taxi'ibi' chula guichojë' cuenda bitzioñe'ejë' con cabë' ina di'idza' la'iya quie Diuzi, como dan' lëdi'idza' na' rguixogue'n quie Cristo. Tuzi Cristo nacarë' ben' bala'ana, ben' naca Diuzi guquë' benë', blë'ë yaca benë' lëbë'. ⁵ Cati rguixogue'ndo' di'idza' la'iya quie Diuzi, quele rguixogue'ndo' ruendo' cuinndo' ben' ze, dechan' rguixogue'ndo' yaca benë' de que naca Jesucristo Señor quiero ben' ze. Na'ra ca raca quiendo' nacando' ca ben' rue dyin zan yu'u quiele nun quie nadyë'ëndo' Jesús. ⁶ Naca Diuzi ben' bë mandado dza na'te ta galo gui' useni'na ga naca chula. Lëscan' naca Diuzi ben' bzioñe'e ra'o ca naca quienë' cuenda bira gaca guicho laxta'oro ca guicho laxta'o ben' rda lao lato lao chula. Cana' bënë' quiero cuenda yeyuebë'ro ca naca yela' huaca quienë'. Pues lëyela' huaca na'ruen rseni'na lao Jesús raca titi'n.

Reya'ala' sudyi'ilëro Diuzi dza rdaro lao yedyi layu

⁷ Pero tu ta naca huen gula, tu ta bzioñe'e Diuzi nëto', lena' yu'un lu'u guicho laxta'ondo'. Nacando' ca nu yeso' yu ta bide fuerza valor quie. Lena' rulu'en tali naca fuerza valor quiendo' fuerza valor quie Diuzi, cala quiendo'. ⁸ Ba'ala'cazi de zëdi quiendo' con gati' tezi rdando', biyela'te quiendo'. Ba'ala'cazi rdëbindo' raquendo', biyeyatendo'. ⁹ Ba'ala'cazi rue ja benë' nëto' bizinaquezi, biusanla'adyi' Diuzi nëto'. Ba'ala'cazi quijë' nëto' layu, bisuecazijë' gutijë' nëto'. ¹⁰ Con gati'tezi rdando' raca quiendo' cabë' guca quie Jesús re'en ja benë' gutijë' nëto'. Pero rute rusela Cristo nëto'. Lena' rulu'en zu Cristo nebannë' sëlënë' nëto', bibi raca quiendo'. ¹¹ Pues yugu dza rdando' lao yedyi layu ruen zudyi guti ja benë' nëto' nun quie nacando' ben' quie Jesús. Cana' raca quiendo', como dan' cati bihue ja benë' gan gutijë' nëto', hualë'ë ja benë' zu Cristo racalënë' nëto'. Lente bë'ëla' zuba' quiendo' ta yeyudyi yedu quie, lena' rulu'en naca Jesús ben' run yela' neban quiendo' yugu dza. ¹² Nun quie rguixogue'ndo' di'idza' la'iya quie Diuzi, ruen zudyi guti ja benë' nëto'. Pero para le'e, nun quie rguixogue'ndo' di'idza' la'iya quie Diuzi, de yela' neban quiele tuzioli.

¹³ Rnën lë'ë guichi la'iya quie Diuzi cani: "Rzudyi'ilia' con cabë' rna Diuzi. Quie lena' rguixogui'a ja benë' di'idza' la'iya quienë'." Lëscan' cana' naca quiendo'. Tuzcazi naca pensari quiendo' len pensari quie ben' bzu di'idza' lë'ë guichi la'iya dza na'te. Rzudyi'ilëndo' Diuzi. Quie lena' rguixogue'ndo' benë' ja di'idza' la'iya quienë'. ¹⁴ Cana' rnando' nun quie dan' nezindo' dyë'ëdi Diuzi psebannë' Jesús. Lëscana' nezindo' dyë'ëdi usebannë' ra'o nun quie dan' nacalëro Jesús tuze. Cana' yezi'në' ra'o ta tzesulëronë' guibá ga zuë'. ¹⁵ Huaca huen quiele cabë' uzacando' nëto', porque cati huela'iya Diuzi ben' zë, lëscan' ben' zë gaca yëbijë' Diuzi diuxcalenë'. Cana' huejë' Diuzi ben' ze.

¹⁶ Quie lena' biyeyatendo'. Ba'ala'cazi reyudyi redu fuerza valor quie bē'ēla' žuba' quiendo', pero yugu dza rudze' Diuzi fuerza valor quienē' lu'u guicho laxta'ondo'. ¹⁷ Ca naca dza rdaro lao yedyi layu, la'acazi yedzagalaotzeguero, lē'ēti'zi raca quiero nun quie dan' cati yezi' Diuzi ra'o, caora na' yeyaca dya'a te tela laohue quiero. ¹⁸ Pues cala rzēla'adyi'ro gaca quiero ta de lao yedyi layu, dechan' tahuen hue Diuzi quiero guibá ga zunē', lena' rzēla'adyi'ro gaca quiero. Cana' huero como dan' ca naca ta de lao yedyi layu, hueyudyi huedu quien, pero ca naca tahuen hue Diuzi quiero guibá ga zunē', biyeyudyi biyedu quien.

5

¹ Naca bē'ēla' žuba' quiero ca quie tu yu'u ga zuro, pero hueyudyi huedu quien. Neziro dyē'ēdi chi aodyiagui' bē'ēla' žuba' quiero naca ca yu'u, zu tu tacubi guibá ta biyeyudyi yedu quie. Nacan ta bē Diuzi, cala ta bē benē'. ² Tu raca nezuro lao yedyi layu, rzēla'adyi'ro usanro yedyi layu yeyoro guibá yezuro lu'u bē'ēla' žuba' cubi quiero. ³ Cana' yezuro lu'u bē'ēla' žuba' cubi quiero ta iya'ro gacaro completo. ⁴ Pero tu raca nezuro lu'u bē'ēla' žuba' gula quiero rdēbīro raquero bayēchi'. Re'enro usanro bē'ēla' žuba' gula quiero ta yezuro lu'u bē'ēla' žuba' cubi quiero cuenda yeyudyi yedu ca ta raca quiero lao yedyi layu, na' gata' tu yela' neban cubi quiero. ⁵ Diuzi na' bzioñe'enē' ra'o ca huenē' quiero. Lēbē' bdze'nē' Bichi Be quienē' lu'u guicho laxta'oro ta xela'adyi'ro talicazi huenē' quiero ca unē' huenē' quiero.

⁶ Quie lena' biyeyatero. Neziro tu raca nezuro lu'u bē'ēla' žuba' gula quiero, bisaque' yeyoro guibá tzasulēro Cristo. ⁷ Rdaro rzudyi'ilēro Diuzi gacalēnē' ra'o. Rdaro rzudyi'ilēro lēbē', birdaro rzudyi'ilēro ta ilē'ēro ta raca lao yedyi layu. ⁸ Quie lena' nuxela'adyi'ro nacalan dya'a quiero gatiro cuenda yeyoro ta sulēro Cristo ga zuē'. ⁹ Quie lena', huero bala ta inaoro huero puro cabē' re'en Cristo, la'acazi cati nebanro, la'acazi cati bagutiro. ¹⁰ Cana' reya'ala' huero como dan' decazide yuguluro tziocaziro lao Cristo ichugulinē' quiero quie quiero, quizunē' ra'o cabē' ta bēro dza rdaro lao yedyi layu, chi bēro tahuen, chi bēro tamala.

Bega'ntza'olē Diuzi ra'o tacubila

¹¹ Quie lena' como dan' neziro dyē'ēdi reya'ala' yeyuezero xa'nro Diuzi, cana' ru-ela'adyi'tzeguendo' ta huendo' gan inao ja benē' xneza Jesús. Pero banezi Diuzi ca naca pensari quiendo'. Lēscan' le'e, re'enndo' inezirēle ca naca pensari quiendo'. ¹² Cala rñando' ruendo' ze cuinndo', dechan' re'enndo' sule gusto cabē' ruendo' cuenda yeguēbile quie nu ben' rnē contra nēto', ben' re'en ilē'ē ja benē' lējē' ben' huen, pero bire'enjē' inez ja benē' ca naca pensari yu'u lu'u guicho laxta'ojē'. ¹³ Pero chi racando' luco cabē' najē', quie Diuzi na' racando' luco. Chi biracando' luco, na'ra lena' ruen huen quiele. ¹⁴ Nun quie nedye'ē Cristo ra'o, decazide huero ca mandado ruenē' ra'o huero. Pues neziro dyē'ēdi guti Cristo lē'ē yaga cruzo lao laza yuguluro. Quie lena' ilē'ē Diuzi ra'o cabē' ben' bagutirē cati guti Cristo. ¹⁵ Cana' bē Cristo, gutinē' lao laza yuguluro tacuenda bira huero tuz ta yega'nnan huen quiero, pero na'ra huero tuz ta yega'nnan huen quie Cristo, ben' guti beban para ra'o. ¹⁶ Tanun quie lena', bira huero pensari ca pensari rue ja ben' nita' lao yedyi layu. Pues dza na'te bēro pensari naca Cristo benē'zi ca pensari rue ja ben' nita' lao yedyi layu, pero bira ruero pensari cana'. ¹⁷ Lēscan' quie lena', chi nuelēro Cristo tuze, abetza' Diuzi pensari quiero, abecubinē'n. Baode quie pensari gula quiero, babeyu'uro pensari cubi.

¹⁸ Cana' bē Diuzi bega'ntza'olēnē' ra'o nun quie guti Cristo lē'ē yaga cruzo. Na'ra bdē' Diuzi nēto' ta tzetixogue'ndo' benē' de que zu Diuzi dispuesto yega'ntza'olēnē' lējē'. ¹⁹ Cani inando': Por nun quie guti Cristo, bega'ntza'olē Diuzi yaca benēchi'. Quie lena' zu Diuzi dispuesto si'zenē' dula' xquia quiejē'. Ulio Diuzi nēto' ta tzetixogue'ndo' benē' cabē' bē Diuzi bega'ntza'olēnē' lējē'. ²⁰ Quie lena' bdyinndo' laole gudyindo' le'e cabē' mandado bē Cristo nēto' ta yēbindo' le'e. Nacan ca quie cuin Diuzi rnēnē' rēbinē' le'e cati rñando' rēbindo' le'e. Cana' mandado quie Cristo ruendo' bē' rēbindo' le'e: Ulega'ntza'olē Diuzi. ²¹ Ni tu bibi dula' xquia bibē Cristo. Pero por nun quiero blē'ē Diuzi lēbē' ca ben' de dula' xquia quie, bēnē' lēbē' castigo lao lazaro cuenda caora nuelēro lēbē' tuze, cana' ilē'ē Diuzi ra'o ben' bide dula' xquia quie.

6

¹ Quie lena', como nacando' compañero quiele, ben' rue dyin quie Diuzi, rnabayēchi'ndo' laole bichu'unle tzala' la ca naca tahuen re'en Diuzi huenē' quiele. ² Lē'ē guichi la'ya quie Diuzi rguixogue'n ca una Diuzi cani: Huadyin dza gaca huen gula quiele, nacan dza cati yeda' ulidzale nē'ēdi'. Huadyin dza ute usela' le'e, nacan dza gacalia' le'e.

Cana' una Diuzi. Na'ra uzëcara nagale porque abdyin dza gaca huen quiele, abdyin dza ute usela Diuzi le'e.

³ Birguilondo' zëdi len ja benë', bire'enndo' inajë' condre dyin quie Diuzi ruendo'. ⁴ Pero yugulu ca ruendo' re'enndo' ilë'ë ja benë' nëto' ben' rue dyin quie Diuzi. Re'enndo' ilë'ëjë' nëto' cana' nun quie rzuendo' dyë'ëdi cati raca tazëdi quiendo', lëscan' cati redzagalaondo' rdzioguendo' bi cosa. ⁵ Pues guca quiendo' benjë' nëto' zi', bdze'jë' nëto' dyiguiba, bebiojë' nëto' yedyi, bëndo' dyin zi'i gula, bigusindo', uduendo'. ⁶ Bابلu'endo' nacando' ben' quie Diuzi como dan' ni tu tamala biruendo'. Banezindo' con cabë' rna di'idza' la'iya quie Diuzi. Nacaro ben' zëla'adyi', ben' huen, yu'undo' Bichi Be quie Diuzi, nedyë'ëndo' benë' du guicho du la'adyi'ndo', ⁷ rguixogue'ndo' benë' di'idza' la'iya quienë', ruendo' yela' huaca quienë'. Dan' ruelëndo' benë' puro tadya'a, lena' rdando' laojë' birdzebindo' quixogue'ndo'jë' xti'idza' Diuzi, birdzebindo' ruendo' defender cuinndo' laojë'. ⁸ Bayu'u rapala'n benë' nëto', bayu'u birapala'një' nëto'. Bayu'u rnajë' quiendo' ruendo' tahuen, bayu'u rnajë' quiendo' biruendo' tahuen. Bayu'u rlë'ëjë' nëto' ca ben' rguixogue' tali, bayu'u rlë'ëjë' nëto' ca ben' birguixogue' tali. ⁹ Bayu'u birzënajë' quiendo', bayu'u rzënajë' quiendo'. Bayu'u ruen zudyi gatindo', pero bigatindo'. Bayu'u rusaca ja benë' nëto' bizinaquezi, pero bisuejë' gutijë' nëto'. ¹⁰ Ba'ala'cazi raca bayëchi' quiendo', pero zucazindo' gusto. Ba'ala'cazi nacando' ben' yëchi', pero gacalëndo' ben'zë. Ba'ala'cazi zundo' abide quiendo', pero naca quiendo' yugulu ta de.

¹¹ Bicha', le'e ben' ciudad Corinto, dyë'ëdi gula bëlëndo' le'e di'idza'. Du guicho du la'adyi'ndo' nedyë'ëndo' le'e. ¹² Cala nëto' bizundo' gusto conlë le'e, dechan' le'e bizule gusto conlë nëto'. ¹³ Rnabayëcha' le'e cabë' rue tu xuzi xcuidi' lënë' z'i'inë' ta idyë'ële në'ëdi' du guicho du la'adyi'le cabë' nedyë'ëda' le'e du guicho du la'adya'.

Nacaro ca quie tu idao' r nabë'ra quie Diuzi

¹⁴ Bihuelële tuze len ja ben' binao xneza Cristo. Rnaba' le'e tu pregunta: ¿Ga huen dyin chi huelë ja ben' rue ta yu'u ni'a xnezi tuze len ja ben' birue ta yu'u ni'a xnezi? ¿Bizi huero gaca gui'lëbi len tachula? ¹⁵ ¿Bizi gaca hue Cristo tuze conlë xan' taxi'ibi' Satanás? ¿Bizi gaca hue tu ben' nao xneza Cristo conlë ben' binao xneza Cristo? ¹⁶ ¿Binezile binacan lëbi idao' rnabë'ra re' ciudad Jerusalén len ja idolo? Pero lëscan' le'e nacale ca quie idao' rnabë'ra quie Diuzi, ben' neban tuzioli. Cana' una cuin Diuzi caora unë' cani: Në'ëdi' sua' talia' le'e.

Në'ëdi' naca' Diuzi quiele, nacale ben' tzionla'adyi' në'ëdi'.

¹⁷ Lëscan' unarë Diuzi caniga:

Bihuelële tuze conlë ben' birue quie di'idza' quia'.

Bihuele cabë' ta naca zudyi ruejë'.

Na'ra në'ëdi' huayezila'adya' cabë' ruele.

¹⁸ Cana' gaca' Xuzile, cana' gacale z'i'ina'.

Lena' una Diuzi, tuzi lëbë' de yela' huaca quie.

7

¹ Pues bicha', ben' nedyë'ëda', cana' naca di'idza' bega'nlë Diuzi ra'o huenë' quiero. Quie lena' reya'ala' gaparo cuidado bihuero xquia. Naca xquia ca quie tu nidyi' udyiaguin' bë'ëla' zuba' quiero len pensari quiero. Lëscan' biansano huero Diuzi bala'ana, biansano naoro xnezë' du guicho du la' adyi'ro.

Ben' Corinto betza'jë' pensari quiejë', bayu'jë' pensari quie Diuzi

² Uzëcara nagale dyë'ëdi ca inando' le'e. Ni tule bibëndo' quiele tamala. Ni tule bibdyiaguin'ndo' quiele. Ni tule biuzi'ndo' le'e yë'. ³ Cala raohua' le'e xquia. Nacan cabë' baonia' le'e dza na', nedyë'ëda' le'e du guicho du la'adya', la'acazi chi nëbana', la'acazi chi gatilia' le'e. ⁴ Lega redaohueda' zudyi'ilia' le'e. Ba'ala'cazi neruen quiero redzagalaoro, redaohuetzegueda'. Lega gusto sua' conlë le'e.

⁵ Desde dza cati bdyindo' yu nebaba Macedonia, bibi yela' huezila'adyi' guta' quiendo', dechan' guta' tazëdi con gati'tezi uyondo'. Raca huedila ga rdando', rutëbin nëto' rdzebindo'. ⁶ Pero reyuezela'adyi' Diuzi ben' raca bayëchi' quie. Lena' beyuezela'adyi' Diuzi nëto', use'ela'në' Tito bedena'në' nëto' redaohuendo'. ⁷ Pero cala tuzi redaohuendo' nun quie bedena' Tito nëto', lëscan' redaohuendo' como dan' le'e beyuezela'adyi'le Tito. Una Tito nëto' cabë' re'enle ilë'ële nëto'. Lëscan' una Tito cabë' raquele bayëchi' rdëbile bi raca quia'. Dan' rdëbile bi raca quia', lena' reyuezela'adyi'le në'ëdi' mazara.

⁸ La'acazi bzua' le'e bayëchi' nun quie guichi use'ela' laole dza na', biraquedana' zi' na'a. Pero chi guqueda'n zi' dza na'te nun quie bzua' le'e bayëchi' tu chi'zi, ⁹ redaohueda' na'a como dan' nun quie lena', betza'le pensari quiele bayu'ule pensari huen. Lena' redaohue Diuzi cabë' bële. Lena' cala tamala bëndo' quiele bzundo' bayëchi' quiele. ¹⁰ Porque cati

ruzu Diuzi ra'ò bayèchi', lena' gacalèn ra'ò ta yetza'ro pensari quiero, yu'uro pensari quie Diuzi, gaque quiero yela' neban tuzioli. Lèpensari bayèchi' nacan pensari quie Diuzi, bireya'ala' gaquero'n zi'. Pero ca naca pensari bayèchi' raca lao yedyi layu, lèpensari na' bihuen quie ja benè' tadya'a. Huen quiejè' ta gatijè' tuzioli yeyojè' lao gui' gabila. ¹¹ Pero le'e bële tahuen caora bzu Diuzi bayèchi' quiele. Ulena' cabè' guca quiele. Dyè'èdi bële casa cabè' tamala guca quiele entre le'e. Du guicho du la'adyi'le udxogue'le cabè' guca quiele. Bdza'le bdzebile cabè' tamala guca entre le'e. Lagu'untele guida' ideyuba' le'e. Laozutele dispuesto huele castigo ben' bë tamala. Lena' rulu'en quiele gabi dula' napale tanun quie ben' bë tamala. ¹² Caora use'ela' guichi quia' laole dza na', bipse'ela'n nun quie tuzi ben' bë tamala, ni quele quie tuzi ben' bega'n yela' stu' quie tanun quie ben' bë tamala, dechan' use'ela' guichi quia' laole ta inezile cabè' rdèbindo' raquendo' quiele lao Diuzi. ¹³ Pero nun quie cabè' bële, bële tahuen redaohuendo'.

Pero quele tuzi len redaohuendo', lèscan' redaohuendo' nun quie zu Tito gusto ca bële. Dyin quiele yugulule bega'n guicho laxta'onè' chizi. ¹⁴ Bron huen cabè' agucha' Tito, agucha'nè' zua' contento conlè le'e. Na' gucan tali yugulu cabè' unando' le'e, lèscan' gucan tali yugulu cabè' gudyindo' Tito quiele de que zundo' contento conlè le'e. ¹⁵ Lèscan' zu Tito contento conlè le'e caora reza'la'adyi'nè' le'e cabè' bële, bële ca ta unanè' quiele huele. Lèscan' zunè' contento conlè le'e cabè' bële uzi'lenè' dyè'èdi udapalenè' bala'ana. ¹⁶ Lèscan' redaohueda' ca ruele zudyi'ilia' le'e.

8

Rguixogue' Pablo quie dumi ptupajè'

¹ Na'ra bicha', re'enndo' hue'lèndo' le'e di'idza' cabè' bë Diuzi blu'enè' yela' ben' huen quienè', bagucalènè' ben' nao xneza Jesús, ben' nita' yu nebaba Macedonia. ² La'acazi guca zèdi gula quiejè', lena' gucajè' ca prueba chi du guicho du la'adyi'jè' naojè' xneza Jesús, pero bipsanjè', nenaøjè' xnezè' nezujè' gusto gula. Ba'ala'cazi nacajè' ben' yèchi' gula, ptupajè' dumi ze. Bèjè' ca ben' bibi rdziogue. ³ Naca' testigo redaohuejè' ptupajè' ca tu uzuejè'. Pues mazara ptupajè' ca tu uzuejè'. ⁴ Unabayèchi'jè' laondo' ta hue'ndo' lato gacalèjè' ben' bichiro, ben' nao xneza Jesús. ⁵ Bèterajè' mazara ca tu guquendo' huejè'. Tanèro bega'nlèjè' Diuzi di'idza' ta hue quieyaquè' mazara quienè', lèscan' ta hue quieyaquè' mazara quiendo' según ca re'en Diuzi huejè'. ⁶ Quie lena' unabando' cule lao Tito chi bisaque' guidè' useyudyinè' ideyubinè' le'e ta utupanè' dumi ca dumi uzulaonè' rutupanè' dza na'. ⁷ Na'ra como dyè'èdi rue quiele xti'idza' Diuzi ca re'ennè' huele, como dyè'èdi zudyi'ilèle lèbè', como dyè'èdi rguixogue'le benè' xti'idzè', como dyè'èdi nezile cabè' nan, como dyè'èdi naole xnezè', como dyè'èdi nedyè'èle nètò', lèscan' dyè'èdi reya'ala' utuparèle dumi ta gacalèle yaca los demás ben' bichiro, ben' nao xneza Jesús.

⁸ Quele nia' le'e rua' mandado zi'laza huele quie dumi cabè' nia'. Nia' le'e re'enda' inezile cabè' bë ja ben' tula, ben' nao xneza Jesús. Du redaohuejè' ptupajè' dumi. Lena' re'enda' inezile cuenda huele tuzi ca bèjè'. Lena' ulu'en quiele tali nedyè'èle Diuzi. ⁹ Cana' re'enda' como dan' banezile dyè'èdi cabè' bë Jesucristo quiele. Yela' ben' huen quienè' taze gacalènè' le'e. La'acazi naca quiejè' yugulu ta de quie Diuzi, bidè' detè'è lao yedyi layu, guquè' ben' yèchi' nun quie dan' nedyè'ènè' le'e. Dyin quienè' huata' tadya'a gula quiele guibá ga zu Diuzi.

¹⁰ Na'ra re'enda' inia' le'e ca naca pensari quia'. Baguca tu iza baozulaole dyè'èdi. Bële huen ptupale dumi. Bële huen bedaohuele ptupalen. ¹¹ Na'ra useyudyile utupale dumi yedaohuele cabè' bedaohuele dza na'. Utupale quie quiele ca tu ta de quiele. ¹² Porque chi tali re'enro hue'ro Diuzi gun, huayezila'adyi' Diuzi ca tu ta de quiero utuparo. Pues bigue'en Diuzi hue'ronè' tu ta bide quiero.

¹³ Na'ra nia' le'e reya'ala' gacalèle laguedyile, pero quiele ta uca'n yèchi'le cuinle. ¹⁴ Reya'ala' gacalèle laguedyile cuenda gabi idziogue laguedyile, gaca tuzi ca ta de quiele len laguedyile. Pues na'a como gabi rdzioguele quiele, lena' reya'ala' gacalèle laguedyile ben' rdziogue. Na'ra cati idyin dza idzioguele quiele, cana' iyacalèjè' le'e gunjè' ca ta rdzioguele. Cana' yugulule birabi idzioguele quiele. ¹⁵ Lena' nacan cabè' rguixogue'n lè'è guichi la'ia quie Diuzi cabè' bë Diuzi dza na', pchizanè' ta naca ca yèta xtila ta gao ja ben' Israel. Lena' rnèn lè'è guichi cani: "Nu ben' bezi' tazè, bigucan sobre. Lèscan' nu ben' bezi' tadao' bicu'zi, bibdzioquen."

Use'ela' Pablo Tito len ja compañoero quienè'

¹⁶ Xcale Diuzi bdze'nè' pensari lu'u guicho laxta'o Tito ta gacalènè' le'e cabè' pensari yu'a ta gacalia' le'e. ¹⁷ Na'ra yaxè Tito cabè' gucha'nè' cabè' re'enda' huenè' quiele. Como re'entzegenè' gacalènè' le'e, zunè' dispuesto ta sa'nè' ideyubanè' le'e cabè' gusto rapè'.

¹⁸ Lëscan' ise'ela'ndo' itu ben' sa'lë Tito tuže. Ja ben' nao xneza Jesús nita' tu tu yedyi ga redupajë', lega raxejë' lëbë' nun quie dyë'ëdi rguixogue'në' benë' xti'idza' Diuzi. ¹⁹ Cala tuzi len ruen lëbë' ben' huen, lëscan' bdë' ja ben' nao xneza Jesús lëbë' ta sa'lënë' nëto' tzaže utupando' dumi ta gacalëndo' yaca los demás ben' nao Jesús, ben' bibi de quie. Lena' baruendo' na'a cuenda huendo' Cristo bala'ana, lëscan' cuenda ulu'endo' cabë' racalë ben' nao xneza Jesús laguedyijë'. ²⁰ Cana' re'enndo' huendo' cuenda bigata' tazëdi ina ja benë' contra nëto' nun quie rzi'ndo' dumi. ²¹ Pues yugulu ca ta ruendo' re'enndo' tzu'un ni'a xnezi. Cala tuzi lao Diuzi re'enndo' tzu'un ni'a xnezi, pero lëscan' lao ja benë' re'enndo' tzu'un ni'a xnezi.

²² Conlë lëjë' ise'ela'ndo' itu ben' bichiro, ben' sa'lë lëjë'. Lëben' na' dyë'ëdi ablu'en quienë' zë lasa cabë' ruenë' dyin quie Diuzi du guicho du la'adyi'në'. Na'ra maztera ruenë' du guicho du la'adyi'në' na'a nun quie anuxela'adyi'në' le'e huele cabë' agucha'në' huele. ²³ Chi inaba yaca benë' nuzi Tito, na' yëbilejë' naca Tito ben' compañero quia', ben' ruelë në'ëdi' dyin quie Diuzi ca dyin ruendo' racalëndo' le'e. Lëscan' quie ichopa ben' sa'lë Tito, nacajë' ben' use'ela' laguedyiro ben' nao xneza Jesús, ben' rapa Cristo bala'ana. ²⁴ Nun quie ta inezi ja ben' nao xneza Jesús nita' tu tu yedyi, ulelu'ejë' cabë' tali nedyë'ële ben' bichiro ben' nao xneza Jesús. Lëscan' ulelu'ejë' napando' razón cati rëbindo' benë' zucazile dispuesto ta gacalële laguedyile, ben' nao xneza Jesús.

9

Re'en Pablo gacalë ja ben' ciudad Corinto, len ja ben' ciudad Jerusalén

¹ Na'ra quie dumi reya'ala' utupale ta gacalële ben' bichiro, ben' nao xneza Jesús, biruguinte ise'ela' guichi laole le'e, ben' nita' yu nebaba Acaya, ² porque nezda' dyë'ëdi zule dispuesto utupalen. Redaohueda' yëpa' ben' bichiro, ben' nita' yu nebaba Macedonia, cabë' desde iza aode zule dispuesto gacalële laguedyile. Quie lena', ben' zëja, ben' Macedonia, zujë' dispuesto gacalëjë' laguedyijë' nun quie ca ruele le'e racalële laguedyile. ³ Na'ra ise'ela' Tito len compañero quienë' laole cuenda gacalëjë' le'e utupale dumi huele. ⁴ Cabë' agucha' ja benë' huele cuenda bigaca di'idza' falso cabë' agucha'jë'. Lena' nia' cuenda lahuetele bala cabë' baonia' le'e huele. ⁵ Porque chi nequi'a bala ja ben' nita' yu nebaba Macedonia, bire'enda' ila'ndo' ilë'ëndo' bibële bala biptupale dumi. Bire'enda' gaca yela' stu' quiendo' len le'e nun quie pxela'adyi'le nëto' utupale dumi, na' biptupale dumi. ⁶ Quie lena' bia' pensari ruguinte inaba' cule lao Tito len compañero quienë' guidajë' ideyubijë' le'e cuenda gacalëjë' le'e utupalëjë' le'e dumi cabë' bega'nro di'idza' dza na'. Cana' bade dumi puesto ta ulu'en bedaohuele ptupalen, quele ptupalen de la fuerza. ⁷ Bigala'adyi'le con ca rnia' le'e: Chi gazaro tadao' bicu', lëzi tadao' bicu' usecho yezi'ro. Pero chi gazaro taze, lëzi taze usecho yezi'ro. ⁸ Quie lena' quie quiele reya'ala' utupale dumi ca tu pensari yu'u lu'u guicho laxta'ole. Bireya'ala' utupalen canezi ni a la fuerza. Reya'ala' sule gusto utupalen, como dan' nedyë'ë Diuzi nu ben' ru'e gun quienë' gusto. ⁹ Cana' huela'ia Diuzi le'e taze gula cuenda gata' quiele, bibi idzioguele. Lëscan' huela'ia Diuzi le'e ta gata' quiele gacalële ben' tula huelëlejë' tadya'a. ¹⁰ Cana' rnën lë'ë guichi la'ia quie Diuzi cani: Taze racalë Diuzi ja ben' yëchi'.

Ca naca tadya'a ruenë' quiejë', biyeyuyi yedu quien.

¹¹ Quie lena' rnia' le'e, naca Diuzi ben' run bini ta gazaro, lëscan' runnë' yela' huao ta gaoro. Lëbë' gunnë' quiele tacuenda bibi idzioguele gacalële benë' huelëlejë' tadya'a. ¹² Cana' gata' yugulu cue' yela' uña'a quiele tacuenda gacalëlejë' taze. Quie lena' conlë dumi ise'ela'le lao na'ando', cana' yedaohuejë' yëbijë' Diuzi diuxcalelo'. ¹³ Porque cati hue'rojë' ta ptupale ta gacalële lëjë', cala tuzi ta rdzioguejë' hue'rojë', pero lëscan' nun quie hue'rojë' ta rdzioguejë', lena' yëbijë' Diuzi diuxcalenë'. ¹⁴ Cana' yeyuezejë' lao Diuzi. Lëscan' cabë' bële quiejë', bë'lejë' ta bdzioguejë', lena' rulu'en tali rue quiele xti'idza' Cristo. Lëscan' yeyuezejë' lao Diuzi por nun quie dumi ze ptupale ta gacalële lëjë' len yugu ja ben' nao xneza Jesús. ¹⁵ Na'ra lëjë' ulidzajë' Diuzi nun quiele. Zujë' gusto conlë le'e nun quie cabë' bële quiejë', cana' ilë'ëjë' naca Diuzi ben' huen. ¹⁶ Xcale Diuzi dan' bëlënë' ra'o tadya'a. Tantozì bëlënë' ra'o tadya'a, bisuero saque' yëbironë' diuxcalelo' cabë' reya'ala' yëbironë' diuxcalelo'.

10

Una Pablo de yela' rnabë' quienë' naquë' apóstol

¹ Në'ëdi', Pablo, nun quie naca Cristo ben' reyëchi'la'adyi', ben' huen, rnabayëcha' laole uzënëgale ca inia' le'e. Na'ra bala le'e rnale naca' ben' rna di'idza' gaxo cati zulia' le'e tuže, pero cati zua' zitu', naca' ben' rna di'idza' zi'laza. ² Tahuencazi chi', rnabayëcha' laole uzënëgale quia' dyë'ëdi cati guida' ideyuba' le'e cuenda biruen zi ugunla'adya' pensari quieza' nun quie bala le'e raole nëto' xquia nale rdando' ruendo' ta racazi la'adyi'ndo',

quele mandado quie Diuzi. Pues zua' dispuesto yela'lia'jè'. ³ Talicazi rdando' lao yedyi layu, pero birdilando' ca rdila ja ben' rda lao yedyi layu. ⁴ Netza'la ca ruendo' como dan' birzèndo' espada ca rzè ben' rda lao yedyi layu espada, pero napando' yela' r nabè' quie Diuzi. Conlè len suendo' udyiagu'indo' ta naca fuerte gula rue contra Diuzi. ⁵ Cana' huendo' gan ta tzioñe'e ben' binuebè' Diuzi con cabè' rna xti'idzè'. Cana' huendo' gan quie nutezi ben' zè', nutezi ben' ruzdun inezi ja benè' con cabè' rna xti'idzè' Diuzi. Cana' huendo' gan ulu'endo' benè' netza'la naca pensari quie len pensari quie Cristo. Cana' huendo' gan ulu'endo'jè' ruguinte yetza'jè' pensari queiejè' ta yeyu'ujè' pensari quie Cristo inaojè' xnezè'. ⁶ Como banezile dyè'èdi con cabè' rna xti'idza' Diuzi, na'tera zundo' dispuesto ta huendo' castigo nu ben' birue quie xti'idza' Diuzi.

⁷ Le'e biruele pensari dyè'èdi. Chi nu ben' zu ladole unanè' bdè' Cristo lèbè' ta gaquè' apóstol, na'ra lèben' na' reya'ala' tzioñe'enè' de que lèscan' bdè'rè Cristo nèto' ta gacando' apóstol. ⁸ La'acazi tazè lasa baonia' le'e ben Cristo yela' r nabè' quiendo', bireude'da' inia' le'e cana' tatula. Ben Cristo yela' r nabè' quiendo' ta uzioñe'endo' le'e ta inaole dyè'èdi xnezè', cala ta udyiagu'indo' le'e. ⁹ Bire'enda' huele pensari use'ela' guichi laole ta idzebile con cabè' inèn lè'èna. ¹⁰ Le'e rnale nuzua' lè'è guichi puro di'idza' zi'laza, pero cati zua' ladole, rnial' le'e puro di'idza' gaxo, bireyažoga' inia' le'e di'idza' zi'laza. ¹¹ Pero nu ben' rna cana', reya'ala' inezijè' dyè'èdi de que cabè' naca di'idza' ruzundo'lè'è guichi cati zundo' zitu', cana'cazi di'idza' huazaque' hue'lèndo' le'e cati zundo' ladole.

¹² Bireyažondo' utilando' lèbi conlè lèben' rue že cuine. Pensari tondo ruejè' nun quie entre lèzjè' rlè'èjè' cuinjè' ben' že, entre lèzjè' rlè'èjè' cuinjè' ben' rutila lèbi. ¹³ Pero cala con ganzi yèbindo' benè' bèndo' huen, bèndo' dyin quie Diuzi. Bè' Diuzi laze quie quiendo' ga si'ndo' huendo' dyin quienè'. Lèscan' laze quiendo' guidando' hasta ciudad Corinto gan' zule. ¹⁴ Quie lena' cala rdetelando' laohue cabè' mandado bè Diuzi guidando' gan' zule. Chi tali bibè Diuzi mandado guidando' gan' zule, lena' aodetelando' laohue cabè' mandado bènè' nèto'. Pero zanèto' bidando' tanèro bedetixogue'ndo' le'e xti'idza' Diuzi. ¹⁵ Birnando' dyin bèndo' chi dyin bè ben' tula. Re'enndo' sudyi'ilèle Cristo mazara cuenda saque' uzioñe'endo' le'e mazara con cabè' naca mandado bè Diuzi nèto'. ¹⁶ Cana' huaca tziondo' tzetixogue'ndo' di'idza' la'iya quie Diuzi ja yedyi nega'nra zitu' ga zule. Pero ga parte ga uyo ja ben' tula, baodixogue'jè' xti'idza' Diuzi, lègan' na' bitziondo' nèto' biyèbindo' benè' dyin quiendo'.

¹⁷ Quie nu ben' re'en ina ja benè' nacajè' ben' že, mejorla inajè' Diuzi naquè' ben' že. ¹⁸ Porque chi hue Diuzi ra'o ben' že, talicazi nacaro ben'že, pero chi huero cuinro ben' že, cala tali nacaro ben' že.

11

Una Pablo quie ja ben' huizi' yè', ben' na naca ja apóstol

¹ Rnaba' cule laole uzènegale quia' dyè'èdi la'acazi chi raquele rnial' le'e pensari tondo. Con ca inia' le'e, huele cule uzènegale quia'. ² Naca dyin quie Diuzi nedyè'èda' le'e, lena' re'enda' usedyina' le'e lao Cristo biuyoguele ben' tula yè'. Re'enda' hua' quiele ca quie rue nu xuzi nigula. Reya'ala' usedyinne' zi'inè' cuidi' lao xquiubi' biuyogue' zi'inè' ben' tula yè'. ³ Pero como conlè yela' sin' quie xan' taxi'ibi' guquen forma ca bèla uzi'n Eva yè', lèscan' rdèbida' utèbi ben' tula pensari quiele cuenda usanla'adyi'le bira inaole tuzi xnezè' Cristo du guicho du la'adyi'le. ⁴ Porque dyè'èdi raxele ruzènegale cabè' di'idza' na nu ben' tula, nu ben' rida rguixogue' le'e netza'la cabè' uidxogue'ndo' le'e quie Jesús. Pues dyè'èdi rezila'adyi'le quie bichi be tula, bichi be binaca Bichi Be quie Diuzi ta uyezila'adyi'le dza na'. Lèscan' dyè'èdi ruzènegale di'idza' rguixogue' ben' tula, di'idza' binacan lèbi con cabè' rna xti'idza' Diuzi unando' le'e dza na'. ⁵ Pues rnial' cala zaca' nè'èdi' menosra cabè' nu ben' naole neza quie, nu ben' rnale naca apóstol huen gula. ⁶ La'acazi ruen zèdi quia' ta hue'lia' le'e di'idza', cala binezda' con cabè' rna xti'idza' Diuzi. Lena' bablu'endo' ladole conlè yugute cabè' bèndo' laole.

⁷ ¿Bí ca nale? ¿Tamala bia' uidxogui'le le'e di'idza' la'iya quie Diuzi, na' biunaba' le'e ni tu centavo? ¿Tamala bia', bedzagalaohua' cuenda gacalia' le'e gata' tahuen quiele? ⁸ Hasta uzi'a dumi ta ben ben' nita' yedyi tula nè'èdi' cuenda tu de len bia' gasto uidxogui'le le'e xti'idza' Diuzi. ⁹ Catu uzulia' le'e dza na', bide ta hua' gasto, ni tule bibia' le'e zèdi inaba'le gunle quie gasto quia'. Pero ja ben' bichiro, ben' uza' yu nebaba Macedonia, lèjè' benjè' ta rdziogueda'. Cana' udapa' cuidado cuenda bihuelia' ni tule zèdi gunle ta rdziogueda'. Pues cana'cazi biusana' huelia' le'e cana'. ¹⁰ Tantozi nužela'adya' nezda' dyè'èdi con cabè' rna di'idza' li quie Cristo, lena' nezda' nunu saque' udzun cabè' zua' gusto yèba' ja ben' nita' yu nebaba Acaya ca naca tahuen bia' quiele. ¹¹ Na'ra ¿bixquien' unia' cana'? ¿Nun quie binedyè'èda' le'e unia' cana'? Calalena'. Nezi Diuzi con cabè' nedyè'èda' le'e. ¹² Biusana' hua' cabè' rua' la'acazi chi zu ben' na nacarèjè' apóstol ca nèto'. Najè' de yela' r nabè' queiejè'

ruejê' ca apóstol tu lëbizi cabê' nêto'. ¹³ Pero binacan con cabê' najê'. Binacajê' dugalo apóstol. Yê'zi rzi'jê' ruejê' cuinjê' ca apóstol quie Cristo. ¹⁴ Lena' binacan ta yebanero, como dan' hasta cuin xan' taxi'ibi' Satanás yê'zi rzi'nê' ruenê' cuinnê' ca tu ángel rseni'n ca xni' gui'. ¹⁵ Cana' biyebanero cabê' rue ben' naque quie xan'taxi'ibi'. Yê'zi rzi'jê' ruejê' ca ben' rue tahuen. Pero hue Diuzi lëjê' castigo con cabê' naca tamala bëjê'.

Una Pablo cabê' uzacayudyinê' dan' naquê' apóstol

¹⁶ Rnia' le'e tatula: Bihuele pensari chi raca' luco. Pero chi cana' ruele pensari, ulegun lato inia' le'e ca rnê ben' raca luco cuando hueria' pensari ca quie ben' hue cuine ben' ze. ¹⁷ Quele mandado quie Cristo rnia' cabê' rnia' ni. Rnia' ca quie ben' raca luco. Rnia' ca quie ben' rue cuine ben' ze. ¹⁸ Nun quie nita' ben' zê ruejê' ben' ze cuinjê', lega raxejê' ta de lao yedyi layu, lëscana'rê nê'êdi', hueria' ca quie ben' rue cuine ben' ze. ¹⁹ Cana' hua' como dan' le'e nale nacale ben' rioñe'e, nale huazuele dyê'êdi huele gan ca na ben' luco. ²⁰ Pues le'e redaohuele huele ca mandado zi'laza huegadyijê' le'e huele quiejê'. Redaohuele cati cubajê' ta de quiele, redaohuele cati inabê'jê' le'e ta zi'laza gula, redaohuele cati gacazê'jê' le'e, hasta redaohuele cati capajê' laohuele. ²¹ Pero redue'da' inia' le'e nêto' bibeya'zondo' huelêndo' le'e cana'.

Pero cabê' rue ja ben' na', ruejê' cuinjê' ben' ze, lëscan' hueria' cuina' ben' ze la'acazi ruen zi inêria' ca ben' luco. ²² Quie lena' inaba' le'e, ¿naca ja ben' na' ben' rnê di'idza' hebreo? Lëscan' nê'êdi', rnêria' di'idza' hebreo. ¿Nacajê' ben' Israel? Lëscan' nê'êdi', nacaria' ben' Israel. ¿Nacajê' Zi'isuba Abraham? Lëscan' nê'êdi', nacaria' Zi'isuba Abraham. ²³ ¿Tali na' nacajê' ben' rue mandado quie Cristo? Rnia' le'e cala mandado quie Cristo ruejê'. Pero nê'êdi' sí, rua' dugalo mandado quie Cristo. Ca rnê ben' tondo, cana' rnia' niga. Pues ganura zu rue dyin quie Cristo ca nê'êdi'. Ganura zu rguijê' ru'ejê' zi' quie ca nê'êdi'. Ga nu ben' zu rudze'jê' lu'u dyiguiba ca nê'êdi'. Tazê lasa bën zudyi quia' guti ja benê' nê'êdi'. ²⁴ Hasta ben' yedyi quia', ben' Israel, bëjê' nê'êdi' castigo. Ga'yo' lasa udijê' nê'êdi' galobechi ga huio guidi. ²⁵ Tzona lasa udijê' nê'êdi' yaga. Itu lasa udijê' nê'êdi' yo. Tzona lasa betu barco yu'a lu'u nisadao'. Tu lasa uzuba' lao nisadao' tu dza tu yela. ²⁶ Zê lasa uza'a uya'a zitu'. Zê lasa ben zudyi quia' hua' yao ze nê'êdi'. Zê lasa ben zudyi quia' cuan ja benê' ta de quia'. Zê lasa ben zudyi quia' hue ja ben' yedyi quia' bizinaquezi len nê'êdi'. Zê lasa ben zudyi quia' hue ja ben' yedyi tula bizinaquezi len nê'êdi'. Zê lasa ben zudyi quia' ga naca ciudad, ga naca lao ya'a, ga naca lao nisadao'. Zê lasa ben zudyi quia' nun quie ben' na najê' xneza Cristo, pero bê' nazijê'. ²⁷ Bia' dyin zi'i guca zêdi quia'. Zê lasa bigusia' bedu yela. Zê lasa bedzagalaohua' udua'. Zê lasa bedzagalaohua' ubilida'. Zê lasa bia' ubasi. Zê lasa bedzagalaohua' nun quie tazaga. Zê lasa bedzagalaohua' nun quie bdziogueda' Zaba'.

²⁸ Cana' guca quia', pero bineyudyi ca tazêdi raca quia'. Yugu dza raqueda' rdêbida' quie ja ben' nao xneza Jesús nita' tu tu yedyi. ²⁹ Chi zu ben' rdzebi inao xneza Cristo, yeyêchi'la'adya' lëbê' ca quie nê'êdi' naca' ben' rdzebi inao xneza Cristo. Lëscan' chi zu ben' bê yela' stu' quie laguedyi, na'ra nê'êdi' rdze'tzegueda' quie ben' bê yela' stu'. ³⁰ Chi ru'en lato hua' cuina' ben' ze, cana' hua' cuina' ben' ze nun quie bedzagalaotzaguia' uzacayudya' bia' dyin quie Diuzi. ³¹ Diuzi, ben' naca Xuzi Señor quiero Jesucristo, ben' rulidzaro ruero bala'ana laohue tuzioli, lëbê' nezinê' tali nacan ca rnia' le'e. ³² Cati uzua' ciudad Damasco, caora na' bê ben' naca gobernador quie rey Aretas mandado ta guida ja soldado gapajê' ru'a yedyi ga de neza ta guxujê' nê'êdi' huejê' nê'êdi' preso. ³³ Pero ja ben' compañero quia', ben' nao xneza Jesús, lëjê' bdze'jê' nê'êdi' tu lu'u chicuiti ze, belizajê' nê'êdi' ru'a ventan zu lë'ê besu ta zu nusio ru'a yedyi. Cana' guca ula' bibêxujê' nê'êdi'.

12

Blu'e Cristo Pablo blê'ênê' ca naca guibá

¹ Bibi zaca'n hua' cuina' ben' ze, mejorla hua' di'idza' cabê' blê'êda' blu'e Cristo nê'êdi' dza na'. ² Nê'êdi', ben' nao xneza Cristo, azio chida' iza, uquiê'nê' nê'êdi' guibá uyune. Binezda' chi uya'a len bê'êla' zuba' quia', o chi biuya'a len bê'êla' zuba' quia'. Tuzi Diuzi nezinê'. ³ Pero nezda' uquiê'nê' nê'êdi' guibá, la'acazi binezda' chi len bê'êla' zuba' o chi cala len. Nezi Diuzi. ⁴ Uquiê'nê' nê'êdi' na' ga beda' di'idza' naca la'iya gula. Tantozi naca la'iya di'idza' na', biru'en lato inê ja benê' ca naca di'idza' beda'. ⁵ Na'ra lega redaohueda' cabê' guca quia' dza na', pero bire'enda' hua' cuina' ben' ze nun quie len. Tuz ca guca quia' cati bedu fuerza quia', lëzin re'enda' yêpa' ja benê'. ⁶ Pero chi hua' cuina' ben' ze yêpa' ja benê' tahuen gula bëlê Diuzi nê'êdi' guibá, lena' binacan pensari tondo, como dan' tali cabê' guca quia' guibá yêpa'jê'. Pero bicala yêpa'jê' cana', como dan' bire'enda' huejê' pensari naca' ben' belaora ca tu rlê'êjê' naca'.

⁷ Tantozi naca tahuen gula ta yebanero cabê' blê'êda' ca naca guibá, ben Diuzi nê'êdi' tu ta tzei ila cuerpo quia' cuenda bigaqueda' cuina' naca' ben' zera ca tu ta naca'. Nacan ca

quie tu yéchi' tona uyu'un lu'u cuerpo quia'. Ruen quia' ca tu bichi be quie xan' taxi'ibi' Satanás rusacan në'édi' bizinaquezi. ⁸ Tzona lasa unaba' lao Cristo ta huené' mandado ta usannan në'édi' dan' yu'u ruzèi rula cuerpo quia'. ⁹ Pero una Cristo në'édi' cani: "Guna' luè' fuerza quia'. Conlè lèzin birabi idzioguelo', porque cati bide fuerza quio' cuinzo', cana' huazaque' guna' luè' fuerza quia'." Cana' redaohueda' bide fuerza quia' cuenda gunnè' fuerza quiené' quia'. ¹⁰ Quie lena' redaohueda' bide fuerza quia'. Redaohueda' cati rutasi runio bené' në'édi'. Redaohueda' cati rdziogueda' bi cosa. Redaohueda' cati rusaca ja bené' në'édi' bizinaquezi. Redaohueda' cati raca zèdi quia'. Cana' raca quia' nun quie rguixogui'a xti'idza' Cristo. Nezda' cati racabè'da' dyè'édi' bide fuerza quia', caora na' run Cristo në'édi' fuerza quiené', pero mazara fuerza ze run Cristo në'édi'.

Rdèbi Pablo quie ja ben' nao xneza Jesús, ben' nita' ciudad Corinto

¹¹ Ca ben' tondo bia', pero dula' quie le'e bia' cana', porque le'e reya'ala' inèle tu cule quia'. Pues cala zaca' në'édi' menosra cabè' nu ben' naole neza quie, nu ben'rnale naca apóstol huen gula. Pero quie në'édi' rnale ni lè'èti' gabi zaca'. ¹² Caora udixogui'a le'e xti'idza' Diuzi dza na', bèlia' le'e zela'adyi' gula, blè'èle bè Diuzi seña, bènè' yela' huaca, bènè' ta yebanero. Lena' blu'en tali naca' apóstol quiené'. ¹³ ¿Cala bèlia' le'e lèbi cabè' bèlia' ja ben' nao xneza Jesús nita' ga tula? Biunaba' le'e ta hua' gasto quia'. Tuzi lena' bibèlia' le'e lèbi. ¿Ules!Ze quia' cabè' tamala bia' quiele, biunaba' le'e ta hua' gasto quia'! ¹⁴ Pues na'ra sí, bazua' dispuesto guida' ideyuba' le'e taoyune. Pero tatula na' biunaba' le'e ta hua' gasto quia' como dan' quiele ta de quiele re'enda', re'enda' huera quiele quie Cristo. Pues como raqueda' le'e ca zi'ina', lena' naca cuenda quia' hua' gasto quiele. Binacan cuenda quiele huelèle në'édi' gasto. ¹⁵ Pues redaohueda' hua' gasto quia' cuinza'. Hasta zua' dispuesto hua' gasto fuerza quia' ta gacalia' le'e gata' tadya'a quiele. Pero cani raqueda': Ca tu mazara nedyè'èda' le'e, cana' menosra nedyè'èle në'édi'.

¹⁶ Pero bala ben' zu ladole inajè' ben' listo gula naca', najè' uzi'a le'e yè' dza na'. Cana' inajè' ba'ala'cazi dyè'édi' nezijè' biunaba' le'e ta hua' gasto quia' dza na'. ¹⁷ ¿Bi ca nale? ¿Uzi'a le'e yè' nun quie nu ben' aose'ela' laole dza na'? ¹⁸ Pues nezile aonaba' tu cule lao Tito chi biguidè' ideyubinè' le'e. Lèscan' use'ela' itu ben' bichiro sa'lèné' Tito. ¿Bi ca nale? ¿Uzi'! Tito le'e yè'? ¿Bi ca nale? ¿Quele tali na' në'édi'lia' Tito, tuzi ca bèlèndo' le'e, tuzi ca naca pensari quiendo'?

¹⁹ Chi raquele rnando' aruendo' defender cuinndo' laole, bira huele pensari cana', como dan' biruendo' cana'. Ca ta ruendo' rnando' lao Diuzi nun quie nacalèndo' Cristo tuze. Pero yugu ca rnando' le'e nacan ta gacalen le'e ta huera quiele quie Cristo. Nedyè'èda' le'e bicha'. ²⁰ Rdèbida' chan' cati guida' ideyuba' le'e neruele ca ta bireya'ala' huele. Lèscan' rdèbida' idza'le në'édi' ca ta inia' le'e. Rdèbida' chan' gata' tazèdi. Rdèbida' chan' neruele gacazè'le laguedyile, chan' nerda'le laguedyile, chan' neruele yela' adyi' len laguedyile, chan' nernèle contra laguedyile, chan' neru'ele di'idza' bižu, chan' neruele cuinle ben' ze, chan' neruele ta biyu'u ni'a xnezi. ²¹ Rdèbida' gaca tastu' quia' ca ruele cati guida' ideyuba' le'e tatula. Rdèbida' huabedyata ca ruele chan' neruele cabè' dula' xquia' bèle tiempote. Rdèbida' chan' neruele tabayatzta len yaca nigula, chan' nerda'lele nigula binaca zgulale. Rdèbida' chan' nenaole ca naca vicio quiele unaole dza na'.

13

Bè' Pablo lèjè' consejo, bgapanè' lèjè' diuzi

¹ Pues na' araca tazona lasa rida' ideyuba' le'e. Biži ta yetilan di'idza' cati gao ja bené' laguedyijè' xquia, re'ennan chopa tzona testigo ta gacan bala chi nacan tali, chi binacan tali. ² Zua' zitu', pero guna' le'e tu consejo tatula: Chi guida' ideyuba' le'e tatula, chi neruele dula' xquia, na'ra biyeyèchi'la'adya' le'e. Cana' naca consejo bi'a ben' bè xquia dza na'. Lèscana' naca consejo bènà' yugulule cati bida' dza na' bedeyuba' le'e tachopa lasa. ³ Chi rnaban huelia' le'e cana', na'ra huata'cazi prueba ca prueba re'enle gata' chi tali rnia' lao na'a Cristo. Cala hue Cristo gaxo len le'e, dechan' ulu'enè' le'e cabè' naca yela' huaca quiené'. ⁴ Tali na' guti Cristo lè'è yaga cruzo ca quie ben' bisaque' hue defender cuine, pero yela' huaca quie Diuzi zue' bebannè'. Lèscan' nètò' nacaré quiendo' ca guca quiené'. Naca quiendo' ca quie ben' bisaque' hue defender cuine, pero como dan' nuelèndo' Cristo tuzi, quie lena' babèn Diuzi nètò' yela' huaca quiené' ta huendo' mandado ca mandado re'en Diuzi huelèndo' le'e.

⁵ Ulehuacara pensari ca ruele chi du guicho du la'adyi'le rnaole xneza Cristo. Ulehue prueba cuinle. ¿Binezile zu Jesucristo len le'e tuze? Pero bisulèné' le'e tuze chi de ladzazi rnaole xnezè'. ⁶ Pues re'enda' inezile binacando' ben' huizi' yè'. ⁷ Rulidzando' Diuzi ta nitu bi tamala huele. Cala binapando' rson rulidzando' Diuzi por le'e, pero ca ta re'enndo', re'enndo' huele puro tahuen, la' acazi raquele binapando' rson. ⁸ Cana' re'enndo' como

dan' bisaque' huendo' ta birutila lëbi len xti'idza' Diuzi. Pues puro cabë' rutilan lëbi ruendo'. ⁹ Quie lena' redaohuendo' cati inaole xneza Cristo dyë'ëdi, la'acazi raquele nacando' ben' bide yela' huaca quie. Biusanndo' ulidzando' Diuzi por le'e cuenda gacalënë' le'e gacale ben' laxta'o yëri. ¹⁰ Bia' guichi ni use'ela'n laole tu zaguidara' ideyuba' le'e cuenda cati sulia' le'e biinaban inabi'a le'e zi'laza conlë yela' r nabë' ta pca'n Cristo lao na'a. Bire'enda' usanla'adyi'le bira inaole xneza Cristo.

¹¹ Na'ra bicha', hua' le'e tu despedida. Uleyue pensari quie ga rapale falta, yeyuezel'a'adyi'le laguedyile, huelële laguedyile tuže, sulële laguedyile gusto. Cana' huapa Diuzi le'e cuidado. Naca Diuzi ben' cuëchi chizi laxta'oro nedyë'ënë' ra'o. ¹² Gapale diuzi quie quie laguedyile dyë'ëdi, gaole xagajë' tu psitu. ¹³ Yugulu ben' bichiro, ben' nita'ja len në'ëdi' niga, rgapajë' le'e diuzi.

¹⁴ Rulidza' Diuzi ta uca'n Señor quiero Jesucristo le'e huen. Nedyë'ë Diuzi le'e. Lëscan' zu Bichi Be quienë' conlë le'e. Amén.

DI'IDZA' BZU SAN PABLO APÓSTOL LĒ'Ē GUICHI, USE'ELA'NĒ'N LAO ESTADO GALACIA

Ni rguixogue'n ca naca guichi bē San Pablo

¹ Nē'ēdi', Pablo, bdē' Diuzi nē'ēdi' ta tzetixogui'a benē' xti'idzē'. Cala benē' bdē' nē'ēdi', dechan' bdē' cuin Jesucristo lēnē' Xuziro Diuzi nē'ēdi'. Naca Diuzi ben' pseban Jesucristo. ² Nē'ēdi'lia' ben' bichiro, ben' nao xneza Jesús, ben' nita' niga ga zua', bēndo' guichi ni ta ise'ela'ndo' lao le'e, ben' nao xneza Jesús, ben' nita' estado Galacia. ³ Rulidza' Xuziro Diuzi lēnē' ži'inē' Jesucristo ta huela'iyaquē' le'e cuēchiyaquē' chizi laxta'ole. ⁴ Naca Jesucristo ben' psedyin cuine gutinē' lē'ē yaga cruzo por nun quie dan' ta gažo dula' quiero quie tamala de lao yedyi layu. Cana' bēnē' quiero segūn ca re'en Xuziro Diuzi gaca quiero. ⁵ ĩRa'o na', reya'ala' gapala'nro Diuzi tuzioli! Amén.

Tuzi neza de yenaoro yeyoro guibá

⁶ Lega rebaneda' le'e ca ruele laozulaotele rusanla'adyi'le xneza Diuzi, ben' ulio le'e por nun quie nadyē'ē Cristo le'e. Baziole zenaole neza tula, pero cala neza ta yeyole guibá. ⁷ Talicazi na' tuzi neza de ta yeyoro guibá. Ca naca ta raca quiele, nita' yaca benē' ruquixiyaquē' quiele. Re'enjē' bigalele ca udixogue'ndo' le'e quie xneza Cristo yenaoron yedyinro guibá. ⁸ Udze'de' Diuzi nu ben' re'en usanla'adyi'le cabē' baodixogue'ndo' le'e dza na'te quie xneza Cristo ta re'enjē' yenaole neza tula, neza ta biyedyinle guibá. Udze'de' Diuzi nuti'tezi ben' rue cana', la'acazi nē'ēdi', la'acazi nu ángel za' guibá. ⁹ Lena' agudya' le'e dza na'te, pero na'a re'enda' inia' le'e tatula de que udze'de' Diuzi nuti'tezi ben' re'en usanla'adyi'le cabē' baodixogue'ndo' le'e quie xneza Cristo dza na'te ta yenaole neza tula.

¹⁰ La'acazi le'e birapale gusto cabē' rnia' le'e niga, pero Diuzi sí, rapē' gusto. Birguiloga' nu ben' hue nē'ēdi' ben' ze. Chan' rguiloga' nu ben' hue nē'ēdi' ben' ze, na'ra bira zaca' hua' dyin quie Cristo.

Ni rguixogue'n cabē' guca quie Pablo guquē' apóstol

¹¹ Pero reya'ala' huele pensari cabē' rnia' le'e ni, bicha'. Cala pensari quie benē' rguixogui'a le'e, dechan' pensari quie Diuzi ta yenaole xneza Cristo yeyole guibá. ¹² Cala benē' bzioñe'enē' nē'ēdi' ca naca xneza Cristo, dechan' cuin Jesucristo bzioñe'enē' nē'ēdi'.

¹³ Le'e babele cabē' guca quia' dza na' cati benaohua' rua' cabē' naca costumbre quie xuzixta'ohua' ben' Israel. Banezile lega psebi'a xneza Cristo. Uya'a yadiloga' yaca ben' nao xneza Cristo ta udyiaya'yaquē', bibeyēchi'la'adya'yaquē'. ¹⁴ Dyē'ēdi' gula benaohua' cabē' naca costumbre quie xuzixta'ohua' ben' Israel. Nunu yaca ben' gololia' lēbizi, bērayaquē' ca nē'ēdi'. ¹⁵ Pero tu binegaloga' bdē' Diuzi nē'ēdi' tanun quie dan' nadyē'ēnē' nē'ēdi'. ¹⁶ Caora abdyin hora una Diuzi, na'ra bedetilalao ži'inē' Jesucristo nē'ēdi', yela' na' quixogui'a ben' binaca ben' Israel ca naca xneza Cristo yenaoron yedyinro guibá. Beyudyi guca quia' cana', nunu yenaba'consejo. ¹⁷ Ni ciudad Jerusalén biuya'a tzenaba'consejo lao yaca ben' banaca apóstol tu binegaca' apóstol. Biuya'a na', pero biudzēda' uya'a yu nebaba Arabia. Na'tera zeza'a uya'a ciudad Damasco.

¹⁸ Baocara tzona iza, caora na' uya'a ciudad Jerusalén bedila' Pedro uzulia'nē' chi'inu' dza. ¹⁹ Nunura apóstol bedila'. Tuzi Pedro len Santiago, ben' naca ben' bichi xa'nro Jesucristo, bedila'. ²⁰ Ruguntia' Diuzi nacan tali cabē' di'idza' ruzua' lē'ē guichi niga.

²¹ Ude beyudyi na', uya'a yu nebaba Siria. Na'tera uza' za' yu nebaba Cilicia. ²² Binuebē' yaca ben' nao xneza Cristo, ben' nita' yu nebaba Judea, nē'ēdi'. ²³ Na' tu beziyaquē' con cabē' na benē' ca bia' dza na'te. Uneziyaquē' cabē' bia' beguiloga' ga nita' ben' nao xneza Cristo ta udyiaya'yaquē'. Pero na'a bira rua' cana', barda' rguixogui'a benē' xti'idza' Diuzi re'enda' inaoyaquē' xneza Cristo. Tanun quie barnaohua' xneza Cristo na'a, ²⁴ cana' rue yaca benē' Diuzi ben' ze.

2

Yaca ben' naca apóstol bējē' Pablo tuze

¹ Na'ra baguca chida' iza beya'a ciudad Jerusalén tatula. Uza'lē Bernabé nē'ēdi' uquiē'ndo' Tito. ² Beya'a na' tatula porque Diuzi na' bēnē' mandado beya'a. Gan' na' bedila' ben' napa dyin quie ben' nao xneza Cristo. Caora na' bexi'idze'yaquē' con cabē' rua' rguixogui'a ben' binaca ben' Israel xti'idza' Diuzi. Cana' bia' tacuenda biten cana'zi dyin quie Cristo rua'. ³ Na' bega'ndo' di'idza' dyē'ēdi. Nica bējē' mandado su compañero quia' Tito tu xēdyidao' cuine como dan' binacan obligado su tu xēdyidao' cuin ben' binaca ben' Israel. ⁴ Pero tali na' gu'un bala yaca ben' na', ben' nazi naoyaquē' xneza Cristo, su

tu xédyidao' cuin Tito. Quie lena' balarazi za'yaqué' uré'naoyaqué' nêto' ta si'jê' cuenda bi ruendo'. Biraxejê' ca ruendo' como dan' tanun quie nuendo' tuže Jesucristo nacando' ben' libre. Re'enyacué' yenaondo' ley pca'n Diuzi lao na'a Moisés tatula. ⁵ Pero ni tzadica' bibêndo'yaqué' lato huelëyaqué' nêto' como dan' re'enndo' huele seguir inaole xneza Cristo yeyole yedyinle guibá.

⁶ Na' yaca ben' napa dyin quie ben' nao xneza Cristo yaxejê' cabê' rua' bibetza'yaqué' ca naca dyin quie Diuzi za'a rua'. Pero chi ben' napa dyin, chi ben' binapa dyin, tuzicazi ca raqueda' como dan' ilê'ëcazi Diuzi ra'o cabê' naca pensari yu'u lu'u guicho laxta'oro, cala cabê' naca žabaro. ⁷ Na'ra bibetza'yaqué' ca naca dyin quie Diuzi za'a rua', gucabê'yaqué' chi Diuzi bënë' nê'ëdi' mandado rguixogui'a ben' binaca ben' Israel xti'idza' Diuzi ta hue quieyaqué' len, na' yezi' Diuzi leyaqué' guibá. Lëbi cabê' gucabê'yaqué' bē Diuzi Pedro mandado quixogue'nē' yaca ben' Israel xti'idza' Diuzi, cana' gucabê'yaqué' Diuzi bënë' nê'ëdi' mandado quixogui'a xti'idzē'. ⁸ Pues lëbi cabê' bē Diuzi ulionē' Pedro use'elē' lëbē' ta tzetixogue'nē' xti'idzē' lao ben' Israel, lëzi cana' ulio Diuzi nē'ëdi' tzetixogui'a xti'idza'nē' lao yaca ben' binaca ben' Israel.

⁹ Quie lena' gucabê' Santiago, len Pedro, len Juan de que bē Diuzi tu tahuen quia', bënë' dyin quienē' hua'. Naca Santiago, len Pedro, len Juan ben' belao, ben' rudze' xnezi quie yaca ben' nao xneza Jesús. Na' redaohueyaqué' bēnyaqué' nē'ëdi'lia' Bernabé di'idza' žela'adyi'. Bega'nlēyaqué' nêto' di'idza' ta tziondo' nêto' tzetixogue'ndo' ben' binaca ben' Israel xti'idza' Diuzi, tu na' tzioyaqué' leyaqué' tzetixogue'yaqué' ben' Israel xti'idza' Diuzi. ¹⁰ Tuzi unayaqué' nêto' reya'ala' yeyëchi'la'adyi'ndo' ben' yëchi'. Pero cana'cazi rua' rapatzaguia' cuidado ta rua'.

Ciudad Antioquía udila Pablo Pedro

¹¹ Na' cati bedyin Pedro ciudad Antioquía, cana' bedila' lëbē' na'. Na'ra udila' lëbē' como baoquixi pensari quienē'. ¹² Dza na' udaolē Pedro yaca ben' binaca ben' Israel. Pero cati bedyin bala ben' Israel, ben' naca amigo quie Santiago, na'ra psannē' bira udaolēnē' leyaqué'. Cana' bënë' como dan' rdzebinē' ben' naca tu cue' ben' Israel, ben' re'en su tu xédyidao' cuin yaca ben' nao xneza Jesús, la'acazi ben' binaca ben' Israel. ¹³ Na'ra yaca los demás ben' nao xneza Jesús, ben' Israel, bërëyaqué' chopa neza quieyaqué' con cabê' bē Pedro. Hasta Bernabé, lëscana' bënë' tuže uquixi pensari quie', bërënē' chopa neza. ¹⁴ Cati blē'ëda' ca ruejē', birnaojē' tali con cabê' rna xti'idza' Diuzi, na'ra unia' rëpa' Pedro zaca'lao lao yaca ben' nao xneza Jesús cani: "Luē' naco' ben' Israel, pero bira naolo' ley pca'n Diuzi lao na'a Moisés. Quie lena' rnaba' luē', žbixquien' re'enlo' huu' mandado inao yaca ben' binaca ben' Israel ley pca'n Diuzi lao na'a Moisés?" Cana' gucha' Pedro udilanē'.

La'acazi ben' Israel, la'acazi ben' tula, ruen zi rzudyi'ilëro Cristo ta yeyoro guibá

¹⁵ Ra'o nacaro ben' Israel. Binacaro ben' binuebē' Diuzi cabē' naca yaca los demás ben' za' yedyi tula. ¹⁶ Pero dyē'ëdi neziro biilē'ë Diuzi ra'o ben' laxta'o yëri tanun quie naoro ley pca'n Diuzi lao na'a Moisés, dechan' tanun quie chi rzudyi'ilëro Jesucristo. Quie tuzi len ilē'ë Diuzi ra'o ben' laxta'o yëri. Quie lena' lente ra'o, rzudyi'ilëro Jesucristo cuenda ilē'ë Diuzi ra'o ben' laxta'o yëri, porque cala tanun quie naoro ley pca'n Diuzi lao na'a Moisés yeyoro guibá.

¹⁷ Pero žbizi huero chi rzudyi'ilëro Cristo, na'tera biyedyinro guibá? žBizi huero chi tali ruen zi inaooro ley quie Moisés ta yezi' Diuzi ra'o? žInaro dula' quie Diuzi chi raparo falta biyezi'nē' ra'o? žBireya'ala' inaro cana'! ¹⁸ Pero xquia nacan quiero chi yenaoro neza gula quiero tatula, na' tu chi'zi uzudyi'ilëro xneza Cristo. ¹⁹ Lao ley quie Moisés nuen quia' ca quie ben' huati, bira ruen nē'ëdi' mandado. Pero lao Diuzi sí, binatia' nabana' ruenē' nē'ëdi' mandado. ²⁰ Naca quia' ca quie ben' gutilē Cristo lë'ë yaga cruzo. Bide yela' neban quia' cunza', yela' neban quie Cristo rdalia' nabana' lao yedyi layu. Quie lena' decazi yela' neban quia' nabana' lao yedyi layu por nun quie dan' rzudyi'ilia' Cristo, ben' naca ži'i Diuzi, ben' nadyē'ë nē'ëdi'. Ta gaca tahuen quia' psedyinnē' cuinnē' gutinē' lē'ë yaga cruzo por nē'ëdi'. ²¹ Biusanla'adya' ca naca yela' racalē quie Diuzi. Chi tali yezi' Diuzi ra'o por nun quie chi hue quiero cabē' na lao ley pca'n Diuzi lao na'a Moisés, na'ra huazaque' inaro bibi zaca'n guti Cristo lē'ë yaga cruzo.

3

Tuzi sudyi'ilëro Cristo ilē'ë Diuzi ra'o ben' laxta'o yëri

¹ žLe'e, bicha', ben' estado Gálatas, aoca tondole! žNuži pquixi pensari quiele bira hue quiele xti'idza' Diuzi? Dyē'ëdi blē'ële baodixogue'ndo' le'e cabē' guca quie Cristo gutinē' lē'ë yaga cruzo. ² Rnaba' le'e tu di'idza': Caora cati uyu'ule Bichi Be quie Diuzi, žtanun quie bidan' uyu'ule? žUyu'ule Bichi Be quie Diuzi tanun quie bē quiele cabē' di'idza' na lao ley quie Moisés, o chi tanun quie bē quiele cabē' di'idza' udixogue'ndo' le'e? ³ žBizi raca quiele

taže aotondole? ¿Ruele pensari cuinzile de fuerza valor quiele yenaole xneza Cristo, bira ruen zi galacê Bichi Be quie Diuzi le'e? ⁴ Taže baoca tazêdi quiele dan' naole xneza Cristo. Na'ra ¿bi ca nale? ¿Bibi zaca'n baozuele tazêdi guca quiele? Tahuen na' chi zaca'n gualên le'e. ⁵ Rnaba' le'e itu di'idza': Cati bdze' Diuzi Bichi Be quienê' lu'u guicho laxta'ole, bënê' yela' milagro quienê' entre le'e, ¿bixquien' bê Diuzi quiele cana'? Pues cala bê Diuzi quiele cana' tanun quie dan' bê quiele cabê' di'idza' na lao ley quie Moisés, dechan' bê Diuzi quiele cana' tanun quie dan' rzudyi'ilêle Cristo cabê' aodixogue'ndo' le'e.

⁶ Na' uzudyi'ilê Abraham Diuzi. Con lêzin blê'ê Diuzi lëbê' ben' laxta'o yêri, ben' nacalê lëbê' tuže. ⁷ Quie lena' reya'ala' inezile naca dugalo ži'isuba Abraham nutezi ben' rzudyi'ilê Diuzi, la'acazi ben' Israel, la'acazi ben' za' yedyi tula. ⁸ Diuzi, ben' bê mandado bzu yaca benê' xti'idzê' lë'ê guichi, unezinë' dza na'te de que sudyi'ilê yaca ben' binaca ben' Israel lëbê'. Cana' gaca quieyaquê' hualê'ê Diuzi leyaquê' ben' laxta'o yêri, ben' hue lëbê' tuže. Quie lena' una Diuzi dza na'te gudyinê' Abraham: "Huela'iya' yugulu ben' nita' lao yedyi layu tanun quio' luê'." Cana' una Diuzi gudyinê' Abraham. ⁹ Na'ra cani nacan: Huela'iya Diuzi yugulu ben' rzudyi'ilê Cristo lëbizi cabê' bêla'iya Diuzi Abraham dza na'te.

¹⁰ Pero udze'de' Diuzi nu yaca ben' sudyi'ilê cabê' mandado rue lao ley ta gata' yela' neban quienê' tuzioli. Lêtana' rguixogue'n lë'ê guichi la'iya quie Diuzi cani: "Yugulu ben' rue quie cabê' mandado rue lao ley, udze'de' Diuzi leyaquê' chi bihue quieyaquê' yugulute cabê' mandado ruen." Cana' rnên lë'ê guichi la'iya quie Diuzi. ¹¹ Tali na' cala tanun quie dan' hue quiero cabê' mandado rue lao ley ilê'ê Diuzi ra'o ben' laxta'o yêri. Lena' rguixogue'n lë'ê guichi la'iya cani: "Tanun quie dan' sudyi'ilêro Diuzi, na'tera ilê'ênê' ra'o ben' laxta'o yêri, gunnê' ra'o yela' neban tuzioli." ¹² Pero taže netza'n quie nu ben' rue quie cabê' mandado rue lao ley. Calá sudyi'ilênê' Diuzi ta gata' yela' neban quienê' tuzioli como dan' rguixogue'n lë'ê guichi la'iya caniga: "Nu ben' hue quie yugulute cabê' mandado rue lao ley, gata' yela' neban quienê' tuzioli." Cana' rnên lë'ê guichi la'iya.

¹³ Nun quie guti Cristo lë'ê yaga cruzo. bibdze'de' Diuzi ra'o, bdze'de'nê' Cristo lao lazaro. Cana' rguixogue'n lë'ê guichi la'iya quie Diuzi cani: "Udze'de' Diuzi yugulu ben' na'ala' lë'ê yaga ta gatinê'." Cana' na lë'ê guichi la'iya quie Diuzi. ¹⁴ Cana' guca quie Cristo cuenda huela'iya Diuzi ben' binaca ben' Israel. Como dza na'te bega'nê Diuzi Abraham di'idza' ta huela'iya Diuzi yugulu benê' tanun quie Abraham, na'ra lao na'a Cristo Jesús nuela'iya Diuzi ben' binaca ben' Israel, ben' nao xneza Cristo. Cana' bzu Diuzi di'idza' ca di'idza' bega'nênê' Abraham. Cana' aose'ela' Diuzi Bichi Be quienê' ta galacênê' ra'o tanun quie dan' rzudyi'ilêro Cristo.

Ni rguixogue'n quie di'idza' bega'nê Diuzi Abraham dza na'te

¹⁵ Na'ra, bicha', re'enda' inia' le'e tu di'idza' quie nu ben' re'en chasa guichi quie. Caora chasa guichi tzu'un firma ta yega'ntza'oro, na'ra bisaque' uquinoron, bisaque' inaro di'idza' tula. ¹⁶ Pues bega'nê Diuzi Abraham len ži'isubanê' di'idza' dza na'te. Pero birnên lë'ê guichi de que bega'nê Diuzi zê ži'isubanê' di'idza', dechan' rnên bega'nênê' tuzi ži'isubanê' di'idza', lena' tzioñê'ero bega'nênê' ži'isuba Abraham, ben' naca Cristo, di'idza'. ¹⁷ Caniga nacan ta inia' le'e: Dyê'êdi bega'nê Diuzi Abraham di'idza' dza na'te. Quie lena' cati baode tapa gayuhua galobechi iza, caora na' pca'n Diuzi ley quienê' lao na'a Moisés. Pero lëley na' bisaque' uquinon con cabê' rna di'idza' bega'nê Diuzi Abraham. ¹⁸ Chi tali na' ruen zi hue quiero cabê' mandado rue lao ley tacuenda gata' yela' neban quiero tuzioli, na'ra bisaque' inaro gata' yela' neban quiero tuzioli tuzi nu tanun quie dan' sudyi'ilêro Cristo. Pero bega'nê Diuzi Abraham di'idza' de que tuzi tanun quie dan' uzudyi'ilênê' lëbê' gata' yela' neban quienê' tuzioli.

¹⁹ Na'ra, ¿ga hue dyin ley pca'n Diuzi lao na'a Moisés? Pues tanêro bega'nê Diuzi Abraham di'idza', na'tera pca'nnê' ley quienê' lao na'a Moisés tacuenda inezi yaca benêchi' de dula' xquia quieyaquê'. Pero cala tuzioli hue ley na' dyin. Cati babdyin Cristo, ben' naca ži'isuba Abraham, ben' bega'nê Diuzi Abraham di'idza', na'tera babedyi' quien. Lëscan' inia' le'e itu di'idza': Caora pca'n Diuzi ley quienê', tanêro pca'nnê' lao na'a yaca ángel, na'tera pca'n yaca ángel ley na' lao na'a Moisés. ²⁰ Pero caora bega'nê Diuzi Abraham di'idza' dza na'te, tu cuinzi Diuzi bega'nênê' Abraham di'idza', nunu ángel, nunu ben' tula use'elê'.

Ni rguixogue'n ga hue dyin ley quie Moisés

²¹ ¿Ca biži inaro? ¿Inaro birutilla di'idza' ley na' cabê' naca di'idza' bega'nê Diuzi Abraham? ¿Bireya'ala' inaro cana'! Porque chi saque' gata' yela' neban quiero tuzioli tanun quie dan' hue quiero cabê' mandado rue bitezi ley, na'ra tanun quie lëley na' gata' yela' neban quiero tuzioli. ²² Pero yuguluro rue dula' xquia quiero ra'o mandado. Dyê'êdi rguixogue'n cana' lë'ê guichi la'iya quie Diuzi. Quie lena' nu ben' sudyi'ilê Cristo, con lêzin gata' cabê' di'idza' una Diuzi huenê' quiero.

²³ Tu bineguida Cristo lao yedyi layu, bē ley quie Moisés ra'o mandado. Guca quiero ca quie ben' rbeza yero lu'u dyguiba. Ulezaro guida Cristo uziñoñ'enē' ra'o ta sudyi'ilēro lēbē'.
²⁴ Naca ley quie Moisés ca quie nu maestro escuela, ben' napa xcuidi'. Cana' udapa ley ra'o tu bineguida Cristo lao yedyi layu ta sudyi'ilēro lēbē', na' yezi'ze Diuzi dula' xquia quiero, ilē'ēnē' ra'o ben' laxta'o yēri. ²⁵ Pero na'a babida Cristo, abdyin hora sudyi'ilēro lēbē'. Quie lena' bira rapa ley quie Moisés ra'o ca nu maestro escuela, bira huen ra'o mandado.

²⁶ Na'a banacale zi'i Diuzi tanun quie rzudyi'ilēle Cristo banuelenē' tuže. ²⁷ Yugulule banaole xneza Cristo bagozole nisa ta ulu'en banuele Cristo tuže. Quie lena' barlē'ē Diuzi le'e cabē' rlē'ēnē' Cristo. ²⁸ Nacaroz tuzi la'acazi ben' Israel, la'acazi ben' za' yedyi tula, la'acazi ben' naca ca preso, la'acazi ben' rda libre, la'acazi be'mbyu, la'acazi nigula. Chi banuero Cristo tuže, nacaro tu cue'ziro. ²⁹ Chi banuero Cristo tuže, banacaro dugalo zi'isuba Abraham. Hue Diuzi quiero yugulu cabē' di'idza' bega'nlē Diuzi Abraham dza na'te.

4

¹⁻² Cani naca tu di'idza' ca re'enda' inia' le'e: Inaro uzu tu ben' uña'a. Gutiguē' pca'nnē' ta de quienē', uzi' tu zi'inē' byu quienē' len. Pero como nenacatebi' xcuidi', biuzaque' gaca lao na'abi' len. Re'ennan gapa ben' tula len cuidado hasta idyin dza ca una xuzibi' gaquen quiebi'. Como binedyin hora gaque quiebi' ta de quie xuzibi', tu lēbizi nacan quiebi' ca quie ben' nada'o. Cabē' bigaquen quie ben' ruezzi dyin zan yu'u, cana' binaquen quiebi'. Pero cati idyin hora, na'ra gaquecazin quiebi'. ³ Lēscana' naca quiero. Tu binedyin Cristo nerue dula' xquia quiero ra'o mandado. ⁴ Pero cati bdyin hora, na'tera use'ela' Diuzi zi'inē'. Bi'a tu nigula lēbē', gologuē' naquē' ben' Israel, bē quienē' cabē' mandado rue lao ley pca'n Diuzi lao na'a Moisés. ⁵ Cana' bidē' ulionē' pca'nnē' ra'o libre. Bira hue ley pca'n Diuzi lao na'a Moisés ra'o mandado. Cala tanun quie ley na' ilē'ē Diuzi ra'o como ca zi'inē'.

⁶ Na'ra ta ulu'en tali nacaro zi'i Diuzi, use'ela' Diuzi Bichi Be quienē' lao na'a zi'inē' Jesucristo, uyu'unē' lu'u guicho laxta'oro. Quie lena' ru'en lato yēbiro Diuzi: "Xuzza' luē'." ⁷ Cana' naca quiero. Banacaro zi'i Diuzi, bira nacaro ca ben' nada'o, ben' binaca familia. Na' como nacan tali nacaro zi'i Diuzi, cana' gun Diuzi ra'o yela' neban quiero tuzioli tzazuro guibá.

Rdēbi Pablo ca raza quie ben' nao xneza Jesús

⁸ Pero dza na'te cati binehueb'le Diuzi, taže bedzagalaole lēle diuzi quiele dechan' cala diuzi. ⁹ Pero na'a banueb'le Diuzi (o mejorla inaro banueb'le Diuzi le'e), ¿bi'zi raza quiele yezulaole yenaole pensari bibizaca', pensari bihue dyin, na' yezi'le tazi' yuda' xcu'udzule tatula? ¹⁰ Neruele nenaole quie dza, quie biu', quie tiempo, quie iza, cabē' mandado rue lao ley pca'n Diuzi la'o na'a Moisés. ¹¹ Rdzeba' te cana'zi dyin bia' conlē le'e dza na' udixogui'a le'e xti'idza' Diuzi.

¹² Bicha', du guicho du la'adya' inia' le'e: Tzu'ule ca pensari quia', porque rdēbida' cabē' raza quiele. Na'ra dza na' bēlēle nē'ēdi' tadya'a. ¹³ Dyē'ēdi nezile cabē' guca quia' guca zhui'a cati uzulaohua' udixogui'a le'e xti'idza' Diuzi dza na'. ¹⁴ La'acazi guquele zēdi cati guca zhui'a, bipsanla'adyi'le nē'ēdi', bibēle yaladyi' conlē nē'ēdi'. Dechan' uzule gusto, blē'ēle nē'ēdi' dza na' ca quie tu ángel quie Diuzi, blē'ēle nē'ēdi' cabē' rlē'ēle Jesucristo. ¹⁵ ¿Bi'zi guca quiele, bira zulēle nē'ēdi' gusto? Nezdza' chan' uzaque' dza na', uliole yolaole bēnle quia' cuenda yelē'ēda' dyē'ēdi. ¹⁶ ¿Bi'zi guca quiele barlē'ēle nē'ēdi' ben' mala na'a, la'acazi di'idza' li rguixogui'a le'e?

¹⁷ Na' yaca ben' re'en hue quie cabē' mandado rue lao ley pca'n Diuzi lao na'a Moisés, lega re'enyaguē' huelēyaguē' le'e tuže, pero cala ta gacalēn le'e. Re'enjē' usanla'adyi'le nēto' cuenda gacalēle leyaquē' tuže. ¹⁸ Quele tamala na' huelē benē' le'e tuže, pero reya'ala' tzu'uyaguē' pensari dya'a ta gacalēyaguē' le'e. Pero reya'ala' gacalējē' le'e yugu dza, cala yaca dzazi cati zulia' le'e. ¹⁹ Zi'ina' dao' quia', tatula redzagalaohua' nun quiele ca redzagalao tu nigula re'en galo xcuidi' quie. Ni zua' rdēbida' quiele hasta yenaole xneza Cristo dyē'ēdi' tatula. ²⁰ Tahuen na' chan' zulia' le'e na'a cuenda hue'lia' le'e di'idza' dyē'ēdi, pero birzaque'da' bihua' quiele como zua' zitu'.

Pablo pxi'idze'nē' tu ejemplo quie tu nigula lao Agar len itu nigula lao Sara

²¹ Le'e ben' re'en hue quie cabē' mandado rue lao ley pca'n Diuzi lao na'a Moisés, ulena chi nezile dyē'ēdi' cabē' rguixogue'n lē'ē guichi ley na'. ²² ¿Bi'zi raza quiele bineyele cabē' nan? Pues rnēn quie Abraham unita' chopax xcuidi' byu quienē'. Tubi' nacabi' zi'i ben' nada'o laohuē' Agar. Itubi' nacabi' zi'i nigula quiecazinē' laohuē' Sara. ²³ Na'ra zi'i nigula nada'o, tu golozi'bi'. Pero zi'i nigula quiecazinē', golobi' ta uzu di'idza' ca di'idza' bega'nlē Diuzi Abraham dza na'te. ²⁴ Con cabē' guca quie chopax nigula, nacan tu ejemplo ta ineziro ca naca chopax cue' compromiso bega'nlē Diuzi yaca ben' Israel dza na'te. Ga zu lē'ē ya'a

laona Sinaí, lëgan' na' bëlë Diuzi ben' Israel tu cue' compromiso, pca'nnë' ley quienë' lao na'a Moisés. Na'ra ca naca quie Agar, ben' nada'o quie Abraham, cana' nacaré' que ben' rue quie cabë' mandado rue lao ley pca'n Diuzi lao na'a Moisés. Nacajë' ca quie ben' nada'o, naca ley ca quie xa'një', binacajë' libre. ²⁵ Pues na' como banaca quie Agar, cana' nacarën quie lë'ë ya'a Sinaí ta nega'nnan yu nebaba ben' Arabia. Lëscan' nacarën cana' quie ciudad Jerusalén ta zu yedyi layu nun quie dan' rue ley quie Moisés yaca ben' nita' ciudad Jerusalén mandado. Hasta yugulu ben' Israel ruen mandado quieyaquë'. Naca ley quie Moisés ca quie xa'nyaquë' nun quie dan' ruen quieyaquë' mandado. ²⁶ Pero ra'o nacaro ben' ciudad Jerusalén ta zu guibá. Cana' nacaro ben' libre bira ruen ley quie Moisés ra'o mandado. ²⁷ Lena' rguixogue'n lë'ë guichi la'iya quie Diuzi cani:

Reya'ala' yedaohuero ra'o ben' naca ben' ciudad Jerusalén ta zu guibá.

Bira naca ciudad quiero ca quie tu nigula huidyi', ben' biru'a xcuidi'.

Bira naca ciudad quiero ca quie tu nigula binuebë' yela' re rla cati ralo xcuidi'.

Porque huida ben' zë gula, ben' inita' ciudad Jerusalén ta zu guibá.

Pero bira inita' ben' zë ciudad Jerusalén ta zu yedyi layu.

Cana' rguixogue'n ra'o.

²⁸ Na'ra, bicha', re'enda' inia' le'e tu di'idza': Cabë' bega'nle' Diuzi Abraham di'idza' golo tu zi'inë' Isaac, cana' naca quiero. Yela' nao xneza Cristo quiero nacaro zi'isuba Abraham segün ca di'idza' bega'nle' Diuzi Abraham dza na'te. ²⁹ Pero cabë' guca dza na'te, psaca zi'i nigula nada'o quie Abraham zi'i nigula quiecazi Abraham bizinaquezi, cana' racaré' quiero na'a. Yaca ben' rue quie cabë' mandado rue lao ley quie Moisés, rusacajë' ra'o, ben' yu'u Bichi Be quie Diuzi lu'u guicho laxta'ohue, bizinaquezi. ³⁰ Pero ¿bizi rguixogue'n lë'ë guichi la'iya quie Diuzi? Pues rguixogue'n de que gudyi Diuzi Abraham ta usannë' quie nigula nada'o quienë' lë'në' zi'inë', como dan' bisaque' yega'n lao na'a zi'i nigula nada'o quienë' ta de quienë'. Nacacazin ta yega'nnan lao na'a zi'i nigula quiecazë'. ³¹ Cana' rguixogue'n ra'o, bicha'. Binacaro zi'i nigula nada'o quienë', dechan' nacaro zi'i nigula quiecazë'.

5

Bihuero lato initi libertad quiero

¹ Dydin bë Cristo nacaro libre, bira rue ley quie Moisés ra'o mandado. Na' gapale cuidado bihuele lato initi libertad quiele. Bira uda'le tazi' xcu'udzule tatula ta bisuele hua'ale.

² Ulezënaga dyë'ëdi ca rnía' në'ëdi', Pablo. Chi huele lato su tu xëdyidao' cuinle, chi por lena' huele pensari yezi' Diuzi le'e, na'ra cabë' bë Cristo para le'e, bibi zaca'n para le'e lao Diuzi. ³ Tatula xoxogui'a le'e: Nutezi ben' ru'e lato su tu xëdyidao' cuine, yela' na' huenë' pensari por lena' yezi' Diuzi lë'bë', na'ra nacan obligación quienë' huenë' yugulu ca mandado rue lao ley quie Moisés. ⁴ Chi huele pensari yezi' Diuzi le'e tanun quie dan' rue quiele cabë' mandado rue lao ley quie Moisés, quie lena' apanla'adyi'le Cristo, aoru'unle tzala'la yela' racalë Diuzi. ⁵ Pero binacan cana' quiero. Rbezaro yezi' Diuzi ra'o tanun quie dan' rzudyi'ilëro Cristo baoyu'u Bichi Be quie Diuzi lu'u guicho laxta'oro. ⁶ Chi banuero Cristo Jesús tuze, gabi huenan chi zuro, chi bizuro, tu xëdyidao' cuinro ca mandado rue lao ley. Tu ta reya'ala' huero, reya'ala' inaoro xneza Cristo edyë'ëro laguedyiro.

⁷ Le'e unita' dyë'ëdi dza na'. ¿Nuzi bë mandado apanla'adyi'le bira rue quiele xti'idza' Diuzi? ⁸ Binaca quie Diuzi cabë' ruele. Pues ulio Diuzi le'e ta gacale ben' quienë'. ⁹ Bigala'adyi'le ca naca quie cuba yëta xtila. Conlë ilë'ëti' levadura ila'adyin duzete cuba. ¹⁰ Nužela'adya' gacalë Cristo le'e ta huele pensari ca pensari quia'. Pero hue Diuzi castigo nu ben' rda rutëbi guicho laxta'ole. Nutezi ben' rue cana' huenë' lëjë' castigo.

¹¹ Nita' ben' na nere'enda' sua' tu xëdyidao' cuin yaca ben' nao xneza Jesús. Nayaquë' rguixogui'a chi bizu xëdyidao' cuin yaca ben' nao xneza Jesús, biyezi' Diuzi leyaquë'. Pero cala lena' rguixogui'a. Chi tali lena' rguixogui'a, birdza' yaca ben' Israel në'ëdi'. Chi tali lena' rguixogui'a, birdza'yaquë' cabë' rnía' quie Cristo rnía' gutinë' lë'ë yaga cruzo ta yezi' dula' xquia quiero. ¹² Pero quie nu ben' rda rutëbi guicho laxta'ole, ben' rëbi le'e biyezi' Diuzi le'e chi bizu tu xëdyidao' cuinle, na'ra mejorla tu chi'zi ichugule quiejë', bira huele lato huelëyaquë' le'e zëdi.

¹³ Pero le'e, bicha', ulio Diuzi le'e cuenda gacale libre inaole xneza Cristo. Quie lena' bireya'ala' huele ta rnazin quiele. Mejorla gacalële laguedyile edyë'ële laguedyile. ¹⁴ Porque chi edyë'ëro laguedyiro cabë' nedyë'ëro cuinro, con tuzi len barue quiero cabë' yugulu mandado rue lao ley quie Moisés. ¹⁵ Pero chi tilalëro gacazë'ro laguedyiro, reya'ala' gaparo cuidado, porque ruen zudyi udyiagu'ro laguedyiro, na' udyiagu'ro cuinro.

Bihuero ta rnazin quiero, huero ca mandado rue Bichi Be quie Diuzi ra'o

¹⁶ Cani rguixogui'a le'e: Ulehue quiele ca mandado rue Bichi Be quie Diuzi le'e. Chi huele cana', huabezan quiele dan' rnaban huele ta rnazin quiele. ¹⁷ Porque chi huele ta rnazin

quiele, lena' rdilalên Bichi Be quie Diuzi. Pero chi hue quiele ca mandado rue Bichi Be quie Diuzi, lena' gacalên le'e ta bihuele ta rnazin quiele. Cana' nacan porque rdilalê pensari quiele le'e, bire'ennan hue quiele cabê' mandado rue Bichi Be quie Diuzi. Quie lena' ruen zêdi quiele huele ca reya'ala' huele. ¹⁸ Chi rue quiele cabê' mandado rue Bichi Be quie Diuzi le'e, na'ra bira rue ley quie Moisés le'e mandado.

¹⁹ Dyê'êdi neziro ca rue ben' rue ta rnazin quie. Rdalëyaquê' nigula binaca quieyaquê', ruejê' bayatza, biredue'yaquê', ²⁰ rionla'adyi'yaquê' yo yaga, ruejê' yela' brujo, rguiloy-aquê' dila, racazê'yaquê' laguediyaquê', rdza'jê' benê' con ganzi, quiezijê' re'enjê' gaca huen, rguiloyaquê' rbêchiyaquê' tu cue' ben' quieyaquê'. ²¹ Nacajê' ben' zê', rutijê' benê', rdajê' hue'e, raojê' con ta rlê'ëyaquê', tazêla tamala naoyaquê' rueyaquê'. Tatula inia' le'e cabê' gudya' le'e dza na'te: Bieyezi' Diuzi nu ben' rue cana'.

²² Pero netza' ca rue ben' yu'u Bichi Be quie Diuzi. Nadyê'ëyaquê' laguediyaquê', sujê' gusto, rbe' chizi guicho laxta'ojê', nacajê' ben' zela'adyi', rapajê' laguediyijê' bala'ana, nacajê' ben' huen, ben' ruzu di'idza'. ²³ Biruejê' ze cuinjê', biruejê' ta rnazin quieyaquê'. Para ra'o, ben' yu'u Bichi Be quie Diuzi, birabi ley de ta ichugubê' cabê' ruero. ²⁴ Chi banuero Cristo tuze, na'ra apsanla'adyi'ro bira huero ta rnazin quiero. Ca naca quie ben' baguti, bira saque' huejê' ta rnazin quieyaquê', cana' naca quiero, bira saque' huero ta rnazin quiero. ²⁵ Pues ca naca quiero yu'uro Bichi Be quie Diuzi, cana' reya'ala' huero lato inabê'nê' ra'o ca huero.

²⁶ Quie lena' bireya'ala' huero cuinro ben' ze. Bireya'ala' utituro laguedyiro ta idza'yaquê' ra'o, nica yežê'ro laguedyiro.

6

Reya'ala' gacalêro laguedyiro

¹ Bicha', chi ga nezile ze tu ben' nao xneza Cristo, pero napê' xquia, le'e ben' rue quie dyê'êdi quie Bichi Be quie Diuzi, reya'ala' gacalêle lèbê' ta usannê' bira gapê' xquia. Hue'lêronê' di'idza' zela'adyi'. Gaparo cuidado cuinro, bihue'ro lato iquixiro ugaparo xquia cuinro. ² Lêscan' reya'ala' gacalêro laguedyiro ca tazêdi raca quieyaquê'. Chi huero cana', cana' hue quiero huero cabê' mandado bê' Cristo ra'o.

³ Chi huero cuinro ben' ze, chi bire'enro bigacalêro laguedyiro, cana' barzi'ro yê' cuinro. ⁴ Yuguluro reya'ala' huero pensari chi nacan huen, chi binacan huen cabê' ta ruero. Chi neziro tali nacan tahuen cabê' ta ruero, na' reya'ala' suro contento, bihue'ro lato utêbin ra'o ca ina yaca los demás benê'. ⁵ Yuguluro reya'ala' huero bala ca naca ta raca quiero.

⁶ Nu ben' ruzioñe'e ra'o xti'idza' Diuzi, reya'ala' gacalêrojê' con ta de quiero.

⁷ Bisi'le cuinle yê'. Nunu saque' utitu Diuzi. Naca quiero ca quie ben' raza bini. Ca ta gazaro layu, de yezi'ro cosecha quien. ⁸ Chi hue benê' ta rnazin quiejê', na'ra lena' udyiaguin' lèjê' lao Diuzi. Ruen zudyi biyezi' Diuzi lèjê', na' bigata' yela' neban quiejê' tuzioli. Pero chi hue nu benê' con cabê' rna Bichi Be quie Diuzi, chi hue quieyaquê' quienê', na'ra gata' yela' neban quieyaquê' tuzioli. ⁹ Cana' biyuhuêdiro huero tahuen, porque chi biyuhuêdiro huero tahuen, huela'iya Diuzi ra'o caora idyin hora. ¹⁰ Quie lena' reya'ala' gacalêro nutezi benê', reya'ala' huero tadya'a quieyaquê'. Lêscana' ta naca belao na' gacalêro ben' bichiro, ben' nao xneza Cristo.

Ga beyudyi di'idza' bzu Pablo lè'ê guichi

¹¹ Ulena'cara ca letra yela ruzua' lè'ê guichi ni conlê na'a cuina'. ¹² Biruejê' huen yaca ben' re'en uzu tu xêdyidao' cuinle cabê' mandado rue lao ley quie Moisés. Rdzebijê' idza' ja ben' Israel lèjê' chi quixogue'jê' tuzi sudyi'illêro Cristo, ben' guti lè'ê yaga cruzo, con lèzin yezi' Diuzi ra'o. ¹³ Pues nu yaca ben' babzu tu xêdyidao' cuine cabê' mandado rue lao ley quie Moisés, nica lèjê' birue quieyaquê' yugulu di'idza' cabê' mandado rue lao ley na'. Pero re'enjê' su tu xêdyidao' cuinle cuenda gacajê' ben' ze lao laguediyaquê', dan' bêjê' gan zule tu xêdyidao'. ¹⁴ Pero por tu parte quia' nê'êdi', birguiloga' bi hua' ta gaca ben' ze lao laguedya'. Tuzi ca re'enda', re'enda' gaca' ben' ze lao Jesucristo, ben' guti lè'ê yaga cruzo ta yezi dula' xquia quiero. Binacan belao chi ilê'ê yaca benê' nê'êdi' ben' ze. Lêscan' binacan belao chi ilê'êda' leyaquê' ben' ze. ¹⁵ Chi nacalêro Cristo tuze, bibi huanan chi zu, chi bizu tu xêdyidao' cuinro cabê' mandado rue lao ley quie Moisés. Pero ruanan zi usanro pensari gula quiero huero pensari cubi ta zaza'lê Cristo. ¹⁶ Rulidza' Diuzi cuêchinê' chizi guicho laxta'ole yeyêchi'la'adyi'nê' le'e, ben' nuelê' Cristo tuze, yu'ule pensari cubi ta zaza'lê Cristo. Rulidza' Diuzi por yugulu ben' nao xneza Cristo, ben' naca ben' quie Diuzi.

¹⁷ Na'ra bira re'enda' huelêle nê'êdi' zêdi ca naca di'idza' aodixogui'a le'e ni. Pues badiyacaza' zê xêdyi ga bën yaca benê' nê'êdi' zi', ben' rudie nê'êdi' tanun quie dan' naohua' xneza Cristo. Lêxêdyi na' rulu'en naca' ben' rue quie cabê' mandado hue Cristo nê'êdi'.

¹⁸ Bicha', rulidza' Señor quiero Jesucristo ta huela'iyane' le'e yugulule. Amén.

DI'IDZA' BZU SAN PABLO APÓSTOL LĚĚ GUICHI, USE'ELA'NĚ'N LAO CIUDAD EFESO

Use'ela' Pablo guichi ni lao yaca ben' nao xneza Jesús, yaca ben' nita' ciudad Efeso

¹ NĚ'ědi', Pablo, ědě' Diuzi nĚ'ědi' según ca re'ennĚ' huenĚ' use'ela'nĚ' nĚ'ědi' lao na'a ži'inĚ' Jesucristo. Bia' guichi ni use'ela'n lao le'e ben' nita' ciudad Efeso. Nacale ben' quie Diuzi. Nacale ben' nao xneza Cristo Jesús. ² Rulidza' Diuzi lĚnĚ' ži'inĚ' Jesucristo ta huela'iya Jesucristo le'e cuĚchijaquĚ' chizi lu'u guicho laxta'ole.

TazĚla babĚla'iya Diuzi ra'o ta biyeyudyi yedu quie

³ Reya'ala' huero Diuzi ben' že, ben' naca xuzi Señor quiero Jesucristo. Lao na'a Cristo tazĚla babĚla'iyane' ra'o ta biyeyudyi yedu quie cuando na' yedyinro guibá. ⁴ Tu binecua' yedyi layu ulio Diuzi ra'o lao na'a Cristo ta gacaro ben' quienĚ'. LĚscan' ulione' ra'o ta yeži dula' xquia quiero, na' yeyĚri guicho laxta'oro lao Diuzi. ⁵ Azio zĚ iza una Diuzi yezi'nĚ' ra'o iyacaro como ca ži'inĚ' nun quie nedyĚ'ěnĚ' ra'o lao na'a Jesucristo. Cana' bĚnĚ' de acuerdo con ca re'ennĚ' huenĚ' quiero. ⁶ Quie lena' huero Diuzi ben' že gaparone' bala'ana como dan' naquĚ' ben' že, ben' bala'ana quiero. Huero Diuzi ben' že como dan' žĚla bĚla'iyane' ra'o tanun quie nuelĚro ži'inĚ' tuže. Lega nedyĚ'ě Diuzi ži'inĚ'. ⁷ Tanto nedyĚ'ě Diuzi ra'o, apte pselanĚ' ra'o quie dula' xquia quiero tanun quie guti ži'inĚ' lĚ'ě yaga cruzo para ra'o, cana' uži'ženĚ' quiero. ⁸ Taže bablu'e Diuzi nedyĚ'ěnĚ' ra'o babžioĚ'ene' ra'o ca naca pensari quie. ⁹ Na'tera babžioĚ'ene' ra'o tu ta bineži benĚ' tiempote. BžioĚ'ene' ra'o ca unane' huenĚ' ise'elĚ' Cristo. ¹⁰ Según cabĚ' una Diuzi huenĚ' cati idyin hora tu dza zaza'ra, yetupane' yugulu ta dyia guibá, len yugulu ta de lao yedyi layu, ta uca'nnĚ'n lao ladyina'a Cristo.

¹¹ Tanun quie nuelĚro Cristo tuže, cana' ulio Diuzi ra'o dza na'te tacuenda gunnĚ' ra'o ca ta re'ennĚ' gunnĚ' ra'o. Cana' gaca quiero cabĚ' pensari bĚ Diuzi huenĚ' quiero dza na'te, porque puro ta nacarĚ tahuen hue Diuzi. ¹² Na'ra nĚto', ben' nĚro, ben' nao xneza Cristo, guca quando' cana' tacuenda huendo' Diuzi ben' že gapando'nĚ' bala'ana nun quie naquĚ' ben' huen gula. ¹³ Pero lĚscan' le'e, cati babele quie di'idza' li quie Diuzi, cati babele cabĚ' hue Diuzi re'ennĚ' gunnĚ' ra'o yela' neban tuzioli, na'tera barnaole le'e Cristo, anacalĚnenĚ' tuže. Por nun quie bayu'u guicho laxta'ole Bichi Be que Diuzi, lena' rulu'en banacale ben' quie Diuzi. Cana' bĚ Diuzi según ca unĚ' huenĚ' quie Bichi Be quienĚ' dza na'te. ¹⁴ Como dan' bayu'uro Bichi Be quie Diuzi, lena' barzela'adyi'ro gun Diuzi ra'o yugulu cabĚ' ta unĚ' gunnĚ' ra'o cati yedyinro guibá nacaro libre. Caora na' yĚbiro Diuzi: "Diuxcaleo' naco' ben' že quando'."

Rnaba Pablo lao Diuzi ta uzioĚ'ene' yaca ben' nao xneza Cristo

¹⁵⁻¹⁶ Quie lena' birusana' rulidza' Diuzi rĚpa'nĚ' diuxcaleo' nun quiele como dan' babeda' dyĚ'ědi' barnaole xneza xa'nro Jesús, dyĚ'ědi' idyĚ'ěle lagueidyile, ben' quie Diuzi. ¹⁷ Rulidza' Xuziro Diuzi, ben' de yela' huaca quie, ta gacalĚnĚ' le'e tžioĚ'ele dyĚ'ědi' ca naca pensari quienĚ', lĚscan' ta uzioĚ'ene' le'e cabĚ' bĚ Cristo, bidane' bĚnĚ' ca mandado bĚ Diuzi lĚbĚ' dza na'te. ¹⁸ LĚscan' rulidza' Diuzi ta useni'nĚ' guicho laxta'ole cuando inezile dyĚ'ědi' ca naca yela' rbeza quiero yeži' Diuzi ra'o yedyinro guibá, ra'o ben' ulio Diuzi dza na'te. LĚscan' rulidza' Diuzi ta tžioĚ'ele dyĚ'ědi' cabĚ' tadya'a gula gaca quiero yedyinro guibá gun Diuzi ra'o yela' neban quiero tuzioli, ra'o ben' quienĚ'. ¹⁹ LĚscan' rulidza' Diuzi ta tžioĚ'ele quie Diuzi de yela' rnabĚ'tzegue quienĚ', birdžioguenĚ' yela' rnabĚ' ta gacalĚnĚ' ra'o, ben' quienĚ'. Blu'e Diuzi de yela' rnabĚ'tzegue quienĚ' ²⁰ cati psebannĚ' Cristo beroguĚ' ga redyin ben' huati, bĚnĚ' mandado cue'nĚ' zaquĚ' yebĚ ga re'nĚ' guibá. ²¹ BĚ Diuzi nombrar Cristo ben' rnabĚ'ra lao yugulu ben' napa yela' rnabĚ', la'acazi ben' nita' lao yedyi layu, la'acazi ben' nita' guibá, la'acazi ben' nita' na'a, la'acazi ben' zaza'ra. ²² Pca'n Diuzi lao na'a Cristo yugulu ta de lao yedyi layu len yugulu ta de guibá. LĚscan' bĚnĚ' nombrar lĚbĚ' ben' rnabĚ'ra lao yugulu ben' nao xnezĚ'. ²³ Nacaro ra'o, ben' nao xneza Cristo, tu cue'ro ben' nuelĚ Cristo tuže. Con Cristo naya'aro tu cue'ro. Naca Cristo ben' rnabĚ' lao yugulutero.

2

Yela' nedyĚ'ě quie Diuzi yezi'nĚ' ra'o

¹ Dza na'te guca quiele ca quie ben' huati lao Diuzi. Dyin bĚ dula' xquia quiele, biyu'ule pensari bĚle ta rnazin quiele. ² Unaole bĚle ca rue yaca ben' nita' lao yedyi layu. BĚ quiele quie Satanás, ben' naca xan' bichi be mala, ben' ru'e fuerza yaca ben' birue quie ca na

Diuzi. ³ Cana' bëcazi ra'o yuguluro dza na'te caora biunaoro xneza Cristo. Bëro ta rnazin quiëro, na' bë quiëro quië pensari mala quiëro. Quië lena' de ga hue Diuzi ra'o castigo huala lëbi ca yaca los demás ben' nita' lao yedyi layu. ⁴ Pero taže beyëchi'la'adyi' Diuzi ra'o. Tanto nedyë'ënë' ra'o ⁵ bënë' tacuenda gata' yela' neban quiëro tuzioli caora cati psebannë' Cristo. Cana' bënë' quiëro dza na'te la'acazi nenacaro ca ben' huati, neyu'uro pensari mala unabhë' dula' xquia quiëro ra'o. Yela' ben' huen quië Diuzi bënë' ta gata' yela' neban quiëro tuzioli. ⁶ Cana' naca quiëro ca quië ben' apseban Diuzi cabë' psebannë' Cristo. Cana' naca quiëro yedyinro cue'lëro inabhë'lëro Cristo guibá. ⁷ Cana' bënë' quiëro cuenda ye inezi ben' zaza'ra dza zaza'ra cabë' taže nedyë'ënë' ra'o, taže gucalënë' ra'o babënë' tahuen quiëro, ben' nao xneza Cristo Jesús. ⁸ Como taže nedyë'ë Diuzi ra'o, cana' bënë' ta gata' yela' neban quiëro tuzioli. Cala por nun quië dan' bi huero cuinro, na' gun Diuzi ra'o yela' neban quiëro tuzioli, dechan' ta gunzi Diuzi ra'o ca regalo por nun quië zi'inë'. ⁹ Como binacan por nun quië dan' bi huero cuinro, na' gun Diuzi ra'o yela' neban quiëro tuzioli, quië lena' bide bi huero ta huero cuinro ben' ze lao Diuzi. ¹⁰ Cana' naca quiëro, como dan' ta bë Diuzi banaoro xneza Cristo Jesús banuelëro lëbë' tuže. Cana' bënë' quiëro cuenda huero tadya'a cabë' unanë' quiëro huero dza na'te.

Baore' chizi guicho laxta'oro por nun quië banaoro xneza Cristo

¹¹ Quië lena' reya'ala' yeza'la'adyi'le cabë' guca quiele dza na'. Cala ben' Israel le'e. Bizu tu xëdyidao' cuinle cabë' mandado rue lao ley quië ben' Israel. Quië lena' biblë'ë ben' Israel le'e dya'a, como dan' yugulu ben' Israel bazu xëdyidao' cuinyaquë'. Tanun quië lena' nayaquë' ben' quië Diuzi lëjël, na' le'e binuebë'le Diuzi nayaquë'. ¹² Dza na'te nita'le binuebë'le Cristo, biblë'le cuenda ben' Israel. Nica nezile ca naca di'idza' bega'n'lë Diuzi ben' Israel dza na'te. Nita'le lao yedyi layu binezile chi zu Diuzi, biulezale yeyole guibá. ¹³ Pero na'a, banuelële Cristo Jesús tuže. La'acazi nica nezile chi zu Diuzi dza na'te, na'tera banezile zu Diuzi, banuebë'le lëbë'. Cana' naca quiele como dan' bida Cristo lao yedyi layu, gutinë' lë'ë yaga cruzo. ¹⁴ Cuin Cristo naquë' ben' rbëchitza'o laxta'oro. Dyin quienë' abeyaca yugulu ben' nao xnezë' ca tu yedyizi. Banacaro ca tu yedyizi la'acazi ben' Israel, la'acazi ben' binaca ben' Israel. Lëbë' appquinoguë' yela' rudie laguedyi quiëro cabë' ruquino besu zu ruza'aga benë'. ¹⁵ Caora cati guti Cristo lë'ë yaga cruzo, cana' uleza ley quië Moisés, bira inabhë'n ra'o huero mandado quien. Cana' beyue Cristo chopa cue' benë' beyacaro tu cue'zi ben' cubi, ben' nuelë lëbë' tuže. Cana' bënë' quiëro caora ulëchitza'ohuë' quiëro. ¹⁶ Lëscan' caora guti Cristo lë'ë yaga cruzo, cana' uleza tazëdi raca entre lao rupa cue'ro. Cana' ulëchitza'ohuë' quiëro conlë Diuzi. Beyuenë' ra'o tužezi.

¹⁷ Bida Cristo lao yedyi layu, udixogue'në' benë' xti'idza' Diuzi gudyinë' leyaquë' ca re'en Diuzi cuëchitza'ohuë' guicho laxta'oro. Udixogue'në' le'e ben' binaca ben' Israel, ben' biunezi chi zu Diuzi. Lëscan' udixogue'në' nëto' ben' Israel, ben' nezi zu Diuzi. ¹⁸ Dyin bë Cristo racalë Bichi Be quië Diuzi ra'o ta huebë'ro Xuziuro Diuzi, la'acazi nacaro ben' Israel, la'acazi nacaro ben' za' yedyi tula. ¹⁹ Quië lena' bira nacale ca quië tu ben' za' yedyi zitu', ben' bdyin ga binaca yedyi quië, dechan' banadele cuenda lao Diuzi na'a lële yaca los demás ben' nao xneza Cristo. Banacale familia quië Diuzi. ²⁰ Naca quiëro ca quië tu yu'u besu de yo. Naca yaca ben' apóstol len yaca los demás ben' profeta ca quië ga rzulao besu. Le'e nacale ca quië yo rucua'jël besu. Naca cuin Jesucristo ca quië yo belao rbëchiyaquë' ga rzulao besu. ²¹ Lao yo belao, inaro Cristo, rucua' Diuzi yo quië besu dyë'ëdi. Rlisë' tu besu dya'a gula ta gaca idao' naca la'iyia como dan' idao' quië Cristo na'. ²² Cana' naca quiele, banuelële Cristo tuže. Quië lena' nacale ca quië tu idao' rnahë'ra quië Cristo. Lëscan' yugulu ra'o ben' nao xnezë', banuelëro Cristo tuže bayu'uro Bichi Be quië Diuzi, yela' na' nacaro ca quië tu idao' rnahë'ra ga zu Diuzi.

3

Bë Diuzi nombrar Pablo ta tzetixogue'në' ben' binaca ben' Israel xti'idzë'

¹ Quië lena' në'ëdi', Pablo, naca' preso dia' lu'u dyiguiba nun quië rdza' ja benë' rguixogui'a xti'idza' Cristo Jesús. Biraxejë' re'enda' gaca huen quiele le'e, ben' binaca ben' Israel. ² Nuzela'adya' banezile cabë' ta ulio Diuzi në'ëdi' ta quixogui'a le'e quië xti'idzë' como dan' re'ennë' yedyinle guibá. ³ Lëscan' babzioñe'e Diuzi në'ëdi' cabë' unanë' dza na'te huenë' quiele. Bibzioñe'enë' ben' tula. Na'tera bzioñe'enë' në'ëdi' quië pensari quië'. Lëpensari quië Diuzi bazbua' lë'ë guichi ni tu chopa. ⁴ Caora bablabale quië di'idza' bzua' lë'ë guichi ni, na'tera inezcazile de que nezda' cabë' una Cristo huenë' quiele dza na'te. ⁵ Bibzioñe'e Diuzi yaca ben' unita' tiempote cabë' unanë' huenë' quiele. Pero na'a sí, lao na'a Bichi Be quienë', babzioñe'e Diuzi yaca apóstol quienë' len yaca los demás ben' rguixogue' xti'idzë', yaca ben' naca la'iyia. ⁶ Cani naca ca una Diuzi dza na'te: Chi hue quiele le'e ben' binaca ben' Israel xti'idza' Diuzi, na'tera huela'iyia Diuzi le'e, gunnë' le'e

yela' neban tuzioli lëbizi ca huela'iyia Diuzi nêto' ben' Israel, gunnê' nêto' yela' neban tuzioli. Lëscan' quie lena', nacarêle ben' nuelê Cristo tuze cabê' nêto'. Gun Diuzi le'e baneza ta de guibá cabê' di'idza' bega'nê Diuzi nêto' ben' Israel dza na'te por nun quie Cristo Jesús.

⁷ La'acazi bibi zaca' ta hua' dyin quie Diuzi, bënë' nombrar nê'êdi' ta tza' tzetixogui'a yaca benê' xti'idzê' cabê' unanê' huenê' dza na'te ta gacalênê' ben' nita' lao yedyi layu. Yela' rnabê' quienê' bënë' nombrar nê'êdi'. ⁸ La'acazi ni lë'êti'zi bibi zaca' ta hua' dyin quie Diuzi cabê' zaca'ra los demás ben' rguixogue' xti'idzê', dechan' ulio Diuzi nê'êdi', bënë' cule, use'elê' nê'êdi' tzetixogui'a ben' binaca ben' Israel ca naca quie Cristo, naquê' ben' ze, biyeyudyi yedu tahuen huenê' quiero. ⁹ Na' bē Diuzi nê'êdi' mandado yexi'idze'na' yugulu benê' ca naca quie pensari quienê' cabê' unanê' huenê' tiempo gula ta gacalênê' ben' binaca ben' Israel. Desde dza na'te nunu ben' gula nezi ca naca quie pensari quiê' ca huenê' quie ben' binaca ben' Israel. Cana' naca pensari quie Diuzi, naquê' ben' raca rue yugulute. ¹⁰ Cana' bē Diuzi bënë' iyaca tuzezi ben' rue quie quienê', ben' Israel len ben' binaca ben' Israel, cuenda ilê'ê yaca ben' rnabê' zu guibá naca Diuzi ben' nayôñe'e yugulute. ¹¹ Cana' bē Diuzi, bënë' según ca unanê' huenê' quiero desde tiempo dza na'te. Nun quie lena' use'elê' z'i'inê' Jesucristo, ben' naca xa'nro. Conlê lëbê' uya'lao bêyaquê' ca re'en Diuzi gaca. ¹² Tanun quie nuelêro Cristo tuze, cana' de lato hue'lêro Diuzi di'idza' cabê' ru'elêro xuzi zna'ro di'idza'. Biidzebiro bigaquero huadza' Diuzi ra'o. Cana' naca quiero dan' barue quiero quie z'i'inê'. ¹³ Bidêbile ta raca quia' niga. Uzule pensari dyê'êdi, como dan' por nun quie ta gaca huen quiele dia' ni redzagalaohua'.

Taze nedyê'ê Cristo ra'o

¹⁴ Tanto bē Diuzi tadya'a quiero, redaohueda' rguitzu ziba' laohuê' naquê' Xuzi Señor quiero Jesucristo. ¹⁵ Lëscan' naquê' Diuzi Xuzi yuguluro, la'acazi bazuro guibá, la'acazi nenita'ro lao yedyi layu. ¹⁶ Rulidza' Diuzi udze'nê' fuerza valor lu'u guicho laxta'ole gacalê Bichi Be quienê' le'e. Birdziogue Diuzi fuerza valor quienê' gacalênê' le'e. ¹⁷⁻¹⁸ Cana' rulidza' Diuzi cuenda bayu'tule pensari quie Cristo lu'u guicho laxta'ole, na' inabê'n le'e dyê'êdi. Lëscan' rulidza' Diuzi ta gacalênê' le'e ta inezile taze nedyê'ê Cristo le'e. Cana' reya'ala' inezile cuenda tziône'ele le'e, len yaca los demás ben' nao xneza Cristo, de que biyeyudyi yedu quie yela' nedyê'ê quie Cristo para ra'o. ¹⁹ Rulidza' Diuzi tacuenda gacalênê' le'e tziône'ele ca naca quie yela' nedyê'ê quie Cristo para ra'o, la'acazi bisaquê' tziône'elen delu derê'. Cana' rulidza' Diuzi cuenda hue'le lato inabê' Diuzi le'e con ga zuzêle du dza du yela.

²⁰ Na'ra reya'ala' ulidzaro Diuzi dan' naquê' ben' ze. De yela' rnabê' quienê' ta huenê' yugulute. Tazera de hue Diuzi quiero cabê' ta inabaronê' huenê'. Tazera de hue Diuzi quiero cabê' ta racaro pensari huenê'. Conlê ra'o ruelê Diuzi yela' huaca quienê'. ²¹ Naca Diuzi ben' ze. Reya'ala' ulidza yugulu ben' nao xnezê' lëbê'. Reya'ala' ulidza yugulu ben' rue quie z'i'inê' Cristo Jesús lëbê'. Cana' reya'ala' gaca quienê' tuzioli. Amén.

4

Dyin quie Bichi Be quie Diuzi nacaro tuze

¹ Quie lena' du guicho du la'adya' inia' le'e reya'ala' tale dyê'êdi como dan' ulio Diuzi le'e gacale ben' quienê'. Cana' nia' nê'êdi' dia' lu'u dyiguiba naca' preso nun quie dan' rdza' yaca benê' nê'êdi' rguixogui'a xti'idza' Diuzi. ² Bihuele cuinle ben' ze, huele gaxo conlê laguedyile. Gacale ben' zela'adyi', yeyêchi'la'adyi'le laguedyile, idyê'êle laguedyile. ³ Huele lato gacalê Bichi Be quie Diuzi le'e ta huele tuze conlê laguedyile, cana' cue' chizi guicho laxta'ole. ⁴ Naca yugulu ra'o, ben' nao xneza Cristo, tu cue'zi ben' nuelê lëbê' tuze. Tuzi Bichi Be quie Diuzi yu'uro yuguluro. Lëscan' como ulio Diuzi ra'o, tuzi naca yela' rbeza quiero rbezaro yedyinro guibá. ⁵ Cani naca quiero: Tuzi Cristo zu neziro naca xa'nro, tuzi xti'idza' Diuzi de neziro nacan ta hue quiero, tuzi bautismo de neziro nacan ta gacaro. ⁶ Tuzi Diuzi zu naquê' Xuziro yuguluro. Lëbê' rnabê'nê' lao yuguluro, lëbê' rudê'nê' ra'o bi dyin quienê' huero yuguluro, lëbê' runnê' fuerza valor de quiero yuguluro.

⁷ Pero quie quiero nudê' Cristo ra'o gunnê' fuerza valor bi dyin quienê' huero. ⁸ Lena' rguixogue'n lë'ê guichi la'iyia quie Diuzi cani: Caora beyêpi Cristo ladza zeyonê' bedyinnê' guibá tatula, caora na' blu'en quienê' bënë' gan lao yaca ben' bdie lëbê'.

Caora na' bêla'iyia Cristo ra'o, bënë' ta naca dya'a quiero.

⁹ ¿Pero bi'zi ca inaro quie di'idza' gan' rnên cani: "Beyêpinê' zeyonê' bedyinnê' guibá tatula"? Lena' inaro tanêro uyêzinê' bdyinnê' uzunê' lao yedyi layu. ¹⁰ Na'ra lëcazê' beyêpinê' zeyonê' bedyinnê' guibá tatula ta inabê'nê' lao yugulu ta naguixu Diuzi. ¹¹ Na'tera bënë' laze nudê'nê' ra'o bi dyin quienê' huero. Nudê'nê' nu ben' gaca apóstol. Nudê'nê' nu ben' quixogue' ca naca quie di'idza' gudyi Diuzi lëjê'. Nudê'nê' ben' rguixogue' xti'idza' Diuzi

cabè' ta pca'n Diuzi quiero ta gata' yela' neban quiero tuzioli. Nudè'nè' ben' rudze' xnezi quie ben' nao xneza Cristo, ben' rusèdi yaca. ¹² Cana' runnè' ra'o fuerza valor huero bi dyin quienè' re'ennè' huero cuenda gacalèro laguedyiro uzioñe'erojè' ca naca quie di'idza' la'ya quienè' ta inaorayaquè' xneza Cristo mazara. ¹³ Cana' ruenè' quiero hasta idyin dza banacaro tuzi ca hue quiero xti'idzè', banacaro tuzi ca nuebè'ro lèbè' raquè' zì'i Diuzi. Cana' gacaro ben' nao du guicho du la'adyi' xneza Cristo, tzu'uro puro pensari dya'a ca pensari yu'u Cristo. ¹⁴ Bira naca pensari quiero cabè' naca pensari quie xcuidi'. Bira yetza'ro pensari quiero tu dza tu dza inaoro neza tula. Binacaro ca la'aga' bidyi ta nu'a be rguinun lao nisa. Bira hue'ro lato si' benè' ra'o yè', ben' re'en uquixi quiero, ben' re'en udze' ra'o neza tula, neza binaca quie Diuzi. La'acazi inayaquè' nacayaquè' ben' rioñe'e, bigalele quiejè'. ¹⁵ Mejorla hue quiero xti'idza' Diuzi edyè'èro benè'. Cana' reya'ala' huero inaoro xneza Cristo, huelèronè' tuze, naquè' xa'nro ra'o, ben' nao xnezè'. ¹⁶ Ta bè Cristo nita'lèro laguedyiro dyè'èdi gacalèro laguedyiro cuenda yuguluro hue quiero xneza Cristo mazara, edyè'èro laguedyiro mazara.

Becubi Cristo pensari quiero

¹⁷ Cani nacan cabè' udxogui'a le'e tanun quie Cristo: Bira tale le'e ca rda ben' binuebè' Diuzi, como dan' naojè' yu'ujè' pensari tondo, pensari bibi zaca' ca naca pensari quie ben' rda ¹⁸ lao lato lao chula naca pensari quieyaquè'. Nica neziziyaquè' chi hue' Diuzi leyaquè' yela' neban tuzioli, como dan' yela' yeladyi' quiejè' nacajè' ben' laxta'o zidi. ¹⁹ Bira redue'yaquè' bi tamala rueyaquè'. Banue quieyaquè' rueyaquè' tamala. Redaohueyaquè' rueyaquè' con ta rnan quieyaquè'. ²⁰ Pero le'e, dyè'èdi nezile, cala xneza Cristo naole chi ruele cana'. ²¹ Chi tali banezile cabè' una Cristo, chi tali banezile nacan tali cabè' unè', ²² quie lena' ruen zi usanla'adyi'le pensari gula quiele. Bira huele ta rnazin quiele, como dan' nacan tamedian gula, baozi'n le'e yè'. ²³ Reya'ala' hue'le lato yecubi Diuzi pensari quiele. ²⁴ Reya'ala' hue quiele quie pensari ta becubi Diuzi quiele, porque lèpensari na' banacan tuze len pensari quienè'. Chi inaoro lèpensari cubi na', cana' du la'adyi'ro talèro laguedyiro dyè'èdi, huero puro tahuen.

²⁵ Quie lena' bira si'le laguedyile yè'. Puro di'idza' li hue'lèle laguedyile, como dan' yuguluro nacaro tu cue' ben' nao xneza Cristo.

²⁶ Chi idza'le laguedyile, gapale cuidado ta bihuen xquia quiele. Chi rdza'le laguedyile, tu binegala dza reya'ala' layeyue'zetele laguedyile. ²⁷ Bihue'le lato huelè taxi'ibi' le'e huele tamala.

²⁸ Chi zu nule rbanle, reya'ala' usanle bira cuanle. Reya'ala' tzu'ule pensari huele dyin dya'a du guicho du la'adyi'le conlè ni'a na'ale ta gata' quiele, na' gacalèle ben' bide quie.

²⁹ Biinèle di'idza' mala bizinaque ulidzale benè'. Mejorla inèle di'idza' dya'a ineyuele leyaquè' hueyaquè' tadya'a huela'ya Diuzi lèjè'. ³⁰ Bihuele tamala cuenda na' gaquyèchi' Bichi Be quie Diuzi yu'ule. Bihuele cana' como dan' dyin quienè' banadele cuenda lao na'a Diuzi yezi'nè' le'e yeyole guibá.

³¹ Usanla'adyi'le, bira inaya'le laguedyile, bira udiele laguedyile, bira idza'le laguedyile, bira utasi uirole laguedyile. Ni tu ta naca mala bira huelèle laguedyile. ³² Mejorla tzu'ulèle laguedyile dyè'èdi, yeyèchi'la'adyi'le laguedyile, si'zele quie laguedyile cabè' baozi'e Diuzi quiele nun quie dan' nuelè tuze len Cristo.

5

Ni rnan cabè' reya'ala' taro dan' nacaro ben' quie Diuzi

¹ Nun quie nedyè'è Diuzi le'e nacale zì'inè', cana' reya'ala' huele tuze huele ca rue Diuzi. ² Quie lena' reya'ala' edyè'èle laguedyile como ca nedyè'è Cristo ra'o. Tanto nedyè'ènè' ra'o pseyinnè' cuinnè' gutiè' lè'è yaga cruzo ta yezi dula' xquia quiero. Ca beco' zì'ila' ruti ja benè' ta yezi dula' xquia quie lao Diuzi, cana' bè Cristo gutiè' lè'è yaga cruzo, ta yezi dula' xquia quiero. Ca yo zixi ulè'èro yaxero taže gula, cana' yaxè Diuzi cabè' bè zì'inè' nedyè'ènè' ra'o.

³ Nun quie banacale ben' quie Diuzi, ni tu lasa, ni ledao'zi, bireya'ala' talèle nutezi nigula, bireya'ala' huele biti'tezi ta naca tabayatza, bireya'ala' sa'la'adyi'le dumi. ⁴ Bireya'ala' hue'lèle benè' di'idza' lè'è, ni di'idza' tonto, ni di'idza' bayatza, porque lèdi'idza' na', bibi zaca'n para le'e. Mejorla ulidzale Diuzi huelenè' ben' ze. ⁵ Dyè'èdi nezile chi nu ben' nue costumbre rdalènè' nutezi nigula, chi ruenè' biti'tezi ta naca tabayatza, chi rza'la'adyi'nè' dumi, (tuzcazi nacan sa'la'adyi'ro dumi, len ta tzionla'adyi'ro ta naca yo o ta naca yaga), biyezi' Diuzi lèbè' ta yedyinnè' guibá ga rnabè' Cristo len Diuzi. ⁶ Bihue'le lato si' benè' le'e yè' hue'lèyaquè' le'e di'idza' tondo inayaquè' le'e binacan mala huele can', porque hue Diuzi castigo huala nu ben' rue cana'. ⁷ Na'ra bihuelèle leyaquè' tuze, ni ledao'zi.

⁸ Le'e udale lao lato lao chula dza na'te. Pero na'ra nun quie dan' nuelële Cristo tuže, cana' banayeni' laxta'ole. Quie lena' reya'ala' tale ca ben' nao xneza Cristo, ben' banayeni' laxta'ohue. ⁹ Nun quie nacale ben' nao xneza Cristo, ben' banayeni' laxta'ohue, lena' reya'ala' huele puro ta naca dya'a, puro ta naca tali, puro ta yu'u ni'a xnezi lao Diuzi. ¹⁰ Udze'le xneze ta huele pensari lëbi ca pensari quie Cristo tacuenda huele ca raxenë'. ¹¹ Bihuele ca rue ben' rda lao lato lao chula. Ruejé' ta bibizaca' lao Diuzi. Mejorla uzioñe'ele leyaquë' cuenda tzeni' guicho laxta'oyaquë' bira inaoyaquë' tamala. ¹² Redue'ro huero di'idza' cabë' ruejé' nagachizi. ¹³ Pero caora uzioñe'erojé' ca naca tamala ruejé', caora na' inezijé' lega de dula' xquia quiejé', yela' na' bë' tzu'u beni' quie Diuzi guicho laxta'ojé', caora na' yenaøjé' xneza Cristo. ¹⁴ Quie lena' rguixogue'n lë'ë guichi la'iya quie Diuzi cani: Uletëlebë le'e nita'le naca quiele ca quie ben' nita' rasi, ben' biyu'u pensari. Ulesuli le'e nita'le naca quiele ca quie ben' huati, ben' biyu'u gracia. Ulesu listo, porque bazu Cristo useni'në' guicho laxta'ole. Cana' rguixogue'n lë'ë guichi la'iya.

¹⁵ Quie lena' reya'ala' gapale cuidado ca tale huele lao yaca benë'. Bitale huele ca ben' tondozi, pero ulehue ca ben' rioñe'e. ¹⁶ Biunitile tiempo quiele. Gacale listo huele tahuen, porque yugu dza de tamala. ¹⁷ Bihuetondole. Udze'le xneze ta inezile ca re'en Cristo huele. ¹⁸ Bihuele hue'e como dan' lena' udyiagui'n pensari quiele. Mejorla hue quiele cabë' mandado rue Bichi Be quie Diuzi le'e. ¹⁹ Hue'lële lagueyile di'idza' con cabë' rnan lë'ë guichi Salmos ga yu'u di'idza' la'iya quie Diuzi. Lëscan' reya'ala' gulale himnos len cantos ta naca quie Diuzi. Cana' reya'ala' huele, huele Cristo ben' ze du guicho du la'adyi'le. ²⁰ Reya'ala' ulidzale Xuziro Diuzi yëbilenë' xcalelo' por nun quie dan' racalënë' le'e runnë' ta rdzioguele. Cana' huele uzetole lao xa'n'ro Jesucristo.

Ni rguixogue'n cabë' re'en Diuzi huelëro familia quiero

²¹ Huelële lagueyile ben' nao xneza Cristo tuže, porque nacale ben' rapa Cristo bala'ana. ²² Quie ja nigula bazulë be'mbyu, reya'ala' uzujé' di'idza' bi mandado rue be'mbyu quiejé' lëjé' como ca quie mandado rue Cristo. ²³ Cana' reya'ala' hue yaca nigula como dan' rnabë' be'mbyu ina' uhuianë' nigula quie' cabë' rnabë' Cristo ina' uhuianë' yaca ben' nao xnezë'. Naca Cristo ben' bapte psela ra'o, gutinë' lë'ë yaga cruzo ta yezi dula' xquia quiero ra'o, ben' nao xnezë'. ²⁴ Como ra'o, ben' nao xneza Cristo, reya'ala' uzuro di'idza' ca mandado rue Cristo ra'o, lëscana' quie nigula bazulë be'mbyu, reya'ala' uzuë' di'idza' ca mandado rue be'mbyu quie' lëbë'.

²⁵ Na'ra quie ja be'mbyu bazulë nigula, reya'ala' edyë'ëjé' nigula quiejé' cabë' nedyë'ë Cristo ra'o, gutinë' lë'ë yaga cruzo ta yezi dula' xquia quiero. ²⁶ Cana' bë Cristo quiero cuenda gacaro ben' naca la'iya. Conlë nisa len xti'idzë' udibinë' guicho laxta'oro, udubë' dula' xquia quiero. ²⁷ Cana' bë Cristo quiero cuenda idyinro ra'o, ben' nao xnezë', laohue' nacaro ben' babeyëri guicho laxta'ohue dyë'ëdi. Ta bë Cristo bëjé' quiero binaparo dula' xquia, bibi tamala de quiero, nacaro ben' naca la'iya, ben' babeyažo duže dula' xquia quie. ²⁸ Quie lena' reya'ala' edyë'ële gapale cuidado nigula quiele cabë' nedyë'ële gapale cuidado cuinle. Chi edyë'ële gapale cuidado nigula quiele, lena' huanita'le dyë'ëdi, gacalële cuinle. ²⁹ Cabë' nedyë'ëro cuinro naparo cuidado cuerpo quiero, cana' nedyë'ë Cristo ra'o napë' ra'o cuidado. ³⁰ Cana' rue Cristo quiero como dan' nacaro ben' quienë', nuelëro lëbë' tuže conlë yaca los demás ben' nao xnezë'. ³¹ Lëscan' naca be'mbyu lënë' nigula quienë' tuzi. Cana' rguixogue'n lë'ë guichi la'iya quie Diuzi cani: "Reya'ala' usan be'mbyu xuzi znë'ë gacalënë' nigula quie' tuzi. Cana' banaca quiejé' ca quie tuzi bdyigo.'" Cana' nan lë'ë guichi la'iya. ³² Nezda' nacan zëdi ta tzioñe'ero cabë' nacan, pero cabë' rnia' niga, nacan tu ejemplo cabë' naca quiero lëro Cristo. Nacalëronë' tuzi. ³³ Quie lena' inia' le'e tatula de quie reya'ala' edyë'ële gapale cuidado nigula quiele cabë' nedyë'ële gapale cuidado cuinle. Lëscan' quie yaca nigula, reya'ala' gapajé' bala'ana be'mbyu quieyaquë'.

6

¹ Ni re'enda' inia' le'e tu di'idza' quie yaca xcuidi' cabë' reya'ala' hueyacabi'. Reya'ala' galeyacabi' quie xuzi zna'yacabi' como dan' cana' re'en Diuzi hueyacabi'. ² Ca naca mandamiento udixu Diuzi dza na'te rguixogue'n cabë' reya'ala' huero quie xuzi zna'ro, lëscan' rguixogue'n ca naca di'idza' bega'nle Diuzi ra'o chi hue quiero di'idza' unanë'. Quie lena' nan lë'ë guichi la'iya caniga: "Reya'ala' gapale bala'ana xuzi zna'le. ³ Chi gapale bala'ana xuzi zna'le, na'ra gaca huen quiele sule zidza lao yedyi layu." Cana' nan lë'ë guichi la'iya quie Diuzi.

⁴ Lëscan' rnia' le'e, ben' naca xuzi xcuidi', bihuele costumbre utza'le zi'ile. Mejorla usegulale zi'ile dyë'ëdi, tilaleyacabi' caora hueyacabi' tamala cuenda gacayacabi' ben' de pensari. Reya'ala' uzioñe'leyacabi' cuenda inaoyacabi' xneza Cristo.

⁵ Lëscan' rnia' le'e, ben' nada'o reya'ala' uzule di'idza' ca mandado hue xa'nle le'e dza rdale lao yedyi layu. Reya'ala' gapale xa'nle bala'ana, reya'ala' uzule di'idza' cabè' rnanè' du guicho du la'adyi'le ca quie ben' ruzu di'idza' cabè' rna Cristo.

⁶ Cana' reya'ala' huele la'acazi zu xa'nle rna'nè' le'e, la'acazi bizunè' ina'nè' le'e. Huele mandado cabè' rue xa'nle le'e, no solamente dan' re'enle yega'nle huen laohuè', pero lëscan' dan' nacale ben' quie Cristo, ben' rue quie ca re'en Diuzi du guicho du la'adyi'.

⁷ Cana' du la'adyi'le huele dyin quie xa'nle. Bihuele pensari chi dyin quie benè'zi huele, dechan' dyin quie Diuzi. ⁸ Pues dyè'èdi nezile ga'acatezi tu tadya'a huero, huaguizu Diuzi ra'o, la'acazi nacaro ben' nada'o, la'acazi benacaro ben' nada'o.

⁹ Lëscan' rnia' le'e, ben' naca xan' ben' nada'o, huele tahuen conlè yaca ben' nada'o quiele. Bitila inè'lèle leyaquè'. Bigala'adyi'le tuzi Diuzi zu guibá inabè'nè' le'e cabè' inabè'le leyaquè'. Tucazi nacan ca rnanè' Diuzi ra'o.

Reya'ala' uzalalo guicho laxta'oro

¹⁰ Na'ra, bicha', inia' le'e uzalale guicho laxta'ole nun quie nuele Cristo tuze. Huele tzutzu guicho laxta'ole nun quie naca Cristo ben' de yela' huaca quie. ¹¹ Ulehue ca re'en Diuzi huero ta ucuasa ucui'oro cuinro uzalalo guicho laxta'oro cuenda bihue xan' taxi'ibi' ra'o gan. ¹² Cana' huele nun quie cala laguedyi benè' rdilalèro, dechan' rdilalèro ben' naca xan' taxi'ibi', rdilalèro ben' rue taxi'ibi' mandado, rdilalèro ben' rnanè' lao lato lao chula. ¹³ Quie lena' ulehue dyè'èdi ca re'en Diuzi huele cuenda huele tzutzu guicho laxta'ole biusanla'adyi'le xneza Cristo caora cati ruelè xan' taxi'ibi' le'e bizinaquezi. Cana' reya'ala' huele cuenda bidzebile hue quiele xti'idza' Diuzi du guicho du la'adyi'le biyeyatile. ¹⁴ Chi huele cana', chi huele tali cabè' una Diuzi, lena' gacalèn le'e ca racalè cincho ruquio lè'èle le'e. Chi huele ta yu'u ni'a xnezi quie Diuzi, lena' ucuasa ucui'on le'e cabè' rucuasa rucui'o guiba lata naco soldado ta biichugo espada lèbè'. ¹⁵ Sule listo tziole tzetixogue'le benè' xti'idza' Diuzi cabè' rue soldado ruejè' listo racojè' zabayaquè' ruliojè' zapato. Naca xti'idza' Diuzi ta rbèchin chizi laxta'oro. ¹⁶ Pero ta naca belao ta huele, reya'ala' sudyi'ilèle Cristo dyè'èdi cuenda bihue xan' taxi'ibi' gan huelèn le'e bizinaquezi. Chi sudyi'ilèle Cristo, lena' huen defender le'e ca rue defender guiba lata zè soldado ta biquido flecha zu gui lèbè'. ¹⁷ Como bapte psela Diuzi le'e, reya'ala' sule puesto ca quie soldado, ben' nuzu casco guichogue ta bibi gaca quie guichonè'. Lëscan' como naca xti'idza' Diuzi ca quie tu espada ta ben Bichi Be quie Diuzi le'e, reya'ala' guxule len sule listo ca quie soldado, ben' nuxu espada. ¹⁸ Reya'ala' uzule di'idza' hue quiele cabè' rnia' le'e. Biusanle ulidzale Diuzi. Biusanle inabalenè' gacalènè' le'e. Hue'le lato gacalè Bichi Be quie Diuzi le'e hue'lèle Diuzi di'idza'. Huele listo, biyehuèdile. Ulidzale Diuzi ta gacalènè' yugulu ben' nao xneza Jesús. ¹⁹ Lëscan' ulidzale Diuzi inabalenè' gacalènè' nè'èdi' gunnè' nè'èdi' bi di'idza' hue'lia' benè'. Cana' re'ennan cuenda iyažuga' yuxi'idze'na'yaquè' cuenda tzioñe'eyaquè' hue quieyaquè' di'idza' la'iya quie Diuzi. Re'en Diuzi quixogui'ayaquè' ca unanè' huenè' dza na'te use'elè' Cristo ta gata' yela' neban tuzioli para yaca ben' nita' lao yedyi layu, pero cala quie tuzi ben' Israel, lëscan' quie yaca ben' yedyi tula. ²⁰ Aose'ela' Diuzi nè'èdi' ta quixogui'a benè' xti'idza'nè', na' dia' lu'u dyiguiba niga tanun quie bire'en yaca benè' quixogui'a xti'idza'nè'. Ulidzale Diuzi gunnè' fuerza valor quia' quixogui'a benè' xti'idza' Diuzi ca reya'ala' hua'.

Rgapa Pablo ben' ciudad Efeso diuzi

²¹ Huedetixogue' Tíquico le'e ta inezile ca raca quia' niga. Dyè'èdi nezile naca Tíquico ben' bichiro, ben' nao xneza Cristo. Du guicho du la'adyi'nè' racalènè' nètò' ruendo' dyin quie Diuzi. ²² Quie lena' use'ela' lèbè' detixogue'nè' le'e ca raca quiendo' niga cuenda bigaqueyèchi' guicho laxta'ole.

²³ Rulidza' Xuziro Diuzi lènè' zi'inè' Jesucristo ta cuèchyaquè' chizi guicho laxta'ole le'e, ben' rue quie xti'idza' Diuzi. Rulidza'yaquè' ta gacalèyaquè' le'e idyè'lèle laguedyile sudyi'ilèle Cristo. ²⁴ Rulidza' Diuzi ta huela'iyane' yugulu le'e ben' nedyè'e Señor quiero Jesucristo tuzioli. Amén.

DI'IDZA' BZU SAN PABLO APÓSTOL LĚĚ GUICHI, USE'ELA'NĚ'N LAO CIUDAD FILIPOS

Rugapa Pablo diuzi yaca ben' nao xneza Jesús, yaca ben' nita' ciudad Filipos

¹ NĚ'ědi' len Timoteo, nacando' ben' rue dyin quie Jesucristo. Use'ela'ndo' guichi ni lao yugu le'e ben' nao xneza Jesús, ben' nita' ciudad Filipos. LĚscan' use'ela'ndo'n lao yaca ben' napa dyin quie Diuzi, ben' rudze' xnezi quiele, len yaca los demás ben' racalĚ le'e ciudad Filipos. Nacale ben' quie Diuzi, nacale ben' nuelĚ Cristo Jesús tuĚe. ² Rulidzando' Xuziro Diuzi len Señor quiero Jesucristo ta gacalĚjĚ' le'e huejĚ' cue' chizi laxta'ole.

Rulidza Pablo Diuzi ta gacalĚ Diuzi yaca ben' nao xneza Jesús

³ RĚpicaza' Diuzi "diuxcaleo" bĚ' reza'la'adya' le'e cabĚ' ruele. ⁴ BĚ' rulidza' Diuzi redaohueda' rnaba' gaca tadya'a quie yugulule. ⁵ Pues desde dza uzulaole inaole xneza Cristo, banuelĚ nĚto' tuĚe rguixogue'le benĚ' di'idza' la'iya quie Diuzi. ⁶ Uzulao Diuzi ruenĚ' dyin dya'a quienĚ' lu'u guicho laxta'ole. BarĚla'adya' biansan Diuzi ruenĚ' dyin dya'a quienĚ' conlĚ le'e hasta dza yedyin Jesucristo. ⁷ Napa' rson inia' quiele cana', porque nedyĚ'ěda' le'e. AbĚle nĚ'ědi' tuĚe con cabĚ' tadya'a bĚ Diuzi para ra'o. AbĚle nĚ'ědi' tuĚe la'acazi dia' lu'u dyiguiba, la'acazi zua' lao yaca ben' rnabĚ' rua' defender xti'idza' Diuzi rguixogui'ayaquĚ' quie ta naca tali. ⁸ Nezi Diuzi lega re'enda' guida' ideyuba' le'e nun quie dan' nedyĚ'ěda' le'e cabĚ' nedyĚ'Ě Cristo le'e. ⁹ Rulidza' Diuzi ta gacalĚnĚ' le'e ta idyĚ'Ěrale itu itule, na' inezile mazara quie Diuzi ta huele pensari dya'a, ¹⁰ na' si'le tahuen, hue quiele quie Diuzi. Cana' sĬ, yeyĚri laxta'ole lao Diuzi, gabi dula' de quiele cati idyin dza yeguida Jesucristo. ¹¹ Cana' hue Jesucristo para le'e tacuenda huele puro tadya'a, yela' na' inezi yaca ben' nita' lao yedyi layu naca Diuzi ben' Ěe, ben' bala'ana.

Ta hue Pablo Cristo ben' Ěe, quie lena' rġanĚ' lao yedyi layu

¹² Bicha', re'enda' inezile ca ta aozaca' nĚ'ědi' bron huen, baoyĚra ben' uzĚnaga di'idza' la'iya quie Diuzi. ¹³ Banezi yaca soldado, ben' rapa yulao', len yaca los demás benĚ', cabĚ' raca quia'. NeziĚ' dia' lu'u dyiguiba por nun quie dan' naohua' xneza Cristo. ¹⁴ LĚscan' ĚĚ yaca ben' nao xneza Jesús, birdzebiyaquĚ' rguixogue'yaquĚ' benĚ' xti'idza' Diuzi du guicho du la'adyi'yaquĚ'. AblĚ'ĚyaquĚ' cabĚ' racalĚ Diuzi nĚ'ědi', tu dia' lu'u dyiguiba.

¹⁵ Tali na' nita' bala ben' rnĚ quie Cristo, pero yela' ĚĚ', yela' mala quieyaquĚ' rnĚyaquĚ'. Pero lĚscan' nita'rĚ yaca ben' rnĚ quie Cristo du guicho du la'adyi'yaquĚ'. ¹⁶ Nita' bala ben' rnĚ quie Cristo ta huejĚ' cuinzijĚ' ben' Ěe. BirnĚyaquĚ' quie Cristo du guicho du la'adyi'yaquĚ', den' re'enyacuĚ' huerayaquĚ' causa quia', dan' nezियाquĚ' dia' lu'u dyiguiba. ¹⁷ Pero lĚscan' nita' yaca ben' rnĚ quie Cristo nun quie dan' nedyĚ'ĚyaquĚ' nĚ'ědi'. NeziyaquĚ' zua' niga ta hua' defender xti'idza' Diuzi. ¹⁸ Pero abihuena. Bicuezan yedaohueda' nun quie rnĚjĚ' quie Cristo, la'acazi du guicho du la'adyi'yaquĚ', la'acazi chi rezĚ'yaquĚ' nĚ'ědi'.

¹⁹ Huedaohueda' dan' nezda' biti'tezi raca quia', huaroga' dya'a nun quie rulidzale Diuzi por nĚ'ědi', na' racalĚ Bichi Be quie Jesucristo nĚ'ědi'. ²⁰ Bire'enda' hua' tu ta gaca yela' stu' quia'. Re'enda' gaca quia' quixogui'a benĚ' xti'idza' Diuzi du guicho du la'adya', biyedue'da' chi bi bia'. Cana' re'enda' hua' tacuenda tzioĚ'era yaca benĚ' naca Cristo ben' Ěe, ben' bala'anara. Cana' re'enda' hua' ba'ala'cazi nebana', ba'ala'cazi gatia'. ²¹ Ta hua' Cristo ben' Ěe, quie lena' rġa'la lao yedyi layu. Na'ra cati gatia', cana'ra bia' gan tzazulia'nĚ' tuzioli. ²² Pero chi nezua' nĚ'ědi' lao yedyi layu, huazaque' huera' dyin quie Diuzi. Quie lena' binezda' nulan nacaran huen inaohua'. ²³ Nacan ĚĚdi ta useria' entre chopa neza. Para nĚ'ědi' nacaran huen gatia' tzazulia' Cristo tuĚe. Cana' naca neza re'enda' inaohua'. ²⁴ Pero zu itu neza reya'ala' inaohua' dan' nacaran dya'a para le'e chi nezulia' le'e lao yedyi layu. ²⁵ Quie lena' nuĚela'adya' yega'nlia' le'e lao yedyi layu ta gacalia' le'e ta inaorale mazara xneza Cristo ta surale contento hue quiele quienĚ'. ²⁶ Cana' gaca huen quiele yedaohuele chi guida' ideyuba' le'e tatula.

²⁷ Nacan belao huele dyabĚ' tzu'ule tuĚe con cabĚ' una Cristo. LĚscan' la'achi guida' ideyuba' le'e, la'achi zua' zitu', re'enda' inezda' neyu'ule dya'a, nacale tuĚe ruele dyin quie Diuzi tacuenda uzĚnaga yaca benĚ' di'idza' quienĚ'. ²⁸ Biidzebile quie yaca ben' rudie le'e. Dan' rudieyaquĚ' le'e, lena' nacan seña udyiaguĬ'yaquĚ' cuinyaquĚ'. Quie le'e nacan seña nacale ben' bapsela Diuzi yezi'nĚ' le'e. ²⁹ BĚ Diuzi cule quiele ulionĚ' le'e no solamente ta hue quiele quie Cristo, pero lĚscan' ta yedzagalaole nun quie dan' nacale ben' quienĚ'. ³⁰ CabĚ' le'e, cabĚ' nĚ'ědi', tuzi ca zioro huero dyin quie Diuzi, biyuhĚdiro. BablĚ'Ěle cabĚ'

bia' dza na' bia' dyin quie Diuzi, bibehuèdia'. Na'ra banezile nerua' dyin quie Diuzi, biruhuèdia'.

2

Naca Cristo ben' belaora lao yugulute

¹ Como tali na' reyueze Cristo le'e, como tali na' nadyè'ènè' ruxela'adyi'nè' le'e, como tali na' banacalèle Bichi Be quie Diuzi tuzi, como tali na' raque Cristo le'e, como tali na' reyèchi'la'adyi'nè' le'e, ² cana'ra reya'ala' huele tuzi ca pensari huele. Reya'ala' nadyè'èle itu itule. Tuzi ca huele, huele tuze itu itule. Yela' na' yedaohueda' quiele. ³ Bihuele yaladyi', biuxa'ale. Huele gaxo len laguedyile, gaquele huen laguedyile ca cuinle. ⁴ Nitu nitule biquilole tadya'a quiezile, pero lèscan' quilole tadya'a quie laguedyile.

⁵ Reya'ala' tzu'ule pensari cabè' pensari yu'u Jesucristo. ⁶ Ba'ala'cazi Cristo len Diuzi tuzi ca nacayaquè', bibè Cristo la fuerza huenè' cuinnè' lèbi ca Diuzi, ⁷ pero pca'nnè' tzala'la yela' rnabè' quienè', gologuè' guquè' be'mbyu, bidè' guquè' ca ben' nada'o. ⁸ Bidè' guquè' be'mbyu bdze'nè' cuinnè' lao na'a Diuzi. Bzunè' di'idza' cabè' gudyi Diuzi lèbè'. Bibebi'nè' cati bazionè' gatinè' lè'è yaga cruzo, ba'ala'cazi yela' stu' huala na' gati benè' lè'è yaga cruzo. ⁹ Quie lena' bzu Diuzi lèbè' naquè' ben' bala'anara quie yugulute. Quie lena' una Diuzi naca Cristo ben' belaora, nuranu ben' naca belao zu ca lèbè'. ¹⁰ Quie lena' yugulu benè', caora reyaquè' laohuè', reya'ala' quitzu žibiyaquè' lao Jesús, la'acazi ben' zu guibá, la'acazi ben' nita' lao yedyi layu, la'acazi ben' baguti. ¹¹ Cana' inayaquè' naca Jesucristo ben' belaora lao yugulute, hueyaquè' Xuziro Diuzi ben' ze.

Reya'ala' uzioñe'e yaca ben' nao xneza Jesús yaca ben' binetzioñe'e

¹² Quie lena', bicha', ben' nedyè'èda', lèbi cabè' bè quiele cabè' di'idza' agudya' le'e dza na' caora nezulia' le'e, na'ra re'enda' hue quiele cabè' di'idza' ria' le'e, la'acazi zua' zitu' bisulia' le'e tuze. Du rdzebile, du ržizile ulehue ca re'en Diuzi huele cuenda inaole dyè'èdi xneza Cristo. ¹³ Dyin quie Diuzi na' rnèn quiele uzule di'idza' quienè'. Cana' gacalè Diuzi le'e uza'laole huele cabè' re'ennè' huele.

¹⁴ Yugulu can' ruele, ulehuna dyè'èdi. Bitzu'ule dila, bitzu'ule huenè, ¹⁵ cuenda bigata' dula' quiele. Re'enda' tale dyè'èdi ca ži'i Diuzi lao yaca ben' mala, yaca ben' de dula' xquia quie. Nacale ca quie bélo dyia guibá ruseni'n yedyi layu nun quie dan' ruzioñe'ele benè', ben' binetzioñe'e. ¹⁶ Reya'ala' quixogue'leyaquè' xti'idza' Diuzi, di'idza' rnèn quie yela' neban biyeyudyi yedu. Chi huele cana', cana' yedaohueda' dza yeguida Cristo dan' nužela'adya' biten cana'zi dyin quie Diuzi bia'. ¹⁷ Ba'ala'cazi ruen ži gatia', huedaohueda' como dan' cana' gaca' ben' naca gun quie Diuzi lèbi cabè' le'e, como nacaréle gun quie Diuzi por nun quie dan' barue quiele quienè'. Lena' yedaohueda' len le'e. ¹⁸ Cana' reya'ala' yedaohuele huelèle nè'èdi' tuze yedaohuero.

Ise'ela' Pablo Timoteo len Epafrodito

¹⁹ Chi napa Jesús gusto, ise'ela' Timoteo ideyubinè' le'e tacuenda yedaohueda' cati yeda' di'idza' ca ta ruele. ²⁰ Tuzi Timoteo rdèbinè' len nè'èdi' ta yega'nle huen. Tuzi pensari racando' len Timoteo len nè'èdi'. ²¹ Yaca ben' tula, rguilola'adyi'yaquè' tadya'a quieziyaquè', birguilola'adyi'yaquè' tadya'a quie Cristo Jesús. ²² Banezile cabè' rue Timoteo. Bablu'enè' rdanè' neza dya'a. Lèscan' banezile cabè' bènè' rdalènè' nè'èdi' rguixogue'ndo' benè' xti'idza' Diuzi. Racialènè' nè'èdi' dyè'èdi ca racialè tu xcuidi' xuzibi'. ²³ Caora banezda' nacala ca yero quia' niga, na'tera ise'ela' Timoteo ideyubinè' le'e. ²⁴ Pero nužela'adya' laguidatia' ideyuba' le'e, chi napa Cristo gusto guida'.

²⁵ Lèscan' raquenda' raoyente ise'ela' ben' bichiro Epafrodito ideyubinè' le'e. Lèlèbè' ruelia' dyin quie Diuzi, lèlèbè' redzagalaolia' tanun quie dan' rguixogue'ndo' xti'idza' Diuzi. Lèlèbè' baose'ela'le gan' zua' dza na' tacuenda gacalènè' nè'èdi' ta tzaxi'nè' chan' bi ta rdziogueda'. ²⁶ Lega re'ennè' yeguidè' idena'nè' yugulule. Lega rdèbinè' dan' nezinè' babele guca žhue'nè'. ²⁷ Tali na' guca žhue'nè' ilè'èti'zi bigutinè'. Pero Diuzi gacalènè' lèbè', bigutinè'. Lèscana' gacalè Diuzi nè'èdi', dan' beyacanè' ta bira uzua' mazara bayèchi'. ²⁸ Quie lena' lega re'enda' ise'ela'nè' laole tacuenda yedaohuele ilè'èlenè' tatula. Cana' bigacacita bayèchi' quia'. ²⁹ Ulesi' lèbè' du guicho du la'adyi'le, dan' naquè' ben' bichiro, ben' nao xneza Cristo. Reya'ala' gapale bala'ana yugulu ben' naca ca lèbè'. ³⁰ Ilè'èti'zi bigutinè' tanun quie dan' rue quienè' di'idza' quie Cristo. Bicuenta bènè' chi gatinè' tacuenda gacalènè' nè'èdi' lao lazale chan' bi ta rdziogueda', como dan' biuzaque' guidale niga gacalèle nè'èdi'.

3

Reya'ala' huebè'ro Cristo

¹ Na'ra bicha', reya'ala' yedaohuele dan' nacale ben' nao xneza Jesús. Binacan zēdi para nē'ēdi' yenia' le'e tatula ca ta baonia' le'e dza na' lē'ē guichi, como dan' nacan belao para le'e. ² Bigalele quie yaca ben' rue ca rue yaca beco', yaca ben' rue tamala, yaca ben' rchugu cuerpo. ³ Ra'o nacaro dugalo ben' nuzu xēdyidao' cuine. Ra'o nacaro ben' rionla'adyi' Diuzi lao na'a Bichi Be quienē'. Redaohuero nacaro ben' quie Cristo Jesús. Neziro bibi zaca'n huero cuinro ben' ze por nun quie bi ruero dza rdaro lao yedyi layu. ⁴ Pero chi nacan huen huero cuinro ben' ze, nalaria' derecho hua' cuina' ben' ze ca nurla ben' tula. ⁵ Pues bzuyaquē' tu xēdyidao' nē'ēdi' caora gologa' guca' xu'una dza. Nē'ēdi' naca' dugalo ben' Israel. Naca' zi'isuba xuzixta'oro Benjamín. Desde nacatia' xcuidi' raca' di'idza' hebreo. Gucalia' ben' partido fariseo tuze. Ca rnaoyaquē' du guicho du la'adyi'yaquē' ley quie Moisés, cana' unaohua' nē'ēdi'. ⁶ Du guicho du la'adya' psaca' ben' quie Jesús bizinaquezi dza na'. Tantozi unaohua' ley quie Moisés, nunu bē causa quia' chi udapa' dula' xquia lao Diuzi. ⁷ Pero banezda' na'a bibi zaca'n lao Diuzi yugulu ca ta guqueda' zaca'n lao Diuzi dza na'. Lena' nezda' porque dan' barnaohua' xneza Cristo na'a. ⁸ Lēscan' nezda' yugulu ta de quia' nacan ca quie ta chu'unro, ta bibi sirve. Zaca'ran huebi'a Cristo, ben' naca Señor quia', cala ca yugulu ta de quia'. Tanun quie nubi'a Cristo, pca'na' tzala'la yugulu ta de quia'. Araqueda'n ca tu bēbi, tanto zaca'ran ta huebi'a Cristo, ⁹ tanto zaca'ran tzalia' Cristo tuze. Calá por nun quie unaohua' ley quie Moisés rlē'ē Diuzi nē'ēdi' ben' laxta'o yēri, dechan' por nun quie dan' rzudyi'ilia' Cristo. Huazi' Diuzi nutezi ben' rzudyi'ilē' Cristo. ¹⁰ Tuzi ca re'enda', re'enda' huebi'a Cristo. Re'enda' sulē yela' huaca quienē' nē'ēdi' cabē' yela' huaca bē Diuzi phebannē' lēbē'. Lēscan' zua' dispuesto yedzagalaohua' cabē' bedzagalaonē', ba'ala'cazi huen zi gatia' cabē' gutinē'. ¹¹ Cana' re'enda' tacuenda hua' gan useban Diuzi nē'ēdi' yeroga' ga de ben' huati.

Ni rguixogue'n ca reya'ala' huero ta huero gan huebē'ro Cristo

¹² Pero biinia' babia' gan baoya'lao banubi'a Cristo. Lēscan' cala beyudyi bzioñe'e Diuzi nē'ēdi' hua' ca mandado re'ennē' hua'. Pero biusana' xneza Cristo. Re'enda' hua' gan huebi'a Cristo ca nuebē' Cristo nē'ēdi'. ¹³ Lēscan' bicha', biinia' babia' gan abeyudyi' bia' cabē' re'en Diuzi hua'. Quie lena' birdēbida' ca tu ta baode baguca. Pero rua' dyabē' ta hua' ca re'en Diuzi hua' dza zaza'ra. ¹⁴ Rua' dyabē' rnaohua' xneza Cristo tacuenda yeyēzi Diuzi nē'ēdi' yeya'a guibá. Hueyēzi Diuzi yaca ben' nuelē' Cristo tuze ta tzezulēyaquē' lēbē' tuzioli. ¹⁵ Yugulu le'e ben' nao nezza Cristo, reya'ala' huele pensari ca pensari agudya' le'e niga. Chi le'e natza' pensari quiele, Diuzi uzioñe'enē' le'e ta huele tuzi ca pensari rua'. ¹⁶ Quie lena' sí, reya'ala' huero, reya'ala' huero tuzi pensari cabē' pensari nudze' Diuzi ra'o.

¹⁷ Bicha', cabē' rua' nē'ēdi', cana' reya'ala' huerēle. Lēscan' huele cuenda nu ben' rue cabē' bēndo' cati unita'lēndo' le'e dza na'. ¹⁸ Zē lasa baonia' le'e, na' du rbedyi' hua' repetir tatula de que nita' ben' zē, ben' naca enemigo quie Cristo. ¹⁹ Naca quieyaquē' yeyoyaquē' lagui' gabila. Ta rnazin quieyaquē' rueyaquē' rnaoyaquē' quie diuzi quieyaquē'. Reya'ala' yedue'yaquē' ca rueyaquē', den' redaohuelayaquē'. Tuz ta raza lao yedyi layu ruejē' pensari. ²⁰ Pero ra'o nacaro cuenda quie Diuzi zu guibá. Rbezaro dca zeza' Jesucristo, ben' psela ra'o, ben' naca Señor quiero. ²¹ Lēbē' yetza'nē' bē'ēla' žuba' banaca bayēchi' quiero ta iyacan yeni' cabē' naca cuerpo quienē' cuinnē'. Cana' huenē' quiero conlē yela' huaca de quienē' rnabē'nē' lao yugulute.

4

Reya'ala' yedaohuero nacaro ben' nao xneza Cristo

¹ Quie lena' bicha', ben' nedyē'ēda', lega re'enda' guida' ideyuba' le'e. Por le'e sua' contento nacale ca quie tu premio quia'. Rnia' le'e, ben' nedyē'ēda', ulenao xneza Cristo du guicho du la'adyi'le, biyehuédile.

² Rnabayēcha' Evodia len Síntique ta yega'nlēleyaquē' tuzi ca reya'ala' hue yaca nigula, ben' nao xneza Cristo. ³ Lēscan' luē', ben' compañero quia', ben' ruelē nē'ēdi' dyin quie Diuzi, re'enda' gacalēlo' lērupa nigula. Leyaquē' bzagalēyaquē' nē'ēdi' cati udixogue'ndo' benē' di'idza' la'iya quie Diuzi conlē Clemente len itu yaca ben' tula, ben' bēlē nē'ēdi' dyin quie Diuzi. Bazu laoyaquē' lē'ē libro ga yu'u lao yaca ben' de yela' neban quie tuzioli.

⁴ Yugu dza reya'ala' yedaohuele, dan' nacale ben' nao xneza Cristo. Tatula rnia' le'e: ¡Yedaohuele! ⁵ Huele tahuen ta ilē'ē yugulu benē' le'e ben' zela'adyi'. Baruen bago dza yeguida Cristo.

⁶ Bidēbile chi biti'tezi raca quiele. Yēbile Diuzi chi bi raza quiele. Ulenaba Diuzi chi bi rdzioguele. Yēbilēnē' diuxcalelo'. ⁷ Cana' hue Diuzi cue' chizi laxta'ole. Ca rue Diuzi, ruenē' cue' chizi laxta'oro, lena' nacaran mazara cabē' nacan ta tzioñe'ero. Lēscan' huapa Diuzi le'e chuzido ta tzu'ule pensari dya'a tanun quie sudyi'ilēle Cristo Jesús.

Huero pensari quie ta naca tadya'a

⁸ Ta iyudyi di'idza' rnia' le'e bicha', ulehue pensari quie yugulu ta naca tali, len quie yugulu ta naca ta bala'ana, len quie yugulu ta naca tabala, len quie yugulu ta naca tala'iya, len quie yugulu ta raxe Diuzi, len quie yugulu ta nuzë quie nacan huen. Chi nacan dya'a, chi nacan ta ilë'ëro huen, lëlena' ulehue pensari cabë' nacan.

⁹ Ulehue ulenao ca ta bapsëdia' le'e, len ca ta blu'ena' le'e. Ulehue ulenao ca ta babele baonia', len ca ta bablë'ële bia'. Cana' selë Diuzi le'e. Naca Diuzi ben' cuëchi chizi laxta'ole.

Ben'yedyi Filipos bë'yaquë' Pablo gun

¹⁰ Lega redaohueda' laohue Cristo dan' babeza'la'adyi'le në'ëdi' tatula. Cala rnia' chi bagula'adyi'le në'ëdi'. Nezda' gu'unle gacalële në'ëdi' dza na', pero biuzaque'. ¹¹ Cala rnia' chi bi rdziogueda'. Baoyulaohua' redaohueda' con tu tadao' de quia'. ¹² Nezda' ca naca quie ben' yëchi'. Lëscan' nezda' ca naca quie ben' birdziogue. Con biti'tezi gaca quia', la'achi aodaohua' beloga', la'achi rdua', la'achi bibi rdziogueda', la'achi rdziogueda', baoyulaohua' sua' contento bira rdëbida'. ¹³ Huazueda' con biti'tezi gaca quia', dan' run Cristo në'ëdi' fuerza valor quienë' yugu dza. ¹⁴ Pero bële tu tahuen quia', beyëchi'la'adyi'le në'ëdi' ca tazëdi raca quia'.

¹⁵ Le'e ben' ciudad Filipos, nezile tu cue'zi le'e baose'ela'le gun quiele. Bigula'adyi'le ca gucalia' le'e udixogui'a le'e di'idza' la'iya quie Diuzi. Lëscan' gucalële në'ëdi' dza uya'a yu nebaba Macedonia caora cati uzulaohua' udixogui'a benë' di'idza' la'iya quie Diuzi. ¹⁶ Cati nezua' ciudad Tesalónica, chopa tzona lasa use'ela'le gun quiele itzani'a ta hua' gasto quia'. ¹⁷ Cala rnia' le'e ta ise'ela'le bi cosa quia'. Ca re'enda', re'enda' gata' tahuen quiele lao Diuzi dan' beyëchi'la'adyi'le në'ëdi'. Redaohueda' cati gaca quiele cana'. ¹⁸ Ta naca yalao babezi'a në'ëdi'. Mazla ca tu ta rdziogueda' use'ela'le quia' lao na'a Epafrodito. Ta use'ela'le quia' në'ëdi' nacan ca quie tu ta bë'le Diuzi rla'n žixi žeo, bezi'në'n yaxenë'n. ¹⁹ Gun Diuzi le'e yugulu ca tu ta rdzioguele como biyeya ta de quie Diuzi. Tadya'atzegue de quie Diuzi conlë Cristo Jesús. ²⁰ Reya'ala' gaparo bala'ana Xuziro Diuzi tuzioli. Amén.

Rugapa Pablo leyaquë' diuzi

²¹ Ulegapa diuzi yaca ben' quie Diuzi nita' na', yaca ben' zulë Cristo tuže. Yaca ben' bichiro, ben' zulë në'ëdi' niga, rgapayaquë' le'e diuzi. ²² Yugulu ben' rue quie xti'idza' Diuzi, ben' nita' niga, rugapayaquë' le'e diuzë. Lëscan' yaca ben' quie Diuzi, ben' rue dyin zan yu'u quie ben' rnabë' quie ben' romano, rugaparëyaquë' le'e diuzi.

²³ Rnaba' huela'iya Jesucristo yugulule. Lëbë' naquë' ben' Señor quiero. Amén.

DI'IDZA' BZU SAN PABLO APÓSTOL LĒ'Ē GUICHI, USE'ELA'NĒ'N LAO CIUDAD COLOSAS

Rugapa Pablo yaca ben' nita' ciudad Colosas diuzi

¹ Nĕ'ĕdi', Pablo, bdĕ' Diuzi nĕ'ĕdi' cabĕ' re'ennĕ' gaca tacuenda tza' tzetixogui'a benĕ' di'idza' la'ya quie Jesucristo. Nĕ'ĕdi'lia' ben' bichiro Timoteo, ² bĕndo' guichi ni, use'ela'ndo'n laole ciudad Colosas. Banacarĕle ben' quie Diuzi dan' banuerĕle Cristo Jesŭs tuze. Rnabando' huela'ya Xuziro Diuzi le'e cuĕchinĕ' chizi lu'u guicho laxta'ole.

Rulidza Pablo Diuzi ta gacalĕnĕ' yaca ben' nao xneza Cristo

³ Yugu dza rĕbicazindo' Diuzi diuxcalelo' tanun quiele caora rulidzando' Diuzi, ben' naca Xuzi Jesucristo. Naca Jesucristo ben' belaora quiero. ⁴ Bagudyi benĕ' nĕto' cabĕ' ruele rzudyi' ilĕle Cristo, nadyĕ'ĕle yaca ben' rue quie xti'idza' Diuzi. ⁵ Cana' naca quiele nun quie dan' rbezale gun Diuzi le'e tu tadya'atzegue pca'nnĕ' quiele guibá. Aonezile cana' bĕ Diuzi quiele dan' babĕle cuenda quie di'idza' la'ya quie Diuzi dza na'. ⁶ Ca naca di'idza' quie Diuzi babele zio rzenan, lĕdi'idza' na' barue quie yaca ben' zĕ, na' betza'yaquĕ' pensari quieyaquĕ', barnaoyaquĕ' xneza Cristo. Cana' baraca duze yedyi layu. Lĕzi le'e, cana' raca quiele desde dza bele ca nadyĕ'ĕ Diuzi benĕ', gucabĕ'le nacan tali. ⁷ Lĕzi cana' psĕdi Epafras le'e. Nacarĕ Epafras ben' rue dyin quie Diuzi. Nadyĕ'ĕndo'nĕ'. Naquĕ' ben' rue dyin quie Cristo conlĕ le'e du guicho du la'adyi'nĕ'. ⁸ Lĕbĕ' bidĕ' bedetixogue'nĕ' nĕto' cabĕ' ruele nadyĕ'ĕle benĕ' cabĕ' nadyĕ'ĕ Cristo benĕ'.

⁹ Quie lena' binusando' rulidzando' Diuzi por le'e desde dza na' cati bendo' ca ruele nedyĕ'ĕle yaca ben' nao xneza Cristo. Binusando' rnabando' lao Diuzi ta uzioñe'enĕ' le'e cabĕ' re'ennĕ' huele, len cabĕ' re'ennĕ' tzu'ule pensari quienĕ', len cabĕ' re'ennĕ' inezile bi rue Bichi Be quienĕ' racalĕnĕ' ra'o. ¹⁰ Cana' rulidzando' Diuzi tacuenda tale cabĕ' reya'ala' ta ben' nao xneza Cristo ta yedaohuenĕ' yugulu ca ruele. Lĕscan' rulidzando' Diuzi tacuenda huele dyin quie Diuzi dyĕ'ĕdi yugu ca re'ennĕ', lĕscan' ta inezirale quie Diuzi cabĕ' rnabĕ'nĕ' ra'o. ¹¹ Rnabando' lao Diuzi gunnĕ' fuerza valor quiele tacuenda huele gan biti'tezi gaca quiele biyedzebile yedaohuele biyeyatile, na' dyĕ'ĕdi yedaohuele du usela Diuzi le'e. ¹² Reya'ala' yĕbile Xuziro Diuzi diuxcalelo', dan' banuetenĕ' ra'o puesto ta tzu'uro ga naca xni' yezi'ro tu ta pca'n Diuzi para ra'o, ben' naca cuenda quienĕ'. ¹³ Aolio Diuzi le'e, bira nacale cuenda ta inabĕ' xan' taxi'ibi' le'e. Banue Diuzi le'e cuenda inabĕ' zĭ'inĕ' le'e. Nadyĕ'ĕ Diuzi zĭ'inĕ'. ¹⁴ Lĕbĕ' gutinĕ' lĕ'ĕ yaga cruzo ta yezi' dula' xquia quiero gata' yela' neban quiero tuzioli.

Tanun quie yela' guti quie Cristo nacalĕro Diuzi tuze

¹⁵ Cabĕ' naca quie Cristo, ben' saque' ilĕ'ĕro, cabĕ' na' naca quie Diuzi, ben' bisaque' ilĕ'ĕro. Naca Cristo lao Diuzi ca quie tu zĭ'inĕ' nĕro. Nacarĕ' belaora lao yugulu ta bĕ Diuzi. ¹⁶ Lao na'a Cristo bĕ Diuzi yugulute, la'acazi ta dyia guibá, la'acazi ta zu lao yedyi layu, la'acazi ta saque' ilĕ'ĕro, la'acazi ta bisaque' ilĕ'ĕro, la'acazi yaca ben' nita' guibá, yaca ben' de yela' rnabĕ' quie. Lao na'a Cristo bĕ Diuzi yugulute, na' bega'nnan quienĕ'. ¹⁷ Tu binecue' yedyi layu bazucazi Cristo. Yugulu ta de lao yedyi layu nacan la'adyi'na'anĕ'. ¹⁸ Naca yaca ben' nao xneza Cristo ca quie tuzi cuerpo. Naca Cristo ca quie guicho cuerpo na'. Na' ra'o nacaro ca quie cuerpo quienĕ'. Tanĕro beban Cristo. Quie lena' naquĕ' ben' belaora lao yugulute. Ganura ben' belao zu como ca lĕbĕ'. ¹⁹ Cani nacan, como dan' cabĕ' naca Diuzi, cabĕ' na' naca Cristo. ²⁰ Tanun quie dan' guti Cristo lĕ'ĕ yaga cruzo ulato ren quienĕ', quie lena' pca'ntza'o Diuzi yaca benĕ', la'acazi ben' ta yedyi layu, la'acazi ben' zu guibá.

²¹ Dza na' gucale ben' binuebĕ' Diuzi, ben' rudie Diuzi tanun quie dan' bĕle tamedian. Pero na'a bapca'ntza'o Diuzi le'e ²² tanun quie dan' guti Cristo lĕ'ĕ yaga cruzo. Cana' bĕ Cristo tacuenda na' nayĕrile lao Diuzi, bibi' dula' quiele de ta usedyinnĕ' le'e lao Diuzi. ²³ Quie lena' reya'ala' inaorale dyĕ'ĕdi hue quiele quie Cristo. Biusanle uzalale biyebiga'le. Reya'ala' cuezale yezi' Diuzi le'e ca rnĕn lĕ'ĕ guichi la'ya quie Diuzi. Lĕdi'idza' na' rguixogue'ro duze yedyi layu. Ca naca nĕ'ĕdi', naca' ben' rguixogue' xti'idza' Diuzi.

Bĕ' Diuzi Pablo ta usĕdinĕ' yaca ben' nao xneza Cristo

²⁴ Redaohueda' sacazi'a ta gacalia' le'e como dan' cana' nacalia' Cristo tuze con cabĕ' guca quienĕ' użacazi'nĕ' ta gacalĕnĕ' yaca ben' quienĕ', ben' naca ca quie cuerpo quienĕ'. ²⁵ Bdĕ' Diuzi nĕ'ĕdi' ta usĕdia' yaca ben' rue quie xti'idza' Diuzi. Cana' re'enda' gacalia' quixogui'a le'e yugulu con cabĕ' rguixogue' di'idza' la'ya quie Diuzi. ²⁶ Lena' rda'a ruzioñe'eda' ben' nao xneza Cristo con cabĕ' rguixogue' xti'idza' Diuzi, pero tu ta biunezi yaca ben' unita'

tiempote ruzioñe'enè'eda'yaquè' na'a. Azio zè iza de di'idza' nucachi' Diuzi, pero na'tera bzioñe'e Diuzi yaca ben' nao xneza Cristo cabè' rguixogue' di'idza' nucachi'nè'. ²⁷ Cana' re'en Diuzi uzioñe'enè' yaca ben' quienè' cabè' rguixogue' di'idza' nagachi' quienè', dan' di'idza' dya'a nacan ta hue quieyaquè' yaca ben' binaca ben' Israel. Pues rguixogue' di'idza' nagachi' quie Diuzi cani: Zu Cristo lu'u guicho laxta'ole. Lèbè' rbezale yeguidè' yezi'nè' le'e yeyole guibá ga naca yeni' quienè'.

²⁸ Nèto' rguixogue'ndo' quie Cristo. Rnëyendo' rusèdindo' benè' du guicho du la'adyi'ndo' tacuenda usedyinndo' yaca benè' lao Diuzi gacayaquè' ben' laxta'o yèri nun quie nacalèyaquè' Cristo tuže. ²⁹ Quie lena' rua' dyin quie Diuzi du guicho du la'adya' conlè fuerza valor run Cristo nè'èdi'.

2

¹ Re'enda' inezile lega rdèbida' bi raca quiele. Lèscan' rdèbida' quie yaca ben' quie Jesús nita' yedyi Laodicea, len nutezi ben' quie Jesús chan' binubè'yaquè' nè'èdi'. ² Re'enda' biyeyatiyaquè' idyè'èyaquè' itu ituyaquè' gacayaquè' tuzi. Re'enda' cue' chizi laxta'oyaquè' nun quie babzioñe'e Diuzi leyaquè' cabè' rguixogue' di'idza' nagachi' quienè' de que rguixogue'n quie Cristo. ³ Naca Cristo ben' rioñe'e yugulute. Biyeyudyi yedu yela' rioñe'e quienè'. ⁴ Lena' rnia' le'e tacuenda bigalele quie yaca ben' ru'e di'idza' huezi' yè'. ⁵ Ba'ala'cazi bizèlia' le'e, pero rdèbida' quiele chi bi raca quiele. Redaohueda' rue quiele ta yu'u ni'a xnezi, birdzebile inaole xneza Cristo.

⁶ Quie lena', dan' baozi'le xneza Cristo, reya'ala' tale cabè' rda ben' nacalè Cristo tuže. ⁷ Ca quie tu yaga huala yu'u luanan garè', lècana' reya'ala' huele quie xneza Cristo, reya'ala' sèle len huala, biinaole udeudela neza. Tuzi neza quie Cristo reya'ala' inaole, na' hue quiele cabè' unanè', cabè' psèdindo' le'e. Biusanle yèbile Diuzi diuxcalelo' yugu dza.

Baben Cristo yela' neban cubi quiero

⁸ Ulegapa cuidado. Bihue'le lato si' benè' le'e yè', ben' rnè di'idza' dachi, di'idza' huezi' yè'. Birueyaquè' dyabè' inao benè' xneza Cristo, den' rueyaquè' dyabè' inao yaca benè' ca naca costumbre quieyaquè'. Rueyaquè' dyabè' inao yaca benè' ca naca pensari quie yaca ben' nita' lao yedyi layu.

⁹ Duzete cabè' naca Diuzi, cabè' na' nacaré Cristo. ¹⁰ Quie lena' yugulu ta de nacan quiele dan' nacalèle Cristo tuže. Lèbè' r nabè'ranè' lao yugulu yaca ben' r nabè'. ¹¹ Lèscan' dan' nacalèle Cristo tuže, quie lena' nacan quiele ca quie ben' bzu tu xèdyidao' cuine. Pues como dan' babeyèrile lao Diuzi, bira r nabè' ta rnazin quiele le'e, lena' nacan quiele ca quie tu xèdyidao' bzu Cristo le'e, ca la xèdyidao' bzu benè' le'e. ¹² Lèscan' caora yu'u'ule nisa gualè bautismo, cana' guca quiele ca quie ben' gutilè Cristo, ben' yu'u' lu'u yé'roba, ben' bebanlè Cristo tatula. Cana' naca quiele na'a nun quie rue quiele quie yela' huaca quie Diuzi, ben' pseban Cristo. ¹³ Tu ta baodele dza na' cati binehue quiele quie Diuzi, baodele guca quiele ca quie ben' huati de lao Diuzi. Pues por nun quie dula' xquia quiele, bineyèrile lao Diuzi. Pero na'a baben Diuzi le'e yela' naban tuzioli nun quie banacalèle Cristo tuže, bezi'zenè' dula' xquia quiele. ¹⁴ Beguba Diuzi tu ta žuba le'e xquia, tu ta nudze'de'na le'e de acuerdo con cabè' na ley quienè'. Lena' apsula Diuzi caora guti Cristo lè'è yaga cruzo. ¹⁵ Cana' bè Cristo gan begubanè' yela' r nabè' quie yaca bichi be xi'ibi' caora cati gutiguè' lè'è yaga cruzo. Paxonè' leycan zaca'lao lao yaca los demás ben' nita' guibá. Bzunè' leycan preso ca rue nu rey ruzunè' preso ben' naca enemigo quienè'.

Ulehue cuando tu ta naca quie guibá

¹⁶ Quie lena' nitu nitu bireya'ala' inabižoyaquè' le'e quie ta bi gaole, len ta bi yo'ole. Bireya'ala' inabižoyaquè' le'e quie bi dza huele lani, chi dza bezè' biu' re'ene, o chi dza tula. Lèscan' bireya'ala' inabižoyaquè' le'e quie bi dza huele dza huezila'adyi'. ¹⁷ Chi yela' huao, chi lani, chi dza huezila'adyi', lao yunaten rguixogue'n quie tu ben' zaza'ra. Rguixogue'n quie Cristo, ben' naca tali quie Diuzi. ¹⁸ Bihue'le lato si' yaca ben' rionla'adyi' yaca ángel le'e yè'. Bihue'le lato cubayaquè' ta pcueza Diuzi para le'e guibá. Rueyaquè' ca quie ben' gaxo gula, pero bè' rueziaquè'. Nayaquè' uxusayaquè' blè'èyaquè' ta naca tali quie Diuzi, pero bè' naziyaquè'. Rueyaquè' cuinyaquè' ben' ze, pero ta racazi la'adyi'yaquè' rueyaquè' cana'. ¹⁹ Bira ruelèyaquè' Cristo tuže. Ca gaoro ta gue'eniro suro dya'a, cana' naca quie Cristo, ruzioñe'enè' ra'o cabè' naca pensari quie Diuzi tacuenda suro dya'a laohuè' con cabè' re'en Diuzi gaca quiero.

²⁰ Le'e nacale ca quie ben' huati, ben' gutilè Cristo. Bira nacale cuando quie benè' ta inaole huele quie pensari quieyaquè'. ¿Bixquien' nenaole neruele quie pensari quie yaca benè' cati bira nacale cuando quieyaquè'? ²¹ Leyaquè' inayaquè' cani: "Biselo' ta ni, bigaolo' ta na', bitzaquilo'n na'alo'." Cana' naca pensari quie benè'. ²² Pero hueyudyi huedu quienan como dan' nacan puro pensarizi quie benè'. ²³ Parece tali na' huacalèn ra'o

chi inaoro huero pensari quie benë', porque ruen dyabë' quiero huero quie idao', gacaro ben' gaxo, gaparo cuidado len cuerpo quiero. Pero bë' ruezin binacan cana'. Bibi sirve inaoro huero pensari quie benë', porque bigacalën ra' o ta bihuero ta rnazin quiero.

3

¹ Le'e naca quiele ca quie ben' baguti babebanlë Cristo. Quie lena' huele cuenda tu ta naca quie guibá ga re' Cristo zaquë' yebë quie Diuzi. ² Nacaran belao huele pensari cabë' naca Diuzi zu guibá. Bihuele puro pensari cabë' raca lao yedyi layu. ³ Le'e naca quiele ca quie ben' bagutilë Cristo. Quie lena' nazi'tzao' Cristo yela' naban quiele tuzioli nun quie dan' nacalë Cristo len Diuzi tuze. ⁴ Naca Cristo ben' run yela' naban quiero tuzioli. Caora yeguida Cristo lao yedyi layu, huazulëronë' tuzioli. Huenë' mandado inabë'ro len lëbë'.

Ni rnan quie yela' neban gula len yela' neban cubi

⁵ Quie lena' rnia' le'e, bira huele cuenda ca tu tamala ina bë'ëla' zuba' quiele huele. Banaca quiele ca quie banati bë'ëla' zuba' quiele, yela' na' bira huele cuenda quien. Biutzagale nigula binaca zgulale. Bihuele ta naca bayatza. Bihuele ta rnazin quiele. Bisa'la'adyi'le dumi. Ca nacan mala tzionla'adyi'ro idolo, cana' mala nacan sa'la'adyi'ro dumi. ⁶ Cana' rue yaca ben' bire'en hue quie con cabë' rna Diuzi. Quie lena' huadyin dza hue Diuzi leyaquë' castigo. ⁷ Lëscan' le'e, cana' bële le'e dza na', dza binenaole xneza Cristo. ⁸ Pero na'a ulesan bira huele tamala. Biihuin'le benë'. Biyezë'le benë'. Biutasi biuniolo benë'. Biulidzale benë' di'idza' lëë. ⁹ Bisi'le itu itule yë', como dan' apca'nle tzala'la cabë' bële dza na'. ¹⁰ Pues banacale ca quie ben' cubi, bayu'ule pensari cubi ta bdze' Diuzi lu'u guicho laxta'ole. Yugu dza racalë Diuzi le'e ta galele huele con cabë' rna pensari cubi yu'u lu'u guicho laxta'ole tacuenda tziönë'eralë mazara quie pensari quie Diuzi. ¹¹ Ra'o, ben' nao xneza Cristo, lao Diuzi bira nacaro zë cue' benë'. Nacaro tuzi cue' benë', la'achi ben' griego, la'achi ben' Israel, la'achi ben' zu seña xëdyidao', la'achi ben' bizu seña xëdyidao', la'achi ben' za' yedyi ga'ala', la'achi ben' za' yedyi zitu', la'achi ben' nada'o, la'achi ben' libre. Zëlë Cristo yugulu ben' nao xnezë'. Naquë' ben' belao la'o yugule.

¹² Nadyë'ë Diuzi le'e. Ulionë' le'e bënë' le'e ben' yëri laohuë'. Tana' reya'ala' yeyëchi'la'adyi'le benë', reya'ala' gacalële benë', reya'ala' gapala'nle benë', reya'ala' hue'lële benë' di'idza' zela'adyi'. Bireya'ala' huele ze cuinle. ¹³ Ulehue'lë laguedyile di'idza' zela'adyi' itu itule. Ules'i'ze quie laguedyile itu itule. Cabë' bë' Cristo bezi'zenë' quiele, cana' hue'lële laguedyile. ¹⁴ Tu ta nacan belao huele, reya'ala' idyë'ëtzguele itu itu laguedyile. Dan' huele cana', lena' gacalën le'e hue quiele duze con cabë' rna pensari cubi bdze' Diuzi lu'u guicho laxta'ole. Cana' gacale tuzi len pensari quie Diuzi. ¹⁵ Rulidza' Diuzi cuëchinë' chizi laxta'ole, porque por lena' ulionë' le'e re'ennë' gacale tuzi cue' ben' quienë'. Bigala'adyi'le yëbile Diuzi diuxcalelo'.

¹⁶ Hue'le lato yega'n di'idza' quie Cristo lu'u guicho laxta'ole dyë'ëdi. Ulesëdi hue'le di'idza' zela'adyi' conlë itu itule conlë yela' rionë'e quie Diuzi. Gulale nu Salmu, nu himno, nu alabanza la'iyä. Yëbile Diuzi diuxcalelo' du guicho du la'adyi'le. ¹⁷ Yugulu ta huele, yugulu ta inale, uzëtöle lao Jesús, ben' belao quiero. Caora cati yëbile Xuziro Diuzi diuxcalelo', lao na'a Jesús yëbilenë' diuxcalelo'.

Rusëdi Pablo ta yu'u ni'a xnezi hue yaca ben' nao xneza Cristo

¹⁸ Na'ra le'e yaca nigula, cani rnia' le'e: Galele quie be'mbyu quiele. Cana' reya'ala' huele, dan' banacale ben' nao xneza Cristo. ¹⁹ Lëscan' rnia' le'e yaca be'mbyu: Gaqule idyë'ële nigula quiele. Bihuele snia conlë lëbë'. ²⁰ Lëscan' rnia' le'e yaca be'mbyu: Uzule di'idza' dyë'ëdi quie xuzi zna'le, como cana' re'en Diuzi huele. ²¹ Lëscan' rnia' le'e xuzi xcuidi': Biquilole idza' xcuidi' quiele, dan' chi huele cana' huadëbibi' biuzubi' di'idza' quiele du guicho du la'adyi'bi'. ²² Lëscan' rnia' le'e yaca ben' nada'o: Uzule di'idza' quie xa'nle, ben' nauiguxo dyin lao yedyi layu. Bisi'le xa'nle yë'. Huele dyin dya'a, la'achi zënë' ina'në' le'e, la'achi bizënë' ina'në' le'e. Tuz ca huele dyin quienë' du guicho du la'adyi'le. Cana' reya'ala' huele, dan' nacale ben' rapala'n Diuzi. ²³ Yugulu ta ruele, huelen du guicho du la'adyi'le como ca dyin quie Diuzi ruele, quie dyin quie benë'. ²⁴ Baonezile baben Diuzi le'e yela' neban tuzioli ta yeyole guiba dan' rzudyi'ilële Cristo, ben' naca Señor quiero. ²⁵ Pero nu ben' rue tamedian, hue Diuzi lëbë' castigo con cabë' naca tamala bënë'. Tuzcazi ca rue Diuzi, cana' ruenë' conlë yugulu benë'.

4

¹ Lëscan' rnia' le'e yaca ben' naca xa'n yaca ben' nada'o: Huele ta yu'u ni'a xnezi conlë yaca ben' nada'o. Bigala'adyi'le lëscan' le'e zurële lao Diuzi zu guibá, ben' naca xa'nle.

² Cana'ra rnia' le'e, ben' bicha': Biusanle ulidzale Diuzi yugu dza. Biulidzalenë' con ganzi, pero yëbilenë' diuxcalelo'. ³ Lëscan' ulidzale Diuzi por nëto' tacuenda isaloguë'

xnezando' saque'ndo' tzatixogue'ndo' benë' di'idza' la'iya quienë' yëbindo'yaquë' quie Cristo ta biunezi yaca ben' unita' tiempote. Tanun quie dan' rguixogui'a quie Cristo, quie lena' dia' lu'lu' dyiguiba niga. ⁴ Ulidzale Diuzi ta gacalënë' në'ëdi' ta quixogui'a di'idza' la'iya quienë' cabë' reya'ala' quixogui'a.

⁵ Uleta dya'a lao yaca ben' binenao xneza Cristo tzala neru'en lato huero dyin quie Diuzi. ⁶ Puro di'idza' dya'a, di'idza' zaca'n lao Diuzi, reya'ala' hue'lële benë' tacuenda na' inezile ta yequëbile quie ben' binenao xneza Cristo.

Ga rugapayaquë' laguedyiyaquë' diuzi

⁷ Huida Tíquico idetixogue'në' le'e cabë' raza quia'. Naquë' ben' nadyë'ëro, ben' bichiro. Lënë' gucalënë' në'ëdi'. Dula'adyi'në' bëlënë' në'ëdi' dyin quie Diuzi. ⁸ Quie lena' ise'ela' lëbë' ta inanë' le'e bi raza quiendo' ta uxela'adyi'në' le'e. ⁹ Huidarë Onésimo conlë Tíquico. Lëscan' naca Onésimo ben' nadyë'ëro, ben' bichiro, ben' yedyi quiele. Layaquë' quixogue'yaquë' le'e yugulu ca raza quiendo' niga.

¹⁰ Aristarco, ben' delë në'ëdi' dyiguiba, rugapanë' le'e diuzi. Lëscan' Moisés, ben' bichi Bernabé, rugaparënë' le'e diuzi. Baonia' le'e cabë' re'enda' huele quie Marcos. Chi za'në' ideyubinë' le'e, ulezi'në' dyë'ëdi. ¹¹ Lëscan' rugapa Jesús, ben' laorë Justo, le'e diuzi. Entre lado yaca ben' nao xneza Cristo, ben' nacarë ben' Israel, tuzi leyaquë' gucalëyaquë' në'ëdi' udixogue'ndo' benë' xti'idza' Diuzi. Lega pxela'adyi'yaquë' në'ëdi'. ¹² Lëscana' rugapa Epafras le'e diuzi. Nacarënë' ben' rue dyin quie Cristo, ben' yedyi quiele. Lënë' lega rulidzanë' Diuzi por le'e tacuenda uzalale zule puesto huele ca re'en Diuzi huele. ¹³ Blë'ëda' ca rue Epafras ta gaca dya'a quiele. Lëzi cana' re'ennë' gaca dya'a quie ben' nita' ciudad Laodicea, len ben' nita' ciudad Hierápolis. ¹⁴ Rugapa Lucas le'e diuzi. Naca Lucas ben' rue remedio, ben' nadyë'ëro. Lëscan' rugapa Demas le'e diuzi.

¹⁵ Ugapale yaca ben' bichiro, ben' nao xneza Jesús, ben' nita' ciudad Laodicea, diuzi. Lëscana' ugapale Ninfas, len yaca los demás ben' redupa zan yu'u quienë', diuzi. ¹⁶ Bë' abeyudyi ablabale guichi bia' ni, ulese'ela'n ciudad Laodicea tacuenda ulaba yaca ben' nao xneza Jesús nita' na' len. Lëscan' ulelaba guichi ta yese'ela'yaquë' laole. ¹⁷ Uleyëbi Arquipo ta uzunë' di'idza' dyë'ëdi ca naca dyin bë' Diuzi lënë' huenë'.

¹⁸ Në'ëdi', Pablo, conlë na'a rua' letra ga iyudyi guichi ni ta inezile tali guichi quia' na'. Rugapa' le'e diuzi lë'ë guichi niga. Uleulidza Diuzi por në'ëdi', dan' dia' lu'lu' dyiguiba. Rulidza' Diuzi ta huela'iyänë' le'e. Amén.

GUICHI NĒRO BĒ SAN PABLO APÓSTOL, USE'ELA'NĒ'N LAO CIUDAD TESALÓNICA

Guichi ni use'ela' Pablo lao yaca ben' nao xneza Jesús, yaca ben' nita' ciudad Tesalónica

¹ NĒ'ēdi', Pablo, len Silas len Timoteo, bĕndo' guichi ni, use'ela'ndo'n laole ga nita'le ciudad Tesalónica. Nacale tuze len Xuziro Diuzi len Señor quiero Jesucristo. Rulidzando' Diuzi lĕnĕ! Señor quiero Jesucristo ta huela'iyaquĕ' le'e cuĕchiyaquĕ' chizi lu'u guicho laxta'ole.

Tadya'a bĕ yaca ben' nao xneza Jesús, yaca ben' nita' ciudad Tesalónica

² Yugo dza rulidzando' Diuzi rĕbindo'nĕ' diuxcalelo' por nun quiele. ³ Yugu dza reza'la'adyi'ndo' le'e cabĕ' ruele, ruele tadya'a rnaole xneza Jesús, nedyĕ'ĕle laguedyile. Tantozi zudyi'lĕle Señor quiero Jesucristo du guicho du la'adyi'le, birdzebile chĭ rusaca yaca benĕ' le'e bizinaquezi. ⁴ Bicha', nedyĕ'ĕ Diuzi le'e. Nezindo' ulionĕ' le'e ta gacale ben' quienĕ'. ⁵ Cala ta racazi la'adyi'ndo' udixogue'ndo' le'e xti'idza' Diuzi dza na', den' con yela' huaca quie Bichi Be quie Diuzi. Dyĕ'ĕdi nezindo' di'idza' li unando' le'e. Dyĕ'ĕdi nezile cabĕ' bĕndo', quĕdo' huen entre le'e dza na' beguilondo' modo ta gata' tahuen quiele.

⁶ Na'ra le'e, por tu parte quiele, ruele cabĕ' ruendo', lĕscan' ruele cabĕ' bĕ Señor quiero. Pues lao na'a Bichi Be quie Diuzi rue quiele xti'idza' Diuzi zule contento, ba'ala'cazi psaca' yaca benĕ' le'e bizinaquezi. ⁷ Quie lena' nezi yaca ben' nao xneza Jesús nita' yaca ciudad nebaba Macedonia, len yaca ben' nao xneza Jesús nita' yaca ciudad nebaba Acaya cabĕ' ruele, ruele tadya'a. ⁸ Quie lena' yaca ben' nita' yaca ciudad nebaba Macedonia, len yaca ben' nita' yaca ciudad nebaba Acaya, rezila'adyi'yaquĕ' xti'idza' Diuzi, pero lĕscan' yaca ben' nita' zĕ yedyi tula, rezila'adyi'rĕyaquĕ' xti'idza' Diuzi. Tanto rue quiele xti'idza' Diuzi, birnaban yĕbiroyaquĕ' ca ruele, ⁹ porque cuinyaquĕ' rĕbiyaquĕ' laguedyiyaquĕ' cabĕ' bĕle dza na', uyezila'adyi'le nĕto'. Lĕscan' rĕbiyaquĕ' laguedyiyaquĕ' cabĕ' bĕle psanla'adyi'le yaca ídolo quiele, banaole tuzi Diuzi zu guibá, ben' neban tuzioli. ¹⁰ Lĕscan' rĕbiyaquĕ' laguedyiyaquĕ' cabĕ' rbezale yeguida zi'inĕ' Jesús zeza'nĕ' guibá yeguidanĕ' lao yedyi layu tatula. Naquĕ' ben' agati, pero pseban Diuzi lĕbĕ'. Naquĕ' ben' ute usela ra'o ta bigata' castigo quiero dza zaga'ra, dza gaca juicio lao yedyi layu.

2

Ca guca cati uda Pablo ciudad Tesalónica

¹ Banezile, bicha', biuden cana'zi bidando' udixogue'ndo' le'e xti'idza' Diuzi dza na'. ² Lĕscan' nezile cabĕ' bĕ yaca ben' ciudad Filipos len nĕto'. Ptasi bnioyaquĕ' nĕto'. Psacayaquĕ' nĕto' bizinaquezi. Pues ba'ala'cazi psaca yaca ben' na' nĕto' bizinaquezi, ba'ala'cazi guca zĕdi gula, udixogue'ndo' le'e xti'idza' Diuzi du guicho du la'adyi'ndo'. ³ Cala di'idza' huizi' yĕ' udixogue'ndo' le'e. Biudixogue'ndo' le'e xti'idza' Diuzi con ganzi. Nitu nitu biuzi'ndo' le'e yĕ'. ⁴ Ulio Diuzi nĕto' ta udixogue'ndo' le'e di'idza' la'iya quienĕ'. Cala rguilondo' modo ta hue yaca benĕ' nĕto' ben' ze. Rbezando' hue Diuzi nĕto' ben' ze, porque nezi Diuzi cabĕ' naca pensari quiendo'. ⁵ Dyĕ'ĕdi nezile cala di'idza' bibizaca', cala di'idza' huizi' yĕ', udixogue'ndo' le'e dza na'. Dyĕ'ĕdi nezile quele re'enndo' ta de quiele. Naca Diuzi testigo cala yĕ' rzi'a. ⁶ Cala za'ndo' rguilondo' ben' hue nĕto' ben' ze, la'achi le'e, la'achi ben' tula. ⁷ Ba'ala'cazi de yela' rnabĕ' quiendo', como nacando' ben' use'ela' Cristo, bibĕlĕndo' le'e zĕdi bi cosa re'enndo' huele. Ca quie zi'indo' bĕlĕndo' le'e dza na'. Gucalĕndo' le'e ca quie zna'le racialĕnĕ' zi'inĕ'. ⁸ Pues tantozi nadyĕ'ĕndo' le'e, cala udixogue'zindo' le'e di'idza' la'iya quie Diuzi, den' lĕscan' uzundo' dispuesto gatindo' lao lazale chi bi re'en yaca benĕ' hueyaquĕ' quiele. ⁹ Bicha', bigalala'adyi'le cabĕ' bĕndo', bĕndo' dyin du dza, du yĕla, ta bibi gasto huele ta de quiele para nĕto' caora cati udando' udixogue'ndo' le'e xti'idza' Diuzi.

¹⁰ Le'e len Diuzi, nacale testigo quiendo' cabĕ' bĕndo'. Dyĕ'ĕdi nezile cabĕ' bĕndo' lĕndo' le'e dza na'. Bĕndo' tahuen, bĕndo' tali, bĕndo' ta gabi causa gata' quiendo' conĕ' le'e. ¹¹ Lĕscan' nezile cabĕ' unando' le'e di'idza' zela'adyi' cabĕ' rue benĕ' lĕnĕ' zi'inĕ'. ¹² Pues pxi'idze'ndo' le'e de que reya'ala' huele tadya'a como ben' nao xneza Diuzi, porque lĕbĕ' ulionĕ' le'e ta yeyole tzezulĕle lĕbĕ' guibá ga re'nĕ' rnabĕ'nĕ'.

¹³ Quie lena' rulidzando' Diuzi diuxcalelo' nun quie uyĕzila'adyi'le xti'idza' Diuzi udixogue'ndo' le'e dza na'. Gucabĕ'le di'idza' li xti'idza' Diuzi, binacan di'idza' quie benĕ'zi. Pues lĕdi'idza' na' ruxi'idze'n le'e cabĕ' reya'ala' huele tadya'a nun quie dan' nacale ben' nao xneza Jesús. ¹⁴ Bicha', cati rue yaca benĕ' le'e bizinaquezi, bigala'adyi'le lĕscan' gucarĕ quie yaca ben' nao xneza Cristo, yaca ben' nita' yaca yedyi nababa estado Judea. Lĕzi

psaca yaca ben' yedyi quiejë' leyaquë' bizinaquezi. ¹⁵ Lëben' Israel bëtiyaquë' Señor quiero Jesús. Lëzi bëtirëyaquë' yaca ben' bida bedetixogue' leyaquë' xti'idza' Diuzi dza na'te. Pues belaoyaquë' nëto' berondo' yaca yedyi quiejë'. Biraxe Diuzi ca ruejë', dan' ruejë' condre yugulu benë'. ¹⁶ Pues bza'agayaquë' nëto' caora cati gu'unndo' quixogue'ndo' ben' binaca ben' Israel xti'idza' Diuzi, porque bigu'unyaquë' galeyauquë' gata' yela' neban quieyaquë' tuzioli. Quie lena' nayëra xquia quieyaquë'. Quie lena' abdyin hora hue Diuzi lëjë' castigo huala gula.

Gu'un Pablo tzionë' tatula ciudad Tesalónica ta tzeyubinë' yaca ben' nao xneza Jesús

¹⁷ Azio zidza beza'ndo' ciudad quiele. Ba'ala'cazi bira zulëndo' le'e yedyi quiele, biralala'adyi'ndo' le'e. Lega re'enndo' ideyubindo' le'e. ¹⁸ Zë lasa gu'unndo' ideyubindo' le'e hasta agu'unda' guida' cuinza', pero bza'aga xan' taxi'ibi' nëto'. ¹⁹ ¿Bixquien' redaohuendo' zundo' gusto, zundo' contento rbezando' yeguida Jesús? Dan' rue quiele xti'idza' Diuzi nacale ben' nao xneza Jesús, quie lena' redaohuendo' zundo' gusto, zundo' contento rbezando' yeguida Señor quiero Jesucristo. ²⁰ Le'e, sí, dan' naole xneza Jesús, quie lena' redaohuendo' zundo' gusto.

3

¹ Caora bira uzuendo' cuezando' idena'ndo' le'e, bëndo' pensari bega'nndo' rupando' ciudad Atenas, ² na' use'ela'ndo' Timoteo bedeyubinë' le'e. Naca Timoteo ben' rale, ben' racalë nëto' ruendo' dyin quie Diuzi rguixogue'ndo' benë' cabë' bë Cristo, bënë' tahuen quiero. Use'ela' lëbi' ideyubinë' le'e ta inë' le'e di'idza' zela'adyi' ta biidzebile hue quiele xti'idza' Diuzi. ³ Cana' huenë' gacalënë' le'e biyehuëdile inaole xneza Jesús ba'ala'cazi raca zëdi quiele. Dyë'ëdi nezile usacacazi yaca benë' ra'o bizinaquezi. ⁴ Pues caora nita'lëndo' le'e dza na', dyë'ëdi unando' le'e huata' tazëdi quiele. Dyë'ëdi nezile gucan laga con cabë' unando' le'e dza na'. ⁵ Quie lena', caora bira uzuenda' cueza' mazara para inezida' bi raca quiele, caora na' use'ela' Timoteo ta guidë' inezinë' bi raca quiele chi nenaole xneza Jesús. Bdzeba' chi babë xan' taxi'ibi' le'e gan, aozina'na le'e yë', baoden cana'zi dyin quie Diuzi bëndo' entre le'e.

⁶ Na'ra abela' Timoteo niga, zeyu'anë' di'idza' nenaole xneza Jesús, nadyë'ële laguedyile. Lëscana' zeyu'anë' di'idza' reza'la'adyi'le nedyë'ële nëto', re'enle guidale idena'le nëto'. Lëscan' nëto' re'enndo' idena'ndo' le'e. ⁷ Quie lena', bicha', biraquendo' bayëchi' ba'ala'cazi rsaca benë' nëto' bizinaquezi, porque nezindo' le'e birusanla'adyi'le xneza Jesús, nerue quiele xti'idza' Diuzi. Cana' ruxela'adyi'le nëto'. ⁸ Legazi yedaohuendo' nezindo' birdzebile nernaole xneza Jesús. ⁹ Quie lena' rulidzando' Diuzi rëbindo'në' diuxcalelo' tu mila gayuhua lasa. Na'ra por nun quie nenaole neruele quie Diuzi, redaohuetzeguendo'. ¹⁰ Pues du dza, du yela, rulidzando' Diuzi chi bigunnë' lato guidando' idena'ndo' le'e tacuenda usëdindo' le'e ga zu racale falta ta inaorale xneza Jesús dya'ara.

¹¹ Pues siempre rnabando' lao Xuziro Diuzi lënë' Señor quiero Jesucristo ta gacalëyaquë' nëto' guidando' idena'ndo' le'e. ¹² Lëscana' rnabando' lao Diuzi chi bigacalënë' le'e ta idyë'ële mazara ben' bichile, ben' nao xneza Jesús. Lëzi cala tuzi ben' nao xneza Jesús reya'ala' idyë'ële, reya'ala' idyë'ële yugulu benë' como cabë' nadyë'ëndo' le'e. ¹³ Chi huele cana', lena' ulu'en nacale ben' laxta'o yëri, bibi causa gata' quiele lao Xuziro Diuzi dza zeza' Señor quiero Jesús lënë' yaca ben' quienë'.

4

Ni nan cabë' re'en Diuzi huero

¹ Na'ra, bicha', lao Señor quiero Jesucristo, rnabayëchi'ndo' huendo' le'e mandado biusanle huele tadya'a con cabë' baruele, con cabë' psëdindo' le'e tacuenda yedaohue Diuzi cabë' ruele.

² Dyë'ëdi nezile conlë yela' rnabë' quie Señor quiero Jesucristo, nidxogue'ndo' le'e xti'idzë'. ³ Pues re'en Diuzi gacaro ben' laxta'o yëri. Quie lena' nitu nitu nunu reya'ala' gatalënë' nigula tula, nigula binaca zgulë'. Lëscan' yaca nigula bireya'ala' gatalënë' be'mbyu tula. ⁴ Lëscan' tahuen na' chi si'le nigula quiele, pero bihuele bizinaquezi lële nigula quiele. Huelëlenë' tadya'a gapala'nlenë'. ⁵ Bihuele ca rue ben' binezi xti'idza' Diuzi. Rzi'jë' nigula ta usacajë' leyaquë' cabë' rnazin pensari mala quiejë'. ⁶ Bire'en Diuzi si'le bichile yë'. Hue Diuzi castigo quie yaca ben' hue cana' laga como bagudyindo' le'e dza na'. ⁷ Cala ulio Diuzi le'e ta huele tabayatza. Ulioguë' le'e ta gacale ben' laxta'o yëri. ⁸ Nacan dyabë' yele cabë' rmando' le'e. Chi nu le'e biraxele hue quiele cabë' nando' le'e, cala nëto'zi birue quiele, lëscan' lente Diuzi birue quiele. Naca Diuzi ben' rudze' Bichi Be quie' lu'u guicho laxta'oro.

⁹ Na'ra biraoyentica ise'ela'ndo' guichi laole ta inando' le'e cabè' reya'ala' huele idyè'èle ben' bichile, ben' nao xneza Jesús, porque cuin Diuzi abzioñe'enè' le'e bi huelèle ben' bichile. ¹⁰ Cana' banadyè'èle ben' bichile, ben' nao xneza Jesús, ben' nita' yaca yedyi nebaba Macedonia. Pero, bicha', re'enndo' huele mazara, re'enndo' idyè'èleyaquè' dyè'èdi. ¹¹ Reya'ala' tzu'ulèle laguedyile dyè'èdi, bihuelèle laguedyile zèdi. Pues tahuen na' chi huele dyin quiezile como bagudyindo' le'e dza na'. ¹² Chi huele cana', hasta ben' binao xneza Jesús, hualè'èyaquè' le'e ben' dya'a, ni tule bibi idzioguele.

Ni nan cabè' gaca dza yeguida Jesucristo lao yedyi layu

¹³ Bicha', re'enndo' inezile cabè' gaca quie yaca bichiro, ben' nao xneza Jesús, yaca ben' baguti. Reya'ala' inezile tacuenda bigaquele bayèchi' quieyaquè' ca bayèchi' naca quie yaca ben' birbeza yeguida Jesús. ¹⁴ Pues como neziro aguti Jesús beseban Diuzi lèbè', lèscana' reya'ala' ineziro useban Diuzi yaca ben' rale, yaca ben' unao xneza Jesús dza udajè' lao yedyi layu.

¹⁵ Quie lena' rando' le'e con cabè' una Jesús de que ra'o, ben' nenaban, bicuialaoro lao ben' baguti, bicuialaoro laojè' dza yeyoro guibá, dza yeguida Jesús lao yedyi layu. ¹⁶ Cati abdyin dza yeguida Jesucristo za'nè' guibá, caora na' huanè' zidzo yeyèzinè' ben' quienè' ta yedupayaquè' yedyinyaquè' ga zènè' ladza. Lèscan' huanè' tu xan' àngel zidzo rucuedyiné' trompeta quie Diuzi. Hora na', useban Diuzi yaca ben' quienè', yaca ben' baguti, ben' unao xnezè' dza udajè' lao yedyi layu. Huebèyaquè' hueyojè' ga zè Jesús ladza. ¹⁷ Te yedyi na', ra'o, ben' quienè', ben' nenaban, ben' nenita' lao yedyi layu, huebèro yedyinrèro ga bedyin ben' zeyo tanèro, ga re' beo, ga zè Jesús ladza. ¹⁸ Pues cana' tzazulèro Jesucristo tuzioli. Con cabè' baonia' le'e, huelèle ben' bichiro di'idza' zela'adyi'.

5

¹ Na'ra, bicha', biraoyentica ise'ela'ndo' guichi laole ta quixogue'n le'e bi hora, bi dza, yeguida Jesús lao yedyi layu, ² porque banezile dyè'èdi cabè' gaca dza yeguida Jesucristo. Pues caora raque yaca benè' bibi gaca quiejè', caora na' bigacabè'jè', pero tu sasazi idyin dza yeguida Jesús. Pues idyin dza na' tu sasazi ca quie tu sasazi guida ben' uban du rëla du rasi xan' yu'u, raquenè' bibi gaca quienè'. Cana' gaca cati idyin dza yeguida Jesús. ³ Pues caora na' ina yaca benè' cani: "Nita'ro dya'a na', bibi gaca quiero", pues caora na' tu sasazi cuiagui'yaquè'. Gabi cule quieyaquè' de ta bicuiagui'yaquè' caora yeguida Jesús. Laga cana' gaca quieyaquè' ca quie nigula rla abdyin hora su xcuidi' quie, gabi cule de quienè' ta biilanè'. ⁴ Pero le'e, bicha', binacale ben' rda lao lato lao chula. Quie lena' bireya'ala' idzebile dza yeguida Jesucristo cabè' rdzebi ben' uban chi yela' xan' yu'u tu sasazi. ⁵ Pues yugulule nacale ben' rda lao lato lao xni'. Binacaro ben' rda lao lato lao chula. ⁶ Bihuero ca rue ben' rasi, ben' bibi pensari yu'u. Pero ra'o, reya'ala' suro listo, reya'ala' huero pensari. ⁷ Ben' rue gusi, denè' gusi rtze'. Lèscan' ben' rue hue'e, rdanè' hue'e rtze'. ⁸ Pero ra'o, bihuero cana', porque nacaro ben' rda lao lato lao xni'. Bihuero ca quie ben' rasi, bihuero ca quie ben' zudyi. Gaparo cuidado, zudyi'ilèro Diuzi du guicho du la'adyi'ro, idyè'èro laguedyiro, cuezaro dyè'èdi yezi' Jesús ra'o, ⁹ porque cala ulio Diuzi ra'o ta huenè' ra'o castigo dza gaca juicio, pero ulionè' ra'o ta gata' yela' neban quiero tuzioli lao na'a Jesucristo. ¹⁰ Pues lèbè' agutiè' lè'è yaga cruzo para ra'o ta sulèro lèbè' dza yeguidè' para tuzioli, la'achi bagutiro, la'achi nenabanro. ¹¹ Biusanle huelèle ben' bichiro, ben' nao xneza Jesús, di'idza' zela'adyi', tal como baruelèleyaquè' na'a.

Niñyue Pablo yaca ben' nao xneza Jesús

¹² Bicha', rando' le'e gapala'nle nu ben' napa dyin quie Diuzi entre le'e. Lao na'a Señor quiero nñyueyaquè' rna'yaquè' le'e. ¹³ Reya'ala' gapala'nle idyè'èle lèjè' nun quie ruejè' dyin quie Diuzi. Yugulule reya'ala' inita'lèle laguedyile dyè'èdi, bitilalèle laguedyile.

¹⁴ Na'ra, bicha', yèbile yaca ben' huèdi ta huejè' dyin, bira yehuèdijè'. Lèscan' hue'lèle yaca ben' raca bayèchi' quie di'idza' zela'adyi'. Gacalèle yaca ben' binetzioñe'e xti'idza' Diuzi dyè'èdi. Huezela'adyi'le quie lao yugulutejè'.

¹⁵ Gapale cuidado biyeyuele laohue chi rusaca yaca benè' le'e bizinaquezi. Pero inaocazile huele tadya'a lèle yugulu benè', la'acazi entre le'èzi, la'acazi entre yaca los demás ben' nita' lao yedyi layu.

¹⁶ Reya'ala' sule contento yugo dza. ¹⁷ Reya'ala' hue'lèle Diuzi di'idza' yugo dza. ¹⁸ Chi bi raca quiele, reya'ala' yèbile Diuzi diuxcalelo', porque cana' re'en Diuzi huele como nacale ben' nao xneza Cristo Jesús.

¹⁹ Bihuele yeladyi'. Huele cabè' re'en Bichi Be quie Diuzi huele. ²⁰ Biyezè'le di'idza' quie ben' rna lao na'a Bichi Be quie Diuzi. ²¹ Ina'le dyè'èdi bi rue yaca benè', chi nacan dya'a, chi binacan dya'a. Yela' na' ilè'èle huerèle tadya'a. ²² Reya'ala' usebi'le yugulu tamedian.

²³Rulidzando' Diuzi ta huenë' le'e ben' laxta'o yëri. Rulidzando'në' ta gapanë' yela' neban quiele, len bichi be quiele, len alma quiele len cuerpo quiele, yela' na' bibi causa gata' quiele dza yeguida Señor quiero Jesucristo. ²⁴Naca Diuzi ben' ulio le'e. Huecazinë' con cabë' unanë' huenë' quiele.

Udapa Pablo leyaquë' diuzi

²⁵Bicha', hue'lële Diuzi di'idza' por nëto'.

²⁶Ugapale ben' bichiro diuzi, gaole situ xagayaquë'.

²⁷Rua' le'e mandado conlë yela' rnabë' quie Jesucristo ta ulabale guichi ni lao yaca los demás ben' nao xneza Jesús.

²⁸Rulidzando' Señor quiero Jesucristo ta huela'iyänë' le'e. Amén.

GUICHI URUPE BÈ SAN PABLO APÓSTOL USE'ELA'NÈ'N LAO CIUDAD TESALÓNICA

Pablo lènè' compañero quienè' bějè' guichi ni.

¹ Nè'èdi', Pablo, len Silas, len Timoteo, bëndo' guichi ni, use'ela'ndo'n laole ga nita'le ciudad Tesalónica. Nacale tuero len Xuziro Diuzi len Señor quiero Jesucristo. ² Rulidzando' Xuziro Diuzi lènè' Señor quiero Jesucristo ta huela'iyaquè' le'e cuèchyaquè' chizi lu'u guicho laxta'ole.

Hue Diuzi castigo yaca ben' mala dza cati yeguida Cristo

³ Bicha', rulidzando' Diuzi rëbindo'nè' diuxcaleo' por le'e. Tadya'acazi yëbïro Diuzi cana', porque yugo dza zudy'ílèle Diuzi, nedýè'èle laguedyile mazara. ⁴ Quie lena' redaohuendo' ga redupando' yëbindo' yaca los demás bichiro, ben' nao xneza Jesús, cabizi raza quiele, porque ba'ala'cazi rusaca yaca benè' le'e bizinaquezi redzagalaole, pero birdzebile birusanla'adyi'le xneza Jesús. ⁵ Lena' rulu'en ta yu'u ni'a xnezi bē Diuzi pensari bē' ulionè' le'e ta tziolo ga zuè' tu dza zaza'ra. Quie lēzin rusaca benè' le'e bizinaquezi.

⁶ Pues tali na' hue Diuzi castigo yaca ben' psacayaquè' le'e bizinaquezi. ⁷ Lēscan' tali na' dza yeguida Jesucristo hue Diuzi mandado ta iyudyi yedzagalaole tazēdi raza quiele tal como tazēdi raza quiendo'. Dza na' huelè'ëro Jesús zeza'nè' guibá, nu'anè' tu gui' ze, zequie'nè' yaca ángel quienè', ben' rue yela' huaca quienè'. ⁸ Zeza'nè' ta huenè' castigo yugo ben' bibè quie xti'idza' Diuzi, ben' biunao xnezè'. ⁹ Na' castigo hue Diuzi leyaquè' nacan de tzalasazi, bira yeyulan. Huaru'un Diuzi lējè' zitu' ga yega'nyaquè' tuzioli, ga bizu Jesucristo, ben' de yela' huaca quie, ben' de yela' rnabè' quie. ¹⁰ Cati yeguida Jesucristo, caora na' hue yaca ben' quienè' lēbè' ben' ze, gapala'ntzegueyaquè' lēbè'. Lēscan', le'e, huazurèle conlè lēbè', porque bē quiele xti'idza' Diuzi uidxogue'ndo' le'e dza na'.

¹¹ Quie lena' yugo dza ruendo' orar por le'e rulidzando' Diuzi quiero ta ilè'ènè' le'e ben' zaca'cazi ulionè' le'e. Lēscan' rulidzando' Diuzi ta huenè' mandado gaca quiele ca re'ennè' gaca quiele, lēscan' ta gacalènè' le'e ta huele tadya'a ca re'enle huele, lēscan' ta huele dyin quie Diuzi ca re'enle huele. ¹² Chi huele cana', cana' gaca gapala'n yaca benè' Señor quiero Jesucristo. Lēscan' gapala'n Jesucristo le'e conforme yela' ben' huen quie Diuzi lènè' Señor quiero Jesucristo.

2

Huida tu ben' hue contra Cristo

¹⁻² Bicha', quie dza cati zeza' Jesucristo ta utupanè' ra'ò, rnabayèchi'ndo' le'e biutza'le pensari quiele bihue'le lato utèbi yaca benè' le'e, chan' nayaquè' babida Cristo. Bigalele quieyaquè' ba'ala'cazi inajè' Diuzi gudyi lējè' cana'. Bigalele quieyaquè' ba'ala'cazi inayaquè' cana' nan lè'è guichi use'ela'ndo' laole. ³ Pues bihue'le lato si' yaca benè' le'e yè'. Dza yeguidara Cristo, decazide idyin tiempo huadilalè ja ben' nita' lao yedyi layu Diuzi. Caora na' guida tu ben' hue contra Cristo. Pero lēben' na', banezi Diuzi bi huenè' quienè', udyiagui'nè' lēbè'. ⁴ Lēben' na' naquè' enemigo quie Diuzi. Huenè' contra yaca ta rionela'adyi' yaca benè', huenè' contra ta najè' naca diuzi quiejè'. Huanè' rnabè'ranè' ca Diuzi tu guibá. Huayu'unè' tzaque'nè' lu'u yu'u idao' rnabè'ra quie Diuzi ta si'nè' benè' yè' gaqueyaquè' Diuzi naquè'.

⁵ Nezda' rezala'adyi'le con cabè' unia' le'e dza na', dza uzèlia' le'e unia' le'e cabè' gaca dza zaza'ra. ⁶ Dyè'èdi nezile nuquien' ruza'aga ta biguida ben' hue contra Cristo. Decazide guida ben' hue contra Cristo, pero bē' idyin hora cabè' psaquè' Diuzi guidè'. ⁷ Pues baouzulaonè' ruenè' contra Cristo, pero lè'èti'zi. Pero huazulaonè' huenè' mazara caora idyin dza bira zu ben' ruza'aga lēbè'. ⁸ Cana' gaca caora idyin dza guida lēben' mala gula, ben' rue contra Cristo. Pero guti Jesucristo lēbè'. Conlè bezi rero ru'anè' gutinè' ben' na', yeguidanè' nica gacabè'zinè'. Cana' hue Jesucristo dza cati yeguidanè' hualè'è yaca benè' ca naca yela' huaca quienè'. ⁹ Mandado hue xan' taxi'ibi' Satanás guida ben' hue contra Cristo. Bade yela' huaca quien ta ulu'en benè' ta yebaneyaquè', pero bē' huezin na' ta si'zin benè' yè'. ¹⁰ Tamala gula huen ta si'n benè' yè', yaca ben' bire'en inao xneza Jesús, yaca ben' bire'en gata' yela' neban quie tuzioli. ¹¹ Quie lena' usanla'adyi' Diuzi leyaquè' tacuenda si' ben' na' lējè' yè'. Lena' galeyayquè' ta binaca tali. ¹² Hue Diuzi lējè' castigo, dan' bibè quieyaquè' di'idza' quienè', yaxerayaquè' inaoyaquè' hueyaquè' tamala quiejè'.

Aolio Diuzi yaca ben' gaca yèri laxta'ohue

¹³ Rulidzando' Diuzi diuxcalelo' por le'e, bicha', ben' nedyë'ëndo'. Rulidzando' Diuzi diuxcalelo', dan' zagata'ra yedyi layu, ulio Diuzi le'e ta gacale ben' nêro, ben' gata' yela' neban quie tuzioli lao na'a Bichi Be quienë' lënë' xti'idza'në' ta barue quiele. ¹⁴ Quie lena' ulio Diuzi le'e por nun quie xti'idzë' udixogue'ndo' le'e ta gaca tu parte quiele quie yela' huaca quie Jesucristo, ben' naca Señor quiero.

¹⁵ Bicha', bigala'adyi'le ca ta psëdindo' le'e, la'achi di'idza' bël'ëndo' le'e, la'achi di'idza' bzundo' lë'ë guichi use'ela'ndo'n laole. ¹⁶⁻¹⁷ Naca Señor quiero Jesucristo lënë' Xuziro Diuzi ben' huen gula, nedyë'ëyaquë' ra'o, racalëyaquë' ra'o tuzioli. Por nun quieyaquë' naca huen quiero rbezaro dza yeguida Jesucristo. Rulidzando'yaquë' por le'e ta xela'adyi'yaquë' le'e, lëscan' ta gapayaquë' le'e dyë'ëdi, na' biusanle xneza Diuzi inaole huele puro tadya'a.

3

Re'en Pablo ulidzayaquë' Diuzi por lëbë' lënë' compañero quienë'

¹ Na'ra, bicha' ulidzale Diuzi por nêto' tacuenda idyin xti'idza' Diuzi yedu yedyi layu, hue yaca benë' quieyaquen cabë' ruele le'e, barue quiele xti'idza' Diuzi. ² Lëscan' ulidzale Diuzi por nêto' tacuenda te ilando' bigaca quiendo' cabë' re'en yaca ben' mala, ben' re'en usaca nêto' bizinaquezi, porque siempre nita' ben' binao xneza Jesús. ³ Biusanla'adyi' Diuzi le'e. Rapanë' le'e dyë'ëdi. Ucuasa ucui'onë' le'e bi tamala za' gaca quiele le'e. ⁴ Barzela'adyi'ndo' inaole ruele cabë' psëdindo' le'e biusanla'adyi'lëna. ⁵ Rulidzando' Diuzi ta gacalënë' le'e ta idyë'ële Diuzi ca nadyë'ënë' le'e, lëscan' ta gacale ben' zela'adyi' cabë' ben' zela'adyi' naca Cristo.

Reya'ala' huero dyin yuguluro

⁶ Na'ra, bicha', lao na'a Señor quiero Jesucristo, rnando' le'e chi zu ben' nao xneza Jesús, pero bire'ennë' huenë' dyin, ulesan quienë' bira huele lëbë' tzaze. ⁷⁻⁸ Dyë'ëdi nezile cabë' bëndo' dza uzulëndo' le'e. Cala ure'zindo' conlë le'e, cala unabando' ta gaondo' cana'zi, den' udižondo' quie ta udaondo'. Dyin huala bëndo' yugo dza ta hue'endo' ta udaondo' ta bibi gasto bële. ⁹ Ba'ala'cazi napando' derecho inabando' ugaole nêto', pero biunabando'n. Cana' blu'endo' le'e cabë' reya'ala' huele. ¹⁰ Nu ben' bire'en hue dyin, bihue'le laze ta gaonë'. Cana' psëdindo' le'e caora uzulëndo' le'e dza na'. ¹¹ Banezindo' balale bire'enle huele dyin, na' rdazile pasiale yugo dza ru'elële laguedyile di'idza' bižu, bireyula'adyi'le huele dyin. ¹² Quie leyaquë' ruendo' mandado ta huejë' dyin ta biidzioguejë' ta gaojë', lëscan' ta bira huejë' laguedyijë' zëdi inabajë' lëjë' ta gaojë'. Lao na'a Señor quiero Jesucristo ruendo' le'e mandado de que reya'ala' hue yaca benë' dyin ta gata' ta gaojë'.

¹³ Bicha', biyehuedile huele tadya'a. ¹⁴ Chi nita' ben' bichiro, ben' birue quie cabë' na di'idza' dyia lë'ë guichi niga, ina'le dyë'ëdi nu yaca ben' rue yaca cana'. Ulesan quieyaquë' tacuenda gata' yela' stu' quieyaquë'. ¹⁵ Biudze'la'adyi'le leyaquë', den' inëyuele quiejë' como ca bichiro.

Ni beyudyi di'idza' use'ela' Pablo lao yaca ben' nita' ciudad Tesalónica

¹⁶ Rulidzando' Señor quiero ta cuëchinë' chizi lu'u guicho laxta'ole con bitezi gaca quiele con gatezi tzirole yugulule.

¹⁷ Në'ëdi', Pablo, rugapa' le'e diuzi lë'ë guichi niga. Conlë na'a rua' letra con ga iyudyi carta niga tacuenda inezile tali carta quia' na'. Cana' rua' yugo carta quia'. ¹⁸ Rulidzando' Diuzi por le'e ta huela'iya Señor quiero Jesucristo yugulule. Amén.

GUICHI NĒRO BĒ SAN PABLO APÓSTOL USE'ELA'NĒ'N LAO TIMOTEO

Use'ela' Pablo guichi ni lao Timoteo

¹ NĒ'ēdi', Pablo, naca' apóstol quie Jesucristo. Use'ela' Diuzi lĕnĕ' Señor quiero Jesucristo nĒ'ēdi'. Naca Diuzi ben' ute usela ra'ò. Lĕscana' naca Jesucristo ben' rbezaro yeguida idezi' ra'ò. ² Timoteo, bia' guichi niga pse'ela'n laolo' nun quie naco' ca zi'ina', ben' naorĕ xneza Jesucristo. Rulidza' Xuziuro Diuzi lĕnĕ' Señor quiero Jesucristo ta huela'iyaquĕ' luĕ', yeyĕchi'la'adyi'yaquĕ' luĕ', cuĕchiyaquĕ' chizi laxta'òlo'.

Rnĕ Pablo quie yaca ben' rusĕdi ta binaca tali

³ Como cabĕ' agudya' luĕ' dza beza' uya'a yaca yedyi nebaba Macedonia, re'enda' yega'nlo' ciudad Eŕeso ta huegadyo' nu ben' rusĕdi ta binaca tali ta usanjĕ' bira huejĕ' cana'. ⁴ Re'enda' yĕbo'yaquĕ' ta bihuejĕ' tazĕdi quie cuento historia quie xuzixta'oyaquĕ' cabĕ' guca quieyaquĕ'. Por nun quie tazĕdi na', huata' huenĕ quieyaquĕ', bibi cule de huen quieyaquĕ' ta hue quieyaquĕ' xti'idza' Diuzi galeyacuĕ' quien.

⁵ Ca ta reya'ala' huero, reya'ala' idyĕ'ĕro laguedyiro como ca ben' laxta'ò yĕri, como ca ben' baoyu'u gracia, como ca ben' nao xneza Jesús du guicho du la'adyi'. ⁶ Pero nita' bala yaca benĕ' birueyaquĕ' bala. Biyu'uyaquĕ' gracia, baoniti pensari quieyaquĕ', rnĕjĕ' puro di'idza' bibi zaca'. ⁷ Re'enyacuĕ' gacayaquĕ' ca ben' rusĕdi guichi ley quie Diuzi, pero nica neziyaquĕ' con cabĕ' rnan lĕ'ĕna nica neziyaquĕ' bidan' rusĕdiyaquĕ'.

⁸ Neziro guichi ley quie Diuzi na' nacan dya'a chi inaoron segun re'en Diuzi inaoron. ⁹ Bigala'adyo' biudixu Diuzi ley quienĕ' para yaca ben' bibi tamedian nueja. Pero udixo Diuzi ley quienĕ' tacuenda gata' castigo quie yaca ben' mala, ben' bire'en gale xti'idzĕ', ben' rue contra lĕbĕ', ben' de dula' xquia quie, ben' guti xuzi žnĕ'ĕ, ben' guti nutezi benĕ', ¹⁰ lente ben' rasilĕ nigula binaca žgule, lente ben' rasilĕ laguedyi byunĕ' ca nigula, lente ben' rban benĕ', lente ben' huizi' yĕ', lente ben' rgunte Diuzi de huizi' yĕ'. Quie lena' udixo Diuzi guichi ley na' tacuenda gata' castigo quie yugulu ben' birue quiejĕ' quie ta naca tali quie Diuzi. ¹¹ Na'ra ta naca tali quie Diuzi rdzelan lĕ'ĕ guichi la'iya quienĕ' ga rguixogue'n ca ruenĕ' gunnĕ' yela' neban quiero tuzioli. Lĕdi'idza' quienĕ' na' bdĕ' Diuzi nĒ'ēdi' ta quixogui'a yaca benĕ'.

Redaohue Pablo beyĕchi'la'adyi' Diuzi lĕbĕ'

¹² Rĕpa' Señor quiero Jesucristo diuxcalelo' nun quie rlĕ'ĕnĕ' nĒ'ēdi' ben' rale rue ca mandado re'ennĕ' hua', uda'nĕ' bĕnnĕ' nĒ'ēdi' fuerza valor ta hua' ca dyin re'ennĕ' hua'. ¹³ Pero dza na'te ptasi bnioga' Jesucristo, udilalia' yaca ben' quienĕ', psacayaquĕ' bizinaquezi. Ba'ala'cazi bia' cana', beyĕchi'la'adyi' Diuzi nĒ'ēdi', porque binezda' bin bia', binenaohua' xneza Jesús caora na'. ¹⁴ Cana' taže gula beyĕchi'la'adyi' Señor quiero nĒ'ēdi'. Cana' bĕnĕ' quia' ta inaohua' xneza Jesucristo, ta idyĕ'ĕda' benĕ' ca nadyĕ'ĕ yaca ben' nao xneza Jesús yaca benĕ'.

¹⁵ Nacan tabala bida Cristo Jesús lao yedyi layu ta ute uselanĕ' yaca ben' de dula' xquia quie ta gata' yela' neban quieyaquĕ' tuzioli. Na'ra lĕscan' nĒ'ēdi', de dula' xquia že quia' dza na', ¹⁶ pero beyĕchi'la'adyi' Diuzi nĒ'ēdi' tacuenda ulu'en naca Cristo Jesús ben' zela'adyi'. Ca guca quia' nacan tu ejemplo para yaca ben' huanao xneza Jesús dza zaza'ra gata' yela' neban quieyaquĕ' tuzioli. ¹⁷ Cana' tuzioli reya'ala' gapala'nro Diuzi, ben' zu tuzioli, ben' neban tuzioli, ben' biilĕ'ĕro. Tuzi lĕbĕ' naquĕ' Diuzi, ganura Diuzi zu. Amĕn.

¹⁸ Timoteo, raqueda' luĕ' ca zi'ina', rnĕ' luĕ' huelo' dyin quie Diuzi du guicho du la'adyo', bĕ quio' xti'idza' Diuzi, bĕ quio' quie pensari bdze' Diuzi lu'u guicho' con ca una yaca ben' bĕ quie xti'idza' Diuzi dza na'. Lao na'a Diuzi unayaquĕ' cabĕ' reya'ala' huelo'. ¹⁹ Na'ra nita' yaca benĕ' bibĕ' quiejĕ' quie pensari bdze' Diuzi lu'u guichoyaquĕ'. Quie lena' aodyiaguĕ' pensari quieyaquĕ' psanla'adyi'yaquĕ' xneza Jesús. ²⁰ Cana' guca quie Himeneo len Alejandro. Pero babebioga' lĕjĕ', banacayaquĕ' cuenda quie xan' taxi'ibi' Satanás tacuenda ineziyaquĕ' bireya'ala' utasi unioyaquĕ' Diuzi.

2

Rnĕ Pablo cabĕ' reya'ala' hue'lĕro Diuzi di'idza'

¹ Ta nacaran belao rnĕ' luĕ', reya'ala' hue'lĕle Diuzi di'idza' por yugulu benĕ'. Reya'ala' inabo' Diuzi gunnĕ' ta rdzioguelo'. Reya'ala' inabo' Diuzi chi bigacalĕnĕ' yaca ben' raca zĕdi quie. Reya'ala' yĕbo'nĕ' diuxcalelo'. ² Hue'lĕle Diuzi di'idza' por yaca ben' naca gobierno, lente yugulu ben' napa dyin tacuenda gaca huen quiero suro chizi, bibi zĕdi gata' quiero.

Cana' inita'ro dya'a tzionla'adyi'ro Diuzi, gapala'n benè' ra'o. ³ Tahuen na' huero cana'. Lena' huetzaxe Diuzi, ben' run benè' yela' neban tuzioli. ⁴ Re'en Diuzi gata' yela' neban tuzioli quie yugulu benè'. Lèzi re'en Diuzi inezi yugu benè' di'idza' la'iya quienè'. ⁵ Tuzi Diuzi naca, ganura diuzi zu. Lèzi tuzi Jesucristo naquè' ben' nuelè' ra'o tuže conlè Diuzi, ganura ben' tula zu. ⁶ Lèbè' psedyinnè' cuinnè' lao na'a yaca benè' bëti lèbè'. Cana' guca guti Jesucristo lao laza yugulu benè', udižuguè' quie dula' xquia quieyaquè' ta gata' yela' neban tuzioli quie yaca benè' conforme con ca una Diuzi tiempote. ⁷ Lena' ulio Diuzi nè'èdi' naca' apóstol use'ela' Diuzi nè'èdi' ta quixogui'a ben' binaca ben' Israel xti'idza'nè', lèscan' ta usèdia'yaquè' inaoyaquè' xneza Jesús, na' hue quieyaquè' di'idza' li quie Diuzi. Tali rnia', cala yè' rzi'a.

⁸ Cana' re'enda', re'enda' hue'lè yaca benè' Diuzi di'idza', ben' baneyèri laxta'ohue con gatezi zuyaquè'. Bireya'ala' idza'jè' tilalèyaquè' laguedyijè'. ⁹ Lèscan' re'enda' gaco yaca nigula la'ari' sencilla ta binaca beya beza' adorno. Tahuen na' uzutza'oyaquè' cuinyaquè', pero cala conlè la'ari' tza'o', ni oro, ni yo tza'o', nica upa'ayaquè' guichoyaquè' taže. ¹⁰ Reya'ala' hueyaquè' tadya'a como ca rue yaca nigula naca la'iya, yaca nigula nao xneza Jesús. ¹¹ Reya'ala' cue' yaca nigula chizi uzènagayaquè' dyè'èdi' caora rusèdi benè' leyaquè'. ¹² Bihua' lato usèdi yaca nigula benè' ga redupa yaca ben' nao xneza Jesús. Lèscan' bihua' lato inabè' nigula yaca be'mbyu. Reya'ala' inita' yaca nigula chizi, ¹³ porque bzalo Diuzi Adán primero, na'tera bzaloguè' Eva. ¹⁴ Quele Adán uzi' xan' taxi'ibi' yè', den' nigula quielanè' uzi' xan' taxi'ibi' yè' bènè' dula' xquia. ¹⁵ Huela'iya Diuzi yaca nigula chi usegulyaquè' zi'iyaquè' dyè'èdi. Lèscan' huela'iya Diuzi leyaquè', chi yu'uyaquè' pensari huen, chi biusanyaquè' inaoyaquè' xneza Jesús, chi idyè'èyaquè' laguedyiyaquè', chi nayèri laxta'oyaquè' lao Diuzi.

3

Rnè Pablo cabè' reya'ala' hue yaca ben' napa dyin quie Diuzi

¹ Nacan tali ca rnia'. Chi nu ben' re'en gapa dyin quie Diuzi rapanè' yaca ben' nao xneza Jesús, na'ra dyin dya'a na' re'ennè' huenè'. ² Nu ben' napa dyin cana', reya'ala' gaca quienè' tantozi rdanè' lao benè' dyè'èdi gula, nitu nitu gao lèbè' xquia. Reya'ala' sulènè' tuzi nigula quienè'. Bireya'ala' huenè' ta rnazin quienè'. Reya'ala' tzu'unè' pensari huen, reya'ala' huenè' bala'ana. Reya'ala' gapachi'nè' ben' rdyin zan yu'u quienè' dyè'èdi. Reya'ala' nezinè' usèdinè' benè'. ³ Bireya'ala' xudyinè'. Bireya'ala' quilonè' dila. Bireya'ala' sa'la'adyi'nè' dumi. Reya'ala' gacalènè' yaca benè'. Reya'ala' tzu'ulènè' laguedyiné' dya'a. ⁴ Reya'ala' usèdinè' ben' nita' zan yu'u quienè' dyè'èdi. Reya'ala' gale zi'inè' quienè'. Reya'ala' gapala'n zi'inè' yaca benè'. ⁵ Chi biracanè' usèdinè' yaca ben' nita' zan yu'u quienè', lena' ulu'en quienè' bigacanè' usèdinè' yaca ben' nao xneza Jesús. ⁶ Lèscana' nu ben' zaozulao inao xneza Jesús, bireya'ala' gapanè' dyin quie Diuzi, porque chan' iyaquè' yežè'nè' laguedyiné', na' huen žudyi gata' castigo quienè' ca castigo guta' quie xan' taxi'ibi'. ⁷ Lèscan' yaca ben' binao xneza Jesús, reya'ala' ilè'èyaquè' lèbè' ben' huen, porque chi biilè'èyaquè' lèbè' ben' huen, huanè'yaquè' quienè', huata' huedila huenè, huen žudyi hue xan' taxi'ibi' gan uza'agan dyin quie Diuzi.

Rnè Pablo cabè' reya'ala' hue yaca ben' racalè yaca ben' nao xneza Jesús

⁸ Lèscan' nu yaca ben' racalè ben' nao xneza Jesús, reya'ala' tajè' gapajè' bala'ana. Bireya'ala' huejè' di'idza' chopa ru'a. Bireya'ala' xudyiyaquè'. Bireya'ala' sa'la'adyi'yaquè' dumi. ⁹ Reya'ala' tzu'uyaquè' pensari dya'a. Reya'ala' galeyacuè' du guicho du la'adyi'yaquè' quie ta naca tali quie Diuzi pca'nnè' lao na'aro. ¹⁰ Pero zareya'ala' ina'le dyè'èdi quieyaquè', chi lagazu rquixiyaquè', na'ra huazaque' gacayaquè' ben' racalè ben' nao xneza Jesús. ¹¹ Lèscan' nigula quieyaquè', reya'ala' tajè' gapajè' bala'ana. Bireya'ala' hue'lèyaquè' yaca benè' di'idza' bižu. Reya'ala' tzu'uyaquè' pensari huen. Lèscan' biti'tezi dyin napayaquè', reya'ala' hueyaquè'n du guicho du la'adyi'yaquè'. ¹² Nu ben' racalè yaca ben' quie Jesús, reya'ala' sulènè' tuzi nigula quienè'. Reya'ala' gale zi'inè' quienè' dyè'èdi lente yaca los demás familia quienè'. ¹³ Chi ruenè' dya'a ca dyin napè', huapala'n yaca benè' lèbè', gacaranè' mazara yexi'idze'nè' yaca benè', dan' zionè' naonè' xneza Cristo Jesús.

Rnè Pablo quie ta naca tali quie Diuzi

¹⁴ Re'enda' laguidatia' ideyuba' luè', ¹⁵ pero chan' bisaque' guidatia', rua' guichi ni ta inezilo' cabè' reya'ala' hue yaca ben' nao xneza Jesús. Yugulu ben' nao xneza Jesús nacayaquè' ca quie tu cue' benè'. Nacayaquè' familia quie Diuzi, ben' neban tuzioli. Leyaquè' quixogue'yaquè' hueyaquè' defender ta naca tali quie Diuzi. ¹⁶ Dula'adyi'ro naca xti'idza' Diuzi di'idza' binezi yaca benè', di'idza' yebantzegueyaquè'. Lèdi'idza' na' rnèn caniga:

Golo Jesucristo lao yedyi layu cabè' ralo benè'.
 Blè'è yaca benè' lèbè'.
 Udixogue' Bichi Be quie Diuzi unè' bibi dula' xquia de quienè'.
 Una' yaca ángel lèbè'.
 Udixogue' benè' xti'idza'nè' lao yedyi layu.
 Unao yaca ben' nita' lao yedyi layu xnezè'.
 Bezi' Diuzi lèbè' guibá ga naquè' ben' r nabè' lao yugulute.
 Cana' rnèn lè'è guichi la'ya quie Diuzi.

4

Rnè Pablo quie ben' bira hue bala quie xneza Jesús

¹ Dyè'edicazi unè Bichi Be quie Diuzi huadyin dza bira hue yaca benè' bala quie xneza Jesús. Galeyaquè' quie yaca bichi be xi'ibi' caora cati si'yacan lèjè' yè', na' yèbiyacan lèjè' di'idza' huizi' yè'. ² Lèscana' hue quieyaquè' di'idza' cabè' di'idza' ina yaca ben' huizi' yè', yaca ben' ru'elè Diuzi di'idza' ladzazi. Yaca ben' na', bibi bayèchi' raqueyaquè' dan' rueyaquè' tamedian. ³ Huanayaquè' binacan dya'a utzagana' yaca benè'. Lèscan' huanayaquè' binacan dya'a gao benè' bè'èla'. Cana' inayaquè' la'acazi Diuzi biunè' cana'. Bè Diuzi yela' huao ta gao yaca ben' quienè', ben' tzioñe'e di'idza' li quienè'. ⁴ Yugulu ta bè Diuzi ta gaoro, nacan huen gaoron. Reya'ala' gaoro ta de, bireya'ala' inaro bigaoro ta de. Reya'ala' yèbiro Diuzi diuxcalelo' na' gaoron. ⁵ Porque cati rëbiro Diuzi diuxcalelo', na' ruela'ya Diuzi ta raoro, hora na' nacan huen gaoron.

Rnè Pablo cabè' reya'ala' hue yaca ben' rue dyin quie Jesucristo

⁶ Chi usèdio' yaca bichiro, ben' nao xneza Jesús, cabè' rnia' ni, chi uzioñe'elo'yaquè' xti'idza' Diuzi, chi usèdio'yaquè' inoayaquè' xneza Jesús con cabè' ruelo' rnaolo' xnezè', cana' naco' ben' huen, ben' rue dyin quie Jesucristo. ⁷ Bigalelo' quie yaca cuento rnèzi benè' de pensari tondozi. Du guicho du la'adyo' gaco' ben' rionla'adyi' Diuzi. ⁸ Huacalèn ra'o huero ejercicio, pero huacalèn ra'o mazara chi du guicho du la'adyi'ro gacaro ben' rionla'adyi' Diuzi. Chi huero cana', lena' gacalen ra'o dza rdaro lao yedyi layu lente dza sulèro Diuzi guibá. ⁹ Nacan tali ca rnia' niga. Reya'ala' gale yugulu benè' cabè' nia' niga. ¹⁰ Quie lena' ruero dyin quie Diuzi yugu dza. Quie lena' redzagalaoro rutasi runio yaca benè' ra'o. Pero sudyi'ilèro Diuzi, ben' naban tuzioli. Naca Diuzi ben' ute usela yaca ben' nita' lao yedyi layu ta gata' yela' neban quieyaquè' tuzioli. Bapte psela Diuzi ra'o, ben' nao xneza Jesús, baguta' yela' neban quiero tuzioli.

¹¹ Cabè' nia' niga, lena' reya'ala' usèdio' yaca benè' huelo'jè' mandado huejè'. ¹² Bihuelo' lato uzè' yaca benè' luè' dan' binetze iza quio'. Nacalan huen gaco' tu ejemplo para yaca los demás ben' nao xneza Jesús. Cana' reya'ala' hue'lao' benè' di'idza' dya'a. Reya'ala' inita'lao' yaca benè' dya'a. Reya'ala' idyè'èlo' laguedyo'. Reya'ala' hue quio' xti'idza' Diuzi du guicho du la'adyo'. Reya'alo' huelo' puro tahuen. ¹³ Tu raca guida' quio', ulabo' di'idza' la'ya quie Diuzi lao yaca los demás ben' nao xneza Jesús ga redupayaquè'. Hue'lao'yaquè' di'idza' zela'adyi', uzioñe'elo'yaquè' xti'idza' Diuzi. ¹⁴ Bigalala'adyo' huelo' según ca ta banegunne Diuzi luè' caora cati du yu'ulo' Bichi Be quie Diuzi, na'ayaquè' guicholo' dza na'.

¹⁵ Gapo' cuidado huelo' cabè' baonia' luè' cuenda ilè'è yaca benè' aracaralo' mazara usèdio' benè' xti'idza' Diuzi cabè' rnèn. ¹⁶ Gapo' cuidado tuzi ca pensari quie Diuzi huelo'. Lèscana' gapo' cuidado tuzi ca di'idza' quie Diuzi usèdio' benè'. Lena' huelo' tzutzu. Chi huelo' cana', huela'ya Diuzi luè'. Lèscan' huela'ya Diuzi yaca ben' ruzè'naga quio' cabè' usèdio'jè'.

5

Ni nan cabè' reya'ala' hue Timoteo len yaca los demás ben' nao xneza Jesús

¹ Timoteo, bitilalèlo' yaca ben' gula. Huenla hue'lao'yaquè' di'idza' dya'a cabè' di'idza' ru'elèro xuziro. Lèscana' yaca bi'byu cuidi', reya'ala' hue'lao'yacabi' di'idza' dya'a cabè' di'idza' ru'elèro bichiro. ² Lèscana' yaca nigula huaca, reya'ala' hue'lao'yaquè' di'idza' dya'a cabè' di'idza' ru'elèro zna'ro. Lèscana' yaca nigula cuidi', reya'ala' hue'lao'yacabi' di'idza' dya'a cabè' di'idza' ru'elèro zanro. Reya'ala' tzu'ulao'jabi' dya'a.

³ Reya'ala' gacalèlo' yaca nigula aguti xquiuhue, nigula abide quie. ⁴ Pero chi nita' zi'ijè', o chi nita' zi'isubajè', lèjabi' naca cuenda quiejabi' gacalèjabi' leyaquè' como apsegulè' leyacabi'. Chi hueyacabi' cabè' nia', na' hueyula'adyi' Diuzi cabè' rueyacabi'. ⁵ Pero ben' nati xquiuhue, ben' ganu familia quiè' nita', tali naquè' ben' tu litza'. Lèbè' sí, reya'ala' sunè' rbezanè' gacalè Diuzi lèbè'. Reya'ala' ulidzanè' Diuzi yugu dza, yugu yela. ⁶ Na' quie tu nigula nati xquiuhue, chi ruenè' ta rnazin quienè', naca quienè' lao Diuzi ca quie ben' anati, dan' bira rue quienè' xti'idza' Diuzi. ⁷ Ruen dyabè' yèbo'jè' cabè' nia' ni cuenda bibi causa

gata' quieyaquë'. ⁸ Chi nita' nu ben' nao xneza Jesús, pero bire'ennë' gacalënë' ben' naca diadza quienë', chi bire'ennë' gapanë' familia quienë', lena' nacan mala. Nacarë' mazara ben' mala cabë' ben' birue quie xti'idza' Diuzi.

⁹⁻¹⁰Reya'ala' huelo' tu lista quie yaca ben' aguti xquiuhue. Pero nia' luë' biuzulo' lao yaca ben' binesu tzona galo iza. Lëscan' biuzulo' laojë' chi birilë' yaca benë' leyaquë' dya'a. Reya'ala' uzulo' laojë' chi uzulëjë' tuzi xquiujë', chi psegulajë' zi'ijë' dyë'ëdi, chi gapachi'jë' dya'a ben' rdyin zan yu'u quieyaquë', chi racalëjë' du guichi du la'adyi'jë' ben' nao xneza Jesús, chi reyëchi'la'adyi'në' ben' redzagalao. Chi bëjë' cana', bëjë' tadya'a. Reya'ala' uzulo' laoyaquë' lao lista.

¹¹Biuzulo' lao yaca ben' binetze iza quie, porque ruen zudyi inan quieyaquë' yezi'yaquë' ben' tula, caora na' ruen zudyi usanla'adyi'jë' xneza Cristo ta yezulëyaquë' be'mbyu tatula. ¹²Cana' gata' causa quieyaquë', porque bibzujë' di'idza' cabë' unajë' huejë', huejë' puro dyin quie Diuzi. ¹³Ruen zudyi tayaquë' tu yu'u tu yu'u quie benë', dan' gabi dyin ruejë'. Ruen zudyi tayaquë' hue'yaquë' di'idza' bižu bi raza quie yaca benë' ta bireya'ala' hue'yaquë'. ¹⁴Quie lena' nia' huenla yezi' nigula nenaca cuidi', ben' baguti xquiuhue, be'mbyu tula. Huenla su xcuidi' quieyaquë' cuenda gacajë' ben' familia gapajë' xcuidi'. Cana' bibi causa gata' quieyaquë' lao na'a enemigo quiero. ¹⁵Pero bala yaca nigula, ben' nati xquiuhue, apsanla'adyi'yaquë' xneza Jesús, banaoyaquë' xneza xan' taxi'ibi' Satanás.

¹⁶Yaca ben' nao xneza Jesús, reya'ala' gacalëyaquë' yaca nigula, ben' nati xquiuhue, ben' tali bazu cuinze. Quie lena', chi nita' yaca nigula, ben' nati xquiuhue, pero nenita' familia quieyaquë', reya'ala' gacalë familia quieyaquë' leyaquë'. Binacan cuenda quie ben' nao xneza Jesús gapajë' lëjë' chi nenita' familia quieyaquë'. Pero nacan cuenda quie ben' nao xneza Jesús ta gacalëjë' ja nigula tali bazu cuinze.

¹⁷Yaca ben' napa dyin quie Diuzi, chi rueyaquë' quie dyin napajë' du guicho du la'adyi'jë', reya'ala' hue yaca ben' nao xneza Jesús leyaquë' bala'ana. Lëscan' nacan belao hueyaquë' ben' rguixogue' xti'idza' Diuzi bala'ana. ¹⁸Cani na lë'ë guichi la'ya quie Diuzi: "Bireya'ala' udze'ro du ru'a bëdyihuaga caora rdaba' rutzutu rulioba' bdyigo' quie trigo ta iro bini quien. Pero dan' rueba' dyin, reya'ala' hue'roba' lato gaoba' tu rdaba' hueba' dyin." Lëscan' narë guichi la'ya quie Diuzi de ga tula: "Ben' rue dyin, napë' derecho si'në' xlažugë'."

¹⁹Timoteo, bigalelo' quie yaca ben' rao ben' napa dyin quie Diuzi xquia, chi binita' chopa tzona ben' naca testigo. ²⁰Chi nita' ben' napa dyin quie Diuzi, pero birusanyaquë' huejë' dula' xquia, reya'ala' tilalao'yaquë' delante lao yaca los demás ben' nao xneza Jesús cuenda idzebijë' bihuejë' dula' xquia. ²¹Rnabi'a luë' lao Diuzi len lao Jesucristo, len lao yaca ángel quienë' ta uzulo' di'idza' huelo' cabë' nia' ni. Tuzi ca huelo', huelo' mandado gale yaca ben' nao xneza Jesús cabë' nia' ni. ²²Reya'ala' yeni'lo' dyë'ëdi nu ben' udë'lo', ben' gapa dyin quie Diuzi, porque ruen zudyi gata' dula' quio' chi hue ben' bdë'lo' bizinaquezi. Pero luë', nia', puro tadya'a huelo'.

²³Lëscan' como racatzegue lë'ëlo', reya'ala' yo'olo' ledao' vino tacuenda yeyaca lë'ëlo'. Bira yo'olo' puro nisa.

²⁴Quie bala ben' rue xquia, ulu'elaonan luegozi zagaca juicio quieyaquë'. Pero quie ibala ben' rue xquia, biulu'elaonan luegozi sino que bë' gacara juicio. ²⁵Lëscan' quie yaca ben' rue tadya'a, ulu'elaonan luegozi. Pero chi biulu'elaonan luegozi, bitzënan ulu'elaonan.

6

¹Quie nu yaca ben' nao xneza Jesús, chi ben' nada'o nacayaquë', na' reya'ala' gapala'nyaquë' xa'nyaquë' dyë'ëdi cuenda bigata' causa quiejë' biinë' xa'nyaquë' condre Diuzi len condre xti'idza'në' ca ta rguixogue'ro benë'. ²Lëscan' chi nacarë xa'nyaquë' ben' nao xneza Jesús, reya'ala' gapayaquë' xa'nyaquë' bala'ana dyë'ëdi gula como dan' nacarë xa'nyaquë' ben' nao xneza Jesús. Pues mazara reya'ala' gapayaquë' leyaquë' bala'ana, porque nacayaquë' ben' rale, ben' bichiro, ben' nedyë'ëro.

Gaparo cuidado bisa'la'adyi'ro dumi

³Ca di'idza' nia' ni, lena' re'enda' rguixogue'lo' yaca benë' huelo' mandado galeyacuë' quien. Chi rguixogue' nu ben' di'idza' falso, di'idza' ta binaca lëbi ca di'idza' una Señor quiero Jesucristo lente con cabë' rna xti'idza' Diuzi rnaoro, quie lena' rulu'en ⁴nacayaquë' benë' zë' bineziyaquë' bi rnëyaquë'. Tanto ru'uyaquë' huedila huenë, raza quieyaquë' ca quie ben' raza žhue'. Lena' za'n ruen quiejë' yela' zë'la. Lena' za'n ruen quieyaquë' yela' utasi unio laguedyi. Pues delaohue raza quiejë' si'jë' yë'. ⁵Yaca ben' rue cana', bire'enyacuë' yeyudyi huedila huenë, abžino pensari quieyaquë'. Bineziyaquë' ca naca tali quie Diuzi. Raqueyaquë' chi xneza Jesús naoyaquë', hueyaquë' gan dumi že. Nu yaca ben' rue cana', bitzu'ulao'jë' tuže. ⁶Pues tali na' chi naoro xneza Jesús huero gan suro

contento. ⁷ Pues bibi nu'aro dza goloro lao yedyi layu. Lëscana' quele hueyu'aro bi cosa bē' gatiro. ⁸ Quie lena' con chi rde rlaro quie ta gaoro, con chi rde rlaro quie žabaro, conlë lëzin reya'ala' zuro gusto. ⁹ Pero nita' yaca ben' rza'la'adyi' dumi. Rueyaquë' bitezi ta idzeleyaquë' dumi, ba'ala'cazi huenan bizinaquezi quieyaquë'. Yela' rza'la'adyi' dumi quieyaquë', rudyaguï'yaquë' cuinyaquë'. ¹⁰ Binacan huen sa'la'adyi'ro dumi. Por nun quie rza'la'adyi' yaca benë' dumi, tana' rueyaquë' bitezi tamala, hasta rusanla'adyi'yaquë' xneza Jesús redzagalaoyaquë', pero dula' quieziyaquë'.

Reya'ala' hue quiero xti'idza' Diuzi du guicho du la'adyi'ro

¹¹ Pero luë', Timoteo, bireya'ala' huelo' ca rue yaca ben' na', dan' naco' ben' quie Diuzi. Reya'ala' huelo' puro tadya'a tzionla'adyo' Diuzi du guicho du la'adyo'. Reya'ala' galelo' quie Diuzi, na' idyë'ëlo' laguedyo'. Reya'ala' suelo' bitezi gaca quio'. Reya'ala' tzu'ulao' talëlo' laguedyo' gaco' ben' gaxo. ¹² Du guicho du la'adyo' galelo' quie Diuzi huelo' cabë' dyin bdë' Diuzi luë' huelo'. Inaolo' xneza Jesús biusanlo'n, na' gata' yela' neban quio' tuzioli. Pues por lena' ulio Diuzi luë' bequëbo' lao yaca benë' de que naco' ben' quie Jesús, ben' nao xnezë'. ¹³⁻¹⁴ Rnia' luë': Bzu di'idza' quia' cabë' unia' luë' hasta idyinte dza yeguida Señor quiero Jesucristo cuenda bihue yaca benë' causa quio' gaojë' luë' xquia. Lena' rnia' luë' delante lao Diuzi, ben' run yela' neban yugulu ta de. Lëscan' rnia' luë' delante lao Jesucristo, ben' bequëbi naquë' zi'i Diuzi lao Poncio Pilato. ¹⁵ Cati psaque' Diuzi abdyin hora, caora na' ilë'ë yaca benë' Señor quiero Jesucristo. Cana' hue Diuzi quiero, porque tuzi lëbë' naquë' Diuzi, ganura Diuzi tula zu. Tuzi lëbë' r nabë'ranë'. Ganura zu r nabë' ca lëbë'. Tuzi lëbë' nacarë' ben' ze. Ganura zu naca ca lëbë'. ¹⁶ Tuzi Diuzi naquë' ben' biyeyudyi yedu quie. Re' xni' ze ga'n zuë'. Nitu nunu saque' ibiga' ga'ala' ga'n zuë'. Nitu nitu ben' nita' yedyi layu bisaque'jë' ilë'ëjë' lëbë'. Reya'ala' gapala'n yugulu benë' lëbë' tuzioli. Biyeyudyi yedu yela' r nabë' quienë'. Amén.

¹⁷ Yaca ben' de dumi quie lao yedyi layu, reya'ala' yëbo'jë' ta biuxa'ajë'. Lëscan' yëbo'jë' ta biuxela'adyi'jë' cuinjë' dan' nacajë' ben' uña'a, porque huade quie yela' uña'a quiejë'. Huenla uxela'adyi'yaquë' Diuzi, ben' naban tuzioli, ben' run ta rdzioguero suro dyë'ëdi. ¹⁸ Yëbo'jë' huejë' tadya'a, pero yugu dza quele batazi. Reya'ala' yeyëchi'la'adyi'yaquë' laguedyiaquë'. Reya'ala' suyaquë' dispuesto si'jë' ta de quieyaquë' hue'yaquë'n ben' yëchi'. ¹⁹ Cana' gata' dugalo yela' uña'a quieyaquë' guibá dza zaza'ra. Cana' gata' yela' neban quieyaquë' tuzioli.

Ga iyudyi di'idza' use'ela' Pablo lao Timoteo

²⁰ Timoteo, reya'ala' uzulo' di'idza' huelo' yugulu cabë' baonia' luë' quie Diuzi. Biuzënago' quie di'idza' ru'ezi yaca benë', di'idza' bë' nazijë', di'idza' bibi zaca'. Lëscan' bitzu'ulo' huenë conlë yaca ben' rue cuine ben' rioñe'e, den' bë' nazijë' najë' rioñe'eyaquë', pero birioñe'eyaquë'. ²¹ Cana' bë' bala ja ben' unita' dza na'. Unayaquë' rioñe'eyaquë', pero bë' naziyaquë', como dan' psanla'adyi'yaquë' xneza Jesús. Ni yeyudyi quie di'idza' unia' luë'. Rulidza' Señor quiero ta huela'iyänë' luë'. Amén.

GUICHI URUPE BĒ SAN PABLO APÓSTOL USE'ELA'NĒ'N LAO TIMOTEO

Use'ela' Pablo guichi ni lao Timoteo

¹ Nĕ'ĕdi', Pablo, naca' apóstol quie Jesucristo con cabĕ' ulio Diuzi nĕ'ĕdi' conforme con ca una Diuzi hue'nĕ' yela' naban tuzioli nutezi ben' hue tuze len Jesucristo. ² Timoteo, bia' guichi niga pse'ela'n laolo'. Nezilo' nadyĕ'ĕda' luĕ', raqueda' luĕ' ca zi'ina'. Rulidza' Xuziro Diuzi lĕnĕ' Señor quiero Jesucristo ta huela'iyaquĕ' yeyĕchi'la'adyi'yaquĕ' luĕ' cuĕchiyaquĕ' chizi lu'u guicho laxta'olo'.

Reya'ala' quixogue' Timoteo yaca benĕ' di'idza' quie Cristo

³ Yugo dza, yugo yĕla, rulidza' Diuzi rĕpa'nĕ' diuxcalelo' por luĕ'. Lĕscan', por tu parte quia' nĕ'ĕdi', rua' dyin quie Diuzi birao pensari quia' nĕ'ĕdi' xquia. Cana' bĕrĕ xuzixta'ohua', bĕyaquĕ' dyin quie Diuzi, biudao pensari quieyaquĕ' leyaquĕ' xquia. ⁴ Na'ra rezala'adya' cabĕ' guquelo' bayĕchi' caora unia' luĕ' bazeya'a. Lena' re'enda'guida' ideyuba' luĕ' tatula, porque lega redaohueda' sulia' luĕ'. ⁵ Nezda' cabĕ' ruelo' rnaolo' xneza Jesús du guicho du la'adyo'. Tanĕro unao zna'gulo' Loida len zna'lo' Eunice xneza Jesús. Reyla'adya' lĕscan' luĕ' naolo' xneza Jesús ca leyaquĕ'.

⁶ Quie lena' rnia' luĕ': Reya'ala' huelo' bala ca ta banegunne Diuzi luĕ' caora uxuba' na'a guicholo' bdĕ' Diuzi luĕ'. ⁷ Bire'en Diuzi idzebiro, re'ennĕ' huero tzutzu huala laxta'oro, re'ennĕ' idyĕ'ero laguedyiro, re'ennĕ' tzu'uro pensari dya'a. ⁸ Biyedue'lo' inĕlo' cule quie Señor quiero. Lĕscan' biyedue'lo' dan' dia' lu'u dyiguiba por nun quie dan' naohua' xneza Cristo cabĕ' luĕ'. Lĕscana' biidzebo' cati huelĕ' benĕ' luĕ' bizinaquezi. Siempre gun Diuzi fuerza valor quio' ta suelo' sulo' chizi chi biti'tezi ta usaca benĕ' luĕ' porque dan' rguixogue'lo' xti'idza' Diuzi. ⁹ Ulio Diuzi ra'o beguibinĕ' laxta'oro, porque re'ennĕ' gacaro ben' la'iya quienĕ'. Cala yela' ben' huen quiero ulio Diuzi ra'o, dechan' ulionĕ' ra'o bĕnnĕ' cule quiero, porque cana' re'ennĕ' huenĕ' quiero nedyĕ'ĕnĕ' ra'o ca nedyĕ'ĕrĕ Jesucristo ra'o. Tu binegata' yedyi layu, tu na' zu Diuzi nadyĕ'ĕnĕ' ra'o. ¹⁰ Tali blu'e Diuzi nadyĕ'ĕnĕ' ra'o, porque use'ela'nĕ' Señor quiero Jesucristo ta yeyudyi yedu quie yela' guti quiero. Lĕscan' lao na'anĕ' guta' yela' neban quiero tuzioli por nun quie xti'idza' Diuzi.

¹¹ Bĕ Diuzi nĕ'ĕdi' nombrado ta tzetixogui'a benĕ' xti'idza' Diuzi. Quie lena' use'ela'nĕ' nĕ'ĕdi' naca' apóstol, naca' maestro. ¹² Quie lena' redzagalaohua', pero biredue'da' porque nuebĕ'da' Cristo, naohua' xnezĕ'. Nezda' naca Cristo ben' de yela' huaca quie, rna'nĕ' nĕ'ĕdi' tu lala zua' yedyi layu hasta idyin dza gaca juicio lao yedyi layu.

¹³ Biusanla'adyo' inalo' cabĕ' psĕdia' luĕ' quie xti'idza' Diuzi. Unao xneza Jesús du guicho du la'adyo', idyĕ'ĕlo' laguedyo' nun quie dan' naco' tuze len Cristo Jesús. ¹⁴ Lao na'a Bichi Bĕ quie Diuzi, ben' yu'u lu'u guicho laxta'oro, gapo' cuidado bigala'adyo' uzulo' xti'idza' Diuzi ca ta bdĕ'nĕ' luĕ'.

¹⁵ Luĕ' nezilo' nezilo' apsanla'adyi' yaca ben' nita' yaca ciudad nebaba Asia nĕ'ĕdi'. Cana' apsanla'adyi' Figelo len Hermógenes nĕ'ĕdi'. ¹⁶ Rulidza' huela'iya Diuzi familia quie Onesíforo, porque zĕ lasa pxela'adyi'nĕ' nĕ'ĕdi'. Biredue'nĕ' quia' naca' preso dia' lu'u dyiguiba. ¹⁷ Cati bedyinnĕ' ciudad Roma udanĕ' beguilonĕ' nĕ'ĕdi' hasta bedzelenĕ' nĕ'ĕdi'. ¹⁸ Rulidza' Diuzi yeza'la'adyi'nĕ' quienĕ' dza gaca juicio lao yedyi layu. Dyĕ'ĕdi' nezilo' taze gugalĕnĕ' ra'o dza udaro ciudad Efeso.

2

Naca ben' nao xneza Jesús ca quie soldado dya'a

¹ Luĕ' naco' ca quie zi'ina'. Tana' nia' luĕ' huelo' bala ca tu ta banegunne Cristo Jesús luĕ'. ² Na'ra cabĕ' di'idza' apsĕdia' luĕ', re'enda' usĕdio' ben' tula, pero ben' nezo' uzu di'idza', ben' nezo' usĕdi dyĕ'ĕdi. Huelo' mandado usĕdijĕ' yaca benĕ' cabĕ' di'idza' apsĕdia' luĕ'.

³ Reya'ala' sĕlo' tzutzu huala ca quie soldado dya'a quie Jesús cati rusaca benĕ' luĕ' bizinaquezi. ⁴ Bireya'ala' hue soldado dyin tula cati ruenĕ' servicio quienĕ'. Reya'ala' huenĕ' puro ca mandado rue xa'ne cuenda yeyula'adyi' xa'ne lĕbĕ'. ⁵ Lĕscana' nacarĕ quio' ca quie ben' rguitulĕ' pelota, bihuenĕ' gan chi bihuenĕ' cabĕ' na reglamento quien. ⁶ Lĕscana' nacarĕ quio' ca quie ben' guza na quie, ben' rue dyin guixi', napanĕ' derecho si'nĕ' usecho quien. ⁷ Huu' pensari cabĕ' nia' luĕ', na'tera huacalĕ Diuzi luĕ' ta tzioñe'elo'n.

⁸ Bigalala'adyo' Jesucristo, zi'isuba' rey David. Naquĕ' ben' aguti, na' bebannĕ' tatula aberoguĕ' gan' yu'u ja ben' huati. Lena' rguixogui'a benĕ'. ⁹ Nun quie rguixogui'a benĕ' xti'idza' Diuzi, redzagalaohua' pquioyaquĕ' ni'a na'a caden. Ca quie ben' bĕ tamala, bĕyaquĕ' quia'. Pero bisaque'yaquĕ' uquioyaquĕ' xti'idza' Diuzi. ¹⁰ Pues rzueda' con

biti'tezi tamala raca quia' cuenda yega'nnan dya'a quie yaca ben' ulio Diuzi, na' gata'yela' neban quieyaquë' tuzioli tzasulëyaquë' Cristo Jesús tuze.

¹¹ Tali nacan de que:

Chi zuro puesto inaoronë' ba'ala'cazi ruen žudyi guti benë' ra'o, na'tera huezi'në' ra'o huetzasulëronë' tuzioli.

¹² Chi suero cati rue ja ben' quiero bizinaquezi, na'tera gunnë' lato quiero inabë'ro conlë lëbë'.

Chi usebi'ro lëbë', lëscana' usebi'në' ra'o.

¹³ Ba'ala'cazi birue quiero xti'idza' Diuzi, lëbë' sí, ruecazi quienë' xti'idzë', porque bisaque' birue quienë' xti'idzë'.

Reya'ala' huero ta yeyula'adyi' Diuzi

¹⁴ Gacalao' yaca ben' nao xneza Jesús ta bigalala'adyi'yaquë' cabë' nia' niga. Lëscan' huegadyo'yaquë' ta bihuejé' cuenda quie yaca ben' raxe tzu'u huenë rdilayaquë' quie bi di'idza' rnën lë'ë guichi ley quie Diuzi. Pues bibi zaca'n tzu'uyaquë' huenë' conlë leyaquë'. Tuzi ca huen quieyaquë', huatondo pensari quiejë' chan' uzë'nagajë' quiejë'. ¹⁵ Bë quio' xti'idza' Diuzi du guicho du la'adyo' cuenda ilë'ë Diuzi cabë' ruelo' tanun quienë' naco' ben' rue dyin dya'a, ben' rguixogue' di'idza' li quienë' ta yu'u ni'a xnezi. Chi huelo' cana', na' huero dyin quio' dya'a, bigata' yela' stu' quio' lao Diuzi. ¹⁶ Bihuu' cuenda quie yaca ben' rna di'idza' bibi zaca'n, di'idza' dachizi, porque yaca ben' rna cana', tu dza, tu dza, ziojë' ruejë' mazara tamala. ¹⁷ Naca di'idza' quiejë' ca quie hue' baru'udzo'. Cana' naca quie Himeneo len Fileto. ¹⁸ Uquixiyaquë' nayaquë' biyeban yaca ben' huati. Cana' aptonojë' pensari quie bala ben' nao xneza Jesús. ¹⁹ Pero bisaque' te cana'zi ta bë Diuzi, yega'nnan tuzioli. Pues cani nan lë'ë guichi la'iya quie Diuzi: "Nezi Diuzi nu ben' naca ben' quienë'." Lëscan' nan: "Yugulu ben' nao xneza Jesús, reya'ala' usanjë' tamala."

²⁰ Uzëcara nago' ta inia' luë' tu di'idza'. Lu'u yu'u quie hen' uña'a de zë cue' taza. De taza de oro, len de plata, len de yaga, len de yu. Na'ra nu taza de oro o de plata zaca'n za'ala'. Pero yaca taza de yaga o de yu, lë'ë'ti'zi zaca'n. Lëscana' ra'o, ben' nao xneza Jesús, naca quiero ca quie zë cue' taza. ²¹ Naca quiero ca quie nu taza zaca'n za'ala', zaca'ro lao Diuzi, huero dyin quienë'. Ruen dyabë' quiero bihuero tamala, na'ra baneyë'ro huero dyin dya'a, huero dyin quie Diuzi.

²² Pues gapo' cuidado, bihuelo' ca rue bala bi' ru'abe, porque rguiloyacabi' ga huejabi' tamedian. Mejorla huelo' ta yeyula'adyi' Diuzi, sudyi'ilëlo'në' mazara, idyë'ëlo' laguedyo', huelo' cue' chizi laxta'olo', porque cana' rue ben' rulidza Diuzi du guicho du la'adyi', ben' nayëri laxta'ohue. ²³ Bihuelo' cuenda quie ben' rnë di'idza' bižu, porque dyë'ëdi nezo' huaca dila yaca benë'. ²⁴ Nacaró ben' rue cabë' re'en Diuzi. Quie lena' bireya'ala' tzu'ulëro benë' huenë'. Reya'ala' gapala'nro yugulu benë'. Reya'ala' suro puesto usëdïro laguedyïro. Reya'ala' huezela'adyi'ro lëro laguedyïro. ²⁵ Lëscan' reya'ala' hue'lëro ben' rdza' ra'o di'idza' dya'a ulidzaro Diuzi gacalë Diuzi lëjë' utza'jë' pensari quiejë' hue quieyaquë' xti'idza' Diuzi. ²⁶ Cana' re'ennan cuenda sujë' listo yerojë' lu'u trampa ga bdze' xan' taxi'ibi' lëjë' nacajë' preso ga hue xan' taxi'ibi' ta rnazin quiena conlë lëjë'.

3

Ni nan cabë' gaca quie yaca benë' caora bayeyudyi quie yedyi layu

¹ Reya'ala' inezó dyë'ëdi cabë' gaca caora bayeguida Jesucristo, porque huata' tu zëdi ze gula lao yedyi layu. ² Yaca ben' inita' dza na', huejë' cunjë' ben' ze, huaza'la'adyi'yaquë' dumi, uzë'yaquë' benë', utasi unioyaquë' Diuzi, bigaleyaquë' quie zuzyaqué', bibi bala'ana gapayaquë' chi nu benë' yeyëchi'la'adyi'në' leyaquë', bitzionla'adyi'yaquë' Diuzi. ³ Binadyë'ëyaquë' benë', bisil'zeyaquë' quie benë', gaoyaquë' benë' xquia rnayaquë' di'idza' falso, hueyaquë' con ta rnazin quieyaquë', hueyaquë' snia, bitzaxeyaquë' tadya'a. ⁴ Huazi'yaquë' bichiyaquë' yë', hueyaquë' con ganzi, rueyaquë' ben' huen cuiyaquë', huatzaxejë' huejë' ta rnazin quiejë', bitzaxeyaquë' ta re'en Diuzi hueyaquë'. ⁵ Rionla'adyi'jë' Diuzi najë', pero bë' nazijë', dan' birueyaquë' ca re'en Diuzi hueyaquë'.

Pues yaca ben' rue cana', bitzu'ulaojë' tuze

⁶ Entre leyaquë' nita' ben' tzu'u lu'u yu'u quie benë' ga zu nigula rue median, ga zu nigula yu'u pensari mala. Raxe yaca nigula na' cabë' di'idza' falso na yaca ben' na'. ⁷ Tu rnabazyaquë' ta inezyaquë' chi nacan tali, pero bë' ruezijë' bire'enjë' inezijë' tali. ⁸ Birue quieyaquë' ta naca tali. Bitzu'uyaquë' pensari dya'a. Bë' nazijë' inajë' naojë' xneza Diuzi. Hueyaquë' cabë' bë chopá ben' brujo dza na', tu ben' lao Janes len itu ben' lao Jambres. Leyaquë' biguleyaquë' quie Moisés caora uzuyaquë' tiempote. ⁹ Pero yaca ben' inita' dza zaza'ra, lë'ë'ti'zi hueyaquë' gan si'jë' benë' yë', porque huacabë' yaca benë' nacajë' ben'

tondo. Gaca quieyaquë' cabë' guca quie Janes len Jambres dza na'. Gucabë' yaca benë' uzu tiempote naca Janes len Jambres ben' tondo.

Ni rguixogue' Pablo mazara Timoteo

¹⁰ Pero luë', dyë'ëdi banaolo' ruelo' cabë' ta psëdia' luë'. Lëscan' ablë'ëlo' cabë' rua', rua' tadya'a, zudyi'ilia' Jesús, rua' ca re'en Diuzi hua' tacuenda gale ja benë' con cabë' rna xti'idza'në'. Nezo' cabë' naca', naca' ben' zela'adyi', nadyë'ëda' benë'. Nezo' cabë' raca quia' redzagalaohua', pero birusanla'adya'. ¹¹ Dyë'ëdi nezilo' cabë' psaca benë' në'ëdi' bizinaquezi. Nezilo' cabë' guca quia' ciudad Antioquia, len ciudad Iconio, len ciudad Listra. Tahauala gula bedzagalaohua', pero gualë Jesús në'ëdi' cabë' tamala gu'un yaca benë' huejë' quia'. ¹² Tana' nia' luë' yedzagalaocazi yaca ben' re'en enao xneza Jesús. Usacacazi benë' lëjë' bizinaquezi. ¹³ Pero yaca ben' mala len yaca ben' huizi' yë', tu dza tu dza ziojë' ruejë' mazara tamala. Rzi'yaquë' yë', riogueyaquë' yë'.

¹⁴ Pero luë', bicha', bë quio' yugulute ca ta bapsëdio', porque anezo' nacan tali, nuebë'lo' nu ben' psëdi luë'. ¹⁵ Nenacatio' xcuidi' uzulalo' rusëdio' guichi la'iya quie Diuzi. Caora na' bzioñe'e Diuzi luë' cabë' reya'ala' huero sudyi'ilëro Jesús tacuenda gata' yela' neban quiero tuzioli. ¹⁶ Lao na'a Bichi Be quie Diuzi bënë' mandado bzu yaca ben' unita' tiempote xti'idzë' lë'ë guichi. Tana' nacan huen isëdiro xti'idza' Diuzi cuenda na'tera usëdiro ben' tula quien, tilarojë' chi bihuejë' tadya'a, uzioñe'erojë' ca re'en Diuzi tajë' huejë' puro ta yu'u ni'a xnezi ¹⁷ cuenda gaca yaca ben' nao xneza Jesús ben' laxta'o yëri, ben' raca rue yugulu tadya'a.

4

¹ Delante lao Xuziro Diuzi lënë' zi'inë' Jesucristo, ben' yeguida lao yedyi layu como ca rey ta huenë' juicio quie ja ben' naban, len quie ja ben' aguti, rua' luë' mandado ² ta quixogue'lo' yaca benë' xti'idza' Diuzi la'achi yeyula'adyi'jë', la'achi biyeyula'adyi'jë'. Uzioñe'elo'jë', tilo'jë', usëdio'jë' ca ben' rue zela'adyi'. ³ Can' huelo', porque dan' huadyin dza bigue'en yaca benë' yejë' ta naca tali, pero huaguiloyaque' nu yaca ben' usëdi lëjë' puro ca ta re'enjë' yejë'. ⁴ Huasebi'yaquë' di'idza' li quie Diuzi. Gue'enyaque' uzë'nagayaquë' cabë' naca cuento quie benë'zi. ⁵ Pero luë', reya'ala' talao' tuzi ca pensari dya'a. Bigalelo' cati hue benë' luë' bizinaquezi. Du guicho du la'adyo' tzetixogue'lo' benë' xti'idza' Diuzi. Uzulo' di'idza' cabë' dyin ben Diuzi ruelo'.

⁶ Bagazi idyin dza gatia' yeya'a tzazua' ga zu Diuzi. ⁷ Ca dyin ben Diuzi bia', bia' tadya'a quien bareyudyin. Bipsanla'adya' xneza Jesús. ⁸ Caora na' udyia Señor quiero, ben' rhugobë' tali, tu coron guichoga'. Na' quele tuzi në'ëdi' udyia Señor quiero coron guichoga', lëscan' udyianë' coron guicho yugulu ben' rbeza yeguida Cristo, ben' nadyë'ë lëbë'.

Rnaba Pablo tu cule lao Timoteo

⁹ Huelo' dyabë' guido' idena'lo' në'ëdi'. ¹⁰ Apsanla'adyi' Demas në'ëdi', zeyonë' ciudad Tesalónica. Raxeranë' gaca quienë' ta de lao yedyi layu cala ca ta yega'nënë' në'ëdi' niga. Na' Crescente zionë' tu mandado yu nebaba Galacia. Lëzi cana' ziorë Tito tu mandado yu nebaba Dalmacia. ¹¹ Ituzi Lucas abega'nënë' në'ëdi' niga. Chi huu' cule, tzio' tzeguedyo' Marcos ta gidalao'në' niga, porque re'enda' gacalënë' në'ëdi'. ¹² Abia' mandado zio Tiquico ciudad Efeso. ¹³ Bë' bazao' ga zua' niga, yedelo' ciudad Troas tzañiu' gaban quia' ta nuca'na' lidyi Carpo. Lëzi re'enda' tzañiu' libro quia', pero racara purari tzañiu' documento quia'.

¹⁴ Alejandro, ben' rue dyin conlë güba, lega psaquenë' në'ëdi' bizinaquezi. Pues hue Diuzi lëbë' castigo. ¹⁵ Gapo' cuidado conlë lëbë', porque lega ruenë' contra xti'idza' Diuzi rguixogue'ro benë'.

¹⁶ Caora tanëro bia' defender cuina' lao yaca ben' rnabë', nunu gualë në'ëdi'. Yugojë' psanla'adyi'yaquë' në'ëdi' niga. Rulidza' Diuzi si'zenë' quieyaquë'. ¹⁷ Pero gualë Cristo në'ëdi', bënë' fuerza valor quia'. Bia' gan udxogui'a yaca ben' binaca ben' Israel xti'idza' Diuzi. Yugojë' bzë'nagajë' xti'idza' Diuzi udxogui'ayaquë'. Cana' gualë Cristo në'ëdi' zë lasa caora cati guca zëdi quia'. ¹⁸ Pues huacalëcazi Cristo në'ëdi' con biti'tezi tamala gaca quia'. Nezda' gapanë' në'ëdi' hasta dza huetzazulia' lëbë' guibá ga rnabë'në'. Huero Diuzi ben' ze tuzioli. Amén.

Ni reyudyi di'idza' use'ela' Pablo lao Timoteo

¹⁹ Ugapo' diuzi Prisca, lënë' Aquilo, len familia quie Onesiforo. ²⁰ Nia' luë' napca'na' Trófimo ciudad Mileto dan' raca Zhue'në'. Lëzi bega'nre Erasto ciudad Corinto. ²¹ Huelo' dyabë' guido' na'a zatzu'uraró biu' ruen zaga. Lëscan' rugapa Eubulo, len Pudente, len Lino, len Claudio, len yaca los demás ben' nao xneza Jesús, luë' diuzi.

²² Rulidza' Señor quiero Jesucristo ta sulënë' luë' yugu dza. Lëscan' rulidza' Diuzi ta huela'iyane' yugulule. Amén.

GUICHI BĒ SAN PABLO APÓSTOL USE'ELA'NĒN LAO TITO

Ga rzulao guichi bē Pablo

¹ Nē'ēdi', Pablo, naca' ben' rue dyin quie Diuzi. Lēscan' naca' apóstol quie Jesucristo, use'ela'nē' nē'ēdi' ta gacalia' yaca ben' ulio Diuzi ta ineziyaquē' ca naca tali quie xneza Jesús. ² Según ca naca xneza Jesús rbezaro idyin dza tzazulēro Diuzi gata' yela' neban quiero tuzioli. Tu binecue' yedyi layu una Diuzi gunnē' yela' neban quiero ra'o, yaca ben' nao xneza Jesús. Nacan tali ca unē', porque tali unanē' como binaca Diuzi ben' rzi' yē'. ³ Na'ra una Diuzi abdyin hora ineziro quie xti'idza'nē' por nun quie ben' rguixogue' len. Lēscan' Diuzi, ben' pte psela ra'o, ulionē' nē'ēdi' ta tzetixogui'a xti'idza'nē' según cabē' mandado bēnnē' nē'ēdi'. ⁴ Na'ra bia' guichi ni use'ela'n laolo' luē', Tito. Naco' ca zi'ina', dan' rnaorēlo' xneza Jesús cabē' nē'ēdi'. Rulidza' Xuziro Diuzi lēnē' Jesucristo, ben' pte psela ra'o, ta huela'iyaquē' luē' cuēchियाquē' chizi lu'u guicho laxta'olo'.

Ni nan cabē' re'en Pablo hue Tito cati zunē' yaca yedyi nebaba Creta

⁵ Na'ra pca'na' luē' isla Creta ta useyudyo' quie asunto bega'n dza na'. Re'enda' huu' nombrar yaca ben' gapa dyin quie Diuzi tu tu yedyi cabē' di'idza' unia' luē' dza na'. ⁶ Pues yaca ben' gapa dyin quie Diuzi, bireya'ala' hueyaquē' bizinaquezi. Reya'ala' sulējē' tuzi nigula quie quieyaquē'. Reya'ala' uzioñe'ejē' zi'iyaquē' ta bihueyacabi' tamedian, lēscan' ta inaoyacabi' xneza Jesús dyē'ēdi. Lēscana' reya'ala' uzioñe'ejē' zi'ijē' ta uzujabi' di'idza' quie xuziyacabi' len z'a'yacabi'. ⁷ Lēscan' yaca ben' gapa dyin quie Diuzi, reya'ala' huejē' dya'a dyin quie Diuzi rueyaquē'. Bireya'ala' inabē'jē' ca cuendazi. Reya'ala' gacajē' ben' zela'adyi'. Bireya'ala' laidza'teyaquē'. Lēscan' bireya'ala' tajē' xudyiyaquē' quilojē' dila. Bireya'ala' cuanjē' quie benē'. ⁸ Reya'ala' gapachi'jē' dyē'ēdi ben' rdyin zan yu'u quieyaquē'. Bireya'ala' hueyaquē' tamedian. Reya'ala' tzu'uyaquē' pensari dya'a, gacajē' ben' huen, ben' bihue ta rnazin quie. ⁹ Reya'ala' inaoyaquē' du guicho du la'adyi'jē' xti'idza' Diuzi ca ta psēdindo' leyaquē'. Reya'ala' gacajē' benē' zela'adyi'. Reya'ala' usēdiyaquē' uzioñe'eyaquē' yaca ben' birnao xneza Jesús, yaca ben' rusebi' xti'idza' Diuzi rnayaquē' binacan tali con cabē' rnēn.

¹⁰ Cana' re'ennan huero, porque nita' zē yaca ben' birale quie xti'idza' Diuzi, ben' rnē di'idza' tondo, ben' rzi' yē'. Nita' zē ben' Israel rueja cana'. ¹¹ Lēben' na' yebo'jē' cue'jē' chizi bira huejē' cana', porque ben' zē aptondo'jē' pensari quie, hasta yugu ben' naca tu cue' familia aptondo'jē' pensari quie. Rusēdiyaquē' benē' ta bireya'ala' usēdiyaquē' cuenda huejē' gan dumi, pero tamala ruejē'.

¹² Uzu tu ben' isla Creta tiempote unē' cani: "Ben' huēdi, ben' mala, naca ben' yedyi quia', ben' isla Creta. Rzi'yaquē' yē', raotzegueyaquē'." ¹³ Cana' unē' quie laguedyinē', pero tabalacazi unē' cana'. Quie lena' reya'ala' tilo'yaquē' dyē'ēdi gula cuenda galejē' quie xti'idza' Diuzi ca reya'ala' galejē'. ¹⁴ Lēscan' yēbo'jē' ta bihue'jē' cuenda quie cuento ta rnazi yaca ben' Israel de pensarizi quieyaquē'. Lēscan' yēbo'jē' bigalejē' quie ben' psebi'n di'idza' li quie Diuzi.

¹⁵ Yaca ben' nayēri laxta'ohue, rguilo'yaquē' tadya'a, pero yaca ben' birnao xneza Jesús, yaca ben' binayēri laxta'ohue, rguilo'yaquē' tamala. Lente pensari yu'uyaquē' nacan pensari bayatza. ¹⁶ Nayaquē' raleyaquē' quie Diuzi, pero bē' nazijē' como dan' birueyaquē' tadya'a cabē' tadya'a re'en Diuzi hueyaquē'. Pues ratza Diuzi quieyaquē', dan' bire'enyaquē' hue quieyaquē' xti'idzē'. Nica nezijē' bi huejē' chan' re'enjē' huejē' tadya'a.

2

Yaca ben' quie Jesús, reya'ala' hue quieyaquē' xti'idza' Diuzi

¹ Ca ta usēdio' benē' reya'ala' inēn lēbizi conlē xti'idza' Diuzi. ² Yēbo' yaca be'mbyu gula de que reya'ala' yu'uyaquē' gracia, bitondoyaquē', gapajē' bala'ana, huejē' pensari. Reya'ala' inaojē' xneza Jesús du guicho du la'adyi'yaquē'. Reya'ala' idyē'ēyaquē' laguediyaquē'. Reya'ala' sueyaquē' cati bi tu tazēdi de quieyaquē'. ³ Lēscan' yēbo' yaca nigula gula ta tayaquē' gapajē' Diuzi bala'ana. Yēbo'jē' ta bihue'lēyaquē' laguediyaquē' di'idza' bižu, nica tayaquē' hue'e. La'acazi tajē', pero huejē' tadya'a. ⁴ Reya'ala' inēyueyaquē' ja nigula cuidi' ta hueyacabi' tadya'a, lēscan' ta idyē'ēyacabi' be'mbyu quieyacabi' len zi'iyacabi', ⁵ lēscan' ta tzu'uyacabi' pensari dya'a, lēscan' ta bigasilēyacabi' be'mbyu tula. Na' yēbo'yacabi' ta sulēyacabi' be'mbyu quieyacabi' dyē'ēdi, lēscan' ta usegulayacabi' zi'iyacabi' dyē'ēdi, lēscan' ta gacalēyacabi' laguediyacabi'. Pues ruen dyabē' uzuyacabi' di'idza' ca mandado rue be'mbyu quieyacabi' cuenda bibi dula' gata' quieyacabi' ina benē' condre xti'idza' Diuzi.

⁶ Lëscan' yëbo' yaca bi'byu cuidi' ta yu'uyacabi' gracia bitondoyacabi'. ⁷ Lëscan', luè', la'acazi tao', pero huelo' puro tahuen. Ca ben' yu'u gracia, ca ben' laxta'o yëri, cana' reya'ala' usëdio' yaca bi'byu cuidi'. ⁸ Reya'ala' hue'lëlo' benè' puro di'idza' dya'a tacuenda bigata' causa quio' gao benè' luè' xquia. Cana' huata' yela' stu' quie yaca ben' rue condre ra'o, porque yedue'yaquë' inajë' quiero nacaro ben' mala.

⁹ Lëscan' yëbo' yaca ben' nada'o de que reya'ala' galejë' quie xa'një'. Yëbo'jë' bireya'ala' yeyëchojë' yedilalëjë' xa'një'. ¹⁰ Lëscan' yëbo'jë' ta bicuanyaquë' ta de quie xa'nyaquë'. Reya'ala' huerajë' huen gapach'jë' ta de quie xa'një' cuenda na' il'ë xa'nyaquë' leyaquë' ben' huen gula, ben' rue quie xti'idza' Diuzi.

¹¹ Pues bablu'e Diuzi ra'o naquë' ben' huen gula, rbezë' ute uselanë' nutezi ben' re'en inao xneza Jesús. ¹² Yela' ben' huen quienë' abzioñe'enë' ra'o ca re'ennë' usanro tamala, re'ennë' bira huero ta rnazin quiero. Bzioñe'enë' ra'o ca re'ennë' tzu'uro pensari huen, re'ennë' huero tadya'a, re'ennë' tziionla'adyi'ronë' dula'adyi'ro, re'ennë' inao xnezë' dza rdaro nabanro lao yedyi layu. ¹³ Lëscan' bzioñe'enë' ra'o ca re'ennë' cuzaro dza yeguida Jesucristo. Pues cuzaro yedaohuero dza cati uzu Diuzi di'idza' quienë' ca unë' huenë' quiero. Lëdza zaza'ra na' yeguida Diuzi quiero lënë' zi'inë' Jesucristo, ben' pte psela ra'o. ¹⁴ Pues dza na'te, dza baode, psedyin Jesús cuinnë' lao na'a yaca benë' bëti lëbë'. Cana' bënë' gutinë' ta gata' tahuen quiero. Cana' bënë' pte pselanë' quiero ta bihue Diuzi ra'o castigo quie yela' mala quiero. Lëscan' udibinë' laxta'oro cuenda gacaro ben' laxta'o yëri, gacaro ben' quienë', tzioro inao huero tahuen.

¹⁵ Cana' re'enda' usëdio' yaca los demás ben' quie Jesús. Reya'ala' uxela'adyo'jë' cati ruejë' tahuen, lëscan' reya'ala' tilo'jë' dyë'ëdi cati ruejë' tamala. Huu' dyabë' uzë'nagajë' quio' cabë' yëbo'yaquë'.

3

Ni nan cabë' reya'ala' hue ja ben' nao xneza Jesús

¹ Yëbo' yaca ben' quie Jesús reya'ala' galejë' quie yaca ben' quie gobierno, ben' napa dyin, len quie ben' rnabë' quie yaca yedyi quieyaquë'. Reya'ala' sujë' dispuesto huejë' dyin dya'a ca mandado rue yaca ben' rnabë' quiejë'. ² Bireya'ala' udze'la'adyi'yaquë' benë'. Reya'ala' inita'lëjë' laguedyijë' dyë'ëdi huejë' tadya'a gapala'një' benë'.

³ Bigala'adyo' cabë' guca quiero dza na'. Gucaro ben' yaladyi', bigulero quie Diuzi. Guca bayëchi' gula quiero, bëro puro ta rnazin quiero. Beyula'adyi'ro bëro puro tamala, biuneziro huero tadya'a. Bezë'ro laguedyiro, bdiero laguedyiro, lëscan' bdieyaquë' ra'o. ⁴ Pero naca Diuzi ben' huen gula reyëchi'la'adyi'në' nedyë'në' ben' nita' lao yedyi layu. ⁵ Bireya'ala' huero pensari chi pte psela Diuzi ra'o por nun quie dan' chi bëro tadya'a. Quele por nun quie dan' chi bëro tadya'a pte pselanë' ra'o, den' yela' ben' huen quienë' beyëchi'la'adyi'në' ra'o pte pselanë' ra'o. Conlë nisa udibinë' laxta'oro becubinë'n. Lao na'a Bichi Be quienë' bënnë' quiero yela' neban cubi. ⁶ Lëzi lao na'a Señor quiero Jesucristo yu'u Bichi Be quie Diuzi lu'u guicho laxta'oro. ⁷ Cana' rue Diuzi quiero. Te beyudyi bezi'zenë' quie dula' xquia quiero, na'tera gunnë' yela' naban quiero tuzioli. Lena' rbezaro gaca quiero.

⁸ Cabë' rnia' ni nacan tali. Lena' re'enda' yëbo' yaca ben' quie Jesús huejë' dyabë' galeyacuë' quia' can' rnia' cuenda huejë' tadya'a. Cabë' rnia' ni nacan huen gacalën le'e yugulule. ⁹ Bitzu'ulo' huedila huenë conlë yaca ben' rnë di'idza' tondo, ben' tzu'u huedila huenë quie yaca ben' unita' tiempote. Lëscan' bitzu'ulo' huedila huenë quie guichi ley pca'n Diuzi lao na'a Moisés. Huanitio' tiempo bibi zaca'n tzu'ulo' huedila huenë conlë leyaquë'.

¹⁰ Chi za' ben' re'en cuëchi ja partido entre yaca ben' nao xneza Jesús, reya'ala' tilo'jë' yëbo'jë' tu chopa lasa ta usanjë' bihuejë' cana'. Chi biralejë' quio', bihue'lo'jë' lato guidayaquë' gan' rdupale ruele culto. ¹¹ Claro gula nacan aoquixiyaquë', huanao xquia banapajë' lëjë', huachugubë na quieyaquë' lao Diuzi.

Rnaba Pablo tu cule lao Tito

¹² Na' ise'ela' Artemas o Tiquico ga zulo'. Caora abla'në' ga zulo', huelo' dyabë' yeza'lo' yeguido' yedilero ciudad Nicópolis, porque abia' pensari yega'na' ciudad Nicópolis biu' zaga. ¹³ Reya'ala' gacalao' Zenas, ben' sëlë benë', len Apolos chi bi ta idziogueyaquë' ta tzu'uyaquë' neza. ¹⁴ Tahuen na' hue yaca ben' bichiro, ben' nao xneza Jesús, tadya'a gacalëyaquë' ben' bibi de quie. Cana' biten cana'zi dza rdayaquë' ben' yedyi layu.

Rugapa Pablo Tito diuzi

¹⁵ Yugulu ben' nita'lë në'ëdi' niga, rugapayaquë' luë' diuzi. Lëscan' ugapo' duiuzi yaca ben' zulë luë'. Nacayaquë' amigo quiero, ben' bichiro, ben' nao xneza Jesús. Rulidza' Diuzi huela'iyane' yugulule. Amén.

GUICHI NI BĒ SAN PABLO APÓSTOL USE'ELA'NĒ'N LAO FILEMÓN

Use'ela' Pablo guichi ni lao Filemón

¹ Nĕ'ĕdi', Pablo, dia' lu'u dyiguiba dan' bire'en yaca benĕ' quixogui'a di'idza' quie Cristo Jesús. Nĕ'ĕdi'lia' bichiro Timoteo use'ela'ndo' guichi ni laolo' luĕ', Filemón. Naco' tuzi len nĕto', ben' rue dyin quie Diuzi. Nedyĕ'ĕndo' luĕ' ca ben' bichindo'. Lĕscan' guichi ni use'ela'ndo' lao zanro Apia ² lente lao yugulu ben' redupa zan yu'u quio', ben' nao xneza Jesús. Lĕscan' use'ela'ndo' guichi ni lao Arquipo. Nacarĕ Arquipo tuzi len ra'o, ben' rguixogue' di'idza' quie Diuzi. ³ Rulidza' Xuziro Diuzi lĕnĕ' Señor quiero Jesucristo ta huela'iyaquĕ' le'e, cuĕchiyaquĕ' chizi lu'u guicho laxta'ole.

Filemón rzudyi'ilĕnĕ' Diuzi nadyĕ'ĕnĕ' benĕ'

⁴ Yugo dza rĕpa' Diuzi diuxcalenĕ' ⁵ nun quie na yaca benĕ' cabĕ' ruelo' naolo' du guicho du la'adyo' xneza Señor quiero Jesús nedyĕ'ĕlo' yaca los demás ben' quienĕ'. ⁶ Rulidza' Diuzi ta uzioĕ'enĕ' luĕ' dyĕ'ĕdi ta inezo' cabĕ' tadya'a gula gata' quiero nun quie nacaro ben' quienĕ'. ⁷ Lega redaohuetzegueda' zua' contento cabĕ' ruelo' nedyĕ'ĕlo' benĕ'. Xcalelo', bicha', dan' por nun quio' bare' chizi lu'u guicho laxta'o yaca ben' nao xneza Jesús.

Unaba Pablo tu cule lao Filemón

⁸ Dan' naca' apóstol quie Cristo, quie lena' napa' derecho hua' luĕ' mandado bi huelo', pero bihua' cana'. ⁹ Raxerada' inaba' tu cule laolo' nun quie nedyĕ'ĕlo' nĕ'ĕdi', lĕscan' nedyĕ'ĕda' luĕ'.

Na'ra nĕ'ĕdi', Pablo, anaca' ben' gula dia' lu'u dyiguiba por nun quie dan' bire'en yaca benĕ' quixogui'a di'idza' quie Cristo Jesús, ¹⁰ rnaba' luĕ' huu' tu cule para Onésimo. Pues ca naca quie Onésimo ni, raqueda'nĕ' ca zi'ina', ben' rue quie xti'idza' Diuzi ta udixogui'anĕ' lu'u dyiguiba gan' dendo' niga. Lĕlena' inaba' tu cule laolo' ta yezi'lo'nĕ' de criado quio' tatula.

¹¹ Bi'zi dza na'la guca Onésimo ben' bibi zaca' len luĕ', pero na'a naquĕ' ben' zaca' len luĕ' len nĕ'ĕdi'. ¹² Bi'zi na'a rese'ela'nĕ' tatula gan' quio' yeziu'nĕ' conlĕ ca nĕ'ĕdi'. ¹³ Gu'unda' yega'nĕ' gacalĕnĕ' nĕ'ĕdi' lao lazo' dia' lu'u dyiguiba por nun quie dan' bire'en yaca benĕ' quixogui'a di'idza' la'ija quie Diuzi. ¹⁴ Pero chi bizulo' de acuerdo, bibi zucazi bi inia' ta yese'ela'nĕ' laolo' la fuerza. Re'enda' de gusto yeziu'nĕ'. ¹⁵ Huazaque' inaro beza' Onésimo lidyo' tu chi'zi tacuenda na'a yezulĕnĕ' luĕ' tuzioli. ¹⁶ Pero cala de criadozi yeziu'nĕ'. Reya'ala' yeziu'nĕ' ca ben' bicho', ben' nedyĕ'ĕlo'. Lega nedyĕ'ĕda'nĕ'. Lĕscan' luĕ', reya'ala' idyĕ'ĕrĕlo'nĕ' mazara ca nĕ'ĕdi'. Biidyĕ'ĕlo'nĕ' con ganzi, idyĕ'ĕlo'nĕ' ca nu ben' bicho', ben' nao xneza Jesucristo.

¹⁷ Ca naca na'a, chi luĕ' nuelo' nĕ'ĕdi' tuzi, bezi'nĕ' cabĕ' beziu' nĕ'ĕdi'. ¹⁸ Chi bizinaquezi babĕnĕ' lĕnĕ' luĕ', o chi reya'ala'nĕ' quio', nĕ'ĕdi' yeguizuga'n.

¹⁹ Nĕ'ĕdi', Pablo, bzua' letra lĕ'ĕ guichi ni conlĕ na'a ta xela'adyo' huaguizuga'n. Bi-gala'adyo' ca cule bia' quio' udixogui'a luĕ' xti'idza' Diuzi. ²⁰ Bicha' huu' tu cule, rnaba' luĕ' como ca ben' rnaorĕ xneza Jesús, yeyuezela'adyo' nĕ'ĕdi' como ca ben' bicha', ben' quie Cristo.

²¹ Rse'ela' guichi ni laolo' dan' nezda' huu' cabĕ' inia' luĕ' huelo' quia'. Pues nezda' huelo' mazara cabĕ' inia' huelo'. ²² Dera re'enda' huelo' quia', chi huu' cule, ucuezo' posada quia', porque rbeza' dza ise'ela' Diuzi nĕ'ĕdi' ideyuba' le'e con cabĕ' rnabale quia' lao Diuzi.

Yaca ben' lagueydi Pablo, rugapayaquĕ' diuzi Filemón

²³ Epafras, ben' derĕ lu'u dyiguiba len nĕ'ĕdi' nun quie dan' rguixogue'ndo' xti'idza' Diuzi, rugaparĕnĕ' luĕ' diuzi. ²⁴ Lĕscan' Marcos, len Aristarco, len Demas, len Lucas, rugaparĕyaquĕ' luĕ' diuzi. Dyĕ'ĕdi racalĕyaquĕ' nĕ'ĕdi' rua' dyin quie Diuzi. ²⁵ Rulidza' Señor quiero Jesucristo ta huela'iyānĕ' le'e. Amĕn.

DI'IDZA' LA'IYA QUIE DIUZI TA USE'ELA'YACUË' LAO BEN' HEBREO

Use'ela' Diuzi zi'inè' ta quixogue'nè' ra'o

¹ Tazè lassa, tazè modo, use'ela' Diuzi tiempote ben' naca profeta ta quixogue'jè' xuzixta'oro quie pensari quienè'. ² Pero dza na'a, dza reyudyi quie tiempo gula, use'elè' zi'inè' ta quixogue'nè' ra'o quie pensari quienè'. Conlè zi'inè' bzalonè' duze yedyi layu, apca'nnè' yugulu ta de lao na'a zi'inè'. ³ Cabè' naca Diuzi ben' ze, ben' la'iya, cabè' na' nacarè' zi'inè' ben' ze, ben' la'iya. Tuzi ca naca Diuzi lènè' zi'inè'. Lèzi'inè' na' rnabè'nè' lao yugulu ta dyia guibá len yugulu ta de lao dyilayu conlè fuerza valor quie di'idza' quienè'. Bè' beyudyi udubanè' dula' xquia quiero, cana' bedyinnè' yere'nè' rnabè'nè' zaca' yebè ga zu Diuzi guibá.

Nacara zi'i Diuzi ben' rnabè'ra ca yaca ángel

⁴ Quie lena' nacara zi'i Diuzi ben' rnabè'ra ca yaca ángel. Pca'n Diuzi lèbè' re'nè' ga nacatera belao ca yaca ángel. ⁵ Porque ni tu lasa bigudyi Diuzi tu ángel ca unè' gudyinè' Cristo cani:

Luè' naco' zi'ina'.

Abdyin dza ulu'ena' yaca ben' nita' lao yedyi layu luè' zi'ina'.

Lèscan' ni tu yaca ángel bigudyi Diuzi lèbè' ca unè' quie Cristo cani:

Nè'èdi' naca' Xuzinè'.

Lèbè' naquè' zi'ina'.

⁶ Pero cati use'elè' zi'inè' bidanè' lao yedyi layu, naquè' ben' bazucazi cati binecue' yedyi layu, cana' unè' cani:

Re'enda' yugulu yaca ángel gapajè' lèbè' bala'ana.

⁷ Quie yaca ángel una Diuzi cani:

Rse'ela' ja ángel quia' cabè' rse'ela'be.

Rua' mandado ja ben' rue dyin quia' cabè' rua' mandado gui' ta ženan.

⁸ Pero quie zi'inè' una Diuzi cani:

Luè', Diuzi, inabè'lo' tuzioli.

Puro ta yu'u ni'a xnezi ruelo' inabè'lo'.

⁹ Puro ta naca tali raxelo' huelo'.

Rudielo' ta binaca tali.

Quie lena' nè'èdi', Diuzi quio', bia' tuzo' luè' ben' rnabè'ra ca ben' tula.

¹⁰ Lèscan' una Diuzi rëbinè' zi'inè' cani:

Luè', Señor, bzalolo' udixulo' yedyi layu dza na'te.

Dyin bèlo' len ni'a na'alo' bèlo' guibá.

¹¹ Ca naca yedyi layu len guibá, hueyudyi huedu quien, huagulan ca quie la'ari'.

Pero luè', biyeyudyi yedu quio'.

¹² Cabè' ruzapa benè' gaban quiejè', cana' uzapalo' yedyi layu len guibá dza zaza'ra.

Cabè' rutzá' benè' zabajè', cana' utza'lo' yedyi layu len guibá dza zaza'ra.

Pero luè', tuzicazi ca naco' tuzioli, biyeyudyi yedu yela' neban quio'.

Cana' una Diuzi. ¹³ Lèscan' ni tu lasa bigudyi Diuzi tu ángel ca unè' gudyinè' Cristo cani:

Ure' cuèta' zaquè' yebè niga, hasta idyin dza cuècha' xni'alo' yaca ben' rudie luè'.

Cana' una Diuzi. ¹⁴ Na'ra naca yaca ángel bichi bezi, ben' rue ca mandado rue Diuzi. Rse'ela' Diuzi lèjè' ta gacalèjè' ben' de yela' neban quie tuzioli.

2

Reya'ala' hue quiero ca na Diuzi

¹ Quie lena' reya'ala' hue quiero xti'idza' Diuzi ta babero cuenda biusanla'adyi'ro inaoro xneza Cristo. ² Nacan tali ca na xti'idza' Diuzi ta udixogue' yaca ángel dza na'te. Bè Diuzi castigo nu ben' bè dula' xquia bigulejè' quie xti'idzè'. Bè Diuzi lèjè' tu castigo cabè' reya'ala' gaca quiejè'. ³ ¿Bizi huero ta bihue Diuzi ra'o castigo chi caora cati bennè' ra'o yela' neban tuzioli, na'ra bihue quiero di'idza' quienè'? Pues tanèro udixogue' cuin Jesús cabè' rue Diuzi uselanè' benè' yeyojè' guibá. Na'tera quie ben' bzènaga cabè' udixogue'nè', gucabè'yaquè' nacan tali, na'tera lèjè' udixogue'jè' ra'o. ⁴ Lèscan' Diuzi, zè lasa bènè' yela' milagro quienè', bènè' seña, bènè' ta beban ja benè' tacuenda inezyaquè' nacan tali di'idza' unanè'. Tazè modo bènè' use'elè' Bichi Be quienè' ta gacalènè' ra'o con ca raxe Diuzi huenè' quiero.

Guca Jesucristo benë' cabë' naca benë', ben' nao xnezë'

⁵ Lëscan' bibë' Diuzi yela' rñabë' quienë' yaca ángel ta inabë'jè' lao yedyi layu cubi ta zaza'ra. Quie lëyedyi na' rñando'. ⁶ Na'ra zu tu parte lë'è guichi la'ya quie Diuzi ga rnan cani:

¿Cabizi naca quie yaca ben' rda lao yedyi layu, chi luë' Diuzi, reyëchi'la'adyo' leyaquë'?

¿Cabizi naca quie yaca ben' nita' lao yedyi layu, chi luë' Diuzi, raquelo' bi raca quieyaquë'?

⁷ Dyin bëlo' luë' bzulo' ja benë' ledao'zi menosra ca ja ángel, pero tu chi'zi.

Pero udapo' lëjè' bala'ana.

⁸ Bëlo'jè' mandado inabë'jè' lao yugulute ta de lao yedyi layu.

Cana' rnan lë'è guichi la'ya quie Diuzi. Na'ra cati bë Diuzi mandado inabë' ja benë' lao yugulute ta de lao yedyi layu, bipca'nnë' tzala'la ni tu ta bigalen quiejè'. Pero neziro binedyin dza ta galen quiejè' yugulu ta de lao yedyi layu. ⁹ Lëscan' neziro cabë' bë Diuzi conlë Jesús. Bënë' mandado gaca Jesús ledao'zi menosra ca yaca ángel, pero tu chi'zi. Yela' nedyé'è quie Diuzi bënë' mandado guti Jesús lao laza yugulu benë'. Na'ra nua Diuzi lëbë' ben' belaoartzegue, ben' bala'ana gula nun quie dan' bedzagalaonë' gutinë' lë'è yaga cruzo.

¹⁰ Yugulu ta de bë bzalo Diuzi naque quienë'. Re'en Diuzi yeyo yugulu ben' nao xnezë' guibá ga zuë'. Quie lena' bënë' mandado bedzagalao Jesucristo cuenda ulu'en dyë'ëdi naca Cristo ben' bide dula' xquia quie, huazuenë' gatinë' lë'è yaga cruzo ta uselanë' yaca benëchi'. ¹¹ Porque Cristo len ben' nao xnezë', naca tuzi Xuzijë'. Nacajë' ben' la'ya nun quie dan' bëla'ya Cristo lëjè'. Quie lena' biredue' zi'i Diuzi yëbinë' ra'o: "Nacale ben' bicha'."

¹² Lena' rnën lë'è guichi la'ya quie Diuzi cani:

Huëpa' ja ben' bicha' cabë' ben' ze gula naca Diuzi.

Gula' ja himno quienë' ga redupa ja benë'.

¹³ Lëscan' rnën cani lë'è guichi la'ya:

Në'ëdi' rzudyi'ilia' Diuzi.

Lëscan' rnën cani:

Ni zulia' ben' bicha', ben' nao xneza', ben' ben Diuzi në'ëdi'.

¹⁴ Cabë' naca quie ben' nao xneza Cristo, nacajë' benë' yudzujë' ren nacajë' bë'ëla' zuba', lëscan' nacaré quie Jesús. Lëbë' guquë' benë', yudzurenë' ren nacarenë' bë'ëla' zuba' cuenda gatinë' lë'è yaga cruzo ta udyiaguinë' ben' rudyiaguinë' benëchi', ta inaro, xan' taxi'ibi'.

¹⁵ Dyin bë Cristo naca ben' nao xnezë' libre. Bira rdzëbijë' gatijë'. Cati dza rdajë' lao yedyi layu, cana' bdzëbijë' gatijë', guca quiejë' ca quie ben' zu lao xa'ne mala gula tu lala dza zujë' lao yedyi layu. ¹⁶ Pues bibida Cristo lao yedyi layu ta gacalënë' yaca ángel, dechan' bidë' ta gacalënë' yaca ben' naca zi'isuba Abraham, ta inaro, ben' nao xnezë'. ¹⁷ Quie lena' ben' zi' guque' benë' cabë' naca benë', ben' nao xnezë', ben' bichinë'. Cana' saque' gapë' dyin gaquë' pxuzi rñabë'ra lao Diuzi. Cana' uzucazinë' di'idza' una Diuzi huenë'. Cana' saque' yeyëchi'la'adyi'në' dyë'ëdi yaca benëchi'. Cana' saque' cubanë' dula' xquia quiejë'. Cana' saque' hueljè' Diuzi tuze. ¹⁸ Nun quie bedzagalao Cristo guquë' prueba bipsannë' bënë' cabë' mandado bë Diuzi huenë'. Cana' huazaque'në' gacalënë' dyë'ëdi nu ben' nao xnezë', ben' raca prueba.

3

Naca Jesús ben' rñabë'ra ca Moisés

¹ Na'ra, bicha', nacale ben' la'ya. Lena' rnia' le'e como dan' ulio Diuzi le'e gacale ben' quienë'. Quie lena' reya'ala' huele pensari dyë'ëdi cabë' naca quie Cristo Jesús. Naquë' ben' use'ela' Diuzi. Naquë' pxuzi rñabë'ra quiero ra'o ben' nao xnezë'. Cana' naquë' quiero. Cana' naca cabë' rue quiero quienë' yuguluro, naca tuzi cabë' rue quiero quienë'. ² Bde' Diuzi Jesús use'elë' lëbë' gaquë' pxuzi rñabë'ra quiero. Bzucazi Jesús di'idza' ca di'idza' gudyi Diuzi lëbë' huenë'. Lëscan' Moisés, bzurëcazinë' di'idza' ca di'idza' gudyi Diuzi lëbë' ta gacalënë' ben' quie Diuzi unita' dza na', ta inaro, yaca ben' Israel, ben' naca familia quie Diuzi. ³ Pero nacara Jesús ben' rñabë'ra ca Moisés. Ca quie nacara ben' uzulao rue familia ben' rñabë'ra ca zi'inë', cana' nacara Jesús ben' rñabë'ra ca Moisés. ⁴ Quie yugulu familia unita' ben' uzulao bë ta unita' zi'inë'. Pero Diuzi uzulaonë' bënë' yugulu ta de. ⁵ Quie lena' Moisés, como ben' rue mandado quie Diuzi, bzucazinë' di'idza' ca di'idza' gudyi Diuzi lëbë' gacalënë' ben' quie Diuzi unita' dza na', ta inaro, yaca ben' Israel, ben' naca familia quie Diuzi. Guca dyin quie Moisés udxoguenë' lëjè' ca di'idza' una Diuzi cabë' ta gaca dza zaza'ra. ⁶ Lëscan' bzucazi Cristo di'idza' ca di'idza' gudyi Diuzi lëbë'. Pero netza' cabë' naca quie Cristo, porque nun quie naquë' zi'i Diuzi racalënë' ra'o, ben' nao xnezë' nacaro familia quie Diuzi. Cana' naca quiero chi inaoro xnezë' du guicho du la'adyi'ro, chi biansanla'adyi'ro sudyi'ilëro lëbë', chi suro gusto cuezaro dyë'ëdi hasta dza gatiro.

Cabë' una Diuzi quie ben' quienë', ben' yeyo ga zuë' yezila'adyi'në'.

⁷ Quie lena' naca quiero cabè' una Bichi Be quie Diuzi dza na'. Lena' rnèn lè'è guichi la'iya quie Diuzi cani:

Na'adza, chi tali rele bi na Diuzi le'e,

⁸ bigacale ben' laxta'o zidi, cabè' bè bala ben' unita' dza na' ptza'jè' Diuzi.

Bèjè' Diuzi zèdi hasta beyudiyi paciencia quienè', cati dza udajè' lao lato dachi.

Lena' una Bichi Be quie Diuzi gudyinè' lèjè' cani:

⁹ Lao lato na' bè xuzixta'ole nè'èdi' zèdi hasta beyudiyi paciencia quia'.

Cana' bèjè' la'acazi blè'èjè' cabè' tahuen bia' quiejè' lao chopa galo iza.

¹⁰ Quie lena' bdzè'èda' lèjè', gucha' jè': "La'acazi nezile ca re'enda' huele, pero bire'enle huele ca re'enda'. Bire'enle huebè'le xneza'."

¹¹ Quie lena' bdzè'èda' lèjè' uchugulia' quiejè' bzètoga' laohua' unia': "Biguidajè' ga zua' yezila'adyi'jè'."

Cana' una Bichi Be quie Diuzi dza na'.

¹² Bicha', gapale cuidado bigacale ben' laxta'o yaladyi' usanla'adyi'le xneza Diuzi nun quie dan' bihue quiele quienè'. ¹³ Mejorla hue'lèle laguedyile di'idza' zela'adyi' yugu dza tu nede lato. Cana' reya'ala' huele cuenda bihue dula' xquia quiele le'e gan, na' huele condre Diuzi. ¹⁴ Porque chi inaoro xneza Cristo biidzebiro biusanla'adyi'ro sudyi'ilèronè' dyè'èdi, na'ra nacaro ben' quienè'. Cabè' bèro tanèro cati uzulaoro unaooro xnezè', cana' re'ennè' huero hasta dza cati gatiro. ¹⁵ Lena' rnèn lè'è guichi la'iya quie Diuzi cani:

Na'adza, chi tali rele bi na Diuzi le'e, bigacale ben' laxta'o zidi cabè' bè bala ben' unita' dza na' ptza'jè' Diuzi.

Cana' rnèn lè'è guichi la'iya quie Diuzi. ¹⁶ Na' inaba' le'e tu di'idza'. ¿Nuzi ja ben' bzènaga xti'idza' Diuzi, na' ude beyudiyi bzènagajè' xti'idzè', caora na' ptza'jè' lèbè'? Pues yaca ben' yedyi quie Moisés, ben' Israel, ben' ulioguè' nación Egipto, lèjè' bèjè' cana'. ¹⁷ Lèscan' inaba' le'e: ¿Nuzi ja ben' bdza' Diuzi lao chopa galo iza? Pues yaca ben' bè dula' xquia. Quie lena' bdza' Diuzi lèjè' gutijè' lao lato dachi. ¹⁸ Lèscan', ¿nuzi ja ben' uchuguli Diuzi quie, bzètoguè' laohuè' unè' biguidajè' ga zuè' yezila'adyi'jè'? Pues yaca ben' bibè quie quie Diuzi, lèjè' uchugulinè'. ¹⁹ Na'ra blè'èro cabè' guca quiejè' biuzaque' yeyojè' ga zu Diuzi como dan' bibè quiejè' quie Diuzi.

4

¹ Quie lena' tu raca nrega'nlè Diuzi ra'o di'idza' ta yeyoro ga zuè' yezila'adyi'ro, reya'ala' gapale cuidado ta hue quiele quie Diuzi, yela' na' yeyole ga zunè' yezila'adyi'le. ² Porque cabè' udixoguè' Diuzi yaca ben' unita' tiempote cabè' bènè' quiejè' ta yeyojè' guibá, lèscan' udixogue'rènè' ra'o. Pero para lèjè' biben sirve bzènagajè' xti'idza' Diuzi, porque tu bzènagazijè'n bibèjè' casa hue quiejè' xti'idza' Diuzi. ³ Pero ra'o, ben' nao xneza Cristo, hueyoro ga zu Diuzi ta yezila'adyi'ro dza gatiro. Bigaca quiero cabè' una Diuzi lè'è guichi la'iya quienè' cani:

Quie lena' bdzè'èda' lèjè', uchugulia' quiejè' bzètoga' laohua' unia' biguidajè' ga zua' yezila'adyi'jè'.

Cana' una Diuzi dza na'te. Pero cala bibè Diuzi ga guidajè' yezila'adyi'jè', como dan' nugaohue Diuzi dyin quienè' bènè' dza cati udixunè' yedyi layu. ⁴ Zu ga rguixogue'n ra'o lè'è guichi la'iya quie Diuzi cabè' bè Diuzi quie dza gadyi. Rnèn cani:

Pseyudiyi Diuzi dyin quienè' lao xopa dza.

Na'ra dza gadyi bezila'adyi'nè'.

⁵ Lèscan' zu ga rnèn lè'è guichi la'iya quie Diuzi cani:

Biguidajè' ga zua' yezila'adyi'jè'.

Cana' una Diuzi dza na'. ⁶ Pero neracara falta yaca ben' yeyo yezila'adyi' ga zu Diuzi. Na'ra yaca ben' unita' tiempote, ben' bzènaga xti'idza' Diuzi ca unè' gudyinè' lèjè' cabè' bènè' quiejè' ta yeyojè' guibá, pero bibè quiejè' xti'idza' Diuzi, na' biuyojè' ga zu Diuzi ta yezila'adyi'jè'. ⁷ Quie lena' bzu Diuzi itu tiempo cati reya'ala' hue quiero quie xti'idza'nè'. Lètiempo na' nacan na'adza. Cana' nacan cabè' una rey David dza na'te, dza unita' ben' unita' ja tiempote. Cabè' una Diuzi, cana' una rey David con ca rguixogue'n ra'o lè'è guichi la'iya quie Diuzi cani:

Na'adza, chi rele bi na Diuzi le'e, bigacale ben' laxta'o zidi.

Cana' una Diuzi dza na'. ⁸ Chi tali lao na'a Josué uyo yaca ben' unita' tiempote guibá bezila'adyi'jè', na' biina Diuzi quie tiempo zaza'ra. ⁹ Lena' neziro neza'ra dza yeyo yaca ben' nao xneza Jesús guibá yezila'adyi'jè'. ¹⁰ Na'ra cati yeyoro ga zu Diuzi yezila'adyi'ro, bira sacazi'ro huero dyin. Gaca quiero yezila'adyi'ro cabè' bezila'adyi' Diuzi dza na' cati beyudiyi bzalonè' yedyi layu. ¹¹ Quie lena' reya'ala' inaoro xneza Cristo du guicho du la'adyi'ro ta yeyoro ga zuè' yezila'adyi'ro. Reya'ala' gaparo cuidado nu nu hue cabè' bè ja ben' unita' tiempote, bibè quieyaquè' xti'idza' Diuzi.

¹² Cabè' naca Diuzi ben' zu neban tuzioli, cabè' na' nacaré xti'idzè'. Cabè' naca Diuzi ben' de yela' huaca quie, cabè' na' nacaré xti'idzè'. Tzu'ura xti'idzè' guicho laxta'oro zitu'ra ca tu espada neduchi'n rupalaona. Tzu'uteran ra'o zitu' ga yu'u bichi be quiero. Tzu'uteran ra'o zitu' ga zelaozi ga yu'u pensari quiero. Rulu'en ca naca pensari yu'u lu'u guicho laxta'oro, chi pensari huen, chi pensari mala. ¹³ Ni tu ta bè Diuzi bisaque' ucachi'laona lao Diuzi. Rlè'è Diuzi yugulu ca ruero. Bisaque' igachi' ca naca quiero laohué'. Lao lèbè' yezacalao yugulu cabè' babèro, chi bèro tahuen, chi bèro tamala.

Naca Jesús pxuzi rnabè'ra quiero

¹⁴ Jesús, zì'i Diuzi, naquè' pxuzi rnabè'ra quiero, bazyoguè' guibá ga zu Diuzi. Quie lena' reya'ala' huero seguir biyehuédiro inaooro xneza Cristo. ¹⁵ Na'ra Cristo racané' reyèchi'la'adyi'nè' ra'o como dan' lèbè' cuinnè' guquè' prueba dza na', chi huenè' tamala, chi bihuenè' tamala, cabè' raca quiero racaro prueba, pero lèbè' bibènè' tamala. ¹⁶ Quie lena' reya'ala' hue quiero xti'idza' Diuzi du guicho du la'adyi'ro, biidzebiro hue'lèro lèbè' di'idza' nun quie zunè' dispuesto gacalènè' ra'o, re'nè' xlatonè' guibá ga rnabè'teranè' ra'o. Chi huero cana', yeyèchi'la'adyi'nè' ra'o gacalènè' ra'o hora cati raca zèdi quiero.

5

¹ Rbio yaca benè' nu ben' gaca pxuzi rnabè'ra quiejè' de entre laguediyjè' ta tzesènè' lao Diuzi lao lazajè'. Lèscan' nacan dyin quienè' gutinè' yaca bia naca gun quie Diuzi udyianè'ba' lao ru'aba cuenda yezi'ze Diuzi dula' xquia quiejè'. ² Na'ra como benè'zi naca pxuzi rnabè'ra, derè dula' xquia quienè'. Quie lena' nezinè' yeyèchi'la'adyi'nè' ben' binenezi, ben' birue quie xti'idza' Diuzi. ³ Lèscan' nun quie derè dula' xquia quienè', tanèro ruen zi gutinè' tu bia udyianè'ba' lao ru'aba cuenda yezi'ze Diuzi dula' xquia quienè' cuinnè', na'tera huazaquè' udyianè' ituba' lao ru'aba cuenda yezi'ze Diuzi dula' xquia quie ja ben' yedyi quienè'.

⁴ Nitu nitu bisaque'nè' huenè' cuinnè' pxuzi rnabè'ra. Dechan' Diuzi cuioguè' nu ben' huenè' bala'ana, huenè' pxuzi rnabè'ra. Cabè' bè Diuzi tiempote ulioguè' Aarón pxuzi rnabè'ra, cana' cuio Diuzi nu ben' gaca pxuzi rnabè'ra. ⁵ Lèscana'rè guca quie Cristo. Quele ulionè' cuinnè' pxuzi rnabè'ra, dechan' Diuzi udapè' lèbè' bala'ana, ulionè' lèbè' naquè' pxuzi rnabè'ra con ca una Diuzi caniga:

Luè' naco' zì'ina', abdyin dza inezi ja benèchi' zì'ina' luè'.

⁶ Lèscan' zurè itu parte lè'è guichi la'ia quie Diuzi ga una Diuzi rëbinè' lèbè':

Luè' naco' pxuzi tuzioli, ca pxuzi guca Melquisedec tiempote, cana' naco' pxuzi.

⁷ Cana' una Diuzi. Na'ra dza uda Cristo lao yedyi layu, caora na' unè' zidzo blidzanè' Diuzi uredyiné' unabanè' Diuzi ta gacalènè' lèbè', como dan' naca Diuzi ben' napa poder ta ucuasa ucu'onè' lèbè', biguti ja benè' lèbè'. Na' como zu Cristo dispuesto ta huenè' ca re'en Diuzi huenè', benè' lèbè' cati blidzanè' lèbè' gacalènè' lèbè'. ⁸ La'acazi naca Cristo zì'i Diuzi, ben zi bedzagalaonè' cuenda ulu'en quienè' huazuenè' hue quienè' xti'idza' Diuzi la'acazi raca zèdi gula quienè'. ⁹ Cati bablu'en quienè' huazuenè', na'ra guquè' ben' run yela' neban tuzioli quie ja ben' nao xnezè'. ¹⁰ Bdè' Diuzi lèbè' pxuzi rnabè'ra quiero. Ca pxuzi guca Melquisedec tiempote, cana' naquè' pxuzi.

Nacan zudyi usanla'adyi'ro bira inaooro xneza Cristo

¹¹ Di'idza' zèra de ta inando' le'e cabè' naca quie Cristo, pero zèdi nacan ta uxi'idze'ndo' le'e, porque canezi rioñe'ele. ¹² Como baziote tiempo banezcabile' naca una Diuzi, lena' reya'ala' uxi'idze'le yaca ben' tula cabè' unanè'. Pero neruen zi quile yexi'idze'ndo' le'e tatula ta nacan yalo quie xti'idza' Diuzi. Abeyaca quiele ca quie xcuidi'. Puro ta nacan yalo quie xti'idza' Diuzi re'enle uxi'idze' benè' le'e. Binegacale uxi'idze' benè' le'e ta naca zèdi quie xti'idza' Diuzi. ¹³ Yaca ben' binegaca tzioñe'e ta naca zèdi quie xti'idza' Diuzi, nacajè' ca quie xcuidi' nera'adyi'. Binetzulaojè' hue quieyaquè' dyè'èdi quie xti'idza' Diuzi. ¹⁴ Pero ta naca zèdi quie xti'idza' Diuzi, nacan para ben' huaca, ben' bayulao rue quie xti'idza' Diuzi, como dan' banezinè' rnaonè' tahuen, birnaonè' tamala.

6

¹ Quie lena' huero seguir usèdiro ta tzioñe'ero mazara cabè' reya'ala' tzioñe'ero ta hue quiero xti'idza' Diuzi mazara. Bira usèdiro puro ta baoyoñe'ero dza na' cati uzularoo unaooro xneza Cristo. Banezile cabè' rguixogue' xti'idza' Diuzi, rguixogue'n cabè' reya'ala' utza'ro pensari quiero bira huero xquia, rguixogue'n cabè' reya'ala' hue quiero xti'idza' Diuzi, ² rguixogue'n quie bautismo, rguixogue'n cabè' huero uquichiro na'aro lao guicho ben' nao xneza Cristo, ben' gapa dyin cati dza sulaonè' gapanè' dyin. Lèscan' rguixogue'n cabè' naca quie ben' huati huebanjè', rguixogue'n quie dza gaca juicio. ³ Pues huero seguir usèdiro tzioñe'ero mazara como cana' re'en Diuzi huero.

⁴ Cana' reya'ala' huero, porque chi babeyue Diuzi ra'o ben' cubi, chi baozulaoro si'ro ca ta run Diuzi ra'o, chi bayu'uro Bichi Be quienè', ⁵ chi baozulaoro usèdiro tziõñe'ero cabè' na di'idza' quienè', chi baozulaoro usèdiro tziõñe'ero quie yela' huaca gata' quiero dza cati taro lao dyila yu cubi ta zaza'ra, ⁶ chi chu'unro tzala'la ca una Diuzi, chi bira inaoro xnezè', na'ra bisaque' yeyue Diuzi ra'o ben' cubi tatula yetza'ro pensari quiero tatula. Chi huero cana', naca quiero ca quie ben' uda' zi'i Diuzi lè'è yaga cruzo tatula, quitoronè' zaquè'lao lao ja benè'. ⁷ Chi huero cana', naca quiero ca quie layu ri'on nisa cati ruen nisayo. Chi hue'n usecho huen quie ben' raza ra'n laona, na'ra layu dya'a na', huela'iya Diuzi len. ⁸ Pero chi hue'n puro guixi', nacan layu mala bibi zaca'n. Ruen žudyi udze'de' Diuzi len, hueyudyi huedu quien tzeina.

Naca seguro quiero lao Diuzi

⁹ La' acazi inando' le'e cana', le'e bicha', ben' nedyè'èda', quie le'e nužela'adyi'ndo' huela'iya Diuzi le'e, rnaole neza ta yeyole guibá. ¹⁰ Naca Diuzi ben' rue puro ta yu'u ni'a xnezi. Bigala'adyi'nè' cabè' bèle dza na' blu'ele cabè' nedyè'èle gualèle ja ben' bichiro, ben' nao xneza Cristo. Lèscan' nezi Diuzi neruele na'a cabè' bèle dza na'. ¹¹ Na'ra nètò' re'enndo' huele seguir yugulule inaole xneza Cristo du guicho du la'adyi'le hasta dza cati gatile nužela'adyi'le gun Diuzi le'e ca ta rbezale gunnè' le'e. ¹² Bire'enndo' yehuèdile, re'enndo' huele seguir huele cabè' rue yaca los demás ben' nao xneza Cristo. Nun quie rue quiejè' ca na Diuzi, redaohuejè' rbezajè' dyè'èdi dza hue' Diuzi lèjè' cabè' di'idza' bega'nè' lèjè'. ¹³ Na'ra quie dza cati bega'nè' Diuzi Abraham di'idza', bgunte Diuzi cuinnè' huenè' ca unè' huenè', como dan' ganura ben' tula zu nacara ben' rnabè'ra ca lèbè' ta uguntènè' laohue. ¹⁴ Na'ra unè' Rèbinè' Abraham: "Talicazi inia' luè', huela'iya' luè' taze, hueze ži'isubo." Cana' una Diuzi gudyinè' lèbè'. ¹⁵ Pues dyè'èdi uleza Abraham dza hue Diuzi cabè' unanè' huenè' quienè'. Na'ra cati bdyin dza, bècazi Diuzi cabè' unanè' huenè' quienè'. ¹⁶ Cati rugunte ja benè', ruguntejè' lao Diuzi. Cati raca dila binaca lèbi ca rnajè' lao ben' rnabè', na'ra ruguntejè' lao Diuzi nacan tali ca rnajè'. ¹⁷ Lèscan' Diuzi, bgu'untènè' dza na' laohuè' cuinnè' unè' nacan tali ca unanè'. Gu'unne' blu'enè' dyè'èdi zuè' dispuestò uzunè' di'idza' ca di'idza' unè', bibetza'nè' ca unè' huenè'. Quie ben' bega'nè' Diuzi di'idza', lèben' na' ablu'e Diuzi seguro na' huenè' ca unè' huenè'. ¹⁸ Naca chopà ta rue Diuzi bisaque' itza'n. Bisaque' itza'n ca unè' huenè'. Lèscan' bisaque' itza'n ca bgu'untènè' laohuè' cuinnè' huenè'. Bisi' Diuzi yè'. Dan' cana' rue Diuzi, lena' uxela'adyi'n ra'o taže. Cana' raca quiero, ben' rnaba lao Diuzi, ta huia ina'nè' ra'o. Cana' raca quiero, ben' rzudyi'lè Diuzi, nužela'adyi'ro hue Diuzi quiero cabè' unè' huenè' quiero. ¹⁹ Naca seguro quiero lao Diuzi cabè' naca seguro quie nu barco nerio len tu guiba naca zi'i gula, bisaque' udyiga be len tzala'la. Cana' naca quiero huazaque' yeyu'utero hasta ga zu Diuzi guibá. ²⁰ Lègan' na' naca ga uyu'u Jesús, psalonè' neza quiero cuenda saque' yeyu'urrèro ga beyu'unè' guibá. Cana' naca quie Jesús, naquè' pxuzi rnabè'ra quiero tuzioli cabè' pxuzi guca Melquisedec dza na'.

7

Naca Jesús pxuzi ca pxuzi guca Melquisedec

¹ Lèben' lao Melquisedec guquè' rey quie ciudad Salem. Lèscan' guquè' pxuzi, ben' rue mandado quie Diuzi quiero, ben' zu sibi. Na' cati bedyin Abraham, uyoguè' lao dila, bènè' gan lao yaca rey. Caora na' bro Melquisedec ptilè' lèbè' bèla'iyànè' lèbè'. ² Na' bè' Abraham Melquisedec tu cue'na quie lao chi cue' yugulu ta bènè' gan uyoguè' lao dila. Na'ra cabè' laohuè', laohuè' Melquisedec, ta inaro xti'idza'ro: "Ben' naca rey, ben' rue ta yu'u ni'a xnezi." Lèscan' como guquè' rey quie ciudad Salem, ta inaro xti'idza'ro: "Yela' ruela'iya quie Diuzi", quie lena' rnèrè laohuè' xti'idza'ro: "Ben' naca rey, ben' rue yela' ruela'iya quie Diuzi." ³ Lè'è guichi la'iya quie Diuzi birguixogue'n ra'o quie xuzi žna'nè', ni quie xuzixta'onè'. Birguixogue'n quie dza golonè', ni quie dza gutinè'. Naquè' ca que ži'i Diuzi, naquè' pxuzi tuzioli.

⁴ Na'ra ulehuecara pensari ca tu ben' belao naca Melquisedec. Pues hasta cuin xuzixta'oro Abraham bè'nè' lèbè' tu cue'na quie lao chi cue' yugulu ta bènè' gan uyoguè' lao dila. ⁵ Na'ra cabè' na lè'è guichi ley pca'n Diuzi lao na'a Moisés dza na'te, rguixogue'n quie yaca pxuzi, ben' naca familia quie xuzixta'oro Leví. Ruen mandado ta uquižujè' yaca ben' Israel tu cue'na quie lao chi cue' quie ta de quiejè', ba'ala'cazi ben' yedyi quiejè', ba'ala'cazi ben' naca ži'isuba Abraham cabè' lèjè'. ⁶ Pero Melquisedec, ba'ala'cazi binaquè' familia quie xuzixta'oro Leví, bè' Abraham lèbè' tu cue'na quie lao chi cue' ta de quienè'. Na' bèla'iya Melquisedec Abraham, ben' bega'nè' Diuzi di'idza' ta yeže ži'isubanè'. ⁷ Na'ra tabalacazi na' nacara belao ben' ruela'iya quele ca ben' raca la'iya. ⁸ Pues ca naca quie yaca pxuzi, ben' napa dyin uquižujè' tu cue'na quie lao chi cue' ta de quie ben' Israel, cati beyudyi dza quiejè' gutijè'. Pero ca naca quie Melquisedec, rnèn quienè' lè'è guichi

la'iya quie Diuzi ca quie ben' nezu bineyudyi dza quie. ⁹ Lëscan' quie Leví, ben' pquiizu tu cue' quie lao chi cue'na ta de quie ben' Israel dza na', ba'ala'cazi binesuë' lao yedyi layu caora uzu Melquisedec, huazaque' inaro bë'rënë' Melquisedec tu cue' quie lao chi cue'na ta de quienë' caora bedila xuzixta'onë' Abraham Melquisedec tu neza, na' bënë' lëbë' tu cue' quie lao chi cue'na ta de quienë'. ¹⁰ Cana' huazaque' inaro como dan' caora na' cati bedila Abraham Melquisedec tu neza, nenu'a Abraham Leví lu'u cuerpo quienë', nenaca Leví forma quie bini lu'u cuerpo quie Abraham, ta inaro nenaca Leví ben' zagalora, ben' gaca zi'isuba Abraham dza zaza'ra.

¹¹ Lao na'a yaca pxuzi, ben' naca familia quie Leví, uzi' yaca ben' Israel ley quie Diuzi. Lëyaca pxuzi na' nacajë' zi'isuba xuzixta'oro Aarón. Na'ra chi tali huaca hue yaca pxuzi na' ta bigata' dula' xquia quie ja ben' nao ley pca'n Diuzi lao na'a Moisés, na'ra birnaban guida ben' tula, ben' gaca pxuzi cabë' pxuzi gaca Melquisedec. ¹² Cati yetza' quie pxuzi, lëscan'rë decazide yetza'n quie ley pca'n Diuzi lao na'a Moisés. ¹³ Na'ra quie Señor quiero, rnën lë'ë guichi la'iya quie Diuzi naquë' pxuzi ca guca Melquisedec pxuzi. Pero binaca Señor familia quie xuzixta'oro Leví. Naquë' familia quie ni tu ben' biguca pxuzi. ¹⁴ Dyë'ëdi neziro naca Señor quiero familia quie xuzixta'oro Judá. Na' biuna Moisés gaca pxuzi ben' naca familia quie Judá.

¹⁵ Lena' reya'ala' tzioñe'ero dyë'ëdi cati ineziro babida tu pxuzi cubi, ben' naca pxuzi cabë' pxuzi gaca Melquisedec. ¹⁶ Binaca Jesús pxuzi nun quie ley quie Moisés ga rguixogue'n nu familia quie ben' Israel reya'ala' gaca pxuzi, dechan' naca Jesús pxuzi nun quie biyeyudyi yedu yela' huaca quienë', tuzioli sunë'. ¹⁷ Porque cani una Diuzi rëbinë' Jesús:

Luë' naco' pxuzi tuzioli, ca guca Melquisedec pxuzi, cana' naco' pxuzi.

Cana' una Diuzi dza na'. ¹⁸ Quie lena' beyula mandamiento uduxu Diuzi dza na' como dan' bira ben dyin. ¹⁹ Pues binapa ley pca'n Diuzi lao na'a Moisés fuerza valor ta gaohue quiero cuenda saque' huelë Diuzi ra'o tuze. Pero lao laza ley na', dera ta nacara dya'a quiero. Pues nacara dya'a quiero chi sudyi'llëro Cristo ta gaohue quiero cuenda saque' huelë Diuzi ra'o tuze.

²⁰ Bgunte Diuzi cuinnë' dza cati bdë'në' Cristo gaquë' pxuzi. ²¹ Cati bdë' Diuzi ben' gaca pxuzi dza na'te, bibguntenë' cuinnë' ta gaca ben' bdë'në' pxuzi. Pero cati bdë' Cristo gaquë' pxuzi, bguntenë' cuinnë' unë' quie Cristo cabë' rnën lë'ë guichi la'iya cani:

Bgunte Diuzi cuinnë', bibetza'në', huenë' ca unë' huenë', unë':

"Luë' naco' pxuzi tuzioli, ca guca Melquisedec pxuzi, cana' naco' pxuzi."

Cana' una Diuzi. ²² Nun quie bgunte Diuzi cana', quie lena' naca cuenda quie Cristo ta uzunë' di'idza' huenë' cabë' di'idza' bega'ntza'olë Diuzi ra'o tacubi. Lëdi'idza' na' nacaran huen ca di'idza' bega'ntza'olënë' ben' unita' tiempote. ²³ Ben' zë gucajë' pxuzi quie ben' Israel tiempote, pero cati bdyin dza quiejë' gutijë', bega'n ben' tula lao lazajë'. ²⁴ Pero como bigati Jesús, tuzioli naquë' pxuzi, ganura yega'n gaca pxuzi lao lazanë'. ²⁵ Quie lena' huazaque' uselanë' ra'o yeyoro guibá tuzioli. Nacaro ben' uuelë Diuzi tuze nun quie rue quiero quie Cristo. Lena' nacan tali, como dan' tuzioli neban Cristo tu ulidzë' Diuzi tanun quiero.

²⁶ Cani naca quie Jesús: Naquë' pxuzi rnabë'ra quiero, naquë' ben' la'iya, bide ni tu dula' xquia quienë'. Netza' quienë', binaca quienë' ca naca quie ben' rue dula' xquia. Zuë' guibá ga naquë' ben' bala'anatzegue. ²⁷ Binaca quie Cristo cabë' naca quie yaca los demás pxuzi rnabë'ra. Yugu dza rnaban gutijë' yaca bia guixi' udyiajë'ba' lao ru'aba nacaba' gun quie Diuzi. Tanëro rnaban gutijë' tuba' udyiajë'ba' lao ru'aba ta yezi dula' xquia quiejë' cuinjë'. Na'tera gutijë' ituba' udyiajë'ba' lao ru'aba ta yezi dula' xquia quie ja ben' Israel. Pero netza' cabë' bë Cristo. Tu lasazi gutinë' guquë' cuinnë' gun quie Diuzi ta yezi dula' xquia quie yaca benëchi'. ²⁸ Con ca naca ley pca'n Diuzi lao na'a Moisés, bdë' Diuzi ben' gaca pxuzi rnabë'ra. Pero como nacajë' benë'zi, decazi dula' xquia quiejë'. Pero netza' cabë' bë Diuzi cati bdë'në' zi'inë' gaquë' pxuzi. Beyudyi pca'nnë' ley quienë' lao na'a Moisés, na'ra bguntenë' cuinnë' bdë'në' zi'inë' gaquë' pxuzi rnabë'ra. Naca zi'inë' pxuzi rnabë'ra, ben' lila'adyi' tuzioli.

8

Naca Jesús ben' zëlë ra'o lao Diuzi

¹ Pero ta nacaran belao inando' le'le, nacan caniga: Zu tu pxuzi rnabë'ra quiero. Lëbë' re'në' zaquë' yebë ga re' Diuzi guibá. ² Ga ruenë' dyin quie pxuzi lu'u idao' zu guibá nacan dugalo ta bë Diuzi, quele ta bë ja benë'. ³ Na' bdë' Diuzi ja ben' gaca pxuzi rnabë'ra cuenda gutijë' yaca bia guixi' udyiajë'ba' lao ru'aba gacaba' gun quie Diuzi. Na' quie Jesucristo gaquë' cuinnë' gun quie Diuzi. Guca quienë' ca quie ben' bdyia cuine lao ru'aba gaca gun

quie Diuzi dza cati gutinè' lè'è yaga cruzo. ⁴ Chi lèbè' nezuè' lao yedyi layu, bihuenè' dyin cabè' dyin rue pxuzi como dan' zu ben' naca pxuzi, ben' rudyia gun quie Diuzi lao ru'aba como ca rnèn lè'è guichi ley pca'n Diuzi lao na'a Moisés. ⁵ Pero cabè' ruejè', ruejè' dyin quie pxuzi, cabè' na' naca quiejè' ca quie tu copia ta ulu'ezin quie idao' ta zu guibá. Neziro naca quiejè' ca quie copia como dan' cati ilè'è'ti'zi rdziogue sulao Moisés huenè' idao' de la'ari', caora na' una Diuzi gudyinè' lèbè': "Una' dyè'è'di, bè idao' de la'ari' con ca blu'ena' luè' dza na' cati ptila' luè' lao ya'a." Cana'una Diuzi gudyinè' Moisés. ⁶ Pero Cristo, ben' naca pxuzi rhabè'ra quiero, nacaran belao dyin quie pxuzi ruenè', como dan' naquè' ben' zèlè ra'o, ben' rute di'idza' quiero lao Diuzi con ca bega'ntza'olè Diuzi ra'o tacubi ta nacaran huenra.

⁷ Cana' naca quiero como dan' chi tali birdziogue gaohue cabè' bega'ntza'olè Diuzi ben' unita' tiempote, na'ra biben zi dza na' yega'ntza'olè Diuzi ra'o tacubi. ⁸ Pero blè'è Diuzi bibè quieyaquè' di'idza' bega'ntza'olè Diuzi lèjè'. Quie lena' rnèn quiejè' lè'è guichi la'iya quie Diuzi caniga:

Cani una Diuzi:

Huadyin dza yega'ntza'olia' yaca ben' Israel len ben' laguedyijè' ben' Judá tacubi.

⁹ Huetza' cabè' di'idza' bega'ntza'olia' xuzixta'ojè' dza na' cati gualia' ulioga' xuzixta'ojè' nación Egipto ga użacazi'yaquè'.

Bibè quie xuzixta'ojè' di'idza' ca di'idza' bega'ntza'olia' lèjè'.

Quie lena' apanla'adya' lèjè'.

¹⁰ Cani naca di'idza' yega'ntza'olia' ben' Israel tacubi cati idyin dza bira usanla'adya' xuzixta'ojè':

Udz'ajè' pensari quia' lu'u guicho laxta'ojè'.

Na'ra nè'è'di' gaca' Diuzi quiejè', na' lèjè' gacajè' ben' quia'.

¹¹ Bira inaban uxi'idze'jè' quie quiejè' ca naca quia'.

Ni laguedyijè', ni bichijè', bira inaban uxi'idze'jè' lèjè' cuenda huebè'jè' nè'è'di', como dan' yugulujè' huebè'jè' nè'è'di' desde ben' gula hasta xcuidi'.

¹² Huezi'zia' dula' xquia quiejè', bira yeza'la'adya' quie dula' xquia quiejè'.

Cana' una Diuzi. ¹³ Na' cati una Diuzi yega'ntza'olènè' ra'o tacubi, cana' unè' como dan' bira hue dyin cabè' bega'ntza'olènè' ben' unita' tiempote. Na'ra tu ta bira huen dyin banacan tagula, baruen bago yeyudyi yedu quien.

9

Ni rnèn quie tu idao' zu lao yedyi layu, len itun zu guibá

¹ Na'ra cabè' naca di'idza' bega'ntza'olè Diuzi xuzixta'oro dza na', unènan cabè' re'en Diuzi hue ja pxuzi lu'u tu idao' de la'ari' ta zu lao yedyi layu ga uyonla'adyi'jè' lèbè'. ² Léidao' na' nacan caniga. Tanèro zu tu cuarto laonan Lato Naca La'ia. Lèlu'unan na' zu tu candelero. Na' zèrè tu mesa ga dyia yèta xtila naca la'ia. ³ Ga beyudyi tu cuarto zu tanèro, na' zè itu la'ari'. Na' xcu'udzu la'ari' na' zu itu cuarto laona Lato Naca La'iyatzegue. ⁴ Na'ra lèlu'u cuarto na' zu tu mesa dao' ga ruzejè' yalo. Lèscan' zu tu caja ga yu'u di'idza' ca di'idza' bega'ntza'olè Diuzi xuzixta'oro. Lècaja na' duzete lè'èn zu ta naca belaozi oro. Na' lu'u caja na' zu tu yeso' de oro ga yu'u yèta xtila laona maná. Lèzi lu'u caja na' yu'u xaga quie Aarón ta bebe'zi'ine. Lèzi lu'u caja na' yu'u tu yo ta'a gan' bzu Diuzi chi mandamiento quienè'. ⁵ Na'ra lao caja zu chopa figura quie ángel laojè' querubines. Gatzo lao' ga zè ángel, na' raca titi' cabè' raca titi' ga zu Diuzi. Na'ra rzè ángel xilajè' lao caja na' ga bzio pxuzi rhabè'ra ren quie bia naca gun quie Diuzi cuenda yezi'ze Diuzi dula' xquia quie ben' Israel. Pero dena'zi, bihue'ro di'idza' zè cabè' ta guca lu'u idao' de la'ari' dza na'.

⁶ Pues cana' bèjè' quie lu'u idao' de la'ari'. Yugu dza uyu'u ben' naca pxuzi lu'u cuarto nèro quie idao' de la'ari' ta huenè' dyin ca naca dyin quie pxuzi de quienè' huenè'. ⁷ Na'ra cuarto urupe lu'u idao' de la'ari', na' ru'u tuzi ben' naca pxuzi rhabè'ra tu lasazi tu iza. Bè' tzu'unè' lu'u cuarto urupe, na' ruen zi quienè' hua'anè' ren quie bia guixi' naca gun quie Diuzi ta bzioquè'n lao caja ga yu'u tu yo ta'a gan' bzu Diuzi chi mandamiento quienè' cuenda yezi'ze Diuzi dula' xquia quienè' cuinnè'. Na'tera bziorènè' ren tatula quie itui bia guixi' ta yezi'ze Diuzi dula' xquia quie ben' yedyi quienè'. ⁸ Na' como cana' bèjè', lena' nacan ta bzioñe'e Bichi Be quie Diuzi ra'o de que tu raca nezu idao' de la'ari' naca chopa cuarto, bisaque' tzu'u ja benè' lu'u cuarto naca la'iyatzegue, ta inaro bisaque' tzu'uro ga zu Diuzi. ⁹ Yugu cabè' ta bèjè' lu'u idao' de la'ari' nacan tu ejemplo ta uzioñe'en ra'o cabè' naca quiero na'a. La'acazi bètijè' bia guixi' nacaba' gun quie Diuzi, la'acazi bziojè' ren quieba' lao ru'aba, biuzaque' yecubin pensari quiejè' ta tzu'ujè' pensari ca pensari re'en Diuzi tzu'u ben' rionla'adyi' lèbè'. ¹⁰ Cabè' naca quie yaca bia guixi' naca gun quie Diuzi bèti ja pxuzi, lena' rguixogue'n quie ta gaoro len ta yo'oro. Rguixogue'n quie ta huero yèri cuinro lao

Diuzi conlè nisa. Yugu len rguixogue'n quie bè'èla' žuba' quiero cabè' r nabè'n ra'o hasta dza cati yetza' Diuzi len.

¹¹ Pero na'a babida Cristo. Naquè' pxuzi r nabè'ra quiero. Bènè' quiero guca tahuen quiero con cabè' baraca quiero na'a. Ca naca lu'u idao' ga zu Cristo guibá ruenè' dyin quie pxuzi, nacaran huenra, nacaran dugalo idao'. Binaca idao' bè benè', ta inaro binaca idao' zu lao yedari layu. ¹² Na'ra cati uyu'u Cristo lu'u cuarto urupe ga naca la'iyatzegue, cala bi'anè' ren quie chibo ni ren quie bēdyihuagadao', dechan' ren quienè' cuinnè' bi'anè'. Cana' bènè' quiero yuguluro, uyu'unè' tu lasazi lu'u cuarto urupe ga naca la'iyatzegue, bènè' gan gata' yela' neban quiero tuzioli. ¹³ Na'ra tali na' de fuerza valor quie ren quie bēdyihuaga len ren quie chibo ta uzio ja pxuzi len ta yeyuen yēri lao Diuzi yaca ben' uditulè ta naca žudyi. Lēscan' de fuerza valor quie de quie tu bēdyihuagadao', bia bzejjè' lao ru'aba ta uziojè'n lao benè' ta yeyuen lējè' yēri lao Diuzi. Pero quie bè'èla' žuba'zi quiejè' huazuen huen lējè' yēri lao Diuzi. Biužaquē'n yeyuen yēri pensari quiejè' lao Diuzi. ¹⁴ Pero dera mazara fuerza valor quie ren quie Cristo. Du racalè Bichi Be quie Diuzi lēbè', psedyinnè' cuinnè' guquè' tu gun quie Diuzi ca naca bia guixi' guti ja pxuzi gun quie Diuzi. Pero naca Cristo gun quie Diuzi ta dya'atzegue, ta bidyia ni tu nidyi'. De fuerza valor quie ren quienè' yeyuen yēri pensari quiero lao Diuzi ta bira inao dula' xquia quiero ra'o, na' tzionla'adyi'ro lēbè', ben' neban tuzioli.

¹⁵ Quie lena' naca Cristo ben' zèlè ra'o, ben' rute di'idza' quiero lao Diuzi con cabè' naca di'idza' bega'ntza'olè Diuzi ra'o tacubi. Nun quie guti Cristo lè'è yaga cruzo, de lato ta yezi'ze Diuzi dula' xquia quie ja ben' unita' dza na', ben' xuzixta'oro, ben' bega'ntza'olè Diuzi tanèro. Lēscan' nun quie guti Cristo lè'è yaga cruzo, de lato ta hue' Diuzi lējè' yela' neban tuzioli, ta inaro ben' bdè'nè' gaca ben' quienè'. Hue' Diuzi lējè' yela' neban tuzioli con cabè' bega'nlnè' lējè' di'idza' dza na'. ¹⁶ Caora de tu acta de cancelación, solamente cati gatira ben' ulisa acta, na'tera hue dyin acta na'. ¹⁷ Tu neneban ben' ulisa acta, bisaque' quisi ben' tula ta de quienè'. Pero cati agutinè'. Na'ra huazaque' quisijè' ta de quienè' segun cabè' nan lè'è guichi. ¹⁸ Pues lente di'idza' bega'ntza'olè Diuzi xuzixta'oro tanèro, ben zi ulatojè' ren ta ulu'en rue di'idza' na' lējè' mandado. ¹⁹ Dza na' udixogue' Moisés lao ja ben' Israel cabè' naca yugu mandamiento pca'n Diuzi lao na'anè'. Na'tera ude beyudyi na', uzi'nè' tu zi'ila' zna len tu taca' yaga laona hisopo, na' psebisane' len lu'u nisa nequixi ren quie bēdyihuagadao' len ren quie chibo. Na'ra bzionè'n lao guichi ley quie Diuzi. Lēscan' bzionè'n lao ja ben' Israel. ²⁰ Caora na' una Moisés gudyinè' lējè': "Lēren niga nacan ta ulu'en ra'o de que di'idza' na' ruen ra'o mandado. Nacan di'idza' bega'ntza'olè Diuzi ra'o." ²¹ Lēscan' bziorè Moisés ren lu'u idao' de la'ari' lente ta de lu'una. ²² Segun cabè' na lè'è guichi ley quie Diuzi, casi yugu ta de quiejè', bisaque' gacan yēri lao Diuzi chi bibzio pxuzi ren laona. Pues ta yezi'ze Diuzi dula' xquia quiejè', ruen zi ilato ren.

Naca Cristo gun quie Diuzi gutinè' udubanè' dula' xquia quie ja benè'

²³ Ben zi dza na' guti ja pxuzi yaca bia guixi' udyiajè'ba' lao ru'aba ca gun quie Diuzi cuenda yeyuen yēri idao' de la'ari' len ta de lu'una. Lena' nacan ca quie copia quie ta de guibá ga zu Diuzi. Pero tacuenda saque' yeyo benè' guibá ga zu Diuzi, ruen zi gati tu ta zaca' mazara ca yaca bia guixi'. ²⁴ Biuyu'u Cristo lu'u idao' de la'ari' ta bē ja benè' ta nacan copia quie tu idao' dugalo zu guibá, dechan' uyu'unè' ga zu cuin Diuzi guibá. Na' beyu'unè' zuè' naquè' ben' zèlè ra'o, ben' rute di'idza' quiero lao Diuzi cuenda gacalènè' ra'o. ²⁵ Na' dza na' uyu'u pxuzi r nabè'ra quie ben' Israel lu'u cuarto naca la'iyatzegue tu lasazi lao tu iza ta bzionè' ren binaca ren quienè' lao caja ga yu'u ley quie Diuzi. Pero bibè' Cristo cana'. Tu lasazi para tuzioli guquè' gun quie Diuzi gutinè' lè'è yaga cruzo. ²⁶ Chan' bē Cristo cabè' bē pxuzi na', na'ra ruen zi gati Cristo tazè lasa desde dza cati udixu Diuzi yedyi layu. Pero binacan cana'. Cani nacan na'adza dza ruen bago iyudyi yedu quie yedyi layu: Babida Cristo lao yedyi layu guquè' gun quie Diuzi gutinè' lè'è yaga cruzo tu lasazi para tuzioli ta udubanè' dula' xquia quie yugulu benèchi'. ²⁷ Porque cabè' una Diuzi huenè' quie ja benè', unè' tanèro idyin dza gatijè', pero tu lasazi, na'tera ichuguzi Diuzi quiejè'. ²⁸ Lēscan' quie Cristo, tanèro guquè' gun quie Diuzi gutinè' lè'è yaga cruzo, pero tu lasazi gutinè', na' udubanè' dula' xquia quie ben' zè gula. Na'tera yeguidè' tatula, pero cala ta cubanè' dula' xquia quie ja benè', den' ta uselanè' nu ben' rbeza ja lēbè' yeguidè'.

10

¹ Porque naca ley pca'n Diuzi lao na'a Moisés tiempote ca quie tu ta ulu'en ra'o cabè' una Diuzi bi huenè' ta huenè' dya'a quiero dza zaza'ra. Binaca ley na' mero tadya'a re'en Diuzi huenè' quiero. Derla tadya'a re'en Diuzi huenè' quiero. Bide fuerza valor quie ley na' ta yeyuen benè' yēri lao Diuzi, ba'ala'cazi bētijè' bia guixi', bia naca gun quienè', bziojè' ren quieba' lao ru'aba lao tu iza huio. ² Chi tali huaca yeyuejè' cuinjè' yēri lao Diuzi nun quie

dan' bëtijè' tu bia guixi', bia naca gun quie Diuzi, bira inaban gutijè' bia tula. Pues chi tali abeduba dula' xquia quiejè' tuzioli, bira idèbjè' chi napajè' dula' xquia. ³ Pero cati bëtijè' bia guixi', bia naca gun quie Diuzi, bziojè' ren quieba' lao ru'aba lao tu iza huio, lena' nacan ta yeza'la'adyi'jè' napajè' dula' xquia. ⁴ Cana' nacan como dan' bisaque' yeduba dula' xquia quie benè' conlè ren quie bèdyihuaga, o conlè ren quie chibo.

⁵ Quie lena' cati bida Cristo lao yedyi layu unè' gudyinè' Diuzi:

Bisulo' gusto caora cati guti ja benè' bia guixi', bia naca gun quio', udyiajè'ba' lao ru'aba, chi bihue quiejè' cabè' nao'.

Pero babzalolo' benlo' tu cuerpo quia' ta ta' lao yedyi layu hue quia' cabè' nao'.

⁶ Biraxelo' ca ruejè' gutijè' bia guixi' naca gun quio', udyiajè'ba' lao ru'aba uzejijè'ba' cuenda yeduba dula' xquia quiejè', chi bihue quieyaquè' cabè' nao'.

⁷ Quie lena' agudya' luè' dza na':

"Ni zua', zua' dispuesto hue quia' cabè' re'leno' luè', Diuzi.

Cabè' rguixogue'n quia' nè'èdi' lè'è guichi la'ya quio', cana' hua', hue quia' di'idza' quio'." Cana' una Cristo dza na'. ⁸ Tanèro rguixogue'n quie Diuzi de que biraxenè' hue' ja benè' tu gun quienè', nica raxenè' gutijè' bia guixi' gaca gun quienè', nica raxenè' udyiajè' bia guixi' lao ru'aba uzejijè'ba' cuenda yeduba dula' xquia quiejè', chi bihue quieyaquè' xti'idzè'. Biraxe Diuzi huejè' cana', ba'ala'cazi cana' rnabè'n lè'è guichi ley quie Diuzi ta huejè'.

⁹ Quie lena' rnèn nran cani: "Ni zua', zua' dispuesto hue quia' cabè' re'leno' luè', Diuzi." Cana' udxoguenè' ra'o bira zaca'n cabè' bè ja ben' unita' tiempote bëtijè' bdyiajè' bia guixi' lao ru'aba. Lao laza lena' udxu Diuzi ta naca tacubi cati guti Cristo lè'è yaga cruzo, guquè' gun quie Diuzi, bè quienè' xti'idza' Diuzi. ¹⁰ Banuela'ya Diuzi ra'o nun quie bzu Jesucristo di'idza' ca mandado una Diuzi huenè' caora cati psedyinnè' cuinnè', guquè' gun quie Diuzi, gutiè' lè'è yaga cruzo tu lasazi para tuzioli.

¹¹ Yugu dza rzè yaca pxuzi quie ben' Israel ruejè' cabè' dyin napajè' quie idao'. Yugu dza rutijè' bia guixi' rudyiajè'ba' lao ru'aba ruzejijè'ba', la'acazi conlè lè'ba' biyeduba dula' xquia quie ben' Israel. ¹² Pero Jesucristo guquè' gun quie Diuzi gutinè' lè'è yaga cruzo ta yeduba dula' xquia quie ja benè' tu lasazi para tuzioli. Na'tera yere'nè' zaquè' yebè ga re' Diuzi guibá. ¹³ Na' zuè' rbezanè' dza cati hue Diuzi castigo yugulu ben' rudie lèbè'. ¹⁴ Porque dan' guquè' gun quie Diuzi, gutinè' lè'è yaga cruzo, cana' beyuenè' yèri para tuzioli ja ben' bdè' Diuzi gaca ben' quienè'. ¹⁵ Pues nuxela'adyi' Bichi Be quie Diuzi ra'o de que nacan tali con cabè' unanè', con cabè' nran lè'è guichi la'ya cani:

¹⁶ Cani naca di'idza' yega'ntza'olia' ben' Israel tacubi cati idyin dza bira usanla'adya' xuzixta'ojè'.

Udzi'a pensari quia' lu'u guicho laxta'ojè'.

¹⁷ Biyeza'la' adya' ca naca dula' xquia quiejè', nica ca naca tamala babèjè'.

Cana' una Bichi Be quie Diuzi dza na'. ¹⁸ Pues cani nacan: Cati abezi'ze Diuzi dula' xquia quiero, bira ruen zi guti ja pxuzi ta bia guixi' ta naca gun quie Diuzi ta yezi'zenè' dula' xquia quiero tatula.

Reya'ala' tzionla'adyi'ro Diuzi du guicho du la'adyi'ro

¹⁹ Quie lena', bicha', huazaque' yeyoro ga naca la'iyatzegue ga zu Diuzi biidzebiro, porque guti Jesucristo lè'è yaga cruzo ulato ren quienè'. ²⁰ Huero seguir inaoro neza cubi quiero, porque chi inaoron, cana' gata' yela' neban quiero tuzioli. Cabè' uyo pxuzi xcu'udzu la'ari' ga naca la'iyatzegue dza na', cana' huazaque' yeyoro ga zu Diuzi nun quie psalo Cristo neza cubi quiero cati gutinè' lè'è yaga cruzo. ²¹ Naca Jesús pxuzi rnabè'ra quiero. Naquè' ben' rnabè'ra lao yugulu ja ben' nao xnezè'. ²² Quie lena' reya'ala' tzionla'adyi'ro Diuzi du guicho du la'adyi'ro sudyi'lèroguè' yugo dza. Lèbè' beyuenè' yèri guicho laxta'oro. Cana' neziro dyè'èdi' baozi'zenè' quie dula' xquia quiero, gabira dula' xquia quiero de. Nacaro yèri lao Diuzi ca quie ben' bagozo yao len nisa yèri gula. ²³ Huero seguir biusanla'adyi'ro hue quiero quie Diuzi, rbezaro dyè'èdi' dza cati hue Diuzi quiero cabè' unè' huenè' quiero, como dan' uzucazi Diuzi di'idza' cabè' di'idza' bega'nlènè' ra'o. ²⁴ Reya'ala' hue'lèro laguedyiro, ben' nao xneza Cristo, di'idza' zela'adyi' ta gacalèrojè' ta idyè'èjè' benè' huejè' puro ta yu'u ni'a xnezi. ²⁵ Bireya'ala' usantro yeduparo tzionla'adyi'ro Diuzi cabè' naca costumbre quie bala ja benè', bapsanjè' bira guidajè' dza cati yeduparo. Reya'ala' hue'lèrojè' di'idza' zela'adyi' ta biyeyatijè' como dan' baruen bago idyin dza cati yeguida Cristo lao yedyi layu tatula.

²⁶ Porque cati baneziro con cabè' rna di'idza' li quie Diuzi, pero chi huero seguir huero tamala, na' bisaque' inaro bineziro tamala. Chi huero cana', huero seguir huero tamala, na'tera bira bide bi hue Diuzi ta yezi'zenè' dula' xquia quiero. ²⁷ Tuz ta huenè', huenè' castigo huala gula nu ben' rue cana', tzejijè' lao gui' ta ra'ala' batzani' gula ga cuiaguai' ben' rue condre Diuzi. ²⁸ Na'ra dza tiempote cati uzu nu ben' uru'un tzalala'la' di'idza' ley pca'n

Diuzi lao na'a Moisés, chi uzu nu chopa o nu tzona ben' guca testigo, ben' nezi tali bë ben' na' tamala, caora na' uchuguli yaca ben' rnabè' quienè' ta gutijè' lèbè', bibeyèchi'la'adyi'jè' biuzi'zèjè' quienè'. ²⁹ Pues ¿bica inale quie ben' reru'un tzala'la' zi'i Diuzi? ¿Bica inale quie ben' rutitu lèbè' inajè': "Bibi zaca' dan' gutinè' lè'è yaga cruzo ulato ren quienè'?" Nedyè'è Bichi Be quie Diuzi yugulu benè', na'ra ¿bica inale quie ben' rutasi runio Bichi Be quienè'? ¿Quele mazara castigo huala gula reya'ala' gaca quiejè'? Pues bira raxejè' tu ta beyue lèjè' yèri lao Diuzi dza na'. Pues nun quie guti Cristo lè'è yaga cruzo ulato ren quienè', lena' nezcapiro nacan tali hue Diuzi quièro cabè' tadya'a unè' huenè' quièro. Pues bira raxejè' tu ta beyuen lèjè' yèri lao Diuzi dza na'. ³⁰ Dyè'èdi neziro Diuzi na' unè' caniga: "Cuenda quia' na' hua' benè' castigo. Huaguizuga'jè' quie tamala bëjè'." Lèscan' una Diuzi: "Nè'èdi' ichugulia' quie yaca ben' nao xneza'." ³¹ Nacan ta idzebitzegue ja benè' cati hue Diuzi lèjè' castigo.

³² Pero bigala'adyi'le cabè' guca quiele dza na', dza cati zaozulaole unaole xneza Cristo. Dyè'èdi uzuele bèle gan cabè' tazèdi gula guca quiele bedzagalaotzeguele. ³³ Pues dza na' ptasi bnio ja benè' le'e. Psacajè' bala le'e bizinaquezi zaca'lao lao ja ben' yedyi quiele. Lèscan' ibala le'e guca quiele bedzagalaole cabè' bedzagalao laguedyile. ³⁴ Dyè'èdi beyèchi'la'adyi'le laguedyile, ben' nao xneza Cristo, ben' de lu'u dyiguiba. Lèscan' hasta uzule gusto uzuele bè' uduba ja benè' ta de quiele, como dan' nezile dera ta de quiele guibá ta nacara huen gula ta biyeyudyi yedu quie. ³⁵ Biusanle sudyi'ilè'le Diuzi, porque huata' tadya'a gula guibá quie ben' rzudyi'ilè' lèbè'. ³⁶ Pues le'e bireya'ala' yeyatile huele ca re'en Diuzi huele. Cana' idyin dza hue Diuzi tadya'a quiele cabè' unè' huenè' quiele. ³⁷ Lena' rnèn' lè'è guichi la'ya quie Diuzi cani: lledao'zi idyin dza cati guida ben' guida, pero bitzenè' guidanè'.

³⁸ Nu ben' rzudyi'ilè' nè'èdi', gata' yela' neban quienè' tuzioli.

Pero chi usannè' bira inaanè' xneza', bisua' gusto conlè lèbè'.

Cana' una Diuzi. ³⁹ Pero ra'o binacaro ben' usan, ben' bira inao xneza Diuzi. Binacaro ben' cuiagui' tuzioli. Dugalo nacaro ben' rue quie quie Diuzi. Nacaro ben' sue hue gan gata' yela' neban quie tuzioli.

11

Cabè' naca quie ben' rzudyi'ilè' Diuzi

¹ Cati sudyi'ilèro Diuzi neziro du guicho du la'adyi'ro huenè' tadya'a quièro cabè' rbezaro huenè' quièro. Lèscan' cati sudyi'ilèro Diuzi nužela'adyi'ro nacan tali zuè' rnabè'nè' la'acazi bisaque' ilè'èroguè'. ² Yaca xuzixta'oro, ben' unita' tiempote, uzu Diuzi gusto conlè lèjè' nun quie bë quieyaquè' quienè'.

³ Nun quie dan' rzudyi'ilèro Diuzi neziro dyin bë Diuzi bzalonè' bènè' yugulu ta de zan guibá tiempote. Conlè fuerza valor quie xti'idza'nè', cana' guta'n. Conlè ta bisaque' ilè'èro, bènè' bzaloguè' tu ta ilè'èro na'a.

⁴ Nun quie uzudyi'ilè' Abel Diuzi, bè'nè' Diuzi tu gun nacara dya'ara, quele cabè' naca gun ta bë' bichinè' Caín Diuzi. Quie lena' blè'è Diuzi Abel ben' laxta'o yèri, uzi'nè' gun quienè'. Na'ra la'acazi aguti Abel, nenaquè' tu ejemplo cabè' reya'ala' huero, reya'ala' sudyi'ilèro Diuzi cabè' uzudyi'ilè' Abel Diuzi.

⁵ Nun quie dan' uzudyi'ilè' Enoc Diuzi, bezi' Diuzi lèbè' zeyoguè' guibá bigutinè'. Nun quie bezi' Diuzi lèbè', bira bedzele yaca benè' lèbè'. Rnèn' lè'è guichi la'ya quie Diuzi de que tu binsi' Diuzi lèbè', lega yaxè Diuzi lèbè' cabè' bènè'. ⁶ Chi bisudyi'ilèro Diuzi, bisaque' tzaxe Diuzi ra'o cabè' ruero, porque ta tzionla'adyi'ro Diuzi, ruen zi galero zunè', ruen zi galero huenè' tahuen quie nu ben' nao xnezè'.

⁷ Nun quie dan' uzudyi'ilè' Noé Diuzi, bzunè' di'idza' ca di'idza' gudyi Diuzi lèbè', bènè' tu barco ze gula cuenda te ilanè' len yaca familia quienè' como dan' gudyi Diuzi lèbè' huaca juicio lao yedyi layu, huaca juicio ca juicio ta binelè'èjè'. Nun quie dan' uzudyi'ilè' Noé Diuzi, udxogué'nè' yaca ben' unita' dza tiempote hue Diuzi lèjè' castigo. Cana' blè'è Diuzi Noé ben' laxta'o yèri nun quie uzudyi'ilè'nè' Diuzi.

⁸ Nun quie dan' uzudyi'ilè' Abraham Diuzi, bzunè' di'idza' dza cati gudyi Diuzi lèbè' ta uzè'è yedyi quienè' zioquè' ga tula ga de layu hue' Diuzi lèbè' gaque quienè'. Ba'ala'cazi binenezinè' ga ise'ela' Diuzi lèbè', pero uzè'è zioquè'. ⁹ Nun quie dan' uzudyi'ilè' Abraham Diuzi, uzunè' ga de layu una Diuzi hue'nè' quienè', pero uzunè' na' ca quie binaquen quienè', ca quie ben' zu yedyi binaca yedyi quie. Puro lu'u yu'u de la'ari'zi uzunè'. Lèscan' cabè' bë Abraham, cana' bère' zi'inè' Isaac, cana' bère' zi'isubanè' Jacob. Lèscan' conlè lèjè' bega'nè' Diuzi lèjè' di'idza' huadyin dza hue'nè' lèjè' gaque quiejè' layu ga zujè'. ¹⁰ Cana' bë Abraham, porque ulezanè' dza cati yeyoguè' ga zu Diuzi, ga zu tu yedyi ta biyeyudyi yedu quie, yedyi ta bë cuin Diuzi.

¹¹ Lëscan', hasta nigula quienè' Sara, nun quie dan' uzudyi'ilènè' Diuzi, bè' Diuzi lèbè' fuerza gucanè' zna' bdao', la'acazi abgulanè' aode tiempo quienè' ta hua'anè' bdao'. Bzucazi Diuzi di'idza' ca di'idza' bega'nlènè' lèbè', gucalènè' lèbè' ta ila' tu xcuidi' byu quienè'. ¹² Lëscan' Abraham, ba'ala'cazi abgulè' banapè' zè iza, ba'ala'cazi ganu zi'inè' uzu, pero bdyincazi dza golo tu zi'inè', bi' inita' zi'isube zè gula. Quie lena' uzu di'idza' unita' zi'isubanè' tazè gula. Nita'jè' ca quie bélo dyia guibá, nita'jè' ca quie yožo re' ru'a yao zè, bisaque' ulabaron. Cana' nita' zi'isuba Abraham.

¹³ Na'ra lèben' uzudyi'ilè Diuzi agutijè' yugulujè'. Binehue Diuzi quiejè' cabè' unanè' huenè' quiejè', pero como uzudyi'ilèjè' Diuzi, cana' nužela'adyi'jè' idyincazi dza hue Diuzi quiejè' cabè' unanè' huenè' quiejè'. Cana' bedaohuejè' unajè' ca naca pensari quiejè', unezije' bisujè' lao yedyi layu tuzioli. ¹⁴ Quie yaca ben' una cana', rulu'en quiejè' dyè'edi rbezajè' yeyojè' sujè' ga naca quiejè'. ¹⁵ Pero bibdèbijè' quie layu ga brojè' uza'jè', porque chi bdèbijè' quie layu na', bebi'jè' bedyinjè' ga uza'jè'. ¹⁶ Pero gu'unjè' tziojè' tzesujè' ga nacatera dya'a, ta inaro gu'unjè' tziojè' tzesujè' guibá ga zu Diuzi. Quie lena' redaohue Diuzi cati inajè' naquè' Diuzi quiejè'. Pues banuetza'o Diuzi tu ciudad guibá ga sujè'.

¹⁷ Nun quie uzudyi'ilè Abraham Diuzi, uquiè'nè' zi'inè' Isaac ta gutinè'bi' udyianè'bi' lao ru'aba ca gun quie Diuzi dza cati bè Diuzi lèbè' tu prueba chi tali hue quienè' ca una Diuzi lèbè'. Uzunè' dispuesto ta gutinè' tu litza' zi'inè' Isaac, la'acazi bega'nè' Diuzi lèbè' di'idza' dza na' cati unè' gudyinè' lèbè' cani: ¹⁸ "Lao na'a zi'ilo' Isaac huanita' ja zi'isubo'." ¹⁹ Na'ra gule Abraham napa Diuzi poder ta yesebannè' ben' huati. Huazaque' inaro guca quie Abraham len zi'inè' como si fuera beseban Diuzi zi'i Abraham caora bezi'nè' zi'inè' tatula nebambi'.

²⁰ Nun quie dan' uzudyi'ilè Isaac Diuzi, bèla'iya Isaac zi'inè' Jacob len zi'inè' Esaú gudyinè' lèjè' cabè' gaca quiejè' dza zaza'ra. ²¹ Lëscan' nun quie dan' uzudyi'ilè Jacob Diuzi, bèla'iya Jacob ja zi'i José dza cati anapè' iza baruen bago gatinè', uyonla'adyi'nè' Diuzi pquichinè' xaga quienè' layu ta gucalèn lènè' ta zènè'. ²² Nun quie dan' uzudyi'ilè José Diuzi, udixogue'nè' ben' Israel idyincazi dza yerojè' sa'jè' nación Egipto, bènè' lèjè' mandado cuiojè' chita quienè' hua'ajè'n dza cati sa'jè'. Cana' udixogue' José lèjè' dza cati baruen bago gatinè'.

²³ Nun quie dan' uzudyi'ilè xuzi zna' Moisés Diuzi, pcachi'jè' lèbi' tzona biu' dza cati golobi', como dan' blè'èjè' naca bdao' na' badan gula. Na'ra bibdzebije' rey quie ben' Egipto, como dan' bè rey na' mandado gati yugulu bdao' byu quie ben' Israel. ²⁴ Nun quie dan' uzudyi'ilè Moisés Diuzi, bigu'unnè' ilè'è ja benè' lèbè' ca zi'i nigula, ben' naca zi'i rey quie ben' Egipto cati bgulanè' guquè' ben' huaca. ²⁵ Quie lena' uzunè' dispuesto ta yedzagalaonè' gacalènè' ben' yedyi quienè' tuze. Uzunè' dispuesto yedzagalaonè', bigu'unnè' inaohe' neza mala quie ben' Egipto. ²⁶ Unezinè' nacaran huenra yedzagalaonè' cabè' bedzagalao Cristo, ta inaro uzunè' dispuesto hue ja benè' lèbè' bizinaquezi cuenda gacalènè' ben' Israel, bigu'unnè' gaca quienè' yela' uña'a ta de quie ben' Egipto. Quie lena' bigulenè' quie ben' Egipto, como dan' unezinè' cabè' tahuenra de ta hue' Diuzi lèbè'. ²⁷ Nun quie dan' uzudyi'ilè Moisés Diuzi, bzunonè' nación Egipto, pero bibdzebinè' bdza' rey quie ben' Egipto lèbè'. Uzuenè' como nuebè'nè' Diuzi, ben' birzaque' ilè'èro.

²⁸ Nun quie dan' uzudyi'ilè Moisés Diuzi, udixonè' lani pascua bènè' mandado bzio ben' Israel ren quie beco' zi'ila' ru'a yu'u quie zan yu'u quie quiejè', como dan' use'ela' Diuzi tu ángel ta gutinè' xcuidi' byu nèro quie nu ben' bibzo ren ru'a yu'u quie. ²⁹ Nun quie dan' uzudyi'ilè ben' Israel Diuzi dza na', udejè' ga de nisadao' laona Nisadao' Zna dza na'te. Uyalo tu neza ga udejè' lu'u nisa beyacan layu bidyi. Na'ra cati gu'un ja benè' Egipto terèjè' cabè' ude ben' Israel, bedaco' nisa lèjè' gutijè'.

³⁰ Nun quie dan' uzudyi'ilè ben' Israel Diuzi dza na', byala ja besu ta naca sibi ta neyècho ru'a ciudad Jericó caora cati beyudyi uyèchojè' ru'a lao ciudad lao gadyi dza cabè' mandado bè Diuzi huejè'. ³¹ Lëscan' tu nigula bèti' gusto quie, ben' lao Rahab, nun quie dan' uzudyi'ilènè' Diuzi, bigutinè' dza na' caora cati bdyiaguí' ben' Israel ben' yedyi quienè', ben' bigu'un hue quie cabè' una Diuzi. Biguti nigula na' nun quie gucalènè' chopa ben' Israel, ben' uyo balarazi ta yena'jè' ca naca ciudad Jericó.

³² ¿Ca bizira ta inia' le'e? Bide tiempo ta inia' le'e quie Gedeón, quie Barac, quie Sansón, quie Jefe', quie rey David, quie Samuel, quie yaca profeta, ben' udixogue' xti'idza' Diuzi tiempote. ³³ Nun quie dan' uzudyi'ilèjè' Diuzi, bèjè' gan bétijè' yaca enemigo quiejè' cati udilalèjè' lèjè', bèjè' gan unabè'jè' lao ja yedyi quiejè', bèjè' gan gucalè Diuzi lèjè' cabè' una Diuzi huenè' quiejè', bèjè' gan bibi guca quiejè' cati gu'un yaca león qui'imba' lèjè', ³⁴ bèjè' gan besulajè' gui' ta raca gui' bela, bèjè' gan ulajè' lao na'a ben' re'en guti lèjè' conlè espada. Lëscan' yaca ben' bdzebi dza na', bibedzebije' cati gucadilalèjè' ja soldado quie ben' yedyi tula. ³⁵ Lëscan' guca quie bala nigula unita' dza na' bezi'jè' ben' huati quiejè' tatula nebanjè'.

Pero unita' ja ben' tula guticazijè'. Udi benè' lèjè' hasta gutijè', pero bipsanjè' unaojè' xneza Diuzi cabè' gu'un ben' udi lèjè'. Cana' gutijè', pero unezijè' huadyin dza useban Diuzi lèjè' sujè' guibá ga nacaran huen gula. ³⁶ Na'ra balajè' ptitu ja benè' lèjè'. Ibalajè' udi ja benè' lèjè' guidi. Ibalajè' pquio ja benè' lèjè' caden, bdze'jè' lèjè' lu'u dyiguiba. ³⁷ Ibalajè' bëti ja benè' lèjè' con yo. Ibalajè' uchugu ja benè' lèjè' conlè serucho gucajè' chopa yo'o. Ibalajè' bëjè' lèjè' bizinaquezi cuenda usanjè' bira inaojè' xneza Diuzi, na' bëtijè' lèjè' con espada. Ibalajè' udajè' ni'nizi, gucojè' zaba beco' zi'ila', gucojè' zaba chibo. Bibi guta' quiejè', guca zèdi gula quiejè'. Psaca benè' lèjè' bizinaquezi. ³⁸ Bibizaca' ja ben' nita' lao yedyi ta inita'lèjè' lèjè' tuze. Cana' guca quiejè' udajè' ni'nizi ga naca lato dachi, udajè' ni'nizi lao ya'a, udajè' ni'nizi ga zu beló. ³⁹ Na'ra lèjè', ba'ala'cazi uzudyi'ilèjè' Diuzi, lèscan' ba'ala'cazi uzu Diuzi gusto cabè' bëjè' dza na', biuzi'jè' quiejè' yugulu cabè' tadya'a unè Diuzi hue'nè' quiejè'. ⁴⁰ Nerdziogue hue Diuzi tadya'a quiejè', porque unanè' huenè' tadya'a quiejè' tuze len ra'o, ben' laxta'o yèri, ben' la'ya, ben' bide dula' xquia quie. Lena' nacaran huen hue Diuzi tadya'a quiero tuze len lèjè' guibá ga zuè'.

12

Reya'ala' inaoro xneza Cristo du guicho du la'adyi'ro

¹ Quie lena' como nita' ben' zè gula, ben' bablu'e ra'o cabè' uzudyi'ilèjè' Diuzi dza na', reya'ala' usanla'adyi'ro yugu ta rudzun ra'o inaoro xneza Cristo. Lèscan' reya'ala' usanla'adyi'ro bira huero tamala cabè' nequionan ra'o bire'ennan huero tahuen. Reya'ala' inaoro xneza Cristo du guicho du la'adyi'ro, biyeyatiro huero ca udux Diuzi quiero huero. ² Reya'ala' huero cuenda cabè' re'en Jesús huero. Naca Jesús ben' naca ejemplo belaotera quiero cabè' reya'ala'huero sudyi'ilèro Diuzi. Ganura zu ben' uzudyi'ilè Diuzi ca lèbè'. Bibdèbinè' nacan yela' stu' quie ben' gati lè'è yaga cruzo. Uzuè' dispuesto bedzagalaonè' gutinè' lè'è yaga cruzo, como dan' neziné' caora cati beyudyi bedzagalaonè', huapala'n Diuzi lèbè' tzeque'nè' zaquè' yebè ga re' Diuzi guibá.

³ Reya'ala' huele pensari cabè' bë Jesús uzuenè' cabè' tamala psacayudyi ben' mala lèbè'. Lena' gacalèn le'e ta biyehuèdile biyeyatile inaole xnezè'. ⁴ Pues le'e, nica guti ja benè' le'e nun quie rnaole xneza Cristo. Nica guti ja benè' le'e nun quie bira re'enle huele tamala cabè' lèjè'. ⁵ ¿Quele agula'adyi'le cabè' rnèyue Diuzi le'e nacale ca zi'inè'? Lena' rnèn lè'è guichi la'ya quie Diuzi caniga:

Zi'ina', bihuele pensari chi bibi zaca'n caora cati rdila Diuzi luè'.

Biyeyatile caora cati hue Diuzi luè' castigo.

⁶ Porque rdila Diuzi nu ben' nedyè'ènè', rdila Diuzi yugu ben' naca zi'inè', huenè' lèjè' castigo cati biralèjè' quienè'.

Cana' una Diuzi dza na'. ⁷ Na'ra rnia' le'e biidza'le bë' rue Diuzi le'e castigo cati biralele quienè', como dan' ca zi'inè' ruelènè' le'e. ¿Binezile bizu xcuidi' birue xuzibi' lèbi' castigo cati biralèbi' quienè'? ⁸ Pero chi birdila Diuzi le'e cabè' rdila Diuzi yugu ben' naca zi'inè', lena' ulu'en nacale ca quie xcuidi' tu yo, binezibi' nu naca xuzibi'. ⁹ Cati nenacaro xcuidi', caora na' udila xuziro ra'o gulero quienè' udaparonè' bala'ana. Quie lena', ¿quele rnabè'ran quiero galero cabè' na Xuziro Diuzi zu guibá cuenda gata' yela' neban quiero tuzioli? ¹⁰ Cati bigulero quie xuziro dza na', udilanè' ra'o segùn ca guquenè' nacan huen quiero, pero tuzi dza nenacaro xcuidi' udilanè' ra'o. Pero Diuzi rdilanè' ra'o cati biralero quienè' yugu dza rdaro lao yedyi layu cuenda tali gaca huen quiero, gacaro ben' la'ya ca naquè' ben' la'ya. ¹¹ Tali na' bisuro gusto cati racaro castigo, raquero zi' ca nacan. Pero ude beyudyi gucaro castigo, chi tali aoyoñe'ero, bira huero cabè' tamala bëro. Lena' gacalèn ra'o huero puro ta yu'u ni'a xnezi suro gusto.

Nacan zudyi chu'unro tzala'la cabè' rna Diuzi ra'o

¹² Quie lena' biyehuèdile huele fuerza ni'a na'ale. ¹³ Huele lucha ta unaole neza li quie Cristo. Cana' yezi' fuerza ni'a na'ale tale dyè'èdi.

¹⁴ Huele bala ta sulèe yugulu benè' dyè'èdi. Lèscan' huele bala ta gacale ben' rue quie quie Diuzi, como dan' chi bihue quie quie Diuzi, bisaque' ilè'èle Cristo tzesulèlenè' tuze. ¹⁵ Gapale cuidado cuenda ni tule bigaca quiele bihue la'ya Diuzi le'e nun quie binaole xnezè' du guicho du la'adyi'le. Lèscan' gapale cuidado bihuele lato su nu ben' bire'en usan dula' xquia quie ladole, porque huenè' quiele ca rue tu guixi' naca veneno, udyiaguinè' yaca los demás ben' nao xneza Cristo. ¹⁶ Lèscan' ni tu le'e, bireya'ala' gasilèle nigula binaca nigula quiele. Lèscan' bireya'ala' utitole huele pensari bibi zaca' ta naca la'ya quie Diuzi. Cana' bë Esaú tiempote guquenè' bibizaca' ca naca derecho quienè' naquè' bi' nèro. Pues ta udaonè' tu lasazi caora bdzioguenè' ta gaohuè', bë'nè' derecho quienè' bi' bichinè'. ¹⁷ Dyè'èdi nezile cabè' guca quie Esaú dza na'. Cati unabané' hue la'ya xuzinè' lèbè', bira gu'un xuzinè'

huela'iyane' lëbë'. Pues la'acazi guquenë' bayëchi' uredyitzeguenë', bira uzaque' huela'iya xuzinë' lëbë'. Bira ubinnë' bi huenë' ta huela'iya xuzinë' lëbë'.

¹⁸ Na'ra bihuele cabë' bë xuzixta'oro ben' Israel dza na'. Lëjë' ubiga'jë' ga'ala' ga zu tu ya'a ga bireya'ala' uliojë'. Lë'ë ya'a na' lega uya'ala'n gui', guca chula, uda tu be bedun' fuerte. ¹⁹ Lëjë' bejë' bgüedyi trompeta, bejë' rchi' Diuzi cati unë' bë'lënë' lëjë' di'idza'. Lëben' na' unabayëchi'jë' Diuzi ta bira hue'lë Diuzi lëjë' di'idza'. ²⁰ Cana' gudyijë' Diuzi, como dan' tantozi bdzëbijë' yëjë' cati una Diuzi gudyinë' lëjë' cani: "Chi babblio tu benë' lë'ë ya'a ni, ulegutinë' conlë yo o conlë lanza, la'achi benë', la'achi bia guixi'." ²¹ Tantozi bdzëbijë' cabë' blë'ëjë' dza na', hasta cuin Moisés unë' rëbinë' lëjë': "Lega rzizida' rdzëba'."

²² Pero quie le'e, anacan cuenda quiele tziote lë'ë ya'a laona ya'a Sión ga de ciudad quie Diuzi, ben' zu tuzioli. Anacan cuenda quiele tziote ciudad Jerusalén zu guibá ga nita' zë mila ángel, ben' negu'udi' ta tzionla'adyi'jë' Diuzi. ²³ Anacan cuenda quiele tziote ga regu'udi' yaca ben' naca z'i'i Diuzi, ben' zu laohue lao lista quie Diuzi. Anacan cuenda quiele tziote ga zu Diuzi, ben' naca jueza quie yuguluro. Anacan cuenda quiele tziote ga regu'udi' yaca ben' huen, ben' laxta'o yëri. ²⁴ Anacan cuenda quiele tziote ga zu Jesús, ben' zëlë ra'o lao Diuzi rutenë' di'idza' ca di'idza' bega'ntza'olë Diuzi ra'o tacubi. Lëscan' naca cuenda quiele yeyëri'le lao Diuzi nun quie ulato ren quie Jesús. Quie lena' gacaran huen quiele ulato ren quie Jesús, cala ca ren quie Abel.

²⁵ Quie lena' reya'ala' gapale cuidado bichu'unle tzala'la ca na Diuzi, ben' ru'elë le'e di'idza'. Pues biula yaca ben' unita' tiempote, ben' uru'un tzala'la ca una Diuzi dza cati beyëzinë' lao yedyi layu bë'lënë' lëjë' di'idza'. Lëscan' ra'o, biilaro hue Diuzi ra'o castigo chi chu'unro tzala'la ca rnanë' ru'elënë' ra'o di'idza' desde guibá. ²⁶ Dyin quie rchi' Diuzi psisi lao yedyi layu dza na', dza cati bë'lë Diuzi Moisés di'idza' lë'ë ya'a Sinaí. Pero cani rna Diuzi na'a: "Itu lasazi usisia' lao yedyi layu, pero quele tuzi yedyi layuzi, lëscan' usisiria' lente guibá." ²⁷ Caora una Diuzi "itu lasazi", lena' reya'ala' tziõe'ero hueyudyi huedu quie ta usisinë'n, pero biyeyudyi yedu quie ta bisaque' usisi yaca benë'. ²⁸ Quie lena' reya'ala' yëbiro Diuzi diuxcalelo', como dan' bënnë' lato quiero tziore ga zuë' rnanë'në', pero biisisin biyeyudyi yedu ga rnanë'në'. Reya'ala' tzionla'adyi'ro Diuzi du guicho du la'adyi'ro cabë' re'ennë' huero quienë'. ²⁹ Naca Diuzi quiero ca quie tu gui' ze ta tzei ben' reru'un lëbë' tzala'la.

13

Cani re'en Diuzi hue yaca ben' nao xneza Jesús

¹ Biusanle idyë'ële ben' bichile, ben' nao xneza Jesús. ² Lëscan' bigala'adyi'le cabë' reya'ala' huele sule dispuesto gapachi'le dyë'ëdi nu ben' za' zan yu'u quiele, como dan' nu ben' rue cana', hasta ben' naca ángel baozi'jë' zan yu'u quiejë', nica bezaquejë' chi ben' naca ángel na'.

³ Lëscan' reya'ala' yeyëchi'la'adyi'le nu ben' naca preso yu'u lu'u dyiguiba. Reya'ala' yeyëchi'la'adyi'lejë' ca quie le'e cuinle yu'ulële lëjë' tuze lu'u dyiguiba. Reya'ala' yeyëchi'la'adyi'le nu ben' raca zëdi quie, rusaca ja benë' lëjë' bizinaquezi. Reya'ala' yeyëchi'la'adyi'lejë' ca quie le'e cuinle raca zëdi quiele, rusaca ja benë' le'e bizinaquezi.

⁴ Yugulule reya'ala' huelële laguedyile puro taahun. La'acazi bazulë laguedyile, la'acazi binësulële laguedyile, bihuele ta naca yela' stu' quiele, porque hue Diuzi castigo nu ben' cuidi', chi rasilëbi' laguedyibi' binësi'bi' lëbi'. Lëscan' hue Diuzi castigo nu ben' bazulë laguedyile, chi rasilënë' ben' tula.

⁵ Bisa'la'adyi'le dumi, pero sule contento conlë bi ta de quiele, porque cani rna Diuzi: "Con bitezi gaca quiele, biusanla'adyi'caza' le'e." ⁶ Quie lena' huazaque' inaro nužela'adyi'ro nacan tali:

Naca Diuzi ben' racalë ra'o, biidzëbiro chi bi re'en ja benë' huejë'ra'o.

Cana' rnën lë'ë guichi la'iya quie Diuzi. ⁷ Bigala'adyi'le quie ben' napa dyin entre le'e, ben' udixogüe' le'e xti'idza' Diuzi dza na'. Huele pensari cabë' bëjë' gulejë' quie Diuzi, cana' inaole huele cabë' bëjë'.

⁸ Tuzi ca naca Jesucristo, biyetza'në'. Cabë' nacacazë' tiempote, cana' naquë' na'a, cana' nacacazë' tuzioli. ⁹ Gapale cuidado bigalele quie ben' re'en inaole cabë' rnajë', rnajë' ta binacan tuzi ca na Cristo. Taže netza'n cabë' rnajë', rnajë' di'idza' zë. Mejorla inabaro Diuzi ta gacalënë' ra'o gunnë' fuerza valor quiero inaoro xneza Cristo. Pero chi gaoro bi cosa, o chi bigaoro bi cosa, lena' bigacalën ra'o inaoro xneza Cristo. Pues hasta yaca ben' unao dyë'ëdi ca naca quie yela' huao dza na', bigucalën lëjë' ta inaojë' quie Diuzi.

¹⁰ Pues netza' ca naca quiero ben' nao xneza Cristo. Guti Cristo lë'ë yaga cruzo guquë' gun quie Diuzi. Pero quie yaca ben' nenao cabë' bë yaca pxuzi quie xuzixta'oro lu'u idao' de la'ari' tiempote, chi nenaojë' ruejë' cabë' bë ja ben' na', na'ra bisaque' inaorëjë' xneza Cristo. ¹¹ Pues tiempote bzio pxuzi rnanë'ra quie xuzixta'oro ren quie bia guixi' lu'u idao'

de la'ari' ga naca la'iyatzegue. Bzionë'n como ca gun quie Diuzi cuenda yeduba Diuzi dula' xquia quie ja ben' Israel. Pero quie yaca bia guixi', bia bëtijë', tzala'la ru'a yedyi bzejë' cuerpo quieyacaba'. ¹² Lëscan', Cristo, tzala'la ru'a ciudad Jerusalén bedzagalaonë' gutinë' lë'ë yaga cruzo cuenda yezinë' dula' xquia quie ben' nao xnezë'. Cana' guca quienë' ulato ren quienë' dza na'. ¹³ Quie lena' tzioro inaoro huero quie Cristo, la'acazi yedzagalaoro usaca benë' ra'o bizinaquezi cabë' guca quie Cristo dza na'. ¹⁴ Pues bizu yedyi quiero lao yedyi layu niga ta biyeyudyi yedu quie. Pero rbezaro dza zaza'ra tzioro tu yedyi zu guibá. ¹⁵ Quie lena' reya'ala' tzionla'adyi'ro Diuzi lao na'a Jesucristo tuzioli. Lena' cati tzionla'adyi'ronë' nacan gun quienë' ta hue'ronë', ta inaro, ulidzaronë' hueronë' ben' ze. ¹⁶ Bigala'adyi'le huele tahuen. Bigala'adyi'le gacalële ben' rdziogue quie con ta de quiele, porque cana' re'en Diuzi huele, cana' naca gun quie Diuzi reya'ala' hue'lenë'.

¹⁷ Lëscan' galele uzule di'idza' quie ben' napa dyin quiele, ben' rue dyin quie Diuzi. Naca cuenda quiejë' gapajë' le'e dyë'ëdi, gacalëjë' le'e inaole xneza Cristo. Nezijë' huadyin dza yedejë' cuenda lao Diuzi cabë' bëjë' udapajë' le'e. Huele dyabë' ta sujë' gusto cabë' naca dyin napajë'. Bihuele quiejë' ta bisujë' gusto, como dan' chi huele cana', bihuena huen quiele.

¹⁸ Ulidzale Diuzi ta gacalënë' nëto'. Pues nužela'adyi'ndo' puro pensari huen yu'undo', puro tahuen re'enndo' huendo' con bitezi ta huendo'. ¹⁹ Huele orar por në'ëdi' cuenda gacalë Diuzi në'ëdi' laguidatia' ideyuba' le'e tatula.

Blidzanë' Diuzi ta gacalënë' lëjë'

²⁰⁻²¹ Rulidza' Diuzi, ben' cuëchi chizi laxta'oro, ta gacalënë' le'e dyë'ëdi ta huele ca re'en Diuzi huele. Naca Diuzi ben' pseban Señor quiero Jesucristo, ben' rapa ra'o ca quie ben' rapa beco' zi'ila', ulato ren quienë' lë'ë yaga cruzo cuenda gaca seguro para tuzioli cabë' di'idza' bega'ntza'olë' Diuzi yaca benëchi'. Lëscana' rulidza' Diuzi ta gacalënë' yuguluro ta galero quienë' du guicho du la'adyi'ro, huero puro ca re'ennë' huero nun quie dan' nacaro ben' quie Jesucristo. ¡Huero Cristo ben' ze tuzioli! Amén.

²² Bicha', rnaba' cule laole ta uzënegale dyë'ëdi cabë' naca di'idza' unia' le'e niga runa' le'e consejo. Pues quele di'idza' zë bzua' lë'ë guichi pse'ela'n laole. ²³ Lëscana' rguixogui'a le'e abero ben' bichiro Timoteo lu'u dyiguiba. Na'ra chi abela'nezanë', na' huaqui'anë' guidando' ta ideyubindo' le'e.

²⁴ Lëscana' gapale diuzi ben' napa dyin quiele, ben' rue dyin quie Diuzi. Lëscan' gapale diuzi yugulu ben' bichiro, ben' nao xneza Cristo ga zule. Rgapa ben' yedyi Italia le'e diuzi.

²⁵ Rulidza' Diuzi huela'iyänë' le'e yugulule. Amén.

DI'IDZA' LA'IYA BZU SANTIAGO APÓSTOL LÈ'È GUICHI

Use'ela' Santiago carta ni lao ben' nao xneza Cristo, ben' nita' tu tu yedyi

¹ Nè'èdi', Santiago, naca' ben' ruzu di'idza' ca mandado rue Diuzi lènè' xa'nro Jesucristo. Rgapa' le'e diuzi, le'e ben' naca chipchopa cue' ben' Israel, le'e ben' nao xneza Cristo, le'e ben' rdale duze yedyi layu.

Naca Diuzi ta uzioñe'enè' ra'o

² Bicha', reya'ala' yedaohuele cati hue Diuzi le'e biti'tezi prueba ta ulu'en chi rnaole xnezè' du guicho du la'adyi'le. ³ Baquezi nezile caora hue Diuzi le'e prueba, lena' nacan ta gacalèn le'e suele dyè'èdi biusanla'adyi'le xnezè' cati gaca zèdi quiele. ⁴ Quie lena' reya'ala' huele purari suele dyè'èdi bi tazèdi gaca quiele dan' rnaole xneza Cristo cuenda gacale ben' nao xnezè' du guicho du la'adyi', gacale ben' bigapa falta.

⁵ Chi nu le'e binezile cabè' reya'ala' huele, ruen zi inabale lao Diuzi gacalènè' le'e ta inezile ca reya'ala' huele. Diuzi sí, huacalènè' le'e ta inezile. Biidza' Diuzi le'e dan' inabalenè' ta inezile ca reya'ala' huele. ⁶ Pero cati inabale Diuzi gacalènè' le'e, bihuele pensari chi usanla'adyi'nè' le'e, huacalècazè' le'e. Chi huele pensari usanla'adyi'nè' le'e, lena' naca pensari quiele ca quie nisa yao ze ru'a be len, reru'unnan len tzala' huio lao yu bidyi. ⁷ Nu ben' naca cana', bireya'ala' huenè' pensari hue' Diuzi lèbè' ca ta inabanè' Diuzi. ⁸ Cana' naca quie yaca ben' rue cana', como dan' chi racajè' chopa pensari, zèdi nacan quiejè', na' biruejè' pensari inaojè' tuzi xneza Diuzi.

⁹ Na'ra rnia' le'e, bicha', ben' yèchi', ben' bi de quie: Reya'ala' yedaohuele sule gusto cabè' tahuen gula babè Diuzi quiele sunè' dispuesto ta yezi'nè' le'e guibá. ¹⁰ Lèscan' rnia' le'e, bicha', ben' uña'a, ben' bibi rdziogue: Reya'ala' yedaohuele sule contenido cati rue benè' le'e bizonaquezi redzagalaole nun quie naole xneza Cristo. Cana' reya'ala' huele como dan' tzadica'zi za'le lao yedyi layu. Naca quiele ca quie tu yo guixi' bisun zidza. ¹¹ Cati rna' oba zi' rbe' tala, cana' ibidyi guixi' iguino yo quien, cana' rnti yela' badan quien. Lèscana' nacaré quie yaca ben' uña'a. Tu chopa dzazi rdajè' ruejè' negocio, caora na' laratitejè'.

Hue Diuzi ra'o prueba chi tali naoro xnezè'

¹² Huela'iya Diuzi nu ben' sue dyè'èdi cabè' prueba hue Diuzi lèbè', porque caora banaquè' prueba, na'ra gaca quienè' ca quie ben' nuzu coron ca coron nuzi rey. Hue' Diuzi lèbè' yela' neban tuzioli cabè' unè' huenè' quie ben' nadyè'è lèbè'. ¹³ Cati racaro pensari huero tamala, bigacaro pensari chi Diuzi rudze'nè' ra'o pensari mala, porque Diuzi biyu'unè' pensari ta huenè' tamala, lèscan' birudze'nè' ra'o pensari huero tamala. ¹⁴ Pero cani nacan: Pensari quieziro ruanan ra'o mandado huero ta rnazin quiero huero tamala. ¹⁵ Nun quie pensari mala yu'uro, lena' inèn ra'o huero tamala cuèchin dula' xquia quiero. Na'ra cati baoyè dula' xquia quiero, barnabè'n ra'o, caora na' udyiaguin' ra'o.

¹⁶ Bicha', ben' nedyè'èda', rnia' le'e bisi'le cuinle yè'. ¹⁷ Puro ta naca huen gula za' guibá gun Diuzi ra'o. Lèbè' nabèchinè' xni' guibá. Tuzi ca naca Diuzi tuzioli, bibetza'nè'. ¹⁸ Según ca una Diuzi huenè' quiero dza na'te, cana' bènè' na'. Use'elè' di'idza' la'iya quienè' cuenda hue quiero quienè' gata' yela' neban quiero tuzioli. Naca quiero ca quie usecho nèro ta yezi' Diuzi.

Ni rguixogue'n ca re'en Diuzi huero inaoro xnezè' dyè'èdi

¹⁹ Quie lena', bicha', rnia' le'e reya'ala' ye uzè nagale dyè'èdi huele cuenda xti'idza' Diuzi. Reya'ala' huele pensari biinèl con ganzi. Reya'ala' gacale benè' zela'adyi', bigacale ben' huin'. ²⁰ Porque chi rdza'ro rdilalèro lague dyi'ro, bisaque' huero tadya'a cabè' re'en Diuzi huero. ²¹ Quie lena' bira inaole huele ca tamala gula rue yaca benè'. Reya'ala' inaole huele ca naca di'idza' la'iya quie Diuzi ta bayu' guicho laxta'ole, bihuele cuinle ben' ze. Pues fuerza valor nu'a di'idza' la'iya quie Diuzi ta gacalèn ra'o yedyinro guibá.

²² Quie lena' uzule di'idza' huele mandado cabè' mandado rue di'idza' la'iya quie Diuzi. Biinaro tu yezilen, tu ina'zilen, porque chi tu yezilen, tu ina'zilen, cana' si'le cuinle yè'. ²³ Chi yeziro ina'ziro biuzuro di'idza' huero ca mandado rue xti'idza' Diuzi, naca quiero ca quie tu ben' rna' laohue lao huan. ²⁴ Tzadica'zi baona'nè' laohuè' lao huan, na'ra bagula'adyi'nè' bi naque laohuè'. Cana' naca quie ben' yezi ina'zi xti'idza' Diuzi. Tu rezinè' rna'zinè', na'ra bagula'adyi'nè' len. ²⁵ Pero nu ben' re rna' dyè'èdi xti'idza' Diuzi, bireza'la'adyi'nè'n ruzunè' di'idza' ca na xti'idza' Diuzi, na'ra huela'iya Diuzi lèbè' cabè' ruenè'. Naca xti'idza' Diuzi di'idza' dya'atzegue. Ruen ra'o mandado chi hue quiero len gacaro ben' libre, suro contento cabè' ruero.

²⁶ Chi ina nu ben' naquë' ben' quie Diuzi, pero binezinë' hue'lënë' benë' di'idza' zela'adyi', rnënë' di'idza' yaladyi' ruldžë' benë', na'ra rzi'në' cuinnë' yë'. Binaquë' sirve para gaquë' ben' quie Diuzi. ²⁷ Pero cani re'en Xuziro Diuzi huero inaoro dyë'ëdi xnezë', re'ennë' gacalëro xcuidi' huezëbi, re'ennë' gacalëro nigula baguti xquiuhue ta rdzioguenë', re'ennë' taro dyë'ëdi biinaoro neza mala cabë' tamala de lao yedyi layu.

2

Reya'ala' huero tuzi ca huelëro benë'

¹ Bicha', le'e ben' nao xneza Señor quiero Jesucristo, reya'ala' huele tuzi ca huelële benë'. ² Por ejemplo, chi za' ben' uña'a ga regu'udi'le, ben' yu'u tu anillo de oro zbenë', chi za'në' nacué' tu la'ari' dya'a, lëscan' chi za' tu ben' yëchi' nacué' tu la'ari' gula, ³ chi rapale bala'ana dyë'ëdi ben' uña'a rëbilenë': "Ure' gan' ni ga naca dya'a", pero chan' na' ben' yëchi' rëbilenë': "Ude uzuli na'la", o chi rëbilenë': "Ure' layu", cala tadya'a ruele dan' ruele cana'. ⁴ Chi biruele tuzi ca ruelële benë', biruele tahuen. Barulu'ena quiele biyu'ule pensari dya'a.

⁵ Bicha', ben' nedyë'ëda, uzënagale dyë'ëdi cabë' rnia': Entre yaca ben' nita' lao yedyi layu, ulio Diuzi yaca ben' yëchi' tacuenda gaca huen gula quiejë' inajë' xneza Cristo yedyinjë' guibá ga r nabë' Diuzi cabë' una Diuzi huenë' quie ben' nadyë'ë lëbë'. ⁶ Pero le'e baruele yela' stu' quie yaca ben' yëchi'. ¿Binezile ben' uña'a, ben' si' le'e yë', lëjë' cuanjë' ta de quiele hasta rehua'ajë' le'e lao ben' r nabë'? ⁷ ¿Binezile leyaquë' rnëbižoyaquë' quie Cristo, ben' naca Señor quiero, ben' rzëtoro laohue?

⁸ Chi tali uzule di'idza' ca mandado rue ley r nabë'ra quie Diuzi, baruele huen. Lëley na' rguixogue'n cani: "Idyë'ële lagueidyile ca idyë'ële cuinle." ⁹ Pero chi biruele tuzi ca ruelële benë', cana' ruele xquia quiele, napale dula' biruzule di'idza' ca mandado rue Cristo ra'o. ¹⁰ Chi uzuro di'idza' con cabë' rna lao ley pca'n Diuzi lao na'a Moisés, pero na'a chi baoquixiro tun cabë' mandado ruen ra'o, na'ra de dula' quiero ca quie ben' baoquixi yugulu mandado ruen. ¹¹ Pues dza na' una Diuzi rëbinë' ra'o: "Bireya'ala' talële nigula binaca zgulale", pero lëscan' una Diuzi: "Bireya'ala' gutile benë'." Quie lena' la'acazi birdalële nigula binaca zgulale, pero chi babëtile benë', naca quiele ca quie ben' biruzo ni tu di'idza' con cabë' rna lao ley quie Diuzi. ¹² Reya'ala' huele pensari dyë'ëdi tale du guicho du la'adyi'le como ben' hue cuenda lao Cristo chi bë quiele cabë' unanë' huele ta gacale ben' libre. ¹³ Pues con nu ben' biyeyëchi'la'adyi' benë', lëscan' biyeyëchi'la'adyi' Diuzi lëbë' dza gaca juicio. Pero con nu ben' beyëchi'la'adyi' benë', huenë' gan yeyëchi'la'adyi' Diuzi lëbë' dza gaca juicio.

Bireya'ala' tu yeziro xti'idza' Diuzi

¹⁴ Na' rnia' le'e bicha': ¿Ga rue dyin dan' inale rnaole xneza Cristo, chi biruzule di'idza' quienë' yeyëchi'la'adyi'le benë' ca mandado bënë' quiero? Chi huele cana', lena' rulu'en quiele binaole xneza Cristo, na' biyezi' Diuzi le'e yedyinle guibá. ¹⁵ Inaro chi zu nu bichiro, o nu zanro, ben' naorë xneza Cristo, pero rdzioguenë' zabanë', rdzioguenë' ta gaonë', ¹⁶ na'ra chi nu le'e inale rëbile ben' rdziogue, ben' bibi de quie: "Beyo dyë'ëdi. Utaco' cuino' quie tazaga. Udao dyë'ëdi", pero bibi bë'lenë' ta idaconë' quie tazaga, bibi bë'lenë' ta gaonë', chi cana' bële, ¿bizi bële ta gacalële ben' rdziogue, bële cana'? ¹⁷ Cani nacan: Chi biuzuro di'idza' ca mandado bë Cristo ra'o, lena' rulu'en quiero binaoro xneza Cristo, lena' rulu'en quiero di'idza' dachi rnëro inaro naoro xneza Cristo.

¹⁸ Pero bala le'e inale biruen zi uzuro di'idza' ca mandado bë Cristo. Inale tu neziziro bidë' gutië' lë'ë yaga cruzo, quie lëzin yedyinro guibá. Pero në'ëdi' rnia' le'e, ruecazin zi uzuro di'idza' ca mandado bë Cristo, porque chi biuzuro di'idza' ca mandado bë Cristo, lena' rulu'en quiero binaoro xnezë'. ¹⁹ Pues banezile dyë'ëdi tuzi Diuzi zu. Tahuen na' banezile cana'. Pero bigala'adyi'le banezirë yaca taxi'ibi' tuzi Diuzi zu. Pues hasta tu rziziyacan rdzebiyacan quie Diuzi. Pero la'acazi neziyacan tuzi Diuzi zu, biyezi' Diuzi leyacan yeyoyacan guibá. ²⁰ Pero pensari tondo yu'ule. ¿Binezile di'idza' dachi rnëro chi inaro naoro xneza Cristo, na' biuzuro di'idza' ca mandado bënë' ra'o? ²¹ Na'ra blë'ë Diuzi xuzixta'oro Abraham ben' laxta'o yëri nun quie dan' bzu Abraham ca di'idza' bë'lë Diuzi lëbë'. Bzunë' zi'inë' Isaac lao ru'aba ca quie gun quie Diuzi lao laza bia guixi'. ²² Pues claro nacan cabë' bë'lë Diuzi Abraham. Nun quie dan' bzu Abraham di'idza' ca mandado bë Diuzi lëbë', cana' blu'en quie Abraham talicazi uzudyi'ilënë' Diuzi. ²³ Cana' uzu di'idza' con cabë' rna lë'ë guichi la'iya quie Diuzi cani: "Como dan' uzudyi'ilë Abraham Diuzi, quie lena' blë'ë Diuzi lëbë' ben' laxta'o yëri." Cana' guca una Diuzi rëbinë' Abraham: "Nacaro amigo."

²⁴ Lëscan', claro nacan cala tu neziziro zu Diuzi, na' ilë'nënë' ra'o ben' laxta'o yëri, yezinënë' ra'o. Pero lëscan' ruen zi uzuro di'idza' ca mandado ruenë' ra'o. ²⁵ Cana' bë'lë Diuzi tu nigula guti' gusto quie lao Rahab dza na'te. Pues lë'nigula na' gualënë' chopa ben' Israel, ben' bida balarazi dena' ca naca yedyi quienë'. Caora na' bë'ne' lëjë' posada quiejë'. Blu'enë' leyaquë'

ga zu neza ta yežunoyaquë' lao yedyi yeza'jë' balarazi, porque gu'un rey quie yedyi na' gutinë' lëjë'. Na' caora guca dilalë ben' yedyi quie nigula na', len ben' Israel, caora na' pte psela Diuzi nigula na' len familia quienë', bigutiyaquë'. ²⁶ Pues cani nacan: Cati babero bichi be quiero lu'u cuerpo quiero, cana' banati cuerpo quiero, bira bisirve. Lëscan' ra'o, chi biuzuro di'idza' huero ca mandado rue Cristo ra'o, nacaro ca quie ben' huati, bibi sirve inaro rnaoro xneza Cristo.

3

Reya'ala' gaparo cuidado cabë' di'idza' hue'lëro benë'

¹ Bicha', gapale cuidado cabë' ruele usëdile benë' xti'idza' Diuzi, porque nezile cabë' hue Diuzi quie ra'o ben' rusëdi. Nezile cati yezi' Diuzi cuenda quiero, na'tera inaba Diuzi ra'o chi bëro cuinro cabë' psëdiro benë' tula, cabë' psëdirojë' reya'ala' hueyaquë'. ² Yuguluro rquixiro, biru'elëro benë' puro di'idza' dya'a. Chi zu tu ben' birquixi, ben' biru'elë benë' di'idza' mala, naquë' ben' laxta'o li, nezinë' inabë'në' cuinnë'. ³ Na' inia' le'e chopa ejemplo. Cati rudze'ro freno ru'a caballo, cana' ucaxoroba' ta tzahua'aba' ra'o gan' re'enro tziro. ⁴ Lëscan' ulehue pensari ca naca quie yaca barco. La'acazi nacan barco yela, la'acazi be fuerte rudyigan len, huaca usa' ben' rusa' len con tuzi yaga ta'a dao' ta tziolë'në'n ga re'ennë' tzioguë'. ⁵ Cana' nacaré quie ludyiro. Nacan tu parte dao' bicu' cuerpo quiero, pero ruanan tazëla quiero. Lëscan' cana' nacarën quie tu gui' dao'. La'acazi nacan gui' dao'zi, taze guixi' yaga uzeinan. ⁶ Naca ludyiro ca quie gui' re' gabila. Tanto ruelëro ludyiro tamala udyiagu'ro benë', cana' udyiagu'ro cuinro. Nun quie lena' quilon tazëdi gula quiero dza rdaro lao yedyi layu. ⁷ Huazaque' ucaxoro nutezi bia guixi', nutezi bguini, nutezi bëla. Pues hasta yaca bia yu'u lu'u nisa huazaque' ucaxoroba'. ⁸ Ben' nunu saque' ucaxo ludyinë'. Bicueza ludyiro quilon tamala quiero. Naca ludyiro ca quie lei bëla ta yudzu veneno ta udyiagu' benë'. ⁹ Con tuzi ludyiro tzionla'adyi'ro Xuziro Diuzi, na' udze'de'ro laguedyiro, ben' bzalo Diuzi ca naquë' cuinnë'. ¹⁰ Tuzi ru'aro rero di'idza' huen tzionla'adyi'ro Diuzi, na' reron di'idza' mala udze'de'ro benë'. Bicha' bireya'ala' huele cana'. ¹¹ ¿Binezile ca naca ga ralo nisa? ¿Binezile biralo chopa cue' nisa gacan nisa žixi, na' gacan nisa sla'? ¹² Bicha', rnia' le'e: ¿Huazaque' cuia yaga hui tazixi tula? Pues bisaque'. Lëscan', rnia' le'e: ¿Huazaque' cuia lao luba bedzuli' hui? Pues bisaque'. Lëscan' ga ralo nisa, bisaque' gacan nisa žna'a, na' gacan nisa žixi.

Ca reya'ala' huero chi tali rioñe'ero quie xneza Cristo

¹³ Ca naca le'e, chi tali rioñe'ele quie xneza Cristo, reya'ala' huele tahuen cuenda ulu'en quie tali barioñe'ele. Reya'ala' huele ca rue ben' rioñe'ele, bihuele cuinle ben' ze. ¹⁴ Chi racazë'le laguedyile, na' naca laxta'ole yaladyi'. Chi puro cuinzile re'enle gaca tahuen quiele, na' biinale rioñe'ele quie xneza Cristo, porque yë' rzi'le binaca tali ca nale. ¹⁵ Chi huele cana', cala pensari quie Diuzi yu'ule, den' pensari quie benë', pensari quie xan' taxi'ibi'. ¹⁶ Porque cati racazë' benë' laguedyiaquë', cati re'enyacuë' puro cuinziyaquë' gaca tahuen, quie lena' gaca tazëdi huaca dilayaquë', gaca zë cue' tamala. ¹⁷ Pero yaca ben' rioñe'ele dyë'ëdi quie xneza Cristo, lëjë' sí, rnaoyaquë' tuzi xneza Cristo, biyu'ujë' pensari mala. Nacayaquë' ben' gaxo, ben' huen, ben' yu'u pensari, ben' reyëchi'la'adyi' laguedyi, ben' rguixogue' dyë'ëdi ca nacan, ben' rda du guicho du la'adyi'. ¹⁸ Con nu ben' rguilo ta cuëchi laxta'o benë' chizi, huaca huen quiejë' lao Diuzi, ruejë' ca re'en Diuzi huejë'.

4

Bireya'ala' taro cabë' rda yaca ben' nita' lao yedyi layu

¹ ¿Gazi za' ralo yela' huedila quiele? Pues za' ralon nun quie pensari mala yu'u lu'u guicho laxta'ole. Lena' runën le'e lu'u guicho laxta'ole rdale rdilalële laguedyile. ² Le'e re'enle ta de quie laguedyile, pero como binacan quiele, na'ra rutilé laguedyile cuenda si'le ta de quienë'. Rza'la'adyi'le ta de quie laguedyile, pero como biden quiele, na'ra rzulaole rdilale. Bide ta rdzioguele como dan' birnabalen lao Diuzi. ³ Chi inabalen lao Diuzi, bibi gunnë' le'e, porque dan' biyu'ule pensari dya'a inabalen. Yu'ule pensari ta huele ta rnazin quiele. ⁴ Le'e bire'enle inaole tuzi xneza Diuzi. ¿Binezile chi huelële tuže ben' rudie xneza Diuzi, na' nacale enemigo quie Diuzi? Nutezi ben' re'en huelë tuže ben' rudie xneza Diuzi, na'ra banaca ben' na' enemigo quie Diuzi. ⁵ Quie lena' rnën lë'ë guichi la'iya quie Diuzi cani: "Lega nedyë'ë Diuzi Bichi Be quienë', bdze'në' lë'në' lu'u guicho laxta'oro." ⁶ Cana' taze racalë Diuzi ra'o. Lena' rguixogue'n lë'ë guichi la'iya quie Diuzi caniga: "Bire'en Diuzi ca rue ben' rue že cuine, pero reyëchi'la'adyi' Diuzi yaca ben' nao xnezë' du guicho du la'adyi'." ⁷ Quie lena' reya'ala' uzule di'idza' dyë'ëdi ca na Diuzi le'e. Chi bihue'le lato inabë' xan' taxi'ibi' le'e, cana' usanla'adyi'n le'e yežunona. ⁸ Ulehuelë Diuzi tuže, cana' huelë Diuzi le'e tuže. Le'e, ben' napa dula' xquia, reya'ala' usanla'adyi'le pensari mala

quiele. Le'e, ben' re'en inao chopa neza, ulehue pensari bi neza inaole. ⁹ Huele pensari ca bayëchi' raca quiele nun quie dula' xquia quiele. Biuzidyile ca ruele. Pues reya'ala' cuedyile gacale bayëchi'. Bisule alegre. Pues reya'ala' cue'le chizi yeyuele pensari cabë' raca quiele. ¹⁰ Ulequituzi zibile lao Diuzi, na'ra huenë' le'e ben' ze.

Bireya'ala' inëbüzoro quie laguedyiro

¹¹ Bicha', bireya'ala' inëbüzole mala quie laguedyile. Chi inëbüzole quie laguedyile, ruen quiele rnëbüzole quie ley pca'n Diuzi lao na'a Moisés. Chi inëbüzole quie ley na', na' babële cuinle ben' rnabë'ra quie lao ley na'. Pero cabë' reya'ala' huele, reya'ala' uzule di'idza' cabë' rna lao ley na', ¹² porque tuzi ben' zu, ben' pca'n ley, ben' naca ben' rnabë'. Lëlëbë' ute uselanë' benë', o chi ise'elë' benë' lao gui' gabila. ¿Pero nuzi naca le'e re'enle inëbüzole quie laguedyile?

Binezoro bi ta za' gaca quiero uxe

¹³ Ulezë'naga le'e ben' rnë: "Na'a, uxe, sa'ro tzioro yedyi tula tzasuro tu iza huero negocio huero gan." ¹⁴ Pero nica nezile bi ta za' gaca quiele uxe. Quie lena' inaba' le'e, ¿cabizi naca quiero dza rdaro lao yedyi layu? Pues naca quiero ca quie tu beo lasi tzadica' reylan. ¹⁵ Pero reya'ala' inale cani: "Chi re'en Diuzi, huazuro lao yedyi layu, huero bi dyin re'enro huero." ¹⁶ Pero le'e, lega raxele huele cuinle ben' ze cabë' rnële. Binacan huen ca ruele ruele cuinle ben' ze. ¹⁷ Chi le'e nezile huele tahuen, na' biruelen, lena' nacan xquia quiele.

5

Ni rguixogue'n cabë' naca quie ben' uña'a

¹ ¡Ulezë'naga dyë'ëdi cabë' naca quie ben' uña'a! Reya'ala' cuedyiya'yaquë' quie tamala za' quieyaquë' yedzagalaoyaquë'. ² Ca naca yela' uña'a quieyaquë', huabiagui'n gudzon itabon. Lëscana' nu zabajë' dya'a, huatabon gao biazidzo len. ³ Lëscana' oro plata quiejë', huabiagui'na gaca ditoguen. Ulu'en ca tamala bëjë' bëlëjë' ben' yëchi'. Lena' huen quiejë' ca quie ben' zuba lagui', uzeinan leyaquë'. Bapupajë' yela' uña'a quiejë' na'adza cati baruen bago iyudyi yedu quie yedyi layu. ⁴ ¡Le'e ulezë'naga! Rbedyi yaca ben' rue dyin quiejë', porque rezijë' cosecha quieyaquë', na' racayaquë' zi', pero birguizuyaquë' leyaquë'. Lena' raona leyaquë' xquia lao Diuzi. Na'ra Diuzi rnabë'në' guibá, rnabë'në' lao yedyi layu, banezinë' cabë' rusaca ben' uña'a yaca ben' rue dyin quieyaquë'. ⁵ Gan' ni lao yedyi layu, puro de lujo re'enyacuë'. Rza'la'adyi'yaquë' tuz ta rnan quie cuerpo quiejë'. Ruejë' baneza cuinziyaquë'. Ruzë'ni' cuinyaquë' cabë' re'eni bëdyihuaga. Baruen bago dza huen Diuzi leyaquë' castigo gatiyaquë' ca ratí bëdyihuaga. ⁶ Mandado quiejë' aochuguli yaca ben' rnabë' ta gutijë' ben' bibi tamala bë, ben' birzaque' hue defender cuine.

Reya'ala' cuezaro dyë'ëdi dza yeguida Cristo, hue'lëro Diuzi di'idza'

⁷ Pero le'e bicha', reya'ala' cuezale dyë'ëdi dza cati yeguida Cristo lao yedyi layu. Naca quiero ca quie ben' rue dyin guixi'. Rbezanë' yela' nisa yo, na'ra gazanë' rbezanë' dyë'ëdi yezi'në' cosecha ca naca ta rdzioguenë'. ⁸ Lëscan' le'e, reya'ala' cuezale dyë'ëdi huele tuzi pensari, porque baruen bago dza yeguida Jesucristo lao yedyi layu. ⁹ Bicha', biinële contra laguedyile, porque huachugubë' Diuzi le'e chi inële contra laguedyile. Naca Diuzi ben' ichugubë' quiero yuguluro. Ilë'ëti'zi nerdziogue idyin dza huenë' juicio lao yedyi layu. ¹⁰ Bicha', cabë' bë ben' profeta, ben' ulio Diuzi, ben' udixogue' xti'idzë' dza na'te, bezueyaquë' bedzagalaoyaquë', cana' reya'ala' huele le'e. ¹¹ Pues nezoro huela'iya Diuzi nu ben' rzue redzagalao, ben' bisan xneza Cristo. Babele cabë' bë Job, ben' unita' tiempote. Dyë'ëdi uzuenë' bedzagalaonë'. Lëscan' nezile cabë' gualë' Diuzi lëbë', bro quienë' huen. Lena' rulu'en reyëchi'la'adyi' Diuzi benë', re'ennë' gacalënë' ra'o.

¹² Nacan belao cabë' rnia' le'e ni, bicha'. Biugunle ta dya guibá, biugunle ta de lao yedyi layu. Biugunle Diuzi con ganzi. Bisi'le benë' yë'. Dula'adyi'le inale: "Huazaque'", dula'adyi'le inale: "Bisaque'". Na'ra bihue Diuzi xquia quiele.

¹³ Chi nu le'e redzagalaole, reya'ala' ulidzale Diuzi hue'lënë' di'idza'. Chi nu le'e sule contento, reya'ala' gulale alabanza. ¹⁴ Chi nu le'e raza zhue'le, reya'ala' guëzile guida ben' napa dyin quie ben' nao xneza Cristo ta ulidzajë' Diuzi ga dele ilëpiyaquë' le'e aceite rzëtoyaquë' lao Jesucristo. ¹⁵ Na'ra cati ulidzayaquë' Diuzi hue'lëyaquë' lëbë' di'idza' du guicho du la'adyi'yaquë', caora na' iyacale yeyue Diuzi le'e. Chi bële xquia, huezi'ze Diuzi dula' xquia quiele. ¹⁶ Quie lena' reya'ala' ixubalëpile lao laguedyile, ben' nao xneza Cristo, chi bële xquia. Lëscan' reya'ala' ulidzale Diuzi inabalenë' gacalënë' laguedyile, ben' nao xneza Cristo, cuenda sule huen. Huacalëcazi Diuzi nu ben' huen, ben' hue'lë lëbë' di'idza' du guicho du la'adyi'. ¹⁷ Bigala'adyi'le ca guca quie ben' profeta Elías. Guquë' benë' ca ra'o. Pero caora unabanë' Diuzi du guicho du la'adyi'në' ta bihuen nisayo, na'ra tzona iza

yu gatzo biben nisayo. ¹⁸ Ude na' benabanë' lao Diuzi ta huen nisayo, na'ra bela' nisayo, bezi'yaquë' cosecha quieyaquë'.

¹⁹ Na'ra rnia' le'e bicha'. Chi nu laguedyile, ben' nao xneza Cristo, bapsanla'adyi'në' xneza Cristo, reya'ala' gacalëlenë' ta yenaohuë' xneza Cristo tatula. ²⁰ Reya'ala' inezile chi gacalële ben' psanla'adyi' xneza Cristo ta yenaohuë' xneza Cristo tatula, babële tahuen ta bicuiagui'në' bira inaohuë' neza tula, neza zio gabila. Lëscan' nun quie gucalëlenë', huazi'ze Diuzi dula' xquia quie ben' na', la'acazi napë' xquia že. Amén.

GUICHI NĒRO BĒ SAN PEDRO APÓSTOL

Bē Pedro tu guichi ni, use'ela'nē'n lao yaca ben' nao xneza Jesús, yaca ben' abdzatza uza' yedyi quie

¹ Nē'ēdi', Pedro, naca' apóstol quie Jesucristo. Bia' guichi ni use'ela'n laole le'e ben' abdzatza uza' yedyi quie ziole yedyi tula, ziole yaca yedyi nebaba Ponto, len yaca yedyi nebaba Galacia, len yaca yedyi nebaba Capadocia, len yaca yedyi nebaba Asia, len yaca yedyi nebaba Bitinia. ² Ulio Xuziro Diuzi desde tiempote gacale ben' quienē' según ca unanē' huenē' quiele. Lao na'a Bichi Be quienē' ulionē' le'e tacuenda inaole xneza Jesucristo yeyēri guicho laxta'ole por nun quie gutinē' lē'ē yaga cruzo ulato ren quienē'. Rulidza' Diuzi ta huela'iyane' le'e cuēchinē' chizi lu'u guicho laxta'ole.

Rbezaro dza yeyoro guibá

³ Huero Diuzi, ben' naca Xuzi Señor quiero Jesucristo, ben' ze. Beyēchi'la'adyi'nē' ra'o, banaca quiero ca quie ben' bagolo tacubi. Lena' rbezaro dza yezi'nē' ra'o gata' yela' neban quiero tuzioli cabē' bēnē' quie Jesucristo, psebannē' lēbē'. ⁴ Cana' yega'nnan quiele ca ta pceza Diuzi guibá gunnē'n quiele. Ca ta gun Diuzi nacan huen gula, binaquixin ni tu tamala. Biyeyudyi yedu yeyulan tuzioli. ⁵ Nun quie naole xneza Jesús, nacui'o Diuzi le'e conlē yela' huaca quienē' hasta dza yeyudyi yedu quie dyilayu bade yela' neban quiele tuzioli. Hora na', hora yeyudyi yedu dyilayu, ulu'e Diuzi le'e ca tadya'a gula bapcuezē' quiele guibá.

⁶ Quie lena' redaohuele ba'ala'cazi rnanban yedzagalaole taže tu tiempo dao' tacuenda ilē'ē Diuzi chi du guicho du la'adyi'le naole xnezē'. ⁷ Rnanban udze'ro yo lagui' ta racan ca oro ta gaca prueba chi tali nacan oro. Lēscan' le'e, rnanban gacale prueba ilē'ē Diuzi chi du guicho du la'adyi'le naole xnezē'. Na' chi biusanle xneza Jesús, lena' zaca'ran ca zaca' oro. Lena' yeyula'adyi' Diuzi le'e yēbinē' bēle huen, yeron dya'a quiele laonē' dza yeguida Jesucristo.

⁸ Le'e nedyē'ēle Jesucristo ba'ala'cazi binelē'ēlenē'. Caora na' nun quie naole xnezē' ba'ala'cazi binelē'ēlenē', zudyi'ilēlenē'. Tantozi redaohuele, birdzelele di'idza' inale cabē' naca yela' redaohue quiele. ⁹ Cuenda quie naole xneza Jesucristo, cana' biiniti bichi be quiele, cana' bade yela' neban quiele tuzioli.

¹⁰ Yaca ben' unita' tiempote, ben' psēdi guichi quie Diuzi, psēdjē' ca cule hue Diuzi quiele gata' yela' neban quiele tuzioli, na' unajē' quie tadya'a gula de quie Diuzi gunnē' quiele. ¹¹ Dza na' use'ela' Cristo Bichi Be quienē' ta uzioñe'enē' yaca ben' psēdi guichi quie Diuzi tiempote. Bzioñe'enē' lējē' tu ta binegaca quie Cristo. Bzioñe'enē' lējē' cabē' yedzagalao Cristo, pero caora yeyudyi yedzagalaonē', gapala'n yaca benē' lēbē' taže gula. Psēdjē' ca ta bzioñe'e Bichi Be quie Cristo lējē'. Bējē' pensari nu guida. Bējē' pensari bata gaca cana'. ¹² Pero bzioñe'e Diuzi lējē' de que cabē' bedzelejē' psēdjē' bigucan para lējē', gucacazin para ra'o. Desde guibá use'ela' Diuzi Bichi Be quienē' ta gacalēnē' yaca ben' rguixogue' xti'idza' Diuzi ta pxi'idze'jē' le'e con cabē' una ja ben' unita' tiempote. Pues lente ja ángel re'enjē' isēdjē' con cabē' una yaca ben' unita' tiempote.

Re'en Diuzi gacaro ben' laxta'o yēri

¹³ Quie lena' sule listo tzu'ule gracia. Sudyi'ilēle Diuzi cuezale dyē'ēdi ca tadya'a gula gaca quiele dza yeguida Jesucristo. ¹⁴ Ca rale z'i'iro quiero, cana' reya'ala' galele quie Diuzi. Bihuele ta rnazin quiele cabē' bēle dza na', dza caora binenaole xneza Jesús. ¹⁵ Ta reya'ala' huele, reya'ala' gacale ben' laxta'o yēri, porque Diuzi, ben' ulionē' le'e, naquē' ben' laxta'o yēri gula. ¹⁶ Porque rnēn lē'ē guichi la'iya quie Diuzi cani: "Gacale ben' laxta'o yēri, porque naca Diuzi ben' laxta'o yēri gula."

¹⁷ Chi ulidzaro Diuzi yēbironē': "Xuzindo' luē'", tana' reya'ala' gaparo cuidado bibi huero tu lala rdaro lao yedyi layu, porque nezi Diuzi nu ra'o rue tahuen, nu ra'o rue tamala. Tuzi ca nezi Diuzi quiero. ¹⁸ Pues bapte psela Diuzi ra'o. Babecubinē' pensari quiero ta bira huero tamala ca ta mala bē xuzixta'oro. Ta bē Diuzi quiero ruenan ca quie ben' ya'ohue ra'o. Pero dyē'ēdi nezile quele con ta yeyudyi yedu quie como ca oro o plata ya'ohue Diuzi ra'o, ¹⁹ pero conlē ren quie Cristo ya'ohue Diuzi ra'o. Lēbē' gutiguē' lē'ē yaga cruzo ca gun quie Diuzi ulato ren quienē'. Naquē' ca quie tu beco' zi'ila' dya'a gula ta hue'ro Diuzi. ²⁰ Tu binegata' yedyi layu una Diuzi ise'elē' Cristo lao yedyi layu. Na'ra tiempo quiero, tiempo rdaro lao yedyi layu, bapsee'ela' Diuzi Cristo bidanē' bēnē' tadya'a quiero. ²¹ Lao na'a Cristo naoro xneza Diuzi. Pseban Diuzi Cristo, bēnē' lēbē' ben' ze. Por nun quie dan' zudyi'ilēro Diuzi, cana' rbezaro dza yezi'nē' ra'o.

²² Na'ra le'e, barue quiele di'idza' li quie Diuzi, baneyëri guicho laxta'ole lao Diuzi tacuenda idyë'ële yaca ben' bichiro. Du baneyëri le lao Diuzi, cana' du guicho du la'adyi'le reya'ala' idyë'ële ben' bichiro, yaca ben' nao xneza Jesús. ²³ Banaca quiele ca quie ben' bagolo tacubi, pero quele por nun quie xuzile žna'le, den' por nun quie xti'idza' Diuzi. Pues quie xti'idza' Diuzi, biyeyudyi yedu quien, nebannan tuzioli. ²⁴ Cana' rnën lë'ë guichi la'iya quie Diuzi cani:

Yugo benë' naca quiejë' ca quie guiži, como tu chopa dzazi yeyudyi yedu quiejë'.

Lëscan' nacarë ta de quiejë' ca quie yo guixi', como lëzirë tu chopa dzazi yeyudyi yedu quien.

²⁵ Pero xti'idza' Diuzi, tuzioli biyeyudyi biyedu quien.

Rguixogue'n quie yela' neban tuzioli. Lëdi'idza' na', di'idza' la'iya quie Diuzi, lena' baodixogue' yaca benë' le'e.

2

¹ Quie lena' bireya'ala' huele ni lë'ëti' tamedian. Bisi'le benë' yë', biinaole chopa neza, biyëžë'le benë', bihue'lële benë' di'idza' bižu. ² Ca bdao' zagolo are'embi' ga'adyibi' ta si'bi' fuerza, cana' reya'ala' gue'enle isëdile xti'idza' Diuzi ta si'le fuerza inaorale mazara xneza Jesús, inita'le dya'a laohuë'. ³ Cana' re'ennan huele chi tali aoyoñe'ele naca Señor quiero ben' la'iya.

Naca Cristo ca quie yo naban zaca'n taze

⁴ Ulenao Cristo, ben' naca ca quie tu yo naban zaca'n taze, pero uru'un yaca benë' len tzala'la. Pero Diuzi sí, bezi'në' lëbë' rlë'ënë' lëbë' ca quie tu yo naban zaca'n taze. ⁵ Cana' ruerë Diuzi conlë le'e. Rlë'ënë' le'e ca quie tu yo naban, ben' rue quie lëbë'. Rlë'ënë' le'e ca quie tu idao' ga zu Bichi Be quienë'. Rlë'ënë' le'e ca quie yaca pxuzi la'iya, ben' rudyia gun quienë' lao ru'aba por nun quie Jesucristo, lega reynun'la'adyi' Diuzi len. ⁶ Quie lena' rnën lë'ë guichi la'iya quie Diuzi cani:

Ise'ela' zi'ina' ciudad Sión, naquë' ca quie yo belao, yo zaca' taze.

Nutezi sudyi'ilë lëbë', huaron dya'a quienë' laohua'.

⁷ Para ra'o, ben' nao xnezë', naca Jesús ca quie tu yo zaca'n taze. Pero para ben' binao xnezë', naca Jesús ca quie tu yo ta bibi zaca', na' aoru'unyaquë' lëbë' tzala'la. Quie lena' naca quieyaquë' con cabë' rnën lë'ë guichi la'iya quie Diuzi cani:

Aoru'un yaca benë' tzala'la yo belao, yo zaca'n taze, pero Diuzi babei'në' yo belao ta uru'un benë', bezunë'n xlaton.

⁸ Lëscan' ga tula rnën lë'ë guichi la'iya quie Diuzi cani:

Naquë' ca quie tu yo ruxitün yaca benë'.

Cana' rnën lë'ë guichi la'iya quie Diuzi. Pues uxitin leyaquë' huabiagu'jé' nun quie bibëjé' casa quie xti'idza' Diuzi. Cana' una Diuzi gaca quiejë'.

Ta huero dyin quie Diuzi suro lao yedyi layu

⁹ Pero le'e, ulio Diuzi le'e, nacale familia quienë'. Lëscan' naca quiele ca quie yaca pxuzi ruzu di'idza' quie nu rey. Nacale ben' nayëri laxta'ohue lao Diuzi. Nacale ladyina'a Diuzi. Cana' naca quiele cuenda quixogue'le benë' cabë' rue Diuzi, ruenë' tahuen gulatzegue. Lëbë' ulionë' le'e ga uyu'ule udale lao lato lao chula, pero na'a aberole rdale lao lato lao xni'. ¹⁰ Dza na'te binacale ladyina'a Diuzi, pero na'a sí, banacale ladyina'anë'. Dza na'te biyëchi'la'adyi' Diuzi le'e, pero na'a sí, abeyechi'la'adyi'në' le'e.

Rnë Pedro cabë' reya'ala' hue yaca ben' nao xneza Jesús

¹¹ Bicha', nedyë'ëda' le'e, rnabayëcha' laole como ben' naca ladyina'a Diuzi, como ben' zu lao yedyi layu tu chi'zi, biinaole neza mala huele ta rnazin quiele, porque dan' chi huele cana', ruen zudyi yega'nle mala lao Diuzi. ¹² Reya'ala' tzirole neza dya'a lao yaca ben' birue quie xti'idza' Diuzi. Yela' na' ba'ala'cazi chi rudyiala'adyi'jé' le'e inayaquë' ben' mala le'e, hualë'ëcazi'jé' ziole neza dya'a. Cana' cati idyin dza gaca juicio, ba'ala'cazi bire'enjë', decadize huejé' Diuzi ben' ze.

¹³ Por nun quie Señor quiero, reya'ala' galele quie yugulu ja ben' rnabë' nita' lao yedyi layu. Reya'ala' galele quiejë' la'achi ben' rnabë'ra, ben' rey, ¹⁴ la'achi ben' rnabë'tica, ben' rue castigo yaca ben' rue xquia, o chi ben' rue bala'ana yaca ben' rue tahuen. ¹⁵ Porque re'en Diuzi huele tahuen ta bigata' causa quiele inë yaca ben' binezi, yaca ben' tondo, condre le'e.

¹⁶ Ca ben' libre reya'ala' huele, pero bihuele pensari ru'en lato huele tamala dan' nacale ben' libre. Nacalan dya'a huele tahuen ca reya'ala' hue yaca ben' quie Diuzi. ¹⁷ Reya'ala' gapala'nle yugulu benë'. Reya'ala' idyë'ële ben' bichiro, ben' nao xneza Jesús. Reya'ala' tziolnla'adyi'le Diuzi. Reya'ala' gapala'nle yaca ben' rnabë'.

Reya'ala' huerëro cabë' bë Jesús

¹⁸ Le'e ben' nada'o, ulegale quie xa'nle, la'acazi ben' rue tahuen quiele, la'alacazi ben' rue tamala quiele. ¹⁹ Porque tahuen na' chi suero huezela'adyi'ro biidza'ro caora cati racaro castigo dula' quie ben' tula, cala dula' quiero. Pues suero biidza'ro, porque nacaro ben' rue hala ca bala pca'n Diuzi lao na'aro. ²⁰ Pero chi racaro castigo, dan' tabala bëro mala, bireya'ala' huero pensari nacaro ben' huen, la'acazi suero huezela'adyi'ro biidza'ro quie castigo quiero. Pues cana' reya'ala' huero como cuinziro naparo dula'. Pero chi racaro castigo ba'ala'cazi bëro tadya'a, chi bidza'ro huezela'adyi'ro castigo quiero, lena' nacan huen lao Diuzi. ²¹ Quie lena' ulio Diuzi le'e guca Jesús castigo dula' quiero, pero uzuenè' bezela'adyi'nè' blu'enè' le'e cabè' reya'ala' huele inaole xnezè'. ²² Ni tu bibi tamala bë Cristo, ni tu nunu uzi'nè' yè'. ²³ Caora ptasi bnio yaca benè' lèbè', biguca lènè' leyaquè' lèbi. Caora psaca benè' lèbè' bizinaquezi, bibzègadyinè' quieyaquè', den' ulezanè' hue Diuzi juicio. ²⁴ Lèbè' gutinè' lè'è yaga cruzo aodizuguè' quie xquia quiero. Guta' castigo quienè' tacuenda bigata' castigo quiero, na' bira inao dula' xquia quiero ra'o. Yela' guti quienè' guta' yela' naban quiero tuzioli. ²⁵ Dza na'te bëro ta rnazin quiero, guca quiero ca quie tu beco' zi'ila' aoniti tu neza. Pero na'a rnaoro xneza Cristo. Rapa Cristo ra'o ca quie beco' zi'ila' bia rapa xa'ne lèba'.

3

Cabè' reya'ala' hue yaca ben' aozij'a laguedyi

¹⁻² Na'ra le'e yaca nigula bazu ben' quie, re'enda' inia' le'e tu di'idza'. Reya'ala' galele dyè'èdi quie be'mbyu quiele. Chi rdale neza huen galele quie be'mbyu quiele, pero binao be'mbyu quiele xneza Jesús, gala' inaoenè' xneza Jesús nun quie blè'enè' rdale neza huen, rapala'nle Diuzi. ³ Lèscan' nia' le'e bireya'ala' upa'ale guichole taže. Bireya'ala' uzutza'ole cuimle conlè la'ari' tzaol', o conlè oro. ⁴ Ta reya'ala' huele, inaole cabè' rnèn pensari quie Diuzi yu'u lu'u guicho laxta'ole. Huele gaxo, bihuele ru'be. Lena' zaca'n lao Diuzi. Hueyudyi quie taztao', pero tu ta zaca'n lao Diuzi biyeyudyin. ⁵ Cana' bë ja nigula unita' dza na'te, yaca nigula bë quie xti'idza' Diuzi. Uzudyi'lèjè' Diuzi, udapala'njè' be'mbyu quiejè'. ⁶ Cana' bë Sara dza na'te, udapala'nnè' be'mbyu quienè', Abraham. Udapanè' lèbè' bala'ana ca xan' yu'u. Chi huele tahuen sudyi'ilèle Diuzi, cana' gaca quiele ca quie zi'isuba Sara.

⁷ Na'ra le'e yaca be'mbyu bazu ben' quie, re'enda' inia' le'e tu di'idza'. Reya'ala' tzu'ule dya'a conlè nigula quiele. Reya'ala' gapala'nleyaquè' huezela'adyi'leyaquè', porque bina-pajè' fuerza cabè' le'e. Cana' reya'ala' huele, porque bega'nlè Diuzi lèjè' di'idza' gata' yela' neban' quiejè' tuzioli tuzi ca bega'nlènè' le'e di'idza'. Ulehue cabè' nia', porque chi bihuele cabè' nia' ni, bibi zaca' rulidzale Diuzi.

Cati rue yaca ben' mala ra'o bizinaquezi, bigacalèrojè' lèbi

⁸ Reya'ala' tuzi pensari huele. Reya'ala' sulèle yaca ben' bichile, ben' nao xneza Jesús dya'a. Reya'ala' yeyèchi'la'adyi'lejè', huele gaxo conlè lèjè'. ⁹ Chi rue yaca ben' mala len le'e bizinaquezi, chi rutasi runiojè' le'e, bigacalèlejè' lèbi. Nacalan huen huele tadya'a quiejè', porque cati ulio Diuzi le'e bènè' tadya'a quiele. ¹⁰ Cana' reya'ala' huele, porque rnèn lè'è guichi la'iya quie Diuzi cani:

Nu ben' re'en inita' dya'a, ben' re'en su contento, bireya'ala' udyiala'adyi'jè' si'jè' benè' yè'.

¹¹ Reya'ala' usanjè' tamala, na' huejè' tahuen. Reya'ala' cue'jè' chizi lèjè' benè'.

¹² Cana' re'ennan, porque rapa Xuziro Diuzi ben' nayèri laxta'ohue, renè' caora rulidzajè' lèbè', pero huaguizu Diuzi castigo quie ben' mala.

¹³ Na' rnaba' le'e tu pregunta: ¿Nu'zi sue huejè' tamala quiele chi huele puro tadya'a quiejè'? ¹⁴ Chi rue yaca benè' tamala quiele, la'acazi ruele tahuen quiejè', huela'iyatzegue Diuzi le'e. Biidzebile bigalele quie yaca ben' rue tamala quiele. ¹⁵ Reya'ala' gapala'nle Cristo du guicho du la'adyi'le como ben' naca xa'nro. Reya'ala' isèdile huele pensari ta iquèbile dyè'èdi chi nu ben' inaba le'e bixquien' naole xneza Jesús. ¹⁶ Reya'ala' tzu'ule neza dya'a ta su chizi laxta'ole. Chi huele cana', gata' yela' stu' quie yaca ben' rao le'e xquia. Yedue'jè' cabè' rnèjè' cati ilè'èjè' naole neza dya'a, ralele quie Cristo. ¹⁷ Zaca'n lao Diuzi huezela'adyi'le yedzagalaole ba'ala'cazi bële tahuen, chi cana' re'en Diuzi, pero bizaca'n lao Diuzi, chi dula' quiezile yedzagalaole bële tamala.

¹⁸ Guti Cristo lè'è yaga cruzo ta yezi dula' xquia quiero de tzalasagazi. Ni tu xquia binuenè', pero gutinè' lao laza ra'o, ben' napa dula' xquia, tacuenda tzu'ulèro Diuzi tuže, na' gacaro ben' quienè'. Dyin quie yaca benè' gutinè', pero lao na'a Bichi Be quie Diuzi bebannè' tatula. ¹⁹ Pero tu gutinè' binebannè' uyonè' yetixogue'nè' di'idza' quienè' lao ja bichi be quie yaca ben' gutija cana'te, yaca ben' naca preso rbezajè' gata' castigo quiejè'. ²⁰ Bigulejè' quie Diuzi caora unita'jè' tiempo aode cana'te, tiempo caora uzu tu ben' lao Noé. Uzu Diuzi ulezè' utza'yaquè' pensari quiejè' tu lala zu Noé ruenè' barco, pero biptza'jè' pensari quiejè'. Quie lena' udyiagu'i'jè' gutijè' lu'u nisa. Xunayaquè' bega'n, bigutijè' lu'u

nisa. ²¹ Lena' nacan ca quie bautismo quie ja ben' nao xneza Cristo. Cabë' guca quieyaquë' ulayaquë' lao nisa, cana' nacaré' quiero, apselá Diuzi ra'o. Bibi dyin hue bautismo ta tzëri cuerpo quiero, pero hue bautismo dyin caora aonabaro Diuzi si'zenë' quie xquia quiero. Caora na' gun Diuzi yela' neban tuzioli quiero nun quie guti beban Jesucristo. ²² Naca Jesucristo ben' beyëpi zeyo guibá. Zunë' zaquë' yebë quie Diuzi ga rnabë'në' lao ja ángel len lao ja yugulute ben' rnabë' yu'uja guibá.

4

Reya'ala' hue quiero xti'idza' Diuzi du guicho du la'adyi'ro

¹ Como bedzagalao Jesucristo, gutinë' lë'ë yaga cruzo, lëscan' le'e, reya'ala' sule dispuesto yedzagalaole. Porque chan' yedzagalaole, lena' gacalën le'e ta biinan quiele huele xquia. ² Lëscan' huacalën le'e inaole tadya'a huele cabë' re'en Diuzi huele dza rdale lao yedyi layu. ³ Zi'tela abële tamala cana'te. Abële tamala ca yaca ben' binezi quie Diuzi. Abële tamala cabë' unan quiele. Udale hue'e, uzudyile, bële lani, bële ru'be, uyonla'adyi'le yaca idolo quiele ta naca bayatza gula. ⁴ Pero na'ra yaca ben' binezi quie Diuzi rdza'jë' le'e, porque bira tzu'ulëlejë' tuze yela' mala quiejë'. Quie lena' rudyalala'adyi'jë' le'e. ⁵ Pero huadyincazi dza gaca juicio quiejë' lao Señor quiero Jesucristo, ben' ichugubë' quie len yaca ben' aguti, yaca ben' naban. ⁶ Quie lena' uyo yaca benë' yetixogue'jë' xti'idza' Diuzi lao yaca ben' unita' tiempote cuenda gata' yela' neban quiejë' tuzioli lao na'a Bichi Be quie Diuzi, ba'ala'cazi cati bdyin dza quiejë' gutiyaquë' cabë' gaca quie yugulu benë'. ⁷ Baidyin dza yeyudyi yedu quie dyila yu. Quie lena' tzu'ule pensari huen ulidzale Diuzi du guicho du la'adyi'le. ⁸ Pero ta nacara belao idyë'ële laguedyile, porque lena' gacalën le'e si'zele quiejë' caora rapajë' falta. ⁹ Reya'ala' gapachi'le laguedyile zan yu'u quiele dyë'ëdi, bitilale leyaquë'. ¹⁰ Como ben' napa dyin quie Diuzi, gacalële laguedyile según ca banegun Diuzi quie quiele. ¹¹ Yaca ben' bë' Diuzi laze quixogue'jë' xti'idza'në', reya'ala' quixogue'jë'n ca ben' rnë quie Diuzi. Lëscan', yaca ben' bë' Diuzi laze gacalëjë' laguedyijë', reya'ala' gacalëjë' lëjë' conlë fuerza valór ru'e Diuzi lëjë'. Yugulu ta ruele, huelen lao na'a Jesucristo tacuenda hue yaca benë' Diuzi bala'ana. Naca Jesucristo ben' zëcazi, ben' de yela' huaca quie tuzioli. Amén.

Biidzebiro yedzagalaoro inaoro xneza Jesús

¹² Bicha', ben' nadyë'ëda', caora raca zëdi quiele nun quie rue Diuzi le'e prueba, bidëbile bihuele pensari tamala raca quiele. ¹³ Mejorla yedaohuele caora rusaca benë' le'e tamala nun quie naole xneza Cristo, porque tahuen gula yega'nnan quiele yedaohuetzeguele caora yeguida Jesucristo ilë'ë yaca benë' naquë' ben' zëcazi. ¹⁴ Chi rutasi runio yaca benë' le'e nun quie naole xneza Cristo, reya'ala' yedaohuele, porque lena' rulu'en yu'ule Bichi Be quie Diuzi lu'u guicho laxta'ole. Rutasi runio yaca benë' Cristo, pero le'e reya'ala' ruelenë' ben' ze. ¹⁵ Chi redzagalaole nun quie bëtile benë', o chi ulanle quie benë', o chi bële tamala, o chi bda' quiele ta bireya'ala' uda' quiele, reya'ala' yedue'le. ¹⁶ Pero chi redzagalaole nun quie naole xneza Cristo, na' bireya'ala' yedue'le, reya'ala' yedaohuele. ¹⁷ Aruen bago dza gaca juicio quie lao yugulu benë'. Huazulaona len ra'o, ben' nao xneza Jesús. Pero chi sulaona len ra'o, ben' nao xneza Jesús, bayëchi' gula gaca quie yaca ben' bibë quie xti'idza' Diuzi. ¹⁸ Lena' rnën lë'ë guichi la'iya quie Diuzi cani:

Chi canezi ula yaca ben' laxta'o yëri, zëbi'zi gaca quie yaca ben' mala?

¹⁹ Tana', chi rusaca yaca benë' le'e bizonaque nun quie naole xneza Cristo cabë' re'en Diuzi, biusanla'adyi'le huele tahuen sudyi'ilële Diuzi, ben' bzalo ra'o. Uzucazi Diuzi di'idza' quienë' cabë' unë' huenë'.

5

Bë' Pedro tu consejo quieyaquë'

¹ Le'e ben' napa dyin quie Diuzi, re'enda' guna' le'e tu consejo. Në'ëdi' nacaria' ben' napa dyin quie Diuzi. Naca' testigo blë'ëda' bedzagalao Cristo gutinë' lë'ë yaga cruzo. Lëscan' conlë yaca los demás ben' napa dyin quie Diuzi, huazulia' Cristo bë' yeguidë' ulu'enë' yela' huaca quienë'. ² Ca ben' napa beco' zi'ila' quie, cana' reya'ala' gapale ben' nao xneza Jesús, ben' naca cuenda quiele. Pero lëscana' du guicho du la'adyi'le huele bala quiele ca re'en Diuzi huele, bihuele ben' zuzile gan, ben' rza'la'adyi' len. ³ Biinabë'le zi'laza ben' naca cuenda quiele como si fuera nacale xa'nyaquë', pero tzu'ule neza dya'a usëdilejë' inaojë' neza ca neza naole le'e. ⁴ Cana' cati yeguida ben' naca pastor belao, huega'n tadya'a quiele lao Diuzi tuzioli.

⁵ Lëscan' le'e, ben' ru'abe, re'enda' guna' le'e tu consejo. Reya'ala' galele quie yaca ben' napa dyin quie Diuzi. Yugulule reya'ala' galale gacale gaxo conlë laguedyile, ben' nao xneza Jesús, porque cana' rnën lë'ë guichi la'iya quie Diuzi cani: Biraxe Diuzi ben' rue ze cuine, pero racalë Diuzi ben' naca gaxo.

⁶ Reya'ala' gacale ben' gaxo lao Diuzi, porque idyin dza gue'en Diuzi, caora na' huenë' le'e ben' ze. ⁷ Bidëbile chi bi tu ta raca quiele. Usedyinle tazëdi quiele lao Diuzi como dan' zu Diuzi rapanë' le'e. ⁸ Gapale cuidado quie xan' taxi'ibi', porque rdanan re'ennan udyiagui'nan benë'. Ca rue león bë' rueba' snia, rdaba' rguiloba' ta gaoba', cana' rda xan' taxi'ibi' reguilonan benë'. ⁹ Bigalele quienan, galele quie Diuzi. Bigala'adyi'le rdanan duze yedyi layu ruenan ta yedzagalao yaca los demás ben' bichiro, ben' nao xneza Jesús, lëscan' ca le'e. ¹⁰ Te yeyudyi yedzagalaole ilë'ëti'zi, caora na' Diuzi huenë' le'e ben' laxta'o yëri, ben' rue quie xti'idzë', ben' rzudyi'ilë lëbë', ben' tazulë lëbë' tuzioli. Tantozi nedyë'ë Diuzi ra'o, ulionë' ra'o cuenda nuelëro Jesús tuze, yeyoro guibá sulëronë' tuzioli. ¹¹ Naca Jesucristo ben' de yela' huaca quie tuzioli. Amén.

Rugapa Pedro lëjë' diuzi

¹² Bia' guichi dao' ni use'ela'n laole lao na'a Silvano ta guna' le'e yaca consejo. Naca Silvano ben' bichiro, ben' nao xneza Jesús, ben' zudyi'ilëro. Lëscan' bia' guichi ni ta nuxela'adya' le'e inezile nadyë'ë Diuzi le'e. Naca prueba nedyë'ënë' le'e bëla'iyänë' le'e taze. Ulenao xnezë', biyehuédile. ¹³ Na'ra yaca ben' nao xneza Jesús, ben' nita' ciudad Babilonia, ben' uliorë Diuzi lëscan' ca le'e, rugapajë' le'e diuzi. Lëzi Marcos, ben' naca ca zi'ina', rugapanë' le'e diuzi. ¹⁴ Ugapale yaca ben' bichiro, ben' nao xneza Jesús, diuzi. Como ben' bichiro gaole tu situ xagajë'. Rulidza' Diuzi cuëchinë' chizi lu'u guicho laxta'ole yugulule. Amén.

GUICHI URUPE BË SAN PEDRO APÓSTOL

Bë Pedro guichi ni, use'ela'në'n lao yaca ben' nao xneza Jesús

¹ Nè'èdi', Simón Pedro, naca' ben' rue mandado quie Jesucristo. Naca' apóstol quienè'. Bia' guichi ni use'ela'n lao le'e, yaca ben' rnaorè xneza Jesucristo cabè' nao nètò' xnezanè'. Yela' ben' justo quie Xuziro Diuzi Jesucristo rlè'ènè' tuzi ca rlè'ènè' ra'o. ² Rulidza' Diuzi ta huela'iyane' le'e taže cuèchinè' chizi lu'u guicho laxta'ole como dan' rioñe'ele ruele tuže conlè Diuzi lènè' Señor quiero Jesús.

Rnè Pedro cabè' reya'ala' hue yaca ben' nao xneza Jesús

³ Conlè yela' huaca quienè', banegun Diuzi fuerza valor quiero ta inaoro xnezè' dza rdaro lao yedyi layu, na' gacaro ben' laxta'o yèri. Cana' bènè' quiero caora cati gucalènè' ra'o ta tzioñe'ero galero quie Cristo, ben' ulio ra'o, ben' ze gula, ben' rue puro ta yu'u ni'a xnezi. ⁴ Cana' bë Diuzi quiero bega'n lènè' ra'o di'idza' ta gacalènè' ra'o ute uselanè' ra'o quie tamala de lao yedyi layu, na' gacaro ben' yèri cabè' nayèri Diuzi. Cana' biudyiaguin' ta rnazin quiero ra'o. ⁵ Quie lena' ruen dyabè' galele quie Diuzi du guicho du la'adyi'le tale neza dya'a. Lèscan' ruen dyabè' tzioñe'ele huele cabè' na Diuzi ⁶ gapale cuidado bihue'le lato inabè' ta rnazin quiele le'e huele tamala. Lèscan' ruen dyabè' ⁷ yeyèchi'la'adyi'le ben' bichiro, ben' nao xneza Jesús, idyè'èle yugulu benè'.

⁸ Chi tziole huele cana', na' biten cana'zi dza rdale lao yedyi layu, biten cana'zi unaole xneza Jesucristo, ben' naca Señor quiero. ⁹ Pero chi bitziole huele cana', nacale ca quie tu ben' laochula, ben' birlè'è dya'a, porque agula'adyi'le cabè' bë Diuzi quiele uzi'zenè' quie dula' xquia quiele ta bële timpote. ¹⁰ Quie lena', bicha', nun quie bë Diuzi nombrar le'e, huele dyabè' hue quiele ca nia' niga. Chi huele cana', na' biiquixile inaole xneza Jesús dyè'èdi gula. ¹¹ Chi huele cana', na' huesalo Diuzi puerta guibá ta tzetzu'ule tzesule tuzioli ga rnabè' Señor quiero Jesucristo, ben' pte psela ra'o.

¹² Quie lena' biusana' inia' le'e ta bigalala'adyi'le cabè' reya'ala' huele, ba'ala'cazi banezile dyè'èdi barue quiele di'idza' li quie Diuzi. ¹³ Tu lala rda' lao yedyi layu, nacan bala quia' guna' le'e consejo ca consejo bëna' le'e niga. ¹⁴ Baona Señor quiero Jesucristo nè'èdi' de que ruen bago dza gatia'. ¹⁵ Quie lena' pca'na' di'idza' quia' laole cuenda bigala'adyi'le cabè' consejo bëna' le'e dza uda' lao yedyi layu.

Ni nan quie yela' huaca quie Jesús

¹⁶ Caora unando' bzioñe'endo' le'e quie yela' huaca quie Señor quiero Jesucristo, quele cuento ulio ben' rzi' yè' bzioñe'endo' le'e, porque nètò' blè'èndo' yela' huaca quienè'. ¹⁷ Lèzi blè'èndo'nè' caora bë Diuzi lèbè' ben' ze. Bendo' rchi' Diuzi caora unènè' dyè'èdi nanè' nètò': "Zi'ina' ben' niga. Lega nedyè'èda'bi' raxeda' ca ruebi'." ¹⁸ Bendo' rchi' Diuzi za'n guibá caora nita'lèndo' Jesús lao ya'a ga betza' žabanè' gucan bezèri di raca titi'.

¹⁹ Quie lena' nacan bala cabè' una yaca ben' unita' tiempo, yaca ben' udixogue' xti'idza' Diuzi. Napale razón ruele cuenda cabè' unajè', porque naca di'idza' unajè' ca quie xni' gui' rseni'na ga naca chula cuenda ilè'èro ga zioro hasta yeguidara Jesucristo huenè' gaca yeni' gula lu'u guicho laxta'oro. ²⁰ Re'enda' inia' le'e tu di'idza' naca belao. Nunu saque' tzioñe'e di'idza' la'iya quie Diuzi según pensari quieziyaquè', dechan' según cabè' rna Bichi Be quie Diuzi tzioñe'eyaquè'n. ²¹ Pues yaca ben' na', ben' unita' timpote, quele bzujè' di'idza' lè'è guichi ta racazi la'adyi'jè', pero como nacajè' ben' la'iya quie Diuzi, bzujè' di'idza' lè'è guichi cabè' mandado bë Bichi Be quie Diuzi quieyaquè'.

2

Ni nan cabè' rue ja ben' huezi' yè'

(Judás 4-13)

¹ Lao ja ben' Israel, uyu'urè ben' huezi' yè'. Unajè' quie Diuzi najè', pero bë' nazijè' uzi'jè' yè'. Lèzi cana' le'e, huayu'urè ben' naca maestro si'jè' yè' laole. Balarazi ruzioñe'ejè' benè' di'idza' huizi' yè', inajè' di'idza' li ruzioñe'ejè'. Cana' huejè' si'jè' yè' udyiaguji'jè' benè' huejè' condre Cristo, ben' udižu xquia quie yugulu benè'. Quie lena' tu sasazi udyiaguji' Diuzi lèjè'. ² Huanao ben' zè neza mala quiejè' huejè' ta rnazin quiejè'. Dula' quiejè' ina yaca benè' binaca dya'a xneza Jesús. ³ Yela' rza'la'adyi' dumi quiejè' rzi'jè' le'e yè' inajè' le'e di'idza' huezi' yè'. Pero udyiaguji' Diuzi lèjè', biilajè'. Desde cana'te banucueza Diuzi castigo quiejè'.

⁴ Caora cati bë bala ja ángel xquia dza na'te, biuzi'ze Diuzi quie xquia bëjè'. Pues na' bë Diuzi mandado tzu'ujè' ga naca chula tziojè' lagui' gabila iriojè' caden cuenda cuezajè' dza

gaca juicio quiejè'. ⁵ Lèzi cana' biuzi'ze Diuzi quie xquia bè yaca ben' unita' cana'te. Bènè' mandado gaca nisayo yusiu' lao chopa galo dza cuenda yedza'jè' nisa gatijè'. Nun quie tamala bějè', bdyiagui' Diuzi lějè'. Tuzi ben' lao Noé lènè' igadyi familia quienè' bega'njè' psela Diuzi lějè'. Pero gudyi Noé ja ben' unita' tiempo de quie re'en Diuzi inaojè' xnezè' huejè' tadya'a, pero bigulejè' quie Noé. ⁶ Lèzi cana' bè Diuzi juicio lao yaca ben' nita' ciudad Sodoma len yaca ben' nita' ciudad Gomorra. Bzejè' Diuzi lějè', dan' bějè' puro tamala. Lente ciudad quiejè' bzejè' Diuzi len bega'nnan gucan puro de. Cana' bè Diuzi quie ja ben' na' ta il'è' ja ben' zaza' de que bire'en Diuzi huejè' cabè' bè ja ben' na'. ⁷ Pero tu ben' lao Lot, bibdyiagui' Diuzi lèbè', ba'ala'cazi naquè' ben' ciudad Sodoma, dan' naca Lot ben' bè quie xti'idza' Diuzi. Guque Lot bayèchi' bè' blè'ènè' cabè' ta bayatza gula bè ja ben' ciudad quienè'. ⁸ Cana' uzu laxta'ohuè' bayèchi' gula yugu dza caora blè'ènè' cabè' bè ja ben' yedyi quienè'. Puro tabayatza ta biraxe Diuzi bějè'. ⁹ Pero nezi Diuzi bi huenè' ta uselanè' yaca ben' nao xnezè' caora re'en xan' taxi'ibi' si'n lějè' yè' huejè' xquia. Lèzi nezi Diuzi bi huenè' huenè' castigo yaca ben' mala hasta dza gaca juicio quiejè'.

¹⁰ Con yugulu ben' rue tabayatza ta rnazin quie, ben' ružidyi ja xti'idza' Diuzi, hue Diuzi lějè' tu castigo huala gula. Pues yaca ben' na' ruejè' ze cuintjè', nacajè' ben' zidi, birdzebijè' rutasi runiojè' ben' rnabè', chi ben' zu guibá, chi ben' zu dylayu. ¹¹ Na'ra ba'ala'cazi nacara yaca ángel ben' rnabè' ca yaca ben' na', birutasi runio yaca ángel yaca ben' na' caora rao yaca ángel xquia yaca ben' na' lao Diuzi.

¹² Pero yaca ben' na', yela' bayatza quiejè' ruejè' huabiagu'jè'. Biyu'ujè' pensari. Ruejè' ca rue bia guixi'. Puro ta rnazin quiejè' ruejè'. Con bitezi ta birioñe'ejè', na' rudyalala'adyi'jè'n. Yela' naca quiejè', na' yeyula yenitijè' lao Diuzi. ¹³ Huanao xquia quiejè' lějè'. Lente tedza ruejè' ta rnazin quiejè' huejè' tabayatza. Anaca quiejè' ca quie nidy' azun lè'è' la'ari' dya'a. Raxejè' gaolèjè' le'le tuže gacalejè' amigo, pero ta si'jè' le'le yè', tana' ruejè' cana'.

¹⁴ Tuzi ca pensari ruejè', re'enjè' gasilèjè' nigula binaca quiejè'. Binezijè' bi modo huejè' ta usanjè' tamala quiejè'. Rzi'jè' yè' yaca ben' zaonao xneza Jesús. Puro dumi rza'la'adyi'jè'. Pero babdze'de' Diuzi lějè'. ¹⁵ Aoru'unjè' tzala'la xneza Jesús, banaojè' neza mala. Aruejè' cabè' bè tu ben' lao Balaam, zi'i Beor, ben' unita' cana'te. Ta huenè' gan dumi bènè' tatondo. ¹⁶ Pero bè Diuzi mandado udila tu burro lèbè'. Unè burro ca rnè benè'. Bè'lèba' lènè' di'idza' udilaba' lèbè' cuenda usannè' bira huenè' tatondo quienè'.

¹⁷ Pero yaca ben' na', ben' rzi' yè', naca quiejè' ca quie yasa babeyu'en nisa. Naca quiejè' ca quie nisayo gupa'dao' ru'azi be bedun' len, bira bisirvejè'. Hue Diuzi mandado tziojè' gui' gabila ga naca chula tuzioli. ¹⁸ Badan gula ruejè' rnèjè' zidzo, pero bè' ruezijè', yè' rzi'jè'. Na'ra najè' nacaro libre huero ca tabayatza rnan quieru huero, pero yè' rzi'jè'. Rguiløjè' nu ben' si' di'idza' quiejè', ben' zapsan neza mala quie. ¹⁹ Najè' nacajè' libre ru'en lato huejè' con biti'tezi raxejè' huejè', pero yè' rzi'jè' najè' cana', dan' puro tamala ruejè'. Biru'e yela' mala quiejè' lato huejè' tahuen. Chi huero tamala, naca yela' mala quieru ca quie xa'nro, binacaro ben' libre. ²⁰ Pues chi apsanro neza mala quieru banaoro xneza Señor quieru Jesucristo, pero na' chi yeyu'uro neza mala quieru tatula, chi usanro xneza Cristo bira tziro inaoron, hueran mazara mala quieru. ²¹ Huen mala quieru chi biinaoro xneza Jesús, pero hueran mazara mala quieru chi barue quieru di'idza' la'iya quie Diuzi, na' usanron yenaoro neza mala quieru tatula. ²² Chi banaoro xneza Jesús, na' usanron, lena' ruen quieru ca rnèn lè'è' guichi cani: "Areyao beco' ta babeyèbiba'. Lèscan' quie yaca cuchi, ba'ala'cazi zabgazoroba' yao, pero hueyu'ucaziba' gun' tatula."

3

Ni nan cabè' gaca cati yeguida Jesús

¹ Na'ra bicha', taurupe na' bia' guichi ni use'ela'n laole, porque re'enda' guna' le'le consejo tacuenda huele pensari ta yu'u ni'a xnezi. ² Bigala'adyi'le cabè' una yaca ben' la'iya quie Diuzi, yaca ben' udxogue' xti'idza' Diuzi tiempote. Lèscan' bigala'adyi'le di'idza' belao quie Señor quieru Jesucristo, ben' pte psela ra'o. Lèdi'idza' belao na' bzioñe'è yaca apóstol le'e.

³ Nacan belao ta inezile cabè' hue yaca benè' caora idyin dza yeyudyi yedu quie yedyi layu. Ruzidyijè' utitujè' xti'idza' Diuzi. Huejè' cabè' ta rnazin quiejè'. ⁴ Lèscana' utitujè' benè' nao xneza Jesús yèbijè' lějè': "¿Bizi' raza quie Cristo? ¿Quele unè' guidè', na' bineguidè'? ¿Biquien' con rbzeale, na' biguidè'? Desde dza cati guti xuzixta'oro, tuzicazi ca nacan cabè' guta' dylayu tiempote." Cana' inajè'. ⁵ Bigue'enjè' galejè' dyin quie Diuzi guta' guibá tiempote. Lèzi bigalejè' mandado quienè' guta' xneza nisa cuenda bebidyi layu cue' nisadao' xlaton. ⁶ Lèscan' bigalejè' mandado quie Diuzi guca nisayo yusiu' lao chopa galo dza tiempote guti yugulute ja ben' unita', aodyiagui' yugulute ta de lao yedyi layu. Cana' bè Diuzi juicio quieyaquè'. ⁷ Pero cati idyin dza hue Diuzi juicio tatula, huayei yugulute ta

de lao yedyi layu lente yugulute ta de guibá. Huachugubè' Diuzi yugulu ben' biunao xneza Jesús.

⁸Lëscan', bicha', bigala'adyi'le ruen quie Diuzi ca quie tu dzazi tu mila iza. Lëscan' tu mila iza ruen quienè' ca quie tu dzazi. ⁹Bitzè Señor quiero con ca rna bala benè', den' uzunè' di'idza' quiè' ca unè' huenè'. Naquè' ben' de paciencia rbezanè' bire'ennè' cuiagui' yaca benè'. Re'ennè' inaojè' xneza Jesús.

¹⁰Cati guida Jesús, tu sasazi guidè' cati guidè'. Guidè' caora raque yaca benè' biguidè'. Guidè' ca guida tu ben' uban caora raque benè' nunu ben' uban guida. Caora na' huabiagui' ladza. Huenan ca rue be bedun' ze gula bè' rudze' rchi'n'an cati baza'n. Lëscan' ta dyia guibá, hueyalan quie tala quie gui'. Huayei yugulu ta de lao yedyi layu. Hue Diuzi juicio lao dužeten.

¹¹Nun quie huabiagui' yugulu ta de lao yedyi layu, ruen dyabè' inaole xneza Jesús gacale ben' laxta'o yèri. ¹²Reya'ala' tzu'ule yedaohuele cuezale dyè'èdi dza cati yeguida Jesús lao yedyi layu. Huele ca ta reya'ala' huele cuenda yeguidanežè'. Dza cati yeguidè', dza na' tzei ta dyia guibá, hueyalan quie tala quie gui'. ¹³Pues ra'o niga rbezaro yeguixo Diuzi yedyi layu cubi, yeyuenè' guibá cubi como cana' unanè' huenè'. Na'ra quie dyilayu cubi len guibá cubi, bira gata'n tamala, bira gata'n tabayatza.

¹⁴Quie lena' bicha', tu lala rbezale hue Diuzi cana', reya'ala' hue quiele xti'idza' Diuzi du guicho du la'adyi'le cuenda cue' chizi laxta'ole binapale dula' xquia hora cati yeguida Jesús lao yedyi layu. ¹⁵Bigala'adyi'le naca Diuzi ben' žela'adyi' gula. Zunè' rbezanè' ulidza ja benè' lëbè' inabajè' si'ženè' quie dula' xquia quiejè' gata' yela' naban quiejè' tuzioli. Cabè' rnèn lè'è guichi bia', lëscan'rè rnèn lè'è guichi bè ben' bichiro Pablo ta use'ela'nè' laole. Ca ta bzioñe'e Diuzi lëbè', lena' bzunè' lè'è guichi use'ela'nè'n laole. ¹⁶Pues lè'è yugulu guichi bè Pablo rguixogue'n ra'o cabè' reya'ala' hue quiero xti'idza' Diuzi du guicho du la'adyi'ro, dan' baza' dza yeyuyi yedu quie yedyi layu. Pero bala di'idza' bzunè' lè'è guichi nacan žèdi bitzioñe'eron. Quie lena' bala ben' binezi, ben' binetzioñe'e xti'idza' Diuzi dyè'èdi, rueyaquè' zidi uzèguichola rnèjè' retza'yaquè' xti'idza' Pablo. Hasta xti'idza' Diuzi uzèguichola rnèjè' retza'yaquè'n. Nun quie ruejè' cana', huayojè' lao gui' gabila.

¹⁷Quie lena', bicha', como anezile cabè' gaca dza zaza'ra, gapale cuidado biiquixile bihue'le lato si' yaca ben' mala le'e yè'. Gapale cuidado ta biiquixile, porque reya'ala' inaole xneza Jesús du guicho du la'adyi'le. ¹⁸Lëscan' reya'ala' huebè'le mazara Señor quiero Jesucristo, ben' pte psela ra'o. Lëscan' reya'ala' idyè'èle lëbè' mazara. Cabè' rueronè' ben' ze, cana' hueronè' ben' ze tuzioli. Amén.

GUICHI NĒRO BĒ SAN JUAN APÓSTOL

Biyeyudyi yedu quie xti'idza' Cristo

¹⁻³ Bendo' guichi ni use'ela'ndo'n laole rguixogue'n quie tu ben' uzu cati binegata' dyilayu. Nĕto' ablĕ'ĕndo'nĕ', una'ndo'nĕ', bendo' cabĕ' di'idza' unĕ', uda' tacando' lĕbĕ'. Rnĕndo' quie xti'idza' ben' na', ben' run yela' naban quiero, pero biyeyudyi yedu yela' neban runnĕ' quiero. Rnĕndo' quie Jesucristo. Rnĕndo' cabĕ' blĕ'ĕndo' cuenda na' gacale tuže len nĕto', len Xuziro Diuzi, lĕnĕ' ži'inĕ' Jesucristo. Bida Jesucristo detĕ'ĕ lao yedyi layu ablĕ'ĕndo'nĕ'. Ga zu Diuzi uza'nĕ' bidĕ' ga yu'undo' blĕ'ĕndo'nĕ'. ⁴ Lena' use'ela'ndo' guichi ni laole cuenda na' sule gusto len nĕto'.

Yeni' gula naca ga zu Diuzi

⁵ Niga rnĕndo' le'e cabĕ' di'idza' una Jesucristo nĕto'. Naca Diuzi ben' laxta'o yĕri gula. Ni tu pensari mala biyu'u laxta'o Diuzi. Yeni' gula naca ga zu Diuzi. Ni lĕ'ĕti' binaca chula ga zuĕ'. ⁶ Chi inĕro nacalĕro Diuzi tuže, pero ruero pensari mala quiero, lena' rulu'en rzi'ro yĕ' ca ta inaro, rquixiro ca ta ruero. ⁷ Pero chi naca laxta'oro yĕri gula como naca laxta'o Diuzi, lena' rulu'en nacalĕro Diuzi tuže. Lĕscan', nun quie guti ži'inĕ' Jesucristo lĕ'ĕ yaga cruzo ulato ren quienĕ', zuĕ' dispuesto si'ženĕ' quie bitezi xquia naparo.

⁸ Chi inaro binaparo xquia, tzioguero yĕ' inaro can', birnĕro tali. ⁹ Pero chi uxubalĕpiro lao Diuzi inaro naparo xquia, nacan tabala hue Diuzi quiero cabĕ' unĕ' huenĕ' quiero, na' huazi'ženĕ' quiero yebionĕ' yugulu pensari mala yu'u lu'u laxta'oro, na' iyacan yĕri gula. ¹⁰ Pero chi inaro binaparo xquia, lena' inaro quie Diuzi rzi'nĕ' yĕ', biruero cuenda con cabĕ' rna xti'idza' Diuzi.

2

Naca Cristo ben' sĕlĕ ra'o lao Diuzi

¹ Raqueda' le'e ca quie ži'ina'. Guichi ni bia' use'ela'n laole ta gacalĕn le'e ta bihuele tamedian. Pero chi huele tamedian, naca Jesucristo ben' huen gula, ben' sĕlĕ ra'o lao Xuziro Diuzi. ² Lĕbĕ' aodizuguĕ' quie xquia quiero cati gutinĕ' lĕ'ĕ yaga cruzo lao lazaro. Pero quele quie ra'ozi udižunĕ', lĕscan' udižunĕ' quie yugulu benĕ'.

³ Chi hue quiero ca una Cristo, lena' neziro tali nacaro ben' quienĕ'. ⁴ Chi inaro nacaro ben' quienĕ', na' bihue quiero cabĕ' unĕ', na' rzi'ro yĕ', birnĕro tali. ⁵ Pero chi hue quiero ca unĕ', lena' rlu'en nedyĕ'ĕro Diuzi du guicho du la'adyi'ro, xela'adyi'ro nacaro ben' quienĕ'. ⁶ Chi inaro naoro xneza Cristo, na' reya'ala' taro cabĕ' udanĕ'.

Udixogue' Juan tu di'idza' naca belao

⁷ Bicha', quele di'idza' cubi rnĕa' le'e niga. Rnia' le'e ca di'idza' abele desde cana'te caora uzulaole rnaole xneza Cristo. ⁸ Pero lĕscan' ta rnĕa' le'e niga, nacan ca quie tu di'idza' cubi. Tantozi naca di'idza' belao, ruen dyabĕ' inia' le'e tatula. Di'idza' li rnĕa' niga. Rnia' quie Cristo, lĕscan' rnĕa' quie le'e. Rnia' le'e areyudyi rda yaca benĕ' lao lato lao chula. Barseni'n gui' quie xti'idza' Diuzi lu'u guicho laxta'o yaca benĕ'.

⁹ Chi inaro rseni'n gui' quie xti'idza' Diuzi lu'u guicho laxta'oro, pero rudiero ben' bichiro, ben' nao xneza Jesús, yĕ' rzi'ro rnĕro can'. Quele rseni'n gui' quie xti'idza' Diuzi lu'u guicho laxta'oro, nechani' nechula lu'u guicho laxta'oro. ¹⁰ Chi nedyĕ'ĕro ben' bichiro, ben' nao xneza Jesús, lena' ulu'en rseni'n gui' quie xti'idza' Diuzi lu'u guicho laxta'oro. Birue xti'idza' Diuzi ra'o mandado huero tamala. ¹¹ Chi rudiero bichiro ben' nao xneza Jesús, naca quiero ca quie ben' rda ga naca chula, birlĕ'ĕro ga zioro. Anaca quiero ca quie ben' laochula, ben' birlĕ'ĕ.

¹² Raqueda' le'e ca quie ži'ina'. Quie lena' bia' guichi niga use'ela'n laole, porque lao na'a Jesucristo aozĕ'ze Diuzi quie xquia quiele. ¹³ Lĕscan' bia' guichi ni, use'ela'n laole le'e, ben' naca ja xuzi familia, porque nuebĕ'le Cristo, ben' uzu tu binegata' dyilayu.

Lĕscan' bia' guichi ni, use'ela'n laole le'e bi' ru'abe, porque rnaole xneza Jesús, bira naole neza mala. ¹⁴ Bia' guichi ni, use'ela'n laole le'e, ži'ina', porque nuebĕ'le Xuziro Diuzi. Lĕscan' bia' guichi ni use'ela'n laole le'e, ben' naca ja xuzi familia, porque nuebĕ'le Cristo, ben' uzu tu binegata' dyila yu. Bia' guichi ni, use'ela'n laole le'e, bi' ru'abe, porque tzutzu huala rnaole xneza Cristo, aoyu'u laxta'ole xti'idza' Diuzi, bira naole neza mala.

¹⁵ Bireya'ala' sa'la'adyi'ro ta de lao yedyi layu. Chi sa'la'adyi'ro ta de lao yedyi layu, lena' rulu'en binadyĕ'ĕro Diuzi. ¹⁶ Yaca ben' nita' lao yedyi layu, ruejĕ' ta rnazin quiejĕ', rza'la'adyi'jĕ' ta de lao yedyi layu. Yela' uña'a quiejĕ', ruejĕ' cuinjĕ' ben' že, rezĕ'yaguĕ' laguedyiyaguĕ'. Pero quele tanun quie Diuzi ruejĕ' cana', dechan' ta racazi la'adyi'jĕ' ruejĕ'

cana'. ¹⁷ Bareyudyi redu quie dyilayu len quie yaca ben' ruela ta rnazin quie. Yaca ben' rue quie ca re'en Diuzi, huata' yela' neban quiejè' tuzioli.

Huida ben' huetzague condre Cristo

¹⁸ Rnia' le'e, zi'ina', ilè'èti'zi yeyudyi yedu quie yedyi layu. Abele huida tu ben' huetzague condre Cristo. Pues hora na'a anita' zè yaca ben' rue condre Cristo. Tana' neziro baza' dza yeyudyi yedu quie yedyi layu. ¹⁹ Yaca ben' rue condre Cristo, gualèjè' ra'o tuze dza na', pero apsanla'adyi'jè' ra'o na'a. Chi dula'adyi'jè' gualèjè' ra'o tuze dza na', bipsanla'adyi'jè' ra'o. Pero guca cana' tacuenda ulu'en dyè'èdi bè' bèziyaquè', dan' gualèjè' ra'o tuze.

²⁰ Pero le'e, habdze' Diuzi Bichi Be quienè' lu'u guicho laxta'ole cuenda gacale Diuzi rioñe'e. ²¹ Bia' guichi ni use'ela'n laole, porque quele binezile con cabè' rna xti'idza' Diuzi, dechan' nezicazile con cabè' rnan. Dyè'èdi nezile birnè xti'idza' Diuzi di'idza' huizi' yè'.

²² Yè' rzi' benè' bè' nayaquè' binaca Jesús ben' use'ela' Diuzi ta ute uselanè' benè'. Nu yaca ben' rnè cana', rudyalala'adyi'yaquè' Cristo. Rusebi'yaquè' Xuziro Diuzi lènè' zi'inè' Jesucristo. ²³ Chi rusebi' yaca benè' zi'i Diuzi, lente Diuzi rusebi'yaquè'. Chi rnèyaquè' cule quie zi'i Diuzi, lente Diuzi rnèyaquè' cule.

²⁴ Quie lena' bigala'adyi'le cabè' di'idza' uyu'u lu'u guicho laxta'ole hora uzulaole rnaole xneza Jesús. Porque chi yega'n di'idza' bele cana'te lu'u guicho laxta'ole, na' biyeyudyi nacalèle Xuziro Diuzi lènè' zi'inè' tuzi. ²⁵ Una Jesucristo gunnè' yela' neban quiero tuzioli. Cana' bega'nlènè' ra'o di'idza'. ²⁶ Guichi bia' niga, nacan ta quixogue'n le'e cabè' hue yaca ben' re'en si' le'e yè'. ²⁷ Na' abdze' Jesucristo Bichi Be quienè' lu'u guicho laxta'ole. Abega'nnè' yu'unè' lu'u laxta'ole ruzioñe'enè' le'e di'idza' li quie Diuzi. Cana' inezile chi inè yaca benè' tuzi ca rnèn len xti'idza' Diuzi, o chi birnèyaquè' tuzi. Puro di'idza' li rna Bichi Be quienè', birnè' di'idza' huezì' yè'. Biyehuèdile nacalèle Cristo tuze conforme con ca bzioñe'e Bichi Be quienè' le'e.

²⁸ Lena', zi'ina', rnia' le'e tatula, biyehuèdìro nacalèro Cristo tuze cuenda bigata' yela' stu' quiero cati dza yeguidè'. ²⁹ Nezile naca Diuzi ben' rue ta yu'u ni'a xnezi. Lèscan' reya'ala' inezile yugulu yaca ben' rue ta yu'u ni'a xnezi, nacayaquè' zi'i Diuzi.

3

Zi'i Diuzi nacaro

¹ Tanto nedyè'è Xuziro Diuzi ra'o ulionè' ra'o nacaro zi'inè'. Quie lena' binacalè yaca ben' nita' lao yedyi layu tuzi len ra'o, porque binacalèjè' tuzi len Diuzi. ² Le'e bicha', nadyè'èda' le'e. Rnia' le'e nacaro zi'i Diuzi. Binelu'e Diuzi ra'o cabè' gaca quiero bè' azulèronè' guibá, pero neziro huaca quiero cabè' naca quie Cristo cati yeguidè'. Porque cati yeguidè', dyè'èdi ilè'èronè' tal cabè' naquè'. ³ Chi du la'adyi'ro rbezaro yeguida Cristo, bihue'ro lato gaca laxta'oro besu. Reya'ala' gaca laxta'oro yèri cabè' yèri naca laxta'o Jesucristo.

⁴ Yugulu ben' rue xquia, tamala ruejè'. Nacan mala huero xquia. ⁵ Dyè'èdi nezile abida Jesucristo lao yedyi layu begubanè' xquia yu'u lu'u laxta'oro, pero ni tu xquia biyu'u lu'u guicho laxta'onè'. ⁶ Chi nacalèro Cristo tuzi, biru'en lato inaoro neza mala huero xquia. Pero yugulu ben' rnao neza mala, birue quieyaquè' xti'idza'nè', binuebè'yaquè' lèbè'. ⁷ Na'ra le'e, zi'ina', bihue'le lato si' benè' le'e yè'. Tali rnia' le'e: Chi nacaro ben' laxta'o yèri ca naca Cristo ben' laxta'o yèri, bide lato inaoro neza mala. ⁸ Chi naoro neza mala, binacaro ben' quie Diuzi, dechan' ben' quie taxi'ibi', porque tu binegata' dyilayu unao xan' taxi'ibi' neza mala. Quie lena' bida zi'i Diuzi lao yedyi layu besulanè' dyin quie xan' taxi'ibi'.

⁹ Yaca ben' naca zi'i Diuzi, bide lato inaoyaquè' neza mala, porque babè' Diuzi yela' naban quiejè' tuzioli, anacajè' zi'i Diuzi. Quie lena', como bibi tamedian rue Diuzi, lèscan' ra'o, chi tali nacaro zi'i Diuzi, bireya'ala' huero tamedian. ¹⁰ Lena' ulu'en chi tali nacaro zi'i Diuzi, o chi nacaro zi'i xan' taxi'ibi'. Chi huero tamedian rudiero benè', binacaro zi'i Diuzi.

Nacan zi hue quiero idyè'èro tu ituro

¹¹ Ni rnia' le'e tatula ca di'idza' babele dza na'te, dza uzulaole rnaole xneza Jesús: Reya'ala' idyè'èro tu ituro. ¹² Bireya'ala' gacaro cabè' guca ben' lao Caín caora uzunè' dyila yu. Gulenè' quie xan' taxi'ibi' bètinè' bi' bichinè', porque unao bi' bichinè' neza dya'a, pero lènè' unaoonè' neza mala quie xan' taxi'ibi'.

¹³ Bicha', biyebanle cati rudie benè' le'e. ¹⁴ Guca quiero ca quie ben' aguti dza na', dza unaoro neza mala quie xan' taxi'ibi'. Pero na'ra banaca quiero ca quie ben' abeban nun quie anaoro neza dya'a quie Jesús. Neziro naoro xneza Jesús chi nadyè'èro tu ituro. Chi binadyè'èro itu ituro, naca quiero ca quie ben' baguti, ben' biyezi' Diuzi. ¹⁵ Chi rudiero tu ituro, naca quiero ca quie ben' bèti benè'. Na'ra nezile dyè'èdi cabè' gaca quie ben' bèti benè'. Bigata' yela' neban quieyaquè' tuzioli. ¹⁶ Tantozi nadyè'èro Cristo ra'o, gutinè' lè'è yaga cruzo ta gata' tadya'a quiero. Lèscan', ra'o, reya'ala' idyè'èrèro itu ituro, hasta suro dispuesto gatiro ta gata' tadya'a quie ben' bichiro. ¹⁷ Chi nacaro ben' uña'a, pero

biyëchi'la'adyi'ro ben' bichiro, ben' bide quie, na'tera bisaque' inaro nadyë'ërojë' cabë' nadyë'ë Diuzi lëjë'. ¹⁸ Zi'ina', bireya'ala' idyë'ëro ben' bichiro de di'idza'zi, pero reya'ala' idyë'ërojë' du guicho du la'adyi'ro.

Cabë' reya'ala' huero ta cue' laxta'oro chizi lao Diuzi

¹⁹ Chi huero cana', huaneziro tali na' naoro xneza Jesús, tali na' huabe' chizi laxta'oro. ²⁰ Pero chi bicue' chizi laxta'oro, chi rao pensari quiero ra'o xquia, na' huacalë Diuzi ra'o yegubanë' chi tamala yu'u lu'u laxta'oro tacuenda cue'n chizi. Cana' hue Diuzi, dan' naquë' ben' ze, nezinë' yugulu cabë' ruero, cabë' pensari yu'uro. ²¹ Pues cani nacan, ben' bicha': Chi birao pensari quiero ra'o xquia, lena' du la'adyi'ro huabe' chizi laxta'oro. ²² Gun Diuzi yugulu ca ta inabaronë' por nun quie rue quiero xti'idzë', ruero ca ta re'ennë' huero. ²³ Na' ta hue quiero xti'idzë', re'ennë' inaoro xneza Zi'inë' Jesucristo, re'ennë' idyë'ëro tu ituro cabë' unë'. ²⁴ Porque chi hue quiero xti'idza' Diuzi, lena' rulu'ena nacalëronë' tuze, lëscan' nacalëne' ra'o tuze. Neziro nacalëronë' tuze, porque yu'u Bichi Be quienë' lu'u guicho laxta'oro.

4

Ni rnën quie ben' yu'u Bichi Be quie Diuzi, len quie ben' yu'u bichi be quie taxi'ibi'

¹ Bicha', bigalele quie yugulu ben' naja tanun quie Diuzi rnajë', dan' bineziro chi balejë' rnajë' quie Diuzi. Reya'ala' uzënarago quiejë' dyë'ëdi chi rnajë' tuzi ca rna di'idza' quie Diuzi, o chi birnajë' tuzi. Porque nita' ben' zë rnaja tanun quie Diuzi rnajë', pero bë' nazijë', yë' rzi'jë'. ² Chi rnajë' bida Jesucristo lao yedyi layu guquë' benë', cana' ineziro nacajë' ben' quie Diuzi, aoyu'u Bichi Be quienë' lëjë'. ³ Pero chi rnajë' bibida Jesucristo lao yedyi layu, biguquë' benë', cana' ineziro binacajë' ben' quie Diuzi, biyu'u Bichi Be quie Diuzi lëjë', pero yu'ujë' bichi be xi'ibi'. Na' bichi be yu'ujë' rdyiala'adyi'n Cristo. Abele huida bichi be xi'ibi' rue cana' lao yedyi layu. Ni rnia' le'e babidan na'a.

⁴ Zi'ina', nacaro ben' quie Diuzi. Quie lena' yaca ben' birna tuzi con cabë' rna xti'idza' Diuzi, bihuejë' ra'o gan si'jë' ra'o yë', porque napara fuerza Bichi Be quie Diuzi yu'uro, quele ca fuerza napa bichi be quie xan' taxi'ibi' yu'ujë'. ⁵ Nacajë' ben' quie xan' taxi'ibi', binacajë' ben' quie Diuzi. Quie lena' rnajë' tuzi ca rna xan' taxi'ibi'. Quie lena' gale yaca ben' nao neza quie xan' taxi'ibi' ca di'idza' inajë'. ⁶ Pero ra'o, nacaro ben' quie Diuzi. Nu ben' gale quiero, nacarëjë' ben' quie Diuzi. Cana' neziro nula yu'u Bichi Be quie Diuzi, nula yu'u bichi be quie taxi'ibi'.

Nadyë'ë Diuzi yugulute benë'

⁷ Bicha', reya'ala' idyë'ëro ben' bichiro, ben' nao xneza Jesús. Cana' re'en Diuzi huero, porque nadyë'ë Diuzi yugulute benë'. Chi nadyë'ëro yugulute benë', nacalëro Diuzi tuze, na' du la'adyi'ro nacaro Zi'inë'. ⁸ Chi binadyë'ëro yugulute benë', na' binacalëro Diuzi tuze, porque nadyë'ë Diuzi yugulute benë'. ⁹ Tantozi nadyë'ë Diuzi ra'o, na' use'elë' tu litza' Zi'inë' lao yedyi layu. Lao na'a Zi'inë' guta' yela' naban quiero tuzioli. Cana' neziro nadyë'ë Diuzi ra'o. ¹⁰ Tanto nadyë'ë Diuzi ra'o, ba'ala'cazi binegue'enro Diuzi caora na', use'elë' Zi'inë' lao yedyi layu gutinë' lë'ë yaga cruzo, udižugüë' dula' xquia quiero cuenda yezi'ze Diuzi quiero.

¹¹ Bicha', nun quie nadyë'ë Diuzi ra'o, reya'ala' edyë'ëro itu ituro. ¹² Ba'ala'cazi ni tu nunu blë'ë Diuzi, pero chi nadyë'ëro itu ituro, na' yu'u Bichi Be quienë' lu'u guicho laxta'oro, na' bitecazi nadyë'ë Diuzi ra'o. ¹³ Nun quie nudze' Diuzi Bichi Be quienë' lu'u guicho laxta'oro, na' ineziro nacalëronë' tuze. ¹⁴ Nëtö' blë'ëndo' nacando' testigo cabë' bë' Xuziro Diuzi lënë' Zi'inë'. Use'elë' lëbë' lao yedyi layu tacuenda ute uselanë' nutezi ben' re'en nao xnezë'. ¹⁵ Nutezi ben' gale chi zi'i Diuzi Jesucristo, lëben' na' nuenë' Diuzi bala'ana, lëscan' nue Diuzi lëben' na' bala'ana.

¹⁶ Cana' neziro nadyë'ë Diuzi ra'o lente yugulute benë'. Lëscan', ra'o, chi edyë'ëro tu ituro, na' nuero Diuzi bala'ana, lëscan' nue Diuzi ra'o bala'ana. ¹⁷ Cana' hue quiero idyë'ëro Diuzi du guicho du la'adyi'ro, biidzebiro dza gaca juicio, porque bdyë'ëro Diuzi dza udaro lao yedyi layu cabë' bdyë'ë Jesucristo Diuzi. ¹⁸ Chi neziro nadyë'ë Diuzi ra'o, biidzebironë'. Chi du la'adyi'ro nadyë'ëro Diuzi biidzëbironë' ni lë'ëti'. Pero chi rdzebiro Diuzi, lena' rulu'en bineneziro chi tali nadyë'ë Diuzi ra'o.

¹⁹ Nadyë'ëro Diuzi porque tanëro bdyë'ë Diuzi ra'o. ²⁰ Chi inaro nadyë'ëro Diuzi, pero rudiero yaca benë', yë' rzi'ro inaro nadyë'ëro Diuzi. Chi binadyë'ëro yaca benë', ben' rlë'ëro, yë' rzi'ro inaro nadyë'ëro Diuzi, ben' birilë'ëro. ²¹ Chi nadyë'ëro Diuzi, nacan zi hue quiero idyë'ëro yaca benë'. Cana' naca mandamiento udiXu Jesucristo para ra'o.

5

Cabë' reya'ala' huero ta huero gan lao tamala de lao yedyi layu

¹ Chi galero use'ela' Diuzi Jesús, chi galero bidè' lao yedyi layu ta ute uselanè' ra'o, na' nacaro zi'i Diuzi. Chi nadyè'ëro Xuziro Diuzi, nacan zi hue quiero idyè'ërero ben' bichiro, ben' naca zi'i Diuzi. ² Chi nadyè'ëro Diuzi huero cabè' mandado ruenè', cana' ineziro tali na' nadyè'ërero yaca ben' bichiro, ben' naca zi'i Diuzi. ³ Bisaque' inaro nadyè'ërero Diuzi chi biruero ca mandado ruenè'. Binaca zi'i mandado quienè'. Mandado dya'a ruenè'. ⁴ Babè yugulu ben' naca zi'i Diuzi gan lao tamala de lao yedyi layu. Nun quie rzudyi'ilèro Jesús abèro gan. ⁵ Chi bisudyi'ilèro quie Jesús inaro zi'i Diuzi lèbè', bisaque' huero gan lao tamala de lao dyila yu.

Cabè' una Diuzi quie zi'inè'

⁶ Caora bida Jesucristo lao yedyi layu, caora na' uyu'unè' lu'u nisa, ulato ren quienè' gutinè' lè'ë yaga cruzo. Quele uyu'uzinè' lu'u nisa, pero lèscan' guticazinè' lè'ë yaga cruzo ulato ren quienè'. Naca Bichi Be quie Diuzi testigo con cabè' guca quie Jesucristo. Puro tali rna Bichi Be quie Diuzi, birzi'nè' yè'. ⁷ Tzona cue' testigo naca ta de guibá rguixogue'n quie Jesucristo. Rguixogue' Xuziro Diuzi, lènè' di'idza' quienè', lènè' Bichi Be quienè'. Tuzi ca rguixogue'jè' quie Jesucristo. ⁸ Lèscan' tzona cue' testigo nacaré ta de lao yedyi layu rguixogue'n quie Jesucristo. Rguixogue' Bichi Be quie Diuzi. Lèscan' caora uyu'u Jesucristo lu'u nisa, lena' rguixogue'n quienè'. Lèscan' cati gutinè' lè'ë yaga cruzo, ulato ren quienè', lena' rguixogue'rènan quienè'. Tuzi ca rguixogue'n lao yunaten quie Jesucristo. ⁹ Chi ralero quie benè' cabè' inajè' ra'o, reya'ala'cazi galero quie Diuzi cabè' unè', porque zaca'ra cabè' una Diuzi quie zi'inè'. ¹⁰ Chi hue quiero di'idza' quie zi'i Diuzi, cana' ineziro tali nacan di'idza' quienè' cabè' unè'. Pero chi bihue quiero di'idza' quie zi'i Diuzi, lena' inaro naca Diuzi ben' huizi' yè', porque biralero tali nacan cabè' unè' quie zi'inè'. ¹¹ Na'ra con cabè' una Diuzi, unè' babènnè' yela' neban quiero ta biyeyudyi yedu quiè. Lèscan' unè' babènnè' quiero len lao na'a zi'inè'. ¹² Nu ben' rale quie zi'inè', banapè' yela' neban ta biyeyudyi yedu quie. Pero nu ben' birale quie zi'inè', binapè' yela' naban ta biyeyudyi yedu quie.

Ni yeyudyi di'idza' bzu Juan lè'ë guichi

¹³ Bia' guichi ni use'ela'n laole le'e, ben' rale quie zi'i Diuzi, ta inezile banapale yela' neban ta biyeyudyi yedu quie.

¹⁴ Quie lena' du la'adyi'ro reya'ala' ulidzaro Diuzi, porque neziro renè' quiero chi inabaronè' ca ta ugunnè' gunnè' quiero. ¹⁵ Como cana' neziro re Diuzi quiero cati ulidzaronè', lèscan' ineziro babènnè' quiero ta unabaronè'.

¹⁶ Chi rlè'ëro rnao tu ben' bichiro neza mala ruenè' xquia, pero binacan xquia ta udyiagui' Diuzi lèbè', reya'ala' ulidzaro Diuzi inabaronè' chi bigacalè Diuzi lèbè' ta usannè' neza mala quienè' yenaonè' xneza Diuzi tatula. De tu cue' xquia nacan ta udyiagui' Diuzi ra'o. Biinia' le'e reya'ala' ulidzaro Diuzi por nu ben' napa xquia nacan ta udyiagui' Diuzi lèbè'. ¹⁷ Yugulu xquia ruero nacan mala, pero de tu cue' xquia nacan ta udyiagui' Diuzi ra'o.

¹⁸ Neziro yugulu ben' naca zi'i Diuzi binaojè' huejè' xquia, porque rapa zi'i Diuzi lèjè'. Bisaque' xan' taxi'ibi' huelèn lèjè'.

¹⁹ Neziro nacaro ben' quie Diuzi. Lèscan' neziro rue yaca los demás ben' nita' lao yedyi layu ca mandado re'en xan' taxi'ibi' huejè'. ²⁰ Lèscan' neziro babida zi'i Diuzi lao yedyi layu bzioñe'enè' ra'o nuebè'ro tuzi Diuzi zu guibá, neziro nunura Diuzi zu. Nacalèronè' tuze, ta inaro, nacalèro zi'inè' Jesucristo tuze. Tuzi lèbè' naque' Diuzi, tuzi lèbè' gunnè' yela' naban quiero ta biyeyudyi yedu quie. ²¹ Zi'ina', gapale cuidado ta birionla'adyi'le ta binaca Diuzi. Amén.

GUICHI URUPE BĒ SAN JUAN APÓSTOL

Nacan zi hue quiero idyē'ēro yugulu laguedyiro

¹ Nē'ēdi', ben' gula, bia' guichi ni, use'ela'n laolo' luē' dan' naco' luē' nigula ulio Diuzi. Lēscan' use'ela' guichi ni lao ja zi'ilo'. Nadyē'ēda' le'e du guicho du la'adya'. Pero cala tuza' nē'ēdi', lēscan' nadyē'ē yaca los demás ben' nao xneza Jesús le'e. ² Nadyē'ēda' le'e por nun quie di'idza' li quie Diuzi yu'un lu'u laxta'oro. Lēdi'idza' na' biyeyudyi yedu fuerza valor quien. ³ Rulidza' Xuziro Diuzi lēnē' zi'inē' Jesucristo ta huela'iyajē' yeyēchi'la'adyi'jē' le'e, cuēchjē' chizi guicho laxta'ole. Tabalacazi nedyē'ē Xuziro Diuzi lēnē' zi'inē' le'e.

⁴ Redaohueda' cabē' rue bala ja zi'ilo', barue quieyaquē' di'idza' li quie Diuzi, barueyaquē' ca mandado re'en Xuziro Diuzi huero. ⁵ Na'ra zana', quele mandamiento cubi inia' le'e lē'ē guichi ni, dechan' mandamiento gula ca ta unē Jesús nēto' desde dza na'te. Rnia' le'e nacan zi hue quiero idyē'ēro yugulu laguedyiro. ⁶ Nacan tali nadyē'ēro yugulu laguedyiro, chi barue quiero xti'idza' Diuzi. Banezile desde dza na'te cabē' re'en Diuzi huero, re'ennē' idyē'ēro yugulu laguedyiro.

Nita' ben' zē, ben' huezi' yē' lao yedyi layu

⁷ Na'ra nita' ben' zē, ben' huezi' yē', ben' rnē biguca Jesucristo benē' cati bidē' lao yedyi layu. Pero yē' rzi'jē', rudyiala'adyi'jē' Cristo rnējē' cana'. ⁸ Gapale cuidado ta bisijē' le'e yē', na' te cana'zi dyin quie Diuzi ta ziole ruele. Hue quiele xti'idza' Diuzi tacuenda gata'cazi quiele dužete ca ta pceza Diuzi gunnē' le'e dza zaza'ra.

⁹ Nutezi ben' rnē di'idza' quie Cristo rguixogue'nē', pero cabē' rguixogue'nē' binacan lēbi con cabē' una Cristo, binubē'nē' Diuzi, binaquē' ben' quie Diuzi. Pero chi rguixogue'nē' lēbi con cabē' una Cristo, nubē'nē' Xuziro Diuzi lēnē' zi'inē'. ¹⁰ Chi guida ben' birguixogue' lēbi con cabē' una Cristo, bisilenē' zan yu'u quiele, biugapalenē' diuzi, ¹¹ porque chi ugapalenē' diuzi, huen quiele ca quie ben' rue tamala len leyaquē'.

Niga yeyudyi di'idza' bzu Juan lē'ē guichi

¹² Zē di'idza' re'enda' inia' le'e, pero hire'enda' hua' zē guichi. Mejorla naguidala' zan yu'u quiele ta hue'ro di'idza' dyē'ēdi, yedaohuero suro gusto.

¹³ Yaca zi'i bi' zilo', ben' uliorē Diuzi, rugapajē' luē' diuzi. Amén.

GUICHI UYUNE BĚ SAN JUAN APÓSTOL

Use'ela' Juan guichi ni lao tu ben' lao Gayo

¹ Nĕ'ĕdi', ben' gula, bia' guichi ni use'ela'n laolo' luĕ', Gayo. Naco' amigo quia', tabalacazi nadyĕ'ĕda' luĕ'.

² Bicha', rulidza' Diuzi ta icuasa icui'o tamala ta bibi gaca quio' sulo' huen. Cabĕ' ruelo' naolo' xneza Jesús dyĕ'ĕdi, cana' re'enda' sulo' dya'a tuzioli. ³ Bedaohueda' caora bla' chopa tzona ben' bichiro, ben' nao xneza Jesús, unajĕ' nĕ'ĕdi' cabĕ' ruelo' rnaolo' xneza Jesús du guicho du la'adyo'. ⁴ Lega redaohueda' bĕ' beda' nenaoyaca ben' quie Jesús xnezane' du guicho du la'adyi'jĕ'. Raqueda'yaquĕ' ca ži'ina'.

⁵ Bicha', tahuen na' huelo' caora gacalao' ben' bichiro, ben' nao xneza Jesús. Tahuen gula huelo' gacalao' yaca ben' za' yedyi tula. ⁶ Unajĕ' rĕbijĕ' yaca los demás ben' bichiro cabĕ' ruelo' nadyĕ'ĕlo' lĕjĕ'. Chi huu' cule, gacalĕlo'jĕ' tzu'ujĕ' neza dyĕ'ĕdi, como lĕzi lĕjĕ' rguixogue'rĕjĕ' xti'idza' Diuzi. ⁷ Mandado quie Jesucristo aoyu'ujĕ' neza. Birnabajĕ' ben' binao xneza Jesús ta gasijĕ' len ta gaojĕ'. ⁸ Nacan cuenda quiero hue'rojĕ' ga gasijĕ', hue'rojĕ' ta gaojĕ', gacalĕrojĕ' tzu'ujĕ' neza tziojĕ' tzetixogue'jĕ' benĕ' xti'idza' Diuzi.

Rnĕ Juan quie tu ben' lao Diótrefes, ben' rudyiala'adyi' lĕbĕ'

⁹ Aose'ela' tu guichi laole dza na' ta inezile cabĕ' reya'ala' huele. Pero bigule Diótrefes quiendo'. Re'ennĕ' inabĕ'nĕ' cuinzinĕ'. ¹⁰ Lena' hua' di'idza' len le'e cati guida' cabĕ' ruenĕ', porque rudyiala'adyi'nĕ' nĕto'. Bire'ennĕ' gapachi'nĕ' ben' bichiro žan yu'u quienĕ'. Lĕscan' ruzegadyinĕ' yaca ben' re'en gapachi' ben' bichiro žan yu'u quie. Biru'enĕ' lato yedupalĕjĕ' ben' bichiro bĕ' rueyaquĕ' culto.

¹¹ Bicha', biinaole huele ca rue ben' mala. Reya'ala' huele ca rue ben' huen. Chi huero tadya'a, lena' rulu'en nubĕ'ro Diuzi. Chi huero tamala, lena' rulu'en binubĕ'ro Diuzi.

Rnĕ Juan naca Demetrio ben' huen

¹² Naca Demetrio ben' huen, cana' na yaca benĕ' yugulujĕ'. Talicazi nacan con cabĕ' najĕ' quienĕ' najĕ' naquĕ' ben' huen. Lĕscan' nĕto', nezirĕndo' naquĕ' ben' huen. Luĕ' nezilo' di'idza' li rnĕndo'.

Ni yeyudyi di'idza' bzu Juan lĕĕ guichi

¹³⁻¹⁴ Zĕ' di'idza' re'enda' inia' luĕ', pero bire'enda' hua' zĕ' guichi. Mejorla naguidala' žan yu'u quio' ta hue'ro di'idza' dyĕ'ĕdi cabĕ' nacan.

¹⁵ Rulidza' Diuzi cuĕchinĕ' chizi guicho laxta'olo'. Yaca amigo quio', ben' zulia' tuže gan' ni, rugapayaquĕ' luĕ' diuzi. Ugapalo' diuzi yugulu amigo quia', ben' nita'lao' tuže. Amĕn.

GUICHI NI BĒ SAN JUDAS APÓSTOL

Guichi ni bē Judas use'ela'nē'n lao yaca ben' nao xneza Jesús

¹ Nē'ēdi', Judas, naca' ben' rue mandado quie Jesucristo. Naca' bicha' Santiago. Guichi ni bia' use'ela'n laole le'e, ben' ulio Diuzi. Nadyē'ē Xuziro Diuzi le'e, zunē' rna'nē' le'e. ² Rulidza' Diuzi ta yeyēchi'la'adyi'nē' le'e dyē'ēdi, lēscan' ta cuēchinē' chizi laxta'ole idyē'ēnē' le'e taze.

*Rnē Judas quie yaca ben' huezī' yē'
(2 Pedro 2.1-17)*

³ Bicha', lega re'enda' ise'ela' tu guichi laole ta inia' le'e mazara cabē' bē Diuzi bēnnē' yela' neban quiero tuzioli. Ruen dyabē' ise'ela' tu guichi laole ta inia' le'e cabē' reya'ala' huele, reya'ala' gapale cuidado ta bisī' benē' le'e yē'. Reya'ala' hue quiele xti'idza' Diuzi ca di'idza' pca'n Diuzi lao na'a yaca ben' quienē'. ⁴ Cana' nia', porque balarazi aoyu'u ben' huezī' yē' ladole. Yaca ben' na' najē' bibi huena chi huero tabayatza cabē' rnan quiero. Najē' bihue Diuzi ra'o castigo, porque dan' nadyē'ēnē' ra'o. Pero bē' nazijē' yē' rzi'jē' binacan cana'. Nacajē' ben' mala, ben' rudyiala'adyi' Jesucristo. Tuzi Jesucristo naquē' xa'n'ro, ben' Señor quiero. Pero lējē' rnajē' bibi zaca'nē'. Pues desde cana'te rnēn lē'ē guichi la'iya quie Diuzi bi gaca quie ben' rna cana'. Rnēn huachugubē' Diuzi lējē' dza gaca juicio.

⁵ Anezile dyē'ēdi cabē' bē Diuzi cana'te, pero decazide re'enda' yeza'la'adyi'le tatula. Bigala'adyi'le cabē' guca caora unita' yaca ben' Israel nación Egipto. Psaca ben' Egipto ben' Israel bizinaquezi, pero pte psela Diuzi lējē', uchugubē'cazi Diuzi quie balajē'. Uchugubē'nē' quie yaca ben' bigule quienē' cabē' unē'. ⁶ Lēzi bigala'adyi'le cabē' guca quie bala ángel. Bigulejē' cabē' una Diuzi, na' berojē' ga banaca xlatojē'. Caora na' bē Diuzi mandado uyu'ujē' ga naca chula ta iriojē' caden para bira yerojē'. Na' yu'ujē' rbezajē' dza gaca juicio. ⁷ Lēzi quie ja ben' ciudad Sodoma, len ja ben' ciudad Gomorra, len ja ben' yedyi re' ga'ala', bigala'adyi'le cabē' ta užacajē'. Bigulejē' quie Diuzi cabē' bigule ja ángel dza na'. Bējē' bizinaque, gusilējē' nigula binaca žgula'jē', hasta gusilējē' laguedyi byujē' ca nigula. Pues lente be'mbyu lente nigula bējē' bizinaquezi. Quie lena' uchugubē' Diuzi quiejē', aoyejē' tzasagazi cuenda na' inezi yaca benē' de que ratza Diuzi cabē' tamala bējē'.

⁸ Cabē' bē ja ben' unita' tiempo, cana' ruerē ben' huezī' yē' uyu'u ladole. Ca ben' xusa, ruelējē' cuinjē' tabayatza. Biralejē' quie Diuzi. Rutasi runiojē' yaca ben' rna'bē' zu guibá. ⁹ Bigala'adyi'le cabē' bē xan' ángel laohuē' Miguel. Lao cuerpo quie Moisés bēlēnē' xan' taxi'ibi' huenē'. Pero yela' ben' huen quienē', biptasi bnionē' xan' taxi'ibi'. Lēzi biudaonē' xan' taxi'ibi' xquia. Pero unē xan' ángel rēbinē' xan' taxi'ibi': "Huaō Jesucristo luē' xquia." ¹⁰ Na'ra yaca ben' na', ben' huezī' yē' uyu'u ladole, ta birioñe'ejē' na' rudyiala'adyi'jē'. Nacajē' ca bia guixi', biyu'ujē' pensari. Dula' napajē' cuinzijē' gata' castigo quiejē' tuzioli.

¹¹ Gaca bayēchi' gula quiejē' nun quie naojē' ruejē' cabē' bē Caín. Yela' rza'la'adyi' dumi quiejē', ruejē' cabē' bē Balaam cana'te. Huacarē bayēchi' quiejē' cabē' guca quie tu ben' lao Coré cana'te. Guca quie Coré uchugubē' Diuzi lēbē', como dan' bdyiala'adyi'nē' Diuzi. ¹² Naca yela' stu' quiele, como dan' raolēle lējē' tuže ga redupale ruele culto len ben' bichile, ben' nao xneza Jesús. Dan' rudyiala'adyi'jē' Diuzi, bireya'ala' gaolēle lējē' tuže. Puro quiezijē' re'enjē' gata'. Naca quiejē' ca quie beo bidyi ru'unan be bedun'. Lēzi naca quiejē' ca quie yaga gu'udzo na' reyalan, birbian tazixi. Cana' naca quiejē', como dan' biralejē' quie Diuzi. ¹³ Naca quieyaquē' ca quie bdyin' ta rzē ru'a yao že dupen bēbi. Rdayaquē' rnētzequeyaquē', pero yē' rzi'jē'. Naca quieyaquē' ca tu bēlo bizun xlaton. Bire'enjē' inaojē' xneza Jesús. Quie lena' udxu Diuzi tu lato chula ga yu'ujē' tuzioli.

¹⁴ Bigala'adyi'le quie tu zi'isuba Adán, ben' uzu tiempote laohuē' Enoc. Tanun quie Diuzi unēnē' quie ja ben' rdyiala'adyi' Diuzi caora unēnē' gudyinē' laguedyinē' cani: "Huadyin dza cati guida Xuziro Diuzi lēnē' yugulute yaca ángel quienē'. ¹⁵ Caora na' huenē' juicio quie lao yugulute ja benē' rue xquia, ja ben' rdyiala'adyi' lēbē'. Huenē' lējē' castigo nun quie unējē' di'idza' bayatza bdyiala'adyi'jē' Diuzi." Cana' una Enoc gudyinē' laguedyinē' cana'te. ¹⁶ Na'ra yaca ben' rdyiala'adyi' Diuzi, puro huaō xquia laguedyi ruejē'. Puro ta rnazin quiejē' ruejē'. Ruejē' cuinjē' že. Cuenda huejē' gan ta de quie benē', lena' ru'elējē' benē' di'idza' dya'a, pero bē' rnazijē'.

Consejo dya'a ru'e apóstol Judas yaca ben' nao xneza Jesús

¹⁷ Pero le'e, bicha', bigala'adyi'le con cabē' una yaca apóstol quie Señor quiero Jesucristo cana'te. ¹⁸ Cani unajē' gudyijē' laguedyijē': "Za' yeyudyi quie yedyi layu ga rzidycala ja

benë' quie xti'idza' Diuzi, ga ruejë' ta rnazin quiejë', ga birapajë' Diuzi bala'ana." Cana' una yaca apóstol dza na', unayaquë' ca hue ben' na'. ¹⁹ Lëzi quie ben' na' rnia' de que raxejë' tzu'ujë' huedila cuenda huejë' laguedyijë' chopa cue'. Biyu'u Bichi Be quie Diuzi lu'u guicho laxta'ojë'.

²⁰ Pero le'e, bicha', huele tzutzu biyehuëdile inaole xneza Jesús. Ulenaba Bichi Be quie Diuzi ta gacalënë' le'e ta hue'lële Diuzi di'idza'. ²¹ Yugu dza reya'ala' yeza'la'adyi'ro Diuzi cabë' ruenë' nadyë'ënë' ra'o. Reya'ala' cuezaro dyë'ëdi dza yezi' Señor quiero Jesucristo ra'o, dza yeyëchi'la'adyi'në' ra'o gunnë' yela' naban quiero ta biyeyudyi yedu.

²² Reya'ala' uxi'idze'ro dyë'ëdi ben' binenezi, ben' nerue pensari chi naojë', chi biinaojë' xneza Jesús. ²³ Reya'ala' yëbiro benë' ta bihuejë' xquia, porque chi huejë' xquia, huabi-agui'jë' cabë' rbiagui' ta yu'u lagui' reina. Reya'ala' yeyëchi'la'adyi'ro ben' rue xquia, porque naca bayëchi' gula quiejë'. Reya'ala' gacalërojë' ta usanjë' bira huejë' tamala. Pero con cuidado gacalërojë' tacuenda bitzu'uro pensari huerëro xquia cabë' rue lëjë'.

Ga iyudyi guichi ni, bë Judas Diuzi ben' ze

²⁴⁻²⁵ Naca Diuzi ben' racalë ra'o ta bira inaoro huero tamedian. Dyin quienë' nacaro ben' laxta'o yëri, binaparo xquia yedaohuero yedyinro laohuë'. Tuzi Diuzi naquë' ben' bala'ana quie lao yugulutero. Tuzi lëbë' rnabë'në' quie lao duzete. Tuzi lëbë' reya'ala' gapala'n yugu benë'. Tuzi lëbë' rute ruselanë' ra'o tanun quie zi'inë' Jesucristo. Tuzioli naca Diuzi ben' zera, la'acazi dza na'la, la'acazi na'a, la'acazi dza zaza'ra. Amén.

DI'IDZA' TABELAO TA UDIXOGUE' JESUCRISTO SAN JUAN APÓSTOL

Di'idza' tabelao ta udixogue' Jesucristo San Juan apóstol

¹ Lèdi'idza' niga nacan di'idza' tabelao ta gudyi Diuzi Jesucristo tacuenda quixogue'nè' ja ben' nao xnezè' ta inezijè' cabè' baza' gaca dza zaza'ra. Use'ela' Jesucristo tu ángel ta gacalènè' nè'èdi' ta inezida' nè'èdi', Juan, naca' ben' nao xneza Cristo. ² Tali rnia' cabè' blè'èda'. Naca' testigo nacan tali con cabè' rna xti'idza' Diuzi. Naca' testigo nacan tali con cabè' una Cristo.

³ Huela'ya Diuzi huaca huen gula quie nu ben' rulaba di'idza' lè'è guichi ni, nu ben' guzènaga con cabè' rnan. Lèscan' huela'ya Diuzi huaca huen gula quie nu ben' rue quie cabè' rnèn lè'è guichi ni, como dan' baidyin dza gaca con cabè' rnèn lè'è guichi ni.

Use'ela' Juan guichi ni lao gadyi ciudad

⁴ Nè'èdi', Juan, bia' guichi niga use'ela'n lao le'e, ben' nao xneza Cristo lao gadyi ciudad ga nita'le yu nebaba Asia. Rnaba' lao Diuzi, ben' zu tuzioli, ta huela'yanè' le'e tacuenda su laxta'ole gusto bidèbile. Lèscan' lena' rnaba' lao ben' naca ca gadyi bichi be, ben' zu zaca'lao lao Diuzi ga naca xlatonè'. ⁵ Lèscan' lena' rnaba' lao Jesucristo, ben' naca testigo dya'a quie Diuzi. Naquè' ben' nèro, ben' pseban Diuzi para tuzioli. Lèbè' rnabè'nè' yugulu ben' naca rey, ben' nita' lao yedyi layu. Nedyè'è Cristo ra'o udubanè' dula' xquia quiero cati ulato ren quienè' gutinè' lè'è yaga cruzo. ⁶ Ulionè' ra'o nacaro rey, nacaro pxuzi ta huero ca mandado re'en Xuzinè' Diuzi huero. Ben' bala'ana naquè' tuzioli. Ben' napa yela' rnabè' naquè' tuzioli. Amén.

⁷ Uzè nagale quia' dyè'èdi. Baidyin dza guida Cristo lao beo. Hualè'è yugulu benè' lèbè'. Hasta ben' psaca lèbè' bizinaquezi hualè'èjè' lèbè'. Huabedyi yugulu ben' nita' lao yedyi layu cati ilè'èjè' lèbè'. Nacan tali can' gaca.

⁸ Na'ra una Diuzi: "Lao na'a uzulaohua' ulècha' yedyi layu. Lèscan' lao na'a yeyudyi yedu quie yedyi layu. Naca' ca quie letra A len letra Z quie abecedario." Cana' una Diuzi, ben' de yugulu yela' rnabè' quie, ben' zu tuzioli.

Blu'e Bichi Be quie Diuzi Juan ca naca Cristo

⁹ Nè'èdi', Juan, naca' ben' bichile, ben' nao xneza Jesús. Nacalia' le'e tuze nun quie redzagalaoro naoro xneza Cristo. Lèscan' nacalia' le'e tuze nun quie dan' nacaro ben' nao quie yela' rnabè' quie Diuzi. Lèscan' nacalia' le'e tuze nun quie racalè' Jesucristo ra'o ta suero dyè'èdi. Na'ra guca' preso dza na' ga de yu bidyi lu'u nisadao' laona Patmos nun quie dan' udixogui'a benè' xti'idza' Diuzi gucha'jè' cabè' bè' Jesucristo. ¹⁰ Na'ra cani guca quia' tu dza quie Señor quiero. Guca quia' blu'e Bichi Be quie Diuzi nè'èdi' cabè' baza' gaca dza zaza'ra. Beda' zidzo gula unè tu benè' xcu'udza'. Como ca rchi' trompeta unènè'. ¹¹ Na'ra una ben' na' rëbinè' nè'èdi':

—Lao na'a uzulaohua' ulècha' yedyi layu. Lèscan' lao na'a yeyudyi yedu quie yedyi layu. Naca' ca quie letra A len letra Z quie abecedario. Cabè' ilè'èlo' ni, uzulo' di'idza' lè'è guichi, huelo' tu libro ise'elo'n lao gadyi ciudad ga nita' ben' nao xneza' yu nebaba Asia. Ise'elo'n lao ciudad Efeso, len lao ciudad Esmirna, len lao ciudad Pérgamo, len lao ciudad Tiatira, len lao ciudad Sardis, len lao ciudad Filadelfia, len lao ciudad Laodicea.

¹² Na'ra beyèchoga' una'a blè'èda' nuzi ben' unè nè'èdi'. Na'ra cati beyèchoga', una'a blè'èda' gadyi candelero de oro. ¹³ Lao tao' candelero na', blè'èda' tu ben' naca ca be'mbyu. Naconè' tu la'ari' tona zun xcu'udzu labatenè'. Na'ra ru'achu'u la'ari' naconè', yu'un tu cinta ta naca de oro. ¹⁴ Na'ra guita' guichonè' nacan ta bezèri cabè' naca Zaba beco' Zi'ila' bezèri, lèscan' cabè' naca yelo bezèri. Na' rna' yulaonè' ca rna' xni' gui'. ¹⁵ Lèscan' labanè' rna'n raca titi' cabè' rna' guíba bronce yèri gula ta bro lao gui'. Lèscan' rchi'nè' rnan zidzo gula ca rchi' tu yao ze gula. ¹⁶ Na'ra zènè' gadyi bélo na'anè' zaquè' yebè. Lèscan' bro tu ta naca ca quie tu espada neduchi'n rupala'n lu'u ru'anè'. Lèscan' rna' laonè' cabè' rna' lao ubidza raca titi' cati rna' oba fuerte gula.

¹⁷ Na'ra cati blè'èda' cana', byala' xni'anè' guca quia' ca quie ben' baguti. Pero lèbè' bda'nè' na'anè' yebè nè'èdi'. Na'ra unè' nè'èdi':

—Bidzebo'. Lao na'a uzulaohua' ulècha' yedyi layu. Lèscan' lao na'a yeyudyi yedu quie yedyi layu. ¹⁸ Naca' ben' de yela' neban quie tuzioli. Ba'ala'cazi agutia', pero bebana' zua' tuzioli. Nè'èdi' rnabi'a lao yela' guti len lao gui' gabila. ¹⁹ Na'ra bzu di'idza' lè'è guichi cabè' bablè'èlo'. Lèscan' bzu di'idza' cabè' rlè'èlo' raca na'a, len cabè' ilè'èlo' baza' gaca. ²⁰ Na'ra cani naca di'idza' ta rguixogue'n quie gadyi bélo zia' zaquè' na'a yebè ta bablè'èlo'. Lèscan'

cani naca di'idza' ta rguixogue'n quie gadyi candelero de oro ta bablë'ëlo'. Na'ra quie gadyi bélo, leyacan rguixogue'n quie gadyi ben' quixogue' xti'idza' Diuzi lao gadyi ciudad ga nita' ben' nao xneza'. Lëscan' quie gadyi candelero, leyacan rguixogue'n quie gadyi ciudad na'.

2

Use'ela' Juan di'idza' lao gadyi ciudad: Di'idza' niga use'ela'në' lao ciudad Efeso

¹ Na'ra una Jesús gudyinë' në'ëdi':

—Bzu di'idza' niga lë'ë guichi ise'elo'n lao ben' nao xneza', ben' zu rguixogue' xti'idza' Diuzi ciudad Efeso. Na' yëbo'jë': "Cani rna ben' zë gadyi bélo zaque' na'anë' yebë, ben' rda lao tao' candelero na': ² Nezda' yugulu cabë' ruele. Nezdä' cabë' ruele dyin quia' du guicho du la'adyi'le. Nezdä' biusanla'adyi'le huele dyin quia'. Nezdä' bihue'le lato gacalë ben' mala le'e tuze. Nezdä' bële prueba quie ben' na nacajë' apóstol, pero bë' nazijë' binacajë' apóstol. Nezdä' banezile ben' huizi' yë' nacajë'. ³ Nezdä' cabë' ruele rnaole xneza' dyë'ëdi. Nezdä' lega bedzagalaole tanun quie dan' naole xneza'. Nezdä' bële dyin quia' biruhuëdile. ⁴ Pero de tu ta ruele biraxeda'. Bira nedyë'ële në'ëdi' cabë' bdyë'ële në'ëdi' dza na', dza uzulaole inaole xneza'. ⁵ Quie lena' reya'ala' yeza'la'adyi'le cabë' bële dza na'. Reya'ala' yetza'le pensari quiele huele tatula cabë' bële dza na'. Chi bihuele ca nia', laguidatia' huaguba' le'e ga zule, bira gacale ca quie candelero quia' chi biyetza'le pensari quiele. ⁶ Pero tahuen na' cabë' pensari ruele rudiele ca rue ja ben' nicolaitas, ben' rionla'adyi' yaca idolo. Lëscan' në'ëdi', rudieda' cabë' ruejë'. ⁷ Ulezënaga dyë'ëdi cabë' na Bichi Be quie Diuzi rëbinë' yaca ben' nao xneza'. Nu yaca ben' sue biusanla'adyi' xneza', huayojë' guibá ta gaojë' tažixi ta dyia tu yaga ta zu na'. Lëtažixi na' ru'en yela' neban." —Cana' una Jesús dza na'.

Di'idza' niga use'ela' Juan lao ciudad Esmirna

⁸ Na'ra una Jesús gudyinë' në'ëdi':

—Lëscan' bzu di'idza' niga lë'ë guichi ta ise'elo'n lao ben' rguixogue' xti'idza' Diuzi, ben' zu ciudad Esmirna. Na' yëbo'jë': "Cani na ben' una lao në'ë uzulao cuëchi yedyi layu, ben' una lao në'ë yeyudyi yedu quie yedyi layu, ben' baguti beban, ben' bazu tuzioli: ⁹ Banezda' yugulu cabë' ruele. Banezda' cabë' redzagalaole. Banezda' nacale ben' yëchi', pero huadyin dza gacale ben' uña'a como dan' huaguizu Diuzi le'e quie dyin quienë' ruele. Banezda' cabë' rudie ja benë' le'e, ben' na nacajë' ben' Israel, pero nacajë' ben' nao rue cabë' mandado rue Satanás. ¹⁰ Na'ra biidzebile cabë' baza' gaca quiele yedzagalaole. Biidzebile ba'ala'cazi dyin quie xan' taxi'ibi' baza' gaca quiele udze' ja benë' bala le'e lu'u dyiguiba cuenda gacale prueba chi tali naole xneza' biusanla'adyi'len. Na'ra baba dzazi baza' yedzagalaole. Pero suele dyë'ëdi inaole xneza' ba'ala'cazi guti ja benë' le'e. Na'ra guna' yela' neban quiele tuzioli. ¹¹ Ulezënaga dyë'ëdi cabë' na Bichi Be quie Diuzi rëbinë' yaca ben' nao xneza'. Nu yaca ben' sue biusanla'adyi' xneza', bibi tamala gaca quiejë', ude beyudyi gutijë', bitziojë' lao gui' gabila." —Cana' una Jesús dza na'.

Di'idza' niga use'ela' Juan lao ciudad Pérgamo

¹² Na'ra una Jesús gudyinë' në'ëdi':

—Na'ra bzu di'idza' niga lë'ë guichi ise'elo'n lao ben' rguixogue' xti'idza' Diuzi, ben' zu ciudad Pérgamo. Na' yëbo'në': "Cani rna ben' zë espada neduchi' rupalao: ¹³ Në'ëdi' nezdä' yugulu ca ruele. Nezdä' zule ciudad ga lega nao ja benë' ca mandado rue Satanás. Pero ba'ala'cazi zule ciudad na', birusanla'adyi'le inaole xneza'. Bipsanla'adyi'le inaole xneza' la'acazi bëti ja benë' Antipas, ben' naca testigo quia'. Bëtijë' lëbë' yedyi quiele ga rna'bë' Satanás. ¹⁴ Pero de tu ta ruele biraxeda'. Biraxeda' ru'ele lato cabë' rue ben' zu ladole, ben' nena' nerue cabë' consejo bdze' tu ben' lao Balaam len itu ben' lao Balac dza na'. Bdze'në' Balac consejo ta yëbinë' ben' Israel ta gaojë' bë'ëla' ta bdyia ja ben' lao ru'aba ga zu idolo. Lëscan' bdze'në' Balac consejo ta yëbinë' ben' Israel ta huejë' tamala gatilëjë' nigula tula, nigula binaca žgulajë'. ¹⁵ Lëscan' biraxeda' ru'ele lato cabë' rue ben' zu ladole, ben' nena' nerue cabë' consejo rudze' ben' nicolaitas. Pero rudieda' cabë' consejo rudze'jë' leyaquë'. ¹⁶ Quie lena' ruen dyabë' yetza'le pensari quiele, como dan' chi biyetza'le pensari quiele, laguidatia' ga zule tilalia' lëjë' conlë espada ta rero ru'a. ¹⁷ Ulezënaga dyë'ëdi cabë' na Bichi Be quie Diuzi rëbinë' yaca ben' nao xneza'. Nu yaca ben' sue biusanla'adyi' xneza', hual'jë' yëta xtila laona maná ta gaojë', pero yëta xtila ta negachi'n na'. Lëscan' hual'jë' tu huio yo bezëri quie quiejë'. Na' lë'ë yo na' zun tu laojë' cubi ta binezi ja ben' tula. Tuzi ben' si' len nezinë' nu laohue zun." —Cana' una Jesús dza na'.

Di'idza' ni use'ela' Juan lao ciudad Tiatira

¹⁸ Na'ra una Jesús gudyinë' në'ëdi':

—Na'ra bzu di'idza' niga lè'è guichi ise'elo'n lao ben' zu rguixogue' xti'idza' Diuzi ciudad Tiatira. Na' yèbo'nè: “Cani rna ben' naca ži'i Diuzi, ben' yu'u laohue ca yu'u xni' gui', ben' rna' labe ca rna' guibá bronce yèri gula: ¹⁹ Na'ra nezda' yugulu cabè' ruele. Nezda' cabè' nedyè'èle nè'èdi'. Nezda' cabè' rnaole xneza'. Nezda' ruele cabè' mandado re'enda' huele. Nezda' rzuele birusanla'adyi'le inaole xneza'. Nezda' arnaorale xneza' dya'ara ca dza uzulaole inaole xneza'. ²⁰ Pero de tu ta ruele biraxeda'. Biraxeda' ru'e'le lato zu tu nigula, ben' lao Jezabel, ladole. Rnanè' nun quie Diuzi rnanè', pero yè'zi rzi'nè', como dan' rudze'nè' ja ben' nao xneza' consejo ta huejè' tamala. Rudze'nè' lèjè' consejo ta gasilèjè' yaca nigula binaca žgulajè'. Lèscan' rudze'nè' lèjè' consejo gaojè' bè'èla' ta bdyia ja benè' lao ru'aba ga zu idolo. ²¹ Na'ra nè'èdi' abi'anè' lato ta yetza'nè' pensari quienè', pero bire'ennè' usanla'adyi'nè' tamala quienè' rasilènè' con nutezi be'mbyu. ²² Pero nè'èdi' hua'nè' castigo gaca žhue'nè' gatanè' lao cama na'. Lèscan' hua' castigo ja ben' ruelè lèbè' tamala chi biusanla'adyi'jè' cabè' tamala ruelèjè' lèbè'. ²³ Na'ra cati gutia' ja ben' nao nigula na', caora na' huanezi yugulu ben' nao xneza' de que nezda' dužete ca naca pensari yu'u lu'u guicho laxta'o benè'. Caora na' guna' le'e tu premio chi bèle tahuen, pero hua' le'e tu castigo chi bèle tamala. ²⁴ Pero le'e, ben' nao xneza', ben' zu ciudad Tiatira, le'e ben' binao birue cabè' consejo rudze' nigula na', le'e ben' binezi cabè' di'idza' rnejè', rnejè' di'idza' negachi' quie Satanás, na' nè'èdi' rnia' le'e, tuzi ca re'enda' huele, re'enda' inaole xneza'. ²⁵ Huele seguir inaole xneza' dyè'èdi hasta dza cati yeguida'. ²⁶ Na'ra quie ben' rzue birusanla'adyi' xneza', quie ben' rue ca mandado re'enda' huejè' hasta dza gatijè', hua'jè' lato inabè'jè' lao yedyi layu. ²⁷ Cabè' lato bèn Xuzza' nè'èdi' rnabi'a, cana' hua'jè' lato inabè'jè'. Conlè zu xaga' de guiba inabè'jè' lao yedyi layu. Chi tilalè ja benè' lèjè', udyiagui' yaca ben' nao xneza' lèjè' užuzuyaquè' lèjè' como si fuera nacajè' yeso' yu. ²⁸ Hua'jè' lato sulèjè' nè'èdi', ben' naca ca bèlo quie bala. ²⁹ Ulezènaga dyè'èdi cabè' na Bichi Be quie Diuzi rëbinè' yaca ben' nao xneza'.” —Cana' una Jesús dza na'.

3

Di'idza' niga use'ela' Juan lao ciudad Sardis

¹ Na'ra una Jesús gudyinè' nè'èdi':

—Na'ra bzu di'idza' niga lè'è guichi ise'elo'n lao ben' rguixogue' xti'idza' Diuzi, ben' zu ciudad Sardis. Na' yèbo'jè: “Cani rna ben' yu'u Bichi Be quie Diuzi naca ca gadyi bichi be, ben' zè gadyi bèlo: Nezda' yugulu cabè' ruele. Nezda' binaca huen quiele, naca quiele ca quie ben' baguti ba'ala'cazi nezule nebanle. ² Ulehue pensari cabè' raca quiele. Gapale cuidado biusanla'adyi'le ca tu tadao' bicu' rnaole xneza'. Pues ilè'èti'zi bipsanla'adyi'le xneza'. Blè'èda' cabè' naole xneza', binegaolen dya'a cabè' re'enda'. ³ Na'ra bigala'adyi'le cabè' bè quiele quie xti'idza' Diuzi dza na'. Reya'ala' inaole dyè'èdi hue quiele quie xti'idza' Diuzi tatula. Reya'ala' utza'le pensari quiele, como dan' chi bihue quiele cabè' rnia' le'e, na'ra guida' binezile bi hora idechugulia' quiele. Cabè' guida ben' uban, binezile bi hora guidè', cana' guida'. ⁴ Pero zu bala ben' zu ladole ciudad Sardis, ben' binaca žabajè' besu, ta inaro, tuzi xneza' rnaojè'. Na'ra hua'jè' la'ari' bezèri ta gacojè', huazulia' lèjè' tuze, como dan' cana' zaca'jè' gaca quiejè'. ⁵ Nu yaca ben' rzue biusanla'adyi' xneza', hua'jè' la'ari' bezèri ta gacojè', biusula' laojè' zu lè'è guichi naca libro ga naca lista bi lao ben' gata' yela' neban quie tuzioli. Huèpa' Xuzza' len yaca ángel quienè': “Ben' ni nacajè' ben' quia'.” ⁶ Ulezènaga dyè'èdi cabè' na Bichi Be quie Diuzi rëbinè' yaca ben' nao xneza'.” —Cana' una Jesús dza na'.

Di'idza' niga use'ela' Juan lao ciudad Filadelfia

⁷ Na'ra una Jesús gudyinè' nè'èdi':

—Na'ra bzu di'idza' niga lè'è guichi ise'elo'n lao ben' rguixogue' xti'idza' Diuzi, ben' zu ciudad Filadelfia. Na' yèbo'jè: “Cani rna ben' naca la'ya, ben' rnè tali, ben' rnahè' lao ciudad quie rey David, ben' rsalo puerta nunu saque' usio len, ben' rsio puerta nunu saque' isalo len: ⁸ Nezda' yugulu cabè' ruele. Para le'e apsaloga' puerta quie guibá, nunu saque' usio len. Cana' bia' quiele como dan' rnaole xneza', rue quiele quie xti'idza', birusebi'le nè'èdi'. ⁹ Cani hua' quiele: Ulaohua' yaca ben' nao xneza Satanás, ben' huizi' yè', ben' na nacajè' ben' Israel, pero binaojè' xneza'. Hua' mandado quitzujè' žibijè' laole ta inezijè' nedyè'èda' le'e. ¹⁰ Lèscan', como dan' rue quiele quie xti'idza', rzuele bipsanla'adyi'le xneza', quie lena' ucuaa ucui'oga' le'e dza zaza'ra cati gaca tazèdi gula lao dužete yedyi layu. Na' gaca tazèdi gula lao yedyi layu ta ulu'en quie yaca ben' nita' na' cabè' ben' mala nacajè'. ¹¹ Laguidatia'. Quie lena' biusanla'adyi'le cabè' babèle naole xneza' cuenda bigaca quiele bigata' premio quiele guibá. ¹² Nu yaca ben' hue gan lao tamala, hua'jè' fuerza valor cuenda gaca quiejè' ca quie tu pilare zu lu'u yu'u quie Xuzza'. Na' huega'njè' lu'u yu'u na' tuzioli. Uzua' lè'è laxta'ojè' laohua', len lao Xuzza', len lao ciudad quienè', ciudad Jerusalén

cubi yeyëzi guibá yedyinnan lao yedyi layu. ¹³ Ulezënaga dyë'ëdi cabë' na Bichi Be quie Diuzi rëbinë' yaca ben' nao xneza'." —Cana' una Jesús dza na'.

Dí'ídza' niga use'ela' Juan lao ciudad Laodicea

¹⁴ Na'ra una Jesús gudyinë' në'ëdi':

—Bzu dí'ídza' niga lë'ë guichi ise'elo'n lao ben' rguixogue' xti'ídza' Diuzi, ben' zu ciudad Laodicea. Na' yëbo'jè': "Cani rna ben' rna puro tali, ben' naca testigo dya'a, ben' birzi' yè', ben' zulë Diuzi tuze cati uzulao Diuzi bzaloguë' yugulu ta de: ¹⁵ Nezda' yugulu ca ruele. Nezda' nica naole xneza' du guicho du la'adyi'le, nica rusebi'le në'ëdi'. Chi bire'enle inaole xneza' du guicho du la'adyi'le, mejorla usebi'le në'ëdi'. ¹⁶ Pero como binaole xneza' du guicho du la'adyi'le, lena' bizua' gusto cabë' ruele. ¹⁷ Na'ra nale nacale ben' uña'a. Nale raca huen quiele. Nale lega raxe Diuzi ca ruele. Nale gabi rdzioguele. Pero nica nezile ca tamala raca quiele. Nica nezile araca quiele ca quie ben' yëchi', ca quie ben' laochula, ca quie ben' rda zan guidi. ¹⁸ Quie lena' guna' le'e tu consejo. Reya'ala' inabale në'ëdi' chi biguti'a quiele ta naca puro oro cuenda gacale dugalo ben' uña'a. Reya'ala' inabale në'ëdi' chi biguti'a quiele la'ari' bezëri ta gacole cuenda ucachi'n cuerpo quiele, na' bigaca yela' stu' quiele. Reya'ala' inabale në'ëdi' chi biguti'a quiele huento ta udze'le yulaole cuenda yelë'ële. ¹⁹ Rdila' ruegadya' yugu ben' nedyë'ëda'. Quie lena' reya'ala' inaole xneza' du guicho du la'adyi'le. Reya'ala' utza'le pensari quiele uzënegale quia'. ²⁰ Naca quia' ca quie tu ben' zë ru'a yu'u, ben' rulidza le'e. Chi nu ben' be quia' inanë' në'ëdi': Uda lu'u yu'u, caora na' tzu'a lu'u yu'u quienë' gaolia'në' tuze, na' gaolënë' në'ëdi' tuze. ²¹ Nu ben' hue gan lao tamala, hua'në' lato cue'lënë' në'ëdi' cuëta' ga ri'a xlatoga'. Cana' hua' quienë' con cabë' bia' në'ëdi', bia' gan lao tamala, ben' Xuza' në'ëdi' lato cui'a cuëta'në' ga re'në' xlatonë'. ²² Ulezënaga dyë'ëdi' cabë' na Bichi Be quie Diuzi rëbinë' yaca ben' nao xneza'." —Cana' una Jesús dza na'.

4

Cabë' rionla'adyi'jè' Diuzi guibá

¹ Na'ra ude beyudyi cana', blë'ëda' neyalo puerta guibá beda' unë ben' unë në'ëdi' tanëro, ben' yu'u rchi' ca yu'u rchi' trompeta. Na'ra unanë' në'ëdi' caniga:

—Uyëpicara niga. Ulu'ena' luë' cabë' ta baza' gaca.

² Cana' bë Bichi Be quie Diuzi blu'enë' në'ëdi' ta baza' gaca. Na'ra blë'ëda' ga cue' tu benë' ta tu guibá. Lëscan' blë'ëda' re' tu benë' laonan. ³ Lëben' na', ben' re' laonan, raca titi'në' ca raca titi' yo jaspe o ca raca titi' yo cornalina. Lëscan' blë'ëda' ru'alao ga re'në', neyëchon byeta' ta raca titi'n ca raca titi' yo esmeralda. ⁴ Lëscan' blë'ëda' ru'alao ga re' ben' na', zura igalobetapa ga cue'ra benë'. Blë'ëda' na' ure' galobetapa ben' gula, ben' rna'bë'ja. Lëben' na' nacojè' la'ari' bezëri, yu'u coron de oro guichojè'. ⁵ Ga re' ben' na', rguino rëpiyesa, ratzo bdyito huiziu'. Na' zaca'lao ga re' ben' na', zu gadyi lámpara ra'ala'n gui'. Lëlámpara na' nacan bichi be quie Diuzi ta naca gadyi. ⁶ Zaca'lao ga re' ben' na', blë'ëda' tu ta naca ca nisadao', pero rna'n ca yaohuan yení' gula.

Lëscan' blë'ëda' lao tao' tu la'a huio, zaca' ga re' ben' na', zu tapa ben' naca forma ca bia guixi'. Na' yu'u yulaojè' duzetejè' xcu'udzujè' len laojè'. ⁷ Na'ra blë'ëda' ben' nëro, naquë' ca tu bëdyi guixi', na' ben' urupe, naquë' ca tu bëdyihuaga, na' ben' uyune, zu laohuë' ca zu lao benë', na' ben' udape, naquë' ca psia bia rzë. ⁸ Blë'ëda' zu tzona huio xilajè' tzala' tzala'jè'. Lëscan' dyia yulaojè' duzete xilajè' rupala'n. Na'ra du dza, du yela, birusanjè' rna'jè' cani: Ben' la'iya naco', ben' la'iya naco', ben' la'iya naco'.

Naco' Diuzi, ben' de yugulute yela' rna'bè' quie, ben' zu tuzioli.

⁹ Na'ra cati rapala'njè' ben' re' lao xlatogue, ben' neban tuzioli, ¹⁰ caora na' uditzu zibi galobetapa ben' gula, ben' rna'bè'ja, lao ben' re' na'. Cana' rionla'adyi'jè' ben' neban tuzioli. Lëscan' blë'ëda' bdyiajè' coron quiejè' lao xlato ben' na'. Na'ra unajè' rëbjè' lëbè' cani:

¹¹ Señor, luë' naco' Diuzi quiendo'.

Luë' zaca'lo' hue ja benë' luë' ben' ze.

Luë' zaca'lo' hue ja benë' luë' ben' bala'ana.

Luë' zaca'lo' hue ja benë' luë' ben' de yela' rna'bè' quie.

Cana' zaca'lo', como dan' luë' bëlo' yugulute ta de.

Lao na'alo' bzalo'yacan.

5

Ni rnan quie tu libro len tu ben' naca ca quie tu beco' zi'ila'

¹ Na'ra blë'ëda' ben' re' xlatogue zënë' tu libro zaquë' na'anë' yebë. Blë'ëda' naca libro forma ca rollo. Yu'u letra laonan len xcu'udzun. Blë'ëda' gadyi cue' nerioranan. ² Lëscan' blë'ëda' tu ángel, ben' de yela' rna'bè' quie. Blë'ëda' unënë' zidzo unanë' cani:

—¿Nu ben' zaca' ta ichipa ta nerio libro na' ta ixèdyinè'n?

³ Na' blè'èda' ganu ben' zu, ben' zaca' ixèdyi libro na', ni ta ulabanè'n bisaque'. Blè'èda' ganu ben' rdzele, ni guibá, ni yedyi layu, ni ga yu'u ben' huati. ⁴ Na'ra uredyitzaya'a nun quie dan' ganu ben' nedzele zaca' ixèdyi libro na', ni ta ulabanè'n bisaque'. ⁵ Na'ra unè tu ben' gula, ben' rnabè', unanè' nè'èdi' caniga:

—Bira cuedyo' como dan' bazaca' Jesús, ben' naca ben' rnabè' quie familia quie Judá, ben' naca zi'isuba rey David, bazaca'nè' ichipanè' gadyi cue' ta nerio libro ixèdyinè'n.

⁶ Lao tao' ga re' ben' na' xlatogue, ga zu tapa ben' naca ca forma bia guixi', len galobetapa ben' gula, ben' rnabè'ja, na' blè'èda' Jesús, ben' naca ca quie beco' zi'ila'. Zènè' na' ba'ala'cazi naquè' hue' nun quie bèti ja benè' lèbè'. Na' blè'èda' dyia gadyi luzu beco' zi'ila'. Lèscan' yu'u gadyi yulaoba'. Na'ra naca gadyi yulaoba' ca gadyi bichi be quie Diuzi ta use'elè' duzete yedyi layu. ⁷ Lèscan' blè'èda' uyo lèben' naca ca quie beco' zi'ila' na', yexi'nè' libro zè ben' re' xlatogue na' zaquè' na'anè' yebè. ⁸ Cati baozi' ben' naca ca quie beco' zi'ila' libro na', na'ra uditzu zibi tapa ben' naca forma ca bia guixi', len galobetapa ja ben' gula, ben' rnabè'ja, lao ben' naca ca quie beco' zi'ila'. Na'ra ja ben' gula, ben' rnabè'ja na', zèjè' tu huio arpa, zèjè' tu huio copa de oro yu'un yalo. Naca yalo na' ca quie di'idza' ru'elè yaca ben' rue quie xti'idza' Diuzi lèbè'. ⁹ Na'ra rulajè' tu tacubi rnajè' caniga:

Luè' na' zaco' si'lo' libro na', ichipo' ta nerionan.

Luè' zaco', como dan' bèti ja benè' luè', ulato ren quio'.

Cana' udižulo' quie dula' xquia quie ja benè' cuenda gacajè' ben' quie Diuzi.

Udižulo' quie dula' xquia quie ben' naca con nutezi ja raza, con nutezi ja di'idza', con bitezi ja yedyi, con bitezi ja naciòn.

¹⁰ Uliolo' lèjè' gacajè' rey, gacajè' pxuzi quie Diuzi quiero.

Na'ra inabè'jè' lao yedyi layu.

¹¹ Caora na' una'a beda' ja ángel zè gula. Neyèchojè' ru'alao xlato ben' na', len ben' naca ca forma bia guixi', len ben' gula, ben' rnabè'ja. Zè million naca ja ángel. ¹² Na' unèjè' zidzo unajè' caniga:

Ben' naca ca quie beco' zi'ila', bèti ja benè' lèbè', zaca'nè' ztionla'adyi' ja benè' lèbè'.

Zaca'nè' yèbijè' lèbè' caniga:

Luè' naco' ben' de yela' rnabè' quie.

Luè' naco' xa'n yugulute ta de.

Luè' naco' ben' rioñe'e yugulute.

Luè' naco' ben' de yela' huaca quie.

Luè' naco' ben' bala'ana, ben' belaotzegue.

Luè' naco' ben' huendo' ben' ze.

¹³ Na'ra beda' unè yugulu ta bè Diuzi, ta inaro, yugulu ta zu guibá, len yugulu ta zu lao yedyi layu, len yugulu ta zu ga yu'u ben' huati, len yugulu ta zu lu'u nisadao', len yugulute ta de. Beda' unèjan unajan caniga:

Ben' re' xlatogue, len ben' naca ca quie beco' zi'ila', nacajè' ben' huendo' ben' ze.

Nacajè' ben' bala'ana, ben' belaotzegue. Nacajè' ben' de yela' rnabè' quie.

Cana' naca quiejè' tuzioli.

¹⁴ Na'ra una tapa ben' naca forma ca bia guixi' caniga:

—Can' gaca.

Lèscan' uditzu zibi galobetapa ben' gula, ben' rnabè'ja, uyonla'adyi'jè' ben' zu tuzioli.

6

Ni rguixogue'n quie xopa ta nerio libro na'

¹ Na'ra blè'èda' cati pchipa ben' naca ca quie beco' zi'ila' ta nerio libro na' tanèro lao gadyi ta nerionan. Beda' rchi' tu ben' nèro, ben' naca quie lao tapa ben' naca forma ca bia guixi'. Beda' rchi'nè' ca rchi' bdyito hueziu'. Na' unanè' nè'èdi':

—jUdacara ilè'èlo'!

² Na'ra cati una'a blè'èda' tu caballo bezèri. Lèscan' blè'èda' dyia tu benè' xcu'udzuba'. Lèben' na' zènè' tu ta chu'un flecha. Na' bè'jè' lebé' tu coron. Lèscan' bè'jè' lèbè' yela' rnabè'. Na' uza'nè' zionè' ta sueranè' hueranè' gan tilalènè' yaca ben' naca enemigo quienè'.

³ Cati pchipa ben' naca ca quie beco' zi'ila' ta nerio libro na' taurupe, caora na' beda' cati unè ben' urupe, ben' naca quie lao tapa ben' naca forma ca bia guixi'. Unanè' nè'èdi':

—jUdacara ilè'èlo'!

⁴ Na'ra cati una'a blè'èda' bro itu caballo zna dyia tu benè' xcu'udzuba'. Na'ra ben' dyia xcu'udzuba' na', napè' yela' rnabè' ta uxenè' dila lao yedyi layu ta guti ja benè' laguedyijè'. Caora na' bè'jè' lèbè' tu espada ze gula.

⁵ Na'ra cati pchipa ben' naca ca quie beco' zi'ila' tauyune nerio libro na', caora na' unë ben' uyune, ben' naca quie lao tapa ben' naca forma ca bia guixi'. Na' unanë' në'ëdi':

—¡Udacara ilë'ëlo'!

Na' cati una'a blë'ëda' itu caballo gaso dyia benë' xcu'udzuba'. Blë'ëda' ben' dyia xcu'udzuba' zënë' tu ziga' de onza. ⁶ Caora na' beda' cati unë ben' uyune, ben' naca quie lao tapa ben' naca forma ca bia guixi', rëbinë' ben' dyia xcu'udzu caballo:

—Lazo quie ben' rue dyin tu dza, cana' saca' tu kilo trigo, cana' saca' tzona kilo cebada. Pero biudyiagui'lo' yaga olivo ta cuio ja benë' aceite. Lëscan' biudyiagui'lo' luba bedzuli' ta cuio ja benë' vino.

⁷ Na'ra cati pchipa ben' naca ca quie beco' zi'ila' taudape ga nerio libro na', caora na' beda' unë ben' udape, ben' naca quie lao tapa ben' naca forma ca bia guixi'. Unënë' unanë' në'ëdi':

—¡Udacara ilë'ëlo'!

⁸ Na'ra cati una'a blë'ëda' bro itu caballo gachi, bia dyia tu benë' xcu'udzuba'. Na' ben' dyia lëba' na' laohuë' Yela' Guti. Lëscan' blë'ëda' xcu'udzunë' zenao itu ben' laohuë' Yero Ba Ga Yu'u Ben' Huati. Bë' Diuzi lëjë' lato ta gutijë' tu naga quie ja ben' nita' lao yedyi layu. Bënë' lato gutijë' lëjë' conlë huedila, conlë ubin, conlë yela' huë', conlë ja bia guixi' mala gula, bia tu lao yedyi layu.

⁹ Na'ra cati pchipa ben' naca ca quie beco' zi'ila' taga'yo' ga nerio libro na', caora na' una'a blë'ëda' zan ru'aba ta zu guibá, blë'ëda' zu ja bichi be quie ja ben' guti nun quie udxogué'jë' xti'idza' Diuzi. Ta bë yaca ben' nita' lao yedyi layu bëtijë' lëjë' nun quie dan' udxogué'jë' xti'idza' Diuzi. ¹⁰ Na'ra beda' unë ja ben' zu zan ru'aba ta zu guibá, beda' rnëjë' zidzo gula rnajë' caniga:

—Señor, ben' la'iya luë'. Luë' uzulo' di'idza' ca unao' huelo'. ¿Bata ichugulilo' huelo' castigo ja ben' nita' lao yedyi layu, ja ben' bëti nëto'?

¹¹ Na'ra bë' Diuzi lëjë' tu huio zabajë' bezëri ta gucojë'. Caora na' una Diuzi rëbinë' lëjë':

—Ulecueza itu tiempo cuenda gacale completo, porque nezu ben' nerdziogue, ben' nuelë le'e tuze, ben' rue ca mandado rue Cristo. Binedyïn dza guti ja benë' lëjë' cabë' bëtijë' le'e.

¹² Na'ra cati pchipa ben' naca ca quie beco' zi'ila' taxopa ga nerio libro na', caora na' guca tu zu' huala gula, na' beyaca ubidza chula ca tu la'ari' gaso gula. Lëscan' beyaca biu' rna'n ca ren. ¹³ Caora na' bguino bélo gusi'jan lao dyilayu. Guca quie bélo cabë' raca quie yaga higo cati rda tu be bedun' fuerte gula, rguino ja higo ya'a quienen rasi'jan layu. ¹⁴ Na'ra bedubi ladza cabë' retubiro guichi, bira ilë'ëron. Lëscan' bzisi ja ya'a, len ga de yu bidyi lu'u nisadao' ga zujan naca xlaton. ¹⁵ Caora na' pcachi'lao ja ben' naca ja rey nita' lao yedyi layu. Pcachi'laorë ja ben' naca ben' belao quiejë', len ja ben' uña'a, len ja ben' naca comandante, len ja ben' de yela' rnabë' quie. La'acazi ben' nada'o, la'acazi ben' libre, pcachi'laojë' zan beló, pcachi'laojë' zan yo yela. ¹⁶ Na'ra unajë' rëbijë' ya'a len yo yela:

—Ulecachi' nëto' cuenda bira ilë'ë ben' re' xlatogue guibá nëto' ta bigaca quiendo' ca castigo huala gula rue ben' naca ca quie beco' zi'ila' nëto'.

¹⁷ Pues abdyïn dza hue Diuzi castigo lao yedyi layu. ¿Ca nuži ben' sue, ben' gacaja ca castigo huenë'?

7

Ni rguixogue'n quie ja ben' Israel, ben' neguichi' sello quie Diuzi

¹ Na'ra ude beyuyi na', blë'ëda' tapa ángel zëjë' tu huiojë' lao dapa squin yedyi layu. Zëjë' ruza'agajë' ta bita lao dapate be rda lao yedyi layu. Cana' bëjë' tacuenda bita be lao yedyi layu, ni lao nisadao', ni ta utan yaca yaga. ² Na'ra lëscan' blë'ëda' za' itu ángel zaca' ni ga rlë ubidza, zënë' tu sello quie Diuzi, ben' zu neban tuzioli. Na'ra léángel na' uredyia'në' zidzo gula blidzanë' tapa ángel. Na' bë' Diuzi tapa ángel yela' rnabë' ta udyiagui'jë' yedyi layu len nisadao'. Na'ra una ángel na' rëbinë' tapa ja ángel na' caniga:

³—Tu raca na' nerdzioguen cuiobë'ro quichiro sello zga ja ben' quie Diuzi, biudyiagui'le yedyi layu, biudyiagui'le nisadao', biudyiagui'le ja yaga.

⁴ Na'ra beda' tu cani naca ja ben' neguichi' sello, ben' naca ja familia quie ben' Israel. Beda' tu gayuhua chopa galo tapa mila nacajë'. ⁵ Chipchopa mila naca ja ben' familia quie Judá, na' chipchopa mila naca ja ben' familia quie Rubén, na' chipchopa mila naca ja ben' familia quie Gad, ⁶ na' chipchopa mila naca ja ben' familia quie Aser, na' chipchopa mila naca ja ben' familia quie Neftalí, na' chipchopa mila naca ja ben' familia quie Manasés, ⁷ na' chipchopa mila naca ja ben' familia quie Simeón, na' chipchopa mila naca ja ben' familia quie Leví, na' chipchopa mila naca ja ben' familia quie Isacar, ⁸ na' chipchopa mila naca ja ben' familia quie Zabulón, na' chipchopa mila naca ja ben' familia quie José, na' chipchopa mila naca ja ben' familia quie Benjamín. Cana' naca lista quie ja ben' neguichi' sello.

Ni rguixogue'n quie ben' zè gula, ben' naco la'ari' bezèri

⁹ Na'ra ude beyudyi na', cati una'a blè'èda' negu'udi' ben' zè gula. Negu'udi' ben' quie yugulute naciòn, len ben' quie yugulute ren, len ben' quie yugulute cue' di'idza', len ben' quie yugulute yedyi. Na'ra blè'èda' neyèchojè' ru'alao gan' re' ben' re' xlatogue, len gan' zè ben' naca ca quie beco' zi'ila'. Na'ra ben' neyècho na', nacajè' ben' zè gula. Nitu ganu sue ulaba lèjè'. Nacojè' yugulutejè' la'ari' bezèri, zèjè' la'aga' zin. ¹⁰ Lèscan' yugulujè' urediyi'jè' zidzo gula unajè' caniga:

Diuzi quiero, ben' re' xlatogue, len ben' naca ca quie beco' zi'ila', lèjè' bapselajè' nètò.

¹¹ Na'ra yugute ja ángel na' neyèchojè' ru'alao gan' re' ben' re' xlatogue, len gan' re' ben' gula, ben' rnabè'ja, len gan' zè yaca ben' naca forma ca bia guixi'. Caora na' byècho ja ángel, bda' ru'ajè' layu gan' re' ben' re' xlatogue, uyonla'adyi'jè' lèbè'. ¹² Na' unajè' cani:

Cani nacan quie Diuzi quiero.

Naca Diuzi ben' tzionla'adyi'ro, ben' huero ben' ze.

Naca Diuzi ben' rioñe'e yugulute, ben' yèbiro diuxcalelo'.

Naca Diuzi ben' bala'ana, ben' de yela' rnabè' quie, ben' de yela' huaca quie.

Cana' nacan quie Diuzi quiero tuzioli. Amén.

¹³ Na'ra tu ben' gula, ben' rnabè' na', unabanè' nèt'èdi' caniga:

—¿Nuzi ja ben' niga, ben' naco ja la'ari' bezèri? ¿Gaži uza'jè'?

¹⁴ Na'ra gucha'nè' caniga:

—Señor, luè' nezo'.

Na' unè' rëbinè' nèt'èdi':

—Lèja ben' niga uza'jè' ga guca zèdi gula lao yedyi layu. Abeyacajè' ben' laxta'o yèri lao Diuzi nun quie dan' unaojè' xneza ben' naca ca quie beco' zi'ila'. Na' nacojè' la'ari' bezèri ta uyèrin conlè ren quienè'. ¹⁵ Quie lena' nita'jè' zaquè'lao ga re' Diuzi ga naca xlatonè'. Rionla'adyi'jè' Diuzi du dza, du yela, ga zu idao' quienè' guibá. Na'ra rapa Diuzi lèjè' ta gabi gaca quiejè'. ¹⁶ Bira yedzagalaojè', bira idzioguejè' ta gaojè' ta yo'ojè'. Bira udyiagu' oba lèjè', nicara gaquejè' zla quien. ¹⁷ Cana' gaca quiejè' como dan' bazè ben' naca ca quie beco' zi'ila' zaca'lao ga re' Diuzi xlatoguè'. Rapa ben' naca ca quie beco' zi'ila' lèjè' ca quie ben' rapa beco' zi'ila' quie. Rehua'anè' lèjè' ga zu nisa ta ri'ojè' ta ru'en lèjè' yela' neban quiejè' tuzioli. Bira cuedyijè', porque barapa Diuzi lèjè'.

8*Ruchipa ben' naca ca quie beco' zi'ila' tagadyi ta nerio libro na'*

¹ Na'ra cati pchipa ben' naca ca quie beco' zi'ila' na' tagadyi ta nerio libro na', caora na' ure' chizi guibá ca du gatzò hora. ² Caora na' blè'èda' igadyi ángel nita'jè' zaquè'lao ga zu Diuzi. Na'ra bè' Diuzi lèjè' gadyi trompeta. ³ Beyudyi ude na', blè'èda' itu ángel zènè' tu ye'n yalo de oro. Na' zunè' zaquè'lao lao ru'aba bè'jè' lèbè' yalo zè gula ta bdyianè' lao ru'aba ca gun quie Diuzi ta tzèpi dzen quien ga zu Diuzi tuze conlè di'idza' ru'elè ben' rue quie xti'idza' Diuzi lèbè'. Na' lèru'aba na' nacan de oro, zun zaca'lao ga re' Diuzi. ⁴ Na'ra lao na'a ángel na' uyèpi dzen quie ye'n yalo tuze len di'idza' ru'elè ben' rue quie xti'idza' Diuzi lèbè' ta bdyinnan ga re' Diuzi. ⁵ Caora na' uzi' ángel ye'n yalo na' pzedza'nè'n bao' ure'n gui' ta dyia lao ru'aba uzi'nè'n uru'unnè'n lao yedyi layu. Cana' guca uyèpi yesa, gotzo bdyito hueziu', guca uzu' lao yedyi layu.

Rucuedyi ja ángel ja trompeta quiejè'

⁶ Na'ra lao gadyi ja ángel, ben' zè ja gadyi trompeta na', ulisajè' trompeta quiejè' ta ucuedyijè'n.

⁷ Na'ra cati pcuedyi ángel nèro trompeta quienè', caora na' bguino yo hueziu' len gui' dupen ta naca ca ren lao yedyi layu. Dyin quie len, uyei tu cue' quie lao tzona cue' yedyi layu, lèscan' uyei tu cue' quie lao tzona cue' yaga, lèscan' uyei tu cue' quie lao tzona cue' guixi' ya'a.

⁸ Na'ra cati pcuedyi ángel urupe trompeta quienè', caora na' bguino tu ta naca ca tu ya'a ra'ala'n gui' lu'u nisadao'. Guca tu cue' quie lao tzona cue' nisadao' ca ren. ⁹ Lèscan' guti tu cue' quie lao tzona cue' bia yu'u lu'u nisadao', lèscan' udyiagu' tu cue' quie lao tzona cue' ja barco rda lao nisadao'.

¹⁰ Na'ra cati pcuedyi ángel uyene trompeta quienè', caora na' bguino tu bélo ze gula lao yedyi layu ra'ala'n gui'. Dyin quie len udyiagu' tu cue' quie lao tzona cue' yao, lèscan' udyiagu' tu cue' quie lao tzona cue' ga rlè nisa. ¹¹ Lèbélo na' lao bélo sla' gula. Dyin quie len beyaca tu cue' quie lao tzona cue' nisa sla' gula. Aguti ben' zè nun quie dan' hue'ejè' nisa na', como dan' sla' gula beyacan.

¹² Na'ra cati pcuedyi ángel udape trompeta quienè', caora na' udyiagu' tu cue' quie lao tzona cue' ubidza, lèscan' udyiagu' tu cue' quie lao tzona cue' biu', lèscan' udyiagu' tu cue'

quie lao tzona cue' bélo. Quie lena' bega'n tu cue' quie lao tzona cue'jan lato chula. Na'ra bipseni' xni' ubidza tu cue' quie lao tzona cue' quie dza. Lëscan' bipseni' xni' biu', bipseni' xni' bélo. Tu cue' quie lao tzona cue' quie yela bipseni'yacan.

¹³ Caora na' una'a beda' cati unë tu ángel rzënë' ladza gatzo guibá. Rnënë' zidzo rnanë' caniga:

—¡Bayëchi' gula nacan quie ja ben' nita' lao yedyi layu cati ucuedyi itzona ángel trompeta quiejë'!

9

¹ Na'ra cati pcuedyi ángel ga'yo' trompeta quienë', blë'ëda' tu ta naca ca bélo uyëzin guibá bdyinnan lao yedyi layu beyacan ángel. Na' bë' Diuzi ángel na' tu zi'guiba quie tu poso zitu' gula. ² Na'ra psalo ángel na' ru'a poso zitu' gula. Caora na' lu'u poso na' bro dzen cabë' dzen rero ru'a horno. Nun quie rero dzen na', bechula xni' ubidza, lëscan' bechula ladza. ³ Na'ra lu'u dzen na' bro ja bëchi'zu rdajaba' rzëjaba' lao yedyi layu. Bë' Diuzi lato quiejaba' ta qui'idyijaba' ja benë' cabë' rgui'idyijaba' xuni'. ⁴ Pero bibë' Diuzi lëjaba' lato ta udyiagu'ijaba' guixi' ni ta udyiagu'ijaba' ta raza ja benë', ni ta udyiagu'ijaba' ja yaga. Pero bë Diuzi lëjaba' mandado ta qui'idyijaba' ja ben' bida' zga sello quie Diuzi. ⁵ Bibë' Diuzi lëjaba' lato ta gutijaba' ja benë', pero solamente ta qui'idyijaba' lëjë' ilajë' lao ga'yo' biu'. Na'ra cabë' rla nu benë' cati rgui'idyijaba' xuni' lëjë', cana' ulajë'. ⁶ Na'ra lëdza cati gaca quie ja ben' nita' lao yedyi layu cana', lega gue'enjë' gatijë', pero bigatijë'. Ba'ala'cazi gue'enjë' iyudyi yedu quiejë', bisi' yela' guti quiejë' lëjë'.

⁷ Na'ra lëja bëchi'zu na', nacajaba' forma ca caballo, bia listo ta rio lao dila. Zun guichojaba' tu ta naca ca coron de oro. Pero zu laojaba' ca zu lao benë'. ⁸ Naca guitza' guichojaba' ca guitza' guicho nigula. Lëscan' dyia lejijaba' ca dyia lei león. ⁹ Na'ra lëbëchi'zu na', yu'u ru'achu'uba' tu ta naca de guiba. Lëscan' xilaba' ruen ru'be cabë' ru'be rue zë carreta ta rguba ja caballo cati yu'ujaba' be tziobjaba' lao dila. ¹⁰ Lëscan' zu zbamba' ca zu zbam xuni'. Zurën yëchi' ca zu zbam xuni'. Napa zbanjaba' fuerza ta qui'idyijaba' ja ben' nita' lao yedyi layu lao ga'yo' biu'. ¹¹ Na'ra zu tu ben' naca xa'n bëchi'zu. Lëben' na' naquë' ángel, naquë' ben' r nabë' lu'u poso zitu' gula. Na' di'idza' hebreo lao ángel na' Abadón. Lëscan' di'idza' griego lao ángel na' Apolión, ta inaro xti'idza'ro, ben' rudiyagui' ja benë'.

¹² Cana' guca aode tu ta naca bayëchi' gula, pero neracara falta gaca ichopan.

¹³ Quie lena' cati pcuedyi ángel xopa trompeta quienë', caora na' beda' bro tu rchi' benë' lao dapa squin ru'aba de oro ta zu zaquë'lao ga zu Diuzi guibá. ¹⁴ Lëscan' beda' rchi' ben' na' rëbinë' ángel xopa, ben' zë trompeta quie unë' caniga:

—Ulexëdyi dapa ángel, ben' nerio ru'a yao ze Eufrates.

¹⁵ Cana' pxëdyijë' dapa ángel na' ta gutijë' tu cue' quie lao tzona cue' ja benë' nita' lao yedyi layu. Dyin bë Diuzi bega'një' neriojë' hasta idyin hora, hasta idyin dza, hasta idyin biu', hasta idyin iza ixëdyijë' ja ángel na'. ¹⁶ Na'ra beda' anaca soldado quiejë' chopa gayuhua million, ben' dyia ja caballo.

¹⁷ Na'ra guca quia' ca quie ben' uxusa, blë'ëda' caballo na'. Lëscan' blë'ëda' ben' dyia lëba' yu'u guiba ru'achu'ujë' ta naca culuri zna, len culuri azul, len culuri gachi. Na'ra naca guicho caballo na' ca guicho león. Lëscan' ru'a caballo na' reron gui' len dzen len ta ra'ala' gui' laona azufre. ¹⁸ Na'ra guti tu cue' lao tzona cue' ja benë' nita' lao yedyi layu. Dyin quie tzona cue' castigo ta bro ru'a caballo bdyiagu'ijaba' lëjë', ta inaro, bdyiagu'ijaba' gui' lëjë', lëscan' bdyiagu'ijaba' dzen lëjë', tu ta ra'ala' gui' laona azufre lëjë'. ¹⁹ Na'ra lu'u ru'a ja caballo yu'u fuerza quiejaba' ta udyiagu'ijaba' ja benë'. Lëscan' de fuerza quie zbanjaba'. Naca zbanjaba' ca bëla zë. Na'ra conlë bëla naca zban ja caballo bëjaba' hue' ja benë'.

²⁰ Na'ra ja ben' bega'n, ben' biguti nun quie ja castigo, biptza'jë' pensari quiejë' ta usanjë' cabë' ruejë'. Lëscan' bipsanjë' cabë' ruejë' rionla'adyijë' taxi'ihui', bipsanjë' cabë' ruejë' rionla'adyijë' ja ídolo ta naca de oro, len ja ídolo ta naca de plata, len ja ídolo ta naca de bronce, len ja ídolo ta naca de yo, len ja ídolo ta naca de yaga. Pues yaca ídolo na' birlë'ën, birena, birza'n. ²¹ Na'ra lëscan' biptza'jë' pensari quiejë' ta usanjë' bira gutijë' benë', bira huejë' brujo, bira gasilëjë' ja nigula binaca zgulajë', bira cuanjë' quie benë'.

10

Ni ru'en di'idza' quie tu ángel, ben' zë tu guichi naca rollo

¹ Na'ra blë'ëda' itu ángel, ben' lega de yela' huaca quie. Uyëzinë' guibá dubinë' beo bdyinnë' lao yedyi layu. Na'ra guichonë' zunan tu byeta'. Lëscan' laohuë' rna'n raca titi' ca rna' ubidza. Naca sunnë' ca plare ta rna' ca gui'. ² Lëscan' blë'ëda' zënë' tu guichi naca rollo nasalonë'n. Blë'ëda' ni'anë' yebë blionë' lao nisadao'. Lëscan' itzala' ni'anë' yega' blionë' lao yu bidyi. ³ Na'ra urediyia' ángel na' unënë' zidzo gula cabë' rue león cati rbediyia'ba'.

Cati urediyia' ángel na', caora na' uné gadyi hueziu'. Na'ra beda' cabé' unajan. ⁴ Cati ude beyudyi beda' cabé' una gadyi hueziu' na', na'ra gue'enda' uzua'n lè'è guichi ca unajan. Pero caora na' beda' tu rchi' ben' uné nê'èdi' guibá. Na' uné' rëbinè' nê'èdi' cani:

—Pachi' cabé' una gadyi hueziu' na' luè'. Biuzulo'n lè'è guichi.

⁵ Na'ra lé'ángel na', ben' blè'èda' nulio lao nisadao' len yu bidyi, caora na' ulisanè' ladza na'anè' yebè ⁶ bguntenè' ben' zu tuzioli, ben' bzalo guibá, len dylayuy, len nisadao', len yugulute ta de. Na'ra uné' caniga:

—Abdyin hora na'a. Bira de tiempo. ⁷ Na'ra bè' idyin tiempo sulao ángel gadyi ta ucuedyinè' trompeta quienè', caora na' su di'idza' gaca cabé' di'idza' belao uduxogue' Diuzi ja ben' quienè', ben' uduxogue' xti'idzè' dza na'.

⁸ Na'ra tatula beda' uné' ángel, ben' uné' nê'èdi' guibá. Na' uné' rëbinè' nê'èdi' cani:

—Uyo yexi' guichi naca rollo nayalo ta zè' ángel na', ben' nulio lao nisadao' len yu bidyi.

⁹ Na'ra uya' gan' zè' ángel na', unaba'nè' ta gunnè'n nê'èdi'. Na'ra uné' rëbinè' nê'èdi' caniga:

—Uzi'n, udaona. Bè' gaolo'n hueyacan zixi gula ca bdyin'dao' lu'u ru'alo'. Pero bè' baodëbo'n baoyëzin lu'u lè'èlo', na'ra hueyacan sla' gula.

¹⁰ Na'ra ben' ángel na' nê'èdi' guichi naca rollo. Bè' udaohua'n beyacan zixi gula ca bdyin'dao' lu'u ru'a. Pero bè' baodëba'n baoyëzin lu'u lè'èna', na'ra beyacan sla' gula.

¹¹ Na'ra unajè' nê'èdi' caniga:

—Tatula reya'ala' quixogue'lo' benè' cabé' una Diuzi cabé' ta baza' gaca quie yedyi zè, len quie nación zè, len quie zè cue' di'idza', len quie zè cue' ben' naca rey.

11

Ni ru'en di'idza' quie chopa ben' naca testigo quie Diuzi

¹ Na'ra benjè' nê'èdi' tu huenixi' ta naca ca yaga ta rzèjè' rurixijè'. Na'ra beda' tu rchi' benè' unanè' nê'èdi' caniga:

—Uyo yexi' bala zicho naca idao' quia' len ru'aba quien. Lëscan' ulabo' bala naca ben' rionla'adyi' nê'èdi' na'. ² Pero biurixo' lali'a quie idao' nun quie dan' na' rda ja ben' yedyi tula, ben' binaca ja ben' Israel. Pues lëben' na' huadyinjè' tajè' bigapajè' bala'ana ciudad Jerusalén, ciudad naca la'iya. Cana' huejè' lao chopa galo chopa biu'. ³ Na'ra nê'èdi' ise'ela' chopa ben' naca testigo quia', nacojè' la'ari' ca la'ari' ta naco ja ben' guti familia quie. Huaguxogue'jè' benè' tanun quia' nê'èdi' lao tu mila chopa gayuhua tzona galo dza. —Cana' unanè' nê'èdi'.

⁴ Na'ra lëchopa ja ben' naca testigo quie Diuzi, nacayaquè' ca quie chopa yaga olivo. Lëscan' nacajè' ca quie chopa candelero ta zu lao Diuzi, ben' naca xan' yedyi layu. ⁵ Na'ra chi nu ben' re'en udyiaguí' ben' naca testigo quie Diuzi, huario gui' lu'u ru'ajè' ta uzejè' ben' re'en udyiaguí' lèjè'. Cana' gati nutezi ben' re'en udyiaguí' lèjè'. ⁶ Na'ra bade yela' rnabè' quiejè' ta huejè' mandado bihuen nisayo lao yedyi layu dza rdajè' rguixogue'jè' ja benè' tanun quie Diuzi. Lëscan' bade yela' rnabè' quiejè' yeyuejè' nisa iyacan zna ca ren. Lëscan' bade yela' rnabè' quiejè' ta uxejè' ta lega yedzagalao ja ben' nita' lao yedyi layu, lëscan' ta uxejè' zè cue' ta udyiaguí' benè'. Con bala cue' ta re'enjè' gata' ta udyiaguí' ja benè', cana' huejè' mandado gaca. ⁷ Pero bè' iyudyi huejè' ca mandado re'en Diuzi huejè', na'ra tilalè tu bia guixi' mala gula lèjè', bia bro lu'u pozo zitu' gula. Na'ra hueba' lèjè' gan, gutiba' lèjè', ⁸ uca'mba' cuerpo quiejè' lëciudad na' ga bda'jè' Señor quiero lè'è yaga cruzo. Biucachi'yaquè' leyaquè', pero yega'n cuerpo quieyaquè' la callezi. Quie lëciudad na' huazaque' inaro nacan ca quie ciudad Sodoma, ciudad mala gula. Lëscan' nacan ca quie nación Egipto. ⁹ Ben' za' zè yedyi tula, ben' nacaja ren tula, ben' racaja zè cue' di'idza' tula, ben' za' zè nación tula, hualè'èjè' cuerpo quiejè' lao tzona dza yugatzo, pero bihuejè' lato ucachi'jè' cuerpo quiejè'. ¹⁰ Na'ra lega yedaohue ja ben' nita' lao yedyi layu sujè' gusto dan' guti ja ben' na'. Tantozi sujè' gusto, ise'ela'jè' regalo quie quie laguedyijè'. Lega raxejè' aguti ja ben' na', como dan' lega rdza'jè' ben' rguixogue' tanun quie Diuzi. ¹¹ Na'ra ude guca lao tzona dza yugatzo, useban Diuzi lèjè' yeyasajè' tatula. Caora na' yugulu ben' blè'è cabé' guca quiejè', lega bdzebijè'. ¹² Caora na' chopa ben' naca testigo, bejè' rchi' tu ben' uné' zidzo guibá uné' rëbinè' lèjè' caniga:

—Uleyèpi niga.

Caora na' beyèpijè' lao beo zeyojè' guibá blè'è ja ben' naca enemigo quiejè' lèjè'. ¹³ Ude na', lagucate tu uzu' fuerte gula, byala tu cue' yu'u quie lao chi cue' yu'u quie ja ben' ciudad na'. Lëscan' nun quie uzu' guti gadyi milajè'. Caora na', ben' bega'nja bigutija, lega bdzebijè' unajè' naca Diuzi ben' de yela' huaca quie.

¹⁴ Cana' ude taorupe ta naca bayèchi' gula, pero taoyune laza'te gaca ta naca bayèchi' gula.

Pcuedyi ángel gadyi trompeta quienè'

¹⁵ Na'ra pcedyí ángel gadyi trompeta quiené'. Caora na' uné ja ben' zulé Diuzi guibá zidzo unajé' caní:

Diuzi len 'zi'iné' Cristo, ben' use'elè' lao yedyi layu, abdyin dza inabè'jè' lao yugulu ben' rnabè', ben' nita' lao yedyi layu.

Biyeyudyi biyedu inabè'jè'.

¹⁶ Na'ra légalobetapa ja ben' gula, ben' rnabè'ja re'ja lao xlatojé' zaquè' lao ga re' Diuzi guibá, lèjè' gutajé' guzuru'ala layu uyonla'adyi'jè' Diuzi. ¹⁷ Cani unajé' rëbijé' Diuzi:

Rnando' luè' diuxcaleo', Señor.

Luè' naco' Diuzi, ben' de yugulute yela' rnabè' quie tuzioli.

Zulo' nebanlo' tuzioli.

Abdyin hora huelo' mandado ta hue ja benè' ca re'enlo' huejé'.

Abdyin hora inabè'lo' lao yedyi layu.

¹⁸ Abdza' ja ben' nita' lao yedyi layu luè'.

Pero na'ra abdyin dza huelo'jè' castigo, abdyin dza ichugulilo' quie ja ben' huati.

Abdyin dza quizulo' ben' udixogue' di'idza' quio', ben' naca ben' la'iya quio', ben' udapa luè' bala'ana.

Abdyin dza quizulo'jè' yugulujé'.

Abdyin dza udyiagui'lo' ben' rudyiagui' yedyi layu.

¹⁹ Na'ra uyaló ga rionla'adyi'jè' Diuzi guibá. Caora na' blè'èjè' tu caja ga yu'u di'idza' bega'ntza'olè Diuzi ja ben' unita' tiempote. Cati uyalon, na'ra uyèpi yesa, gotzo bdyito hueziu', lèscan' guca uzu', bguino yo hueziu' duzetén.

12

Ni rnèn quie tu nigula len tu bia guixi' snia gula nacaba' ca bèla

¹ Na'ra guca tu seña guibá. Bla' tu nigula nedubinè' xni' ubidza. Naconè'n nacan ca quie zabanè'. Lèscan' xni'ané' zu biu'. Lèscan' zu tu coron guichonè' ga dyia chipchopa bélo.

² Nu'ané' bdao' rbedyi'ya'né' bedzagalaonè' len bdao'. Ruen zhue'né' ta su bdao' quiené'.

³ Na'ra guca itu seña guibá. Bla' tu bia guixi' snia gula nacaba' ca bèla, nacaba' culuri zna. Naca gadyi guichoba'. Dyia chi luzuba'. Lèscan' zu tu huio coron lao gadyi guichoba'.

⁴ Conlè zhamba' pquinoba' tu cue' quie lao tzona cue' bélo lao yedyi layu. Caora na' uzèba' lao nigula, ben' su bdao' quie, cuenda gaoba' bdao' quiené' bè' subi'. ⁵ Caora na' uzu' tu bdao' byu quie nigula na'. Lèbdao' na', cati banacabi' ben' huaca, huanabè'né' lao yedyi layu ta yu'u ni'a xnezi. Na'ra labezi'te Diuzi bdao' na', zeyu'ané'bi' yesanné'bi' ga re'né' lao xlatoguè'. ⁶ Lèscan' bžuno nigula na', zionè' lao lato ga bidyia yu'u. Lèlato na' nacan ga pceua Diuzi ta gao nigula na' lao tu mila chopa gayuhua tzona galo dza.

⁷ Cati ude beyudyi na', guca tu dila guibá. Na'ra ángel Miguel len ja ángel quiené', udilalèjè' lèbia guixi' snia gula len ángel quieba'. ⁸ Pero biu'zaque'ba' huelèba' ángel quieba' gan. Cana' abeyudyi tiempo quieba' len ángel quieba'. Bira saque' sulèba' ángel quieba' guibá. ⁹ Cana' guca uliojè' lèba' guibá. Na'ra lèbia guixi' snia gula laoba' xan' taxi'ihui'. Lèscan' laoba' Satanás. Lèba' rzi'ba' yè' ja ben' nita' lao yedyi layu. Cana' guca uru'unjè'ba' lao yedyi layu len ja ángel quieba'.

¹⁰ Na'ra beda' tu rchi' benè' unènè' zidzo guibá unané' caní:

—Babdyin dza ute usela Diuzi yaca ben' quiené'. Barnabé' Diuzi quiero len ben' naca Cristo quiené' lao yedyi layu. Baoru'unjè' ben' udao xquia yaca ben' nao xneza Jesús. Du dza, du yela, udao Satanás lèjè' xquia lao Diuzi. ¹¹ Bèjè' gan lao taxi'ibi' nun quie guti Cristo, ben' naca ca quie beco' zi'ila', bia naca gun quie Diuzi. Bèjè' gan nun quie bibdzebijè' udixogue'jè' xti'idza' Diuzi. Bibdzebijè' chi guti ja benè' lèjè', na' uzujé' dispuesto gatijé'. ¹² Pues yedaohuele le'e, ben' zu guibá. Pero bayèchi' gula nacan quiele le'e, ben' nita' lao yedyi layu, la'acazi zule yu bidyi, la'acazi zule lao nisadao'. Naca bayèchi' gula quiele como dan' baoyèzi xan' taxi'ibi' yedyi layu ga nita'le. Lega bdza'né' nun quie dan' nezinè' baruen bago dza yeyudyi yedu quiené'. —Cana' una ben' na'.

¹³ Na'ra cati blè'è lèbia guixi' snia gula cabè' bèjè' quieba', uliojè'ba' guibá, pquinojè'ba' lao yedyi layu, caora na' uza'ba' zioba' unaoba' nigula, ben' baozu bdao' quie. ¹⁴ Pero bè' Diuzi nigula na' chopá xila yela ca xila psia cuenda sènè' ladza tzonè' lao lato ga bidyia yu'u, ga nacan zitu'. Lènigula na' bè'jè' ta udaonè' lao tzona iza yugatzo. ¹⁵ Na'ra bro nisa lu'u ru'a bia guixi' snia gula na', udixoba' tu yao ze cuenda idyinnan ga zu nigula gatinè' lu'u nisa. ¹⁶ Pero gualè layu nigula na', uxa'ana' ru'an hue'enan nisa bro ru'a bia guixi' snia gula. ¹⁷ Quie lena' lega bdza'ba' nigula na' zioba' tzetilalèba' yaca zi'isuba nigula na', yaca ben' ruzu rue cabè' mandado rue Diuzi, yaca ben' rnao con cabè' rna xti'idza' Jesucristo du guicho du la'adyi'.

13

Ni ru'en di'idza' quie chopa bia guixi' bayatza gula

¹ Na'ra uzua' ru'a nisadao' ga naca layu bidyi, caora na' blé'eda' bro itu bia guixi' bayatza gula lu'u nisadao'. Blé'eda' naca gadyi guichoba'. Lëscan' blé'eda' dyia chi luzuba'. Na' tu huio lao luzuba' zun tu huio coron. Lëscan' lë'é gadyi guichojaba' zu laojaba' quie quie ca laojaba'. Pero ca naca laojaba' nacan ta utasi unioyacan Diuzi. ² Na'ra lëbia guixi' bayatza gula, bia blé'eda', nacaba' forma ca bëdyi. Naca ni'aba' ca ni'a oso. Zu ru'aba' ca zu ru'a león. Caora na' lëbia guixi' snia gula nacaba' ca bëla, bë'ba' xlato bia guixi' bayatza gula ga cue'ba'. Lëscan' bë'ba' lëba' yela' rnabé' ta inabé'ba' lao yedyi layu. ³ Na'ra tu guichoba' zun tu hue' ta gutin lëba', pero beyaca hue' na'. Quie lena' lega beban ja ben' nita' lao yedyi layu unaojé'ba'. ⁴ Na'ra uyona'adyi'jé' bia guixi' snia gula, como dan' bë'ba' bia guixi' bayatza gula yela' rnabé' quieba'. Lëscan' uyona'adyi'jé' bia guixi' bayatza gula. Na' unajé' caniga: —Ganura zu naca ca lëba'. Nunu sue tilalé lëba'.

⁵ Na'ra bia guixi' snia gula bë'ba' bia guixi' bayatza gula lato ta hueba' ze cuimba' ta utasi unioba' Diuzi. Lëscan' bë'ba' lëba' lato ta inabé'ba' ca tu re'emba' inabé'ba' chopa galo chopa biu'. ⁶ Na'ra tamalatzague bë'ba' bia guixi' bayatza gula unajé' contra Diuzi. Lega ptasi bnioba' lëbè'. Lëscan' ptasi bnioba' ga zu Diuzi guibá. Lëscan' ptasi bnioba' ja ben' zulënë' na'. ⁷ Caora na' lëbia guixi' snia gula bë'ba' bia guixi' bayatza gula lato ta tilalëba' ja ben' quie Diuzi hasta hueba' lëjé' gan. ⁸ Na'ra yaca ben' nita' lao yedyi layu, yaca ben' bizu laojé' lë'é lista ta bë' Diuzi tu binecuéchiné' yedyi layu, uyona'adyi'jé' bia guixi' bayatza gula. Lëlista napa ben' naca ca quie beco' zi'ila', ben' guti dza na'. Rguixogue'n quie ben' de yela' naban quie tuzioli.

⁹ Chi zu ja ben' ruzénaga, reya'ala' uzénagajé' dyé'édi ca rnia'. ¹⁰ Chi nu ben' hue yaca ben' quie Diuzi preso, lëscan' huadyin dza gacaréjé' preso. Chi nu ben' guti ben' quie Diuzi conlé espada, lëscan' conlé espada gatiréjé'. Quie lena', reya'ala' sue ben' quie Diuzi sudyi'iléjé' Diuzi dyé'édi.

¹¹ Na'ra ude na', blé'eda' itu bia guixi' bayatza gula ta broba' lu'u yu. Dyia chopa luzuba' ca luzu beco' zi'ila', pero unëba' zidzo gula. ¹² Na'ra ca de yela' rnabé' quie bia guixi' bayatza gula, bia blé'eda' tanëro, lëscan' deré yela' rnabé' quie bia guixi' bayatza gula, bia blé'eda' taorupe. Pues con ca mandado re'en bia nëro hue bia urupe, cana' rucaziba'. Caora na' bë'bia urupe mandado tzionla'adyi' yugulu ben' nita' lao yedyi layu bia nëro, bia beyaca hue' tu guichogue ta guti lëba'. ¹³ Lëscan' bëba' yela' milagro quieba' hasta ruquinoba' gui' guibá rguinon lao yedyi layu ta ilé'é ja bené' len. ¹⁴ Na'ra nun quie yela' milagro bë'bia urupe zaqué'lao bia nëro, cana' uzi'ba' yé' ja ben' nita' lao yedyi layu. Cana' bëba' mandado hue ja bené' tu ta naca forma quie bia nëro, bia zu hue' ga uchugu espada guichoba', pero beyacaba' zuba'. ¹⁵ Na'ra bia urupe bëba' yela' milagro quieba', bëba' mandado ta iné tu ta naca forma quie bia nëro ta huenan mandado gati ja ben' birionla'adyi' lënan. ¹⁶ Lëscan' bëba' itu mandado ta uzu tu sello quieba' zaqué' na'a yebé ja bené', o zaqué' z'gajé', la'acazi xcuidi', la'acazi ben' huaca, la'acazi ben' uña'a, la'acazi ben' yéchi', la'acazi ben' nada'o, la'acazi ben' libre. ¹⁷ Lëscan', chi nu ja ben' bizu sello quieba', o chi bizu laoba', o chi bizu número quie laoba', na'ra bisaque' ga'ojé' bi cosa, bisaque' yeyuti'jé' bi cosa. ¹⁸ Reya'ala' inezi nu ben' rioñe'e cabé' nan niga. Chi nacale ben' rioñe'e, ulelaba ca naca número quie lëbia guixi' bayatza gula. Lënumero na' nacan número quie tu be'mbyu. Cani naca número quieba': Xopa gayuhua tzona galo xopa naca número quieba'.

14

Rula tu gayuhua chopa galo tapa mila bené' tu canto cubi

¹ Na'ra ude na', una'a blé'eda' ben' naca ca quie beco' zi'ila'. Zënë' ga zu tu ya'a laona ya'a Sión. Zëlënë' tu gayuhua chopa galo tapa mila bené'. Blé'eda' zga ja ben' na' zu lao ben' naca ca quie beco' zi'ila', lëscan' zu lao xuziné'. ² Na'ra beda' ca tu rchi' yao ze gula uyézin guibá. Naca rchi'n ca tu rchi' yesa cati rëpin ratzon fuerte gula. Lëscan' naca rchi'n ca rchi' zé ja ben' ruxidyja ja arpa. ³ Caora na' beda' rula ja ben' na' tu canto cubi. Zëjé' zaqué'lao lao xlato Diuzi ga zu yaca ben' naca ca forma bia guixi' len ja ben' gula. Ni tu ja ben' tula biraca gula ca tacubi rula ja ben' na'. Tuzi ja ben' naca tu gayuhua chopo galo tapa mila, ja ben' psela Diuzi de entre ja ben' nita' lao yedyi layu, tuzi lëjé' racajé' rulajé' tu tacubi. ⁴ Ni tu lasa bigusilëjé' nigula binaca z'gulajé'. Bibi xquia napajé'. Na'ra rnaojé' ben' naca ca quie beco' zi'ila' con gatezi zioné'. Psela Diuzi lëjé' de entre ja ben' nita' lao yedyi layu cuenda gacajé' ben' nëro, ben' naca gun quie Diuzi lënë' ben' naca ca quie beco' zi'ila'. ⁵ Ni tu di'idza' huizi' yé' biunajé'. Ni tu xquia binapajé' zëjé' zaqué'lao lao xlato Diuzi.

Ni rnan quie di'idza' udixogue' tzona lao ángel ja bené'

⁶ Na'ra blè'èda' itu ángel rzënë' ladza gatzo guibá. Rguixogue'nè' ben' nita' lao yedyi layu xti'idza' Diuzi. Lèdi'idza' na' nacan tali tuzioli. Rguixogue'nè' ben' quie yugulute nación, len ben' quie yugulute ren, len ben' quie yugulute cue' di'idza', len ben' quie yugulute yedyi. ⁷ Caora na' una ángel na' zidzo gula unè' cani:

—Reya'ala' gapale Diuzi bala'ana huelenè' ben' ze, como dan' abdyin hora huenè' juicio. Reya'ala' tzionla'adyi'le Diuzi, ben' bè guibá, len yedyi layu, len nisadao', len ga rlè nisa.

⁸ Na'ra una itu ángel unè' cani:

—Aoca quie Babilonia, aoca quie Babilonia, porque naca ciudad Babilonia ca quie tu nigula ru'e ben' nita' lao yedyi layu vino ta yo'ojè' izudyijè' huelèjè' lèbè' tabayatza gula.

⁹ Na'ra una ángel uyune. Unè' zidzo gula unè' caniga:

—Con nu ben' tzionla'adyi' lèbia guixi' bayatza gula, o chi tzionla'adyi'jè' tu ta naca ca forma quieba', chan' hue'jè' lato su marca quieba' lao žgajè', o chi lao na'ajè', ¹⁰ caora na' hue Diuzi lèjè' tu castigo huala gula. Lega idza' Diuzi lèjè' biyeyèchi'la'adyi'nè' lèjè'. Huayejjè' conlè gui' len itu gui' ra'ala' laona azufre. Huayejjè' zaca'lao lao ángel quie Diuzi len ben' naca ca quie beco' zi'ila'. ¹¹ Huayasa dzen ga tzejjè' tuzioli. Yugu dza, yugu yela, bide huezila'adyi' quie ben' uyonla'adyi' lèbia guixi' bayatza gula len ben' uyonla'adyi' tu ta naca ca forma quieba', ben' bè' lato uzu marca quieba' cabè' laoba'. ¹² Quie lena' nu ben' naca ben' quie Diuzi, ben' ruz ca mandado ruenè', ben' nao xneza Jesús du guicho du la'adyi', reya'ala' cuezajè' dyè'èdi, reya'ala' gacajè' ben' de paciencia.

¹³ Na'ra beda' tu rchi' benè' uyèzin guibá. Unè' nè'èdi' caniga:

—Bzu lè'è guichi cabè' nia' caniga: “Huaca huen quie ben' baguti, ben' bè quie xti'idza' Diuzi. Desde na'a sulao huaca huen quiejè'.” Lèscan' una Bichi Be quie Diuzi cani: “Huaca huen quiejè'. Huezila'adyi'jè' abeyudyi cabè' dyin quie Diuzi bèjè'. Cabè' unaojè' quie Diuzi dza udajè' lao yedyi layu, lena' rulu'en nacajè' ben' quie Diuzi.”

Bezi' Diuzi cosecha quie yedyi layu

¹⁴ Na'ra una'a blè'èda' tu beo bezèri. Lao beo na' ure' tu ben' naca bichi yugulu benèchi'. Zu tu corona de oro guichonè'. Zënë' tu espada leco ta neduchi'tzague. ¹⁵ Na'ra bero itu ángel ga zu Diuzi guibá. Unènè' zidzo rulidzanè' ben' re' lao beo unè' caniga:

—Conlè espada leco quio' ichugulo' yeziu' cosecha, como dan' abdyin hora bara cosecha de lao yedyi layu. ¹⁶ Na'ra conlè espada leco quie ben' re' lao beo, uchugunè' bezi'nè' cosecha quienè' de lao yedyi layu.

¹⁷ Na'ra bero itu ángel ga zu Diuzi guibá. Zèrënë' itu espada leco ta neduchi'tzague. ¹⁸ Na'ra bero itu ángel ga zu ru'aba quie Diuzi guibá, ben' rnabè' quie gui'. Unènè' zidzo gula blidzanè' ben' zè espada leco ta neduchi'tzague rëbinè' lèbè' cani:

—Ichugo' ziza bedzuli' de lao yedyi layu como aranan.

¹⁹ Na'ra uchugo ángel na' ziza bedzuli' de lao yedyi layu. Uzi'nè' cosecha ziza bedzuli' bdze'nè'n lu'u pilo ta isinè' nisa quien. Cabè' guca quie ziza bedzuli', cana' hue Diuzi quie ja benè' dza huenè' juicio. ²⁰ Na'ra bzi ziza bedzuli' na' nisa quien ru'a yedyi na'. Caora na' bro ren zila gula ru'a pilo. Tanto bro ren ure'n tasiba ca tu sibi naca ru'a caballo. Cana' ure'n sibi tzona gayuhua kilómetro. Tu cana' ure'n yela' ze quien.

15

Nu'a ja ángel zelao gadyi castigo

¹ Na'ra blè'èda' itu seña taže guibá ta naca ta yebanero: Blè'èda' igadyi ángel nu'ajè' gadyi cue' castigo ta naca ga zelaozi gadyi castigo. Zelao na' iyudyi yela' rdza' quie Diuzi.

² Lèscan' blè'èda' tu ta naca ca nisadao', pero rna'n ca yaohuan ta yu'u gui'. Blè'èda' zè ja ben' lao nisadao' na', ja ben' uzue biuyonla'adyi'jè' lèbia guixi' bayatza gula. Lèscan' biuyonla'adyi'jè' tu ta naca ca forma quieba', bibèjè' lato sujè' número quieba' ta bigaca quieba' lèjè'. Napajè' arpa ta bè' Diuzi lèjè'. ³ Na'ra rulajè' tu ta bila Moisés dza na'. Lèscan' rularèjè' tu ta rula ben' naca ca quie beco' zi'ila' na'. Lena' rnan cani:

Yugulu ta bèlo' nacan tahuen gula, nacan ta yebanendo', Señor.

Diuzi quiendo' luè', naco' ben' de yugulute yela' huaca quie.

Puro tali, puro ta naca dugalo naca quio'.

Luè' rnabè'lo' yugulu nación.

⁴ Reya'ala' tzionla'adyi' yugulu ja benè' luè', Señor.

Reya'ala' hue yugulu ja benè' luè' ben' ze.

Tuzi luè' naco' ben' la'iya.

Huida yugulu ja ben' nita' lao yedyi layu ta tzionla'adyi'jè' luè', porque blè'èjè' ruelo' puro ta naca tali.

⁵ Ude beyudyi na', una'a blè'èda' neyalo idao' ga zu Diuzi guibá. Blè'èda' ru'aba ga nudze'jè' tabla yo ga zu di'idza' ley quie Diuzi. ⁶ Lu'u idao' na' bro igadyi ángel. Nu'ajè'

gadyi cue' castigo. Nacojè' la'ari' yèri gula ta raca titi'. Yu'u cinta de oro ru'achu'ujè'. ⁷ Na'ra blè'èda' tu ben' naca forma ca bia guixi' bè'nè' gadyi ángel tu huio copa de oro ta yudzo castigo huala gula ta hue Diuzi, ben' tu tuzioli. ⁸ Na'ra yela' huaca quie Diuzi bedza' dzen lu'u idao' quienè'. Na' nunu saque' tzu'u lu'u idao' na' tu bineyudyi hue Diuzi gadyi castigo ta nu'a gadyi ángel.

16

Ni rnèn quie gadyi copa yudzo castigo

¹ Na'ra beda' rchi' tu benè' unènè' zidzo gula lu'u idao' na'. Unè' rëbinè' gadyi ángel cani: —Uletzio uletzelato copa ta yudzo castigo huala gula quie Diuzi lao yedyi layu.

² Na'ra uyo ángel nëro yelatonè' copa quienè' lao yedyi layu. Caora na' yugulu ben' zu marca quie bia guixi' bayatza gula, ben' uyonla'adyi' tu ta naca forma quieba', ulè yèdzo' bërè' mala gula lèjè'. Lega castigo gula gucajè'.

³ Na'ra uyo ángel urupe yelatonè' copa quienè' lao nisadao'. Caora na' beyaca nisadao' na' ca ren quie ben' huati, lëscan' guti yugute bia yu'u neban lu'unan.

⁴ Na'ra uyo ángel uyune yelatonè' copa quienè' lu'u ja yao len ga rlè nisa lao yedyi layu. Caora na' beyaca nisa na' ca ren. ⁵ Lëscan' beda' unè' itu ángel, ben' rnabè' nisa de lao yedyi layu unè' cani:

—Tahuen gula ruelo' rchugobè'lo' quie ja benè'. Luè' naco' Diuzi, ben' la'iya. Luè' naco' ben' azucazi desde tiempote. ⁶ Nacan ta yu'u ni'a xnezi babè'lo' quiejè', como dan' bëtijè' blatojè' ren quie yaca ben' naca la'iya quio', blatojè' ren quie ben' uidxogue' xti'idzo' dza na'. Na'ra luè' bao' mandado yo'ojè' nisa ren na'a. Pues cana' reya'ala' gaca quiejè'.

⁷ Lëscan' beda' unè' itu ben' zu ru'aba unè' caniga:

—Xuzindo' Diuzi. Luè' naco' ben' de yugulute yela' huaca quie. Nacan ta yu'u ni'a xnezi cabè' babè'lo' baochugubè'lo' quiejè'.

⁸ Na'ra uyo ángel udape yelatonè' copa quienè' lao obidza. Caora na' bè' Diuzi lèbè' fuerza ta uzeinè' yaca ben' nita' lao yedyi layu. ⁹ Na'ra uyeitzaguejè', pero bibetza'jè' pensari quiejè', bibèjè' Diuzi ben' ze, den' ptasi bniolajè' Diuzi, ben' rue ca castigo raca quiejè'.

¹⁰ Na'ra uyo ángel ga'yo' yelatonè' copa quienè' lao xlato bia guixi' bayatza gula. Caora na' bega'n chula lato ga rnabè'ba', lëscan' udi'in ja benè' ludyijè' tanto ulajè'. ¹¹ Pero bibetza'jè' pensari quiejè' ta bira huejè' cabè' naca tamala ruejè', den' ptasi bniolajè' Diuzi, ben' zu guibá, nun quie dan' lega ulajè' uzujè' yedzo' bërè'.

¹² Na'ra uyo ángel xopa yelatonè' copa quienè' lu'u yao ze laona Eufrates. Caora na' beyu'e nisa quie yao na', beyacan layu bidyi cuenda uyalo tu neza ga ude ja soldado quie rey, ben' za' zaca' rlè ubidza.

¹³ Na'ra blè'èda' bro tzona bichi be mala nacajan forma ca quie'dzo'. Brojaba' lu'u ru'a bia guixi' snia gula, bia naca Satanás. Lëscan' brojaba' lu'u ru'a bia guixi' bayatza gula. Lëscan' brojaba' lu'u ru'a ben' rguixogue' di'idza' huezi' yè'. ¹⁴ Na'ra lèja bichi be mala na', nacajan bichi be quie taxi'ihui'. Ruejan seña, ruejan yela' milagro. Na' riojan retupajan ja rey, ben' nita' lao yedyi layu, ta yedupajè' tu dza bzu Diuzi, dza belatzegue, dza cati tilalajè' Diuzi, ben' de yugulute yela' huaca quie.

¹⁵ Na'ra una Jesucristo: “Gapale cuidado, porque tu sasazi yeguida' ba'ala'cazi raquele biyeguida'. Huaca huen quie ben' zu rbeza nè'èdi' cati yeguida', porque ben' birbeza nè'èdi', naca quienè' ca quie ben' rasi, ben' biracabè' tu sasazi idyin ben' uban zan yu'u quienè'. Huele listo cuezale nè'èdi' dyè'èdi' cuenda bigaca yela' stu' quiele cati idyin hora yeguida'.” Cana' una Jesucristo. ¹⁶ Caora na' betupa ja bichi be mala quie ja rey nita' lao yedyi layu tu lugar ga lao Armagedón di'idza' hebreo.

¹⁷ Na'ra uyo ángel gadyi yelatonè' copa quienè' ladzazi. Caora na' desde lu'u idao' zu guibá ga zu xlato Diuzi, na'te bro tu rchi' bene' unanè' caniga:

—Aoca.

¹⁸ Caora na' uyèpi yesa, gotzo bdyito hueziu', lëscan' guca uzu' fuerte gula. Na' lega psisin yedyi layu. Ni tu lasa binežu' fuerte gula cabè' uzu' huala gula guca. Tu lala nita' ja benè' lao yedyi layu, binegacacazi cana'. ¹⁹ Aodyiagui' lèyedyi belaotera, na' gucan tzona cue'. Aozuri' ja ciudad de lao yedyi layu. Caora na' beza'la'adyi' Diuzi quie ciudad Babilonia, ciudad belaotera. Bè Diuzi castigo huala gula quie ben' ciudad Babilonia nun quie lega bdza'nè' cabè' bè ja ben' ciudad na'. ²⁰ Lëscan' abeyula ga de yu bidyi lu'u nisadao', lëscan' abeyula yugulu ya'a. ²¹ Gusi' yo hueziu' yela gula guibá. Gusi'n lao ja ben' nita' lao yedyi layu. Naca yela' zi'i quien chopa galo kilo tu tun. Pero ptasi bniola ja benè' Diuzi nun quie dan' besi'nè' yo hueziu' gucajè' tu castigo huala gula.

17

Bè Diuzi castigo tu nigula bayatza, nigula ruti' gusto quie

¹ Caora na' bida tu ángel, ben' naca gadyi ben' yelato gadyi copa unanè' nè'èdi' caniga:

—Uda, ulu'ena' luè' cabè' castigo gaca quie nigula bayatza gula, nigula ruti' gusto quie, ben' re' lao nisadao'. ² Na'ra ja rey na', ben' nita' lao yedyi layu, bèlèjè' lè'nigula na' tabayatza gula, ta bireya'ala' huelèjè' lèbè'. Lèscan' ja ben' nita' lao yedyi layu, ahue'èjè' vino quienè' uzudiyè' bèrèjè' tabayatza gula ta bireya'ala' huelèjè' lèbè'.

³ Na'ra dyin quie Bichi Be quie Diuzi guca quia' ca ben' uxusa blè'èda' tu ángel uquiè'nè' nè'èdi' tu lao lato ga bidyia yu'u. Na' blè'èda' dyia tu nigula xcu'udzu tu bia guixi' nacaba' zna. Blè'èda' dyia laoba' di'idza' ta rutasi runioba' lao Diuzi. Blè'èda' zu gadyi guichoba', lèscan' dyia chi luzuba'. ⁴ Na'ra lè'nigula na' naconè' tu vestido naca culuri tamorado len tazna. Naca tza'onè' conlè oro, len yo tzaol, len perla. Lèscan' zènè' tu copa de oro ta yudzu ta naca bayatza gula cabè' bèlènè' ja be'mbyu. ⁵ Na'ra žga nigula na' zu letra rguixogue'n cabè' laohuè', pero negachi'zi naca laohuè'. Cani rnèn lè'è žganè': “Nè'èdi' laohua' Babilonia. Naca' zna' yugulu nigula bayatza, nigula ruti' gusto quie. Naca' zna' yugulu ta naca mala gula de lao yedyi layu.” ⁶ Na'ra blè'èda' raca tondo guicho nigula na' ca raca tondo guicho ben' zudyi. Raca tondo guichonè' nun quie dula' quienè' ulato ren quie ja ben' quie Diuzi, len ja ben' udixogue' xti'idza' Jesús. Pues dula' quienè' gutijè'. Caora blè'èda' ca naca quienè', lega bebaneda'. ⁷ Na'ra unè ángel na' nè'èdi' cani:

—¿Bixquien' lega rebanelo'? Na' uziõne'eda' luè' cabè' naca ta negachi' quie nigula na', len quie bia guixi', bia dyia nigula na', bia zu gadyi guichogue, bia naca chi luzu. ⁸ Lèbia guixi' blè'èlo', nacaba' bia uzu dza na'te, pero bira zuba' na'a, pero huaroba' lu'u pozo zitu' gula ga yu'uba'. Bè' yeyudyi na', te quieba' tuzioli. Huebane ja ben' nita' lao yedyi layu, ja ben' bizu laohue lu'u libro ta naca lista quie ben' de yela' neban quie tuzioli. Desde dza cati ure' dyilayu bizu laojè' lè'è lista. Huebanejè' cati ilè'èjè' lèbia guixi', bia uzu dza na'te, pero bira zuba' na'a, pero huaroba' yezuba' tatula.

⁹ Ni rnìa tu di'idza' para nu ben' tziõne'e len. Rnìa' lègadyi guicho bia guixi' rnèrèn quie gadyi ya'a ga dyia nigula na'. ¹⁰ Lèscan' lègadyi guichoba' rnèrèn quie gadyi rey. Na'ra quie ga'yo' rey na' abeyudyi bedu quiejè'. Itunè' rnabè'nè' na'a. Itunè' nerdzioguera idyin dza inabè'nè'. Cati idyin dza inabè' zelao ben' gadyi, biinabè'nè' zi dza. ¹¹ Na'ra lèbia guixi', bia uzu dza na'te, pero bira zuba' na'a, lèba' huaroba' gacaba' xuna rey. Entre लागuedy gadyi ben' rey, huaroba' gacaba' rey xuna, pero bè' yeyudyi na', te quieba' tuzioli.

¹² 'Quie lao chi luzuba' ta blè'èlo', lenan rnèrèn quie chi rey, ben' binesulao inabè'. Huacajè' rey, pero tu chi'zi inabè'jè' len lèbia guixi'. ¹³ Na'ra lao chi rey na' huazujè' de acuerdo ta hue'jè' lèbia guixi' na' yela' rnabè' quiejè' ta inabè'ba'. ¹⁴ Caora na' huadilalèjè' ben' naca ca quie beco' ži'ila', pero hue ben' naca ca quie beco' ži'ila' gan. Huenè' gan como dan' naquè' xan' yugulu ben' rnabè', lèscan' naquè' xan' yugulu ben' naca rey. Ulio Diuzi pserenè' yaca ben' naca ben' quienè'. Nacajè' ben' bipsan unao xnezè'.

¹⁵ Lèscan' una ángel na' nè'èdi' caniga:

—Nisadao' ta blè'èlo' gan' dyia nigula bayatza gula, nigula ruti' gusto quie, lena' rguixogue'n quie ja ciudad, len quie ja benè', len quie ja di'idza' len quie ja nación. ¹⁶ Na'ra quie chi luzu bia guixi' naca rey ta blè'èlo', lèyaca rey na' udiejè' nigula bayatza gula, nigula ruti' gusto quie. Usanla'adyi'jè' lèbè'. Hualèchojè' zabanè' ta tanè' du ga'ala' guidinè'. Lèscan' gaojè' bè'èla' zuba' quienè', na' uzejjè' cuerpo quienè'. ¹⁷ Cabè' re'en Diuzi gaca, cana' udze'nè' pensari lu'u guicho laxta'ojè' ta huejè' quienè' cabè' re'ennè', la'acazi biracabè'jè' chi Diuzi hue quiejè' cana'. Quie lena' huazujè' de acuerdo hue'jè' yela' rnabè' quiejè' lao na'a bia guixi' ta gacaba' rey inabè'ba' lèjè'. Cana' gaca quiejè' hasta izu di'idza' cabè' una Diuzi. ¹⁸ Na'ra lè'nigula na' blè'èlo', naquè' lèyedyi belaotera ga rnabè'jè' ja rey nita' lao yedyi layu.

18

Aoca quie ciudad Babilonia

¹ Na'ra ude beyudyi na', blè'èda' itu ángel, ben' detzague yela' rnabè' quie, uyèzinè' guibá. Na'ra tantozi naquè' raca titi', uyu'u xni' quienè' lao yedyi layu. ² Caora na' unè ángel na' zidzo unanè' caniga:

—Aoca quie Babilonia, aoca quie Babilonia. Naca Babilonia ciudad belaotera, pero abeyacan ciudad ga rda ja taxi'ihui'. Abeyacan ca beló ga yu'u yugu cue' bichi be mala. Abeyacan lidyí ja bia mala gula, bia rzè ladza, bia naca bayatza gula. ³ Cana' guca quie Babilonia, como dan' naca ciudad Babilonia ca quie tu nigula mala, nigula ruti' gusto quie. Ahue'e ben' quie yugulu nación vino quienè'. Bèlèjè' lèbè' tabayatza, ta bireya'ala' huelèjè' nigula. Lèscan' ja rey nita' lao yedyi layu, bèlèjè' lèbè' tabayatza gula, ta bireya'ala' huelèjè'

nigula. Lëscan' ja ben' yu'u huëti', ben' nita' lao yedyi layu, beyacajë' ben' uña'a gula nun quie dan' bërëljë' nigula na' tabayatza gula, ta bireya'ala' huelëjë' nigula.

⁴ Na'ra beda' tu rchi' itu ben' zu guibá. Unanë' cani:

—Le'e ben' naca ben' quia'. Ulero ciudad na' tacuenda bihuerële cabë' dula' xquia ruejë', ta bigaca quiele cabë' castigo gacajë'. ⁵ Tantozi baoye dula' xquia quiejë', una Diuzi abdyin dza huenë' lëjë' castigo. ⁶ Abdyin dza gaca nigula na' castigo lëbi ca castigo bënë' ja ben' tula. Chopa tantola huele nigula na' castigo quie cabë' tamala bënë'. Hue'le nigula na' ta yo'onë' chopa tantola ta naca sla' cabë' ta bënë' hue'e ja ben' tula. ⁷ Lëbizi ca bënë', bënë' cuinnë' ben' ze, lëbizi ca guquë' ben' uña'a nun quie bënë' tabayatza, cana' huele nigula na' castigo ta yedzagalaotzeguenë'. Cani rna nigula na' lu'u guicho laxta'onë': "Ni ri'a. Naca' ben' rnabë'. Binaca' nigula guti xquihue. Bisaca'yudyicaza'." Cana' rnanë'. ⁸ Quie lena' tu sasazi gata' castigo quienë'. Tu sasazi gata' yela' guti quienë'. Tu sasazi gata' yela' rla quienë'. Tu sasazi gata' yela' rdue quienë'. Na' huayeinë' conlë gui' como dan' naca Diuzi ben' de yela' huaca quie baochugulinë' quienë'.

⁹ Huabedyi ja rey, ben' nita' lao yedyi layu, ben' bëlë lëbë' tabayatza. Huabedyiya'jë' cati ilë'ëjë' rasa dzen ga reinë'. ¹⁰ Na'ra yega'n ja rey na' zitu' nun quie rdzebijë' cabë' castigo raca nigula na' inajë' caniga:

—¡Ay! ¡Bayëchi' gula raca quie ben' ciudad Babilonia! Ciudad ze, ciudad belaotera naca ciudad Babilonia, pero tu sasazi bla' castigo quiejë'.

¹¹ Lëscan' huabedyi ja ben' yu'u huëti', ben' nita' lao yedyi layu. Huabedyijë' nun quie aodyiagui' lëciudad na'. Huabedyiya'jë' como dan' bira nita' nu ja ben' ga'o ta nu'ajë' ruti'jë' ¹² ta nu'ajë' oro, ta nu'ajë' plata, ta nu'ajë' yo tza'o, ta nu'ajë' perla, ta nu'ajë' la'ari' fino gula taculuri morado len taculuri zna. Lëscan' bira nita' nu ja ben' ga'o ta nu'ajë' yugu cue' ja yaga rla' zixi zeo, ta nu'ajë' marfil, ta nu'ajë' yaga fino, ta nu'ajë' bronce, ta nu'ajë' guibá, ta nu'ajë' mármol. ¹³ Lëscan' bira nita' nu ja ben' ga'o ta nu'ajë' canela, ta nu'ajë' rchlnaza, ta nu'ajë' yalo, ta nu'ajë' aceite mirra len aceite tula ta rla' badan gula, ta nu'ajë' vino, ta nu'ajë' aceite olivo, ta nu'ajë' yezo fino, ta nu'ajë' trigo. Lëscan' nequie'jë' bia ru'a yua', nequie'jë' beco' zi'ila', nequie'jë' caballo, nusa'jë' carreta, hasta nequie'jë' benë' ta yeyuti'jë'. ¹⁴ Na'ra cani ina yaca ben' huëti' rëbijë' yaca ben' ciudad na':

—Bira de tazixi cabë' tazixi lega yaxele dza na'. Aode quie yela' uña'a quiele, aode quie tafino ta de quiele dza na'.

¹⁵ Na'ra ja ben' ruti'ja tana', ben' guca ben' uña'a nun quie bëjë' huëti' ciudad na', bira tziojë' ga'ala' ga re' ciudad na'. Huega'një' zitu' nun quie rdzebijë' quie castigo raca ja ben' ciudad na'. Huabedyijë' huaquejë' bayëchi'. ¹⁶ Cani inajë':

—¡Ay! ¡Bayëchi' gula raca quie ciudad na'! Guca ciudad na' ca quie tu nigula naco tu la'ari' fino de culuri morado len culuri zna. Guca ciudad na' ca quie tu nigula naca tza'o con oro, len yo tza'o, len perlas. ¹⁷ Pero tu sasazi aoniti yela' uña'a quienë'.

Na'ra yugulu ben' naca xan' barco, len ben' naca pasajero quiejë', len ben' rue dyin quie barco, len ben' huëti', ben' rse'ela' ja yua' quie ta tzion yedyi tula, caora na' bira tziojë' ciudad na' huega'një' zitu'. ¹⁸ Cati ilë'ëjë' rasa dzen rei ciudad na', na'ra huabedyiya'jë' inajë' caniga:

—¡Bira de ciudad belaotera ca ciudad niga!

¹⁹ Na'ra udze'jë' yu guichojë', huabedyijë' gaquejë' bayëchi', cuedyiya'jë', inajë' caniga:

—¡Ay! Bayëchi' gula raca quie ciudad na'. Conlë yela' uña'a quie ciudad na' beyaca ben' naca xan' barco ben' uña'a. Pero na'a tu sasazi aode quie ciudad na'.

²⁰ Pero le'e ben' zu guibá, len le'e ben' naca apóstol, len le'e ben' rguixogue' xti'idza' Diuzi, len le'e yugulu ben' naque quie Diuzi, reya'ala' yedaohuele cabë' guca quie ciudad na', como dan' castigo bë' Diuzi ciudad na'. Cana' apquizu Diuzi lëjë' cabë' tamala bëjë' quiele.

²¹ Na'ra blë'ëda' ulisa tu ángel hua'ala' tu yo ta naca ca yo ze cabë' ta rutujë' zuba'. Blë'ëda' uru'unnë'n lu'u nisadao'. Nani unë' cani:

—Lëbizi cabë' guca quie yo ze, cana' gaca quie ciudad Babilonia. Tu sasazi te quien, bira ilë'ë yaca benë' len. ²² Bira uxidyí ja benë' arpa, bira ucuedyi ja benë' flauta, bira ucuedyi ja benë' trompeta, bira huejë' música lao calle ciudad na'. Nitu nitu ben' hue dyin, bira inita'jë' ciudad na'. Bira gutu molino yo, ²³ bira useni' lámpara gui', bira gaca ru'be lani quie huetzagana' ciudad na'. Cana' gaca quie ciudad na' la'acazi ben' yu'u huëti' quie ciudad na', gucajë' ben' belaora lao yaca ben' nita' lao yedyi layu, pero uzi'jë' ben' quie yugulu nación yë' conlë yela' brujo quiejë'.

²⁴ Na'ra lëciudad na' nacan ciudad ga bëtijë' blatojë' ren quie ben' udixogue' xti'idza' Diuzi len yaca los demás ben' naque quienë'. Blatojë' ren quie yugulu ben' unao xneza Cristo.

19

¹ Na'ra ude beyudyi na' beda' rchi' ja ben' zë, ben' zu guibá, unëjë' zidzo gula caniga:

Naca Diuzi ben' ze.

Tuzi Diuzi quiero uselanë' ra'lo.

Tuzi Diuzi quiero de yela' bala'ana quienë'.

Tuzi Diuzi quiero de yela' rnabë' quienë'.

² Cana' naca quienë', como dan' rchugulinë' ta yu'u ni'a xnezi, rchugulinë' ta naca tali.

Pues aochugulinë' quie nigula bayatza gula, nigula ruti' gusto quië, nigula psëdi ja ben' nita' lao yedyi layu, na' bëjë' tabayatza gula cabë' psëdinë' lëjë'.

Bapquizu Diuzi lë'nigula na' cabë' bënë' bëtinë' ja ben' quie Diuzi.

³ Caora na' benajë' tatula:

—jNaca Diuzi ben' ze! Tuzioli raca dzen ga rei nigula na'.

⁴ Na'ra galobetapa ja ben' gula, len tapa ben' naca forma quie bia guixi, gutajë' uzu ru'ala layu uyonla'adyi'jë' Diuzi, ben' re' lao xlatogue. Na'ra unajë' cani:

—jCana' nacan! jNaca Diuzi ben' ze!

⁵ Na'ra beda' itu rchi' benë', ben' zu cuëta xlato Diuzi, unënë' caniga:

Huele Diuzi ben' ze, yugulu le'e ben' rue ca mandado ruenë'.

Huele Diuzi ben' ze, yugulu le'e ben' rionla'adyi' lëbë', len le'e ben' cuidi', len le'e ben' huaca.

Ni rnën quie lani quie huetzagana' quie ben' naca ca quie beco' zi'ila'

⁶ Lëscan' beda' itu rchi' ja ben' zë. Unëyaquë' cabë' rnë ja yao ze, lëscan' cabë' rnë bdyito hueziu' fuerte. Unajë' caniga:

jNaca Diuzi ben' ze!

Abdyin dza tuzi lëbë' rnabë'në'.

Naca Diuzi quiero ben' de yugulute yela' rnabë' quie.

⁷ Yedaohuetzeguero, suro gusto gula, hueronë' ben' ze, como dan' abdyin hora quie huetzagana' quie ben' naca ca quie beco' zi'ila'.

Azu nigula gaca zgulanë', rbezanë' utzagana'lënë' lëbë'.

⁸ Bë' Diuzi lëbë' la'ari' fino gula, la'ari' yëri gula, la'ari' raca titi' ta gaconë'.

Lëla'ari' fino gula rnën quie ben' naque quie Diuzi nun quie bë quiejë' ca re'en Diuzi huejë'.

⁹ Na'ra una ángel na' në'ëdi' caniga:

—Bzu di'idza' lë'ë guichi cani: “Tahun gula nacan quie ja ben' guida lani quie huetzagana' quie ben' naca ca quie beco' zi'ila'.”

Lëscan' unë' në'ëdi' cani:

—Cabë' di'idza' rnia' luë' nacan di'idza' quie Diuzi.

¹⁰ Na'ra uditzoga' ziba' lao ángel na' ta tzionla'adya' lëbë', pero unë' në'ëdi' caniga:

—Bihuelo' cana'. Tuzi Diuzi reya'ala' tzionla'adyo'. Nacaria' ben' rue bi mandado hue Diuzi në'ëdi' cabë' ruelo' luë', len ja ben' bicho', ben' rguixogue' xti'idza' Jesús. Pues nu ben' rguixogue' xti'idza' Jesús, yu'ujë' Bichi Be ca Bichi Be uyu'u ja ben' udixogue' xti'idza' Diuzi tiempote.

Ni rnan quie tu ben' dyia caballo bezëri

¹¹ Na'ra blë'ëda' uyalo guibá, blë'ëda' tu caballo bezëri dyia benë' lëba'. Na'ra ben' dyia lëba' laonë' cani: “Ben' ruzu di'idza', ben' rue puro tali.” Cana' laonë', como dan' puro ca re'en Diuzi huenë', cana' ruenë'. Cana' rnabë'në' rdilalënë' ben' raca condra Diuzi. ¹² Lëben' dyia caballo bezëri, na' yu'u yulaohuë' ca gui'. Yu'u guichonë' coron zë. Zu letra lë'ë coron quienë' cabë' laohuë', pero tuzi lëbë' nezinë' cabë' laonë'. ¹³ Na'ra naconë' tu la'ari' nela'lo ren. Lëscan' laonë': “Xti'idza' Diuzi.” ¹⁴ Na'ra unao yugulu ben' tu guibá ben' na'. Lëscan' nacojë' la'ari' fino gula, la'ari' yëri bezëri. Lëscan' dyiajë' ja caballo bezëri. ¹⁵ Bro tu espada neduchi' gula lu'u ru'a ben' na'. Conlë len rguinë' ja ben' quie ja nación nita' lao yedyi layu. Inabë'në' lëjë' zi'laza gula. Huachugulinë' quiejë' tali gula. Gaca quiejë' ca quie ziza bedzuli' ta blio ja benë' uzin. Yela' rdza' quie Diuzi, ben' de yugulute yela' huaca quie, huenë' lëjë' castigo huala gula. ¹⁶ Na'ra blë'ëda' zu letra lë'ë zabanë' len sunnë' ga rguixogue'n bi laonë'. Cani laonë': “Ben' rnabë'ra ca ja rey, ben' rnabë'ra ca ja ben' rnabë'.”

¹⁷ Na'ra blë'ëda' tu ángel nuliogue' lao obidza urediyi'a'në' fuerte gula guzinë' yugulu bia rzë ladza. Unë' caniga:

—Uleda, idupale ta gaole rtze' quie Diuzi. ¹⁸ Uleda ta gaole bë'ëla' zuba' quie ja rey, len quie ja xan' soldado, len quie ja ben' naca tzutzu huala, len quie ja caballo, len quie ja soldado dyia caballo, len quie ja ben' zë. Gaole bë'ëla' zuba' quiejë', la'acazi ben' libre, la'acazi ben' nada'lo, la'acazi ben' yëchi', la'acazi ben' belao.

¹⁹ Na'ra blë'ëda' lëbia guixi' bayatza gula, lëscan' blë'ëda' ja rey nita' lao yedyi layu len ja soldado quiejë'. Babedupajë' ta tilalëjë' ben' dyia caballo bezëri len ja ben' nao lëbë'. ²⁰ Na'ra ben' dyia caballo bezëri len ben' nao lëbë', bëjë' bia guixi' bayatza gula len ben' rguixogue' di'idza' huezi' yë' preso. Lëben' huezi' yë' naquë' ben' bë seña, bënë'

yela' milagro uzi'nè' yè' ja ben' bè lato uzu marca quie bia guixi' bayatza gula. Lèjè' uyonla'adyi'jè' tu ta naca ca forma quie bia guixi' bayatza gula. Na'ra ben' dyia caballo bezèri len ben' nao lèbè', uru'unjè' bia guixi' bayatza gula len ben' rguixogue' di'idza' huezi' yè' lu'u gui' ze naca ca lagun ga yu'u tu ta lao azufre ta lega ra'ala' gui'. Du nebanjè' aoru'unjè' lèjè' lu'u gui' na'. ²¹ Na'ra ben' dyia caballo bezèri bétinè' ja ben' bega'n, ben' naca rey len soldado quiejè'. Conlè espada neduchi' bero ru'anè', conlè len bétinè' lèjè'. Na'ra bla' ja bia rzè ladza udaojaba' bè'èla' zuba' quiejè' belojoba'.

20

Ni rnan quie tu mila iza

¹ Ude beyudyi na' blè'èda' uyèzi tu ángel guibá zènè' Zi'guiba quie pozo zitu' gula, lèscan' zènè' tu caden reo. ² Na'ra bèxonè' lèbia snia gula, bia naca ca bèla, bia naca xan' taxi'ihui' lao Satanás. Pquio ángel na' lèbè' lao tu mila iza. ³ Baoru'un ángel na' lèbè' lu'u pozo zitu' gula gan' psiogue' lèbè', lèscan' bzunè' tu sello ru'a puerta quie pozo na' tacuenda bira si'nè' ja ben' nita' lao yedyi layu yè' lao tu mila iza. Na'ra bè' aode lao tu mila iza, cana' yeguidè' itu chi'zi.

⁴ Caora na' blè'èda' re' yaca benè' lao xlatojè'. De yela' r nabè' quiejè' ta huejè' justicia. Lèscan' blè'èda' ja bichi be quie ja ben' guti dza na'. Aochugu benè' luba'jè' dza na' nun quie dan' unaojè' xneza Jesú udxogue'jè' xti'idza' Diuzi. Biuyonla'adyi'jè' bia guixi' bayatza gula. Lèscan' biuyonla'adyi'jè' tu ta naca forma quieba'. Bibèjè' lato su marca quieba' z'gajè'. Lèscan' bibèjè' lato su marca quieba' lao na'ajè'. Blè'èda' beban ja ben' na' ta inabè'jè' tu ze len Cristo lao tu mila iza. ⁵ Pero ja los demás ben' huati, bibebanjè' hasta aode lao tu mila iza. ⁶ Naca huen gula quie ben' beban tanèro. Nacajè' ben' la'ya quie Diuzi. Tuzioli bigata' castigo quiejè', den' huacajè' pxuzi quie Diuzi len Cristo. Inabè'jè' tu ze len Cristo lao tu mila iza.

⁷ Bè' aode tu mila iza, na'ra bero Satanás lu'u ga yu'unè' neyeyonè'. ⁸ Huaronè' ta tzexi'nè' yè' ja ben' nita' lao yedyi layu. Huazi'nè' ben' quie nación Gog len ben' quie nación Magog yè'. Huatupanè' lèjè' ta huejè' dila. Tantozi naca soldado quiejè' ben' zè gula, una'n ca quie yo zo re' ru'a nisadao'. ⁹ Na'ra bedza'jè' lao yedyi layu, uyèchojè' ga negu'udi' ja ben' quie Diuzi, ta inaro uyèchojè' lèciudad nedyè'è Diuzi. Pero na'ra pchezi Diuzi gui' guibá ta bzeinan lèjè' beyudyi bedu. ¹⁰ Caora na' uru'un Diuzi xan' taxi'ihui', ben' uzi'yè', lu'u gui' ze naca ca lagun ga yu'u azufre ta lega ra'ala' gui'. Ga uru'un Diuzi lèbia bayatza gula, len lèben' udxogue' di'idza' huizi' yè', lègan' na' uru'un Diuzi xan' taxi'ihui'. Lègan' na' ilatzeguejè' du dza, du yela, tuzioli.

Ga rue Diuzi juicio quie ben' mala

¹¹ Na'ra blè'èda' xlatu Diuzi ta naca bezèri. Blè'èda' nu ben' re' laona. Nun quie re' ben' na' xlatoguè', aode quie ladza, aode quie dyilayu duzetén. Ni ilè'èti'n bira bega'n. ¹² Na'ra blè'èda' ja ben' huati, ben' huaca len ja xcuidi', zèjè' zaquè'lao lao Diuzi. Na'ra usaløjè' ja libro len itu libro ga yu'u lista quie ben' de yela' neban quie tuzioli. Caora na' uchuguli Diuzi quie ja ben' huati cabè' bèjè' segùn ca rnèn lè'è ja libro na'. ¹³ Na'ra blè'èda' abedupa ben' zè, ben' huati. Abedupa ben' guti lu'u nisadao' len ben' guti con gati'tezi gan' zujè' rbezajè'. Uchuguli Diuzi quiejè' cabè' bèjè'. ¹⁴ Caora na' aode quie yela' guti, aode quie gui' gabila. Beyudyi bedu quien uy'u'un lu'u gui' naca ca lagun. Na'ra quie nu ben' tzu'u lu'u gui' ze naca ca lagun, biyeyudyi yedu gaca castigo quiejè' tuzioli. ¹⁵ Uy'u lu'u gui' naca ca lagun nu ben' bizu laoje lu'u libro ga yu'u lista quie ben' de yela' neban quie tuzioli.

21

Bade tu guibá cubi len tu dyilayu cubi

¹ Na'ra ude beyudyi na', blè'èda' bazè tu guibá cubi len tu dyilayu cubi. Abeyula guibá gula len dyilayu gula. Lèscan' bira de nisadao'. ² Nè'èdi', Juan, blè'èda' bayèzi tu ciudad la'ya, tu ciudad Jerusalén cubi. Bayèzin guibá ga zu Diuzi. Banaca ciudad na' dya'a gula cabè' dya'a gula naca la'ari' naco nigula caora idyín be'mbyu ta utzagana'lènè' lèbè'. ³ Na'ra beda' rchi' benè' guibá, rnènè' zidzo gula cani:

—Una'cara, bazu Diuzi ga nita' ja benè'. Huazunè' len lèjè' tu ze. Huacajè' ben' quienè'. Cuin Diuzi huazunè' len lèjè' ta nacanè' Diuzi quiejè'. ⁴ Bihue Diuzi lato gaca tamala quiejè'. Bira gatijè', bira cuedyijè', bira gaca bayèchi' quiejè', bira ilajè', como dan' aode quie yugulu tagula, babeyulan.

⁵ Na'ra una Diuzi, ben' re' lao xlatogue, unènè' cani:

—Una'cara, tacubi reyua' yugulu ta de.

Lèscan' unè' cani:

—Bzu di'idza' lè'è guichi cabè' rnia', como dan' cabè' rnia' nacan ta sudyi'ilèlo'.

⁶ Ude beyudyi na' unē' nē'ēdi' cani:

—Babia' cabē' unia' hua'. Lao na'a uzulaohua' ulēcha' yedyi layu. Lēscan' lao na'a yeyudyi yedu quie yedyi layu. Naca' ca quie letra A len letra Z quie abecedario. Con nu ben' rbili nisa, nē'ēdi' hua'jē' nisa yo'ojē', bibi si'a quien. Nisa zila rlē ta hua'jē' yo'ojē'. Nu ben' yo'o nisa hua'jē', nebanjē' tuzioli. ⁷ Lēscan' nu yaca ben' sue biusanla'adyi' xneza', gaca quiejē' tadya'a gula cabē' unia' gaca quiejē'. Huaca' Diuzi quiejē', na' huacajē' zi'ina'. ⁸ Pero cabē' gaca quie ben' rdzebi inao xneza', ben' bibē' quie xti'idza', len ben' bē tabayatza, len ben' bēti benē', len ben' udalē ja nigula binaca žgule, len ben' bē yela' brujo, len ben' uyonla'adyi' ja idolo, len yugulu ja ben' huezi' yē', lējē' naca quiejē' tziojē' lu'u gui' naca ca lagun ga yu'u tu ta lao azufre ta lega ra'ala' gui'. Cana' gata' castigo quiejē' tuzioli.

Huayēzi tu ciudad Jerusalén cubi guibá

⁹ Na'ra bida tu ángel, ben' nacaja gadyi, ben' zē ja gadyi copá ta yudzo zelao gadyi castigo bē Diuzi dza na'. Na'ra unanē' nē'ēdi' cani:

—Udacara, ulu'ena' lu'ē' cabē' naca nigula, ben' utzagana'lē ben' naca ca quie beco' zi'ila'.

¹⁰ Na'ra dyin quie Bichi Be quie Diuzi, guca quia' ca quie ben' uxusa. Blē'ēda' tu ángel uquiē'nē' nē'ēdi' tu lao ya'a ze naca sibi gula. Na' blu'enē' nē'ēdi' lēciudad ze, ciudad naca la'ya, ciudad Jerusalén ta za' guibá ga zu Diuzi. ¹¹ Na' raca titi'n ca raca titi' ga zu Diuzi. Raca titi'n ca raca titi' yo' tzao' gula, ca raca titi' yo' jaspe rna'n ca yaohuan. ¹² Ru'a lao ciudad na' zu tu besu ze gula nacan tasibi ta dyian chipchopa puerta. Na'ra zu tu huio ángel ru'a ja puerta na'. Lēscan' lē'ē ja puerta na' zu letra cabē' lao tu huio ja ben' Israel quie chipchopa familiajē'. ¹³ Zu tzona puerta zaquē' ga rlē obidza. Lēscan' zu tzona puerta zaquē' norte, lēscan' zu itzonan zaquē' sur, lēscan' zu itzonan zaquē' ga reyen obidza. ¹⁴ Na'ra uzulao besu quie ciudad na' lao chipchopa' yo nacan laga'. Lēscan' lē'ē yo na' zu tu huio lao ja apóstol quie lao chipchopajē', ben' naque quie ben' naca ca quie beco' zi'ila'.

¹⁵ Na'ra lēángel na', ben' bēllēnē' nē'ēdi' di'idza', zēnē' tu ta naca ca huenixi' de oro ta urixinē' ciudad na', len ja puerta quien, len ja besu quien. ¹⁶ Blē'ēda' lēciudad na' nacan cuadrado. Nacan yela' tona quien lēbizi len yela' laga' quien. Caora na' bixi' ángel na' ciudad na' blē'ēda' nacan tu gayuhua legua. Tu lēbizi nacan yela' tona quien len yela' sibi quien len yela' laga' quien. ¹⁷ Lēscan' bixi' ángel na' besu quien blē'ēda' tu gayuhua chopá galo tapa žicho yela' laga' quien, según ca rurixi ja benē' como dan' cana' bixi' ángel na' len.

¹⁸ Blē'ēda' naca besu quien de yo jaspe. Lēscan' lēciudad na' nacan puro de oro rna'n ca yaohuan yēri gula. ¹⁹ Lē'ē yo naca laga' ga uzulao besu na', yu'un yugu cue' yo' tzao'. Na' yo laga' nēro, yu'un yo jaspe. Na' yo laga' urupe, yu'un yo safiro. Na' yo laga' uyune, yu'un yo ágata. Na' yo laga' udape, yu'un yo esmeralda. ²⁰ Na' yo laga' ga'yo', yu'un yo ónice. Na' yo laga' xopa, yu'un yo cornalina. Na' yo laga' gadyi, yu'un yo crisólito. Na' yo laga' xuna, yu'un yo berilo. Na' yo laga' ga, yu'un yo topacio. Na' yo laga' chi, yu'un yo crisoprasa. Na' yo laga' chiptu, yu'un yo jacinto. Na' yo laga' chipchopa, yu'un yo amatista. ²¹ Na'ra quie chipchopa puerta na' nacajan de tu huio perla quie quien. Lēscan' naca calle belao quie ciudad na' de oro puro. Rna'n ca yaohuan yēri gula.

²² Biblē'ēda' nitu idao' bizu lao ciudad na' como dan' cuin Diuzi, ben' de yugulute yela' huaca quie, zunē' lao ciudad na' len ben' naca ca quie beco' zi'ila'. ²³ Lēscan' birnaban tzu'un xni' obidza ni xni' biu' ciudad na', como dan' cuin Diuzi len ben' naca ca quie beco' zi'ila' rseni'jē' nacajē' gui' quien. ²⁴ Nun quie xni' quie ciudad na', hualē'ē ja ben' quie ja nación ta tajē' neza quiejē'. Huida ja rey lao ciudad na' ta gapala'njē' Diuzi. ²⁵ Na'ra bireyeyo ja puerta quie ciudad na' te dza. Bira rala lao ciudad na'. ²⁶ Lēscan' huida ja benē' quie quie nación lao ciudad na' ta huejē' Diuzi ben' ze gapala'njē' lēbē'. ²⁷ Pero yaca ben' mala, len yaca ben' hayatza, len yaca ben' huezi' yē', bisaque' tzu'ujē' lao ciudad na'. Tuzi ben' zu laohue lē'ē lista zu lu'u libro napa ben' naca ca quie beco' zi'ila', tuzi lējē' huazaque' tzu'ujē' lao ciudad na'. Lēlibro na' nacan ga yu'u lao ja ben' de yela' neban quie tuzioli.

22

¹ Na'ra blu'e ángel na' nē'ēdi' tu yao nacan nisa dya'a gula raca titi'n ca yaohuan yēri gula. Lēnisa na' ru'en yela' neban. Na'ra rero nisa na' ga re' xlato Diuzi len ga re' xlato ben' naca ca quie beco' zi'ila'. ² Lēscan' lao tao' calle belao quie ciudad na', de tu yao yēri gula. Itzala' huio yao na', zu ja yaga ru'e yela' neban. Rbia ja yaga na' tazixi quien chipchopa lasa tu iza, ta inaro, tu lasa tu biu'. Lēxla'aga' ja yaga na' nacan remedio ta iyaca ja ben' quie ja nación. ³ Na'ra bira nudze'de' Diuzi nitu ben' zu lao ciudad na'. Lēscan' huazu xlato Diuzi len ben' naca ca quie beco' zi'ila' lao yedyi na'. Huayonla'adyi' yaca ben' quienē' lēbē'. ⁴ Hualē'ējē' ru'alao Diuzi. Badyia letra žgajē' cabē' lao Diuzi. ⁵ Na'ra bira rala lao ciudad na'. Lēscan' yaca ben' zu lao ciudad na', bira inaban useni'n gui' ta ilē'ējē', bira inaban useni' ubidza gan' zujē', como dan' cuin Diuzi useni'nē' gui' quiejē' ta ilē'ējē'. Caora na' inabē'jē' tuzioli.

Baruen bago dza yeguida Cristo

⁶ Na'ra una ángel nē'ēdi' cani:

—Nacan di'idza' li ta babelo'. Nacan ta sudyi'ilēlo'n. Caora na' use'ela' Diuzi tu ángel quienē' ta ulu'enē' ja ben' quienē' cabē' ta baza' gaca. Naca Diuzi ben' rudze' Bichi Be quienē' lu'u guicho laxta'o ja ben' rguixogue' xti'idzē' ta gacalēnē' lējē' cabē' inajē'.

⁷ Na'ra tanun quie Cristo una ángel cani:

—Baruen bago dza yeguida'.

¡Huaca huen quie ja ben' ruzēnaga cabē' di'idza' rguixogue' libro ni!

⁸ Nē'ēdi', Juan, beda' blē'ēda' cabē' blu'e ángel na' nē'ēdi'. Caora cati beyudyi beda' blē'ēda' cana', caora na' uditzoga' žiba' lao ángel na', ben' blu'e nē'ēdi' cana', ta tzionla'adya' lēbē'.

⁹ Caora na' unē' nē'ēdi' cani:

—Bihuelo' cana'. Nacaria' ben' rue mandado quie Diuzi cabē' luē', cabē' ben' bicho', ben' rguixogue' xti'idza' Diuzi, len yugulu ben' ruzēnaga cabē' di'idza' zu lē'ē libro niga. Tuzi Diuzi reya'ala' tzionla'adyo'.

¹⁰ Lēscan' unē' nē'ēdi' caniga:

—Biucacho' con cabē' rna di'idza' zu lē'ē libro niga, como dan' baruen bago dza su di'idza' gaca con cabē' rnan lē'ē libro ni. ¹¹ Psan quie ben' mala. Huegarajē' seguir huejē' cabē' tamala quiejē' ruejē'. Psan quie ben' rue tabayatza. Huegarajē' seguir huejē' cabē' tabayatza quiejē' ruejē'. Pero ben' rue tahuen, huegarajē' seguir huejē' tahuen. Lēscan' ben' naca la'iya, ben' quie Diuzi, huegarajē' seguir gaca la'iyarajē'.

Na'ra tatula una ángel tanun quie Cristo, unē' cani:

¹² —Tali na' baruen bago dza yeguida'. Huaguizuga' ja benē' cabē' naca ta bējē'. ¹³ Naca' ben' zu tuzioli. Lao na'a uzulaohua' ulēcha' yedyi layu. Lēscan' lao na'a yeyudyi yedu quie yedyi layu. Naca' ca quie letra A len letra Z quie abecedario.

¹⁴ Huaca huen quie ben' rguibi žabe cuenda gata' derecho quiejē' ta gaojē' tazixi rbia yaga ru'e yela' neban. Cana' huazaque' tzu'ujē' lu'u ru'a puerta quie ciudad na'. ¹⁵ Pero bisaque' tzu'u ja ben' birue quie Diuzi, bisaque' tzu'u ja ben' rue yela' brujo, bisaque' tzu'u ja ben' rdalē ja nigula binaca žgule, bisaque' tzu'u ja ben' ruti benē', bisaque' tzu'u ja ben' rionla'adyi' ja ídolo, bisaque' tzu'u ja ben' raxe rue huezi' yē'.

¹⁶ —Nē'ēdi', Jesús, aose'ela' ángel quia' ta quixogue'nē' yugulu cabē' unia' niga lao ja ben' nao xneza'. Naca' ži'isuba rey David. Naca' ca bélo' raza titi' quie bala.

¹⁷ Na'ra cani una Bichi Be quie Diuzi len nigula utzagana'lē ben' naca ca quie beco' ži'ila':

—Rbezando' yeguido', Señor Jesús.

Lēscana' cani una nu ben' ruzēnaga cabē' di'idza' zu lē'ē guichi ni:

—Rbezando' yeguido', Señor Jesús.

Lēscan' huen guida nu ben' rbili nisa, nu ben' re'en guida yo'o nisa ta ru'e yela' neban. Biquizuga'jē' ta yo'ojē'n.

¹⁸ Na'ra inia' le'e, ben' ruzēnaga cabē' di'idza' zu lē'ē libro ni: Chi utza' benē' di'idza' ni, huejē'n di'idza' falso, hue Diuzi lējē' ja castigo cabē' rguixogue'n lē'ē libro niga. ¹⁹ Lēscan' chi užēchi'jē' con cabē' rna di'idza' zu lē'ē libro niga, bihue' Diuzi lato si'jē' parte quiejē' quie yaga ru'e yela' neban. Lēscan' bihue'nē' lato tzu'ujē' lu'u ciudad naca la'iya cabē' rguixogue'n lē'ē libro niga.

²⁰ Na'ra Jesús, ben' naca testigo quie di'idza' zu lē'ē libro niga, unanē' cani:

—Baruen bago dza yeguida'.

Na'ra nē'ēdi', Juan, rnia' cani:

—Gaca cana'. ¡Rbezando' yeguido', Señor Jesús!

²¹ Rulidza' Señor quiero Jesucristo ta huela'iyane' le'e yugulule. Amén.